

BILITA MONONDOK MATIUS MO PELENGGENE

PANGANTOKON

Kitab Matius pelenggene doi kita Bilita Monondok baikon Yesus yanamo ko Tomundo Pasalamat Mian Bisa mo dandikene. Lolo doi Yesus doiyamo Mian Bisa tealikene oila komo lapamo yana dondiikene doi kitab Paladandian Tumbeno lalomo doi naumat. Mau kai Yesus nasinuung luwedoi Yahudi miano tukon tubo buno Yahudi miano, bai Bilita Monondokoo bolikon kai tongo tuuk bangsa Yahudi bai tuuk doi sasaibino kodunia.

Kitab Matius nia monondok kona sinusunan; inatambuun tukon doi Yesus nasinuungan, doibundu mansauan paisu salani tukon palasobaan kaliangano natinoupi, maka nabalimangan kaliangano doi Galilea. Idoe yana mongotunggul, tukon aline komian moseselon. Lapa doiya kitab nia salitayo Yesus naampakonan luwedoi Galilea taus doi Yelusalem, tukon oila komo teali doi Yesus doi minggudoo lalomo napupusan kona tuboan nai dunia nia lalomo komo babasal tuuno doi namatean tukon natuboan.

Daano komeeng kolangge mo teali utama doi Matius doiyamo baikon Yesus daano Gulu babasal, otunggukene baikon ko Mian Bisa mapalenta, buno Tomundo. Yesus koidan daano kona kuasa momoola alatikangene koalatino luwedoi Mian Bisadoo Naatulan. Badaang kai Yesus napingotungguloo inobos-obos loingiyo kona pokok-pokok. Daano kolima kotambuno: (1) Pongotunggul doi bunggo motuuk doi lenggang, kawajiban, haak-haak tukon tuboan motuuk doi Mian Bisa naumat (pasal 5-7); (2) Otinau-otinau doi songulo lua kopololaing-pololaing Yesus sulano naampakonggene kotugas (pasal 10); (3) Andean-andean Mian Bisa namapalentaan buno Tomundo (Pasal 13); (4) Otunggul alatino doi tealian pololaing Yesus (pasal 18); tukon (5) Otunggul doi loonu napupusan tukon Yesus nalubatan koluano luunggon (pasal 24-25).

Antoko

Naluwean Yesus Klistus tukon nasinuungan 1:1-2:23

Yohanes Pasau Mian nalimang 3:1-12

Mansauan paisu salani tukon palasobaan doi

Yesus 3:13-4:11

Yesus baleleani doi Galilea miano 4:12-18:35

Luwedoi Galilea taus doi Yelusalem 19:1-20:34

Minggu napupusan doi Yelusalem tukon

potikunggon 21:1-27:66

Yesus natuboaan tukon naokitakanano kobutongo 28:1-20

Yesus Klistus nambumbu natinulisan

(Luk. 3:23-38)

1 Naiyamo Yesus Klistus nambumbu natinulisan, Daud natulunan, Abalaham natulunan. Doi Abalaham polong doi Daud, Yesus natulunan kopai sambuno naiyamo:

^{2-6a}Abalaham, Ishak, Yakub, Yehuda tukon utus-utuso bailong, Peles tukon Zelah (kotinanoila kosambuno Tamal), Hezlon, Lam, Aminadab, Nahason, Salmon, Boas (kotinano Lahab), Obed (kotinano Lut), Isai, tukon Tomundo Daud.

^{6b-11}Doi Daud polong doi tembono bangsa Israel nainaisonan doi Babel totulis kopai sambuno naiya:

Salomo (kotinano Ulia baluno), Lehabeam, Abia, Asa, Yosafat, Yolam, Uzia, Yotam, Ahas, Hizkia, Manasye, Amon, Yosia, Yekhonya tukon utus-utuso.

¹²⁻¹⁶Doi tembo bangsa Israel nainaisonan doi Babel polong doi Yesus natosuungan totulis kopai sambu sambuno naiyamo:

Yekhonya, Sealtiel, Zelubabel, Abihud, Elyakim, Azol, Zadok, Akhim, Elihud, Eleasal, Matan, Yakub, Yusuf Malia nalangkai.

Tukon doi Malia doiyamo komo suunge Yesus mo binantil Klistus.

¹⁷Jadi lengget doi Abalaham polong doi Daud, sasaibino daano songulo sangkap koingat kona luwean kobanggapi. Luwedoi Daud polong doi tembo kobangsa Israel nainaisonan doi Babel daano kosongulo sangkap koingat. Doi tembono

bangsa Israel nainaisonan doi Babel polong doi Klistus natosuungan daano koikoidan songulo sangkap koingat kona luwean kobanggapi.

Yesus Klistus nasinuungan

(Luk. 2:1-7)

¹⁸Buno naiya kosalitano Yesus Klistus natosuungan. Kotinano doiyamo Malia pobibianggon tukon Yusuf. Bai yanila akiyoon napobaba, tokita Malia tianano. Yusuf aki natoiyu Malia natiananan moteali tukon Mian Bisa Na Loh nakuasa. ¹⁹Yusuf dona bibianoo, daano meeng komian mo sidutu loingiyo koagama atulano. Tobikon doiya yana yase ebetele kona pobibianggonan, bai aki nabantil-bantile sulano Malia aki namalaat maa doi mian madaang. ²⁰Sodo Yusuf pikipikikene doiya langgedoo, yana olumon doi namooloan. Doi naolumonoo, yana kitayo komeeng do Temenenodoo namalaekat mo bantil doi yana, “Yusuf natulunan Daud, inai momatakut mopobabakene Malia, sabab do paudoo natiniananggon doiya teali tukon Mian Bisa Na Loh nakuasa. ²¹Malia yana suunge meeng kopau malaneno. Do paudoo sio musombuikene Yesus, sabab yanamo komo salamatene kobanggapi doi nalalim.”

²²Sasaibino doiya teali sulano nateali indee ko Temeneno nabinantil mopinolonggon doi nanabi, doiyamo, ²³“Meeng kopau boine yana tianan tukon mosuung meeng kopau malaneno. Do paudoo sinombuikon Imanuel.” (Immanuel silingan Iblani koalatio, “Mian Bisa daano polaing kita”.)

²⁴Sambuno Yusuf sosumbu doi namooloan, yana kubaiyo indee do Temenenodoo namalaekat nabinantil doi yana. Yana pobabakene Malia, ²⁵bai kalu Malia akiyoon nasuunge do napaudoo, Yusuf aki namoola pokoloi tukon Malia, tukon kalu do paudoo sosuungo, Yusuf sio nasombuikene Yesus.

Mian-mian molubat doi Tolopot

2 Yesus nasinuungan doi kota Betlehem doi lipu Yudea doiya kosinggatoo Helodes nabapamalentaan. Doiya kosinggatoo daano komoimoiya komian mopandoiy kitayo komandala doi tolopot motokita doi Yelusalem. ²Yanila mansadai doi indee indee komiano, “Inaando kai do paudoo, . mo sosuung teali

Yahudi miano natomundo? Kami kitayo komandalano sumbut doi tolopot taalikon, tukon kami lubat mososubaiyo yana.”

³Sambuno Tomundo Helodes lengele langgedoo, yana masaingding tuuno, bunomo lakon sasaibino ko Yelusalem miano. ⁴Maka yana sumboliiyo koimam kapalano tukon gulugulu agama Yahudi miano nalubat pototongi. Maka sadaiyo doi yanila, “Doi naando kona tosuungan do Tomundodoo Mian Bisa mo paladandikene?”

⁵Yanila timbiliyo, “Doi kota Betlehem doi lipu Yudea. Baikon sabab buno naiya daano komeeng konabi motulise,

⁶ ‘Komuyu Betlehem miano, doi lipu Yehuda, komuyu tutuuno bolikon mian mo poi-poisik doi mian bailong doi kota-kota moutama doi Yehuda.

Sabab luwedo koomo naikon kona lubatan komeeng kokatua naikon mo katuayo daku umat Israel.’ ”

⁷Sambuno lapa malaat do katalanganoo, Helodes uange domianoo mopandoiy mokita mandala doi tolopot tukon laasiakanggene. Maka yana sadaiyo doi yanila indee kosinggato do mandaladoo natambunan tokita. ⁸Sambuno lapa doiya yana sumboliiyo yanila ampakon doi Betlehem tukon bateteba, “Poampakono, poumbale do paudoo tukon monomonondok tukon kalu komuyu posuungenemo yana, pobontiikanaku, sulano mau yaku kutaus sosuba doi yana.”

⁹⁻¹⁰Maka yanila ampakono, yanila kitayo koidan domandaladoo napai kinita loolukonoo doi tolopot taalikon. Buka maen konapoo laba-labaan padungga yanila mokitayo do mandaladoo! Do mandaladoo loolukoniyo yanila, maka natade potimbang doi paudoo nadungolan bunggono. ¹¹Yanila usok doi bonuadoo lalomo yanila kitayo do paudoo tukon tinano Malia. Yanila tootukuiyo tukon sosubaiyo do paudoo, maka yanila bukayo konapo mangabosan buat, tukon mososubakon doi Yesus, mosoni, kemenyaan, tukon pobilat. ¹²Mian Bisa ingotiikene yanila doi napoo monii lalomo inai napo abali doi Helodes. Jadi yanila mule loloiyo kololoon bailong.

Dampas doi Mesil

¹³Sambuno do mianoo mopandoiy mokita mandala paloosano tauso, do Temenenodoo namalaekat batokitakon doi Yusuf



Kamanggian batango pangano (2:11)

doi namonii lalomo. Malaekatoo bantile, “Helodes kona tetel umboliiyo do paudoo sulano naakateyo. Tobikon doiya banguno, babayo do paudoo tukon tinano podampas doi Mesil. Podungolo imbali tukon mototiili nadaano daku bantilan koidan doi komuyu.”

¹⁴Yusuf polaing bangun, tukon do popookoo yana taus babayo do paudoo tukon tinano yanila dampas doi Mesil.

¹⁵Yanila dungol doi Mesil sampe Helodes mate.

Bunomo doiya kona tealian indee komo lapamo Temeneno bantile lolo doi nanabi mopelengene, buno naiya, “Yaku uange daku Pau doi Mesil.”

Labuk-labuk nainakatean

¹⁶Sambuno Helodes toiyo baikon do mianoo mopandoiy mokita mandala paloosano doi tolopot taalikon yanila mokalalakaiyo yana, yana nggimal tuuno. Maka yana bintekene sulano nainakate sasaibino kopau-pau malaneno mo umul lua

kotaum doi bilit doi Betlehem tukon kampung-kampung bailong mopokolanikon. Doiya pokokonoi do mianoo mopandai mokita mandala paloosano nabantilano yana molaate tembono do mandaladoo natokitaan.

¹⁷Bunomo doiya kona tealian indee komo sidutu Nabi Yelemia bantile doiyamo,

¹⁸ “Doi Lama tololongol komandaungan alalo,
kobebean tukon kokiilan.

Lahel mandaungene kona labuk-labuk;
yana aki nayase inoluuliy
sabab dona labuk-labuk kiyono.”

Abali luwedoi Mesil

¹⁹Sambuno Helodes mate, Yusuf daano doi Mesil meeng do Temenenodoo namalaekat batokita doi Yusuf doi namonii lalomo. ²⁰Malaekato bantile, “Domianoo mo yase akateyo do paudoo yana matemo. Tobikon doiya banguno, babayo do paudoo koidan tukon tinano poabalimo doi Islael.” ²¹Yusuf bangun maka kanggiyo do paudoo tukon tinano yanila abali doi Islael.

²²Boobus doibundu Yusuf lengele Alkelaus, Helodes namalane soboliyomo kotamano moteali tomundo doi Yudea. Jadi Yusuf matakut komo ampakon indaa. Sambuno yana malaat pongotunggul molobian doi Temeneno doi namonii, yana ampakon doi meeng kolipu doiyamo Galilea. ²³Idoo yanila dungol doi meeng kolipu mo sinombuikon Nasalet. Tobikon bunomo doiya maka teali indee komo lapamo nabi-nabi bantile kokaliangano do paudoo: “Yana binantil Nasalet miano.”

Yohanes Pasau Mian naotunggul

(Mlk. 1:1-8; Luk. 3:1-18; Yoh. 1:19-28)

3 Doiyamo kosinggato Yohanes Pasau Mian lubat doi pandang lalomo doi Yudea tukon yana bangotunggul. ²“Po badodoloon doi polalim-lalim,” kona bantilano, “sabab ko Mian Bisa loolanimo kona mapalentaan pokakana ko Tomundo!” ³Yohanes naiyamo komiano Nabi Yesaya naminakisuuti doi nabasilinganan,

“Daano komian mobantil-bantil doi padang lalomo,
 ‘Sadiayo kololoon motuuk doi Temeneno,
 keseayo kololoon motuuk doi yana.’”

⁴Yohanes mapake unta buluno mokinubai pakean, kona pokoot oako unta kulito, tukon kona kinaan betek tukon ani dokoto. ⁵Badaang komian doi Yelusalem, doi sasaibino komian doi kota Yudea tukon mian badaang doi lipu napokolanikonan ko Paisu Yoldan lubat doi Yohanes. ⁶Yanila anggayo Yohanes nabantilan tukon yanila akuiyo konapoo lalim-lalim, maka Yohanes sauwo yanila doi Paisu Yoldan.

⁷Badaang koidan ko Falisi tukon Saduki miano molubat doi Yohanes sulano yanila nasinau. Bai donapo lubatanoo yana kitayo yanila tolongo kakaadukon, yana bantile doi yanila: “Komuyu mian lokis! Indee komo bantile baikon komuyu tongosodii doi Mian Bisa naukuman naikon mo lubat? ⁸Okitakangene tukon pokokubai koidan komuyu molapamo badodoloon doi polalim-lalimoo. ⁹Inai poaangene komuyu momalaat tongosodiiyan doi Temeneno naukuman tukon komuyu bantile baikon Abalaham daano mbai katulunan. Neneeke, mau nabatu-batu nia Mian Bisa moola kubaiyo nateali Abalaham nakatulunan! ¹⁰Oloang lapamo tasadia sulano natinape kokayung polong doi alo-alono. Meeng kokayung mo akiyo kosaono mo monondok sio natinape tukon sinakukon doi aung. ¹¹Yaku sauwo komuyu tukon paisu teali meeng kotandano baikon komuyu lapamo badodoloon doi polalim-lalimoo; bai naikon komo lubat nalapa yaku, yana sauwo komuyu tukon Mian Bisa Na Loh tukon aung. Yana lobian babasal kona kuasa tukon yaku. Mau natolongo yaku babayo kona sapatu bai yaku aki namomoola. ¹²Doi limano daano kokiapan sulano nalilike sasaibino kogandum polong nabilisii. Kogandum pinototongikon doi longgo bai kokalupaso sasaibino sinua doi aung lalomo mo akiyo kona posoan.”

Yesus sinau

(Mlk. 1:9-11; Luk. 3:21-22)

¹³Doiuya kosinggatoos Yesus ampakon doi Galilea doi Paisu Yoldan. Indaa yana lubat doi Yohanes tukon kabiyo nasinau. ¹⁴Bai Yohanes akiyengene dona kakabidoo. Yohanes bantile,



Israel miano nakabiasaan looluk alasano kogandum tukon batango (3:12)

“Yaku komo moola Tama nasauwo. Bai doiya budodoo Tama komo lubat doi yaku.”

¹⁵Bai Yesus timbiliyo, “Tealikenemo naiya, baikon kalu buno naiya konda kubaiyomo sasaibino ko Mian Bisa nainiyas.” Sambuno buno doiya Yohanes sauwomo Yesus.

¹⁶Sambuno lapa sinau, Yesus kosobiton sumbot doi paisudoo lalomo. Baino sosinggot kotimbu tobuka maka Yesus kitayo Mian Bisa Na Loh obulus pokakana kotomisi lapatiing potimbang doi yana. ¹⁷Boobus doiya yana lengele ko Mian Bisa alalo mobantil, “Naiyamo daku Pau Yaku mo seange, yana sanaangene konoangu.”

Yesus sinobai*(Mlk. 1:12-13; Luk. 4:1-13)*

4 Doibundu Mian Bisa Na Loh lolainge Yesus doi padang lalomo sulano nasinobai Ibiliis. ²Sangkap kolono kooloyo sangkap kolono kopopook Yesus aki nakaan. Maka yana lasayo malaalo. ³Ibiliis lubat tukon bantile, “Ikoo Mian Bisa Napau, bolikon? Ah, sumboliyo nabatu-batu nia nateali loti.”

⁴Yesus timbiliyo, “Doi Kitab Moliyous lalomo daano mototulis: Kobanggapi tubo aki natolongo loti, bai samba-samba ko Mian Bisa nabantilan momoola tubo.”

⁵Lapamo doiya Ibiliisoo babayo Yesus doi Yelusalem, kota momoliyous tukon abese yana doi Temeneno Nabonua loungo. ⁶Maka Ibiliisoo bantile doi yana, “Ikoo Mian Bisa Napau, bolikon? Tobikon doiya okotuwong doi tano; sabab doi Kitab Moliyous lalomo daano mototulis buno naiya,

‘Mian Bisa sumboliyo kona malaekat-malaekat molabete ikoo, yanila labete ikoo tukon limanoila, sulano koaimu naaki natodumbakon doi batu.’ ”

⁷Yesus timbiliyo, “Bai doi Kitab Moliyous lalomo daano mototulis koidan, ‘Inai mosobaiyo komu Temeneno Mian Bisa.’ ”

⁸Boobus koidan Ibiliis babayo Yesus doi bunggul mo tatandak tuuno tukon otudoikene doi yana sasaibino batomundoan doi dunia tukon sasaibino kona kaasaan. ⁹Maka Ibiliisoo bantil doi Yesus, “Sasaibino naiya yaku beekonggon, kalu ikoo tootuku tukon sosubaiyo yaku.”

¹⁰Yesus timbiliyo, “Dampas ikoo, he Penggoda! Doi Kitab Moliyous lalomo totulis: Sosuba doi Temeneno, komu Mian Bisa, tukon leleaniyo yana!”

¹¹Doibundu Ibiliisoo tinggalemo Yesus, tukon malaekat-malaekat lubat moleleaniyo yana.

Yesus atambuune kona limang doi Galilea*(Mlk. 1:14-15; Luk. 4:14-15)*

¹²Sambuno Yesus ndongoliyo baikon Yohanes inusokono doi talunggu, Yesus dampas doi Galilea. ¹³Yana tinggale ko

Nasalet, maka dungol doi Kapelnaum doi Paisu Galilea bibilo doi Zebulon tukon Naftali nalipu kinuasai. ¹⁴Tobikon Yesus nakubaiyo do langgedoo, sulano nateali indee kolobono mo lapamo Nabi Yesaya bantile:

¹⁵ “Zebulon nabuta tukon Naftali nabuta,
loloon doi danau, doi Paisu Yoldan sembeleng,
Galilea bolikono Yahudi miano nabuta!

¹⁶ Bangsa mo tubo doi kalipookan lalomo
monggita madialan mo motoontilang!

Mo dungol doi matean lalomo
lapamo sumbut kopanah momadialan!”

¹⁷Doiya kosinggatoo Yesus atambuunemo kona bantilano, “Po badodoloon doi polalim-lalim, baikon ko Mian Bisa mosobito mapalenta bunu Tomundo!”

Yesus uange sangkap kotolosabang

(Mlk. 1:16-20; Luk. 5:1-11)


¹⁸Yesus daano moampakon doi Paisu Galilea bibilo, yana kitayo lua komian mosabang, doiyamo Simon (mo sinombuikon Petulus) tukon utuso piyoto Andelias. Yanila daano momalako ikan doi paisudoo tukon buani. ¹⁹Yesus bantile doi yanila, “Mai polaingaku. Yaku otunggule komuyu pobuani banggapi.” ²⁰Polaing yanila otinggale konapo buani maka yanila mololo Yesus.

²¹Yesus ampakon momeenggon, maka yana kitayo koidan kolua komian motolutus bailong doiyamo Yakobus tukon Yohanes, Zebedeus nalabuk-labuk. Yanila tukon tamano daano mopoototongi doi duangan lalomo mokindendeke konapo buani. Yesus uange yanila koidan, ²²tukon yanila polaing tinggale kotamano tukon napo duangan, maka yanila malaing Yesus.

Yesus mongotinau, bangotunggul tukon aline komian

(Luk. 6:17-19)

²³Doi Galilea, Yesus boilingiyo kokampung-kampung sasaibino tukon bangotunggul doi samba-samba kobonua kaleda. Yana basalitakene ko Bilita Monondok baikon ko Mian Bisa naikon mapalentamo tukon yana koidan aline ko mian-mian mo masakit tukon moseselon. ²⁴Bilita tentang Yesusdoo tololongol doi



Tolosabang doi Danau Galilea (4:18)

sasaibino kokampung-kampung doi Silia, tobikon doiya badaang komian molubat doi yana. Yanila babayo badaang komian mo seselon doi bula-bulaa kosesel kaliangano tukon susaan. Badaang ko mian-mian mo inusoki ibiliis, mo seselon kotonotoko, tukon mo lapit, sasaibino Yesus aline. ²⁵Badaang tuuno komian mo malaing Yesus doiya kosinggato. Daano komo lubat doi Galilea, daano komo doi Songulodoo Kokota, doi Yelusalem, doi Yudea, tukon daano koidan komo luwedo tano Yoldan sembeleng.

Otunggul doi bunggul

5 Sambuno Yesus kitayo do mianoo momadaang, yana liba doi bunggul bungbukono. Sambuno yana osulang, kona pololaing-pololaing lubat doi yana, ²maka yana atambuune kona otunggul doi yanila:

Monondokan mo bisa

(Luk. 6:20-23)


- 3 “Kinatauwan doi mian mo toupiyo kotalalaisan bai tolongo bataani doi Temeneno tolong; yanila daano anggota Mian Bisa naumat.
- 4 Kinatauwan doi mian mo poloon konoano; Mian Bisa hibule yanila!
- 5 Kinatauwan doi mian mo kependeyo konoano; Mian Bisa daanokene kona paladandian doi yanila!
- 6 Kinatauwan komian mo polonggene molakukene ko Mian Bisa namongiasan; Mian Bisa naikon akambule yanila!
- 7 Kinatauwan komian mo seange komian bailong; Mian Bisa naikon seseange yanila koidan!
- 8 Kinatauwan komian mo molios konoano; yanila naikon komo tingoniiyo ko Mian Bisa!
- 9 Kinatauwan komian mo babayo kopaladamean doi antala banggapi; Mian Bisa naikon akuiyo yanila salaku nalabuk-labuk!
- 10 Kinatauwan komian mo mandalita sakisaawan sabab molakukene ko Mian Bisa namongiasan; yanila daano anggota Mian Bisa naumat!
- 11 Kinatauwan kai kalu komuyu sinosiboli, sinakisaa, tukon binaloobukon sabab yaku. 12 Nabi-nabi mo tubo loolukon akiyoon nadaano komuyu yanila lapamo sinakisaa buno doiya. Potedes-tedes tukon polaba-laba, sabab babasal kopo tambo Temeneno mo sadiayo tuuk doi komuyu.”

Tumuson tukon madialan

(Mlk. 9:50; Luk. 14:34-35)

13 “Komuyumo kotumuson dunia. Kalu kotumuson tealimo matabal, minolakon kai nakinotamo koidan? Akiyono kai kona totuuk, baino kai inaison tukon mian tudo-tudongiyo.

14 Komuyu komadialan dunia. Kota mo tangabos doi bunggul bungukono aki namoola tosookon. 15 Akiyo komian mo suayo kona posi, maka nakukupe posidoo tukon dulang. Bai yana



Posi tukon gumbang doi loolukoo (5:15)

naikon abese dona posidoo doi posi abosano, sulano kolaango natokita momeeng komian doi bonuadoo lalomo. ¹⁶Bunomo lakon doiya komu madialan sio natokita doi mian salaano, sulano yanila kitayo komu kokubaidoo mo monondok, maka nggaale ko Tamamu doi sulugaa.”

Otunggul tentang atulan agama Yahudi

¹⁷“Inai poaanggene baikon yaku lubat sulano kuakiyenggene Musa naukum tukon nabi-nabi naotunggul. Yaku lubat bolikon moakiyenggene, bai sulano kuotudoikene koalatino natutuuwan. ¹⁸Poneneeke! Makalumbit kotimbu tukon buta daanoon, meeng kohuluf kai titik mo poipoisik doi atulanoo lalomo, aki naikon nainakiyonggon, kalu sasaibino akiyoon nateali! ¹⁹Tobikon doiyamo indee komiano komo lupaiyo komeeng do tetebadoo, mau nabaino mo poipoisik, tukon otunggukene kotulano bailong kubaiyo bunoo doiya koidan, maka yana teali komo poipoisik doi Mian Bisa naumat. Bai koikoidan, indee komo ampakonggene do tetebadoo tukon otunggule komian bailong sulano nakubaiyo

buno doiya koidan, naikon teali babasal doi antala Mian Bisa naumat. ²⁰Tobikon, poneneeke: Komuyu aki nateali Mian Bisa naumat, kalu komuyu akipo liisiyo kogulu-gulu agama tukon Falisi-falisi miano doi kubaiyano ko Mian Bisa namongiasan!”

Otunggul tentang nggimalan

(Luk. 12:57-59)

²¹“Komuyu toiyo baikon doi nda mbumbu talaat kootunggul buno naiya: Inai momangakate; indee komo mangakate, sio nainadili. ²²Bai doiya budodoo yaku bantile doi komuyu, indee komo nggimoliiyo kotulano bailong, sio nainadili; tukon indee komo sangele kotulano bailong, yana inadili doi Pangadilan Agama. Tukon indee komo bantile kotulano bailong, ‘Bongakon’ pantas nasinakukon doi aung nalaka lalomo. ²³Tobikon doiya, kalu daano komeeng komian motaus sosubakene kona sosubakon doi Mian Bisa, maka neneeke baikon daano komian mo abos noa doi yana, ²⁴siokai yana naotinggale looluk dona sosubakonoo doi balabaan salaano, maka nataus loolukon podame tukon do mianoo. Lapa doiya moolamo nasula maka nasosubakene kona babeean doi Mian Bisa.

²⁵Ande-ande kalu daano komian mokalaakene komuyu doi pangadilan agama, popodame tukon yana modaano kotembono mo akiyoon napolong doi pangadilan agama. Kalu aki, do mianoo beekene komuyu doi pamalenta, koidan beekene doi polisi, maka do polisidoo usekene komuyu doi talunggu lalomo. ²⁶Tukon poneneeke: Bisa komuyu aki ponggoola tobuat doi talunggudoo lalomo, kalu akiyoon nakabus komu nggimalan.”

Doi basinduwaan

²⁷“Komuyu toiyo daano kootunggul buno naiya: Inai mobasinduwa. ²⁸Bai budodoi ya yaku bantile doi komuyu: indee komiano komo mbalenge komeeng koboine tukon kuetene, doiya mianoo basinduwa doi noano lalomo. ²⁹Kalu komatamu bakalingano lubatene kolalim, suwete tukon sakukenemo! Tadukai nalapus komeeng koanggota doi butomu kalu baino sasaibino kobutomu sinakukon doi nalaka lalomo. ³⁰Kalu limamu bakalingano lubatene kolalim, tadukai mupatele tukon

musakukene do limamudoo! Tadu naakiyo kolimamu sembeleng kalu baino sasaibino kobutomu inusokon doi nalaka lalomo.”

Doi pobauntalan

(Mat. 19:9; Mrk. 10:11-12; Luk. 16:18)

³¹“Daano koidan kootunggul bunu naiya: doi mian mo bauntale kona boloki, sio nabeena sulat pobauntalan doi yana. ³²Bai doiya budodoo yaku bantile doi komuyu: indee komiano komo bauntale kona boloki bai dona boloki aki namasala, mokubaiyo dona boloki basinduwa, kalu dona boloki osowaan koidan. Bai indee komiano komo kilayo do boinedoo mo binauntal pokakana yana basinduwa koidan.”

Doi basumbaan

³³“Komuyu toiyo doi nda tulunan talaat kootunggul bunu naiya: inai motinggale koteteba. Indee komo lapa ikoo tetebakene tukon basumba doi Mian Bisa salaano, sio mukubaiyo. ³⁴Bai doiya budodoo yaku bantile doi komuyu: inai pobasumba, mau doi timbu, sabab kotimbu Mian Bisa nakulusii batomundoan, ³⁵mau buta sakean, sabab kobuta sakean Temeneno napoombosii aino; kai tukon Yelusalem, sabab doiya Tomundo kota mobabasal. ³⁶Inai koidan mobasumba tukon bantile koolumu, sabab ikoo aki munggoola kubaiyo komu buuk nateali mbombol kai mopook mau natongo soisik. ³⁷Tongo ikoo bantile, ‘Oode’ kai ‘Aki’ – kalu lobiano doiya kona lubatan doi Ibiliis.”

Otunggul doi basabalian

(Luk. 6:29-30)

³⁸“Komuyu toiyo daano kootunggul bunu naiya: mata sinoboli mata, ngolingo sinoboli ngolingo. ³⁹Bai budodoiya yaku bantile doi komuyu: inai posoboliyo kokiitan doi mian mo kubaiyo komuyu kulokis. Kalu komian tapiyo kopapaimu bakalingano, tadikenemo natapiyo kopapaimu bobono koidan. ⁴⁰Tukon kalu daano komian mokalaakene komuyu doi pamalenta, tukon yanila kabiyo komu bokukum, beekene koidan

5:30: Mat. 18:8, Mlk. 9:43 5:31: Kuai. 24:1-4, Mat. 19:7, Mlk. 10:4 5:32: Mat. 19:9, Mlk. 10:11-12, Luk. 16:18, 1Kol. 7:10-11 5:33: Masam. 19:12, Bang. 30:2, Kuai. 23:21
5:34: Yak. 5:12, Yes. 66:1, Mat. 23:22 5:35: Yes. 66:1, Saad. 48:2 5:38: Teal. 21:24, Masam. 24:20, Kuai. 19:21

komu jubah. ⁴¹Kalu meeng kopamalenta pakisaayo komuyu tanggungge kona langge meeng kokilo kona kodoon tanggungemo napolong lua kokilo. ⁴²Kalu daano komian momangkabi komu langge-langge, beena yana, tukon inai moakiyenggene komian mo yase masabol mulangge.”

Seseange komu musu

(Luk. 6:27-28, 32-36)

⁴³“Komuyu toiyo daano koidan kootunggul buno naiya: seseange kotula-tulamu tukon pomositene kopoo musu-musu. ⁴⁴Bai doiya budodoo yaku bontiikene komuyu: poseseseange kopoo musu-musu, tukon posambeangene komian mo sakisaayo komuyu, ⁴⁵sulano komuyu teali Tamamu napau-pau doi sulugaa. Sabab ko Mian Bisa osumbete kona oloyo tuuk doi mian mo monondok kona kokubai tukon tuuk doi mian mo kulokis kona kokubai. Mian Bisa lubatene kona udan tuuk doi mian mo kubaiyo kolangge motalakan tukon tuuk koidan doi mian mo kubaiyo kolangge molokis. ⁴⁶Sabab kalu komuyu tolongo seseange komian mo seseange komuyu, indee kona tealian, ko Mian Bisa mosio nasabaliyo domu kokubaidoo? Bolikon kai mau pakabi lulu yanila kubaiyo buno doiya? ⁴⁷Tukon kalu komuyu tolongo mebee poanggaan doi tula-tulamuyu moanggayo komuyu, indee kai kona monondokan? Mau mian mo aki natingoniiyo ko Mian Bisa yanila toiyo kubaiyo buno doiya! ⁴⁸Tamamu doi sulugaa mamasikene sasaibino komian tukon monondok. Komuyu sio pobuno doiya.”

Otunggul doi basadakaan

6 “Poneneeke, inai pokubaiyo kosipatanano koagama doi mian badaang sulano mian nakitayo. Kalu komuyu kubaiyo buno doiya, komuyu aki pomalaat tambo doi Tamamu modaano doi sulugaa.

²Jadi kalu komuyu mebee sadakaa doi mian motalalais, inai pobantil-bantile doiya posadakaadoo pokakana komian momunafik nakokubai, yanila yase kubaiyo doiya doi kaledaan lalomo tukon doi loloon mobabasal sulano komian nggaale. Poneneeke, yanila lapamo talimayo konapoo tambo. ³Bai komuyu, kalu komuyu mebee sadakaa po beekene tukon inai

pobantil-bantile, sulano naakiyo komian mo toiyo. ⁴Tinggalemo do pokokubaidoo naakiyo komeeng komian motoiyo, tolongo Tamamu doi sulugaa. Yana kitayo domu kokubaidoo mo tosookon tukon beena tambo doikoo.”

Otunggul doi sambeangan

(Luk. 11:2-4)

⁵“Kalu komuyu sambeang, inai pomoloingikon bunu mian mo kakaadukon. Yanila yase sambeang tukon kokondong doi bonua kaledaan tukon doi loloon bibilo sulano mian nakitayo. Poneneeke, doiya konapoo tambo lapamo yanila talimayo. ⁶Bai kalu komuyu sambeang, pousok doi kombiang tukon pobatataapikon, maka posambeang doi Tamamuyu Temeneno mo aki natokitadoo. Maka Tamamu mo kitayo komu kokubaidoo motosookon yana beena tambo doikoo.

⁷Kalu komuyu sambeang, inai poulang-ulange bunu mian mo aki natingoniiyo ko Temeneno. Yanila aanggene donapoo kakabidoo linongol sabab donapoo sambeanganoo mo bulusan. ⁸Inai pomoloingikon yanila. Tamamu lapamo toiyo indee komo lapamo komuyu kabiyo, mau naakiyoon pokabiyo. ⁹Jadi posambeang bunu naiya:

‘Tamanggami doi sulugaa:

Ikoomo ko Mian Bisa mo Meeng.

Boliisi ikoo musinosubai tukon muinodotii.

¹⁰ Ikoomo kombai Tomundo.

Boliisi ikoo mumapalenta doi dunia
tukon komu mongiasan linoingikon bunu doi sulugaa.

¹¹ Beena mo doi kami kinaan oloyo nia
kami mo palaluuwe.

¹² Ompuniyomo kami luwedoi mai salaan,
pokakana kami molapamo ompuniyo komian
mo daano kona sala doi kami.

¹³ Inai mobatadikene nalapus kombai maanggaan doi tembo
nasinobaiyan kami,
bai osodiiyo kami doi Ibiliisoo nakuasa.
[Ikoomo ko Tomundo mo balakuasa tukon monondok
polong sidutu-posidutukon. Amin.]’

¹⁴Kalu komuyu ompuniyo komian mo salakene komuyu, Tamamu doi sulugaa ompuniyo kopoo sala. ¹⁵Bai kalu komuyu aki poompuniyo komian bailong nasala Tamamu doi sulugaa koidan aki naompuniyo kopo salaan.”

Otunggul doi bangapataian

¹⁶“Kalu komuyu bangapatai inai poboli-boliyo kodudusomuyu buno mian mo kakaadukon. Yanila boli-boliyo kopai duduso sulano sasaibino komian toiyo yanila bangapatai. Poneneeke, doiyamo konapoo tambo lapamo yanila talimayo. ¹⁷Bai kalu komuyu bangapatai, kumesio kodudusomuyu tukon posiduwo kopo buuk, ¹⁸sulano akiyo komian mo tingoniiyo baikon komuyu modaano mobangapatai, tolongo Tamamu mo aki natokitadoo komo toiyo. Yana kitayo domu kokubaidoo tukon beena tambo doikoo.”

Buat doi sulugaa

(Luk. 12:33-34)

¹⁹“Inai poatambune kobuat motuuk doi butomuyu doi dunia nia, koeaka tukon atak momoola manase tukon pondikuk lubat moola ndikuke. ²⁰Tadukai poatambune kobuat doi sulugaa, koeaka tukon atak moaki namoola manase, tukon pondikuk aki nalubat mondikuke. ²¹Sabab inaando domu buato idoomo konoamu.”

Madialan tuuk doi butonggita

(Luk. 11:34-36)

²²“Matanggita daano komeeng kodial doi butonggita. Kalu komatamu bilisii, sasaibino kobutomu madialan. ²³Bai kalu komatamu songgoliiyon, sasaibino kobutomu kalipookan. Jadi do lampudoo doi butomu lalomo kalipookan, bulaando kona kulokisan do kalipookanoo!”

Mian Bisa maka buat

(Luk. 16:13, 12:22-31)

²⁴“Akiyo komeeng komian momoola balimang doi lua komian nabalimangan. Sabab yana lobian seseange komeeng tukon domeengoo. Kai yana lobian kona loingiyano doi

nabalimanganoo meeng tukon domeengoo. Bunomo lakon doiya komuyu. Komuyu aki pomoola balimang motuuk doi Mian Bisa tukon motuuk doi buat koidan.

²⁵Tobikon doiya poneneeke; inai posasaaki doi potuboan, doiyamo indee kopoo kinaan tukon ininum, kai indee komo komuyu pakeyo. Bolikon kai kotuboan lobian doi ndemel, tukon butonggita lobian doi pakean? ²⁶Pokitayo kotomisi doi dapang yanila aki napoo basakakon, aki napoo balonggokon tukon aki namangabos kinaan doi longgo. Mau nabuno doiya Tamamu doi sulugaa pialayo yanila! Bolikon kai komuyu lobian odoon koanggano tukon dotomisidoo? ²⁷Indee kai doi komuyu mo tukon nasasaakian momoola okobulusane kona umul mau nabaino soisik?

²⁸Bulaando komuyu momboingene kobapakean? Pokitayo kobunga-bunga mo tubo doi padang. Bunga-bungadoo aki nabalimang tukon aki nabatonun; ²⁹mau Tomundo Salomo mo buno doiya kona kaasaan, aki namapake pakean mo tambongan mobuno do bunga-bungadoo! ³⁰Bulung doi padang tubo oloyo nia bai namodoa sinua kabus. Bai ko Mian Bisa pialayo do bulungoo buno doiya kona monondokan. Baino kai komuyu! Bai komuyu akinduung pomaangga! ³¹Inaikai pomboing tukon pobantile, 'Indee naikon konda kinaan', kai 'indee naikon konda ininum', kai 'indee naikon konda pinake'? ³²Langgedoo doiya sidutu binuluk doi mian-mian mo akiyoon natingoniiyo ko Mian Bisa. Bai ko Tamamu doi sulugaa toiyo doiya sasaibino komuyu mopalaluuwo. ³³Tobikon umbale loolukon sulano ko Mian Bisa nakuasaiyo komu tuboan tukon kubaiyo kona mongiasan. Maka sasaibino kolangge-langge bailong Mian Bisa beekene doi komuyu. ³⁴Tobikon doiya, inai pomboing doi modoa koono. Sabab komodoa koono daano koidan kona mboingan susuungo. Oloyo nia lapamo kona susaan, mau naakimo nasinuungi koidan."

Doi palesaano komian

(Luk. 6:37-38, 41-42)

7 "Inai mosalakene kotulamu bailong, sulano komuyu koidan aki Mian Bisa naasalakene. ²Sabab bunomo lakon komuyu asalakene komian bailong, bunomo doiya lakon ko

Mian Bisa asalakene komuyu. Tukon bantilan mosala komuyu mobantile doi tulamuyu bailong, doiya Mian Bisa abalinggene tuuk doi komuyu. ³Bulaando komuyu kitayo kokayung puputo mokiyoto doi utusomu matano, bai kokayung mopopong doi matamuyu akipo palatikangene. ⁴Bulaando komuyu momoola bantile doi utusomuyu, 'Mai kulate kokayung puputodoo mopoipoisik doi matamu,' bai doi matamu lalomo daano kokayung motopopong. ⁵Eh mian mokakaadukon! Liate looluk kokayung motopopong doi matamu, maka musodo kitayo tukon tingoniiyo, tukon moolamo muliate kokayung puputo mokiyot doi utusomu matano.

⁶Inai mobeekene kolobo mo moliyous koasu, sulano do asudoo naaki naabali tukon buluke ikoo. Tukon inai mobeekene komu mutiala doi babung, sulano do babungoo naaki nabaino tudongiiyo do mutialadoo."

Kabiyo, umbale, tukon ketuuke

(Luk. 11:9-13)

⁷"Mangkabimo, sulano komuyu binee. Umboliiyo sulano komuyu malaat. Ketuuke sulano kotataapon binukakon tuuk doi komuyu. ⁸Sabab komian mo mangkabi yana binee; komian mo moumbal yana malaat; tukon mian mo mokotuuk, binukakon kotataapon. ⁹Doi komuyu nia kai daano komeeng kotamamuyu mo beena batu kona pau, kalu yana mangkabi loti? ¹⁰Kai beena binda, kalu mangkabi ikan? ¹¹Mau komuyu polokis, komuyu toiyo beekene komo monondok doipo labuk-labuk. Baino kai ko Tamamuyu doi sulugaa! Yana lobian monondok doi mian mo mangkabi langge doi yana.

¹²Pokubaiyomo kolangge monondok doi mian bailong bunomo lakon komuyu yase yanila kubaiyo kolangge momonondok doi komuyu. Doiyamo koantoko Musa naatulan tukon nabi-nabi naotunggul."

Tataapon mo madipot

(Luk. 13:24)

¹³"Usoko mololoi tataapon mo madipot, sabab tataapon tukon loloon mo loloiyo konalaka babasal tukon bebelan, tukon badaang komian mo loloiyo. ¹⁴Bai madipot tukon maaling



Anggul saono (7:16)

kotataapon tukon loloon mo babayo komian doi tuboan. Tukon tolongo soisik komian mo malaat.”

Batango tukon saono

(Luk. 6:43-44)

¹⁵“Pobaingotii doi nabi-nabi moaki natalakana. Yanila lubat doi komuyu konoano pokakana kodomba bai yanila kona bisaan pokakana koseligala mo balani. ¹⁶Komuyu moola tingoniiyo yanila nakokubai. Mosolot mosoniton aki nasaokene koanggul saono, tukon laing mosoniton aki nasaokene koala saono. ¹⁷Kayung batango mo mandaba ilaat kosaono monondok, tukon doi kayung batango mo aki namandaba kosaono kulokis. ¹⁸Kayung batango mo mandaba aki nasaokene komo kulokis. Tukon kayung batango mo aki namandaba aki nasaokene

komo monondok. ¹⁹Kokayung batango mo aki nasaokene komo monondok tinape tukon sinua. ²⁰Bunomo koidan tukon nabi-nabi moaki natalakana. Komuyu tingoniiyo doi yanila nakokubai.”

Kokubai bolikon bantilan

(Luk. 13:25-27)

²¹“Aki nasasaibino komian mo uange yaku, ‘Temeneno, Temeneno,’ komo teali Mian Bisa namian, bai tolono mian mo loloiyo ko Tamanggu doi sulugaa namongiasan. ²²Doi Oloyo Nakiamatan badaang komian mobantil doi yaku, ‘Temeneno, Temeneno, bolikon kai doi sambumu kami lapamo pelengene Mian Bisa nateteba? Tukon bolikon kai doi sambumudoo kami lapamo siikayo koibiliis tukon mongkubai badaang kolobo mominasaingdinggon?’ ²³Bai yaku timbiliyo, ‘Yaku aki kutingoniiyo komuyu! Potauso naimbaa, komuyu mo kubaiyo kulokis.’”

Pokubai bonua mo pandoi tukon pokubai bonua mo bonggu

(Luk. 6:47-49)

²⁴“Eh, mian mo lengele daku binantil nia, tukon loingiyo, pokakana komian mopandoi mo kubaiyo kona bonua doi batu bunggono. ²⁵Sambuno lubat koudan, tukon kopaisu lomba, mbombuul makansang lupayo do bonuadoo, bai do bonuadoo aki natolubang sabab lapamo tokubai doi batu bunggono.

²⁶Tukon mian mo longol daku bantilan nia, bai aki naloingiyo yana pokakana komian mobonggu mo kubaiyo kona bonua doi bone bunggono. ²⁷Sambuno lubat koudan, tukon kopaisu lomba, mbombuul makansang lupayo do bonuadoo, bonuadoo tolubang, tukon manas tuuno!”

Yesus nakuasa

²⁸Sambuno Yesus lapa mongotunggul tukon mian badaang mo daano idoo masaingding tuuno momolongol kona otunggul. ²⁹Sabab Yana bangotunggul tukon daano koanggano, aki napokakana konapo gulu-gulu agama.

Yesus aline komeeng komian mo takatolon mo minosikiton

(*Mlk. 1:40-45, Luk. 5:12-16*)

8 Yesus tokolu doi bunggul, tukon badaang komian molainge yana. ²Doiya kosinggatoos lubat komeeng komian mo takatolon mo minosikiton. Yana ladanggene kotuulo tukon sosuba doi Yesus salaano, maka bantile, “Tama, kalu Tama yase, Tama moola aline daku sesel.”

³Yesus taape do mianoo maka bantil, “Yaku yase. Tangalino!” Doiya kosinggatoos kona sesel tangalino. ⁴Maka Yesus bantile doi yana, “Neneeke! Inai mosalitayo mau doi indee komiano. Bai taus doi imam, tukon kabiyo doi yana natantukanggene ikoo lapamo tangalin. Lapa doiya sosubakene komu sosubakon mo lapamo Musa bontiikonggon, teali meeng kobukutii doi mian badaang baikon ikoo bisa-bisa molapamo tangalin.”

Yesus aline komeeng kosuludadu Loma kapalano napeleleani

(*Luk. 7:1-10*)

⁵Sambuno Yesus usok doi Kapelnaum, meeng kosuludadu Loma kapalano yana lubat pososuung tukon Yesus maka mangkabi tulung doi Yesus. ⁶Suludadu kapalanodoo bantile, “Tama, daku peleleani daano momasakit, yana banggonggoling bunu mian lemat doi moolooan tukon masakit tuuno.”

⁷Yesus bantile, “Yaku taus moaline yana.”

⁸“Tama mau naaki.” Suludadudoo kapalano napotimbili, “Yaku aki nateali motalimayo Tama doi kubonua. Tama mau nabaino ikoo bantil, daku peleleani tangalin. ⁹Sabab mau yakudoo sio kutulutiyo daku atasan napalenta. Tukon yaku daano daku suludadu-suludadu mo sio natulutiyo daku palenta. Kalu yaku sumboliiyo meeng daku suludadu, ‘Taus!’ yana taus. Kalu yaku bantile doi bailong, ‘Maimo dimbaa!’ yana lubat; tukon kalu yaku bintekene daku ata, ‘Kubaiyo naiya!’ yana koidan kubaiyo.”

¹⁰Sambuno Yesus lengele oila do suludadudoo kapalano nabinantil, yana masaingding tuuno. Maka yana basilingan doi mian-mianoo mo lolainge yana, “Tadudulo namian nia, doi Israel miano akiyoon kumoposuonggon maanggaan mobuno

naiya! ¹¹Tutuu! Badaang komian molubat doi tolopot tukon doi talise mopotedesi singgat-singgat tukon Abalaham, Ishak, tukon Yakub doi Mian Bisa na Dunia Boolu lalomo. ¹²Kabudoon komian mo teali Mian Bisa namian sinakukon doi kalipookan tonggulungo. Idoe yanila kokiil tukon sakisaa.” ¹³Maka Yesus bontiikene doi suludadudoo kapalano, “Mulemo, oila komu inanggadoo tealimo.”

Doiia kosinggatoe pepleanidoo tangalino.

Yesus aline komian badaang nasesel

(Mlk. 1:29-34; Luk. 4:38-41)

¹⁴Yesus taus doi Petulus nabonua idoe yana kitayo Petulus namonianan moluko daano moseselon maligot tukon moolo doi namooloan. ¹⁵Yesus taape kolimano maka dona maligot tangalin, yana polaing bangun tukon leleaniyo Yesus.

¹⁶Sodo tambuun kinobian badaang komian mo inusoki kuasa ibiliis mobinabakon doi Yesus. Tukon tongo meeng kosilingan patolo, Yesus siikayo ibiliisoo tukon aline koidan sasaibino komian mo masakit. ¹⁷Yesus lakukanggene sasaibino doiya, tukon doiyadoo tealimo oila Nabi Yesaya nabinantil, naiyamo, “Yana tanggunge konda sakisaa tukon aline konda sesel.”

Badaang komian mo yase teali Yesus napololaing

(Luk. 9:57-62)

¹⁸Badaang tuuno komian motikume Yesus. Salataa Yesus kitayo yanila sasaibino, yana sumboliyo kona pololaing-pololaing pintosiyo kopaisu. ¹⁹Maka meeng kogulu agama lubat doi yana tukon bantile, “Tama Gulu, yaku yase lainge Tama doi yayaando.”

²⁰Yesus timbiliyo, “Seligala daano kona buang, tukon kotomisi daano kona telea, bai Manusia Napau akiyo kona mooloan.”

²¹Maka kona pololaing meeng koidan bantile, “Tama, pataikanaku kumule looluk mokibule kotamanggu.”

²²Bai Yesus timbiliyo, “Laingemo yaku, tukon tinggalemo komian mate natadine komian momate.”

Yesus atadeo kosokoi

(*Mlk. 4:35-41; Luk. 8:22-25*)

²³Yesus lakit doi duangan tukon napololaing-pololaing lainge yana singgat-singgat. ²⁴Sosinggot makansang kombombuul babokolan doi paisudoo tukon pakapapung kobokol doi duanganoo. Doiya kosinggatoo Yesus daano momoolo. ²⁵Maka napololaing-pololaing taus doi yana maka bangune yana. “Tama! Tulung! Kita silakamo!” yanila bantile.

²⁶“Bulaando komuyu momatakut?” Yesus bantile, “Komuyu akinduung poanggayo yaku!” Lapa doimbaa Yesus kokondong maka atadeyo do mbombuuloo tukon do paisudoo. Maka paisudoo teali molino tuuno.

²⁷Yesus napololaing-pololaing masaingding. Yanila bantile, “Oila komiano yana nia, kombombuul tukon bokol loingiyi kona palenta!”

Yesus aline kolua komian mo inusoki ibiliis

(*Mlk. 5:1-20; Luk. 8:26-39*)

²⁸Yesus polong doi paisu sembeleng doi lipu Gadala. Idoe lua komian mo inusoki ibiliis lubat doi yana. Do mianoo molua balani tuuno, tobikon doiya akiyo komeeng komian mololo idoo. ²⁹Yanila tobuat doi kibil-kibil lalomo tukon wowookon, “Mian Bisa Napau, bulaa komu kubaiyano kami? Kabudoon ikoo yase sakisaayo kami mau naakiyoon nalaate kooloyono?”

³⁰Aki nadodoon idoo, daano badaang tuuno kobabung-babung momounggolii kaan. ³¹Ibiliisoo kabiyo doi Yesus, “Kalu ikoo siikayo kami, sumboliiyo mbai usok doi babung-babungoo lalomo.”

³²“Tauso!” Yesus bantile. Ibiliisoo dampas doi mianoo molua, maka usok doi babung-babungoo lalomo. Tukon do babung-babungoo obuleng basakukon doi motombing bibilo doi paisudoo maka molomos.

³³Do pototoolidoo babung obuleng doi kota tukon salitayo sasaibino komo tealidoo, koidan komo teali doi mian molua mo inusoki kuasa lokis. ³⁴Komian doi kotadoo taus pososung tukon Yesus. Salataa yanila kitayo Yesus, yanila kabiyo tukon tutuu sulano yana natinggale yanila nalipu.

Yesus aline komeeng komian molemat

(*Mlk. 2:1-12; Luk. 5:17-26*)

9 Yesus lakit doi meeng koduangan maka pintosiiyo do paisudoo, abali doi nalipu sinuungan. ²Idoo mian babakene doi yana komeeng komian molemat mo moolo doi nabalayon. Salataa Yesus kitayo domianoo badaang babasal konapoo maanggaan, Yesus bantil doi mianoo molemat, “He daku pau anggayomo! Komu lalim-lalim inompunimo.”

³Momondukon kogulu-gulu agama mo daano idoo bantil doi noano, “Namian nia totulaiyo ko Mian Bisa!”

⁴Yesus toiyo konapo pikilan, tobikon yana bantile, “Bulaa komu pikilan molokisoo! ⁵Inaando komo moola binantil, ‘Komu lalim lapamo inompuni’, kai binantil, ‘Banguno tukon ampakon’? ⁶Bai doiya budodoo yaku okitakene doikoo kai doi dunia nia bungkukono tongo Manusia Napau komo balakuasa motelese kolalim.” Maka Yesus bantil doi mianoo molemat, “Banguno bingkate komu balayon tukon mulemo!”

⁷Do mianoo molemat banguno tukon mulemo doi nabonua. ⁸Sambuno do mianoo mobadaang kitayo domo tealidoo, yanila matakut tukon nggaale ko Mian Bisa, sabab ko Mian Bisa lapamo beena kuasa mo babasal doi banggapi.

Yesus uange Matius

(*Mlk. 2:13-17; Luk. 5:27-32*)

⁹Lapa doiya Yesus tinggalemo do lipudoo. Doi naampakonan, yana kitayo komeeng kopakabi lulu, kosambuno Matius, daano moosulang doi kantol baluluan. Yesus bantile doi yana, “Mai lainge yaku!”

Maka Matius kokondong tukon laingemo Yesus.

¹⁰Daano Yesus mokaan doi Matius nabonua, badaang kopakabi lulu molubat tukon mian mo tinoi aki namonondok doi mian badaang, posinggat-singgat kaan tukon Yesus tukon napololaing-pololaing. ¹¹Daano ko Falisi-falisi miano mo kitayo yanila kaan singgat-singgat, maka mansadai doi Yesus napololaing, “Bulaando kopoo gulu mokaan posinggat-singgat tukon pakabi lulu tukon domianoo moaki namonondok?”

¹²Yesus lengele doi yaniladoo napasadai maka timbiliyo, “Mian mo makalikodong aki napalaluukene kodoktel. Tongo mian mo seselon. ¹³Unggoliiyo oila koalatio ayat Kitab Moliyous nia: ‘Yaku keeteiyo koseang, tukon bolikon sosubakon iyayon’. Yaku lubat bolikon yaku uange komian mo monondoko kobutongo bai tongo mian mo lokis.”

Pogagaiyan doi apataan kaliangano

(Mlk. 2:18-22; Luk. 5:33-39)

¹⁴Lapa doiya Yohanes Pasau Mian napololaing lubat doi Yesus. Maka yanila mansadai, “Bulaando kami tukon Falisi-falisi miano apata; bai Tama napololaing-pololaing aki?”

¹⁵Yesus timbiliyo, “Bulaandomo kai kopo palaat? Moola kai komian molubat doi lamean osowaanan poloon konoano kalu kobabaabu malaneno daano polaing yanila? Tantu aki! Bai daano kotempono malanedoo baasowaan inala doi yanila. Doiya kosinggato maka yanila nasodo naapata.

¹⁶Akiyo komian mo siabaiyo kona kalambi mo motuwamo tukon meeng kotoik patolo mo boolu. Sabab do koikoo posiabai mangaanikene mosiak kona kalambidoo, tobikon kona mosiakan teali babasal tuuno. ¹⁷Bunomo lakon akiyo komeeng komian mo batune kona suka moolu doi koitan mo tuwamo. Sabab do koitanoo kulokis tukon mapasah, maka dosukadoo tokundang. Suka moolu sio nabinatun doi koitan mo boolu sulano domo lua-luadoo daano pomonondokon.”

Pototooli bonua kaleda napau

Boine mo singgile Yesus

(Mlk. 5:21-43; Luk. 8:40-56)

¹⁸Daano Yesus basilingoniiyo doi Yohanes Pasau Mian napololaing, lubat komeeng kopototooli bonua kaleda. Yana ladanggene kotuulo doi Yesus salaano tukon bantile, “Daku pau moluko sodo mate. Bai, kalu momoola lubat mutaape sulano yana natubo koidan.”

¹⁹Yesus tubo tukon napololaing-pololaing polainggon taus tukon do mianoo.

²⁰Doi loloon tangano meeng koboine songulomo lua kotaum kona kalumbit kosauno nandendekan posuungimo tukon

nabolokonan, lubat koolaniyo Yesus doi tonggulung. ²¹Yana bapikil, “Mau natongo yaku singgile kona jubah, pasti yaku tangalin.” Maka yana singgile Yesus najubah bunduno.

²²Doiya kosinggatoos Yesus mbaleng tukon kitayo do boinedoo maka bantile doi yana, “Ikoo daku pau tanaang! Sabab ikoo anggayomo yaku, ikoo tangalino!” Singgat doiya do boinedoo tangalino.

²³Lapa doimbaa Yesus polongo doi pototoolidoo nabonua. Sambuno yana kitayo domianoo bamusik tukon badaang komian mo pelek, ²⁴yana bantil doi yanila, “Pokalual komuyu sasaibino! Paunia aki namate; yana tongo moolo.”

Yanila sasaibino kokumbite Yesus. ²⁵Sambuno lapa do mianoo badaang kalual, Yesus usok doi paudoo nakombiang lalomo maka taaniyo kolimano. Polaing bangun tubo do paudoo boine. ²⁶Naiya bilita nia sasabukono posaapon do lipudoo.

Yesus aline lua komian mopiit komatano

²⁷Yesus taus lengget idoo tukon doi loloon tangano lua komian mopiit komatano tunduwo. Yesus. Yanila wookon, “Daud Napau, seseange kami!”

²⁸Sambuno Yesus usok doi bonua lalomo, do mianoo mopiit luaila lubat doi yana. Yesus sadaiyo yanila, “Kai komuyu anggayo yaku moola aline komatamuyu mopiit?”

“Tama kami anggayo!” yanila timbiliyo.

²⁹Maka Yesus taape komatanoila tukon bantil, “Sabab komuyu maangga, tealimo oila kopo minoinikon.” ³⁰Maka yanila moolamo mongkita. Yesus ingotiikene tuuno yanila, sulano inai napopitoikene langgedoo doi inde-indee.

³¹Bai yanila taus tukon pelengene doi sasaibino kolipu bilita tentang Yesus.

Yesus aline komian ponga

³²Salataa do mianoo molua taus, meeng komian moponga mo kinuasai ibiliis binabakon doi Yesus. ³³Yesus siikayo do ibiliisoo tukon doiya kosinggatoos do mianoo moolamo basilingan koidan. Komian badaangoo masaingding tukon bantil, “Akiyoon mbai mokita nakadadian nia mobuno niia doi Israel!”

³⁴Bai ko Falisi-falisi miano bantile, “Ibiliis lokis kapalano komo beena yana kuasa mosiikayo kuasa-kuasa lokisoo.”

Yesus seange mokitayo komian badaang

³⁵Bunomo doiya Yesus taus boilingiyo doi meeng kokota doi kota bailong tukon meeng kokampung doi kampung bailong. Yana mongotunggul doi bonua-bonua kaleda, tukon popitoikene ko Bilita Monondok doi bulaando kokaliangano ko Mian Bisa namapalentaan buno Tomundo. Yana aline komian mo sakisaa doi bula-bulaa kokaliangano kosesel tukon komo seselon kobutongo. ³⁶Salataa Yesus kitayo komian mobadaangoo, Yana seseange doi yanila, sabab yanila pusing tukon akimo napobukuan, pokakana kodomba mo akiyo kopototoolino. ³⁷Maka Yesus bantile doi napololaing-pololaing, “Komo pinupui badaang, bai komo bapupui tongo soisik. ³⁸Tobikon doiya kabiyo doi asidoo tumbuno sulano namosumbolii komian mobalimang sulano napupuiyo domo pinupuidoo.”

Songulo lua kolasul

(Mlk. 3:13-19; Luk. 6:12-16)

10 Daano kooloyo meeng Yesus uange domo songulodoo lua kona pololaing napototongi. Maka yana beena kuasa yanila sulano mosiikayo koibiliis tukon aline sasaibino kokaliangano kopanakit tukon sasaibino kokaliangano kosesel doi mian butongo. ²Kosambuno do lasuloo mosongulo lua doiyamo: kotumbeno Simon (mo sinombuikon Petulus) tukon utuso Andelias, Yakobus tukon utuso Yohanes, doiyamo Zebedeus napau. ³Tuundu Filipus tukon Baltolomeus, Tomas tukon Matius pakabi lulu, tukon Yakobus Alfeus napau, tukon Tadeus; ⁴tukon doibundu Simon, si Patliot tukon Yudas Iskaliot mo loilokise Yesus.

Lasul-lasul nalimang

(Mlk. 6:7-13; Luk. 9:1-6)

⁵Domo songulodoo lua kolasul Yesus bontiikene tukon tetebayo, “Inai potaus doi mian bailong nalipu mo bolikon Yahudi miano nalipu. Inai koidan potaus doi Samalia miano

9:34: Mat. 10:25, 12:24, Mlk. 3:22, Luk. 11:15 9:35: Mat. 4:23; Mlk. 1:39, Luk. 4:44

9:36: Bang. 27:17, 1Tomd. 22:17, 2Tun. 18:16, Yehz. 34:5, Zak. 10:2, Mlk. 6:34

9:37-38: Luk. 10:2

nakota-kota. ⁶Bai potaus doi Israe'el miano, doi yanila mo tapamo. ⁷Pelengene doi yanila baikon ko Mian Bisa mosobito kona mapalentaan pokakana ko Tomundo. ⁸Poaline komian mo seselon; otuboiyo komian mo mate; aline komian mo takatolon mo minosikiton, tukon siikayo koibiliis. Komuyu lapamo talimayo sasaibinodoo tukon akiyo kopebealo. Jadi, beena koidan tukon aki nainoli. ⁹Inai momakanggi do'oy mosoni, do'oy pelak kai do'oy tombaga. ¹⁰Inai koidan pomababa mandu doi po ampakonan, inai pomakanggi lua kokalambi, toik kai tongkat, sabab komian mo balimang lapamo sinadiakon kona palaluu.

¹¹Kalu komuyu polong doi kota kai kampung, poumboliyo komeeng komian mo yase talimayo komuyu. Podungolo doi yana polong komuyu luwe koidan. ¹²Kalu komuyu usok doi mian nabonua, pobantile, "Kinatauhan ko Temeneno nabalakaatiyo komuyu." ¹³Kalu do bonuadoo tumbuno talimayo komuyu, sodiiyomo dopo salam nadungol doi yanila. Bai kalu yanila aki natalimayo komuyu, po abalingene dopoo salamoo. ¹⁴Kalu daano kobonua tumbuno kai kokota miano mo aki natalimayo komuyu kai mo aki nayase molongol komuyu potinggalemo do lipudoo tukon potipasene koambata doi aimuyu salaano. ¹⁵Poneneeke! Doi Oloyo Nakiamatan, kokota Sodom miano tukon Gomola naikon lobian kona mumundaan ko Mian Bisa naompuniyo kalu baino do kotadoo miano."

Poloilokis mo lubat naikon

(Mlk. 13:9-13; Luk. 21:12-17)

¹⁶"Pokitayo naiya: Yaku bintekene komuyu pokakana kodomba mo akimo nabukuan doi asu lobo mobalani salaano. Komuyu sio pobadagai pokakana kobinda tukon moloyos konoamuyu pokakana kotomisi lapatiing. ¹⁷Pobada-badagai, sabab komuyu linako tukon sinalakanggon doi pangadilan agama. Komuyu sinakisaa doi bonua kaledaan. ¹⁸Komuyu binaba doi ponguasa-ponguasa salaano tukon doi tomundo-tomundo sabab komuyu daano kupololaing. Tukon idoomo kopoo todanan mebee kasaksian motuuk doi yaku doi yaniladoo tukon doi mian badaang mo aki natingoniyo ko Mian Bisa.

¹⁹Bai kalu komuyu binaba moinadili, inai pomatakut oila kopo binantil kai bulaando kopo basilinganan. Sabab oila kopo binantilo, doiya binontiikon doi komuyu nalaate kotempono.

²⁰Sabab komo basilingan doiya kosinggatoo bolikon komuyu, bai Tama Na Loh doi sulugaa komo lolainge komuyu.

²¹Naikon teali baikon komian beekene koutuso sulano nainakate. Tukon doiyadoo naikon komo teali doi tama tukon napau. Kolabuk-labuk musuwo kotinano tamano tukon beekene kotinano tamano nainakate. ²²Sasaibino komian mosikitene komuyu sabab komuyu kupololaing. Bai komian mo bataanggon maangga polong doi oloyo napupusan yana malaat kasalamatan. ²³Kalu komuyu sinakisaa doi meeng kokota, poobuleng doi kota bailong. Yaku bontiikene doikodoo: Kalu akiyoon nalapa komuyu boilingiyo sasaibino kokota Islael, Manusia Napau lubato.

²⁴Komulit aki nalobian kona babasalan doi nagulu, tukon peleleani aki nalobian kona babasalan doi natuan. ²⁵Moolamo kalu komeeng komulit teali buno nagulu, tukon kalu komeeng kopeleleani tealimo buno natuan. Kalu meeng kobonua tumbuno lakaino lapamo binee sambu Beelzebul, baino kai doi nabonudoo lalomo. Yanila binee sambu mo lobian kona kulokisan koidan!”

Pomatakutene ko Mian Bisa

(Luk. 12:2-7)


²⁶“Inai momatakutene kobanggapi. Akiyo komo tosookon, mo aki nakinita, tukon akiyo komo linaasiakon mo aki natotoiy. ²⁷Oila daku binantildoikoo doi kalipookan sio komuyu poulange doi oloyo namadialanan lalomo. Tukon indee komo pinolisaukon doi tolingaimuyu, posilingane nailongol sasaibino!

²⁸Inai pomatakutene doi yanila mo akateyo kobutomu, bai akiyo kona kuasa moakateyo konda jiwa. Pomatakutene ko Mian Bisa mo balakuasa mosilakaiyo kobutonggita mau kai nda jiwa doi nalaka lalomo. ²⁹Lua kotomisi pepeleet moola nainoli tukon meeng kodoy mo poipoisik tuuno koanggano. Mau nabuno doiya akiyo komeeng dotomisidoo mootuwong doi buta kalu bolikon Tamamu namongiasan. ³⁰Sasaibino kobuuk doi olumu

10:21: Mlk. 13:12, Luk. 21:16 10:22: Mat. 24:9, 13, Mlk. 13:13, Luk. 21:17

10:24: Luk. 6:40, Yoh. 13:16, 15:20 10:25: Mat. 9:34, 12:24, Mlk. 3:22, Luk. 11:15

10:26: Mlk. 4:22, Luk. 8:17



Tomisi pepeleet (10:29)

lapamo inait. ³¹Tobikon doiya inai momatakut! Komuyu lobian koanggano doi tomisi pepeleetoo!”

Akuiyamo Yesus doi mian badaang salaano

(Luk. 12:8-9)

³²“Indee komo mangaku doi mian badaang salaano yana daano kupololaing, yaku koidan akuiyo yana doi Tamanggu salaano doi sulugaa. ³³Bai indee komo akiyenggene yaku doi mian badaang salaano, yaku koidan akiyenggene yana doi Tamanggu salaano doi sulugaa.”

Bolikon podamean, bai pomusuan

(Luk. 12:51-53, 14:26-27)

³⁴“Inai poanggene yaku lubat babayo kopodamean doi dunia nia. Yaku lubat aki kubabayo kopodamean bai pomusuan. ³⁵Yaku lubat sulano pau mala-malaneno musuwo kotamano, pau boineno musuwo kotinano, tukon monianan boine musuwo kona

monianan moluko. ³⁶Yah, komo teali musu mobabasal doiyamo bonuadoo tumbuno!

³⁷Komian mo seseange kotamano kai tinano lobian doi yaku aki nateali kupololaing. Bunomo lakon komian mo seseange kona pau malaneno kai moluko lobian doi yaku. ³⁸Tukon komian mo aki natanggunge kona kayung sempang tukon lainge yaku aki namoola teali kupololaing. ³⁹Mian mo seseange kona tuboan, lapus kona tuboan, bai komian mo lapus kona tuboan sabab yana moonggol doi yaku, yana laate kona tuboan.”

Patambo doi kokubai mo monondok

(Mlk. 9:41)

⁴⁰“Mian mo talimayo komuyu, talimayo yaku. Tukon mian mo talimayo yaku, talimayo komian mo bintekene yaku. ⁴¹Mian mo talimayo konabi sabab yana nabi, mantalima tambo bunu meeng konabi. Tukon indee komo talimayo komeeng komian mo monondok sabab yana monondok, naikon mantalima tambo meeng komian monondok. ⁴²Indee komiano komo beena monginum, mau tongo paisu momemel doi meeng komian doi yaniladoo moakiyo koanggano nia, sabab yana kupololaing, poanggayomo yana tutuu talimayo kona tambo!”

Yohanes Pasaudoo Mian nabito-bitu

(Luk. 7:18-35)

11 Salataa lapa Yesus beena teteba dona pololaingoo mosongulo lua, yana tinggalemo do lipudoo. Yana taus mongotunggul, tukon sabukene ko Mian Bisa nateteba doi kota-kota mo loolani idoo.

²Yohanes Pasau Mian mo daano doi talunggu yana ndongoliyo bulaa kokaliangano Klistus nalimang. Maka yana sumboliyo kómoimoiya kona pololaing taus doi Yesus mansadaikene, ³“Tama kai ikoomo domianoo mo lubat Mian Bisa motetebakene, kai daano kami mototiili mian bailong?”

⁴Yesus timbiliyo, “Poabali doi Yohanes tukon pobontiikene oila kopo linongol tukon kopoo kinita: ⁵Mian mopiit teali mokita, mian molemat teali ampakon, kai mian mo takatolon tangalin; mian mobongol teali molongol, mian momate

tubo koidan, tukon Bilita Monondok moluwedoi Mian Bisa pinolonggon doi mian motalalais. ⁶Kinatauwan doi mian mo akiyo kona bantilan sulano naakiyengene yaku!”

⁷Sambuno lapa Yohanes nasosumboliidoo taus, Yesus atambuunemo kona silingan doi mian badaangoo tuuk doi Yohanes, kona bantilano, “Komuyu taus doi padang lalomo oila kopo kinita? Meeng kobulung mbombuul kai mo puule? ⁸Komuyu taus oilakai kopoo kinita? Meeng komian mo bapake monondok? Komian mo bapake monondok bunoo doiya dungol doi kamali! ⁹Jadi bulaa komuyu motaus doi padang lalomo? Sulano kai pomongkita meeng konabi? Bisa, bai lobian meeng konabi. ¹⁰Sabab Yohanes doiyamo komo minakisuti doi ayat Kitab Moliyous lalomo nia,

‘Naiyamo daku bito-bitoo, Mian Bisa bantile, yaku bintekene yana komo loolukon tumbeno doikoo sulano yana nabukayo kololoon tuuk doikoo.’

¹¹Neneeke! Doi dunia nia akiyoon nadaano komian mo lobian kona babasalan doi Yohanes Pasaudoo Mian. Mau nabuno doiya komian mo poipoisik doi antala Mian Bisa naumat lobian kona babasalan doi Yohanes. ¹²Salataamo Yohanes napolongganano kona bilita polong diabudodoo nia, ko Mian Bisa namian inakiyonggon doi mian mobadaang mo kakaate nakuasaiyo tukon kakatikan. ¹³Polong doi Yohanes nalubatan, sasaibino Musa naatulan tukon otunggul nabi-nabi doiya tinantukanggon bulaa kokaliangano kolobo mo teali. ¹⁴Tukon kalu komuyu yase maangga, Yohanes doiyamo Elia, kona lubatan lapamo tinantukanggon. ¹⁵Kalu daano kotolingaimuyu polengele!

¹⁶Tukon oila komo sio kupokakanakene komian nia budodoo? Yanila pokakana kolabuk-labuk mo osulang doi labotan. Komeeng kotambuno mansadai doi bailong, ¹⁷‘Kami maengene kolagu momonondok tuuk doi komuyu, bai komuyu aki poyase moosuleng! Kami mananikene konanian matean, bai komuyu aki poyase mokokiil!’ ¹⁸Yohanes lubat – yana apata tukon aki namonginum anggul; tukon komian badaang bantile, ‘Yana inusoki setan!’ ¹⁹Budodoiya Manusia Napau, lubat – yana kaan tukon monginum; maka komian bantile, ‘Kitayo ndaiya mianoo! Modoko, nggolonguon, pakabi lulu tulano tukon mian modaano

kona lalim tulano.' Bai mau nabuno doiya, ko Mian Bisa napandoiyan tokita doi nabalimangan."

Kota-kota mo aki namaangga

(Luk. 10:13-15)

²⁰Maka Yesus sosiboliiyo kokota-kota, doiyaya yana badaang tuuno konakinubai mominasaingdinggon. Sabab do mianoo badaang doi kotadoo aki nayase babolii doi yanila nalalim-lalim. ²¹"Komuyu Kolazim silakamo! Tukon silakamo komuyu koidan, Betsaida! Sabab doi Tilus tukon Sidon lapamo kinubai kopaloosan mominasaingdinggon pokakana doi komuyu, yanila malumbito konapai badodoloonan doi napai lalim-lalim tukon mapakemo pakean matean maka abese koabu doi yanila oluno. ²²Poneneeke, doi Oloyo Nakiamatan, Tilus tukon Sidon miano, mumudah tuuno Mian Bisa ompuniyo moluwedoi komuyu nokon! ²³Tukon ikoo, Kapelnaum! Kai naikon komuyu kinatandak polong doi sulugaa? Aki! Bai komuyu sinakukon doi nalaka! Sabab kalu kai dolangge-langgedoo mominasaingdinggon lapamo kinubai doi komuyudoo lapamo koidan kinubai doi Sodom, do Sodomoo daano polong doi oloyo nia! ²⁴Poneneeke, doi Oloyo Nakiamatan, do Sodomoo miano naikon lobian mumunda tuuno ko Mian Bisa ompuniyo moluwedoi komuyu!"

Lubat doi yaku

(Luk. 10:21-22)

²⁵Doiyo kosinggatoo Yesus sambeang, "Tama, Temeneno mo kuasaiyo kotimbu tukon buta! Yaku bakinatauwan doikoo sabab sasaibinodoo ikoo seekene doi mian-mian mo pandoi tukon modaano kona ilimuu, bai ikoo tudoikene doi mian-mian mo aki nasikolah. ²⁶Doiyamo komo sanaangene Tama noano."

²⁷Maka Yesus bantile, "Sasaibino kolangge lapamo Tama beekene doi yaku. Akiyo komeeng komian motoiyo do Paudoo tolongo Tama. Akiyo koidan komo tingoniiyo Tama tolongo do Paudoo, tukon mian-mian doi indee do Paudoo nainotingoniikon ko Tamano.

²⁸Komuyu sasaibino mo pakadak polubato doi yaku, tukon molasayo babalat kona tanggungan; yaku beena komuyu

11:21: Yes. 23:1-18, Yehz. 26:1-28:26, Yo. 3:4-8, Am. 1:9-10, Zak. 9:2-4

11:23: Yes. 14:13-15, Teal. 19:24-28 11:24: Mat. 10:15, Luk. 10:12 11:27: Yoh. 3:35, 1:18, 10:15

leleapan. ²⁹Loingiyo daku palenta tukon pomonggiyotunggukon doi yaku. Sabab yaku nia aki kubalani tolongo monondok konoanggu, maka komuyu lasayo monondok. ³⁰Sabab daku palenta monondok tukon kotanggungn yaku mobeekene doi komuyu leleap.”

Pasadai motuuk doi oloyo Tadean

(Mlk. 2:23-28; Luk. 6:1-5)

12 Daano kooloyo meeng, oloyo Tadean, Yesus alon doi meeng kogandum asino, kona pololaing-pololaing tambuno bapupui gandum, maka yanila makaan sabab yanila malaalo. ²Sambuno Falisi-falisi miano kitayo, yanila bantil doi Yesus; “Kitayo! komu pololaing-pololaing lawane konda atulan-atulan agama tukon kubaiyo komo pinantanggon doi oloyo Tadean.”

³Yesus timbiliyo, “Kai akiyoon pobasayo oila Daud nakinubai singgatoos yana tukon na mian-mian momalaal? ⁴Yana usok doi Mian Bisa Nabonua lalomo; maka makaan loti mo lapamo sinosubakon doi Mian Bisa. Kalu kai doi nda agama atulanoo yana tukon na mian-mian aki namoola kaane do lotidoo – tolongo imam-imam komo moola. ⁵Kai akiyoon pobasayo doi Musa naatulan lalomo doi oloyo Tadean imam-imam mo balimang doi Temeneno Nabonua, lupaiyo koatulan oloyo Tadean, bai aki nainasalakon? ⁶Neneeke, daku binantil nia: naimbaa daano komo lobian babasal doi Temeneno Nabonua. ⁷Doi Kitab Moliyous lalomo totulis: Poseseangan daku iniyas, bolikon iyayon mosinosubakon. Kalu andeno komuyu mangalatikene do bantilanoo, tantu komuyu aki poasalakene komian mo akiyo kona sala. ⁸Sabab Manusia Napau kuasaiyo dooloyodoo Tadean.”

Mian mo lemat kolimano sembeleng

(Mlk. 3:1-6; Luk. 6:6-11)

⁹Yesus tinggalemo do lipudoo maka taus doi meeng kobonua kaleda. ¹⁰Idoo daano komeeng komian mo lemat kolimano sembeleng. Daano komoimoiya komian mo yase unggoliiyo

Yesus nakasalaan, yanila sadaiyo doi yana, “Kabudoon inalin komian nasesel doi oloyo Tadean?”

¹¹Yesus timbiliyo, “Kalu baikon daano komeeng komian doi komuyu modaano komeeng kona domba, doi oloyo Tadeanoo yana otuwong doi buang lalomo mo atean; kai do dombadoo tumbuno aki nakakaatekene mobuate dona dombadoo doi buangoo lalomo? ¹²Yah, kobanggapi lobian koanggano doi dombadoo! Jadi kalu buno doiya, moola natulungiyo komian doi oloyo Tadean.” ¹³Lapa doiya Yesus bantile doi mianoo mo lemat kolimano sembeleng, “Ululemo kolimamu.”

Do mianoo ulule kolimano, tukon do limanodoo tangalino pokakana dolimano sembeleng. ¹⁴Bai do Falisi mianodoo tinggalemo do bonuadoo kaleda, maka yanila pomeenggon moakateyo Yesus.

Mian Bisa lilike kososumbolii

¹⁵Yesus toiyo baikon ko Falisi-falisi miano niate kulokis kobutongo. Maka yana taus doi tampatoo tukon badaang komian motunduwo. Maka yana aline sasaibino komian mo seselon. ¹⁶Bai yana pantane yanila mopopitoikene yana doi mian badaang bailong. ¹⁷Kalu buno doiya tealimo oila ko Mian Bisa nabinantil doi Nabi Yesaya,

¹⁸ “Naiyamo daku bobitokon yaku mo lilike,
mian kusineang tukon mo kana doi noanggu.

Daku Loh naikon yaku beekene doi yana,
tukon daku adilan pinolonggon doi bangsa-bangsa.

¹⁹ Yana aki naikon napodangani kai wookon,
kai bapidato doi loloon-loloon babasal.

²⁰ Aok mo tobonuk aki naikon nalinotoi,
posi mo kait aki naikon natoposoy.

Yana naikon kakaatekene polong laate kokaadilan;

²¹ sasaibino kobangsa abese kona moinian doi yana.”

Yesus tukon Beelzebul

(Mlk. 3:20-30; Luk. 11:14-23)

²²Lapa doiya binabakon doi Yesus komeeng komian mo piit tukon ponga sabab kinuasaimo tukon kuasa ibiliis. Yesus aline do mianoo sampe yana moolamo basilingan tukon monggita.

²³Sasaibino komian masaingding tukon bantile, “Kai yanamo nia doi Daud Napau mo lapamo tinetebakonoo?”

²⁴Salataa Falisi mianodoo lengele doiya, yanila timbiliyo, “Namian nia tolongo moola siikayo koibiliis, sabab Beelzebul, ibiliisoo kapalano, lapamo beena kuasadoo doi yana.”

²⁵Yesus toiyo do Falisi mianodoo napikilan. Maka yana bantile doi yanila, “Kalu meeng konegala pomusu, negaladoo aki namoonggol. Tukon meeng kokota kai meeng kobonua tumbuno po alaaso tukon pomusu meeng tukon bailong lusako. ²⁶Bunomo lakon doi batomundoan Ibiliis, kalu meeng kotambuno siikayo kotambuno bailong, maka do Ibiliisoo nabatomundoan sasabulo-sasabulo tukon naikon lusako. ²⁷Komuyu bantile yaku siikayo koibiliis sabab kuasa Beelzebul. Kalu bunu doiya indee kokuasano komu pololaing-pololaing siikayo koibiliis? Mupololaing-pololaingoo komo okitakene baikon kopo sala! ²⁸Bai yaku siikayo koibiliis tukon Mian Bisa Na Loh nakuasa. Doiya koalantino Mian Bisa lapamo tambuune kona mapalentaan doi komuyu nokon.

²⁹Bulaando komian moola usok doi meeng komian mo bukuan nabonua lalomo maka napo lambase kona buat, kalu yana aki nakinoot looluk? Lapa doiya maka namoola yana lambase kona buat.

³⁰Mian mo aki natotuwos doi yaku doiyamo komo lawane yaku. Tukon mian mo aki natomboniiyaku doiyamo komo lusayo daku limang! ³¹Tobikon doiya, potoiyo, kalu komian kubaiyo kolalim tukon bantile kopototulaiyan, yana moola nainompuni! Bai kalu yana totulaiyo ko Mian Bisa Na Loh, yana aki namoola inompuni! ³²Kalu komian mabantil meeng kolangge motumbokiiyo Manusia Napau, yana moola inompuni, bai kalu yana totulaiyo ko Mian Bisa Na Loh, yana aki namoola inompuni, mau naiya budoo mau kai doi lounu napupusan!”

Batango tukon sao-saono

(Luk. 6:43-45)

³³“Sulano namalaat saono mo monondok, kobatango sio namolumbang. Kalu kobatango aki namolumbang, kosaono aki namonondok. Molumbang kai aki dokayungoo batango tinoi

doi saono. ³⁴Komuyu mian molokis, bulaando kona tealian komuyu moola bantile kolobo monondok kalu komuyu kulokis? Oila kosuumuyu nabinantil doiyamo komo ano doi noamuyu. ³⁵Mian monondok bantile kolobo monondok sabab yana daano doi monondokan tuuno. Kobalino; komian mo lokis mabantil langge-langge mo lokis sabab yana takainomo lokis.

³⁶Poneneeke, doi Oloyo Nakiamatan meeng-meeng komian sio natanggung jawape doi meeng-meeng kona bantilan mo akiyo kona kanaan. ³⁷Sabab doi mubantilanoo susuumu kona inalaan koputusan kai ikoo sala kai aki.”

Falisi-falisi miano kabiyo doi Yesus namokubai langge mominasaingdinggon

(Mlk. 8:11-12; Luk. 11:29-32)

³⁸Doibundu bubulaa kogulu-gulu agama tukon Falisi-falisi miano bantile, “Tama Gulu, kami yase kitayo Tama namokubai langge mominasaingdinggon.”

³⁹“Todudulo kai kona kulokisan tukon napalalentelan komian nia budodoo!” Yesus timbiliyo, “Komuyu kabiyo yaku kukubaiyo kolangge mominasaingdinggon? Akimo komuyu pobinee mau nabaino meeng dolangedoo mominasaingdinggon, tongo komo minasaingdinggon doi Nabi Yunus.

⁴⁰Yunus dungol tolu kooloyo, tolu kopopook doi ikan babasal tiano lalomo. Bunomo lakon doiya Manusia Napau dungol tolu kooloyo tolu kopopook doi buta lolomo. ⁴¹Doi Oloyo Nakiamatan, Niniwe miano naikon pomeenggon tukon mian-mian nia budodoo tuduwe yanila. Sabab Niniwe miano baboliimo doi yaniladoo nalalim, sambuno Yunus bangotunggul doi yanila. Bai naimbaa diabudodoo daano komo lobian babasal doi Yunus! ⁴²Doi Oloyo Nakiamatan kotomundo moluko moluwedoi lipu Lalom naikon pomeenggon ko mian-mian nia budodoo tukon tuduwe yanila. Sabab konda molongolan Salomo mo pandoi, tomundo molukodoo kona ampakonan mo dodoon tuuno doi dunia bunduno. Bai naimbaa diabudodoo daano komo lobian babasal doi Salomo.”

12:33: Mat. 7:20, Luk. 6:44 12:34: Mat. 3:7, 23:33, 15:18, Luk. 3:7, 6:45

12:38: Mat. 16:1, Mlk. 8:11, Luk. 11:16 12:39: Mat. 16:4, Mlk. 8:12 12:40: Yun. 1:17

12:41: Yun. 3:5 12:42: 1Tomd. 10:1-10, 2Tun. 9:1-12

Naabalian koibiliis

(Luk. 11:24-26)

⁴³“Kalu ibiliis otinggalemo doi meeng komian, ibiliisoo boilingiyomo kolipu-lipu mo motuul sulano nabalasang, bai yana aki namalaat tampat. ⁴⁴Tobikon doiya yana bantile: ‘Yaku abali doi bonuadoo mo lapamo yaku tinggale.’ Sambuno yana polong idoo, do bonuadoo kosong, bilisii tukon monondok. ⁴⁵Maka yana taus tukon babayo kopitu koibiliis bailong mo lobian kona kulokisan doi yana. Doibundu yanila usok doi mianoo, tukon dungol idoo. Boobus doibundu do mianoo ndondoongo lobiano kona kulokisan doi tumbenodoo. Doiyamodoo koidan komo teali naikon tukon doi mian-mian molokis nia budodoo.”

Yesus utus-utuso tukon tinano

(Mlk. 3:31-35; Luk. 8:19-21)

⁴⁶Yesus daano mobasilingan doi mianoo mobadaangoo lubato kotinano tukon utus-utuso. Yanila kokondong doi tonggulung unggoliyo namoola pososung tukon yana. ⁴⁷Daano komeeng komian doi mian mobadaangoo bantile doi Yesus, “Tama, tinamu tukon utus-utusomu daano doi tonggulung. Yanila yase posilingonii tukon Tama.”

⁴⁸Maka Yesus timbiliyo, “Indee kai kotinanggu? Indee kai koutus-utusonggu?” ⁴⁹Maka yana tudeo kona pololaing-pololaingoo tukon yana bantile, “Naiyamo kotinanggu tukon utus-utusonggu. ⁵⁰Komian mo loingiyo ko Tamanggu doi sulugaa namongiasan, doiyamo koutusonggu malaneno tukon utusonggu boine tukon yanamo kotinanggu.”

Andean meeng komian pasabukon

(Mlk. 4:1-9; Luk. 8:4-8)

13 Doi oloyodoo Yesus tinggalemo do bonuadoo tukon taus doi paisudoo bibilo maka osulang idoo. ²Badaang tuuno komian mo pototongi potikungon Yesus, tobikon doiya Yesus taus osulang doi duangan lalomo, bai domian-mianoo mobadaang kokondong doi paisudoo bibilo. ³Maka Yesus



Kalibuang mo tinipas (13:4)

mongotunggul badaang kolangge doi yanila tukon mangala andean.

“Daano kopetani meeng taus tipase kona kalibuang,” bunomo doiya Yesus atambuune kona salita. ⁴“Sodo doi natipasano, daano kokalibuang mo otuwong doi loloon. Maka lubat kotomisi mokaane kabus do kalibuangoo. ⁵Daano koidan komo otuwong doi lipu mobatuon, kobutano tongo soisik, kalikalibuangoo sosinggot tubo, sabab kobutano tolono soisik. ⁶Bai kalu tatandako kooloyo, kosopisopiino moloyuumo, lapa doiya motuul tukon mate sabab koanggolo aki naatean doi buta lalomo. ⁷Daano komo otuwong doi laing mo soniton. Do sonitoo tubo polipi-lipitimo dokalibuangoo mosodo tubo teali mate. ⁸Bai daano koidan dokalibuangoo mo otuwong doi buta monondok, maka nasao; daano komo sakat, daano komo noom kolono, tukon daano komo tolu kolono luunggon natolu-tolu kolono.”

⁹Sambuno lapa yana basalitakene do andeanoo Yesus bantile, “Kalu daano kotolingaimuyu pondongoliiyo!”

Bulaando Yesus mangala andean

(Mlk. 4:10-12; Luk. 8:9-10)

¹⁰Doibundu Yesus napololaing-pololaing lubat tukon mansadai doi yana, “Bulaando Tama kalu basilingan doi mian badaang mangala andean?”

¹¹Yesus timbiliyo, “Sabab komuyu lapamo bineekon kona monondokan sulano potoiyo bulaa kolaasia kaliangano doi bulaando ko Mian Bisa namapalentaan, bai yanila aki. ¹²Tobikon komian koono mo daanomo, naikon binee lobian badaang koidan, tukon komo daanomo doi yana inala koikoidan. Bai komian mo akiyo kona oioila, maka kosoisik mo daano doi yana naikon inala koidan. ¹³Doiyamo kosababpo yaku mangala andean kalu yaku basilingan tukon doi mian mobadaang, sabab yanila kitayo, bai pokakana komian mo aki namongkita, yanila molongol bai pokakana komian mo aki namolongol tukon aki namangalati. ¹⁴Kalu bunu doiya tealimo Nabi Yesaya nabinantil,

‘Mian Bisa bantile:

Yanila tuluus mondongolii

bai aki namangalati;

yanila tuluus nunuiyo

bai aki natoiyoyo oila komo teali.

¹⁵ Sabab pikilan mian-mian nia akimo namamangan, yanila tolingaino tealimo bongol tukon yanila matano lapamo piite.

Naiya teali sulano yanila matano naaki nakitayo,

tukon tolingainoila naaki namolongol,

yanila napikilan naaki namangalati

tukon yanila naaki naabali doi yaku,

maka yaku aline yanila.’ ”

¹⁶“Bai tobikon doiya komuyu laba-laba,” Yesus bantile doi napololaing-pololaingoo, “sabab komuyu bisa mongkita tukon molongol.

¹⁷Poneneeke, badaang konabi tukon mian maangga doi Mian Bisa yase mongkita kopoo kinita diabudodoo nia, bai yanila



Mosolot mo soniton (13:22)

aki nakitayo, yanila yase momolongol oila kopoo linongol diabudodoo, bai yanila aki namolongol.”

Yesus talakangene andean meeng komian pasabukon

(Mlk. 4:13-20; Luk. 8:11-15)

¹⁸“Ndongoliyo oila koalatio andean pasabukonoo. ¹⁹Kalibuang mo otuwong doi loloon bibilo doiyamo mian-mian mo molongol bilita bulaando ko Mian Bisa namapalentaan bai aki namangalatikene. Ibiliis lubat tukon alayo oila komo lapamo ano doi noano lalomo. ²⁰Kalibuang mo otuwong doi lipu mo batuon, doiyamo mian-mian mo molongol bilitadoo tulus talimayo, tukon noano monondok. ²¹Bai bilita nia aki namoonggol doi noanoila, tobikon aki natataan malumbit. Sambuno yanila malaat susa kabai sinakisaa sabab bilitadoo, tuluus yanila akimo namaangga. ²²Kalibuang mo otuwong doi laing mosoniton doiyamo mian-mian mo molongol bilitadoo, bai molilikene kona tuboan, tukon yase monondok. Sabab bilita doi Mian Bisa aki namoonggol doi noanoila tobikon aki natotingonii. ²³Kalibuang mo otuwong doi buta monondok, doiyamo mian-mian mo molongol bilitadoo tukon mangalatikene, yanila mangalatikene badaang daano komo sakat, daano komo noom kolono, daano komo tolu kolono.”

Andean padang-padang moano doi gandum antalano

²⁴Yesus salitayo koidan meeng koandean doi mian badaang yana bantile, “Kalu Mian Bisa mapalenta kona bunoan pokakana andean nia: Meeng komian balimang asi sabukene kona kalibuang mo monondok doi naasi.

²⁵Daano kopopook meeng, singgato komian sasaibino daano mo moolo, do asidoo tumbuno namusu lubat mosabukene kopadang kalibuango antalano doi gandumoo maka yana taus. ²⁶Sambuno domo sinookonoo tubo tukon bunga-bungano tambuuno sumbot totiingoniimo do padang-padangoo. ²⁷Maka asidoo tumbuno namian sinasai lubat doi asidoo tumbuno tukon bantile, ‘Tuan, bolikon kai Tuan motipas kalibuang mo monondok doi Tuan naasi? Bulaando kona tealian modaanomo kopadang-padang imbali?’ ²⁸Asidoo tumbuno timbiliyo, ‘Koiya musu nakokubai.’ Maka mian-mian mosinasaidoo mansadai koidan doi asidoo tumbuno, ‘Tuan yase kami taus kibute do padang-padangoo?’ ²⁹‘Inai,’ napotimbili, ‘Sabab kalu do padang-padangoo binubut, maka gandumoo tokibut. ³⁰Tinggalemo padang-padangoo natubo singgat-singgat polong doi tembo bapupuiyan. Doiya singgat maka kubantil doi mian-mian mo bapupui: Pototongikene looluk padang-padangoo, boboiyo, maka suayo. Lapa doiya pototongikene dogandumoo, maka usekene doi longgo lalomo.’ ”

Andean mostol batuno

(Mik. 4:30-32; Luk. 13:18-19)

³¹Yesus basalitakene koidan doi mian momadaangoo meeng koandean, yana bantile, “Kalu Mian Bisa mapalenta kona bunoan pokakana naiya andean nia: Meeng komostol batuno moinala, maka sinabukon doi asi. ³²Mostol batuno doiyamo kokalibuang mo poipoisik tuuno. Bai kalu yana tubomo teali babasal doi antala mosinakakonoo. Yana teali kayung, tukon tomisi-tomisi lubat mokubai telea doi panga-pangano.”

Andean tentang lagi

(Luk. 13:20-21)

³³Daano komeeng koandean bailong Yesus mo salitaikene doi mian badaang. “Kalu kai ko Mian Bisa mapalentamo, kona konandodoong pokakana bunu lagi meeng koboine moalayo

maka inojo tukon sangkap kolono kolitel taligu polong posaapon tuboi!”

Bulaando Yesus mangala andean

(Mlk. 4:33-34)

³⁴Sasaibino Yesus otunggulikene komian badaang tukon mangala andean. ³⁵Tobikon doiya tealimo konabi nabinantil, “Yaku mangala andean kalu basilingan tukon yanila; yaku beekene kolobo mo tosookon salataa kodunia nia natinealikonan.”

Yesus talakanggene koandean kopadang mopotuboiy gandum

³⁶Sambuno lapa doiya Yesus tinggalemo do mianoo mobadaang, maka usok doi bonua. Kona pololaing-pololaing lubat maka bantile, “Tama soba talakanggene doi kami koalatio koandean kaliangano kopadang mopotuboiy kogandum.”

³⁷Yesus timbiliyo, “Mian mo sabukene kona kalibuang mo monondokoo doiyamo Manusia Napau. ³⁸Asidoo doiyamo dunia nia. Kalibuang mo monondokoo doiyamo mian-mian mo lapamo teali Mian Bisa naumat. Padang-padang doiyamo mian-mian mo daano doi Ibiliis. ³⁹Musu mo sakakene do padangoo doiyamo Ibiliis. Oloyo bapupuiyan doiyamo Oloyo Nakiamatan, tukon mian-mian mo bapupuidoo doiyamo malaekat-malaekat. ⁴⁰Bunomo kai padang-padang pinototongikon tukon sinua doi aung lalomo, bunomo lakon doiya doi Oloyo Nakiamatan. ⁴¹Manusia Napau sumboliiyo kona malaekat-malaekat mopototongikene sasaibino kona mian mo kubaiyo kolalim, tukon sasaibino komian bailong mo kubaiyo kulokisan. ⁴²Yanila sasaibino sinakukon doi aung babasal lalomo; idoo yanila kokiil tukon sakisaa. ⁴³Tukon mian-mian mo loingiyo ko Mian Bisa namongiasan naikon kopanano pokakana kooloyo doi Mian Bisa na Dunia Boolu, yanila Tamano. Jadi kalu daano kotolingaimuyu, polengele!”

Andean buat mo tatanom doi buta

⁴⁴“Kalu Mian Bisa mapalentamo, kona bunoon pokakana naandean nia: daano kobuat mo tatanom doi buta lalomo maka

meeng komian posuunggene tukon usekene koidan doi butadoo lalomo. Doibundu sabab nasanaangan, do mianoo taus balukene sasaibino kona lobo masalo, maka yana abali tukon olio do butadoo.”

Andean mutiala mo monondok

⁴⁵“Kalu Mian Bisa mapalentamo, kondondoongo pokakana naandean nia: Meeng komian badagang mounggolii mutiala mo maaling koolino. ⁴⁶Sambuno yana posuunggene komeeng komutiala batuno mo monondok tuuno, mosobit yana taus balukene sasaibino kona lobo masalo, maka yana oliyo mutialadoo meeng.”

Andean buani

⁴⁷“Kalu Mian Bisa mapalentamo, kondondoongo bunu buani mo sinakukon doi paisu, maka matapu moisalomo koikan kaliangano. ⁴⁸Sambuno do buanidoo moonoo ikan, do buanidoo yanila bingkatemo doi buta tina. Lapa doiya yanila osulang maka alaase do ikan-ikanoo: Komonondok inabos doi loyang tukon komo aki namonondok sinakukon. ⁴⁹Bunomo lakon doiya doi Oloyo Nakiamatan; malaekat-malaekat taus alaase ko mian-mian lokis doi mian-mian mo loingiyo ko Mian Bisa namongiasan. ⁵⁰Lapa doiya komian molokis sinakukon doi aung babasal. Idoe yanila kokiil tukon sakisaa.”

Lobo boolu tukon lobo motuwamo

⁵¹“Kai komuvu mangalatikene sasaibinodoo?” Yesus sadaiyo.

“Mangalati Tama!” yanila timbiliyo.

⁵²Maka Yesus bantile, “Doiyamo kosababpo doi meeng kogulu agama mo lapamo teali Mian Bisa namian, pokakana meeng kobonua tumbuno mo buate kona buat doi naabosan lobo-lobo moolu tukon momotuwamo.”

Yesus aki natinalima doi Nasalet

(Mlk. 6:1-6; Luk. 4:16-30)

⁵³Sambuno lapa Yesus basalitakene do ande-andeanoo, yana tinggalemo do lipudoo, ⁵⁴maka yana abali doi nalipu sinuungan. Indaa yana taus mongotunggul doi bonua kaleda tukon badaang komian mo mondongolii yana idoo, masaingding tuuno. Yanila

bantile, “Naando namian nia namalaatan pandoiyan mobuno doiya? Tukon doiyaa kona malaatan kuasa mokubaiyo kotanda mominasaingdinggon? ⁵⁵Bolikon kai yana tukang kayung napau? Bolikon kai yanadoo kotinano Malia; tukon koutus-utuso doiyamo Yakobus, Yusuf, Simon, tukon Yudas? ⁵⁶Tukon bolikon kai koutus-utuso boine daano modungol dimbaa koidan? Doiyaa kona laatano sasaibinodoo?” ⁵⁷Maka yanila tolayo Yesus. Maka Yesus bantile doi yanila, “Meeng konabi inodotii doi yayaa, alaasene doi nakampung susuungo tukon doi nabonua susuungo.” ⁵⁸Tobikon doiya Yesus aki namokubai badaang kolangge mominasaingdinggon idoo sabab yanila aki naanggayo.

Yohanes Pasau Mian namatean

(Mlk. 6:14-29; Luk. 9:7-9)

14 Doiya kotembono Helodes, tomundo doi Galilea, lengele bulaa kokaliangano Yesus. ²Helodes bantile doi napagawe-pagawedoo, “Bisamo naiyamo Yohanes do Pasaudoo Mian mo tubomo koidan! Doiyamo kosababpo yana daano kona kuasa mokubaiyo komo minasaingdinggon.”

³Sabab akiyoon doiya Helodes sumboliiyo Yohanes nalinako tukon nabinoboi tukon nainusokon doi talunggu lalomo. Helodes kubaiyo buno doiya sabab Helodias kokaliangano, utuso Filipus naboloki. ⁴Sabab Yohanes biasamo bontiikene Helodes, “Aki namoola ikoo kilayo Helodias!” ⁵Kona tutuuwan Helodes yase moakateyo Yohanes, bai yana matakutene komian, sabab yanila anggayo Yohanes daano meeng konabi.

⁶Singat doiya Helodes kubaiyo kona taum sinuungan, Helodias napau boine yana osuleng doi mianoo pollubotii salaano. Kona osulenganoo kubaiyo sanaang tuuno Helodes noano. ⁷Tobikon Helodes paladandi tukon totopi baikon oila kona kinabi, yana beekene doi yana.

⁸Sabab kotinano beena galal, do boinedoo bantile, “Yaku kabiyo Yohanes Pasau Mian oluno kubineekon diabudodoo doi meeng kodulang!”

⁹Helodes lengele do kakabidoo susa tuuno konoano. Bai yana molapamo batotopi doi namian inuang salaano, yana mapalentakene sulano do boinedoo nakakabi nabineekon. ¹⁰Yana mosumbolii mian motaus doi talunggu sulano napatele Yohanes

oluno. ¹¹Doibundu doi Yohanes olunodoo binaba inusokon doi dulang bungkukono tukon bineekon do boinedoo. Maka do boinedoo babakene doi tinano koidan. ¹²Lapa doiya Yohanes napololaing lubat moalayo Yohanes badano tukon kibule. Maka yanila taus tukon popitoikene do halloo doi Yesus.

Yesus beena kaan lima koloon komian

(Mlk. 6:30-44; Luk. 9:10-17; Yoh. 6:1-14)

¹³Sambuno Yesus lengele do bilitadoo, yana lakit duangan susuungo tukon tinggalemo do lipudoo, taus doi meeng kolipu mo kiis. Bai sambuno komian toiyo doiya langgedoo, yanila tinggalemo konapoo lipu tukon taus tunduwo Yesus mololoi loloon buta tina. ¹⁴Singgatoo Yesus loboson doi duanganoo yana kitayo do mianoo mobadaang, yana seseange mo yanila. Maka yana aline komian mo masakit doi yaniladoo.

¹⁵Oloyo kinobiano pololaing-pololaing Yesus lubat tukon bantile doi yana, “Oloyo kinobiano tukon nalipu nia tambasiil. Tadukai Tama nasumboliiyo yanila nataus, sulano yanila namalaat mongoli kaan doi kampung-kampung.”

¹⁶“Inaimo napai taus,” Yesus bantile, “Komuyu komo beena kaan.”

¹⁷“Komo daano doi kami tolongo lima koloti tukon lua koikan!” Yesus pololaingo napotimbili.

¹⁸“Babayomo doiya doisumai,” Yesus bantile. ¹⁹Lapa doiya yana sumboliiyo do mianoo mobadaang osulang doi bulung bungkono. Maka yana alayo do lotidoo molima tukon do ikanoo molua, maka lelengea doi timbu tukon libakene kona syukuul doi Mian Bisa. Lapa doiya yana bisi-bisiliyo do lotidoo tukon limano maka beekene doi napololaing-pololaing sulano naebese-ebese doi mian-mianoo mobadaang. ²⁰Yanila sasaibino kaan polong bobosul. Sambuno lapa doiya, Yesus napololaing-pololaing pototongikene do lotidoo labino; daano kosongulo lua kobois komo momoono. ²¹Komo kaan doiya singgat uga-ugaate lima koloon komian, akiyoon natangait koboine tukon labuk-labuk.

Yesus ampakon doi paisu bungkukono

(Mlk. 6:45-52; Yoh. 6:15-21)

²²Lapa doiya Yesus sumboliiyo kona pololaing-pololaing lakit doi duangan tukon mantailuk pintas doi paisudoo;

badungga daano yana mosumboliiyo do mianoo mobadaang namule. ²³Sambuno lapa do mianoo momadaang taus, Yesus liba doi meeng kobungkuko susuungo sulano nabaladoa. Oloyo popooko Yesus daano idoo susuungo. ²⁴Napololaing-pololaingoo naduangan lakitan mododoono tuuno doi paisu tangano. Bokol tukon mbombuul pakapapuungo doi duanganoo sabab kombombuul posusul tukon duangan naampakonon. ²⁵Doi antalano batong tolu tukon batong noom dodowasoono, Yesus lubat doi yanila tukon ampakon doi paisu bungukono. ²⁶Sambuno napololaing-pololaing kitayo yana moampakon doi paisudoo bungukono yanila matakut tuuno. “Setan!” yanila wookon doi napoo matakutan.

²⁷Bai Yesus timbiliyo, “Inai pobiyok, yaku nia Yesus, inai matakut!”

²⁸Maka Petulus bantile, “Kalu ikoo doiyamo Yesus, sumboliiyo yaku kulubat ampakon doi paisu bungukono.”

²⁹“Lubato,” Yesus timbiliyo. Jadi Petulus obulus doi duangan, maka ampakon doi paisu bungukono tukon lubat doi Yesus. ³⁰Bai sambuno Petulus kitayo kobokol mobabasal tuuno doi paisudoo, yana polaing matakut tukon yana otuwong doi paisudoo. “Temeneno tomboniyaku!” Petulus wookon.

³¹Yesus ulule kolimano tukon lakeyo yana maka bantile, “Petulus, Petulus, ikoo nia kinduung mumaangga. Bulaando ikoo mobalasaaki doi yaku?”

³²Maka yanila luaila lakit doi duanganoo tukon dombombuuloo polaing tade. ³³Maka Yesus napololaing-pololaing sosuba doi yana. Yanila bantile, “Bisamo ko Temeneno doiyamo Mian Bisa Napau!”

Yesus aline komian moseselon doi Genesalet

(Mlk. 6:53-56)

³⁴Sambuno yanila polong doi paisudoo sembeleng, yanila ampakon doi Genesalet. ³⁵Tukon salataa komian idoo kitayo domo lubatoo Yesus, yanila sabukene do bilitadoo doi sasaibino kolipu mopokoolani do kotadoo. Maka sasaibino komian moseselon binaba doi Yesus. ³⁶Tukon yanila kabiyo doi Yesus sulano namoola singgile kona jubah, mau natolongo bunduno. Maka sasaibino komo singgile teali tangalin.

Tumbanggita looluk naadat

(*Mlk. 7:1-13*)

15 Meeng ko Falisi miano tambuno tukon bubulaa kogulu agama doi Yelusalem lubat doi Yesus. Yanila mansadai doi yana, ²“Bulaando komu pololaing-pololaing molanggalemo kotumbanggita naadat? Salataa naikon nakaan, yanila aki nakumesiyo kolimano looluk manulut palatulan!”

³Yesus timbiliyo, “Tukon bulaando komuyu molupaiyo ko Mian Bisa napalenta, tolongo sabab yase loingiyo koadat istiadat tumbanggita? ⁴Sabab ko Mian Bisa bantile, ‘Odotiiyo kotamamu tukon tinamu,’ tukon ‘Indee komo banti-bantile kulokis kotamano-tinano, sio nainukum mate.’ ⁵Bai komuyu otunggukene: kalu komian bantile doi olong tua, ‘Oila komo moola kubeekene doi tamanggu-tinanggu, lapamo yaku sosubakene doi Mian Bisa,’ ⁶maka do mianoo akimo sinumbolii koidan moodotiiyo koolang tua. Jadi, tobikon tumbumu looluk naadat, komuyu lailaingene ko Mian Bisa nabantilan. ⁷Komuyu mian bakala-kala! Bisamo tuuno oila Nabi Yesaya nabinantikon doi komuyu, doiyamo,

⁸ ‘Buno naiya ko Mian Bisa nabantilano:

Do mianoo tolongo sosubaiyo yaku tukon bantil-bantilan,
bai yanila noano odoon doi yaku.

⁹ Palasuma yanila sosuba doi yaku,
sabab bangga napalatulan yanila nainotunggukon
buno baikon kupalatulan.’ ”

Langge-langge kaliangano mo kubaiyo komian lokis

(*Mlk. 7:14-23*)

¹⁰Doibundu Yesus uange komian madaang tukon bantile doi yanila, “Polengele sulano pomangalati! ¹¹Mo usok doi babano aki nakubaiyo komian mosikit; tolongo mo tobuat doi babano doiyamo komo tealikene yana mosikit.”

¹²Maka Yesus napololaing-pololaing lubat tukon bantile doi yana, “Tama toiyo, ko Falisi-falisi miano manasalo konoanoila salataa molongol Tama nabantilan mobuno doiya?”

¹³Yesus timbiliyo, “Meeng kolangge mo bolikon Tamanggu doi sulugaa komo sakakene naapa kinubut. ¹⁴Inai pomopu-

singgon do Falisidoo miano. Yaniladoo padagai-padagai mopiit; tukon kalu komian piit tandane komian piit, lualuadoo otuwong doi bitu.”

¹⁵Petulus bantile, “Tama tunggulikene doi kami koalatio do andeanoo!”

¹⁶Yesus timbiliyo yanila, “Kai komuyu akiyoon pomangalati? ¹⁷Akiyoon kai komuyu potoiyo, baikon komo usok doi babanggita obulus doi tianggita lalomo lapa doiya tobuat koidan? ¹⁸Bai komo tobuat doi babanggita, luwedo noanggita; doiyamo komo kubaiyo komian mominosikiton. ¹⁹Sabab doi noanggita lubat kopikilan-pikilan mokulokis; mo tealikene komian mangakate, poselekon, balolowa, pondikuk, bakalaka, tukon batotosii. ²⁰Doiyamo kolobono komo tealikene komian minosikiton, tukon bolikon kai kaanan mo aki nda bakumosi.”

Meeng koboine Kanaan namaanggaan

(Mik. 7:24-30)

²¹Doibundu Yesus tinggalemo do lipudoo tukon taus doi lipu moloolani kokota Tilus tukon Sidon. ²²Meeng koboine Kanaan doi lipudoo, lubat doi Yesus tukon wowookon, “Daud Napau, seaseangaku! Daku pau boineno inusoki ibiliis. Kondondoongo payahmo tuuno.”

²³Yesus aki timbiliyo do boinedoo. Maka Yesus napololaing-napololaing lubat doi yana tukon kabiyo, “Tama, sumboliyo boinedoo nataus. Yana tolongo wookon doi tonggulunggita!”

²⁴Yesus timbiliyo, “Yaku binontokon tolongo doi bangsa Israel, tolongo tuuk doi yanila mo tapa.”

²⁵Do boinedoo lubat mososuba doi Yesus salaano tukon bantile, “Tulungiaku, Tuan.”

²⁶Yesus timbiliyo, “Aki namonondok mangala labuk-labuk nandemel tukon sinakukon doi asu.”

²⁷“Bisa, Tuan,” boinedoo timbiliyo, “bai koasu kaane kondemel labino mo otuwong doi tumbuno nameda.”

²⁸Maka Yesus bantile doi yana, “Tina, komu maanggaan babasalo! Tealimo oila komu mongiasan!” Doiya kosinggatoo do paudoo boineno tangalino.

Yesus aline komian badaang moseselon

²⁹Yesus tinggalemo do lipudoo, maka ampakon meseele doi Paisu Galilea bibilo. Lapa doiya yana libamo doi meeng kobunggul maka osulang idoo. ³⁰Badaang komian molubat doi yana mababa mian-mian mo pelong, mo piit, mo lemat, mo ponga, tukon badaang komian bailong mo seselon. Yanila abese do mian-mianoo doi Yesus salaano tukon yana aline do mianoo moseselon. ³¹Mian badaang mo daano idoo masaingding tuuno, sodo yanila kitayo komian ponga moola basilingan, mian pelong moola tangalin, mian lemat ampakon, tukon mian mopiit teali mongkita. Maka yanila nggaa-nggaaale kobangsa Israe'el na Mian Bisa.

Yesus beena kaan sangkap koloon komian

(Mlk. 8:1-10)

³²Doibundu Yesus uange kona pololaing-pololaing maka bantile, “Yaku seaseange namian nia mobadaang. Tolumo kooloyo molapa yanila polaing yaku, tukon diabudodoo yanila akiyo kona ndemel. Yaku aki kuyase sobiiyo yanila mule tukon tiano momalaal, naaki yanila napadut doi loloon.”

³³Maka Yesus napololaing-pololaing mansadai doi yana, “Inaando konda malaatan ndemel nai lipu nia mokiis tuuk doi mian nia momadaang?”

³⁴“Daano komoiya koloti doi komuyu?” Yesus sadaiyo doi yanila.

“Pitu,” yanila timbiliyo, “tukon bubulaa koikan.”

³⁵Maka Yesus sumboliiyo do mianoo mobadaang naosulang doi buta. ³⁶Maka Yesus alayo do lotidoo mopitu tukon do ikanoo, lapa doimbaa yana baladoa doi Mian Bisa. Lapa doiya yana bisi-bisiliyo do lotidoo tukon do ikanoo maka beekene doi napololaing-pololaing, tukon yanila ebes-ebese doi mianoo badaang. ³⁷Sasaibino do mianoo badaang kaan bobosul. Lapa doiya pololaing-pololaing Yesus pototongikene dondemeloo labino. Sasaibino pitu kobois momoonoh. ³⁸Kona kadaang komo kaan doiya singgat mamalane sangkap koloon komian, akiyoon natangait koboi-boine tukon labuk-labuk.

³⁹Lapa doiya Yesus sumboliiyo do mianoo namule. Yana

susuungo lakit doi meeng koduangan tukon taus doi lipu Magadan.

Falisi-falisi miano kabiyo Yesus nakubaiyo kolangge mominasaingdinggon

(Mlk. 8:11-13; Luk. 12:54-56)

16 Daano kobubulaa ko Falisi miano tukon Saduki miano lubat doi Yesus modesaake yana. Yanila kabiyo yana nakubaiyo kolangge mominasaingdinggon sulano natokita baikon yana modoi Mian Bisa kona lubatan. ²Yesus timbiliyo, ["Kalu kooloyo sodo nasopok, komuyu bantile, 'Monondok kodapang, sabab kotimbu memela.' ³Tukon dodowasoono komuyu bantile, 'Oloyo nia naikon udan, sabab kotimbu memela tukon antonggon.' Nah komuyu moola tantukene kodapang tukon kitayo kotimbu ndondoongo, bai koloonu palo-palosano aki namoola komuyu tantukene!"] ⁴"Bukan maen kona kulokisan tukon napalalentelan komian doi loonu nia? Komuyu kabiyo yaku kukubaiyo kolangge mominasaingdinggon. Komuyu aki pobinee meeng kolobo mominasaingdinggon kasuali langge mominasaingdinggon doi Nabi Yunus."

Sambuno lapa bantile bunu doiya Yesus tinggalemo yanila tukon taus.

Falisi tukon Saduki miano napangaani

(Mlk. 8:14-21)

⁵Sambuno Yesus napololaing-pololaing polong doi paisu sembeleng, maka nasodo yanila toiyo moaki napai makanggi loti. ⁶Yesus bantil doi yanila, "Pobaingotii doi Falisi tukon Saduki miano napangaani."

⁷Molongol Yesus nabantilan mobuno doiya, napololaing-pololaing pobantikon meeng tukon bailong, "Yana bantile bunu doiya sabab kita aki nda makanggi loti."

⁸Yesus toiyo oila yanila nasalita. Jadi yana bantile, "Bulaando komuyu mopusinggene moakiyo kopo loti? Akiyoon namoonggol kopoo maanggaan! ⁹Komuyu akiyoon po mangalatikene? Kabudoon komuyu akimo poneneeke yaku mo bata-bataiyo lima koloti tuuk doi lima koloon komian? Bulaa kobois nakadaang

lotidoo labino komuyu pototongikene? ¹⁰Tukon bulaa koidan pitu koloti tuuk doi sangkap koloon komianoo? Bulaa kobois kolabino komuyu pototongikene? ¹¹Bulaando komuyu moaki pomangalatikene baikon yaku bolikono basilingan doi komuyu kokaliangano doi lotidoo? Pobaingotii doi Falisi tukon Saduki miano napangaani!”

¹²Doibundu Yesus napololaing-pololaing mangalatikenemo baikon Yesus sumboliiyo yanila nabaingotii bolikon kai lagi mo pinake doi mokubaiyan loti, bai Falisi tukon Saduki miano naotunggul.

Petulus namangakukanano Yesus

(Mlk. 8:27-30; Luk. 9:18-21)

¹³Yesus taus doi meeng kolipu moloolani kokota Kaisalea Filipi. Idoos yana sadaiyo kona pololaing-pololaing, “Manulut mian nabantilano, Manusia Napaudoo indee?”

¹⁴Pololaing-pololaing timbiliyo, “Daano komo bantile Yohanes Pasau Mian. Daano komo bantile Elia. Kobailong koidan bantile Yelemia, kai meeng konabi.”

¹⁵“Bai kalu komuyu susuumuyu, yaku nia indee?”

¹⁶Simon Petulus timbiliyo, “Tama doiyamo Tomundo Pasalamat, Mian Bisa Napau Mo Tubo.”

¹⁷“Ikoo laba tuuno, Simon Yona napau!” Yesus bantile, “Sabab bolikon banggapi komo bontiikene doikoo bai Tamanggu doi sulugaa. ¹⁸Tobikon doiya mutoiyo, ikoo doiyamo Petulus, batu mo moonggol. Tukon nia batu nia bungbukono naimbaamo daku kokondongano daku kaleda, mo aki namoola nalinunggui; mau kai matean! ¹⁹Yaku beekene doikoo kopogiling doi Dunia Boolu Mian Bisa. Oila komu pinantanggon doi dunia bungbukono, koidan pinantanggon doi sulugaa. Tukon oila komu binisakon doi dunia bungbukono, mau doi sulugaa tobisakon.”

²⁰Lapa doiya Yesus ingotiikene kona pololaing-pololaing sulano yanila naaki babotilangene doi inde-indee baikon moi yanamo ko Tomundo Pasalamat.

Yesus basilingangene kona sakisaawan tukon namatean

(*Mlk. 8:31 - 9:1; Luk. 9:22-27*)

²¹Tambuun doi oloyodoo Yesus bontiikene doi napololaing-pololaing, baikon yana sio nataus doi Yelusalem tukon motoupi badaang kosakisaa doi katua-katua, imam-imam kapalano tukon gulu-gulu agama. Yana naikon inakate, bai oloyo kotoluno yana tubo koikoidan.

²²Maka Petulus kedele Yesus doi bibilo tukon anuukene, yana bantile, “Kalu momoola Mian Bisa nadedeengene doiya langgedoo, Temeneno! Inai doiya langgedoo nateali doi Temeneno!”

²³Yesus mbaleng maka bantile doi Petulus, “Taus luwe naimbaa, Ibiliis! Ikoo sembange yaku. Mupikilano, pikilan banggapi; bolikon pikilan Mian Bisa!”

²⁴Lapa doiya Yesus bantile doi napololaing-pololaing, “Mian mo yase laingaku sio natoliminggene kona kapalaluuwan doi yana susuungo, tanggunge kona kayung sempang, tukon lainge yaku. ²⁵Sabab mian mo yase bataangene kona tuboan, lapus kona tuboan. Bai komian mo yase sosubakene kona tuboan motuuk doi yaku, yana malaat tuboan. ²⁶Oila kona labaan doi meeng komian, kalu sasaibino nadunia nia ano doi yana bai yana lapus kona tuboan? Moola kai do tuboano nasinoboli tukon lobo bailong?”

²⁷Akimo namalumbit koidan Manusia Napau, posinggat-singgat tukon namalaekat-malaekat naikon molubat tukon Tamano nakuasa. Doiya kosinggato yana balese meeng-meeng komian pololoikon tukon nakokubai. ²⁸Potoiyo! Doi komuyu nokon daano komo aki namate, kalu akiyoon nakitayo Manusia Napau molubat pokakana ko Tomundo.”

Yesus kinabasal

(*Mlk. 9:2-13; Luk. 9:28-36*)

17 Noom kooloyo molapa Yesus babayo Petulus, tukon Yakobus maka utuso Yohanes, basusuunganggon doi meeng kobunggul mo tatandak. ²Doi yanila salaano, Yesus tobolii koduduso; Koduduso teali madialan pokakana kooloyo

16:24: Mat. 10:38, Luk. 14:27 16:25: Mat. 10:39, Luk. 17:33, Yoh. 12:25

16:27: Mat. 25:31, Saad. 62:12, Lm. 2:6 17:1-5: 2Ptl. 1:17-18

tukon napakean moute didilengan. ³Doibundu dona pololaingoo motolu kitayo Musa tukon Elia pobasingonii tukon Yesus. ⁴Maka Petulus bantile doi Yesus, “Temeneno monondok tuuno kita naimbaa. Kalu Temeneno yase, yaku mokubai tolu kosandung dimbaa: meeng tuuk doi Temeneno, meeng tuuk doi Musa, tukon meeng tuuk doi Elia.”

⁵Daano Petulus mobasilingan, bunong mo madialan tuuno tonggupiyo yanila tukon doi bunongoo lalomo tololongol koalalo mo bantile, “Naiyamo daku Pau sineang. Yana komo sanaangene konoanggu. Lengele yana!”

⁶Doiya singgat sambuno dopololaing-pololaingoo lengele do mianoo alalo, yanila matakut tobikon yanila tootuku doi buta. ⁷Bai Yesus lubat maka singgile yanila. “Pobanguno,” kona bantilano, “inai momatakut!” ⁸Salataa yanila mbalenge, yanila akimo namokita mau inde-indee komiano, tongo Yesus.

⁹Salataa yanila tokolu doi bunggulo, Yesus ingotiikene yanila, “Inai mopopitoikene doi inde-indee komiano dopo kinitadoo budodoo, kalu akiyon Manusia Napau nainotuboi doi namatean.”

¹⁰Pololaing-pololaing Yesus mansadai doi yana, “Bulaando kogulu-gulu agama mobantile baikon Elia sio nalubat matailuk?”

¹¹Yesus timbiliyo, “Takainomo Elia lubat tukon alapayo sasaibino kolangge. ¹²Bai yaku bantile doikoo, Elia lapamo lubat, mau komian naaki natingoniiyo yana; tukon yanila lailaingene yana manulut napai mongiasan. Tukon bunomo lakon doiya yanila naikon sakisaayo Manusia Napau.”

¹³Maka dona pololaing mangalatikenemo komo Yesus nasinalita doiyamo Yohanes Pasau Mian.

Yesus aline kopau meeng mo inusoki ibiliis

(Mlk. 9:14-29; Luk. 9:37-43a)

¹⁴Salataa Yesus tukon tolu kona pololaing-pololaing abali doi mian momadaangoo, meeng komalane lubat, sosuba doi Yesus salaano, ¹⁵tukon bantile, “Tama, seseange daku pau. Yana seselon kobutongo sintok. Doseseloo nakokubai idan-idan yana otuwong doi aung tukon idan-idan yana otuwong doi paisu

lalomo. ¹⁶Yaku babayomo yana doi Tama napololaing-pololaing, bai yanila aki namoola aline yana.”

¹⁷Yesus timbiliyo, “Todudulo komuyu nia! Komuyu tutuu mian mo aki namoloingi tukon aki namaangga. Polong indee kotembono yaku sio kudungol pototongi komuyu tukon sabal doi komuyu? Babayo do paudoo doi suma.” ¹⁸Maka Yesus palentayo do ibiliisoo natobuat doi paudoo. Tukon do ibiliis tobuato, maka do paudoo tangalin doiya singgato koidan.

¹⁹Lapa doiya pololaing-pololaing Yesus lubat doi yana susuungo maka mansadai doi yana, “Tama, oila kosababpo kami moaki namoola siikayo do ibiliisoo?”

²⁰Yesus timbiliyo, “Sabab komuyu akinduung pomaangga. Poneneeke! Kalu komuyu kopoo maanggaan pokakana komostol batuno, komuyu moola pobantil doi bunggul nia, ‘Biol imbali!’ do bunggulo biol. Bai akiyo komeeng mo aki namoola komuyu kubaiyo! [²¹Bai koibiliis mo pokakana naiya, tongo moola siniika tukon sambeang tukon bangapataiyan.]”

Yesus basilinganggene koidan kona matean

(Mlk. 9:30-32; Luk. 9:43b-45)

²²Salataa Yesus napololaing-pololaing pototongi doi Galilea, Yesus bantile doi yanila, “Akimo namalumbit koidan, Manusia Napau sinalakanggono doi banggapi nakuasa. ²³Yana naikon inakate, bai doi oloyo kotoluno yana tubo koidan.”

Maka kona pololaing-pololaing teali poloon konoano tuuno.

Babealan lulu doi Temeneno Nabonua

²⁴Singgato Yesus tukon napololaing-pololaing polong doi Kapelnaum, pakabi-pakabi lulu Temeneno Nabonua lubat doi Petulus tukon mansadai, “Kopo gulu mebeal lulu doi Temeneno Nabonua kai aki?”

²⁵Petulus timbiliyo, “Mebeal!”

Salataa Petulus mule, Yesus nggalakene tumbe yana, “Simon, bulaa komu palaat? Indee komiano komo sio namebeal lulu kai lulu doi tomundo-tomundo dunia nia? Mian madaang kai mian molubat?”

²⁶“Mian molubat,” Petulus timbiliyo.



Kota doi Danau Galilea bibilo (17:22)

“Kalu buno doiya,” Yesus bantile, “mian madaang aki napalaluu babeal. ²⁷Bai inaikai nda singgunge komian napalasaanoo. Jadi, potauso doi paisu po bapekai. Poalayo kopoo ikan tinapu tumbeno. Doi babano lalomodoo ikoo naikon malaat doy sukup pobeal nda lulu lua kita. Alayomo do doydoo tukon beale doi yanila konda lulu tuuk Temeneno Nabonua.”

Indee komo babasal?

(Mlk. 9:33-37; Luk. 9:46-48)

18 Doiya kosinggato Yesu napololaing-pololaing lubat doi yana tukon mansadai, “Indee komo inaanggon babasal doi sasaibino ko Mian Bisa namian?”

²Yesu uange meeng kopau pau-pauno maka yana kekendenge doi salaanoila. ³Maka yana bantile, “Poanggayomo! Tongo kalu komuyu tobolii pokakana kopau-pau, komuyu teali Mian Bisa namian. ⁴Komian mo pependeyo kobutongo tukon teali pokakana napau nia, doiyamo komo babasal doi Mian Bisa

namian. ⁵Tukon mian mo talimayo kopau pokakana naiya tobikon yaku, koalatio talimayo yaku.”

Langge-langge mo tealikene komian kubaiyo kolalim

(Mlk. 9:42-48; Luk. 17:1-2)

⁶“Indee komo tealikene sala komeeng doi pau-pau pauno nia akimo namaangga doi yaku, tadukai batu gilingan nakinooton doi bulungo maka yana nakinolomos doi tobun mo atean. ⁷Silakamo nadunia nia sabab mo tealikene kolobo mo kubaiyo kobanggapi baladosa. Takainomo langge-langge mobuno doiya naikon sidutu daano, bai silakamo komiano mo lubatene doiya!

⁸Kalu limamu kai aimu kubaiyo ikoo baladosa, patele maka sakukene. Lobian komonondok ikoo tubo tukon Mian Bisa mau naakiyo kolimamu kai aimu sembeleng, maka mobaino ikoo sinakukon doi aung nalaka lalomo tukon lua-lua kolimamu maka aimu. ⁹Tukon kalu matamu komo kubaiyo kolalim, tadukai musuwete maka musakukene. Lobian komonondok ikoo tubo tukon Mian Bisa mau naakiyo komatamu sembeleng, maka mobaino ikoo sinakukon doi nalaka lalomo tukon lua komatamu.”

Andean domba mo lapus

(Luk. 15:3-7)

¹⁰“Awais inai mototulaiyo doi meeng komian mo poipoisik nia. Sabab poneneeke, yanila namalaekat-malaekat daano sidutu doi Tama salaano doi sulugaa.

[¹¹Sabab Yesus lubat sulano nasalamatene komian mo tapa!]

¹²Bulaa komu palaat? Andeno kalu daano komeeng komian mo mototooli sakat kodomba, maka nalapus komeeng kona domba, oila do mianoo nakinubai? Tantu yana tinggale dona domba mo sio kolono sio doi bunggul maka nataus umboliiyo domo lapusoo. ¹³Tukon kalu yana posuunggenemo koidan dona dombadoo – poanggayomo yaku – yana lobian kona sanaangan doi nadombadoo mo meeng tukon domo sio kolono siodoo mo aki nalapus. ¹⁴Bunomo lakon doiya ko Tamamu doi sulugaa aki nayase doi meeng komian mo sosodoan kona maanggaan doi yaku nia yana tapa.”

Kalu koutusomu baladosa

¹⁵“Kalu doutusomu kubaiyo kolalim doikoo, taus doi yana tukon tudoikene doi yana kona sinalakon. Kubaiyomo doiya lua komuyu inai pobiyok-biyok. Kalu yana loloiyo komu bantilan maka ikoo laatemo yana koidan. ¹⁶Bai kalu aki babayo komeeng kabai lua komian koidan. Sabab doi Kitab Moliyous lalomo totulis, ‘Kona kidikan lua kai tolu kosakisii moinuang kalu daano komeeng kotuduhan.’ ¹⁷Kalu yana aki natalimayo do mianoo naotunggul, popitoikene doiya langgedoo doi jemaat. Tukon doibundu, kalu yana aki natalimayo kojemaat naotunggul, poaanggenemo yana buno kopakabi lulu tukon meeng komian mo aki natingoniiyo ko Mian Bisa.”

Mo pinantanggon tukon mo minoolakon

¹⁸“Potoiyo: Oila kopo pinantanggon doi dunia, mau doi sulugaa pinantanggon. Tukon oila kopo minoolakon doi dunia, mau doi sulugaa minoolakon.

¹⁹Tukon potoiyo koidan: Kalu komuyu doi dunia nia lua komian pomeenggon motuuk doi oioilamo tolong tukon sambeangene, do sambeangoo Tamanggu doi sulugaa talimayo. ²⁰Sabab doi naando lua kai tolu komian pototongi sabab yaku, yaku daano doi tangatanga yanila.”

Andean ata mo aki nayase ompuniyo komian

²¹Lapa doiya Petulus lubat doi Yesus maka mansadai, “Temeneno, kalu koutusonggu daano kona lalim doi yaku polong bulaa luunggon yaku sio kuompuniyo yana? Polong pitu luunggon kai?”

²²Yesus timbiliyo, “Aki, bolikon tongo polong pitu luunggon, bai pitu kolono luunggon napitu. ²³Sabab kalu ko Mian Bisa mapalenta, kondondoongo pokakana naandean nia: Meeng ko tomundo yase moolunase kona ata-ata nasamea. ²⁴Salataa yana tambuun kubaiyo kona bapalesaan, sinasalaanikon doi yana komeeng koata mo basamea doi imbu-imbuno, ²⁵tukon akimo namoola tebeal. Jadi, do tomundodoo mapalentakene sulano do atadoo nabinalukon singgat-singgat tukon napau

tukon naboloki, maka sasaibino kona buat sulano nabeale kona samea. ²⁶Atadoo sosuba doi tomundodoo salaano, tukon kabiyo, ‘Tuan, sabal looluk doi muata. Ata naikon olunase ata nasamea.’ ²⁷Tomundodoo seseangemo doi yana, tobikon yana apusangganemo sasaibino kona samea.

²⁸Sambuno do atadoo tobuat, yana posuung tukon tulano, meeng koata koidan, mo basamea doi yana moimoiya koloon. Yana lakoyo do tulanodoo, maka peeke tukon bantile, ‘Beale sasaibino komu samea!’ ²⁹Maka do tulanodoo sosuba doi salaano tukon kabiyo, ‘Tulanggu sabal looluk, sasaibino yaku beale!’ ³⁰Bai do tulanodoo tolake. Koikoidan, yana usekene do tulanodoo doi talunggu lalomo polong yana beale kona samea. ³¹Sambuno doata-atadoo bailong kitayo oila komo lapamo teali, yanila susa tukon yanila popitoikene doiya langgedoo doi tomundo. ³²Maka do tomundodoo uange do atadoo mo lokis tukon bantile doi yana, ‘Ata mo lokis! Sasaibino komu samea lapamo yaku apusangene badungga ikoo mokabiyo doi yaku. ³³Bolikon kai ikoo sio mumangabos seang doi tulamu pokakana yaku molapamo seseange ikoo?’ ³⁴Tomundodoo nggimal tuuno. Do atadoo mo lokis inusokon doi talunggu lalomo polong yana olunase sasaibino kona samea.”

³⁵Yesus akabuse kona salita tukon nabantil-bantilan nia, “Bunomo lakon ko Tamanggu doi sulugaa naikon kubaiyano komuyu meeng-meeng, kalu komuyu aki poompuniyo koutusomuyu tukon nasanaangan.”

Yesus naotunggul doi pobauntalan

(Mlk. 10:1-12)

19 Sambuno lapa Yesus bantile sasaibinodoo, yana tinggalemo ko Galilea maka taus doi lipu Yudea doi Paisu Yoldan sembeleng. ²Badaang komian motunduwo yana, tukon yana tangalinggene yanila idoo.

³Maka ko Falisi-falisi miano lubat mosobaiyo yana. Yanila mansadai, “Kalu nda ukum agama, kabudoon moola kai komian bauntale kona boloki tukon moisalomo kona alasan.”

⁴Yesus timbiliyo, “Kabudoon komuyu akiyoon pobasayo doi Kitab Moliyous lalomo baikon Papasitaka komo kubaiyo kobanggapi, doi tumbeno lapamo tealikene yanila mamalane

tukon boine? ⁵Tukon sambuno lapa doiya yana bantile, ‘Doi-yamo kosababpo mala-malane otinggale kotamano-tinano tukon pomeenggon kona boloki, maka luailadoo teali meeng.’ ⁶Jadi yaniladoo bolikono koidan lua komian bai meeng. Doiyamo kosababpo oila komo lapamo Mian Bisa pomeenggene akimo namoola kobanggapi pobauntakene.”

⁷Maka ko Falisi-falisi miano mansadaikene doi yana, “Kalu buno doiya bulaando Musa moloasene komian mebee sulat potinggalan doi boloki mo binauntal?”

⁸Yesus timbiliyo, “Musa beena izin komuyu pobauntale kopoo boloki sabab komuyu susa poinotunggul. Bai kona tutuuwan aki nabuno doiya doi tumbeno. ⁹Jadi, polengele nia: Indee komo bauntale kona boloki – bai do boinedoo aki nabalolowa – lapa doiya maka naosowaan koidan tukon boine bailong, do mianoo balolowa.”

¹⁰Maka pololaing-pololaing Yesus bantile doi yana, “Kalu kopoo babaan langkai boloki buno doiya, tadukai naaki nda osowaan.”

¹¹Yesus timbiliyo, “Aki nasasaibino komian moola talimayo doiya bantil-bantilanoo, tongo mian-mian mo lapamo Mian Bisa tantukanggene. ¹²Sabab daano komian mo aki nateali osowaan, sabab yanila takainomo sinuung bunomo doiya. Daano koidan komo aki namoola osowaan sabab yana mian bailong komo kubaiyo buno doiya. Tukon daano koidan komo piliyo susuungo moaki nakilayo osowaan, sulano namoola leleaniyo ko Mian Bisa. Mian mo moola talimayo naotunggul nia, tadumokai natalimayo.”

Yesus balakaatiyo kolabuk-labuk

(Mlk. 10:13-16; Luk. 18:15-17)

¹³Daano komian mobabayoy kona labuk-labuk doi Yesus sulano yana nabingkakene kolimano doi olunoila bungkokono tukon nasambeangene yanila. Bai Yesus napololaing-pololaing nggimoliiyo do mian-mianoila. ¹⁴Maka Yesus bantile doi napololaing-pololaing, “Sodiikenemo koiya labuk-labukokon nalubat doi yaku! Inai popantane yanila, sabab komian mobuno naiya komo teali Mian Bisa namian.”

¹⁵Maka Yesus bingkakene kolimano doi labuk-labukoo oluno bunggono tukon balakaatiyo yanila. Lapa doiya yana tauso.

Mian motabokon mo kaasa

(Mlk. 10:17-31; Luk. 18:18-30)

¹⁶Daano kooloyo meeng, meeng komalane lubat doi Yesus, “Tama Gulu,” nabantilan, “kokubai monondok oila komo sio kulakukanggene sulano namoola mantalima tuboan mobisa tukon posidutukon?”

¹⁷Yesus timbiliyo, “Bulaando ikoo mansadai doi yaku oila komo monondok? Tongo daano komeeng komonondok. Kalu ikoo yase tubo, ikoo sio muloingiyo ko Mian Bisa napalenta.”

¹⁸“Palenta mo bulaandodoo?” mianoo mansadai.

Yesus timbiliyo, “Inai momangakate, inai mobalolowa, inai mopondikuk, inai mobakala-kala, ¹⁹odotiiyo kotamamu tukon kotinamu; tukon seseange kotulamu banggapi pokakana ikoo moseseange kobutomu susuumu.”

²⁰“Sasaibino do palentadoo lapamo kuloingiyo,” do mianoo motabokon timbiliyo. “Oilamo koidan komo palaluu?”

²¹Yesus bantile doi yana, “Kalu ikoo yase motalakana, ampakono mubalukene sasaibino kolobo. Kodoyno beekene doi mian motalalais, tukon ikoo malaat buat doi sulugaa. Lapa doiya, lubato mololo yaku!”

²²Molongol bantil-bantilanoo, mianoo motabokon taus tukon susa konoano sabab yana kaasa tuuno.

²³Maka Yesus bantile doi napololaing-pololaing, “Yaku bantile doi komuyu, maaling tuuno komian mokaasa nateali Mian Bisa namian. ²⁴Tukon nia koidan yaku yase bantile doi komuyu; mumunda tuuno meeng kounta usok doi pakaut buango, kalu mobaino meeng komian mokaasa usok doi Mian Bisa na Dunia Boolu.”

²⁵Salataa kona pololaing-pololaing lengele doi Yesus nabantilanoo, yanila masaingding. “Kalu buno doiya,” yanila bantile, “indee komo mo moola selamat?”

²⁶Yesus mbalenge yanila maka bantile, “Doi banggapi, doiya aki nateali! Bai doi Mian Bisa, sasaibino teali.”

²⁷Maka Petulus bantile, “Kitayo kami nia lapamo tinggale sasaibino kolangge-langge sulano kami lainge Tama. Tukon indee naikon kombai linaat?”

²⁸Yesus bantile doi yanila, “Poanggayomo: Doi Dunia mo Boolu, Manusia Napau osulang doi nakulusii nabatomundoan mo monondok. Doiya kosinggato komuyu daku pololaing-pololaing naikon osulang doi songulo lua kobatomundoan tukon moadiliyo kosongulo lua kobenseno bangsa Israel! ²⁹Tukon memeeng komian mo lapamo tinggale kona bonua, kai utuso mala-malane kai boine, kai tama-tina, kai pau-pau, kai naasi sabab yaku, doiya mianoo naikon mantalima sakat luunggon komo sakat. Tukon yana mantalima koidan tuboan mobisa tukon posidutukon. ³⁰Bai badaang komian diabudodoo kotumbeno teali mo doibundu tukon komo budodoiya nia doibundu naikon tealimo tumbeno.”

Andean polimang-polimang anggul asino

20 “Kalu ko Mian Bisa mapalenta, kondondoongo pokakana naandean nia: Meeng koasi anggul tumbuno dodowasoono yana taus moumbolii mian mobalimang doi naasi anggul. ²Sambuno lapa yana yase mobeale doi yanila meeng kodoy pelak meeng kooloyo, yana sumboliiyo yanila mobalimang doi naanggul asino. ³Batong sio dodoa, do asidoo tumbuno taus koidan, tukon kitayo bubulaa komian modaano moosulang doi labotan. ⁴Maka yana bantile doi yanila, ‘Potauso komuyu pobalimang doi kuanggul asino. Yaku naikon beale kopo tambo mo sukup.’ ⁵Yanila polaing taus. Batong songulo lua suun kooloyo tukon koidan batong tolu kinobian asidoo tumbuno taus koidan tukon kubaiyo koidan kolangge mo pokakana. ⁶Tukon uga-ugaate batong lima kinobiano, yana taus koidan tukon yana kitayo daano komian mo bapiada. Maka yana mansadai doi yanila, ‘Bulaando komuyu motongo kokondong meeng kooloyo dimbaa tukon moakiyo kopo limang?’ ⁷Do mianoo timbiliyo, ‘Akiyo komo sasaiyo kami.’ ‘Kalu buno doiya,’ do asidoo tumbuno bantile, ‘potauso komuyu pobalimang doi kuanggul asino.’

⁸Sambuno kinobian, asidoo tumbuno bantil doi namandol, 'Uangemo do polimang-polimangoo tukon beale kona pai tambo meeng-meeng, mulai doi mo sodo usok polong doi mo usok tumbeno.' ⁹Maka domulaidoo balimang batong lima kinobian lubat. Yanila meeng-meeng mantalima meeng kodoy pelak. ¹⁰Lapa doimbaa lubat koidan domo tinambodoo balimang salataa dodowasoono. Yanila pikikene yanila mantalima lobian. Banggokai yanila tolongo binee meeng kodoy pelak koidan. ¹¹Salataa talimayo do doydoo, yanila mondomukiyo doasidoo tumbuno: ¹²'Polimang mo lubat doibundu doiya tolongo balimang meeng kojam. Kami mobalimang meeng kooloyo kopintal moonas, bai Tuan bayale yanila natambo pokakana tukon kami!' ¹³Asidoo tumbuno timbiliyo doi meeng komian doi yaniladoo, 'Tulando, yaku akiyo daku sala doikoo. Bolikon kai ikoo yase mantalima tambo meeng kodoy pelak komu balimangan meeng kooloyo? ¹⁴Tobikon doiya, alayomo komu tambo, tukon ampakono. Yaku yase beena tambo doi mian mo usok binduno pokakana tukon daku bineekon doi komuyu. ¹⁵Kai aki namoola kukubaiyo daku iniyas tukon daku lobo? Kai ikoo mosikit, sabab yaku monondok konoanggu?' "

¹⁶Maka Yesus bantil koidan, "Bunomo lakon koidan komian doibundu teali mo mantailukon tukon mian mo mantailukon teali doibundu."

Yesus basilingan kotoluno luunggon doi namatean

(Mlk. 10:32-34; Luk. 18:31-34)

¹⁷Salataa Yesus badombaakon Yelusalem, doi loloon tangano yana uange kosongulo lua kona pololaing pototongi bangalaas. Maka yana bantile doi yanila, ¹⁸"Pondongoliiyo! Kita budodoiya taus doi Yelusalem. Idoe Manusia Napau sinalakanggon doi imam-imam kapalano tukon gulu-gulu agama. Maka yana naikon inukum mate, ¹⁹doibundu sinalakanggon doi mian mobolikon Yahudi. Yanila totulaiyo yana, sakisaayo yana, tukon sempangene yana. Bai doi oloyo kotoluno yana inotuboi koidan."

Yakobus tukon Yohanes tinano nakakabi

(Mlk. 10:35-45)

²⁰Lapa doimbaa Zebedeus naboloki lubat tukon nalabuk-labuk doi Yesus. Doi Yesus salaano yana sosuba sulano namangkabi meeng kolangge.

²¹“Tina oila komu kinabi?” Yesus sadaiyo.

Do bolokidoo timbiliyo, “Yaku yase daku pau luaila nia naosulang doi Tama bakalingano tukon bobono kalu Tama tealimo Tomundo.”

²²“Komuyu aki potoiyo oila kopo kinabi,” Yesus bantile doi yanila. “Moola kai komuyu po inume doi galaas sakisaawan nia mo sio kuinume?”

“Moola,” yanila timbiliyo.

²³Yesus bantile, “Takainomo komuyu naikon monginum koidan doi kugalaas. Bai kokaliangano indee naikon komo osulang doi bobo tukon bakalinganggu, doiya bolikon yaku komo tantukanggene. Do osulanganoo doiya tuuk doi mian mo lapamo Tamanggu tantukanggene.”

²⁴Singgatoo domo songulodoo kopololaing bailong lengele doiya langgedoo, yanila nggimoliiyo doi mianoo moluaila montolutus. ²⁵Tobikon doiya Yesus uange yanila sasaibino maka bantile, “Komuyu toiyo baikon katua-katua bangsa mo aki natingoniiyo ko Mian Bisa lailaingenemo kona mian. Tukon babasakene yanila dedekene yanila. ²⁶Bai komuyu aki namoola bunu doiya. Bai komian mo yase teali babasal doi komuyu, sio nateali po peleleani. ²⁷Tukon mian mo yase tanggaal doi komuyu, sio nateali poata. ²⁸Pokakana bunu Manusia Napau koidan; yana lubat bolikon sulano nalineleani, bai sulano nameleleani, tukon nasalakanggene kobutongo teali potolos mian badaang.”

Yesus aline kolua komian mopiit

(Mlk. 10:46-52; Luk. 18:35-43)

²⁹Singgatoo yanila tinggale ko Yelikho, badaang komian motunduwo Yesus. ³⁰Lua komian mopiit daano moosulang doi loloon bibilo. Sambuno yanila lengele Yesus moalomo, yanila wookon, “Daud Napau, seseange kami!”

³¹Mian badaang modaano idoo nggimoliyo yanila tukon sumboliiyo yanila inai napelek. Bai yanila pololokon kakabukuan wookon, “Tuan, Daud Napau, seseange kami!”

³²Maka Yesus tade tukon uange yanila. “Oila komo komuyu yase kukubaiyo doi komuyu?” Yesus sadaiyo.

³³Yanila timbiliyo, “Tuan, kami yase mokitayo kolipu!”

³⁴Yesus seseange yanila, maka taape yanila matano. Doi ya singgat yanila moolamo kitayo kolipu. Maka yanila malaingo Yesus.

Yesus usok doi Yelusalem tukon nggaangan

(*Mlk. 11:1-11; Luk. 19:28-40; Yoh. 12:12-19*)

21 Sambuno loolanimo ko Yelusalem, yanila polong doi Betfage doi Zaitun Bunggulo. Idoo Yesus sumboliiyo lua kona pololaing ampakon loolukon. ²“Potauso doi kampungoo mo sinasalaan,” Yesus tetebayo doi yanila. “Komuyu naikon mosobit kitayo daano komeeng kokaladai mokinooton tukon napau. Posodiiyo lua-lua tukon pobabayo doi sumai. ³Kalu daano komian momansadai oioila, bontiikene doi tumbuno, ‘Temeneno palaluuwo’, maka do mianoo tukon mosobit sodiikenemo do kaladaidoo nabinaba.”

⁴Langedoo buno doiya sulano nateali oila konabi nabinantil bunu naiya,

⁵ “Bontiikene doi Sion,
komu Tomundo lubat doikoo.

Yana monondok konoano tukon molokiti meeng kokaladai,
meeng kokaladai napau mo tatabokon.”

⁶Lapa doimbaa doi napololaingoo molua tauso tukon loingikene doi Yesus natinetebakonoo doi yanila. ⁷Yanila babayomo do kaladaidoo tukon napau. Maka yanila ombosiiyo do kaladai-kaladaidoo bungguto tukon napai jubah. Maka Yesus lokitiyo. ⁸Badaang komian indaa moambasene kona pai jubah doi loloon, bai komian bailong mopotoli kayung langano tukon adadale doi loloon tangano. ⁹Mian badaang mo ampakon mantailuk tukon motunduwo Yesus keikeison, “Tubo Daud Napau! Binalakaatimo yana mo lubat tukon Temeneno sambuno! Nggaaale ko Mian Bisa mo Tatandak Tuuno!”



Loloon doi kota Yelusalem (21:10)

¹⁰Maka sambuno Yesus usok doi Yelusalem, sasaibino komian doi kotadoo teali nggabut. “Naiya indee miano?” mian-mian doi kotadoo mansadai.

¹¹“Yana Nabi Yesus, lengget doi Nasalet doi Galilea,” mian badaang mo lainge Yesus napotimbili.

Yesus usok doi Temeneno Nabonua

(Mlk. 11:15-19; Luk. 19:45-48; Yoh. 2:13-22)

¹²Lapa doiya Yesus usok doi Temeneno Nabonua, tukon siikayo sasaibino komian mo poboluki idoo. Yesus buanggeyo komeda-meda posobolian doy, tukon banggo-banggo babalukanan tomisi lapatiing. ¹³Maka yana bantile doi mian-mianoo, “Doi Kitab Moliyous lalomo totulis baikon ko Mian Bisa bantile, ‘Daku bonua binantil bonua sambeangan.’ Bai komuyu tealikene mian molokis nadungolan!”

¹⁴Mian-mian mopiit tukon molemat lubat doi Yesus doi Temeneno Nabonua, tukon yana aline yanila. ¹⁵Bai imam-imam kapalano tukon gulu-gulu agama nggimal mokitayo komo minasaingdinggon Yesus mo kubaiyo. Tukon yanila nggimal molengele kolabuk-labuk mokokuweis doi Temeneno Nabonua, “Tubo Daud Napau!”

¹⁶Yanila bantile doi Yesus, “Ikoo lengele oila kona pai binantil?”

“Oode, yaku lengele,” Yesus timbiliyo. “Kai akiyoon komuyu pobasayo ayat doi Kitab Moliyous nia: ‘Labuk-labuk tukon pau lumboon lapamo ikoo otunggule sulano namabantil manggaalan mo kana’?”

¹⁷Lapa doiya Yesus tinggalemo yanila, maka tobuat doi kotadoo taus doi Betania tukon moolo idoo.

Yesus kutuke koala batango

(Mlk. 11:12-14, 20-24)

¹⁸Modoakon dodowasoono, doi naampakonon abali doi kota, Yesus malaalo. ¹⁹Yana kitayo komeeng koala batango doi loloon bibilo. Yana ampakon doi aladoo batango, bai aki namalaat mau nabaino meeng kosaono tolono loono. Maka Yesus bantile doi kayungoo, “Ikoo akimo musao koidan!” Aladoo batango polaing molooyu.

²⁰Sambuno Yesus napololaing-pololaing kitayo do kadadianoo, yanila masaingding tuuno. “Bulaa kai do aladoo batango polaing mate banggadudul?” yanila mansadai.

²¹“Bisa,” Yesus timbiliyo, “Kalu komuyu maangga tukon aki po balasaak, komuyu moola pokubaiyo oila komo lapamo yaku lakukanggene doi ala batango nia. Tukon aki natongo doiya, bai komuyu moola pobantile kobunggul nia, ‘Tobingkat tukon tasakukon doi tobun lalomo’: maka doiya langgedoo naikon teali. ²²Oila mo komuyu po kinabi doi posambeangan, komuyu naikon talimayo, asal komuyu maangga.”

Pasadai tentang doi Yesus nahaak

(Mlk. 11:27-33; Luk. 20:1-8)

²³Doibundu Yesus abali doi Temeneno Nabonua, maka usok tukon mongotunggul idoo. Yana daano momongotunggul, imam-

imam kapalano tukon sambu-sambu Yahudi lubat doi yana tukon mansadai, “Oila komu toiyano sasaibino nia ikoo moola kubaiyo? Indee komo beenggon haak?”

²⁴Yesus timbiliyo, “Yaku koidan mansadai doi komuyu, tukon kalu komuyu timbiliyo, yaku bontiikene doi komuyu tukon indee nahaak yaku mokubaiyo nalangge-langge nia. ²⁵Yohanes momansau mian tukon indee nahaak? Mian Bisa kai banggapi?”

Maka imam-imam kapalano tukon sambu-sambu Yahudidoo tambuun posadaikene doi yaniladoo. “Kalu kita bantile, ‘Tukon Mian Bisa nahaak,’ yana bantile, ‘Kalu buno doiya bulaando komuyu akipa maanga doi yana?’ ²⁶Bai kalu kita bantile, ‘Tukon banggapi nahaak,’ kita matakut doi mian badaang, sabab yanila sasaibino toiyo Yohanes daano meeng konabi.” ²⁷Jadi yanila timbiliyo, “Kami aki mai toiyo.”

Maka Yesus bantile doi yanila, “Kalu buno doiya mau yaku aki kubantile doikoo tukon indee nahaak yaku mokubaiyo sasaibino nia.”

Andean lua kolabuk

²⁸“Budodoiya bulaando komu palaat doi langge nia?” Maka Yesus bantile koikoidan. “Daano komeeng kotama mo totooli lua kopau malaneno. Mianoo ampakon doi napau langgongo tukon bantile, ‘Pau, ampakono balimang oloyo nia doi anggul asino.’ ²⁹‘Yaku aki kuyase,’ do paudoo timbiliyo. Bai lapa doimbaa boliimo kona pikilan tukon ampakono doi anggul asinodoo. ³⁰Lapa doimbaa tamanodoo ampakon doi napau koluano, tukon mabantil langge mo pokakana. ‘Monondok, Tama,’ paudoo koluano timbiliyo. Bai yana aki naampakon. ³¹Kalu doi paudoo luaila inaando komo loingiyu kotamano namongiasan?”

“Langgongo,” imam-imam kapalano tukon sambu-sambu Yahudi napotimbili.

Maka Yesus bantile doi yanila, “Poanggayomo: Pakabi-pakabi lulu tukon boi-boine balolowa naikon mantailukon teali Mian Bisa naumat kalu baino komuyu. ³²Sabab Yohanes Pasau Mian lubat, tukon tudoikene doi komuyu bulaando kotuboan Temeneno mo yase, bai komuyu aki poyase maangga doi otungguloo; bai kopakabi-pakabi lulu tukon boi-boine balolowa maanggamo doi yana. Bai mau kai nalapamo komuyu kitayo

sasaibino doiya, komuyu akipo boliiyo kopo pikilan tukon akipo maangga doi Temeneno.”

Andean polimang-polimang anggul asino

(Mlk. 12:1-12; Luk. 20:9-19)

³³“Ndongoliiyo naandean nia meeng koidan,” Yesus bantile. “Meeng komian buta tumbuno sakaiyo meeng kona anggul asino. Yana pagale potikunggon, tukon makali buang bapipisan anggul, lapa doiya maka kekendenge kosabua meeng batotoolian motatandak. Lapa doiya maka yana monggisabokene dona asidoo anggul doi molimangedoo, maka taus doi lipu bailong. ³⁴Sambuno laate kobapupuiyan anggul saono, buta tumbunodoo sumboliiyo kona peleleani-peleleani doi molimangedoo sulano natalimayo kona obos. ³⁵Bai domo limange do asidoo lakoyo do butadoo tumbuno napeleleani; komeeng binobokii, kobailong inakate, tukon kobailong sinokuli batu. ³⁶Butadoo tumbuno sumboliiyo koidan kona peleleani bailong, lobian kona kadaang doi tumbenodoo. Bai yanila binunokon dotumbenodoo. ³⁷Doibundu butadoo tumbuno sumboliiyo doi yanila kona pau susuungo, ‘Tantu daku pau inodotii,’ doi napopikikon. ³⁸Bai sambuno do polimangoo mo kitayo do butadoo tumbuno napau, yanila pobantikono meeng tukon bailong, ‘Ah naiyamo yana, kotumbuno mohaakiyo. Mai nda akateyo yana, sulano kita malaat naobos!’ ³⁹Maka do paudoo linako, sinakukon doi tonggulung, maka inakate.”

⁴⁰Yesus mansadai, “Nah kalu do asidoo anggul tumbuno abali, yana naikon oila kona kubaiyano do polimang-polimangoo?”

⁴¹Yanila timbiliyo, “Tantu yana naikon akateyo do mianoo molokis, maka namonggisabokene do asidoo anggul doi mian bailong mo yase beena obos do butadoo hasilo doi tempono.”

⁴²Maka Yesus bantile doi yanila, “Kai akiyoon komuyu pobasayo komo totulis doi Kitab Moliyous lalomo?

‘Batu mo aki tukang bangunan napakeyo tealimo batu mo pinalaluu.

Naiyamo ko Temeneno nakokubai; monondok tuuno!’ ”

⁴³“Jadi poneneeke,” Yesus bantile, “sasaibino kohaak buno Mian Bisa naumat inala doikoo tukon bineekon doi bangsa bailong mo ampakonggene ko Mian Bisa napalenta-palenta. [⁴⁴Komian mo otuwong doi batudoo, naikon manas; tukon do mianoo mo pinisaidoo batu, manas teali ambata.]”

⁴⁵Doiya kosinggatoo imam-imam kapalano tukon Falisi-falisi miano lengele Yesus naande-andean, yanila toiyomo baikon Yesus basilingangene yanila. ⁴⁶Jadi yanila pomeenggon molakoyo Yesus. Bai yanila matakutene komian badaang, sabab mian badaang aangene Yesus meeng konabi.

Andean lamean basowaanan

(Luk. 14:15-24)

22 Yesus basilingan koidan doi mian madaang tukon mangala andean, ²nabantilano, “Kalu Mian Bisa mapalenta, kona bunoan pokakana naandean nia: Meeng kotomundo kubaiyo kolamean basowaanan tuuk doi namalane. ³Tomundodoo sumboliiyo kona peleleani-peleleani taus uange komian mo inuang doi lameanoo. Bai do mianoo moinuang aki nayase lubat. ⁴Lapa doiya do tomundodoo sumboliiyo koidan kona peleleani-peleleani bailong. Yana bantile doi yanila: ‘Bontiikene doi mian moinuangoo: Kolobo masalo lapamo tasadia. Saapi, tukon daku saapi napau mo monondok tuuno lapamo kinolot. Sasaibino sadiamo. Polubato doi lameanoo basowaanan!’ ⁵Bai do mianoo mo inuang aki napopusinggon. Yanila ampakon doi nalimang memeeng - komeeng doi naasi, kobailong doi namangambalan; ⁶tukon kobailong lakoyo do peleleanidoo tomundo, maka bobokiiyo tukon akateyo yanila. ⁷Sambuno do tomundodoo lengele do langgedoo, yana nggimal tuuno. Yana sumboliiyo kona suludadu moakateyo do pangakate-pangakatedoo, tukon suayo yanila nakota. ⁸Lapa doiya yana uange kona peleleani-peleleani, maka bantile, ‘Lamean basowaanan lapamo sadia, bai saibino komo inuang aki namoola. ⁹Poampakono budodoiya doi loloon mobabasal, tukon pouange mau nabadaang komian molubat doi lamean basowaanan nia.’ ¹⁰Peleleani-peleleanidoo ampakono. Yanila ampakon doi loloon mobabasal maka pototongikene sasaibino komian napinosuunggon, mo monondok mau mo kulokis. Maka moonoo komian doi lamean basowaananoo tukon mian molubat.

¹¹Lapa doiya do tomundodoo usok mokita-kitayo domianoo molubat; yana kitayo daano komeeng komian doi lameanoo mo aki namapake pakean lamean. ¹²Maka yana sadaiyo do mianoo, 'Tulando, bulaando ikoo mousok dimbaa moaki mumapake pakean lamean?' Mianoo aki namoola mabantil oioila. ¹³Maka do tomundodoo bantile doi peleleani-peleleani, 'Boboiyo koaino tukon limano namian nia, tukon sakukene yana doi tonggulong doi lipu nakalipookanan. Imbalimo kona daanowan kokiilan tukon sakisaawan.' "

¹⁴Maka Yesus akabuse kona andeanoo bunu nia, "Badaang komo inuang, bai soisik komo tolilik."

Soal babealan lulu

(Mlk. 12:13-17; Luk. 20:20-26)

¹⁵Lapa doiya Falisi-falisi miano ampakon bisalakene singgat-singgat bulaa kona moolaan yanila moosinggete Yesus tukon pasadai-pasadai. ¹⁶Maka yanila sumboliiyo kona pai pololaing-pololaing ampakon doi Yesus polaing tukon bubulaa koanggota Helodes namian. Mian-mianoo bantile doi Yesus, "Tama Gulu, kami toiyo Tama monondok. Tama mongotunggul talaang tuuno ko Mian Bisa namongiasan motuuk doi banggapi, aki mupopusinggon komian bailong napalaat. Sabab Tama aki mulilike komian. ¹⁷Tobikon doiya, Tama bontiikene doi kami: Kalu nda agama atulano, kai moola nda babeal lulu doi Tomundo kai aki?"

¹⁸Yesus toiyo konoanoila mo kulokisoo, jadi yana bantile, "He, komuyu mian-mian mokakaadukon! Bulaando komuyu yase osinggete yaku? ¹⁹Soba tudoikene doi yaku dodoydoo komuyu mo pakeyo pebeal lulu!"

Maka yanila beekene doi yana meeng kodoydoo pelak. ²⁰Yesus mansadai doi yanila, "Gambal tukon indee miano sambuno naiya?"

²¹"Tomundo," yanila timbiliyo.

Maka Yesus bantile doi yanila, "Kalu bunu doiya, beekene doi Tomundo oila komo Tomundo koona, tukon doi Mian Bisa oila komo Mian Bisa koona."

²²Salataa yanila molongol do bantilanoo, yanila teali masaingding. Maka yanila ampakono tinggale Yesus.

Soal abalian tubo doi matean

(*Mlk. 12:18-27; Luk. 20:27-40*)

²³Doi ya kooloyonodoo koidan ko Saduki miano lubat doi Yesus. Yanila daano meeng komian tambuno mo pikikene baikon komian mate akimo natubo koidan. ²⁴“Tama Gulu,” yanila bantile, “Musa bunu naiya kona otunggul; Kalu meeng komalane mate, tukon yana akiyo kona pau, sio utuso nakilayo dobalunodoo sulano nadaano kona tulunan doi mianoo mo mate. ²⁵Daano pitu komian motolutus mo dungol dimbaa. Kolanggongo osowaan maka mate akiyo kona pau. Maka dobaluno tininggoliikon tuuk doi utuso. ²⁶Utusodoo aki namalumbit mate tukon akiyo kona pau. Bubuudoomo lakon tukon utuso kotoluno tuluus polong doi kopituno. ²⁷Doibundu boinedoo susuungo mate koidan. ²⁸Jadi, nalaate kotembono komian mate nainotuboian koidan, do boinedoo indee naboloki? Sabab domo pituiladoo lapamo poala yana.”

²⁹Yesus timbiliyo, “Komuyu sala tuuno, sabab komuyu aki poalatiyo ko Kitab Moliyous, mau Mian Bisa nakuasa. ³⁰Sabab kalu komian momate abalimo tubo, yanila akimo naosowaanan koidan, bai yanila tubo pokakana komalaekat doi sulugaa. ³¹Akiyoon baanggon komuyu pobasayo oila ko Mian Bisa nabinantil bunu kokaliangano komian momate moinotuboi koidan? Mian Bisa bantile, ³²‘Yakumo Abalaham na Mian Bisa, Ishak tukon Yakub na Mian Bisa.’ Mian Bisadoo bolikon Mian Bisa mian momate. Yana Mian Bisa mian motubo!”

³³Salataa do mianoo mobadaang lengele Yesus napobontiikon, yanila masaingdingene tuuno kona otunggul.

Palenta mo tutuu

(*Mlk. 12:28-34; Luk. 10:25-28*)

³⁴Singgato o Falisi-falisi miano lengele baikon Yesus molapamo kubaiyo ko Saduki miano akimo namoola basilingan oioila koidan, yanila pototongi. ³⁵Meeng komian doi yanila, doiyamo meeng kogulu agama, osinggete Yesus tukon meeng kopasadai. ³⁶“Tama Gulu,” nabantilano, “palenta oilakai komo tutuu doi agama atulano?”

³⁷Yesus timbiliyo, “Seseange ko Temeneno Mian Bisa tukon sasaibino konoamu, tukon sasaibino kobutomu, tukon sasaibino komu pikilan. ³⁸Doiyamo kopalenta mo tutuu tukon moponting! ³⁹Palenta koluano pokakana tukon do tumbenodoo: Seseange kotulamu pokakana kobutomu susuumu. ⁴⁰Sasaibino koagama atulano Musa mo beekene tukon otunggul doi nabi kona luwean doi palentadoo molua.”

Soal Tomundo Pasalamat

(Mlk. 12:35-37; Luk. 20:41-44)

⁴¹Daano ko Falisi-falisi miano pototongi idoo, maka Yesus mansadai doi yanila, ⁴²“Oila komuyu kopo palaat doi Tomundo Pasalamat? Indee nakatulunan yana?”

“Daud natulunan,” yanila timbiliyo.

⁴³“Kalu buno doiya,” Yesus sadaiyo, “oila kosababpo ko Mian Bisa Na Loh mobontiliyo Daud sulano nabantile Tomundo Pasalamat ‘Temeneno’? Sabab Daud bantile,

⁴⁴ ‘Temeneno bantile doi ku Temeneno:

osulang doi bakalinganggu taikon,

polong yaku kubaiyo komu musu-musu loingiyo ikoo.’

⁴⁵Jadi kalu Daud sombuikene Tomundo Pasalamato, ‘Temeneno’, bulaando kona tealian yana katulunan Daud?”

⁴⁶Akiyo komeeng komian momoola timbiliyo Yesus. Tukon mulai doi oloyodoo, akimo nadaano komo balani mansadai oioila koidan doi yana.

Poingotii sulano bada-badagai doi gulu-gulu agama tukon Falisi-falisi miano

(Mlk. 12:38-39; Luk. 11:43, 46, 20:45-46)

23 Maka Yesus bantile doi mian badaang tukon doi napololaing-pololaing, ²“Gulu-gulu agama tukon Falisi-falisi miano malaat kuasa sulano naunggoliiyo kona makisuut Musa naukum. ³Tobikon doiya loingiyo tukon tulutiyo sasaibino yanila napinalentakon. Bai inai mokubaiyo oila kona pai kinubai, sabab yanila aki naampakonggene oila kona pai inotunggukon. ⁴Yanila tuntute kolangge-langge mo maaling tukon beena palatulan-palatulan mo babalat, bai mau nabaino kai soisik yanila aki natulungiyo komian moampakonggene.

⁵Sasaibino komo yanila lakukene tolongo kai sulano komian nakitayo. Yanila sangadaiyo mapake alos sambeangan mo bebelan tukon kobulusane kona jubah ale-aleno! ⁶Yanila yase kotampat mo monondok tuuno doi lamean, tukon osulangan mosanaang doi bonua kaleda. ⁷Yanila sanaang kalu mian odotiiyo doi labotan-labotan, tukon inuanggon 'Tama Gulu'. ⁸Bai komuyu inai poyase inuanggon 'Tama Gulu', sabab komu Gulu tongo meeng tukon komuyu sasaibino montolutus. ⁹Tukon inai komuyu monguang meeng komian doi dunia nia 'Tama', sabab ko Tamamu tongo meeng, doiyamo Tama doi sulugaa. ¹⁰Tukon inai komuyu poyase inuanggon 'Pongotunggul', sabab kopo pongotunggul tongo meeng, doiyamo Tomundo Pasalamat mo lapamo Mian Bisa dondiikene. ¹¹Komian mo babasal doi komuyudoo siokai nateali mupeleleani. ¹²Komian mo katandake kobutongo naikon inepende, tukon mian mo pependeyo kobutongo naikon kinatandak."

Yesus sosiboliiyo kokokubai mokakaadukon

(Mlk. 12:40; Luk. 11:39-42, 44, 52, 20:47)

¹³"Silakamo kai komuyu gulu-gulu agama tukon Falisi-falisi miano! Komuyu tongo kakaadukon. Komuyu semba-sembeange komian moteali Mian Bisa naumat. Bai komuyu susuumuyu aki poyase teali Mian Bisa naumat, tukon mian bailong mo yase, komuyu semba-sembeange.

[¹⁴Silakamo kai komuyu gulu-gulu agama tukon Falisi-falisi miano: Komuyu tongo kakaadukon. Komuyu tongo tipuwe kobalu-balu tukon lambase kona bonua tukon sulano kopoo kulokisan naaki natotoi komuyu sambeang bulu-buluan. Doiyamo kosababpo komuyu kopo ukuman naikon babalat!]

¹⁵Silakamo kai komuyu gulu-gulu agama tukon Falisi-falisi miano! Komuyu tongo kakaadukon! Komuyu ampakon dodoon pintosiiyo kotobun, tukon loloiyo kobuta tina tongo sulano po kubaiyo meeng komian nausok doi muagama. Tukon kalu lapamo do mianoo usok doi muagama, komuyu kubaiyo yana nalaka miano, mo lobian lua luunggon kona kulokisan doi komuyu susuumuyu!

¹⁶Silakamo kai komuyu pongotunggul-pongotunggul mo piit! Komuyu mootunggukene naiya, 'Kalu komian batotopi domii Temeneno Nabonua, do mianoo aki natokooton doi natotopidoo; bai kalu yana batotopi domii mosoni doi Temeneno Nabonua, yana tokooton doi natotopidoo.' ¹⁷Komuyu mianmian bodoh mo piit! Naando komo lobian monondok tuuno: namas, kai do Temenenodoo Nabonua mo tealikene do mosonidoo moliyous? ¹⁸Komuyu otunggukene naiya koidan, 'Kalu meeng komian batotopi domii balabaan, do mianoo aki natokooton doi natotopidoo; bai kalu yana batotopi domii sosubakon doi balabaanoo bungkukono, yana tokooton doi natotopidoo.' ¹⁹Todudulo kopo piitan! Inaando komo lobian monondok tuuno? Nasosubakon kai balabaan mo tealikene do sosubakonoo moliyous? ²⁰Tobikon doiya, kalu meeng komian batotopi domii balabaan, doiya koalantino yana batotopi domii balabaan, tukon domii sasaibino kososubakon mo daano doi bungkukono. ²¹Tukon kalu komeeng komian batotopi domii Temeneno Nabonua, doiya koalantino yana batotopi domii do Temenenodoo Nabonua, tukon domii do Mian Bisadoo mo dungol idoo. ²²Tukon kalu komeeng komian batotopi domii sulugaa, doiya koalantino yana batotopi domii doi Temeneno nakulusii, tukon tuuk doi Mian Bisa mo osulang doi nakulusiidoo.

²³Silakamo kai komuyu gulu-gulu agama tukon Falisi-falisi miano! Komuyu kakaadukon. Lamba-lamba bunu salasi, adas momaamis, tukon jintan, komuyu mebee soobos doi Temeneno kalu songulo koobos. Banggokai kolangge-langge mo pontiing doi palatulan-palatulan agama, bunu: Kaadilan, poseseangan, tukon taatan, komuyu akipo popusinggon. Banggokai doiyamo komo sio pokubaiyo, tukon inai polapusene kobailong koidan. ²⁴Komuyu katua-katua mo piit! Pos doi po paisu ininum lalomo komuyu tilise, banggokai kounta komuyu lemese!

²⁵Silakamo kai komuyu gulu-gulu agama tukon Falisi-falisi miano! Komuyu kakaadukon! Manggo-manggo tukon mupingan-pingan komuyu kumosiyo doi tonggulungo nabilibisii bai doi lalomo manggilit tuuno tukon langge-langge komuyu molaate tukon doi ponggimalan tukon pomodokoan. ²⁶Falisi miano mopiit! Kumosiyo looluk nabilibisii domanggo-

manggodoo lalomo tukon domu pinggan, sulano doi tonggulungodoo koidan nateali bilisii!

²⁷Silakamo kai komuyu gulu-gulu agama tukon Falisi-falisi miano! Komuyu tongo kakaadukon! Komuyu pokakana kokibulkibul mo sineet moute; doi tonggulungo tokita monondok, bai doi lalomo moonoo tukon buku tukon sasaibino boowan. ²⁸Bunomo koidan komuyu. Doi tonggulung komuyu tokita monondok doi mian; bai doi lalom komuyu moonoo tukon bakala-kalaan maka kulokisan.”

**Yesus tantukene koukuman motuuk doi gulu-gulu agama
tukon Falisi-falisi miano**

(Luk. 11:47-51)

²⁹“Silakamo kai komuyu gulu-gulu agama tukon Falisi-falisi miano! Komuyu kakaadukon! Komuyu bangune kokibulkibul mo monondok tuuk doi nabi-nabi, tukon komuyu bubungaiyo kopaliasano doi mian mo monondok kona tuboan. ³⁰Tukon bantile, ‘Kalu andeno kami tubo doi loonudoo tumbunggami loolukonoo, aki mai moloingi yanila moakateyo konabinabi.’ ³¹Jadi komuyu mangakukenemo mau komuyu daano tulunan domianoo mo akateyo konabinabi! ³²Kalu buno doiya, pobanggadudulkenemo tukon poalapayomo kolalim-lalim mo lapamo tumbunggitadoo tambuune! ³³Komuyu kulokis tukon tulunan mian kulokis! Bulaando kopoo tealian salamatene kobutomuyu doi nalaka ukumano? ³⁴Ndongoliiyo momonondok: Yaku naikon makapatu doikoo nabi-nabi, mopandoi, tukon gulu-gulu; kosoobos doi yaniladoo naikon komuyu akateyo, tukon kosoobos naikon komuyu sembange doi kayung sembang. Daano komo naikon komuyu sakisaayo doi bonua-bonua kaleda, tukon komuyu lelengene doi meeng kokota tukon doi kota bailong. ³⁵Tobikon doiya, komuyu inukum sabab pomangakatean mian mo akiyo kona sala - tambuun doi Habel nainakatean mo akiyo kona sala polong doi Zakalia Belekia napau nainakatean, komuyu akateyo doi Temeneno Nabonua napo kalatanaan tukon balabaan. ³⁶Poanggayomo: sasaibino doiya tinonggungikon doi mian doi loonu nia!”

Yesus seseange ko Yelusalem

(Luk. 13:34-35)

³⁷“Yelusalem, Yelusalem! Ikoo akateyo konabi-nabi, Mian Bisa nabobintokon ikoo sakule batu polong pomatekon. Madaango luunggon yaku yase dagaiyo sasaibino komu mian pokakana komanuk tinano mosoloupiyo kona pau-pau doi kapilo adeno, bai aki poyase! ³⁸Tobikon doiya, ko Mian Bisa akimo nalolainge ikoo. ³⁹Potoiyo: Tambuun diabudodoo ikoo akimo mukitayo yaku koidan polong ikoo bantile, ‘Binalakaati yana mo lubat tukon Temeneno sambuno.’”

Yesus basilingangene bulaa kokaliangano ko Temeneno Nabonua namolompoan

(Mlk. 13:1-2; Luk. 21:5-6)

24 Salataa Yesus tinggale ko Temeneno Nabonua, kona pololaing-pololaing lubat doi yana tukon tudeyo kobangunan-bangunan Temeneno Nabonuadoo. ²Yesus bantile doi yanila, “Kai komuyu kitayo sasaibinodoo? Potoiyomo, akiyo komeeng kobatu doi bangunan-bangunanoo naikon mototinggal tosusun doi natangabosan. Sasaibino naikon linamas.”

Kona susaan tukon sakisaawan

(Mlk. 13:3-13; Luk. 21:7-19)

³Doibundu Yesus ampakon doi Zaitun Bunggulo, tukon daano moosulang, kona pololaing-pololaing lubat mopobasalitai tukon yana. “Bontiikene doi kami sasaibinodoo indee kotembono kona tealian,” yanila bantile doi yana, “Indee kopaloosano mookitakene Tama nalubatan tukon dunia nakiamatan?”

⁴Yesus timbiliyo, “Pobadagai, inai napolong komuyu totipu. ⁵Sabab badaang komian molubat tukon moalayo kosambunggu tukon bantile, ‘Yakumo kai do Tomundodoo Pasalamat!’ Yanila naikon badaang komian natinipu. ⁶Komuyu molongol salita poakatean tukon papalangan bulitano, bai inai pomatakut. Sabab doiya langge-langgedoo sio nateali, bai doiya akiyoon nalaate kotembono kona kiamatan. ⁷Kobangsa meeng poakate tukon bangsa bailong, konegala meeng naikon lobosio konegala bailong. Doi yayaa naikon teali komalaalan tukon leali. ⁸Sasaibino ,doiya sodo namangatambuunan tolong,

pokakana komeeng koboine mo meneemiyonggon malalas doi namosuungan.

⁹Doibundu komuyu linako tukon bineekon sulano po sinakisaa tukon inakate. Sasaibino komian doi dunia mosikitene komuyu sabab komuyu kupololaing. ¹⁰Doiya singgato badang komian momulutat, tukon molokis-lokise tukon pomosikiton meeng tukon bailong. ¹¹Badang konabi-nabi mokala naikon molubat, tukon okoliyo komian badang. ¹²Kokulokisan naikon landa bunu doiya kona hebatan polong badang komian moakimo namoola koidan poseang. ¹³Bai mian mo bataanggon polong doibundu naikon sinalamaton. ¹⁴Tukon Bilita Monondok kaliangano bulaando ko Mian Bisa namapalentaan naikon pinolonggon doi posaapon kodunia, sulano sasaibino komian moola molongol. Lapa doiya maka nasodo lubat kokiamat.”

Kulokisan mo bamanas

(Mlk. 13:14-23; Luk. 21:20-24)

¹⁵“Komuyu naikon kitayo ‘Kulokisan mo bamanas’, pokakana komo bunu Nabi Daniel nabinantil, kokondong doi tempat mo moliyous. (Sasatan doi mobasayo: Popalatikanggene oila koalatio!) ¹⁶Doiya kosinggato, mian mo daano doi Yudea sio naobuleng doi bunggul. ¹⁷Mian mo daano doi bonua atono bunggono inai naobulus momangala oila komo daano doi nabonua lalomo. ¹⁸Mian mo daano doi naasi inai naabali moalayo kona jubah. ¹⁹Buka maen, kona kulokisan oloyo-oloyodoo tuuk boi-boine mo tianan, tukon boboloki mo daano mosusuwo kona pau! ²⁰Posambeang sulano inai komuyu po obuleng doi tembo udan kai oloyo Tadean! ²¹Doi oloyo-oloyo mo kulokisoo daano naikon kosusaan mobabasal mo akiyon nateali salataa doi dunia natinealikonan looluk polong naiya nia, tukon akimo naikon nateali koidan. ²²Kalu kai ko Mian Bisa aki nakependeyo kotembono; maka akiyono komeeng komian mo salamat. Bai tobikon naumat, ko Mian Bisa pependeyomo kotembono.

²³Doiya singgato kalu daano komeeng komian mobantile doi komuyu, ‘Kitayo, do Tomundo Pasalamatoo daano naimbaa!’ kai ‘Yana daano idoo!’ – inai poanggayo do mianoo. ²⁴Sabab

naikon sumbut kopasalamat-pasalamat mokala tukon nabi-nabi mokala. Yanila kubaiyo kokokubai-kokubai mo akiyo kona bunoan, tukon mominasaingdinggon sulano nabatipu, kalu moola, mau Mian Bisa naumat koidan. ²⁵Jadi poneneeke! Yaku lapamo popitoikene doi komuyu loolukonoo moakiyoon do langgedoo nateali.

²⁶Kalu komian bantile doikoo, 'Kitayo, yana daano indaa doi padang lalomo!' – inai komuyu po badombalaakon. Kai kalu yanila bantile, 'Kitayo, yana basookon doi kombiang nia lalomo!' – inai pomaangga. ²⁷Sabab Manusia Napau nalubatan pokakana kodidip laango motebeas doi tolopot tukon kopanano polong doi talise.

²⁸Inaando kona anoan kobunut, idoo daano kotomisi mokaane kobunut."

Manusia Napau nalubatan

(Mlk. 13:24-27; Luk. 21:25-28)

²⁹"Aki namalumbit kona lapaan do susaanoo tumbeno, oloyo teali kalipookan, tukon bituwon akiyono kolaango. Bituon-bituon pauno tuwong luwedei timbu, tukon mototooliyo kodapang teali nggabut. ³⁰Sambuno lapa doiya Manusia Napau paloosano tokita doi timbu. Doiya kosinggatoo sasaibino kobanggapi doi dunia kokiil. Yanila kitayo Manusia Napau molubat doi bunong bungukono maka nakuasa tukon kinabasalan mo babasal. ³¹Popuukon tolompot babasal pinuuko, tukon Manusia Napau sumboliiyo kona malaekat-malaekat mopototongikene kona mian doi sangkap kopasuno kolipu nai dunia nia doi timbu bunduno meeng polong doi timbu bunduno bailong."

Otunggul doi ala batango

(Mlk. 13:28-31; Luk. 21:29-33)

³²"Poalayo kootunggul doi ala batango. Kalu langa-langaano manampal tukon muyuk, tukon mangatambuuno sopii, komuyu toiyo baikon kotembo pintal loolanimo. ³³Bunomo lakon kalu komuyu kitayo do langge-langgedoo moteali, komuyu toiyo baikon kotembono loolanimo tuuno. ³⁴Potoiyo! Do langge-

langgedoo naikon teali akiyoon ko mian-mian mo tubo nia budodoo namate sasaibino. ³⁵Timbu tukon buta naikon lapus, bai daku bantilan sidutu-posidutukon.”

Akiyo komo toiyo kooloyono tukon kojamo


(Mlk. 13:32-37; Luk. 17:26-30, 34-36)

³⁶“Akiyo komo toiyo kooloyono tukon kojamo, malaekat-malaekat doi sulugaa aki, mau Mian Bisa Napaudoo aki, tolongo Tama tolong komo toiyo. ³⁷Kalu Manusia Napau lubat naikon kondondoongo pokakana doi loonu Nuh natubooan looluk. ³⁸Doi oloyo-oloyo moakiyoon do lombadoo babasal nalubat, komian badaang kaan inum, tukon basowaan. Bunomo lakon doiya momeenggon polong doi oloyo Nuh nausokan doi nakapal lalomo. ³⁹Sambuno do lombadoo lupayo yanila sasaibino, maka nasodo yanila toiyo oila komo teali. Bunomo lakon doiya kondondoongo naikon kalu Manusia Napau lubat. ⁴⁰Doiyo kosinggatoo, lua komian daano mobalimang doi asi; komeeng binaba, tukon komeeng tininggal. ⁴¹Lua koboine modaano gilinge kona gandum; komeeng binaba, tukon komeeng tininggal. ⁴²Jadi, pobadagai, sabab komuyu aki potoiyo komu Temeneno nalubatan. ⁴³Neneeke naiya! Kalu andeno dobonuadoo tumbuno toiyo kojamo bulaa doi popookoo kopondikuk naikon lubat, yana aki namoolo, sulano kopondikuk aki nausok doi nabonua. ⁴⁴Tobikon doiya, komuyu sio pobasa-basadia. Sabab Manusia Napau lubat doi tembo mo aki posangka-sangkayo.”

Peleleani mo satia tukon peleleani mo aki nasatia

(Luk. 12:41-48)

⁴⁵Yesus bantile koidan, “Kalu bunoo doiya, peleleani mo inaando komo satia tukon mopandoi? Yanamo komo tinealikon kapalano doi peleleani-peleleani bailong, sulano yana nabeena yanila kaan kana kotembono. ⁴⁶Monondok tuuno do peleleanidoo kalu kona tuan abali, tukon laate yana daano mokubaiyo kona limang. ⁴⁷Poanggayomo, do tuanoo monggidagaikenemo sasaibino kona buat doi peleleanidoo! ⁴⁸Bai kalu do peleleanidoo kulokis, yana naikon bantile doi noano lalomo, ⁴⁹“Daku tuan daano malumbit maka naabali,” maka



Posi tukon baabosan lisison (25:3)

yana tambuuno bobokiiyo kopeleleani-peleleani bailong, tukon kaan monginum tukon mian-mian momalangu. ⁵⁰Doibundu dona tuan abali doi oloyo tukon jam mo aki natinoi. ⁵¹Maka do peleleanidoo naikon binobokii tutuuno doi natuan, tukon sinakukon doi tempat mian mokakaadukon. Yanila kokiil tukon sakisaa idoo.”

Andean kaliangano doi songulo koboine

25 “Kalu baikon Manusia Napau lubat bunu Temeneno, kondondoongo pokakana doi andean nia lalomo: Songulo koboine mokotulaiyo bandolonoo suwe-suwele mangala posi, maka ampakon ndobotiyo dobadolonoo malane. ²Lima komian doi yaniladoo longas, tukon lima kobailongoo pandoi. ³Lima koboine mo longas babayo kona posi, bai aki namababa lisison pasadiakon. ⁴Boine limailadoo mo pandoi babayo kona

posi tukon nalisison sinadia. ⁵Bandolon malanedoo malumbit nalubat, jadi do boinedoo pipiito maka yanila moolo.

⁶Pintanga kopopook, maka sodo nalinongol koalalo mokuweis, 'Bandolonoo malaneno lubato! Maimo nda ndobotiyo yana!' ⁷Boinedoo mosongulo bangun, maka suayo kona pai posi. ⁸Boi-boinedoo mo longas bantile doi mo pandoidoo, 'Beenggami polisison soisik sabab komai posi kabimo poso.' ⁹'Aki namoola!' boi-boinedoo mo pandoi napotimbili, 'sabab inaikene kita sasaibino aki nasukup konda lisison. Poampakono mongoli doi teko.' ¹⁰Do boi-boinedoo mo longas ampakon mongoli lisison. Sodo yanila ampakon, lubato dobandolonoo malaneno. Boinedoo molimaila mo pandoi mo daano kona lisison usok polaing tukon dobandolonoo malane doi tempat balameanan, tukon kotataapon tinataapikono!

¹¹Doibundu boi-boinedoo bailong lubat. Yanila wookon, 'Tuan, Tuan, bukayo natataapon nia sulano mai usok.' ¹²Bai do bandolon malanenodoo timbiliyo, 'Yaku aki kutingoniiyo komuyu!' "

¹³Maka Yesus opupusiyo kona andeanoo bunu naiya, "Tobikon doiya pobada-badagai, sabab komuyu aki potoiyo kooloyono kai kojamo."

Andean tolu kopeleleani

(Luk. 19:11-27)

¹⁴"Kalu kai Manusia Napau lubat bunu Temeneno kondondoongo pokakana nai andean nia lalomo. Meeng komalane lengget ampakon doi lipu mododoon. Yana uange kona peleleani-peleleani, maka monggitotoolikene kona buat doi yanila. ¹⁵Doi memeeng kopeleleandoo yana beekene manulut nangginoolakon pau meeng tukon pau meeng. Doi meeng komian yana beena lima koloon kodoy mosoni. Doi bailong yana beena lua koloon kodoy mosoni. Tukon doi meeng koidan yana beena sololoon kodoy mosoni. Maka yana ampakono. ¹⁶Peleleani mo mantalima lima koloon kodoy mosoni polaing ampakon badagang, maka malaat utung lima koloon kodoy mosoni koidan. ¹⁷Bunomo koidan do peleleani mo mantalima lua koloon kodoy mosoni malaat utung koidan lua koloon. ¹⁸Bai



Yunani miano nadoy (25:15)

dopeleleanidoo mo mantalima sololoon kodoy mosoni ampakon makali buang doi buta, maka seekene dona tuan nadoy idoo.

¹⁹Lapa doiya malumbit tuuno, maka do peleleanidoo natuan mule, maka tambuun kubaiyo kona polekengian tukon yanila. ²⁰Peleleani mo mantalima lima koloon kodoy mosoni lubat, tukon salakangene songulo koloon. 'Tuan,' yana bantile, 'Tuan beekene doi yaku lima koloon kodoy mosoni. Kitayo niiya, yaku daano malaat utung lima koloon koidan.' ²¹'Monondok,' tuanoo nabantilano, 'ikoo peleleani mo monondok tukon satia. Sabab ikoo moola muinangga tukon mo soisik, yaku maanggakene komo badaang doikoo. Usoko tukon malaingo mobalabalasanaang polong yaku!'

²²Maka peleleani mo mantalima lua koloon kodoy mosonidoo lubat, tukon bantile, 'Tuan, Tuan lapamo beekene yaku lua koloon kodoy mosoni doi yaku. Kitayo, yaku malaat utung lua koloon koidan.' ²³'Monondok,' tuanoo bantile, 'ikoo peleleani mo monondok tukon satia. Sabab ikoo moola muinangga tukon mo soisik, yaku maanggakene doikoo komo badaang doikoo tukon malaingo mobala-balasanaang tukon yaku!' ²⁴Doibundu dopeleleanidoo mo mantalima soloon kodoy mosoni lubat, tukon

bantil, ‘Tuan, yaku toiyō Tuan meeng komian mo balani. Tuan pupuiyō kosaono doi lipu Tuan moaki namasakakon, tukon mangala hasilo doi lipu Tuan moaki namotipas kalibuang. ²⁵Yaku matakut, jadi yaku taus moseekene Tuan nadoy doi buta lalomo. Naiyamo Tuan nadoy.’ ²⁶‘Ikoo peleleani mo lokis tukon malas!’ tuanoo nabantilano. ‘Bolikon kai ikoo lapamo toiyō baikon yaku mobapupui doi lipu moaki kumasakakon, tukon mangala hasilo doi lipu moaki kumotipas kalibuang? ²⁷Kalu bunō doiya, siokai ikoo abese daku doydoo doi bank, sulano kalu yaku mulemo yaku moola talimayo daku doydoo tukon bungano. ²⁸Tobikon doiya, alayomo doydoo doi yana, tukon beekene doi mianoo mo daanomo kosongulo koloon kodoy mosonidoo. ²⁹Sabab komian mo daanomo koonā, binee koidan lobian badaang, tukon yana ano kona lobianan. Bai komian mo akiyō koonā, soisik komo daano doi yana inala koidan. ³⁰Tukon do peleleanidoo mo akiyō kotakoso, sakukenemo doi tonggulung doi kalipookan lalomo. Imbali yana kokiil tukon sakisaa!’ ”

Pangadilan doi Oloyo Nakiamatan

³¹“Kalu kai Manusia Napau lubat bunō tomundo sasaibino kona malaekat lainge yana, yana osulang doi nakulusii monondok. ³²Sasaibino kobangsa nai dunia nia pinototongikon doi salaano. Maka yana alaase yanila teali lua kotambunō pokakana kopototooli iyayon moalaase kona domba doi domba. ³³Mianmian mo loingiyo ko Mian Bisa namongiasan pinototongikon doi bakalingano, tukon kobailong doi bobono. ³⁴Doibundu do tomundodoo bantile doi mianoo modoi bakalingano taikon, ‘Maimo, komuyu Tamanggu mo balakaatiyo. Usoko doi ku Batomundoan lalomo mo lapamo sinadiakon doikoo salataa dunia natinealikonan. ³⁵Sabab doi tembo yaku malaal, komuyu beenggu kaan, tukon yaku molou, komuyu beenggu monginum. Yaku meeng komian molulubaton, komuyu talimayo yaku doi mubonua. ³⁶Yaku aki kubapake, komuyu beena yaku pakean. Yaku seselon, komuyu pakuliyaku. Yaku tinalunggu komuyu tulungiyaku.’

³⁷Maka do mianoo bantile, ‘Temeneno, oila kotembono kami kitayo Temeneno malaal maka kami beena kaan

Temeneno, kai molou maka kami beena Temeneno monginum?
³⁸Oila kotembono kami kitayo Temeneno pokakana komian molulubaton maka kami motalimayo Temeneno doi mai bonua lalomo? Oila kotembono Temeneno aki nabapake, maka kami beena Temeneno pakean? ³⁹Oila kotembono kami mokitayo Temeneno seselon kai tinalunggu, maka kami tulunge Temeneno?’ ⁴⁰Tomundodoo naikon timbiliyo, ‘Potoiyo: Doi tembo komuyu pokubaiyano do langgedoo, mau natolongo doi meeng komian doi utus-utusonggu mo tinotulai, koalantino komuyu kubaiyo tuuk doi yaku!’

⁴¹Maka do tomundodoo naikon bantile, doi mianoo modaano doi bobono taikon, ‘Ampakono naimbaa, mianoko molokis! Usoko doi aung lalomo mo akiyo kona posoan, mo lapamo sinadiakon doi Ibiliis tukon namalaekat-malaekat! ⁴²Sabab doi tembo yaku malaal komuyu akipo beenggu kaan; yaku molou komuyu akipo beenggu monginum. ⁴³Yaku mian sodo lubat, komuyu aki potalimayo yaku doi po bonua lalomo. Yaku aki kubapake, komuyu akipo beenggu pakean, yaku seselon tukon doi talunggu, komuyu akipo tulungiyo yaku.’ ⁴⁴Maka yanila naikon bantile doi yana, ‘Temeneno, oila kotembono kami mokitayo Temeneno momalaal kai molou, kai meeng komian mosodo lubat, kai aki nabapake, kai seselon, kai tinalunggu, tukon kami aki natulunge ko Temeneno?’ ⁴⁵Tomundodoo timbiliyo, ‘Potoiyo: doi tembo komuyu akipo yase tulunge komeeng komian mo tinotulai nia, koalantino komuyu akipo yase tulungiyo yaku.’ ⁴⁶Maka do mianoo inukum tukon ukuman mo akiyo kona pupusan, bai komian mo kubaiyo ko Mian Bisa namongiasan malaat tuboan mobisa tukon posidutukon.”

Pangakakon Yesus

(*Mlk. 14:1-2; Luk. 22:1-2; Yoh. 11:45-53*)

26 Sambuno Yesus lapa otunggukene sasaibino do langgedoo, yana bantile doi napololaing-pololaing, ²“Komuyu toiyo lua kooloyo koidan Oloyo Babasal Paskah, tukon Manusia Napau naikon sinalakanggon sulano nasinempanggon doi kayung sempang!”

³Doiyo kosinggatoo imam-imam kapalano tukon katua-katua Yahudi pototongi doi Imam Babasal Kayafas nakamali. ⁴Yanila

posadaikene sulano nalakoyo Yesus tukon aki natinoi, tukon akateyo yana. ⁵“Bai,” yanila bantile, “inai do langgedoo nakinubai doi lamean tembono, sabab naikon sumbut kopo nggalanggabutonon doi layat.”

Yesus kinundongii lisison mobabangi doi Betania

(Mlk. 14:3-9; Yoh. 12:1-8)

⁶Salataa Yesus daano doi Betania, doi Simon nabonua doi mo loolukoo kanakon takatol mo minosikiton, ⁷meeng koboine lubat doi Yesus. Yana mababa meeng kobotol mokinubai luwedoi batu galaas, koantoko lisison mobabangi mo maaling. Doiya singgat Yesus daano moosulang kaan, do boinedoo kundongiikene do lisisonoo mobabangi doi Yesus oluno bunggono. ⁸Yesus napololaing-pololaing kitayo do langgedoo yanila teali nggimal. “Oila kona totuuk sasaibino nia modinadaat?” yanila bantile. ⁹“Lisison mobabangidoo moola nabinalukon tukon koolino maaling tuuno, maka kodoyno nabineekon doi mian motalalais!”

¹⁰Yesus toiyoyo yanila napikilan, maka yana bantile, “Bulaando komuyu mokubaiyo susa naboine nia? Yana kubaiyo kolobo mo monondok tukon tanggaal tuuk doi yaku. ¹¹Mian motalalais sidutu daano doi komuyu, bai yaku aki kusidutu polaing-laing tukon komuyu. ¹²Tukon nakundangano do lisison lambudoo mobabangi doi butonggu, yana masadiakene yaku tuuk daku kinibulan. ¹³Poanggayomo! Doi posaapon kodunia, inaando tolong ko Bilita Monondok moluwedoi Mian Bisa napinolonggonan, boine nia nakokubai naikon binasalitakon koidan teali tondoan doi yana.”

Yudas yase moloilokise Yesus

(Mlk. 14:10-11; Luk. 22:3-6)

¹⁴Maka meeng komian doi songulo lua Yesus napololaing, kosambuno Yudas Iskaliot, ampakon doi imam-imam kapala. ¹⁵Yana bantile doi yanila, “Oilakai naikon komuyu kopo bineekon doi yaku kalu yaku beekene Yesus doi komuyu?” Maka yanila mangait tolu kolono kodoy pelak, maka yanila beekene do doydoo doi yana. ¹⁶Tambuun doiya singgat Yudas moumboliimo todanan mo monondok sulano naloilokise Yesus.

Yesus kaane kokinaan Paskah tukon napololaing-pololaing

(Mlk. 14:12-21; Luk. 22:7-14, 21-23; Yoh. 13:21-30)

¹⁷Doi oloyo tumbeno doi Lamekanano ko Loti Moakiyo ko Lagino, Yesus napololaing-pololaing lubat doi yana. Yanila mansadai, “Naando Tama naiyasano kami mosadiayo kokinaan Paskah tuuk Tama?”

¹⁸Yesus timbiliyo, “Tauso doi meeng komian doi kota tukon bontiikene doi yana, ‘Tama Gulu nabantilan, lapamo polong kotembono motuuk doi yaku; yase lamekene kolamean Paskah doi mubonua posinggat-singgat tukon kupololaing-pololaing.’”

¹⁹Yesus napololaing-pololaing kubaiyo oila komo Yesus nasinumboliikon doi yanila. Yanila ampakon sadiayo kokinaan doi Paskahdo.

²⁰Salataa popook, Yesus tukon songulo lua kona pololaing osulang kaan. ²¹Daano yanila mokaan Yesus bantile, “Pondongoliyo: meeng komian doi komuyu naikon loilokise yaku.”

²²Pololaing-pololaing Yesus lengele doiya teali susa. Maka yanila meeng komian tukon meeng mansadaikene doi Yesus, “Tantu bolikon yaku komo Tama naminakisuuti?”

²³Yesus timbiliyo, “Mian mo kemeke koloti doi manggo lalomo posinggat-singgat tukon yaku, yanamo naikon komo loilokise yaku. ²⁴Takainomo Manusia Napau naikon mate, bunu komo totulis doi Kitab Moliyous lalomo. Bai silakamo kai komiano mo loilokise Manusia Napau! Tadukai do mianoo naaki nasinuung!”

²⁵Maka Yudas do poloilokisoo bantile, “Tantu bolikon yaku Tama Gulu naminakisuuti?”

Yesus timbiliyo, “Bunomo kai komu bantilan.”

Temeneno nalamean

(Mlk. 14:22-26; Luk. 22:15-20; 1Kol. 11:23-25)

²⁶Salataa yanila kaan, Yesus mangala loti, maka sambeang. Doibundu yana bata-bataiyo do lotidoo tukon limano maka beekene doi napololaing-pololaing tukon bantile, “Alayo, tukon kaane; naiyamo kobutonggu.”

²⁷Lapa doiya yana mangala meeng kogalaas anggul, maka sambeangene doi Mian Bisa. Doibundu yana beekene do

angguloo tukon abosano doi napololaing-pololaing, tukon bantile, “Inume, komuyu sasaibino. ²⁸Sabab naiyamo kosaunggu mo sahkanggene ko Mian Bisa nadandi – sau mo kinundang tuuk doi mian badaang, tuuk potolos yanila nalalim. ²⁹Anggayomo: Yaku akimo kai naikon kumonginum naanggul nia koidan polong doi tembo yaku inume koanggul mo boolu posinggat-singgat tukon komuyu doi Tamanggu na Dunia Boolu.”

³⁰Doibundu yanila mananikene meeng konanian panggaal. Tukon salataa lapa doiya yanila ampakon doi Zaitun Bunggulo.

Tinantukono Petulus moakiyenggene Yesus

(Mik. 14:27-31; Luk. 22:31-34; Yoh. 13:36-38)

³¹Maka Yesus bantile doi napololaing-pololaing, “Naiya popookia koidan komuyu sasaibino obuleng tinggale yaku; sabab doi Kitab Moliyous lalomo totulis; ko Mian Bisa bantile, ‘Yaku naikon akateyo do pototoolidoo, tukon kona domba teali sasabul.’ ³²Bai salataa yaku inotuboi koidan, yaku ampakon matailukiyo komuyu doi Galilea.”

³³Petulus bantile doi Yesus, “Batadikenemo sasaibino natinggale Tama, bai yaku aki kutinggale Tama!”

³⁴“Neneeke,” Yesus bantile doi yana, “Napopookia koidan, akiyoon komanuk nakokuuwa, ikoo tolumo luunggon muakiyenggene yaku.”

³⁵Petulus timbiliyo, “Mau kumate polaing Tama, yaku aki naikon kubantile baikon moaki kutingoniiyo Tama!”

Tukon sasaibino kona pololaing bailong bantile buno doiya.

Yesus sambeang doi Getsemani

(Mik. 14:32-42; Luk. 22:39-46)

³⁶Lapamo doiya Yesus ampakon tukon napololaing-pololaing doi meeng kolipu kosambuno Getsemani. Imbali yana bantile doi yanila, “Osulang dimbaa yaku daano motaus sambeang.”

³⁷Maka yana uange Petulus tukon Zebedeus napau lua taus

polaing tukon yana. Yana nomiiyomo poloon tukon susa. ³⁸Yana bantile doi napololaing-pololaing, “Konoangu poloon tuuno pokakana yaku naikon momatemo. Podungolo dimbaa, tukon pomalaing mobada-badagai tukon yaku.”

³⁹Doibundu Yesus taus mododoon soisik, maka yana ladangene kotuulo doi buta maka sambeang. “Tama,” kona bantilano, “kalu moola, dedeengene doi yaku kosakisaa mo sio kutoupiyo nia. Bai inai moloingiyo daku mongiasan; tongo Tama namongiasan komo teali.”

⁴⁰Lapa doiya Yesus abali doi napololaing mototuiladoo tukon laate yanila daano momoolo. Yana bantile doi Petulus, “Tongo meeng kojam komuyu tolu komuyu aki namoola pobadagai tukon yaku? ⁴¹Pobada-badagai kai, tukon posambeang sulano komuyu naaki pokanakan palasobaan. Takainomo komu pikilan yase komo kana bai komuyu aki namoola, sabab banggapi nakokubai lemah.”

⁴²Yesus taus sambeang koidan, kona bantilano, “Tama, kalu nasakisaawan nia sio kutoupiyo, tukon akimo namoola dinodoonggon, batadikenemo kai Tama namongiasan komo teali.” ⁴³Sambuno lapa doiya Yesus abali koidan, tukon laate kona pololaing-pololaing daano momoolo, sabab yanila todudul pipiito tuuno.

⁴⁴Koikoidan Yesus tinggale yanila tukon doiyamo kotoluno luunggon yana sambeang tukon mabantil bantil-bantilan mo pokakana. ⁴⁵Lapamo doiya yana abali koidan doi napololaing-pololaing tukon bantile, “Kai daano komuyu momoolo tukon balasanaang? Kitayo, laatemo kotembono Manusia Napau nasinalakanggonan doi mian mobaladosa nakuasa. ⁴⁶Pobanguno, mai nda taus. Kitayo! Mian mo loilokise yaku lubato!”

Yesus linako

(Mlk. 14:43-50; Luk. 22:47-53; Yoh. 18:3-12)

⁴⁷Daano Yesus mobasilingan, Yudas, meeng komian doi mosongulodoo lua kona pololaing lubato. Polaing-laing tukon yana, lubato koidan komian badaang mo mbaba bakoko tukon tompide. Yanila sinumbolii imam-imam kapalano tukon katua-katua Yahudi. ⁴⁸Dopoloilokisoo lapamo popitoikene doi yanila natanda nia, “Mian yaku mo umayo, doiyamo komiano. Lakoyo yana!”

⁴⁹Bunomo doiya polong doi lipudoo, Yudas banggadudul taus doi Yesus tukon bantile, “Tabea, Tama Gulu!” Maka yana umayo Yesus.

⁵⁰Yesus timbiliyo, “Utus, oila kona totuuk Utus molubat doi sumai?”

Doibundu do mianoo mobadaang usok, tukon lakoyo Yesus. ⁵¹Daano komeeng kona pololaing mo daano idoo tukon Yesus, kibute kona bakoko maka tobosiikene doi imam babasal naata polong bontol kotolingaino. ⁵²Yesus bantile doi napololaingoo, “Usekenemo koidan komu bakoko doi salungo, sabab sasaibino komian mo mapake bakoko yana mate tukon bakoko. ⁵³Ikoo aanggene yaku aki kumoola mangkabi tulung doi Tamanggu, tukon sulano yana mosobit naikon olubate lobian songulo lua kopasukan suludadu malaekat? ⁵⁴Bai kalu bunomo doiya, akimo nateali bunu domo lapadoo tinantukon doi Kitab Moliyous lalomo, baikon takainomo sio nateali bunu naiya budodoo?”

⁵⁵Maka Yesus bantile doi mian mo badaangoo, “Kai yaku nia mian kulokis, tobikon komuyu polubat mababa bakoko tukon tompide sulano polakoyo yaku? Samba kooloyo yaku mongotunggul doi Mian Bisa Nabonua, bai komuyu aki polakoyo yaku! ⁵⁶Bai takainomo sio nabuno doiya sulano nateali oilamo konabi-nabi nabinantil mo totulis doi Kitab Moliyous lalomo.”

Lapa doiya, sasaibino kona pololaing-pololaing obuleng otinggalemo Yesus.

Yesus inadili doi Pangadilan Agama salaano

(Mlk. 14:53-65; Luk. 22:54-55, 63-71; Yoh. 18:13-14, 19-24)

⁵⁷Mian badaang mo lakoyo Yesus babayo yana doi Imam Babasal Kayafas nabonua. Indaa gulu-gulu agama tukon katua-katua Yahudi lapamo pototongi. ⁵⁸Petulus badodoonggon motunduwo Yesus polong doi imam babasal nabonua basaleano. Maka Petulus usok doi basaleano, tukon osulang pototongi tukon dopototooli-pototoolidoo. Yana yase toiyo bulaando sasaibinodoo kona pupusan. ⁵⁹Imam-imam kapalano tukon sasaibino komo Pangadilan Agama moumbolii kasaksian mosala sulano namoola otuwenge Yesus nainukum mate. ⁶⁰Bai yanila aki namalaat mau nabaino meeng kobukutii, mau kai nabadaang

komo lubat mo teali sakisii mokala-kala. Doibundu daano kolua komian mo lubat doi muka. ⁶¹Yanila bantile, “Mian nia bantile, ‘Yaku moola lepeyo ko Mian Bisa Nabonua, tukon tolu kooloyo moolamo nakekendenge koidan.’”

⁶²Maka imam babasalo kokondong, tukon bantile doi Yesus, “Kai ikoo aki mumotimbili do pangasalakonoo doikoo?” ⁶³Bai Yesus aki nabiyok. Imam babasal bantile koidan doi yana, “Lolo Mian Bisa mo tubo, bantilemo doi kami kai koomo ko Tomundo Pasalamat, Mian Bisa Napau?”

⁶⁴Yesus timbiliyo, “Bunomo domu bantilanoo. Bai anggayomo: diabudodoo, komuyu naikon kitayo Manusia Napau moosulang taalikon bakalinga doi Mian Bisa Mobasala Konakuasa, tukon lubat doi bunong bungkono luwedoi timbu!”

⁶⁵Maka doimam babasalo sia-siake kona pakean, tukon bantile, “Yana bantile lokis ko Mian Bisa! Akimo napalaluu sakisii, komuyu lapamo lengele kona bantil-bantilan mo lokis doi Mian Bisa!

⁶⁶Doiya budodoo bulaamo komuyu kopo palaat?”

Yanila timbiliyo, “Yana salamo, tukon sio namate.”

⁶⁷Maka yanila tupeiyo Yesus duduso, tukon nanale yana. Daano koidan komo tapiyo yana ⁶⁸tukon bantile, “Soba timbiliyo tukon bontiikene doi kami, oh Tomundo Pasalamat! Indee komo tapiyo ikoo?”

Petulus akyengene Yesus

(Mlk. 14:66-72; Luk. 22:56-62; Yoh. 18:15-18, 25-27)

⁶⁹Petulus daano moosulang doi tonggulung, doi basaleano. Daano komeeng kopeleleani boine molubat, tukon bantile doi Petulus, “Bolikon kai ikoo koidan domo polaing-laingoo Yesus do Galileadoo miano?”

⁷⁰Bai Petulus akyengene doi yanila sasaibinodoo salaano. “Yaku aki kutoiyo komu makisuut,” Petulus napotimbili, maka ampakon doi basaleano tataapono. ⁷¹Komeeng kopeleleani boine bailong kitayo Petulus, tukon bantile doi mianoo idoo, “Mian nia tadodoo daano polaing tukon Yesus moluwedoi Nasaletoo.”

⁷²Maka Petulus bangakiyonggon koidan, tukon batotopi, “Tutuu yaku aki kutingoniiyo koiya mianoko!” Petulus bantile.

⁷³Aki namalumbit salataa lapa doiya, mian badaangoo mo kokondong idoo lubat doi Petulus, tukon bantile, “Bisamo ikoo daano meeng komian doi yaniladoo. Koiya tokita tuuno doi mubasilinganan.”

⁷⁴Maka Petulus tambuuno bato-batotopi tukon bantile, “Yaku aki kutingoniiyo koiya komianoko!”

Doiya singgat polaing kokuuwa komanuk. ⁷⁵Tukon Petulus tandandayomo Yesus molapamo bantile doi yana, “Akiyoon komanuk nakokuuwa, ikoo tolu mo luunggon muakiyenggene yaku.” Maka Petulus tobuat tukon kokiil polong-poloong.

Yesus binaba doi Pilatus

(*Mlk. 15:1; Luk. 23:1-2; Yoh. 18:28-32*)

27 Dodowasoono, sasaibino koimam kapalano tukon katua Yahudi mangala kaputusan moakateyo Yesus. ²Yanila boboiyo yana, tukon babayo yana, maka beekene doi Pilatus, gubelnul pamalenta Loma.

Yudas namatean

(*Kis. L. 1:18-19*)

³Salataa Yudas do poloilokisoo kitayo baikon Yesus mola-pamo binee ukuman, yana manasalo. Maka yana abalinggene do doydoo motolu kolono kopelak doi imam-imam kapalano tukon katua-katua Yahudi. ⁴Yana bantile, “Yaku baladosamo moloilokise komian mo akiyo kona sala, polong yana inukum mate!”

Bai yanila timbiliyo, “Kami aki mai motoi? Koiya muulusan susuumu!”

⁵Yudas sakukene do doydoo doi Temeneno Nabonua lalomo, maka taus tukon bakoot bulung.

⁶Imam-imam kapalano pulute do doydoo tukon bantile, “Doy nia doy sau. Kalu atulan agama, doy nia aki namoola inusokon teali sosubakon doi Temeneno Nabonua.” ⁷Sambuno yanila lapa pomeenggon, yanila pakeyo do doydoo pongoli buta mo sinombuikon Buta Tukang Tobunan. Butadoo pinake bakibulan

doi mian molulubaton. ⁸Doiyamo kosababpo polong oloyo nia do butadoo sinombuikon “Buta Sau”.

⁹Tukon doiya, tealimo oila komo Nabi Yelemia nabinantil, doiyamo, “Yanila mantalima tolu kolono kodoy pelak, doiyamo koolino mo lapamo pinomeenggon doi bangsa IsraeI teali pebeal tuuk doi yana. ¹⁰Tukon do doydoo yanila pakeyo teali pongoli buta tukang tobunan, buno Temeneno napinalentakon doi yaku.”

Pilatus palesayo Yesus napalakala

(Mlk. 15:2-5; Luk. 23:3-5; Yoh. 18:33-38)

¹¹Singgatoo Yesus mangadap doi Pilatus, gubelnul doi lipudoo, Pilatus mansadai, “Kabudoon ikoo tomundo Yahudi miano?”

“Bunomo komu bantilan,” Yesus timbiliyo. ¹²Bai tembo imam-imam kapalano tukon katua-katua Yahudi moloolukonggon badaang kopangasalakon motuuk doi Yesus, yana aki namotimbili.

¹³Tobikon doiya Pilatus bantile doi yana, “Kai ikoo aki mumolongol sasaibino yanila napangasalakon doikoo?”

¹⁴Bai Yesus aki natimbiliyo mau nasoisik, tobikon do gubelnuloo teali masaingding tuuno.

Yesus kinonoi ukuman mate

(Mlk. 15:6-15; Luk. 23:13-25; Yoh. 18:39 - 19:16)

¹⁵Doi samba ko Lamekanano ko Paskah, gubelnul mongosodii meeng komian motinalunggu mololoi mian badaang naililik.

¹⁶Doiya singgat daano komeeng komian moinukum mo minaamasakon. Kosambuno Yesus Balnabas. ¹⁷Jadi salataa domianoo badaang lapamo pototongi, Pilatus mansadai doi yanila, “Indee kopoo iniyas kusodiiyo tuuk doi komuyu? Yesus Balnabas kai Yesus mo binantil Klistus?” ¹⁸Pilatus bantile buno doiya sabab yana toiyo, baikon katua-katua Yahudi beekene Yesus doi yana sabab yanila masakit konoano.

¹⁹Doiya singgat Pilatus daano moosulang doi kantol mangadilian, kona boloki makapatu teteba doi yana, “Inai momasambul kona palakala koiya mian noko mo akiyo kona sala, sabab tobikon yana, yaku olumon mo lokis tuuno

kolubongi.” ²⁰Bai imam-imam kapalano tukon katua-katua Yahudi momeenggon tomboniiyo komian badaangoo sulano nakabiyo doi Pilatus, Balabas komo sinodii bai Yesus sio nainukum mate. ²¹Maka do gubelnuloo mansadai koidan doi yanila, “Doi mian moluailadoo indee kopoo iniyas kusodiiyo tuuk doi komuyu?”

“Balnabas,” yanila timbiliyo.

²²“Kalu buno doiya, yaku sio nabulaando kokubaiyano tukon Yesus mo sinombuikon Klistus?” Pilatus mansadai doi yanila.

“Posempangemo yana!” yanila sasaibino napotimbili.

²³“Bai oila kona kulokisan?” Pilatus napasadai.

Maka yanila wookon kakabukuan koidan, “Posempangemo yana!”

²⁴Doibundu Pilatus toiyomo baikon yana moakimo namoola mokubaiyo oioila koidan tukon koidan do mianoo naikon nggimalo. Jadi yana mangala paisu, maka doi mianoo badaangoo salaano yana kumosio kolimano tukon bantile, “Yaku aki kumasasalaan kona matean naiya mian nia! Koiya poulusan!”

²⁵Sasaibino do mianoo badaang timbiliyo, “Oode, batadikene-mo kami tukon mai labuk-labuk komo tanggunge kona ukuman doi namatean nia!”

²⁶Maka Pilatus sodiiyo Balnabas tuuk doi yanila, tukon sumboliiyo komian nabobokiiyo Yesus; tukon salakanggene yana sulano nasinempanggon.

Suludadu-suludadu maenggene Yesus

(Mlk. 15:16-20; Yoh. 19:2-3)

²⁷Doibundu Pilatus nasuludadu-suludadu babayo Yesus usok doi gubelnul nakamali, tukon sasaibino kona pasukan pototongi boilingiyo Yesus. ²⁸Yanila bukayo Yesus napakean, maka kinonoikon doi yana kojubah mosamelaon. ²⁹Yanila mokubai meeng kotomundo nasonggo doi kayung langaano mosoniton, tukon kinonoikon doi Yesus oluno. Doibundu yanila abese komeeng kotongkat doi limano bakalingano, maka yanila sosubaiyo yana doi salaano tukon totulaiyo yana. “Tabea Tomundo Yahudi Miano!” yanila bantile. ³⁰Yanila tupeiyo

yana, tukon alayo do tongkatoo maka umbosiikene yana doi oluno. ³¹Salataa lapa yana minaenggon, yanila bukayo kona jubahdoo mosamelaon maka pinekeikon koidan kona pakean susuungo. Doibundu yana binabamo doi tonggulung sulano nasinempanggon.

Yesus sinempanggon

(Mlk. 15:21-32; Luk. 23:26-43; Yoh. 19:17-27)

³²Doi loloon tangano, yanila posuungene komeeng komian molengget doi Kilene kosambuno Simon. Yanila pakisaayo yana natanggunge Yesus nakayung sempangan. ³³Doibundu yanila polong doi meeng kolipu kosambuno Golgota, koalatino, "Mangabosan Olu". ³⁴Idoo yanila beena Yesus monginum anggul mo sinabul lobo iyuno. Bai sambuno lapa Yesus tamise do angguloo, yana akimo nayase monginum.

³⁵Doibundu yanila sempangemo yana, maka ebe-ebese kona pakean tukon undian. ³⁶Lapa doiya yanila osulang mototooliyo yana indaa. ³⁷Doi oluno bungkono yanila abese kotulisan moteali pangasalakon doi yana, doiyamo: "Naiyamo Yesus, Tomundo Yahudi Miano". ³⁸Polaing-laing tukon yana yanila sempangene koidan kolua komian molokis; komeeng komian doi bakalingano taikon, komeeng koidan doi bobono sembeleng.

³⁹Komian mo alon idoo suasualilinggene kooluno, tukon totulaiyo Yesus. ⁴⁰Yanila bantile, "Ikoomo komo yase lomoboyo ko Mian Bisa Nabonua, tukon mokekendenge koidan tongo tolu kooloyo! Kalu ikoomo ko Mian Bisa Napau, obulus koiya kayung sempangokon, tukon salamatenene kobutomu!"

⁴¹Bunomo lakon doiya koimam-imam kapalano tukon gulu-gulu agama maka katua-katua Yahudi sosiboliyo Yesus. Yanila bantile, ⁴²"Yana salamatenene komian bailong, bai kobutongo susuungo yana aki namoola salamatenene! Kalu yana tomundo Israel, tadukai yana diabudodoo naobulus doi kayung sempangoo, maka nasodo kami yase momaangga doi yana. ⁴³Yana maangga doi Mian Bisa, tukon bantile baikon yana Mian Bisa Napau. Oode, mai nda kitayo kai ko Temeneno yase mosalamatene yana doiya budodoo."

⁴⁴Pangakate-pangakate mo sinempang tukon Yesus sosiboliiyo yana koidan buno doiya!

Yesus namatean

(Mik. 15:33-41; Luk. 23:44-49; Yoh. 19:28-30)

⁴⁵Doi nasuunan kooloyo, tolu kojam kona kalumbit posaapon do tanodoo teali kalipookan. ⁴⁶Batong tolu kikinobian, Yesus wookon tukon kabasale koalalo, “Eli, Eli lama sabakhtani?” koalantino, “Oh ku Mian Bisa, oh ku Mian Bisa bulaando kai ikoo motinggalaku?”

⁴⁷Bubulaa komian modaano idoo molengele Yesus nawooko-nanoo, maka bantile, “Yana uange Elia!” ⁴⁸Meeng komian doi yaniladoo moso-mosobit taus mangala kalang bungano maka tooniyo doi anggul momeele lalomo. Doibundu yana tabeyo doi meeng kokayung bunduno, tukon tutumikene doi Yesus suungo bibilo.

⁴⁹Bai komian bailong bantile, “Totiliiyo, mai nda kitayo kai Elia lubat mosalamatene yana!”

⁵⁰Doibundu Yesus wookon koidan tukon kabasale koalalo, maka yana supakene kona ansaang labino.

⁵¹Toik lalanse doi Temeneno Nabonua tebeak tongobos lua doi bungkok polong doi bilit. Kobuta sakean tonggiyok tukon kobunggul-bunggul batuno tabatai. ⁵²Kokibul-kibul tobuka, tukon badaang ko Mian Bisa naumat mo lapamo mate tubo koidan. ⁵³Yanila tobuat doi kibul-kibuloo sambuno Yesus tubo doi namatean tukon yanila usok doi Yelusalem. Indaa badaang komian mokitayo yanila.

⁵⁴Pasukan kapalano polaing-laing tukon nasuludadu-suludadu mo totooliyo Yesus teali matakut tuuno sambuno yanila kitayo do butadoo motonggiyok tukon sasaibino komo tealidoo. Yanila bantile, “Bisamo, yana nia Mian Bisa Napau!”

⁵⁵Idoo daano mobadaang koboine mo mongkita doi nadodoonan. Yanilamo komo lapamo malaing Yesus sulano natulungiyo yana salataa doi Galilea. ⁵⁶Doi yaniladoo doiyamo Malia Magdalena, Malia Yakobus tinano tukon Yusuf, tukon Zebedeus napau-pau tinano.

Yesus nakinibulan

(*Mlk. 15:42-47; Luk. 23:50-56; Yoh. 19:38-42*)

⁵⁷Doi popookoo lubat komeeng komian mokaasa doi Alimatea, kosambuno Yusuf. Yana lakon pololaing Yesus. ⁵⁸Yana ampakon doi Pilatus, maka kabiyo Yesus badano. Maka Pilatus monggipalentakene sulano doi Yesus badanodoo nabineekon doi yana. ⁵⁹Maka Yusuf alayo do badanoo, maka bungusio toik lenan patolo mo boolu. ⁶⁰Maka yana abese Yesus badano doi nakibul kinubai susuungo doi meeng kobunggul batu lalomo. Lapa doiya yana nggolinggene kobatu meeng mobabasal teali patataapikon doi kibuloo, maka yana taus.

⁶¹Malia Magdalena tukon Malia bailong dungol osulang idoo sasalaane do kibuloo.

Pototooli-pototooli kibul

⁶²Modoakon kolobo, doi oloyo Tadean, imam-imam kapalano tukon Falisi-falisi miano ampakon polaing-laing momangadap doi Pilatus, ⁶³tukon bantile, “Tuan, kami neneeke tempodoo domo batipudoo modaano motubo, yana lapamo bantile, ‘Salataa tolu kooloyo yaku tubomo koidan.’” ⁶⁴Tobikon doiya, sumboliiyo komian natotooliyo do kibuloo mono-monondok polong doi oloyo kotoluno, sulano kona pololaing-pololaingoo aki namoola ndikuke kobadano maka nabantile doi mian-mian baikon yana lapamo inotuboi doi matean. Tukon bakala-kalaan doibundu nia lobian kona kulokisan doi tumbeno.”

⁶⁵“Komuyu daano kopoo suludadu pototooli,” Pilatus bantile doi yanila, “potauso totooliyo tuuno do kibuloo.”

⁶⁶Maka yanila taus doi kibuloo tukon yanila beena soloot doi batu potutupino tukon mangabos padagai doi salaano, sulano naakiyo komo biye-biyeke do kibuloo.

Yesus natuboaan

(*Mlk. 16:1-10; Luk. 24:1-12; Yoh. 20:1-10*)

28 Salataa kooloyo Tadean toliis, doi Minggu oloyono dodowasoono, Malia Magdalena, tukon Malia bailonggon taus momokita do kibuloo. ²Sosinggot teali koleali mo

babasal. Meeng ko Temeneno namalaekat lengget doi sulugaa maka nggolinggene do batudoo potutupo, tukon osulang doi bunggono. ³Malaekatoos duduso pokakana kodidip, tukon kona pakean moute tuuno. ⁴Suludadu kapalano mo batotooli idoo matakuto polong yanila bubusak tukon teali buno mian momate.

⁵Malaekatoos bantile doi boi-boinedoo, “Inai pomatakut! Yaku toiyoo komuyu umboliiyo Yesus mo lapamo sinempang-gonoo. ⁶Yana akiyoo dimbaa. Yana tubomo koidan buno komo lapamo yana bantile looluk. Mai kitayo kona tangabosan doi yana nakinooloanoo. ⁷Budodoiya, tauso moso-mosobit, bontiikene doi napololaing-pololaing, ‘Yana lapamo tubo, tukon budodoiya yana tauso mantailukiyo komuyu doi Galilea. Imbali komuyu kitayo yana!’ Neneeke oila komo lapamo yaku bantile doikoo.”

⁸Moso-mosobit boi-boinedoo tinggale do kibuloo. Tukon noanoila momatakut posoloi nasanaangan yanila obu-obuleng mobontiikene do langgedoo doi Yesus napololaing-pololaing.

⁹Sosinggot Yesus lubat pososung tukon do boi-boinedoo, tukon bantil, “Tabea!” Maka yanila lubat koolaniyo yana doibundu lebeke koaino tukon sosubaiyo yana. ¹⁰“Inaikai matakut,” Yesus bantile doi yanila, “taus pobabotilangene doi utus-utusonggu sulano yanila nataus doi Galilea; imbali yanila kitayo yaku.”

Suludadu kapalano nalapulan

¹¹Daanon do boi-boinedoo taus, bubulaa moluwedoi suludadudoo kapalano mo tootooliyo do kibuloo abali doi kota tukon popitoikene doi imam-imam kapalano sasaibino komo lapamo teali. ¹²Imam-imam kapalanodoo posadaikene tukon katua-katua Yahudi, maka beena doy badaang doi suludadudoo mobatotooli, ¹³tukon bantile, “Komuyu sio pobantile baikon pololaing-pololaing Yesus lubat doi popook oloyoo, tukon ndikuke dobadanoo daano komuyu momoolo. ¹⁴Tukon kalu gubelnuloo lengele doiya langgedoo, kami asi-asiyo yana sulano komuyu akipo malaat oioila kokasulitano.”

¹⁵Maka suludadu kapalano alayo doydoo, tukon kubaiyo buno komo tinetebaikoo doi yanila. Tobikon doiya salitadoo daano motasabukon doi Yahudi miano polong doi oloyo nia.

Yesus okitakene kobutongo doi napololaing-pololaing

(Mlk. 16:14-18; Luk. 24:36-49; Yoh. 20:19-23; Kis. L. 1:6-8)

¹⁶Kosongulono meeng Yesus napololaing taus doi Galilea bunggulo pokokonoi tukon Yesus napinalentakon doi yanila. ¹⁷Salataa yanila kitayo Yesus imbali, yanila sosubaiyo yana. Bai daano kobailong doi yaniladoo mo sasaaki. ¹⁸Yesus koolaniyo yanila, tukon bantile, “Sasaibino kokuasa doi sulugaa tukon doi dunia lapamo bineekon doi yaku. ¹⁹Tobikon doiya potauso doi sasaibino kobangsa doi posaapon kodunia nia tealikene yanila kupololaing-pololaing. Posauwo paisu salani yanila tukon pobantile Tama sambuno, tukon Pau sambuno, tukon Mian Bisa Na Loh. ²⁰Otunggukene doi yanila naloingiyo sasaibino komo lapamo yaku palentakene doikoo. Tukon neneeke yaku daano mololainge komuyu polong doi lounu napupusan.”

BILITA MONONDOK MALAKUS MO PELENGGENE

PANGANTOKON

Buku Bilita Monondok luwedoi Malakus inatambuun tukon pangakuan: "Naiyamo ko Bilita Monondok doi Yesus Klistus, Mian Bisa Napau". Doi Bilita Monondokoo lalomo Yesus inokitaikon pokakana meeng komian mo badaang kona kokubai tukon taangga tuuno. Kona taangaan tokita doi namongotunggulan, doi kuasa motuuk doi ibiliis, tukon doi naompuniano kolalim. Yesus okitekene kobutongo salaku Manusia Napau mo beekene kona tuboan sulano kobanggapi nainosodii luwedoi lalim.

Nasinalitaan Yesus naiya buku nia lalomo pinolonggon doi natokitaan tukon tontong tuuno. Kona kokubai-kokubai badaang doi nabantilan tukon naotunggul. Lapa atambuune kona bantil-bantilan mopalus motuuk doi Yohanes Pasau Mian tukon doi Yesus nasinauan tukon nasinobaiyan doi butongo, Malakus nakitab nia banggadudul salitayo Yesus nameleleanian, doiyamo nabangalinan sesel tukon nabangotunggulan. Paspal-pasal napupusan totulis kolangge-langge kaliangano mo teali doi minggu napupusan, doi Yesus natuboan lalomo nai dunia nia, komo penting tuuno doiyamo nasinempanganoo kobutongo tukon natuboan doi matean.

Koluano doi Malakus nakitab napupusan, mo minakisuuti doi tanda kulung babasal lalomo, sasaibino tinoi bolikon natulisan komo tulise Malakus nakitab bai kai mian bailong.

Antoko

Pololukoni 1:1-13

Yesus nameleleanian mian badaang doi Galilea 1:14-9:50

Luwedoi Galilea taus doi Yelusalem 10:1-52

*Minggu napupusan doi Yelusalem tukon
moololaniyo 11:1-15:47*

Yesus natuboan koidan 16:1-8

*Bangokitakonan tukon nainoluweiyan Yesus doi
sulugaa 16:9-20*

Yohanes Pasau Mian naotunggul

(Mat. 3:1-12; Luk. 3:1-18; Yoh. 1:19-28)

1 Naiyamo ko Bilita Monondok bulaa kokaliangano Yesus Klistus, Mian Bisa Napau. ²Bilita Monondokoo tinambuun pokakana Nabi Yesaya natinulis, buno naiya,

“ ‘Naiyamo daku binontokon,’ Mian Bisa bantile;

‘Yaku bintekene yana loolukon doi komuyudoo, sulano yana nabukayo kololoon motuuk doikoo.’

³ Daano komian mowowookon doi padang lalomo,

‘Sadiayo kololoon motuuk doi Temeneno; keseayo kololoon mo linoloi.’ ”

⁴Pokakana domo totulisoo, bunomo doiya koidan Yohanes lubat doi padang lalomo. Yana sauwo komian tukon pelenggene kobilita moluwedoi Mian Bisa. “Komuyu sio pobadodoloon doi polalim-lalim tukon sio po sinau, sulano ko Mian Bisa naompunio komuyu,” bunomo doiya Yohanes nabantilan. ⁵Sasaibino komian doi lipu Yudea tukon kota Yelusalem miano ampakon mondongolii Yohanes naotunggul. Yanila mangakukene kona lalim-lalim, tukon Yohanes sauwo paisu yanila doi Paisu Yoldan.

⁶Yohanes napakean unta buluno. Kona pabaang kulit, kona kinaan betek tukon ani dokoto. ⁷Yana babilitakene naiya bilita nia, “Sio lapa yaku lubat, naikon lubat komian mo lobian babasal kona kuasa doi yaku. Mau nabaino yaku totuku mobukayo kona sapatu alosodoo, yaku aki nateali. ⁸Yaku sauwo komuyu tukon paisu, bai yana naikon sauwo komuyu tukon Mian Bisa Na Loh.”

Yohanes sauwo Yesus

(Mat. 3:13-17; Luk. 3:21-22)

⁹Doiya kosinggatoo Yesus lubat doi Nasalet lipu Galilea, tukon Yohanes sauwo doi Paisu Yoldan. ¹⁰Salataa Yesus sumbot doi paisudoo, yana kitayo kotimbu tobuka tukon ko Mian Bisa Na Loh obulus pokakana kotomisi lapatiing doi bunggono. ¹¹Lapa doiya tololongol ko Mian Bisa alalo mobantile, “Ikoomo daku Pau sineang. Ikoomo komo kindendeke konoanggu.”

Ibiliis sobaiyo Yesus

(Mat. 4:1-11; Luk. 4:1-13)

¹²Lapa doiya Mian Bisa Na Loh antekene Yesus doi padang lalomo. ¹³Sangkap kolono kooloyo Yesus daano idoo, Ibiliis nasobaiyano. Iyayon-iyayon mombosolo daano podungoli idoo tukon yana, tukon malaekat-malaekat leleaniyo yana.

Yesus uange kosangkap komian mosabang

(Mat. 4:12-22; Luk. 4:14-15, 5:1-11)

¹⁴Salataa Yohanes tinalunggu, Yesus ampakon doi Galilea, tukon babilitakene idoo ko Bilita Monondok moluwedoi Mian Bisa. ¹⁵Kona bantilano, “Mosobito naikon ko Mian Bisa natambuune kona mapalentaan. Pobadodoloon doi polalim-lalim, tukon anggayomo ko Bilita Monondok moluwedoi Mian Bisa!”

¹⁶Singgatoo Yesus ampakon doi Paisu Galilea bibilo, yana kitayo komian lua mosabang, doiyamo Simon tukon Andelias utuso piyoto. Yanila daano momalako ikan tukon bapukat ikan doi paisudoo. ¹⁷Yesus bantile doi yanila, “Lainge yaku, yaku otunggule komuyu poteali popukat mian.” ¹⁸Maka yanila polaing tinggale kona pukat tukon lainge Yesus.

¹⁹Yesus ampakon momeenggon, maka kitayo koidan kolua komian montolustus bailong, doiyamo Yakobus tukon Yohanes, Zebedeus nalabuk-labuk. Yanila luaila daano doi duangan lalomo tukon yanila daano mokindendeke kona pai pukat.

²⁰Yesus banggadudul uange yanila. Tukon yanila tinggalemo kotamano tukon napai mian tinambo doi duanganoo. Maka yanila ampakon lainge Yesus.

Mian mo inusoki ibiliis

(Luk. 4:31-37)

²¹Yesus tukon napololaing-pololaing polong doi kota Kapelnaum. Doi oloyo Tadean koikoidanggon, Yesus usok doi bonua kaledaan maka tambuune kona mongotunggulan.

²²Ko mian-mian mondongolii kona otunggul masaingding tuuno, kona mongotunggulan. Sabab, yana mongotunggul inangga, aki nabuno kogulu-gulu agama.

²³Doiya kosinggatoo meeng komian mo inusoki ibiliis usok doi bonuadoo kaleda lalomo, tukon wookon, ²⁴“Eh Yesus, Nasalet miano, ikoo yase kubaiyo oila doi kami? Ikoo lubat sulano musilakayo kami? Yaku toiyo indee ikoo: Ikoomo kobito-bito mo moliyous moluwedoi Mian Bisa!”

²⁵“Tade!” Yesus gilaiyo do ibiliisoo, “Koliato doi mian nia!”

²⁶Maka do ibiliisoo tika-tikakene do mianoo kokobukuan, doibundu yana dampas doi mianoo maka wookon. ²⁷Sasaibino komian masaingding tuunc, tobikon yanila bantil meeng tukon bailong, “Oh, oila nia? Meeng kootunggul mo boolu! Tukon nainanggaan tukon nakuasa yana palentayo do ibiliisoo nadampas, tukon yanila loingiyo yana!”

²⁸Maka dobilitadoo motuuk doi Yesus tolongol tukon mosobit doi mian badaang doi posaapon kolipu Galilea.

Yesus aline komian badaang nasesel

(Mat. 8:14-17; Luk. 4:38-41)

²⁹Yesus tukon napololaing-pololaing tinggale do bonuadoo kaleda, tukon ampakon doi Simon tukon Andelias napai bonua. Yakobus tukon Yohanes ampakon koidan polaing yanila. ³⁰Simon namonianan moluko seselon maligoot doi namooloan. Singgat doiya Yesus tukon napololaing-pololaing usok doi bonuadoo, doiya langgedoo pinopitoikon doi Yesus.

³¹Maka Yesus ampakon doi Simon namonianan, tukon taaniyo

kolimano, maka bangune. Kona maligoot tangalin, tukon yana koidan leleaniyomo yanila.

³²Doi kinobiannoo, sambuno sosoopo kooloyo, mian-mian babayo sasaibino komian mo seselon tukon mo inusoki ibiliis doi Yesus. ³³Sasaibino komian doi kotadoo pototongi doi bonuadoo salaano. ³⁴Maka Yesus aline komian badaang mo kanakon moisalomo kosesel, tukon koidan siikayo koibiliis mobadaang. Yana aki napataikene do ibiliis-ibiliisoo nabasingan, sabab yanila toiyo indee miano yana.

Yesus bangotunggul doi Galilea

(Luk. 4:42-44)

³⁵Modoakon kooloyo, sodo dodowasoono, Yesus banguno tukon tinggale do bonuadoo. Yesus ampakon doi lipu mo kiis doi kota tonggungo, tukon sambeang idoo. ³⁶Bai Simon tukon tula-tulano ampakon umboliiyo Yesus. ³⁷Tukon salataa yanila pososuungene, yanila bantile, “Sasaibino komian daano moumboliiyo Tama.”

³⁸Bai Yesus timbiliyo, “Maimo nda banggadudulkene konda ampakanan doi kota-kota bailong doi napokoolanikonan naimbaa. Yaku sio kumongotunggul indaa koidan, sabab doiyamo komakisuuto yaku modoisumaikon.”

³⁹Tobikon doiya Yesus ampakon doi yayaa posaapon ko Galilea, tukon mongotunggul doi bonua-bonua kaleda tukon siikayo koibiliis.

Yesus tangalingene komeeng komian mo takatolon

(Mat. 8:1-4; Luk. 5:12-16)

⁴⁰Meeng komian mo takatolon mo minosikiton lubat doi Yesus. Mianoo ladangene kotuulo, tukon bantile, “Kalu Tama yase, Tama namoola alinaku.”

⁴¹Yesus seseange do mianoo. Maka, yana taape do mianoo tukon bantil, “Yaku yase, mutangalino!” ⁴²Doiya kosinggato kona takatol lapus tukon tangalin. ⁴³Maka Yesus sumboliiyo yana ampakon tukon ingotiikene, ⁴⁴“Ingate, inai mosalitayo doi inde-indee komiano, bai ampakono doi imam, tukon kabiyo yana natantukangene ikoo molapamo tangalin. Maka domu tangalinganoo sosubakene komu sosubakon loingikene Musa

napinalentakon, teali meeng kobukutii doi mian-mian baikon ikoo bisa-bisa lapamo tangalin.”

⁴⁵Bai do mianoo ampakono, tukon momeenggon basalitakene do kadadianoo doi yayaa polong Yesus aki namoola usok doi kota tukon bangokitakonggon. Yana tongo dungol doi kota tonggulungo doi lipu mokiis. Bai komian momeeng lubotiiyo yana doi yayaa.

Yesus aline komeeng komian molemat

(*Mat. 9:1-8; Luk. 5:17-26*)

2 Bubulaa kooloyo koidan Yesus abali doi Kapelnaum. Maka tololongolo kobilita baikon Yesus modaano doi bonua. ²Maka badaang komian molubat. Yanila pototongi idoo polong akiyono kodungolan. Doi tataapon moonoo komian. Maka Yesus pelengene kobilita moluwedoi Mian Bisa doi yaniladoo. ³Daano yana mobasilingan, sangkap komian motanggunge komeeng komian molemat mobinabaikon doi Yesus. ⁴Bai padungga komian motodudul badaang, yanila aki namoola koolaniyo. Jadi, yanila lopoyo koato pokonoikene doi Yesus nadaanoan. Sambuno buno doiya, yanila ululemo do mianoo molemat tukon nabalayon. ⁵Salataa Yesus kitayo bulaa kona babasalan yanila namaanggaan, Yesus bantile doi mianoo molemat, “Kupau, komu lalim-lalim lapamo tinolos.”

⁶Moi-moiya kogulu agama daano mo osulang idoo yanila tambuuno momansa-mansaday doi noanoila lalomo. ⁷“Balani tuuno namian nia basilingan buno doiya! Yana totulaiyo ko Mian Bisa. Indee komo moola telese kolalim kalu bolikon Mian Bisa susuungo?”

⁸Doiyo kosinggatoo Yesus toiyo yanila napikilan. Maka yana bantile, “Bulaando komuyu mansa-mansaday buno doiya doi noamuyu lalomo? ⁹Indeenoo kai komo lobian mumuda: kobantilano, ‘Mulalim tinoloso’, kai bantilano ‘Banguno, bingkate komu balayon tukon ampakono’? ¹⁰Bai budodoiyo yaku okitakene doikoo baikon doi dunia nia bungkono, Manusia Napau balakuasa telese kolalim.” Maka Yesus bantile doi mianoo mo lemat, ¹¹“Banguno, bingkate komu balayon tukon mulemo!”

¹²Yana kokondong soi-soibiton alayo kona balayon maka tobuat yanila sasaibino daano mosakisiyo. Mianoo masaingding maka nggaale ko Mian Bisa. Yanila bantile, “Akiyoon nabiasa kita mongkita kadadian mopokakana naiya!”

Yesus uange Lewi

(Mat. 9:9-13; Luk. 5:27-32)

¹³Yesus abali koikoidan doi Paisu Galilea bibilo. Badaang komian molubat doi yana, tukon yana otunggule yanila. ¹⁴Sodo Yesus naampakonon idoo, yana kitayo meeng komian kosambuno Lewi pakabi lulu, Alfeus napau, daano moosulang doi bonua baluluan. “Laingaku,” Yesus bantile doi yana. Maka Lewi kokondong tukon lainge Yesus.

¹⁵Daano Yesus mo kaan doi Lewi nabonua, badaang kopakabi lulu molubat tukon mian mo inaanggon aki namondok doi mian badaang polaing kaan posinggat-singgat Yesus tukon napololaing-pololaing. Sabab badaang doi yanila molainge Yesus. ¹⁶Bubulaa kogulu agama luwedoi Falisi bensenon kitayo Yesus kaan posinggat-singgat tukon pakabi-pakabi lulu tukon do mianoo mo inaanggon aki namonondok. Jadi yanila mansadai doi Yesus napololaing, “Bulaando kopoo gulu mopokaanggon tukon pakabi-pakabi lulu tukon do mianoo mo inaanggon aki namonondok?”

¹⁷Yesus lengele yanila napasadai, maka timbiliyo, “Mian mo makalikodong aki napalaluuwo kodoktel; tongo mian mo seselon tolong. Yaku lubat bolikon uange komian mo aanggene kobutongo monondok, bai mian mo inaanggon aki namonondok.”

Pogagaiyan doi apataan kaliangano

(Mat. 9:14-17; Luk. 5:33-39)

¹⁸Daano kotembo meeng Yohanes Pasaudoo Mian napololaing-pololaing tukon Falisi miano daano moapata. Maka daano komian molubat doi Yesus tukon mansadaikene, “Bulaando pololaing Yohanes Pasau Mian tukon pololaing Falisi miano moapata, bai bulaandokon Tama napololaing moaki?”

¹⁹Yesus timbiliyo, “Doi lamean basowaanan kai mian lubat aki nakaan? Kalu babaabu malane daano polaing yanila, tantu yanila kaan. ²⁰Bai naikon lubat kotembono meeng babaabuan

malanedoo yanila leleiyo. Doiya kosinggatoo maka nasodo yanila aki nakaan.

²¹Akiyo komian mo posiabaikene kotoik motuwamo tukon meeng kotoik patolo boolu, sabab posiabaidoo mangaanikene kona mosiakan do kalambidoo, tobikon mangaanikene babasal kona mosiakan. ²²Bunomo lakon akiyo komian mo batune kona suka boolu doi koitan mo motuwamo. Sabab do sukadoo boolu mangaanikene do koitanoo mapasa. Doibundu lolua tangaison. Kosuka mo boolu sio nabinatun doi koitan mo boolu lalomo!”

Pasadai motuuk doi oloyo Tadean

(Mat. 12:1-8; Luk. 6:1-5)

²³Doi meeng kooloyo Tadean, salataa Yesus alon doi meeng kogandum asino, pololaing Yesus bapupuimo gandum. ²⁴Ko Falisi-falisi miano mansadai doi Yesus, “Bulaando komu pololaing molupaiyo konda agama atulano, tukon kubaiyo komo pinantanggon doi oloyo Tadean?”

²⁵⁻²⁶Yesus timbiliyo, “Akiyoon kai nasidutu komuyu basayo oila Daud nakinubai, salataa Abiyatal daano balimang teali imam babasal. Singgatoo Daud tukon namian malaal, tukon akiyo konapoo kinaan, Daud usok doi Temeneno Nabonua, tukon makaan loti mo lapamo sinosubakon doi Mian Bisa. Tukon do lotidoo beekene doi namianoo. Bai banggokai manulut doi nda agama, tongo imam komo moola kaane do lotidoo.”

²⁷Maka Yesus bantile koidan, “Oloyo Tadean dinaanokon tuuk doi banggapi; bolikon banggapi tuuk oloyo Tadean. ²⁸Jadi, Manusia Napau balakuasa, mau doi oloyo Tadean.”

Mian mo lemat kolimano sembeleng

(Mat. 12:9-14; Luk. 6:6-11)

3 Yesus abali koidan doi bonua kaleda. Ido daano komeeng komian mo lemat kolimano sembeleng. ²Idoo daano komian mo unggoliyo Yesus nasalaan, sulano namoola yana kalaakene. Ido yanila pateekene momeeng Yesus naikon aline komian moseselon doi oloyo Tadean. ³Yesus bantile doi mian mo lemato kolimano sembeleng, “Mai kokondong naimbaa, doi salaanggu.” ⁴Maka Yesus sadaiyo domianoo mo daano idoo,

“Manulut nda agama, indee komo moola kinubai doi oloyo Tadean? Kubaiyo komo monondok, kai kubaiyo komo lokis? Salamaten komian, kai mangakate mian?”

Yanila tongo aki nabiyok. ⁵Yesus nggimal kitayo potikunggon, bai koidan Yesus poloon, sabab yanila todudul matikas konoano. Maka Yesus bantile doi mianoo, “Ulule kolimamu.” Do mianoo ulule kolimano tukon dolimanodoo tangalino. ⁶Maka do Falisidoo miano tinggale do bonuadoo kaleda, tukon kosobiton pobisalai tukon bubulaa komian potombonii Helodes, sulano napo akateyo Yesus.

Mian badaang doi paisu bibilo

⁷Yesus tukon napololaing ampakon bangabalinggon doi Paisu Galilea. Badaang tuuno komian doi Galilea taus tunduwo Yesus. Badaang koidan komo lubat doi Yudea, ⁸luwedoi Yelusalem, doi lipu Idumea, tukon luwedoi lipu taikon tolopot Yoldan, tukon luwedoi napoonggaupan kokota-kota doi Tilus tukon Sidon. Yanila sasaibino lubat doi Yesus, sabab yanila mondongolii langge-langge mo lapamo Yesus kubaiyo. ⁹Dopai mian-mianoo bunoo doiya kona kadaang, maka Yesus bintekene kona pololaing-pololaing masadiakene duangan tuuk yana, sabab inai-inaikene do mianoo badaang nandiyaiyo yana. ¹⁰Yesus aline bunoo doiya komian badaang, tobikon sasaibino komian moseselon podipot-dipotimo sulano koolaniyo Yesus namoola taape yana. ¹¹Tukon komian mo inusoki ibiliis, idan-idan nakitayo Yesus, yana sosuba doi Yesus salaano tukon nggeleamon, “Ikoomo ko Mian Bisa Napau!”

¹²Bai Yesus pantane tuuno do ibiliisoo napopitoikene indee yana.

Yesus molilik songulo lua kona pololaing

(Mat. 10:1-4; Luk. 6:12-16)

¹³Doibundu Yesus liba doi meeng kobunggul bungkokono, tukon uange komian napinalaluu. Mianoo lubat, ¹⁴maka Yesus lilike doi yaniladoo kosongulo lua komian. Kona bantilano, “Yaku lilike komuyu sulano komuyu lolainge yaku, sulano kubintekene komuyu popelengene ko Bilita Monondok luwedoi Mian Bisa, ¹⁵tukon komuyu malaat kuasa mosiikayo koibiliis.”

¹⁶Naiyamo kosambuno do mianoo mosongulo lua: Simon (mo sinombuikon Petulus), ¹⁷Yakobus tukon Yohanes motolutus, doiyamo Zebedeus napau-pau (yanila nia sinombuikon Boanelges koalatio “guluk napau”), ¹⁸Andelias, Filipus, Baltolomeus, Matius, Tomas, Yakobus Alfeus napau, Tadeus, Simon si Patliot, ¹⁹tukon Yudas Iskaliot mo loiloikisangene Yesus.

Yesus tukon Beelzebul

(Mat. 12:22-32; Luk. 11:14-23, 12:10)

²⁰Lapa doiya Yesus mule doi bonua. Bai mian badaang lubat koidan pototongi, Yesus tukon napololaing-pololaingoo aki naloi kaan. ²¹Mian-mianoo bantile, “Yana tindomo!” Salataa pulino ndongoliiyo doiya langgedoo, yanila ampakon alayo tukon babayo yana.

²²Gulu-gulu agama mo lubat doi Yelusalem bantile, “Yana Beelzebul usokiyomo! Do ibiliisoo kapalano komo beena kuasa doi yana mo siikayo doibiliisoo.”

²³Maka Yesus uange do mianoo badaang, tukon salitayo doi yanila bubulaa koande-andean. “Bulaando kona tealian koibiliis, mosiikayo koibiliis?” Yesus bantile. ²⁴“Kalu meeng konegala tongoboboso bubulaa kobense-benseno tukon mo pomusu-musumo do negaladoo akimo namoonggol. ²⁵Tukon kalu doi meeng kobonua tumbuno akiyono kona pomeenggonan tukon tumbuno bailong pomosikitono maka do bonuadoo tumbuno nggabuto. ²⁶Kalu doi Ibiliis nabatomundoan lalomo teali tongobos-obos tukon pomusu-musumo, batomundoanoo akimo namalumbit tantu lapuso.

²⁷Akiyo komeeng komian momoola usok doi meeng komian mo bukuan nabonua lalomo tukon ndikuke kona buat, kalu yana aki naboboioyo loolukon do mianoo mobukuan. Lapa doiya, maka namoola ndikuke kona buat.

²⁸Potoiyo! Kalu komian mokubai lalim tukon bantile kopoototulaiyan, yana moola nainompuni. ²⁹Bai kalu yana totulaiyo ko Mian Bisa Na Loh, yana aki namoola inompuni! Sabab do totulaidoo daano komeeng kolalim mo akiyo kona pupusan.” (³⁰Yesus bantile buno doiya sabab daano komian bantile baikon Yesus inusoki ibiliis.)

Yesus tukon tinano maka utus-utuso

(*Mat. 12:46-50; Luk. 8:19-21*)

³¹Lapa doiya Yesus tinano tukon utus-utuso lubat. Yanila mototiili doi tonggulung mosumbolii mian mouange Yesus. ³²Doi ya singgat badaang komian osulang potikunggon Yesus. Yanila bantile doi yana, “Tama, tina tukon utus-utusomu daano doi tonggulung, yanila umboliiyo Tama.”

³³Yesus timbiliyo, “Indee kai kotinanggu? Indee kai koutus-utusonggu?” ³⁴Lapa doiya yana mbalenge doi mianoo mo osulang potikunggon maka bantile, “Naiyamo kotinanggu tukon utus-utusonggu! ³⁵Mian mo loingiyo ko Mian Bisa namongiasan, doiyamo koutus-utusonggu malane, utusonggu moluko, tukon tinanggu.”

Andean meeng komian motipase kona kalibuang

(*Mat. 13:1-9; Luk. 8:4-8*)

4 Yesus mongotunggul koidan doi Paisu Galilea bibilo. Badaang tuuno komian motokuuniyo Yesus. Tobikon doiya yana ampakon osulang doi meeng koduangan lalomo doi paisudoo bungkono, tukon do mianoo badaang kokondong doi paisudoo bibilo. ²Maka Yesus mongotunggul badaang kootunggul doi yanila tukon mangala andean. Buno naiya kona otunggulano yanila.

³“Pondongoliiyo! Daano komeeng komian mobalimang asi ampakon tipase kona kalibuang. ⁴Sambuno yana tipase kona kalibuang, daano kona kalibuang mo otuwong doi loloon. Maka kotomisi lubat kaane kabus do kalibuangoo. ⁵Daano koidan komo otuwong doi lipu mo batuwon kobutano soisik. Kalibuangoo mosobit tubo sabab kobutano soisik, ⁶bai kalu tatandako kooloyo kosopi-sopiino molooyumo, doibundu motuul tukon mate sabab koanggolo aki naatean kona usokan doi buta lalomo. ⁷Daano kokalibuang bailong otuwong doi sonit lalomo. Sonitoo tubo nunungiyo do kalibuangoo sopi-sopiino tobikon aki nasao. ⁸Bai daano koidan kokalibuang bailong mo otuwong doi buta mo monondok. Kalibuangoo tubo, teali babasal maka sao, daano komo tolu kolono, daano komo noom kolono, tukon daano komo sakat luunggon nasakat.”

⁹Salataa lapa salitayo do andeanoo, Yesus bantile, “Komuyu daano kotolingaimuyu, pondongoliiyo!”

Bulaando Yesus pakeyo koandean

(Mat. 13:10-17; Luk. 8:9-10)

¹⁰Salataa Yesus basusuunganggon, mian mo lapamo molongol naotunggul lubat doi Yesus posinggat-singgat tukon songulo lua kona pololaing. Yanila kabiyo Yesus naalatikanggene do andeanoo alatino. ¹¹Maka Yesus bantile doi yanila, “Komuyu lapamo binee pikilan monondok sulano potoiyo komaanano bulaando ko Mian Bisa napalenta. Bai mian doi tonggulung inotunggul tukon ande-andean, ¹²sulano

‘Yanila naikon momeenggon palaatikanggene
 bai aki natoiyoyo oila komo teali,
 yanila naikon lengele budoo,
 bai aki namangalati,
 naiya teali sulano yanila inai nakitayo tukon alatiyo
 tukon inai nalubat doi Mian Bisa
 tukon Mian Bisa naompunio yanila.’ ”

Yesus otunggulikene koandean meeng komian motipase kona kalibuang

(Mat. 13:18-23; Luk. 8:11-15)

¹³Doibundu Yesus bantile doi yanila, “Kalu komuyu akipo mangalatikene do andeanoo, bulaando komuyu kopoo toiyano koande-andeanoo bailong? ¹⁴Potipasoo kalibuang doiyamo meeng komian mo babotilanggene kobilita Mian Bisa. ¹⁵Kalibuang mo otuwong doi loloon inandekon mian mo longol bilita tentang bulaando ko Mian Bisa namapalentaan. Sodo lengele, ko Ibiliis lubato tukon alayo oila komo lapamo abese doi yanila noano lalomo. ¹⁶Kalibuang mo otuwong doi lipu mobatuwon inandekon mian mo lengele do bilitadoo, yana talimayo tukon monondok konoano. ¹⁷Bai bilitadoo aki namoonggol doi yanila noano, tobikon aki nataan namamalumbit. Sambuno yanila malaat sakisaa kai poloilokis sabab do bilitadoo, yanila akimo namaangga. ¹⁸Kalibuang mo otuwong doi sonitoo lalomo inandekon mian molongol do bilitadoo, ¹⁹bai matakutene konapo tuboan tukon yase tubo monondok. Konoano nabinantil

motuuk doi bubulaa kolobo mousok doi yanila noano lalomo. Tobikon doiya do bilitadoo moluwedoi Mian Bisa soisik komo tangabos doi yanila noano, tobikon aki nasao. ²⁰Tukon kalibuang mo otuwong doi buta monondok inandekon mian mo longol do bilitadoo tukon yanila talimayo, yanila sao badaang, daano komo tolu kolono, daano komo noom kolono, tukon daano komo sakat luunggon nasakat kohasilo.”

Posi mo sinunggup tukon gumbang

(Luk. 8:16-18)

²¹Koikoidan Yesus bantile, “Daano sidutu kai komian mosuayo kona posi maka nasunggupe tukon gumbang, kai abese doi koi adeno? Bulaando yana moaki naabese do posidoo doi bangiisonan posi? ²²Akiyo komeeng mo tosookon mo aki natokita; tukon akiyono komo sinookon mo aki natotoi. ²³Tobikon doiya, kalu daano kotolingaimuyu, pondongoliiyo!”

²⁴Maka Yesus bantile koidan, “Palatikanggene oila komuyu kopo linongol nia! Ukulan komuyu pakeyo motuuk doi mian bailong naikon ko Mian Bisa pakeyo tuuk doi komuyu – tukon lobian kona kadaang koidan. ²⁵Sabab komian mo daanomo binee koikoidan lobian badaang; bai mian mo akiyo koono, soisik komo daano doi yana naikon inala koidan.”

Andean kalibuang mo tubo

²⁶Yesus taame kona salita koidan, “Kalu ko Mian Bisa mapalenta bunu tomundo, kona bunuan inandekon bunu meeng komian mo tipase kona kalibuang doi naasi. ²⁷Popook yana moolomo, oloyo yana bangun. Kalibuangoo tubomo tukon tealimo babasal. Bai bulaando kona tealian do kalibuang-kalibuangoo tubo tukon teali babasal, do mianoo aki natoiyoo. ²⁸Do butadoo doiyamo komo sumbetene kohasilo: tumbeno langaano, lapa doiya bungano, maka saono. ²⁹Kalu do labuedoo motuwamo, do mianoo tambuuno potoliyo sabab laatemo kona pinupuiyan.”

Andean kalibuang mostol

(Mat. 13:31-32, 34; Luk. 13:18-19)

³⁰“Kalu ko Mian Bisa mapalenta, tukon oila komo moola ndapokakanakene?” Yesus sadaiyo koidan. “Oila kopopiyalungo mo moola kita pakeyo motuuk doi bangotunggulkanano? ³¹Kalu ko Mian Bisa mapalenta, kondondoongo buno naandean nia: Meeng komian momangala meeng komostol batuno maka tiduke doi buta. Mostol batunodoo doiyamo kokalibuang mo poipoisik tuuno doi dunia nia. ³²Bai kalu tubomo, yana tealimo babasal doi lobo mosinakakon bailong. Kolanga-langaano masalimbung kotomisi moola lubat, soop-soop tukon mokubai telea.”

³³Bunomo doiya Yesus mongotunggul mian tukon mangala badaang koandean pokakana doiya, sulano yanila namoola mangalati. ³⁴Yesus sidutu mapake andean kalu yana otunggule do mianoo. Bai kalu yana susuungo tukon napololaing-pololaing, yana alatikanggene sasaibino doi yanila.

Yesus atadeo kosokoi

(Mat. 8:23-27; Luk. 8:22-25)

³⁵Doi kinobianoo koidan, Yesus bantile doi napololaing-pololaing, “Maimo nda talabut imbali paisudoo sembeleng.”

³⁶Maka Yesus lakit doi duanganoo, tukon napololaing-pololaing tinggalemo do mianoo mobadaang doi paisudoo bibilo, maka yanila polokiti doi duanganoo. Duangan-duangan bailong daano idoo. Lapa doiya Yesus tukon napololaing-pololaing talabuto. ³⁷Aki namalumbit puulo kosokoiy. Bokol pakapapung doi duangan tukon usok doi duangan lalomo tobikon doi duanganoo adukon moonoo tukon paisu. ³⁸Doi duanganoo taambikon puus, Yesus daano mooloo tukon batangunan. Pololaing-pololaing Yesus bangune yana. Yanila bantile, “Tama Gulu, bulaando Tama mobatadikene kita nda silaka?”

³⁹Yesus bangun, maka atadeo do sokoiydo, tukon bantile dopaisudoo, “Tade, molinomo!” Mombuul tade, tukon dopaisudoo teali molino tuuno. ⁴⁰Maka Yesus bantile doi napololaing-pololaing, “Bulaando komuyu matakut? Bulaando komuyu akipo anggayo yaku?”

⁴Maka yanila teali matakut tukon bantil meeng tukon doi bailong, “Indee kona tutuuwan namian nia, polong komombuul tukon bokol loingiyo yana.”

Yesus aline komian mo inusoki Ibiliis

(Mat. 8:28-34; Luk. 8:26-39)

5 Lapa doiya Yesus tukon napololaing-pololaing polong doi Paisu Galilea sembeleng doi kabupaten Gelasa. ²Sodo Yesus loboson doi duangan, meeng komalane mo tobuat doi kibil lalomo lubat doi Yesus. ³Mianoo ibiliis kuasaiyomo tukon kona dungolan doi kibil-kibil. Yana akimo nakinoot koidan; mau nabaino lante. ⁴Lapamo idan-idan koaino tukon limano nabinoboi, bai sidutu do lante-lantedoo yana bentele, tukon besi doi aino yana lotoyo. Yana bukuan tuuno tobikon akiyo komeeng komian momoola lakoyo. ⁵Popook oloyo yana doombaa doisumai doi kibil tukon doi bunggul-bunggul, tukon wowookon tukon pokoloniyo kobutongo tukon batu.

⁶Daano moodoon yana kitayo Yesus molubat, yana obuleng maka sosuba doi Yesus salaano. ⁷Yana wookon babasal konalalo, “Yesus, Mian Bisa Napau Mo Tatandak Tuuno! Bulaando komu kubaiyano yaku nia? Doi Mian Bisa, yaku kabiyo, inai mosakisaayo yaku!” (⁸Do mianoo bantile buno doiya sabab Yesus bantile doi yana, “Ibiliisoo, dampaso doi mian nia!”)

⁹Maka Yesus mansadai doi yana, “Indee kai kosambumu?”

Mianoo timbiliyo, “Kosambunggu ‘Legiun’ – sabab kami nia badaang tuuno!” ¹⁰Bubulaa luunggon kona kabiyo tuuno sulano Yesus inai nasumboliiyo do ibiliisoo lokis nadampas doi lipudoo.

¹¹Loolani do lipudoo badaang tuuno kobabung mo moumbolii kaan doi bunggul pepelako. ¹²Ibiliisoo kabiyo doi Yesus, “Sumboliiyo kami mai usok doi babung-babungoo.” ¹³Tukon Yesus loingiyo. Jadi, do ibiliisoo tobuato doi mianoo maka usok doi babung-babungoo. Sasaibino do babung-babungoo obuleng tukon bakatuwong doi motombing bibilo doi paisudoo lalomo maka molomos – sasaibino uga-ugaate daano molua koloon kobabung.

¹⁴Pototooli-pototooli do babungoo obuleng tukon popitoikene do bilitadoo doi kota tukon kampung. Maka komian ampakon

mongkita oila komo lapamo teali. ¹⁵Yanila lubat doi Yesus, maka yanila kitayo do mianoo budodoo mo inusokidoo ibiliis, daano moosulang idoo. Yana lapamo bakalambi, tukon kona pikilan koidan lapamo tanaang. Maka yanila sasaibino teali matakut. ¹⁶Mian badaang mo lapamo sakisiikanggene susuungo dokadadianoo bulaa kokaliangano do mianoo tukon do babung-babungoo yanila basalitakene oila komo lapamo teali. ¹⁷Maka komian modungol doi lipudoo kabiyo sulano Yesus natinggale do lipudoo.

¹⁸Salataa Yesus lakit doi duanganoo lalomo, do mianoo budodoo mo inusoki ibiliis kabiyo doi Yesus, sulano namoola malaing.

¹⁹Bai Yesus aki naloingiyo, Yesus bantile, “Mulemo tukon popitoikene doi utus-utusomu oila komo lapamo Temeneno kubaiyo tuuk doikoo tukon namonondokan Yesus doikoo!”

²⁰Do mianoo ampakono, tukon basalitakene doi Songulo Kokota doi lipudoo oila komo lapamo Yesus kubaiyo doi yana. Sasaibino komian molengele masaingding.

Yailus napau – Boine mo singgile Yesus najubah

(Mat. 9:18-26; Luk 8:40-56)

²¹Yesus abali koidan doi paisu sembeleng. Doi paisudoo bibilo, badaang komian molubat motokuuniyo potikunggon Yesus. ²²Meeng komian molubat kosambuno Yailus. Yana daano meeng komian mokatuaiyo kobonua kaleda doi kotadoo. Salataa yana kitayo Yesus, yana sosuba doi Yesus salaano, ²³tukon kabiyo tuuno, “Tama, daku pau molukono babalato kona sesel. Moolakene mulubat tukon mutaape, sulano natubo tukon aki namate!”

²⁴Maka Yesus ampakono polaing Yailus. Badaang komian motunduwo yana tukon mian mondobotiyo doi sasaibino kololoon.

²⁵Doi yaniladoo daano koidan komeeng koboine mo seselon songulomo lua kotaum kosauno nandendekan posuungimo tukon nabolokonan. ²⁶Kabuso sasaibino kona buat kubaiyo pobeal doi doktel-doktel, bai aki natangalin, bai tosuungi kona sesel. ²⁷Boinedoo lapamo molongol badaang doi Yesus. Maka doi

mianoo badaang tanga-tangano, yana koolaniyo Yesus doi tonggulungo, ²⁸sabab yana bapikil, “Mau natongo yaku singgile kona jubah, yaku tangalin!”

²⁹Yana singgile Yesus najubah, tukon aki namalumbit doimbaa dosaudoo mondendek tademo. Yana lasaiyo baikon yana lapamo tangalin. ³⁰Doi singgatoos Yesus lasaiyo daano kubukuanan mo tobuat doi butongo. Maka yana mbalenge do mianoo badaang tukon mansadai, “Indee komo singgile daku jubah?”

³¹Napololaing-pololaing bantile, “Tama kitayo susuumu daano badaang komian mo podipot-dipoti. Tukon Tama daano mansadai, indee komo singgile Tama?”

³²Bai Yesus kitayo potikunggon sulano naumboliiyo domianoo mo singgile yana. ³³Do boinedoo mo toiyomo oila komo tealimo doi butongo, tukon bubusak tukon matakut sosuba doi Yesus salaano tukon akuiyo sasaibino. ³⁴Maka Yesus bantile doi boinedoo, “Kupau, sabab ikoo anggayo doi yaku, ikoo tangalin! Ampakono tukon selamat. Ikoo makalikodong tuuno!”

³⁵Daano Yesus mobasilingan, bubulaa kobito-bito lubat doi Yailus nabonua. “Tuan naboine lapamo mate,” yanila bontiikene doi Yailus. “Mau naakimo Tuan nakubaiyo susa Tama Gulu koidan.”

³⁶Aki namaangga oila do mianoo nabinantil, Yesus bantile doi Yailus, “Inai matakut, anggayomo yaku!” ³⁷Maka Yesus ampakon banggadudul bai yana aki napataikene meeng komian molainge yana, alaasene Petulus tukon Yakobus tukon Yohanes montolutus. ³⁸Salataa yanila polong doi Yailus nabonua, Yesus kitayo kokaadaan monggabut tukon lengele komian mokokiil tukon mandaungan mo bukuan tuuno. ³⁹Maka Yesus usok tukon bantile doi yanila, “Bulaando komuyu mopelek-pelek tukon kokiil? Do paudoo aki namate; yana tongo moolo!”

⁴⁰Yanila kokumbite Yesus. Maka Yesus sumboliiyo yanila sasaibino natobuat. Maka yana babayo do paudoo tamano tinano tukon tolu kona pololaing usok doi paudoo nakombiang lalomo. ⁴¹Yesus taaniyo do paudoo limano maka bantile doi yana, “Talita kum,” kona alati, “Pau molukono, yaku bantile doi ikoo: bangun!”

⁴²Pau boinedoo polaing bangun, tukon ampakon. (Songulomo lua kotaum kona umul.) Sasaibino komo kitayo do kadadianoo masaingding tuuno! ⁴³Bai Yesus patane tuuno yanila mobasalita-



Bonua kaleda tambikon doi lalom (6:2)

kene do langgedoo mau doi inde-indee komiano. Maka bantile, “Beenamo do paadoo kaan.”

Yesus aki natinalima doi Nasalet

(Mat. 13:53-58; Luk. 4:16-30)

6 Doi lipudoo, Yesus tukon napololaing-pololaing mule doi Nasalet. ²Doi oloyo Tadean yana tambuunemo kona mongotunggulan doi bonua kaleda. Daano badaang komian idoo. Salataa do mianoo lengele Yesus naotunggul, yanila masaingding tuuno. Yanila bantile, “Doiyaa namian nia nalaatano sasaibinodoo? Kopandoiyan kaliangano nia bulaando mo daano doi yana? Bulaando kai yana momoola kubaiyo komo minasaingdinggon? ³Bolikon kai yana nia tukang kayu, Malia napau, tukon Yakobus utuso, Yoses, Yudas tukon Simon? Ya, koutus-utuso boine daano modungol dimbaa.” Tobikon doiya yanila tolake yana.

⁴Maka Yesus bantile doi yanila, “Meeng konabi inodotii doi yayaa, alaasene doi nalipu sinuungan, tukon utus-utuso tukon pulino.”

⁵Doi lipudoo Yesus aki namoola mongkubai meeng kolangge mominasaingdinggon tongo aline kobubulaa komian moseselon tukon bingkakene kolimano doi yanila. ⁶Yana masaingding padungga yanila moaki namaangga.

Yesus sumboliyo kosongulo lua kona pololaing

(Mat. 10:5-15; Luk. 9:1-6)

Doibundu Yesus ampakon doi kampung-kampung, tukon mongotunggul. ⁷Yana monguang songulo lua kona pololaing, maka sumboliyo yanila polaing lua-lua tukon beena kuasa doi yanila sulano nasiikayo koibiliis. ⁸Yana beena otunggul doi yanila, "Inai momakanggi oioila doi ampakonan, tongo tongkat. Inai makanggi kinaan kai pundi sadakaa, kai doy. ⁹Pakeyo komu sapatu, bai inai makanggi lua kokalambi." ¹⁰Yana koidan bantile, "Kalu komuyu usok doi meeng kobonua, dungolo idoo polong komuyu otinggale do kotadoo. ¹¹Bai kalu komuyu polong doi meeng kolipu, tukon domianoo idoo aki nayase talimayo tukon mondongolii komuyu, potinggale do lipudoo. Tukon tipasene koambata doi aimuyu teali tondoan doi yanila!"

¹²Maka Yesus napololaing domo songulodoo lua ampakono. Yanila ampakon popitoikene kobilita baikon kobanggapi sio nabadodoloon doi nalalim-lalim. ¹³Pololaing-pololaing Yesusoo siikayo badaang koibiliis, solitikene kolisison zaitun doi mian moseselon tukon aline yanila.

Yohanes Pasau Mian namatean

(Mat. 14:1-12; Luk. 9:7-9)

¹⁴Bilita-bilita kaliangano sasaibino komo tealidoo polong koidan doi Tomundo Helodes, sabab Yesus sambuno totoimo doi yayaa. Daano komian mo bantile, "Yohanes Pasau Mian lapamo tubo koidan! Doiyamo kosababpo yana daano kona kuasa mokubai langge mominasa-masaingdinggon."

¹⁵Bai komian bailong bantile, "Yana Elia."

Daano kobailong bantile, "Yana nabi, pokakana meeng konabi doi loolukoo."

¹⁶Salataa Helodes lengele doiya, yana bantile, “Doiyamo Yohanes Pasau Mian doi loolukoo mo lapamo kumosumboliikene napinatol kooluno. Diabudodoo tubomo koidan!”

¹⁷Sabab akiyoon doiya Helodes lapamo sumboliiyo komian lakoyo Yohanes, tukon usekene doi talunggu lalomo. Helodes kubaiyo bunu doiya soal Helodias, utuso naboloki, doiyamo Filipus. Sabab Helodes kilayomo Helodias, ¹⁸tukon doiya langgedoo Yohanes badaang luunggon naotinauwo Helodes bunu doiya, “Aki namoola ikoo kilayo koutusomu nabolokidoo!”

¹⁹Doiyamo kosababpo Helodias batuulikene Yohanes tukon yase moakateyo Yohanes, bai yana aki namoola kubaiyo do langgedoo sabab Helodes sembang-sembe. ²⁰Sabab Helodes lapamo sumboliiyo komian modagaiyo namono-monondok Yohanes nakasalamatan doi talunggu, sabab yana matakutene Yohanes. Yana toiyo Yohanes meeng komian mo monondok Mian Bisa mo sumboliiyo. Tukon kalu Yohanes basilingan, Helodes yase mondongolii, mau kai yana nateali susa tuuno konoano.

²¹Doibundu Helodias malaat todanan doi Helodes nakubaiyano kona taum sinuungan. Doiya singgat Helodes kubaiyo kona lamean tuuk sasaibino doi mian mopobbosolii kona sambu doi batomundoan, suludadu-suludadu kapalano tukon katua-katua masalakat Galilea. ²²Doi lameanoo Helodias napau boine osuleng tukon dona osulenganoo sanaangene tuuno Helodes noano tukon domianoo molubat. Maka Helodes bantile doi boinedoo, “Indee komu iniyas, kabiyo. Yaku naikon beekene doikoo!” ²³Maka Helodes dandiyo doi boinedoo tukon totopi. Helodes bantile, “Oila komu kinabi yaku beekonggon, tukon sembeleng daku batomundoan!”

²⁴Maka do boinedoo tobuat tukon mansadai doi tinano, “Tina, oila komo monondok mo moola yaku kabiyo?”

Tinano timbiliyo, “Kabiyo Yohanes Pasau Mian oluno.”

²⁵Do boinedoo polaing abali doi Helodes tukon bantile, “Yaku kabiyo Yohanes Pasau Mian oluno kubineekon diabudodoo doi meeng kodulang bungkono!”

²⁶Salataa lengele do kakabidoo Helodes susa tuuno konoano. Bai yana aki namoola tolayo do kakabidoo sabab yana lapamo batotopi doi mian molubat salaano. ²⁷Jadi yana banggadudul

mapalentakene meeng komian mololainge yana alayo Yohanes Pasaoodoo Mian oluno. Maka do suludadoodoo ampakon doi talunggu, maka patele Yohanes bulungo. ²⁸Doibundu yana babayo Yohanes oluno doi meeng kodulang tukon beekene doi boinedoo. Tukon do boinedoo beekene koidan doi tinano. ²⁹Salataa Yohanes napololaing-pololaing lengele doiya langgedoo, yanila ampakono alayo Yohanes badano maka yanila tadine.

Yesus beena kaan lima koloon komian

(Mat. 14:13-21; Luk. 9:10-17; Yoh. 6:1-14)

³⁰Lasul-lasul Yesus mo sumboliiyodoo doibundu abali koidan, maka pototongi tukon Yesus. Yanila bontiikene doi yana sasaibino komo lapamo yanila kubaiyo tukon nainotunggukon. ³¹Badaang tuuno komian mo lubat tukon moampakon, Yesus tukon napololaing-pololaing aki naloi kaan. Tobikon doiya Yesus bantile doi napololaing-pololaing, “Maimo nda ampakon doi lipu mo kiis, idoo kita moola basusuunganggon tukon komuyu moola balasanaang soisik.” ³²Maka doi yaniladoo luwe lakit doi duangan ampakon doi lipu mo kiis.

³³Bai badaango komian molapamo kitayo yanila motinggalemo do lipudoo tukon toiyomo indee miano yanila. Jadi, doi sasaibino kokota doi wilayahdoo, komian obu-obuleng lolo lipu matailukiyo Yesus tukon napololaing-pololaing. ³⁴Salataa Yesus loboson doi duangan, yana kitayo komian badaang. Yana seseange doi yanila, sabab yanila pokakana kodomba mo akiyo kopotoolino. Maka yana atambuunemo kona mongotunggulan badaang kolangge doi yanila. ³⁵Salataa kinobiano, Yesus napololaing bantile doi yana, “Loolanimo kona popookan tukon nalipu nia tosusunganggon. ³⁶Tadukai Tama sumboliiyo na mianmian nia naampakono, sulano yanila moola mongoli kinaan doi desa-desa tukon kampung-kampung doi napokoolanikonan nia.”

³⁷Bai Yesus timbiliyo, “Komuyumo komo beena kaan yanila.”

“Oh, oilakai kami sio mai ampakon mongoli loti lua kosakato kodoy pelak tuuk mobeena kaan doi mian-mian nia?” buno doiya pololaing-pololaing Yesus nabantilano.

³⁸Maka Yesus mansadai, “Daano kobulaa koloti modaano doi komuyu? Soba potaus kitayo.”

Lapa yanila ampakon kitayo, yanila bantile, “Daano kolima koloti tukon daano kolua koikan.”

³⁹Maka Yesus sumboliyo do mianoo badaang osulang meeng-meeng kotambuno doi bulung mo manampal. ⁴⁰Mian-mianoo osulang tukon taatul, meeng-meeng kotambuno. Daano komo sakat komian meeng kotambuno, tukon daano koidan komo lima kolono komian meeng kotambuno. ⁴¹Doibundu Yesus alayo do lotidoo molima tukon do ikanoo molua, maka lelengea doi timbu tukon mangkabi kinatauan doi Mian Bisa. Lapa doiya, yana bisi-bisiliyo do lotidoo tukon limano maka beekene doi napololaing-pololaing sulano naobos-obosikene doi mianoo badaang. Tukon do ikanoo molua inobos-obosikon koidan doi yanila sasaibino. ⁴²Yanila kaan polong bobosul. ⁴³Doibundu do kinaanoo labino Yesus napololaing-pololaing pototongikene – sasaibino daano kosongulo lua kobois momoono. ⁴⁴Mian mamalane komo makaan do lotidoo uga-ugaate daano lima koloon.

Yesus papakon doi paisu bungkono

(Mat. 14:22-33; Yoh. 6:15-21)

⁴⁵Lapa doiya Yesus sumboliyo napololaing-pololaing luwe tukon lolo duangan matailukiyo yana doi Betsaida doi paisu sembeleng, daano mosumboliyo do mianoo badaang namule. ⁴⁶Salataa yana sodiiyo mule do mianoo badaang, Yesus ampakon doi bunggul mosambeang. ⁴⁷Sambuno popook, Yesus napololaing-pololaing naduangan daanomo doi paisudoo tangano, bai Yesus daano doi buta tina. ⁴⁸Yana kitayo yanila susa tuuno mboseyo do duanganoo sabab konapoo duangan posusul kombombuul. Tobikon doiya uga-ugaate antala batong tolu tukon batong noom dodowasoono, yana lubotiiyo doi yanila tukon ampakon doi paisu bungkono. Tukon yana kadukadukon banggadudul liisiyo yanila. ⁴⁹Sambuno yanila kitayo yana moampakon doi paisu bungkono, yanila aangene yana ibiliis, ⁵⁰tobikon yanila nggele-nggeleamon momatakut. Sabab yanila sasaibino kitayo yana tukon yanila pogilakon tuuno.

Bai Yesus banggadudul basilingan doi yanila, “Potademo! Yaku Yesus. Inai pomatakut!” ⁵¹Maka yana lakit doi yanila naduangan, tukon dombombuuloo polaing tade. Yesus napololaing-pololaing masaingding tuuno. ⁵²Do lotidoo molima

minasaingdinggon yanila koidan akiyoon namangalatikene. Maaling doi yanila konapo alatiano.

Yesus aline komian moseselon doi Genesalet

(Mat. 14:34-36)

⁵³Salataa polong doi paisudoo sembeleng, yanila balabu doi Genesalet tokoluano. ⁵⁴Salataa yanila tobuat doi duanganoo komian kitayo baikon domo lubatoo doiyamo Yesus. ⁵⁵Maka yanila obu-obuleng doi yayaamo doi sasaibino do wilayahdoo, tukon tambuuno yanila mobabayo ko mian-mian momasakit doi Yesus doi yanila nabalayon bunggono. ⁵⁶Doi yaando Yesus nalubatan - mau doi kampung, doi kota kai doi desa - idoo komian sidutu lubat tukon mangabos mian moseselon doi labotan. Maka yanila kabiyo tukon tutuu sulano do mianoo moseselon naminoolakon mosinggile Yesus najubah, mau natongo bunduno. Sasaibino komo singgile, teali tangalin.

Adat istiadat mian loluk

(Mat. 15:1-9)

7 Meeng kotambuno ko Falisi miano tukon bubulaa kogulu agama doi Yelusalem, lubat doi Yesus. ²Yanila kitayo bubulaa Yesus napololaing kaan tukon aki nakumosiyo kolimano manulut atulan agama, doiyamo kalu akiyoon lolukon nda kumosiyo kolimano loingiyo koagama naatulan.

³Falisi-falisi miano, bunomo lakon sasaibino ko Yahudi miano, taat tuuno mololoi adat istiadat yanila natulunan. Yanila aki naikon nakaan kalu akiyoon nakumosiyo kolimano mololoi agama naatulan. ⁴Oila komo inoli doi labotan aki nakinaan, kalu akiyoon nakinumosi lolukon. Tukon badaang koatulan bailong doi napoo tulunanoo yanila mo taaniyo tutuuno; bunoo palatulan mokumosian galaas, mangko tukon pakakas tambaga.

⁵Tobikon doiya ko Falisi-falisi miano tukon gulu-gulu agamadoo mansadaikene doi Yesus, “Bulaando komu pololaing-pololaing kaan tukon limanoila mo aki nakinumosi? Oila kosababpo yanila moaki namololoi adat istiadat nda tulunan?”

⁶Yesus timbiliyo, “Komuyu mian kakaadukon! Bisa tuuno oila komo tinantukon Yesaya doi komuyu, doiyamo,

‘Buno naiya ko Mian Bisa nabantilan,

Mianoo tongo sosubaiyo yaku tukon bantil-bantilan,

bai yanila noano dodoon doi yaku.

⁷ Palasuma yanila sosubaiyo yaku,
sabab palatulan banggapi yanila nainotunggukon,
bunekene daku palatulan!’

⁸ Ko Mian Bisa napalenta komuyu akipo tulutiyo, tukon ko-banggapi napalatulan-palatulan komuyu taaniyo momoonggol.”

⁹ Maka Yesus bantil koidan, “Komuyu pandoi tuuno, ko Mian Bisa napalenta komuyu tolayo; sulano kemuyu moola palataangene kopo otunggul. ¹⁰ Musa lapamo beekene kona palenta nia, ‘Odotiiyo kotamamu tukon tinamu,’ tukon ‘Indee komiano mobantil-bantile kotamano-tinano sio nainukum mate.’ ¹¹ Bai komuyu otunggukene: Kalu komian bantile doi tamano tinano, ‘Oila komo moola yaku beekene doi tamangu tukon tinangu, lapamo yaku sosubakene doi Mian Bisa,’ ¹² maka komuyu sodiiyo do mianoo doi nakawajiban motulungiyo kotamano-tinano. ¹³ Jadi tukon muotunggul susuumuyu komuyu beekene doi mian-mian, komuyu akiyengene ko Mian Bisa nabantilan. Daano badaang kolangge buno nia komuyu mo kubaiyo.”

Lobo mo kanggilitiyo komian

(Mat. 15:10-20)

¹⁴ Maka Yesus uange do mianoo badaang koidan tukon bantile doi yanila, “Polengele sulano pomangalati! ¹⁵ Akiyo kolobo meeng doi tonggulung mo usok doi mian mo moola kubaiyo do mianoo minusikiton. Bai, mo tobuat doi meeng komian, doiyamo komo kubaiyo yana lokis. [¹⁶ Jadi, kalu daano kotolingaimuyu, pondongoliiyo.]”

¹⁷ Salataa Yesus tinggale do mianoo badaang tukon usok doi bonua, napololaing-pololaing mansadai doi yana bulaa kokaliangano do andeanoo. ¹⁸ Maka Yesus bantile doi yanila, “Oilakai komuyu akiyoon pomangalati? Kai komuyu aki namoola mangalatikene baikon komo usok doi memeeng komian aki namoola kubaiyo do mianoo lokis? ¹⁹ Sabab komo usokoo aki naluwe doi noano, bai usok doi tiano, tukon doibundu tobuat koidan.” Tukon do bantil-bantilanoo Yesus tudoikene baikon sasaibino kokinaan moola kinaan.

²⁰Maka Yesus bantile koidan, “Komo tobuat doi mian, doiyamo komo kanggilitiyo yana. ²¹Sabab komo luwedoi lalomo, doiya luwedoi noano lalomo, sumbot kopikilan-pikilan molokis mo tealikene komian kubaiyo kolokis, pondikuk, mangakate, ²²balolowa, bakokolii, sali-salitayo kotulano, tukon kubaiyo kolobo samba mo kulokis, teali batinggai, akiyo kona adat, mosikit konoano, babanggaal, akiyo kootunggul naloloon. ²³Sasaibino domo lokisoo sumbot doi lalom, tukon doiyamo komo tealikene komian lokis.”

Meeng koboine namaanggaan

(Mat. 15:21-28)

²⁴Doibundu Yesus tinggalemo do lipudoo tukon ampakon doi lipu mololani kokota Tilus. Yana usok doi meeng kobonua lalomo tukon aki nayase baikon komian natoiyoyo yana modaano idoo. Bai yana aki namoola seekene kobutongo. ²⁵Meeng koboloki, kona pau boineno inusoki ibiliis, ndongoliyo bulaa kokaliangano Yesus. Yana lubat doi Yesus tukon sosuba doi salaano, ²⁶tukon kabiyo sulano Yesus nasiikayo do ibiliisoo doi paudoo. Do boinedoo bolikon Yahudi miano, sinuung doi lipu Fensia doi Silia. ²⁷Yesus bantile doi yana, “Pau-pau sio nabinee kaan lolukon. Aki namonondok moalayo kopau-pau nakinaan maka nasinokulikon koasu.”

²⁸“Tuan,” boinedoo timbiliyo, “asu-asu doi meda suukano kaane kokinaan labi-labino do pau-paudoo mo tuwenge!”

²⁹Maka Yesus bantile doi yana, “Sabab domu potimbilidoo, mulemo; koibiliisoo lapamo toliat doi mupaudoo!”

³⁰Bolokidoo mulemo. Doi nabonua, yana laate dona paudoo daano moolo, tukon do ibiliisoo bisa-bisa lapamo toliat doi paudoo.

Yesus aline komeeng komian mo ponga bongol

³¹Doibundu Yesus tinggale kolipu Tilus, tukon banggadudulkene kona ampakonan loloiyo ko Sidon doi Paisu Galilea. Yana mangala loloon loloiyo kolipu Songulo Kota. ³²Idoo mian babakene doi yana komeeng komian mo ponga bongol. Yanila kabiyo Yesus nabinggakene kolimano doi mianoo bunggono. ³³Yesus babayo do mianoo nabasusuunganggon doi mianoo badaang, maka naabese kolimano saono doi mianoo tolingaino lua-lua lalomo. Maka Yesus tupeiyo, tukon taape do mianoo

alepo. ³⁴Lapa doiya Yesus lelengea doi timbu, maka ansaang kobukuan tukon bantile doi mianoo, “Efata,” koalantino, “Tobukamo!”

³⁵Do mianoo tolingaino tobukamo tukon doalepodoo tealimo abali biasa tukon yana tambuuno mumuda kona basilinganan. ³⁶Maka Yesus pantane yanila sasaibino sulano naaki nasalitayo do langgedoo mau doi inde-indee komiano. Bai pololokon Yesus pantane pololokon yanila basilingangene. ³⁷Tukon sasaibino komian mo molongol masaingding tuuno. Yanila bantile, “Sasaibino kona kubaiyano tukon monondok! Tukon yana kubaiyo komian mobongol teali molongol tukon komian moponga moola basilingan!”

Yesus beena kaan sangkap koloon komian

(Mat. 15:32-39)

8 Aki namalumbit doimbaa, daano koidan komeeng komian tambuno badaang molubat pototongi. Sabab yanila akiyo kona kinaan, Yesus uange kona pololaing-pololaing tukon bantile, ²“Yaku mamaasikene namian nia badaang. Lapamo tolu kooloyo kona kalumbit yanila napolaing-laingan yaku, tukon diabudodoo yanila akiyono kona kinaan. ³Kalu yaku sumboliyo yanila namule tukon tiano malaal, yanila naikon padut doi loloon tanga. Oila koidan doi yaniladoo daano komo lubat doi naodoonan.”

⁴Yesus napololaing-pololaing timbiliyo, “Doi lipu mo tambasiil nia, inaando komian namoola malaat kinaan mosabe motuuk sasaibino namian nia?”

⁵“Daano kobulaa kona kadaang koloti doi komuyu?” Yesus mansadai.

“Pitu,” yanila timbiliyo.

⁶Maka Yesus sumboliyo do mianoo badaang osulang doi buta bunggono, maka yana alayo do lotidoo mopitu tukon baladoa doi Mian Bisa. Doibundu yana bisi-bisiliyo do lotidoo tukon limano maka beekene doi napololaing-pololaing moebe-ebese doi mian-mianoo. Maka dona pololaing-pololaing lakukangene. ⁷Yanila daano kobubulaa kona pai ikan popoisik koidan. Yesus baladoakene doi Mian Bisa do ikan-ikanoo, maka sumboliyo kona pololaing-pololaing moebe-ebese do ikan-ikanoo koidan. ⁸⁻⁹Yanila kaan polong bobosul - daano uga-ugaate sangkap koloon komian mo kaan. Doibundu Yesus napololaing-pololaing

pototongikene kolabino - pitu kobois komo moonoo. Maka Yesus sumboliiyo do mian-mianoo namule, ¹⁰tukon yana maka napololaing-pololaing banggadudul lakit doi duangan tukon ampakon doi lipu Dalmanuta.

Falisi-

falisi miano kabiyo Yesus nakubaiyo komo minasaingdinggon

(Mat. 16:1-4)

¹¹Bubulaa ko Falisi miano molubat doi Yesus, tukon ponggeeleki yana sulano tongodinggala. Yanila kabiyo Yesus nakubaiyo komo minasaingdinggon salaku meeng kotanda yana baikon molubat doi Mian Bisa. ¹²Yesus basilingan maka timbiliyo, “Oila kosababpo komian natempo nia mokabiyo yaku kubaiyo komo minasaingdinggon? Aki! Yaku aki kumebeekon kotanda mobuno doiya doi yanila!”

¹³Maka Yesus tinggale yanila, tukon usok doi duangan lalomo; doibundu yana ampakono doi paisudoo sembeleng.

Lagi Falisi-falisi miano tukon Helodes

(Mat. 16:5-12)

¹⁴Yesus napololaing-pololaing toliminggene momakanggi loti mosabe. Yanila tongo meeng koloti modaano doi duangan.

¹⁵“Pobada-badagai doi Falisi-falisi miano nalagi tukon Helodes nalagi,” Yesus bantile doi yanila.

¹⁶Maka Yesus napololaing-pololaingoo tambuuno mosalitayo do langgedoo. Yanila bantile, “Yana bantile bunoo doiya, sabab kita akiyo konda loti.”

¹⁷Yesus toiyo oila yanila napinobantikon. Tobikon doiya yana mansadai doi yanila, “Bulaando komuyu mopobantikengene sabab moakiyo kopo loti? Oilakai komuyu aki potoiyo tukon akiyoon pomangalatikene koidan? Bunoo doiya kona mokisulan komu pikilan? ¹⁸Komuyu daano komatamuyu - bulaando moaki pokitayo? Komuyu daano kotolingaimuyu - bulaando moaki pomolongol? Aki kai komuyu poneneeke ¹⁹naikon do lotidoo molima yaku mo bisi-bisiliyo motuuk doi lima koloon komian? Bulaando kobois komoonoo kolabino dokinaano komuyu pototongikene?”

“Songulo lua,” yanila timbiliyo.

²⁰“Tukon dotempodoo daku bisi-bisiliyano dolotidoo mopitu motuuk doi sangkap koloon komian,” Yesus sadaiyo koidan, “bulaa kobois kolabino dokinaanoo komuyu mo pototongikene?”

“Pitu,” yanila timbiliyo.

²¹“Eh, akiyoon kai komuyu pomangalatikene koidan?” Yesus bantile koidan.

Yesus aline komian mopiit doi Betsaida

²²Yanila polong doi Betsaida. Ido komian babayo komeeng komian mopiit doi Yesus, tukon kabiyo sulano yana nataape do mianoo mopiit sulano naaline. ²³Maka Yesus taaniyo do mianoo mopiit limano tukon tandane yana natobuat doi kotadoo. Doibundu Yesus tupeiyo do mianoo matano. Yana abese kolimano doi mianoo matano, maka sadaiyo doi yana, “Moolamo kai ikoo kitayo komeeng kolobo diabudodoo?”

²⁴Mianoo kitayo doi salaano, maka bantile, “Oode. Yaku kitayo komian mopapakon; bai yanila tokita bunu kayung.”

²⁵Yesus taapene kolimano koidan doi mianoo mopiit. Naiya nia do mianoo mopiit kakabukuan sulano namoolakene mongkita. Komatano mopiit tangalino, tukon yana kitayomo sasaibino tukon tontong tuuno. ²⁶Maka Yesus bantile doi yana, “Mulemo, tukon inaimo moabali doi kotadoo.”

Petulus namangakukanano Yesus

(Mat. 16:13-20; Luk. 9:18-21)

²⁷Yesus tukon napololaing-pololaing ampakon doi kampung-kampung moloolani ko Kaisalea Filipi. Doi loloon tangano Yesus mansadai doi yanila, “Mololoi komian nabantilano, indee kai nayaku nia?”

²⁸Yanila timbiliyo, “Daano komo bantile: Yohanes Pasau Mian; daano koidan komo bantile Elia, tukon kobailong koidan bantile: daano komeeng konabi.”

²⁹“Bai mololoi komuyu susuumuyu, yaku nia indee?” Yesus mansadai.

Petulus timbiliyo, “Tama doiyamo ko Tomundo Pasalamat!”

³⁰Maka Yesus ingotiikene yanila, sulano naaki napopitoikene doi inde-indee komiano kobutongo kaliangano.

Yesus basilingangene kokaliangano doi nasinakisaawan tukon namatean

(Mat. 16:21-28; Luk. 9:22-27)

³¹Lapa doiya Yesus tambuunemo kona mongotunggulan doi napololaing-pololaing baikon Manusia Napau sio nasinakisaa badaang, tukon binamusukon doi tua-tua, imam-imam kapalano, tukon gulu-gulu agama. Yana sio nainakate, bai doi oloyo kotoluno yana tubo koidan. ³²Tukon tontong tuuno Yesus popitoikene do langgedoo doi napololaing-pololaing. Maka Petulus kedele Yesus doi bibilo, tukon anukene yana. ³³Bai Yesus mbaleng tukon kitayo kona pololaing-pololaing, maka anukene Petulus, “Saakon naimbaa, Pongoda! Komu pikilanoo pikilan bangga; bolikon Mian Bisa napikilan!”

³⁴Doibundu Yesus monguang mian badaang mo daano idoo posinggat-singgat tukon napololaing-pololaing. Maka yana bantile doi yanila, “Komian mo yase lainge yaku sio natoliminggene kona limang susuungo, doibundu tanggunge kona kayung sempang, tukon banggadudul lolainge yaku. ³⁵Sabab komian mo yase salamatene kona tuboan, naikon lapus kona tuboan. Bai komian mo salakangene kona tuboan motuuk doi yaku tukon motuuk doi Bilita Monondok moluwedoi Mian Bisa, komo salamatene. ³⁶Oila kona linaat doi meeng-meeng komian, kalu sasaibino nadunia nia teali nalobo, bai yana lapus kona tuboan? ³⁷Moola kai do tuboanoo sinoboli tukon langgelange?”

³⁸Kalu meeng-meeng komian mamaa momangakukene yaku tukon kuotunggul doi tempo nia molokis, Manusia Napau koidan mamaa mangakukene do mianoo, doi tempo nalubatan naikon tukon Tamano nakuasa, linolaing malaekat-malaekat mo moliyous.”

9 “Potoiyo!” Yesus bantile. “Doi komuyu nia nimbaa daano komo aki naikon namate, kalu akiyoon nakitayo ko Mian Bisa namapalentaan tukon kuasa!”

Yesus nakinabasalan

(*Mat. 17:1-13; Luk. 9:28-36*)

²Noom kooloyo molapa Yesus babayo Petulus tukon Yakobus tukon utuso Yohanes, basusunganggon doi meeng kobunggo mo tatandak. Doi yanila matano salaano tobolii kobutongo. ³Kona pakean teali moute didilengan. Aki nadaano komeeng komian mobabusoiy nai dunia nia mo moola babusoi kona moutean mobuno doiya. ⁴Doibundu dona pololaingoo motolu kitayo Yesus mopobasalitai Elia tukon Musa. ⁵Maka Petulus bantile doi Yesus, “Tama Gulu, monondok tuuno kita naimbaa. Tadukai kami mokokondong tolu kosabua: komeeng tuuk doi Tama, komeeng tuuk doi Musa, tukon komeeng koidan tuuk doi Elia.” ⁶Kona bisaan Petulus aki natoiyoyo oila komo yana sio nabantile, sabab yana tukon dotulanodoo molua daano momatakut tuuno.

⁷Doibundu kobunong sunggupiyo yanila tukon doi bunongoo tololongol kolalo mo bantile, “Naiyamo daku Pau yaku mo seange. Polengele yana!” ⁸Moso-mosobit yanila mbaleng potikunggon doi yaniladoo, tukon akimo koidan napokitayo indee komiano komo daano idoo komo polaing yanila, tongo Yesus susuungo. ⁹Singgatoo yanila obulus doi bungguloo, Yesus ingotiikene yanila, “Inai po popitoikene doi indee komiano oila kopo kinita budodoo kalu Manusia Napau akiyoon nainotuboi doi matean.”

¹⁰Yanila loingiyo tuuno do tetebadoo, bai doi yaniladoo susuungo yanila tambuuno mobasilinganggene oila Yesus namakisuit tukon “tubo doi namatean”. ¹¹Maka yanila mansadai doi yana, “Bulaando gulu-gulu agama mobantile baikon Elia lubat matailukon?”

¹²Yesus timbiliyo, “Elia takainomo lubat matailukon sulano naalapayo sasaibino kolangge. Bai bulaando kai dolanggedoo tukon Manusia Napau? Oila kosababpo doi Kitab Moliyous lalomo totulis baikon yana naikon badaang kona sakisaa tukon komian totulaiyo? ¹³Bai yaku bantile doikoo: Elia lapamo lubat, tukon komian nakubaiyano doi yana baino oilamo konapo mongiasan. Doiya pokokonoi tuuno tukon komo lapamo totulis doi Kitab Moliyous lalomo tentang kobutongo.”

Yesus aline pau mo inusoki ibiliis

(*Mat. 17:14-21; Luk. 9:37-43a*)

¹⁴Salataa Yesus tukon dona pololaing motolu lapamo pototongi koidan tukon napololaing-pololaing bailong, yanila kitayo badaang komian idoo. Bubulaa kogulu agama daano ponggeeleki tukon Yesus napololaing-pololaingoo. ¹⁵Sambuno do mianoo kitayo Yesus, yanila masaingding, maka obu-obuleng lobotiyo Yesus. ¹⁶“Oila komuyu kopo pinonggeelekikon tukon do gulu-gulu agamadoo?” Yesus sadaiyo doi napololaing-pololaing.

¹⁷Meeng komian doi mianoo badaang timbiliyo, “Tama Gulu, yaku babayo daku pau doi Tama. Yana ponga sabab inusoki ibiliis. ¹⁸Kalu ibiliisoo usokiyomo yana, kobutongo tika-tikakene doi buta, kobabano babiyoi, kongolingo pongolitikene, tukon kobutongo teali aki nabiyok. Yaku kabiyo Tama napololaing-pololaing nasiikayo ibiliisoo, bai yanila akinamoola kubaiyo.”

¹⁹Bai Yesus bantile doi yanila, “Bulaando komuyu nia! Komuyu tutuu mian mo aki namaangga. Polong oila kotembono yaku sio dungol podungoli komuyu tukon sabal doi yanila? Babayo do paudoo doisumai!” ²⁰Yanila babayomo paudoo doi Yesus.

Sambuno ibiliisoo kitayo Yesus, yana kubaiyo do paudoo butongo sintok-sintok tobikon do paudoo otuwong tonggoi-nggoling doi buta. Kobabano babiyoi. ²¹Maka Yesus sadaiyo doi paudoo tamano, “Bulaamo kona kalumbit yana kona bunooan naiya?”

“Salataamo doi napau-paunoan!” tamano napotimbili. ²²“Biasamo ibiliisoo umboliiyo moakateyo yana tukon mootuwenge doi aung lalomo kai doi paisu lalomo. Bai kalu Tama moola tulunge, Tama moola museange kami tukon tulungiyo kami!”

²³“Oila komu binantil? Kalu Tama moola?” Yesus timbiliyo. “Sasaibino moola, asal komian maangga!”

²⁴Banggadudul do paudoo tamano nggeleamon, “Temeneno, yaku maangga, bai daku maanggaan soisik. Tulungiyo yaku sulano nalobian daku maanggaan koidan!”

²⁵Sambuno Yesus kitayo baikon domianoo badaang tambuuno lubat pototongi, yana mapalentakene ibiliisoo tukon bantile, “Loh bongol tukon ponga, yaku bintekene ikoo toliat nai pau nia tukon inaimo koidan mousok doi paudoo!”

²⁶Do ibiliisoo nggeleamon, maka kubaiyo do paudoo butongo sintok-sintok, doibundu kokoliato doi paudoo. Paudoo tokita pokakanamo kobadan tobikon sasaibino komian bantile, “Yana matemo!” ²⁷Bai Yesus taaniyo kolimano tukon tomboniyo yana mobangun. Do paudoo polaing bangun.

²⁸Salataa Yesus daanomo doi bonuadoo, kona pololaing-pololaing lubat basusuunganggon doi yana tukon mansadai, “Oila kosababpo kami aki namoola mosiikayo ibiliisoo?”

²⁹Yesus timbiliyo, “Do ibiliiso mobuno doiya aki namoola siniika tukon mau nabulaa konda kokubai, kalu bolikon baladoa.”

Yesus basalita koidan tentang namatean

(Mat. 17:22-23; Luk. 9:43b-45)

³⁰Yesus tukon napololaing-pololaing tinggale do lipudoo tukon ampakon banggadudul lolojiyo ko Galilea. Yesus aki nayase komian motoiyo naando yana nadaanoan, ³¹sabab yana daano mootunggule kona pololaing-pololaing. “Manusia Napau sinalakanggon doi banggapi nakuasa,” bunomo doiya Yesus nabantilano, “tukon yana inakate, bai doi oloyo kotoluno yana tubo!”

³²Napololaing-pololaing aki natoiyoyo Yesus nai notunggukon, bai yanila matakut momansadai doi yana.

Indee komo babasal?

(Mat. 18:1-5; Luk. 9:46-48)

³³Yanila polong doi Kapelnaum. Salataa daanomo doi bonua, Yesus mansadai doi napololaing-pololaing, “Indee dopo pinoonggeekikonoo doi loloon tangano budodoo?”

³⁴Yanila aki natimbiliyo, sabab doi loloon tanganodoo yanila pogagaikene tentang indee komo babasal. ³⁵Yesus osulang, maka uange dona pololaing mosongulo lua. Yana bantile doi yanila, “Mian mo yase teali nomol komeengo, yana sio nateali mataibundukon tukon sio nateali peleleani sasaibino komian.”

³⁶Doibundu Yesus mangala meeng kopau poipoisik, tukon kekendenge do paudoo doi yanila sasaibino salaano. Yesus lambine do paudoo tukon bantile doi napololaing-pololaing, ³⁷“Mian mo talimayo meeng kopau pokakana naiya tobikon

yaku, koalantino talimayo yaku. Tukon komian mo talimayo yaku, yana aki natongo talimayo yaku, bai talimayo koidan yana mo bintekene yaku.”

Indee komo aki naliitiyo kita mololoi doi kita

(Luk. 9:49-50)

³⁸Maka Yohanes bantile doi Yesus, “Tama Gulu, kami kitayo komeeng komian mosiikayo koibiliis tukon Tama sambuno. Tukon kami pantane sabab yana bolikon tulanggita.”

³⁹Bai Yesus bantile, “Inai mopantane yana, sabab akiyo komeeng komian mo moola mokubai lobo mominasaingdinggon tukon sambunggu, momoola banggadudul molokis-lokisaku. ⁴⁰Sabab mian mo aki naliitiyo kita, koalantino pomeenggon kita. ⁴¹Poneneeke! Mian mo beena komuyu monginum sabab komuyu pololaing Tomundo Pasalamat, yana tutuu talimayo kona tambo.”

Langge-langge mo mangaanikene komian mokubai lalim

(Mat. 18:6-9; Luk. 17:1-2)

⁴²“Indee komo mangaanikene sala komeeng komian doi mianmian mo poipoisik nia akimo naanggayo koidan doi yaku, tadukai kalu kobatu gilingan binoboikon doi bulungo, tukon yana sinakukon doi tobun lalomo. ⁴³Kalu kolimamu kubaiyo ikoo baladosa, patele do limamudoo! Tadukai ikoo tubo tukon Mian Bisa mau naakiyo kolimamu sembeleng kalu baino ikoo tukon lua-lua kolimamu usok doi nalaka, doiyamo aung mo akiyo kona posoan. [⁴⁴Imbali koaung aki namoola poso, tukon kobesuk aki namoola mate.] ⁴⁵Tukon kalu koaimuyu kubaiyo ikoo baladosa, patele do aimudoo. Tadukai ikoo tubo tukon Mian Bisa mau naakiyo koaimu sembeleng, kalu baino ikoo tukon aimu lua-lua sinakukon doi nalaka lalomo. [⁴⁶Imbali koaung aki namoola poso tukon kobesuk aki namoola mate.] ⁴⁷Kalu komatamu mangaanikene ikoo baladosa, suwete do matamudoo! Tadukai ikoo usok doi Mian Bisa na Dunia Boolu mau natongo meeng komatamu, kalu baino kai ikoo tukon lua-lua komatamu sinakukon doi nalaka lalomo. ⁴⁸Imbali koaung aki namoola poso tukon kobesuk aki namoola mate.

⁴⁹Meeng-meeng komian kinindok tukon aung, pokakana kososubakon mokinoliyousi tukon timuson.

⁵⁰Timusenoo monondok, bai kalu tealimo matabal, moola kai nakinotono koidan? Jadi, tobikon doiya komuyu teali pokakana kotimuson – potubo pototongi tukon monondok.”

Yesus mongotunggul tentang potinggalan

(*Mat. 19:1-12; Luk. 16:18*)

10 Doibundu Yesus tinggalemo do lipudoo tukon ampakon doi lipu Yudea tukon doi lipu Paisu Yoldan sembeleng. Mian madaang lubat koidan pototongi potikunggon Yesus. Tukon buno kakabiasaan Yesus mongotunggul yanila.

²Bubulaa ko Falisi miano lubat koidan sulano dinggalayo Yesus. Yanila mansadai, “Mololoi palatulan nda agama, kabudoon moola komian motinggale kona boloki?”

³Yesus timbiliyo, “Musa beena palenta oila doi komuyu?”

⁴“Musa pataikene komian tinggale kona boloki, kalu tulise kosulat potinggalan looluk,” yanila timbiliyo.

⁵“Musa tulise do palentadoo sabab komuyu todudul maaling kopo inotunggulan,” Yesus bantile doi yanila. ⁶“Bai doi tumbeno doi temponodoo ko Mian Bisa napasitakaano kobanggapi, kobinantilan baikon ko ‘Mian Bisa tealikene yanila mala-malane tukon boine. ⁷Doiya kosababpo komala-malane tinggale kotinano-tamano tukon pomeenggon kona boloki, maka doluailadoo tealimo meeng.’ ⁸Jadi, yanila bolikono lua komian, bai tealimo meeng. ⁹Doiya kosababpo, oila komo lapamo Mian Bisa pomeenggene akimo namoola kobanggapi potinggakene!”

¹⁰Lapamo yanila usok doi bonua, kona pololaing-pololaing mansadai doi Yesus tentang do langgedoo. ¹¹Yesus bantile doi yanila, “Indee komo tinggale kona boloki, maka naosowaan tukon boine bailong, do mianoo pololowai tukon dona bolokidoo tumbeno. ¹²Bunomo lakon doiya doboinedoo mo tinggale kona langkai maka naosowaan doi malane bailong, yanadoo balolowa.”

Yesus balakaatiyo kolabuk-labuk

(Mat. 19:13-15; Luk. 18:15-17)

¹³Daano komian mobabaya kona labuk-labuk doi Yesus sulano Yesus nataape tukon balakaatiyo yanila. Bai Yesus napololaing-pololaing nggimoliiyo do mianoo. ¹⁴Kitayo do lobodoo, Yesus nggimal maka bantile doi napololaing-pololaing, “Sodiikenemo do labuk-labukoo nalubat doi yaku! Inai popantane yanila, sabab ko mian-mian mobuno naiya komo teali Mian Bisa namian. ¹⁵Neneeke naiya! Indee komo aki nalubat doi Mian Bisa bunu napau nia meeng, aki nateali Mian Bisa namian.” ¹⁶Salataa lapa bantile bunu doiya, Yesus lebeke do pau-paudoo, doibundu yana abese kolimano doi yanila meeng-meeng tukon balakaatiyo yanila.

Mian mokaasa

(Mat. 19:16-30; Luk. 18:18-30)

¹⁷Singgatoo Yesus banggadudulkene kona ampakonan, meeng komian lubat obu-obuleng kupayo Yesus. Do mianoo sosuba doi Yesus salaano tukon mansadai, “Gulu mo monondok, yaku sio oila daku kinubai sulano namoola mantalima tuboan sidutu-posidutukon?”

¹⁸“Bulaando ikoo mobantile yaku monondok?” Yesus sadaiyo. “Akiyo komonondok, tongo Mian Bisa susuungo. ¹⁹Ikoo lapamo toiyo ko Mian Bisa napalenta, ‘Inai mangakate, inai balolowa, inai pondikuk, inai moteali sakisii mokala-kala, inai bakokolii, odotiiyo kotamamu tukon tinamu.’”

²⁰“Tama Gulu,” do mianoo nabantilan, “sasaibino do palentadoo yaku lapamo tulutiyo daano doi kupaumalanekonan.”

²¹Yesus mbalenge do mianoo tukon seange maka bantile, “Baimo meeng kolobo koidan ikoo mo daanokene. Ampakono mubalukene sasaibino komu langge; beekenemo kodoyno doi mian motalalais, tukon ikoo malaat buat doi sulugaa. Lapamo doiya lubato lainge yaku.” ²²Molongol Yesus nabantilan mobuno doiya, do mianoo susa maka tinggale do lipudoo tukon susa tuuno konoano sabab yana kaasa tuuno.

²³Maka Yesus mbalenge kona pololaing-pololaing maka bantile doi yanila, “Maaling tuuno komian mokaasa nateali Mian Bisa namian!”

²⁴Napololaing-pololaing masaingding molongol Yesus nasinganoo. Bai Yesus bantile koidan, “Daku labuk-labuk, takainomo maaling kotealian Mian Bisa naumat! ²⁵Tadukai meeng kounta usok doi pakaut buango kalu baino meeng komian mokaasa usok doi Mian Bisa na Dunia Boolu.”

²⁶Yesus nabantil-bantilanoo tealikene kona pololaing-pololaing masaingding, tobikon yanila posadai meeng tukon bailong, “Kalununo doiya, indee komo moola salamat?”

²⁷Yesus mbalenge yanila tukon timbiliyo, “Doi banggapi do langgedoo aki nateali bai doi Mian Bisa akiyo komo aki nateali, sasaibino moola nateali doi Mian Bisa.”

²⁸Maka Petulus bantile, “Kitayo, kami lapamo tinggale sasaibino komai langge-langge tukon lainge Tama.”

²⁹Yesus bantile, “Poanggayomo: komian mo lapamo tinggale kona bonua antoko kai utuso mala-malane, kai moluko, kai tinano, kai tamano, kai napau-pau, kai nalabue asino tobikon yaku tukon sabab Bilita Monondok moluwedoi Mian Bisa, ³⁰do mianoo mantalima lobian badaang naiya loonu nia budodoo. Yana malaat sakat luunggon lobian badaang kobonua, utus mala-malane, utus boi-boine, tinano, labuk-labuk, labue asino, – tukon sakisaawan koidan. Tukon sio doi loonu naikon mo lubat, do mianoo naikon mantalima tuboan moakiyo kona pupusan. ³¹Bai badaang komian naiya budodoo nia kotumbeno naikon teali doibundu tukon badaang komian nia budodoo modoi bundukon teali mo mantailukon.”

Yesus basilingan kotoluno luunggon tentang namatean

(Mat. 20:17-19; Luk. 18:31-34)

³²Yesus tukon napololaing-pololaing daano doi naampakonan doi Yelusalem, Yesus ampakon doi muka, tukon napololaing-pololaing pakadak sasaibino. Tukon komian mo lainge yanila doibundu matakut. Doibundu Yesus uange koidan kona pololaing-pololaing basusuunggon tukon bontiikene doi yanila oila komo teali naikon doi butongo. ³³“Polengele,” kona bantilano, “kita nia budodoo daano sasalaane ko Yelusalem.

Imbali Manusia Napau naikon nasinalakanggonan doi imam-imam kapalano tukon gulu-gulu agama. Yana naikon inukum mate, doibundu sinalakanggon doi mian-mian mobolikon Yahudi. ³⁴Yanila sosiboliyo yana, yana tinupei, yana sinakisaa, tukon pinakukon doi kayung sempang. Bai doi oloyo kotoluno yana naikon tubo.”

Yakobus tukon Yohanes nakakabi

(Mat. 20:20-28)

³⁵Maka Yakobus tukon Yohanes, doiyamo Zebedeus napau-pau lubat doi Yesus. “Tama Gulu,” yanila bantile, “daano komeeng kolobo kami mo yase Tama nalakukanggene doi kami.”

³⁶“Oila kopo iniyas kukubaiyo doi komuyu?” Yesus mansadai.

³⁷Yanila timbiliyo, “Kami yase osulang doi Tama bakalingano tukon bobono, kalu baikon Tama nabatomundoan mondoko.”

³⁸“Komuyu aki potoiyo oila kopoo kinabi,” Yesus bantile doi yanila. “Kai moola poinume daku galaas sakisaawan naikon yaku mo inume tukon usok doi sakisaawan tuuno lalomo mo yaku usokiyo?”

³⁹“Moola,” yanila timbiliyo.

Maka Yesus bantile koidan doi yanila, “Bisa komuyu momoola inume dogalaasoo sakisaawan mo yaku inume tukon usok doi sakisaanan tuuno mo yaku usokiyo. ⁴⁰Bai indee kokaliangano komo osulang doi bakalingangu kai doi bobonggu, doiya bolikon kuhaak motantukanggene. Mian Bisa komo tantukanggene inde-indee naikon komo osulang doi tempat-tampatoo.”

⁴¹Salataa Yesus napololaing-pololaing domo songulodoo bailong lengele do langgedoo, yanila nggimoliyo doi Yakobus tukon doi Yohanes. ⁴²Jadi Yesus uange yanila sasaibino, maka bantile, “Komuyu toiyo baikon kokatua-katua bangsa mo aki natingoniyo ko Mian Bisa pipiike kona mian. Tukon mobabasakene yanila pipiike yanila. ⁴³Bai komuyu aki namoola buno doiya! Kobalino komian mo yase teali babasal doi komuyu, yana sio nateali peleleani ikoo. ⁴⁴Tukon mian mo yase teali mantailukon doi komuyu, sio nateali ata doi sasaibino. ⁴⁵Sabab mau Manusia Napau kai aki nalubat sulano nalineleani. Yana

lubat sulano nameleleani tukon sulano nasalakangene kodilino sulano natongosobii komian badaang.”

Yesus aline Baltimeus mo piit komatano

(Mat. 20:29-34; Luk. 18:35-43)

⁴⁶Yanila polong doi Yelikho. Tukon dotempodoo Yesus tukon napololaing-pololaing tukon domianoo badaang tinggalemo do kotadoo, meeng komian piit daano moosulang bakai-kabi doi loloon bibilo. Kosambuno Baltimeus, Timeus napau. ⁴⁷Salataa yana lengele baikon domo alonoo doiyamo Yesus Nasalet miano, yana nggeleamon, “Yesus, Daud Napau! Seseange yaku!”

⁴⁸Yana ngginimolii doi mian badaang tukon sinumbolii inai napelek. Bai yana pololokon kabasale kona nggeleamonan, “Daud Napau, seseange yaku!”

⁴⁹Maka Yesus tade tukon bantile, “Uangemo yana.”

Jadi yanila uangemo do mianoo mopiit. Yanila bantile doi yana, “Inai mobiyok! Ikoo Yesus uange, banguno!”

⁵⁰Mianoo mopiit sakukene kona jubah, tukon moso-mosobit kokondong tukon ampakon doi Yesus.

⁵¹“Oila komu iniyas yaku mokubaiyo tuuk doikoo?” Yesus sadaiyo doi yana.

Do mianoo mopiit timbiliyo, “Tama Gulu, yaku yase momokita.”

⁵²“Ampakono,” Yesus bantile, “tobikon ikoo anggayo doi yaku, ikoo tangalino.”

Doiya kosinggatoo koidan do mianoo mopiit moolamo mokita. Maka yana laingemo Yesus doi loloon.

Yesus usok doi Yelusalem tukon nggaangan

(Mat. 21:1-11; Luk. 19:28-40; Yoh. 12:12-19)

11 Sambuno lolani ko Yelusalem, yanila polong doi kota Betfage tukon Betania, doi Zaitun Bunggulo eaako. Idoe lua komian kona pololaing Yesus bintekene naloolukon. ²“Ampakono doi kampungoo nda sinasalaan,” Yesus bantile doi yanila. “Kalu komuyu usok doi kampungoo, komuyu naikon kitayo komeeng kokaladai napau modaano tokooton, mo akiyoon nabiasa komian molokitiyo. Sodiiyo do kaladaidoo, tukon babayo doisumai. ³Tukon kalu daano komian momansadai doikoo oila kosababpo komuyu mosodiiyo do kaladaidoo,



Kota Betania (11:2)

bontiikenemo, ‘Temeneno komo palaluuwo, tukon yana mosobit naabalinggene.’”

⁴Yesus napololaing moluadoo ampakono, tukon laate komeeng do kaladaidoo napau modaano tokooton doi bonua tataapono doi loloon bibilo. Maka yanila sodiiyo do kaladaidoo. ⁵Domianoo mo kokondong idoo sadaiyo yanila, “He, daano oila komuyu? Bulaa kai komuyu mosodiiyo do kaladaidoo napau?”

⁶Yanila timbiliyo bulaandomo komo lapamo Yesus tetebakene doi yanila. Maka do mianoo sodiikenemo yanila mobabayo do kaladaidoo. ⁷Salataa polong doi Yesus, do kaladaidoo bungguto yanila omobosiiyo tukon napai kalambi, maka Yesus lokitiyo doibunggono. ⁸Badaang komian moambasene yanila najubah doi loloon, daano koidan komo atambune doi loloon tangano kokayung panga-pangano yanila mo alayo doi asi. ⁹Ko mianmian mo ampakon mantailukon tukon komian mo tuundu doi tonggulungo sasaibino wowookon, “Nggaale ko Mian Bisa! Binalakaati yana mo lubat tukon Temeneno sambuno! ¹⁰Tubomo kona batomundoan naikon mo lubat – Daud nabatomundoan

tumbunggita looluk! Nggale ko Mian Bisa Mo Tatandak Tuuno!”

¹¹Doibundu Yesus polong doi Yelusalem, maka usok doi Temeneno Nabonua. Idoe yana nunuiyo potikunggon. Bai sabab loolanimo kona popookan, doibundu luwe ampakon doi Betania polaing-laing tukon songulo lua kona pololaing.

Yesus kutuke koala batango

(Mat. 21:18-19)

¹²Modoakon kooloyono, sambuno yanila tinggale ko Betania, Yesus malaal. ¹³Daano modoon yana kitayo komeeng koala batango koloono masalimbung. Jadi yana ampakon doi kayungoo sulano nakitayo kai daano kosaono. Bai sambuno yana polong doi kayungoo uuno yana aki namalaat saono tongo loono, sabab doiya singgat akiyoon nalaate kona saowan. ¹⁴Maka Yesus bantile doi aladoo batango, “Mulaimo diabudodoo akiyo komeeng komian mo makaan saono doikoo koikoidan!”

Pololaing-pololaing Yesus molongol do bantilanoo.

Yesus usok doi Temeneno Nabonua

(Mat. 21:12-17; Luk. 19:45-48; Yoh. 2:13-22)

¹⁵Doibundu yanila polong doi Yelusalem, tukon Yesus ampakon koidan doi Temeneno Nabonua. Idoe yana siikayo sasaibino komian mo poboluki doi lipudoo. Yana buanggeyo komeda-meda doi mian posoboli doy, tukon bangku-bangku mabalukanan tomisi lapatiing. ¹⁶Tukon akiyo komeeng komian mo pinataikon makanggi oilakai mololoiyo ko Temeneno Nabonua kintalodoo. ¹⁷Doibundu Yesus mongotunggul mian-mian idoo. Yana bantile, “Doi Kitab Moliyous lalomo totulis bunu naiya: Mian Bisa bantile, ‘Daku bonua sinombuikon bonua sambeyangan sasaibino kobangsa.’ Bai komuyu tealikene mian napoakatean nadungolan!”

¹⁸Imam-imam kapalano tukon gulu-gulu agama lengele do bantilanoo. Maka yanila tambuun momoumbolii loloon sulano naakateo Yesus. Yanila matakut doi yana, sabab sasaibino komian masaingding momondongolii kona otunggul.

¹⁹Adukono kalipookan Yesus tukon napololaing-pololaing otinggalemo do kotadoo.

Otunggul doi ala batango

(Mat. 21:20-22)

²⁰Modoakon dodowasoono, salataa yanila alon doi aladoo batango, yanila kitayo do kayungoo matemo polong doi anggol-anggolo. ²¹Maka Petulus neneeke dolobodoo moteali akiyoon nameeng kooloyo. Maka Petulus bantile doi Yesus, “Tama Gulu, soba kitayo! Aladoo batango Tama mo kutuke matemo!”

²²Yesus timbiliyo, “Anggayomo ko Mian Bisa. ²³Bisa komuyu moola pobantile doi bunggul nia, ‘Tobingkat tukon tasakukon doi tobun lalomo!’ Maka do langgedoo komuyu naikon kubaiyo; asal komuyu aki posasaaki, tukon komuyu anggayo baikon oila dopo binantilo bisa-bisa teali. ²⁴Tobikon doiya neneeke naiya: Kalu komuyu sambeyang tukon mangkabi meeng kolangge, anggayomo ko Mian Bisa molapamo beekene doi komuyu oila kopo kinabi, maka komuyu naikon talimayomo. ²⁵Tukon kalu komuyu baladoa, bai konoamuyu aki nasanaang doi meeng komian, ompunio do mianoo looluk, sulano ko Tamamu doi sulugaa naompunio kopo lalim-lalim. [²⁶Kalu komuyu aki poompunio komian bailong, ko Tamamu doi sulugaa koidan aki naompunio komu lalim-lalim.]”

Pasadai motuuk doi Yesus nahaak

(Mat. 21:23-27; Luk. 20:1-8)

²⁷Yanila abali koidan doi Yelusalem. Tukon singgato Yesus ampakon boilingiyo ko Temeneno Nabonua lalomo, imam-imam kapalano, gulu-gulu agama tukon tua-tua Yahudi lubat doi yana. ²⁸Yanila mansadai, “Oila kona pokok ikoo molakukene sasaibino nia? Indee komo beena haak doikoo?”

²⁹Yesus timbiliyo, “Yaku koidan yase mansadai doi komuyu. Potimbiliyomo tukon yaku naikon bontiikene doikoo tukon indee nahaak yaku mokubaiyo nalangge-langge nia. ³⁰Yohanes mansau mian tukon indee nahaak, Mian Bisa kai banggapi?”

³¹Maka doimam-imam kapalanodoo tukon tua-tua Yahudi tambuun moposadaikene doi yaniladoo. Yanila bantile, “Kalu kita bantile, ‘Tukon Mian Bisa nahaak,’ yana naikon bantile,



Sandung badagaiyan doi anggul asino (12:1)

‘Bulaando komuyu moaki poanggayo doi Yohanes?’ ³²Bai maaling koidan nda bantile, ‘Tongo banggapi nahaak.’” Sabab yanila matakutene komian badaang, sabab sasaibino komian toiyo Yohanes meeng konabi. ³³Jadi, yanila timbiliyo, “Kami aki mbai toiyo.”

Maka Yesus bantile doi yanila, “Kalu buno doiya, mau yaku bai aki kuyase mobontiikon doikoo tukon indee nahaak yaku mokubaiyo sasaibino nia.”

Andean polimang-polimang anggul asino

(Mat. 21:33-46; Luk. 20:9-19)

12 Doibundu Yesus tambuuno mobasilingan tukon andean doi imam-imam kapalano, gulu-gulu agama tukon tua-tua Yahudi. Yesus bantile, “Daano komeeng komian masakai meeng koanggul asino, maka pagale potikunggon. Lapa doiya yana makali buang teali alat mopipisan anggul, maka yana kekendenge komeeng kosandung batotoolian. Lapa doiya yana monggisabekene do anggulo asino doi bubulaa kopolimango maka ampakon doi lipu bailong. ²Salataa laate kotempono bapupuiyan anggul saono, do mianoo sumboliyo

komeeng kona peleleani doi polimang-polimang asidoo, sulano natalimayo kona obos. ³Bai do polimang-polimangoo lakoyo do peleleanidoo. Doibundu yanila bobokiiyo, maka sumboliiyo yana mule tukon akiyo kona kinanggi. ⁴Maka do asidoo tumbuno sumboliiyo koidan komeeng komian kona peleleani bailong. Bai do polimang-polimangoo bobokiiyo do peleleanidoo oluno, maka siikayo tukon totosiiyo. ⁵Do asidoo tumbuno sumboliiyo koidan komeeng kona peleleani bailong. Bai yanila akateyo do peleleanidoo. Tukon buno doiya momeenggon yanila lakukanggene badaang kopeleleani bailong: daano komo binobokii tukon daano koidan komo inakate. ⁶Indee do asidoo tumbuno nasinumbolii koidan diabudodoo? Baimo meeng komian, doiyamo napau susuungo yana mo seange. Jadi doibundu yana sumboliiyo dona paudoo doi polimang-polimang asidoo. 'Tantu daku pau naikon inodotii,' kona pikikanano. ⁷Bai do polimang-polimangoo pobantikon meeng tukon bailong, 'Naiyamo komo kuasaiyo. Mai nda akateyo yana, sulano kita nda malaat naobos!' ⁸Maka do paudoo linako, maka inakate. Kobadano yanila sakukene doi asidoo tonggulungo."

⁹Maka Yesus mansadai, "Oilamo do asidoo tumbuno nakinubai? Tantu yana lubat tukon akateyo do polimang-polimangoo, maka nasalakanggene do asidoo doi polimang-polimang bailong. ¹⁰Komuyu tantu lapamo pobasayo naiya ayat nia doi Kitab Moliyous lalomo,

'Batu mo akimo natapake doi mobakubai bangunan lapamo teali batu mo monondok.

¹¹ Naiyamo ko Temeneno nakokubai; bukan maen kona monondokan!'"

¹²Maka kolaka-lakai Yahudi miano mo molongol do andeanoo, moumbolii akal molakoyo Yesus, sabab yanila toiyo do andeanoo Yesus konoikene doi yanila. Bai yanila matakutene komian mobadaang. Jadi, yanila ampakon tinggale Yesus.

Soal babealan lulu

(*Mat. 22:15-22; Luk. 20:20-26*)

¹³Bubulaa ko Falisi miano tukon anggota mololoiyo Helodes sinumbolii modinggalayo Yesus tukon pasadai-pasadai. ¹⁴Yanila lubat doi Yesus tukon bantile, "Tama Gulu, kami toiyo

Tama monondok tukon aki napopusinggon inde-inde komian napandapat. Tama mongotunggul tukon natutuuwan ko Mian Bisa namongiasan doi banggapi, sabab ko Tama aki nalilike komian. Eh, soba Tama bantile doi kami, ‘Mololoi palatulan nda agama, moola kai nda babeal lulu doi Tomundo kai aki? Siokai nda babeal do luludoo kai aki?’ ”

¹⁵Yesus toiyo yanila nakakaadukonan. Yana timbiliyo, “Oila kosababpo komuyu mo yase odinggalayo yaku? Soba pokitakene doi yaku komeeng kodoy pelak.”

¹⁶Maka yanila beekene doi yana komeeng kodoy pelak. Maka Yesus mansadai, “Gambal tukon indee sambuno naiya?”

“Tomundo,” yanila timbiliyo.

¹⁷“Eh, kalu bunu doiya,” Yesus bantile, “beekene doi Tomundo oila ko Tomundo koono, tukon doi Mian Bisa oila komo Mian Bisa koono.” Yanila masaingding molengele yana.

Soal tuboan luwedoi matean

(Mat. 22:23-33; Luk. 20:27-40)

¹⁸Bubulaa komian doi Saduki tulano lubat doi Yesus. (Yanila daano tongusokon doi mo bapandapat mian momate akimo naikon natubo koidan.) ¹⁹“Tama Gulu,” yanila bantile doi Yesus, “Musa tulise kona palatulan nia tuuk doi kita: ‘Kalua meeng komala-malane mate tukon akiyo kona pau, maka koutuso sio nakilayo do balunodoo sulano nadaano kona katulunan doi mianoo mo lapamo mate.’” ²⁰Daano kopitu komian montolutus. Kolanggongo osowaan, maka mate akiyo kona pau. ²¹Doibundu kokoluano osowaan tukon baluno, bai yana mate akiyo kona pau. Langgedoo mo pokakana teali koidan doi utuso kotoluno, ²²tukon banggadudul polong doi kopituno. Doibundu do boinedoo susuungo mate koidan. ²³Doibundu komian momate natubooan koidan, indee kai naboloki do boinedoo? Sabab domo pitu-pituiladoo lapamo pooala tukon yana!”

²⁴Yesus timbiliyo, “Komuyu sala tuuno. Sabab komuyu aki pomangalatikene ko Kitab Moliyous mau ko Mian Bisa nakuasa.

²⁵Sabab kalu naikon komian momate tubomo koidan, yanila akimo naosowaan koidan, bai yanila tubo pokakana komalaekat doi sulugaa. ²⁶Tukon tentang komian momate nainotuboiyan koidan, akiyon baanggon komuyu pobasayo doi Musa nakitab

lalomo kaliangano do mosolotoo mo mosua? Doi ayat-ayatoo lalomo totulis baikon ko Mian Bisa bantile doi Musa, ‘Yakumo Abalaham na Mian Bisa, Ishak na Mian Bisa, tukon Yakub na Mian Bisa.’ ²⁷Do Mian Bisadoo bolikon Mian Bisa mian momate. Yana Mian Bisa mian tubo. Komuyu salamo tuuno!”

Palenta mo tutuu

(Mat. 22:34-40; Luk. 10:25-28)

²⁸Maka lubat komeeng kogulu agama mondongolii Yesus napobasalitaiyan tukon do mianoo motongusokon Saduki miano. Gulu agamadoo kitayo Yesus lapamo timbiliyo do mianoo tukon monondok. Maka yana mansadai doi Yesus, “Palenta yaando komo penting doi sasaibino kopalenta?”

²⁹Yesus timbiliyo, “Palenta tumbeno, doiyamo: ‘Polengele, eh bangsa Israel! Konda Temeneno Mian Bisa, Temenenodoo meeng. ³⁰Seange kai konda Temeneno Mian Bisa tukon sasaibino konoamu, tukon sasaibino kobutomu tukon sasaibino komu pikilan tukon sasaibino komu bukuanan.’ ³¹Palenta koluano doiyamo: ‘Seseange kotulamu, buno ikoo seseange kobutomu susuumu.’ Akiyono koidan kopalenta bailong mo lobian tuuno doi moluadoo kopalenta.”

³²Maka do gulu agamadoo bantile doi Yesus, “Kana tuuno, Tama Gulu! Takainomo bisa Tama nabinantil: Ko Temenenomo ko Mian Bisa mo momeeng, tukon akiyono koidan ko Mian Bisa bailong. ³³Tukon kobanggapi sio naseseange ko Mian Bisa tukon sasaibino konoano, tukon sasaibino kona pikilan tukon sasaibino kona bukuanan. Tukon yanadoo sio naseseange kotulano, buno butongo susuungo. Doiya lobian kona monondokan doi mososubakonan sosubakon mosinua tukon sosubakon-sosubakon bailong doi Mian Bisa.”

³⁴Yesus kitayo baikon do gulu agamadoo lapamo timbiliyo tukon monondok tuuno. Tukon Yesus bantile doi yana, “Ikoo kabimo teali Mian Bisa namian.”

Lapa doiya akiyono komeeng komian mo balani koidan sumbetene kona pasadai doi Yesus.

Tomundo Pasalamat

(Mat. 22:41-46; Luk. 20:41-44)

³⁵Daano mongotunggul doi Temeneno Nabonua, Yesus mansadai, “Bulaando kai gulu-gulu agama moola bantile baikon do Tomundo Pasalamatoo Daud natulunan? ³⁶Banggokai Daud susuungo – sabab Mian Bisa Na Loh komo bontilio – bantilan,

‘Temeneno bantil doi ku Temeneno:
osulang doi bakalinganggu taikon
polong yaku kubaiyo komu musu-musu
sosuba doikoo.’

³⁷Jadi kalu Daud mabantil do Tomundodoo Pasalamat ‘Temeneno’, bulaando kona tealian yana mobaino Daud natulunan?”

Poingotii sulano bada-badagai doi gulu-gulu agama

(Mat. 23:1-36; Luk. 20:45-47)

Mianoo badaang mo daano doi Temeneno Nabonua sanaang momondongolii Yesus momongotunggul. ³⁸Yana bantile doi yanila, “Pobada-badagai doi gulu-gulu agama. Yanila yase papaakon tukon najubah mo bulusan tukon yase moinodotii doi labotan. ³⁹Yanila yase moosulang doi osulangan mo inodotii doi bonua kaledaan lalomo tukon lamean-lamean. ⁴⁰Yanila kokoliiyo kobalu-balu tukon alayo kona langge-langge doi nabonua. Tukon sulano napo tutupiyo do napo kulokisanoo, yanila sambeyang bulu-bulusan. Yanila babalat kona ukuman!”

Meeng kobalu nasosubakon

(Luk. 21:1-4)

⁴¹Sambuno osulang posalaanggon tukon dopetidoo sosubakon doi Temeneno Nabonua, Yesus palatikangene komian momongusokon doy doi petidoo lalomo. Badaang komian mokaasa momongusokon doy mobadaang; ⁴²maka komeeng kobalu mo talalais lubat koidan. Yana mongusokon lua kodoy tambaga, doiyamo doy limis mo soisik koanggano. ⁴³Maka Yesus uange kona pololaing-pololaing maka bantile doi yanila, “Popalatikangene naiya: Do baludoo mo talalais momongusokon doi petidoo lalomo lobian badaang luwedo

mo inusokon doi sasaibino domianoo bailong. ⁴Sabab yanila sasaibino mebee doi nabuat nalobianan. Bai do baludoo mau kai natodudulo kona talalaisan yana mebeekon komo daano doi yana – sabab doiyamo yana palaluu sulano natubo.”

Yesus basilingan tentang Temeneno Nabonua namanasan

(Mat. 24:1-2; Luk. 21:5-6)

13 Salataa Yesus tinggale ko Temeneno Nabonua, meeng komian doi napololaing-pololaing bantile, “Tama Gulu, soba kitayo do bangunan-bangunanoo. Palatikanggene kobatubatu. Bukan maen kona monondokan!”

²Yesus timbiliyo, “Ikoo kitayo do bangunan-bangunanoo mo babasal, bolikon? Akiyo komeeng kobatu doi bangunan-bangunanoo mototinggal tosusun doi natangabosan. Sasaibino naikon minanas.”

Sakisaawan tukon poloilokisan

(Mat. 24:3-14; Luk. 21:7-19)

³Doibundu Yesus ampakon doi Zaitun Bunggulo, tukon osulang doi osulangan posalaanggon tukon Temeneno Nabonua. Maka Petulus, Yakobus, Yohanes, tukon Andelias lubat doi yana sulano napobasilingan tukon yana salaku pelibadi. ⁴“Soba Tama bontiikene doi kami,” yanila bantile doi yana, “Oila kotempono sasaibinodoo naikon kona tealian? Tukon oila kopaloosano kona tokitaan molaatemo kotempono?”

⁵“Pobaingotii,” Yesus timbiliyo, “inai komuyu pokinoikolii. ⁶Badaang komian molubat tukon pakeyo kosambunggu tukon bantile, ‘Yakumo yana!’ maka kokoliiyo komian badaang. ⁷Kalu komuyu molongol sinapan-sinapan alalo doi popasangan tukon bilita poakatean, inai pomatakut. Do lobo-lobodoo sio nateali, bai doiya aki nabalati baikon molaatemo kona kiamatan. ⁸Kobangsa meeng poakate tukon molawane kobangsa bailong. Negala bailong lobosio konegala bailong. Doi yayaa teali koleali tukon malaalan. Sasaibino doiya sodo natambuunan tolong, buno meeng koboine mo toupiyo kona masakitan doi namosuungan.

⁹Komuyu pobaingotii, sabab komuyu naikon linako tukon sinalakanggon doi pangadilan agama. Komuyu naikon binobokii doi bonua-bonua kaleda. Komuyu naikon binaba mangadap doi sambu-sambu tukon tomundo-tomundo sabab komuyu

kupololaing. Tukon doiyamo komu kasampatan sulano mumebee teteba doi yanila tentang yaku. ¹⁰Bilita Monondok moluwedoi Mian Bisadoo sio nabinabilitakon loluk doi sasaibino kobangsa. ¹¹Tukon kalu komuyu linako tukon binaba doi sambu, inai pomatakut tentang oila komuyu mo bantile. Kalu laatemo kotempono komuyu mobasilingan, bantile kai oila komo pinopitoikon doikoo doiya kosinggatoo. Sabab bantil-bantilan komuyu mo bantiledoo bolikon mubantilan susuumu, bai lubat doi Mian Bisa Na Loh. ¹²Mian kulokisene koutuso susuungo sulano nainakate. Doiyamo komo teali doi tama tukon napau. Pau-pau naikon apese kotinano-tamano, tukon salakangene yanila nainakate. ¹³Komuyu minosikiton doi sasaibino komian sabab komuyu kupololaing. Bai komian mo bataanggon polong doi napupusan, naikon sinalamatan.”

Kulokisan mo manase

(Mat. 24:15-28; Luk. 21:20-24)

¹⁴“Komuyu naikon kitayo ‘Kulokisan mo Manase’ kokondong doi tempat mo pinantanggon yana. (Sasatan doi mobasayo: Palatikangene oila koalatio!) Doiya kosinggatoo komian mo daano doi Yudea sio naobuleng doi bunggul. ¹⁵Mian moano doi nabonua bunggono inai naobulus tukon usok doi nabonua lalomo sulano naalayo kona langge-langge. ¹⁶Mian mo daano doi labue asino inai naabali moalayo kona jubah. ¹⁷Bukan maen kona susaan doi oloyodoo doi boi-boine mo tianan tukon tina mo daano mosusuwo konapau! ¹⁸Baladoa sulano do lobo-lobodoo inai nateali doi timul lalomo. ¹⁹Doi oloyo-oloyo mo susadoo naikon daano komeeng kosusa moakiyoon nabiasa teali, salataa ko Mian Bisa natealikanano nadunia nia polong naiya budodoo, tukon akimo koidan nateali. ²⁰Kalu baikon ko Mian Bisa aki nakependeyo do loonudoo, maka akiyo komeeng komian mo selamat. Bai tobikon namian, Mian Bisa kependeyo do loonudoo.

²¹Doiya kosinggatoo kalu meeng komian bantile doi komuyu, ‘Kitayo, Tomundodoo Pasalamat daano dimbaa!’ kai ‘Kitayo, yana daano idoo!’ – inaikai poanggayo do mianoo. ²²Sabab pasalamat-pasalamat mokala-kala tukon nabi-nabi mokala-

kala naikon lubat. Yanila naikon kubaiyo kokubai-kokubai mobilikon langge tukon mominasaingdinggon-minasaingdinggon sulano natipuwu kalu moola, mau Mian Bisa namian koidan. ²³Jadi, pobadagai! Sasaibinodoo lapamo yaku bontiikene doikoo mau naakiyoon do lobodoo nateali.”

Manusia Napau nalubatan

(Mat. 24:29-31; Luk. 21:25-28)

²⁴“Salataa do loonudoo susaan, kooloyo teali kalipookan, tukon kobituwon akiyono koidan kolaango. ²⁵Bituon-bituon pauno tuwong luwedoi timbu, tukon komo kuasaiyo kodapang teali nggalanggabut. ²⁶Doiyo kosinggato Manusia Napau kinita lubat doi bunong lalomo tukon kuasa mobabasal tukon nanggaanganan. ²⁷Yana naikon utuse kona malaekat-malaekat sulano napototongikene kona mian lilik doi sangkap kolipu pasuno, doi lipu-lipu bunduno tukon doi timbu-timbu bunduno.”

Ala batango teali otunggul

(Mat. 24:32-35; Luk. 21:29-33)

²⁸“Alayo otunggul dealadoo batango. Kalu kopanga-pangano manampal tukon mantalamuyuk, tukon tambuun sopii, komuyu toiyo baikon kopintal moonas loolanimo. ²⁹Bunomo doiyo kalu komuyu kitayo do langge-langgedoo moteali, komuyu toiyo baikon kotempono loolanimo tuuno. ³⁰Potoiyo! Sasaibino nalanggenia naikon teali akiyoon komian mo tubo nia budodoo namate sasaibino. ³¹Timbu tukon buta naikon lapus, bai daku bantilan tataap sidutu-posidutukon.”

Akiyo komeeng komian motoiyo kooloyono tukon kojamo

(Mat. 24:36-44)

³²“Mau kai nabuno doiyo, kiyo komeeng komian motoiyo kooloyono kai kojamo. Malaekat-malaekat doi sulugaa aki tukon Paudoo aki, tongo Tama komo toiyo. ³³Jadi komuyu sio pobada-badagai tukon pobaingotii, sabab komuyu aki potoiyo oila kotempono. ³⁴Kondondoongo inandekon komeeng komian mo tinggale kona bonua maka ampakon doi lipu mo odoon.



Buat-buat mo luwedoi tambaga (14:3)

Yana mosumbolii doi napeleleani-peleleani nauluse kona bonua, tukon beena limang doi yanila suwe-suwele. Doi pototooli tataapon, yana bateteba sulano nabadagai mono-monodok. ³⁵Tobikon doiya komuyu sio pobada-badagai, sabab komuyu aki potoiyo oila kooloyono do bonua tumbunodoo naikon kona abalian – uga-ugaate doi nakinobianan, ugaate doi popook tangano, ugaate doi oloyo naalanian komodoa, kai doi oloyo nasumbotan. ³⁶Kalu sosinggoton yana lubat, inai yana nalaate komuyu daano momoolo. ³⁷Oila daku binantil nia doikoo, yaku bantile koidan doi sasaibino komian: pobada-badagai!”

Yesus nainokoliian

(Mat. 26:1-5; Luk. 22:1-2; Yoh. 11:45-53)

14 Lua kooloyo koidan Oloyo Paskah tukon Lamekanano ko Loti Moakiyo ko Lagino. Imam-imam kapalano tukon gulu-gulu agama daano moumbolii loloon sulano nalokoyo Yesus tukon aki natotoi, tukon sulano nainakate yana. ²“Bai inai nda kubaiyo doiya doi lamean tembono,” yanila bantile, “sabab naaki nateali koponggimakanan.”

Yesus kinundongiikon kolisison mobabangi

(Mat. 26:6-13; Yoh. 12:1-8)

³Sambuno Yesus daano doi Betania, doi Simon nabonua doi lolukoo moseselon kokulito mo minatakuton, meeng koboine lubat doi yana. Yana makanggi meeng kobotol pualam koantoko

lisison mobabangi mo maaling, kinubai doi wangi anggolo. Singgatoos Yesus daano moosulang kaan, do boinedoo pasayo do botoloo maka kundongiikene do lisison babangidoo doi Yesus bunggono. ⁴Bubulaa komian mo daano idoo teali nggimal tukon bantile meeng tukon doi bailong, “Oila kona mototuuk do lisisonnoo mobabangi modinadaat? ⁵Do lisisonnoo moola binalukon tukon lobian koolino tolu kosakato kodoy suasa, tukon kodoyno bineekon doi mian motalalais!” Maka yanila nggimoliyo do boinedoo.

⁶Bai Yesus bantile, “Sodiiyomo yana! Bulaando komuyu mokubaiyo susa yana? Yana kubaiyo komeeng komonondokan tukon tanggaal doi yaku. ⁷Mian motalalais sidutu daano doi komuyudoo. Sampa-sampa kotempo kalu komuyu yase, komuyu moola tulunge yanila. Bai yaku aki nasidutu polaing-laing komuyu. ⁸Boine nia lapamo lakukangene komo moola yana lakukangene. Yana lapamo masadiakene yaku lisison mobabangi motuuk doi kukinibulan akiyoon nalaate kotempono. ⁹Poanggayomo! Doi posaapon kodunia, naando ko Bilita Monondokoo moluwedoi Mian Bisa binabotilanggon, boinedoo nakokubai binasalitakon koidan teali tondoos doi yana.”

Yudas yase Yesus nalinoilokis

(Mat. 26:14-16; Luk. 22:3-6)

¹⁰Maka Yudas Iskaliot, meeng komian doi songulodoo lua Yesus napololaing, ampakon doi imam-imam kapalano tukon namakisuut moloilokise Yesus doi yanila. ¹¹Yanila sanaang tuuno molengele doi Yudas namakisuutoo, tukon dandiyo naikon mobeena doyo doi Yudas. Maka doi Yudas koidan tambuuno moumbolii kasampatan sulano naloilokise Yesus.

Yesus kaane kokinaan Paskah tukon napololaing-pololaing

(Mat. 26:17-25; Luk. 22:7-14, 21-23; Yoh. 13:21-30)

¹²Doi oloyo tumbeno doi Lamekanano ko Loti Moakiyo ko Lagino – salataa komian namokolotan domba Paskah – pololaing-pololaing Yesus mansadai doi yana, “Naando kai Tama naiyasano kami mosadiayo kokinaan Paskah motuuk doi Tama?”

¹³Maka Yesus sumboliiyo kolua komian doi yanila, “Poampakon doi kota, indaa meeng komala-malane mo daano makanggi meeng koselekan moonoo paisu, naikon pososuung tukon komuyu. Polainge yana ¹⁴doi bonua yana mo usokiyo tukon bontiikene doi bonuadoo tumbuno, ‘Tama Gulu mansadai, naando kona tempat yana tukon napololaing-pololaing naikon makaanan kinaan Paskah.’ ¹⁵Do mianoo naikon tudoikene doikoo komeeng koluangan doi babo mo babasal. Do luanganoo lapamo inatul, sukup tukon pakakaso doi lalom. Sadiayomo sasaibino indaa tuuk kita.”

¹⁶Maka Yesus napololaing luailadoo ampakono doi kota. Imbali yanila laate sasaibino bisa bunomo do Yesus nabantilanodoo. Maka yaniladoo masadiakene kokinaan Paskah.

¹⁷Popookoo, Yesus lubat tukon domo songulodoo lua kona pololaing. ¹⁸Tukon yanila daano moosulang kaan, Yesus bantile, “Pondongoliiyo: meeng komian doi antala komuyu, diabudodoo nia mo kaan pososinggat yaku naikon komo loilokise yaku.”

¹⁹Molongol doiya, Yesus napololaing-pololaing teali poloon tuuno. Maka memeeng komian tambuun mansadai doi Yesus, “Tantu bolikon yaku Tama naminakisuuti?”

²⁰Yesus timbilio, “Yana meeng komian doi komuyudoo mo songulo lua nia, mo kaan meeng kopinggan tukon yaku. ²¹Takainomo Manusia Napau naikon mate pokakana komo totulis doi Kitab Moliyous lalomo. Bai bukan maen kona silakaan domianoo mo kulokisanggene Manusia Napau! Lobian komondok tuuk do mianoo kalu yana aki nasinuung!”

Temeneno na Lamean

(Mat. 26:26-30; Luk. 22:14-20; 1Kol. 11:23-25)

²²Salataa yanila daano kaan, Yesus mangala loti tukon baladoa syukuul doi Mian Bisa. Doibundu yana bisi-bisilio do lotidoo tukon limano, maka beekene doi napololaing-pololaing maka yana bantile, “Alayomo tukon kaanemo, naiyamo kobutonggu.”

²³Lapa doiya yana mangala meeng kogalaas koanggul. Yana baladoa syukuul doi Mian Bisa, maka beekene do galaasoo doi napololaing-pololaing. Doibundu yanila sasaibino monginum do anggulo. ²⁴Lapa doiya Yesus bantile, “Naiyamo kosaunggu mo

sahkangene ko Mian Bisa napaladandian, sau mo kinundang motuuk doi mian badaang. ²⁵Poanggayomo: Yaku akimo naikon kumonginum naiya anggul nia koidan, polong doi singgatooyaku monginum anggul boolu polaing komuyu doi Tamanggu na Dunia Boolu.”

²⁶Doibundu yanila mananikene komeeng konanian nggaalano ko Temeneno. Tukon sambuno lapa doiya yanila ampakon doi Zaitun Bunggulo.

Patantukon naikon Petulus moakiyengene Yesus

(Mat. 26:31-35; Luk. 22:31-34; Yoh. 13:36-38)

²⁷Doibundu Yesus bantil doi yanila, “Komuyu sasaibino dampas mootinggale yaku. Sabab doi Kitab Moliyous lalomo totulis, ‘Mian Bisa naikon akateyo kona pototooli, tukon kona domba tambuno meeng malapaaso.’ ²⁸Bai salataa yaku inotuboi koidan, yaku ampakono matailukiyo komuyu doi Galilea.”

²⁹“Aki,” Petulus timbiliyo, “sodiiyomo yanila sasaibino naotinggale Tama, yaku tutuu aki.”

³⁰“Neneeke,” Yesus bantile, “napopook nia koidan, akiyoon komanuk nakokuuwa lua luunggon, ikoo tolumoluunggon muakiyengene yaku.”

³¹Petulus timbiliyo tukon togaas, “Sodiiyomo yaku sio kumate posinggat-singgat tukon Tama, tutuu yaku aki naikon kubantile baikon yaku aki kutingoniiyo Tama!”

Tukon pololaing-pololaing bailong bantile bunodoiya.

Yesus baladoa doi Getsemani

(Mat. 26:36-46; Luk. 22:39-46)

³²Yanila polong doi meeng kotampat kosambuno Getsemani, tukon Yesus bantile doi napololaing-pololaing, “Osulang dimbaa yaku daano moampakon baladoa.”

³³Maka Yesus tobiyo Petulus, Yakobus, tukon Yohanes ampakon polaing-laing tukon yana. Yana tambuun nemiiyo poloon tukon susa. ³⁴“Noanggu poloon tuuno,” Yesus bantile doi yanila, “nemiiyano bunoyase tongo mate. Dungolo dimbaa tukon pobadagai!”

³⁵Yesus ampakon lobian odoon soisik maka totuku doi buta tukon baladoa. Doi sambeyangoo lalomo yana kabiyo kalu

moola yana mau naaki natoupiyo kona susaanoo. ³⁶“Tama, oh Tama,” kona bantilano, “akiyo komeeng moaki nateali doi Tama. Binggatemmo nasusaan nia doi yaku. Tolongo inai moloingiyo daku mongiasan bai tolongo Tama namongiasan.”

³⁷Lapamo doiya Yesus abali tukon laate kona pololaing-pololaing daano momoolo. Yana bantile doi Petulus, “Simon, ikoo kai moolomo? Tolongo meeng kojamo, ikoo aki nateali bada-badagai?” ³⁸Maka Yesus bantile doi yanila, “Pobada-badagai, tukon baladoa sulano komuyu aki potoupiyo kosobaan. Takainomo komu loh yase kubaiyo komo kana, bai komuyu aki posangupe sabab kobanggapi nasipatoo mantalamuyuk.”

³⁹Kokoidan Yesus ampakon baladoa tukon mabantil bantil-bantilan mo pokakana. ⁴⁰Lapamo doiya yana abali koidan doi napololaing-pololaing tukon laate yanila daano koidan momoolo, sabab yanila pipiito tuuno. Maka yanila akimo napotoiyo oila komo sio yanila bantile doi Yesus.

⁴¹Salataa Yesus abali doi yanila doi kotoluno luunggon, yana bantile, “Daano kai komuyu momoolo tukon tatade? Sukupo! Polongo kotempono Manusia Napau nasinalakanggonan doi mian mobaladosa limano. ⁴²Pobanguno, maimo kita nda ampakon. Kitayo! Komian mo kulokisanggene yaku lapamo lubat!”

Yesus linako

(Mat. 26:47-56; Luk. 22:47-53; Yoh. 18:3-12)

⁴³Daano Yesus mobasilangan, lubato Yudas, meeng komian doi mosongulodoo lua kona pololaing-pololaing. Polaing-laing tukon yana badaang komian molubat mo makanggi sabel tukon tompide. Imam-imam kapalano, gulu-gulu agama tukon katua-katua Yahudi sumboliiyo yanila. ⁴⁴Yudas lapamo tantukanggene komeeng kotanda doi yanila. “Mian yaku mo umayo,” yana bantile doi yanila, “yanamo komiano. Lakoyo yana tukon boboiyo yana tukon podagaiyo tutuuno.”

⁴⁵Doiyo singgat Yudas lubat, yana banggadudul ampakon doi Yesus tukon bantile, “Tama Gulu!” doibundu yana umayo Yesus. ⁴⁶Maka do mianoo mo lubat mopolaing-laing tukon Yudas lakoyo Yesus tukon boboiyo yana. ⁴⁷Bai daano komeeng komian mo daano idoo bubute kona sabel tukon takulikene doi imam babasal naata polong botol kotolingaino sembeleng. ⁴⁸Maka Yesus bantile doi yanila, “Kai naiya yaku nia lokis,

tobikon komuyu lubat makanggi sabel tukon tompide sulano polakoyo yaku? ⁴⁹Sasamba kooloyo yaku mongotunggul doi Temeneno Nabonua doi salaamuyu, tukon komuyu aki polakoyo yaku. Bai takainomo sio nabuno doiya, sulano natealimo oila komo lapamo totulis doi Kitab Moliyous lalomo.”

⁵⁰Sasaibino kona pololaing dampas otinggale Yesus.

⁵¹Meeng kopamuda, mo tolono mapake meeng kotoik patolo sulano nabungusio kobutongo, mololaing Yesus. Komian yase lakoyo yana, ⁵²bai yana liate dona toikoo maka obuleng tukon balalau.

Yesus doi Pangadilan Agama salaano

(Mat. 26:57-68; Luk. 22:54-55, 63-71; Yoh. 18:13-14, 19-24)

⁵³Yesus binaba doi imam babasal nabonua. Imbali sasaibino koimam kapalano, katua Yahudi, gulu agama daano pototongi. ⁵⁴Petulus lolainge Yesus doi naodoonan polong usok doi imam babasal nabonua basaleano. Imbali yana osulang kotolonosiiyo kobutongo balolanikon doi aung pototongi tukon padagai-padagai. ⁵⁵Imam-imam kapalano tukon sasaibino Pangadilan Agama balausaha namalaatene bukutii-bukutii mo inasalakon Yesus sulano namoola inotuwongikon koukuman mate. Bai yanila aki namalaat meeng kobukutiino. ⁵⁶Badaang kosakisii mo inuang sulano namebee kasaksian mokala motuuk doi Yesus, bai yanila nabantilan aki napololoi meeng tukon bailong.

⁵⁷Maka bubulaa kosakisii mokokondong tukon mebee bantilan mokala nia tentang Yesus, ⁵⁸“Kami lengele naiya mian nia bantile, ‘Yaku naikon lubange naiya Mian Bisa nia Nabonua banggapi mo kubaiyo, tukon salataa tolu kooloyo, yaku naikon bangune kobailong mo bolikon banggapi komo kubaiyo.’” ⁵⁹Bai nomianoo nasilingan aki napokokonoi meeng tukon bailong.

⁶⁰Maka imam babasal kokondong doi yanila sasaibino salaano tukon mansadai doi Yesus, “Bulaando kai ikoo moaki mutimbiliyo natuduan-tuduan nia mo bineekon doikoo?”

⁶¹Bai Yesus aki nabiyok. Yana aki namotimbili. Maka doimam babasaloo mansadai koidan doi yana, “Kai ikoomo ko Tomundo Pasalamat, Mian Bisa Napau Moliyous?”

⁶²“Yakumo nia,” Yesus timbiliyo, “tukon komuyu sasaibino naikon kitayo Manusia Napau moosulang taalikon bakalinga doi

Mian Bisa Mobabasal Konakuasa tukon lubat luwedoi bunong lalomo doi timbu!”

⁶³Maka doimam babasalo sia-siake kona kalambi tukon bantile, “Akimo napalaluu sakisii! ⁶⁴Komuyu lapamo lengele kona bantil-bantilan mo kulokisangene ko Mian Bisa. Diabudodoo oilamo komu putusan?”

Yanila sasaibino putusiyo baikon komo sala Yesus, tukon sio nainukum mate.

⁶⁵Maka bubulaa komian tambuuno motupeiyoyo Yesus, tukon yanila kukupe komatano tukon bobokiiyo yana, maka bantile, “Soba bantile, indee komo bobokiikon?” Padagai-padagaidoo koidan moloingi momatapi Yesus.

Petulus akiyengene Yesus

(Mat. 26:69-75; Luk. 22:56-62; Yoh. 18:15-18, 25-27)

⁶⁶Daanoon Petulus modaano doi basaleano, daano komeeng kopeleleani boine doi imam babasal lubat imbali. ⁶⁷Salataa kitayo Petulus molalange kobutongo kolaniyo koaung, yana palatikangene mono-monondok Petulus duduso tukon bantile, “Bolikon kai ikoo koidan komo polaing-laing Yesus do Nasaletoo mianodoo?”

⁶⁸Bai Petulus akiyengene. “Aki kutoiyo tukon akiku mangalatikene oila komu minakisuut,” nabantilano doi peleleanidoo. Maka Petulus ampakono doi imam babasal nabonuadoo tataapono. [Doi ya singgato, komanuk kokuuwamo.]

⁶⁹Peleleani boinedoo kitayo Petulus koidan, tukon bantile doi mianoo idoo, “Yana takainomo daano meeng komian doi yanila!” ⁷⁰Bai Petulus akiyengene koidan.

Aki namalumbit doibundu, domianoo idoo bantile koidan doi Petulus, “Akimo namoola inakiyonggon koidan takainomo ikoo meeng komian doi yanila, sabab ikoo luwedoi Galilea!”

⁷¹Maka Petulus tambuuno mobato-batotopi tukon bantile, “Aki kutingoniiyo do mianoo komuyu mo makisuutiyo!”

⁷²Doi ya kosinggato komanuk luamo luunggon nakokuuwa. Tukon Petulus tandayomo baikon Yesus molapamo bantile doi yana, “Akiyoon komanuk nakokuuwa koluano luunggon, ikoo tolu mo luunggon muakiyengene yaku.” Maka Petulus kokiil yodi-yodi.

Yesus doi Pilatus salaano

(*Mat. 27:1-2, 11-14; Luk. 23:1-5; Yoh. 18:28-38*)

15 Dodowasoono, sasaibino komo Pangadilan Agama tongusokon imam-imam kapalano, tua-tua Yahudi tukon gulu-gulu agama pobisalai moso-mosobit. Yanila boboiyo Yesus, doibundu yana binaba tukon sinalakanggon doi Pilatus. ²Pilatus sadaiyo doi Yesus, “Tutuu kai ikoo Yahudi miano Tomundo?”

³“Bunomo komu bantilan,” Yesus timbiliyo.

Imam-imam kapalano badaang kona tuduano doi Yesus. ⁴Maka Pilatus mansadai koidan doi Yesus, “Aki kai muyase timbiliyo? Soba kitayo bulaa kona kadaang kotuduano yanila mo inotuuk doikoo!”

⁵Bai Yesus aki namotimbili koidan, tobikon Pilatus masaingding.

Yesus inotuwongikon koukuman mate

(*Mat. 27:15-26; Luk. 23:13-25; Yoh. 18:39 – 19:16*)

⁶Doi samba-samba ko Lamekanano ko Paskah, Pilatus mongosodii meeng komian motinalunggu loingiyo komian badaang naililik. ⁷Doi talunggu lalomo, antala mobanggabut-banggabut mo lakukene komangakatean doi tempo nanggabutan, daano komeeng komian kosambuno Balanabas. ⁸Mian badaang pototongi tukon kabiyo doi Pilatus sulano yana naosodiiyo komeeng komian motinalunggu buno mobiasamo. ⁹Pilatus mansadai doi yanila, “Komuyu kai yase, yaku sodiiyo do Yahudi miano natomundo motuuk doi komuyu?” ¹⁰Sabab Pilatus tingoniiyo baikon koimam-imam kapalano salakanggene Yesus doi yana sabab mosikit konoanoila.

¹¹Bai imam-imam kapalanodoo bujukiyo domianoo badaang sulano nakabiyo doi Pilatus nasodiiyo Balanabas motuuk doi yanila. ¹²Maka Pilatus bantile koidan doi mianoo badaang, “Kalu buno doiya, yaku sio kubaiyo oila domianoo komuyu mobantile Yahudi miano natomundo?”

¹³Yanila ngeleamon? “Posempangemo yana!”

¹⁴“Bai oila kona kulokisan doi yana?” Pilatus sadaiyo.

Maka yanila ngeleamon koidan kokobukuan, “Sempangemo yana!”



Meeng komian kosuludadu Loma (15:16)

¹⁵Pilatus yase tanaangene do mianoo badaang, maka yana sodiiyo Balanabas tuuk yanila. Doibundu yana sumboliyo komian mobobokiiyo Yesus, maka salakangene sulano nasinempanggon.

Suludadu-suludadu maenggene Yesus

(Mat. 27:27-31; Yoh. 19:2-3)

¹⁶Suludadu-suludadudoo babayo Yesus doi kantol pangadilan doi gubelnul nakamali. Doibundu sasaibino kopasukan inuang pototongi. ¹⁷Maka yanila konoikene kojubah mosamelaon doi Yesus, tukon mokubai songgo doi kayung langa-langaano mo palatadian, doibundu sinonggoikon doi Yesus oluno. ¹⁸Lapa doiya yanila beena holomat doi yana. “Tabea Tomundo Yahudi Miano!” yanila bantile. ¹⁹Yanila bobokiiyo Yesus oluno tukon tongkat, maka yanila tupeiyo yana tukon sosubaiyo doi salaano. ²⁰Salataa lapa Yesus minaenggon, yanila bukayo jubahdoo

mosamelaon maka kinonoikon koidan kona pakean susuungo. Doibundu yana binaba doi tonggulung sulano nasinempanggon.

Yesus sinempanggon

(*Mat. 27:32-44; Luk. 23:26-43; Yoh. 19:17-27*)

²¹Doi loloon tangano yanila pakisaayo komeeng komian motanggunge Yesus nakayung sempang. Do mianoo pokokonoi sodo naluwe doi nakampung ampakon usok doi kota. (Kosambuno Simon – kona lipu doi Kilene – Aleksandel tukon Lufus tamano.) ²²Yesus binaba doi meeng kotampat kosambuno Golgota, koalatio, “Mangabosan Olu”. ²³Idoo yanila yase beena doi yana anggul mo sinambul gataa momotuulo, bai Yesus aki nayase moinume do angguloo. ²⁴Doibundu yanila sempanggene yana, tukon inobos-obos kona pakean tukon undian sulano natatukanggene kona obos meeng-meeng. ²⁵Dona sinempanggonanoo kona tealian batong sio dodoa. ²⁶Doi sinempanggonanoo bungguno tinulis kotuduano kaliangano doi yana, doiyamo: “Tomundo Yahudi Miano”. ²⁷Posinggat-singgat tukon Yesus yanila sempanggene koidan kolua komian molokis; komeeng doi bakalingano taikon komeeng koidan doi bobono taikon. [²⁸Kalu buno doiya tealimo komo totulis doi Kitab Moliyous lalomo; doiyamo: “Yana inanggap tongusokon doi mianoo molokis.”]

²⁹Komian mo alon idoo sua-sualilinggene kooluno tukon totulaiyo Yesus. Yanila bantile, “He, ikoo komo yase lubange ko Mian Bisa Nabonua tukon kekendenge koidan tolu kooloyo lalomo. ³⁰Soba obulus koiya musinempanggonannokon tukon salamatene kobutomu!”

³¹Bunomo koidan imam-imam kapalano tukon gulu-gulu agama piadayo Yesus. Yanila bantile meeng tukon bailong, “Yana salamatene komian bailong, bai butongo susuungo yana aki namoola salamatene! ³²Kalu yana tomundo Islael, Tomundo Pasalamat, tadukai yana diabudodoo naobulus doi sempangoo, sulano kami kitayo tukon maangga doi yana!”

Do mianoo mo sinempanggon pososinggat Yesus koidan totulaiyo Yesus.

Yesus namatean*(Mat. 27:45-56; Luk. 23:44-49; Yoh. 19:28-30)*

³³Doi nasuunan kooloyo, tolu kojama kona kalumbit posaapon do lipudoo teali kalipookan. ³⁴Tukon batong tolu kinobian, Yesus nggeleamon tukon alalo mo babasal, “Eloi, Eloi, lama sabakhtani?” Koalatino, “Oh Ku Mian Bisa, oh Ku Mian Bisa bulaandokon ikoo motinggale yaku?”

³⁵Bubulaa komian idoo molengele do manggadidianoo, tukon bantile, “Pondongoliiyo, yana uange Elia!” ³⁶Meeng komian doi yanila moso-mosobit ampakon mangala bunga kalang, maka kemeke doi anggul momeele lalomo. Doibundu do bunga kalangoo tinabokon doi meeng kokayung bunduno, maka tinutumikon doi Yesus suungo bibilo, tukon bantile, “Totiili, mai nda kitayo kai Elia lubat obulusene yana doi nasinempangonanoo.”

³⁷Maka Yesus nggeleamon tukon mate.

³⁸Lalanse pangantang mo tokooton doi Temeneno Nabonua tebeak tokuakon lua doi bunguk polong doi bilit. ³⁹Suludadu kapalano mo kokondong doi sempangoo, kitayo bulaa Yesus namatean. Suludadudoo kapalano bantile, “Takainomo bisa namian nia Mian Bisa Napau!”

⁴⁰Idoo daano kobubulaa koboine mo daano mokita sasaibinodoo doi namododooonan. Doi yaniladoo daano Salome, Malia Magdalena, tukon Malia Yakobus tinano mo muda tukon Yoses. ⁴¹Yanila koboi-boine mo lolainge tukon tomboniiyo Yesus, singgatooyana modaano doi Galilea. Tukon daano mobadaang koidan koboi-boine bailong idoo mo lapamo lubat doi Yelusalem polaing-laing tukon Yesus.

Yesus nakinibulan*(Mat. 27:57-61; Luk. 23:50-56; Yoh. 19:38-42)*

⁴²⁻⁴³Kooloyo lolanimo kona popookan salataa Yusuf doi Alimatea lubat. Yana anggota Pangadilan Agama mo inodotii. Yana koidan daano montotiili kotembono ko Mian Bisa namapalentaan bunu Tomundo. Oloyodoo oloyo Mosinadiakon (doiyamo oloyo akiyoon nalaate kooloyo Tadean). Tobikon doiya Yusuf balani mangadap doi Pilatus tukon kabiyo Yesus badano.

⁴⁴Pilatus masaingding molengele baikon Yesus momatemo. Jadi yana mosumbolii mian mouange kopasukan kapalano tukon mansadai doi yana kabudoon Yesus malumbito kona matean. ⁴⁵Salataa molongol do suludadudoo kapalano nalapulan, Pilatus pataikene Yusuf moalayo Yesus badano. ⁴⁶Maka Yusuf mongoli toik lenan moalus tukon sambuno lapa obulusene Yesus badano, yana bungusiyomo tukon do toikoo. Doibundu yana abese do badano doi meeng kokibul lalomo mo kinubai doi bunggul batu lalomo. Lapa doiya yana nggolinggene komeeng kobatu mobabasal potutupikon do kibuloo tataapon. ⁴⁷Momeeng daano Malia Magdalena tukon Malia Yoses tinano pakitooliyo nando Yesus nainabosan.

Yesus abali tubo

(*Mat. 28:1-8; Luk. 24:1-12; Yoh. 20:1-10*)

16 Salataa kooloyo Tadean toliiso, Malia Magdalena, Malia Yakobus tinano tukon Salome ampakon mongoli lamba-lamba sulano natuluwo Yesus badano. ²Dodowasoono tuuno salataa kooloyo sumbot, doi oloyo tumbeno doi minggudoo, yanila ampakon doi kibuloo. ³⁻⁴Doi loloon tangano yanila pobantikon meeng tukon bailong, “Indee kai komo moola tomboniiyo kita moliate dobatudoo potutupi dokibuloo buango?” Sabab do batudoo babasal tuuno. Bai sodo napolong idoo yanila kitayo do batudoo lapamo ngginolinggon. ⁵Maka yanila usok doi kibuloo lalomo. Doi lalomo tapikon bakalinga, yanila kitayo komeeng kopamuda mo pakeyo kona jubah momoute daano moosulang, tukon yanila ngginggim.

⁶Mian pamudadoo bantile, “Inai matakut! Yaku toiyo komuyu umboliiyo Yesus Nasalet miano mo lapamo sinempanggon. Yana akiyono nimbaa, yana abalimo tubo! Kitayomo naimbaamo yanila naabosano yana. ⁷Doiya budodoo poampakono, popitoikene naiya bilita nia doi napololaing-pololaing, tongusokon Petulus. Pobantile, ‘Yana ampakon mantailukiyo komuyu doi Galilea. Imbali komuyu kitayo yana, bunu mo lapamo binotiikon doikoo.’ ”

⁸Maka yanila sumbot doi kibuloo tukon obuleng sabab ngginggim tukon matakut. Yanila aki nabantil oi-oila doi indee komiano, sabab matakut.

NAPUPUSAN MALAKUS NAKALANGAN MOLOLOI TULISAN LOOLUK

Yesus okitakene kobutongo doi Malia Magdalena

(Mat. 28:9-10; Yoh. 20:11-18)

[⁹Salataa Yesus tubo doi matean, dodowasoono doi Minggu oloyono, yana tumbe-tumbeno okitakene kobutongo doi Malia Magdalena. (Doi Maliadoo biasamo Yesus kaluale kopitu kokuasa ibiliis.) ¹⁰Maka Malia Magdalena ampakon babotilangene domo tealidoo doi Yesus tula-tulano, mo daano susa tukon kokiil. ¹¹Bai salataa yanila lengele baikon Yesus motubomo, tukon baikon Malia lapamo kitayo yana yanila aki namaangga.

Yesus okitakene kobutongo doi lua komian mopolaing

(Luk. 24:13-35)

¹²Lapa doiya Yesus okitakene kobutongo doi lua komian napololaing tukon ndondoong bailong. Doiya teali salataa do mianoo moluaila daano moompokoniyo komeeng kokampung. ¹³Jadi yanila abali maka babotilangene do langgedoo doi bai-bailonggon. Bai yanila aki namaangga.

Yesus okitakene kobutongo doi napololaing-pololaing

(Mat. 28:16-20; Luk. 24:36-49; Yoh. 20:19-23; Kis. L. 1:6-8)

¹⁴Doibundu, Yesus okitakene kobutongo doi mosongulodoo meeng kona pololaing, salataa yanila daano mokaan. Yana anuukene yanila kulang kona iman tukon todudul matikas konoano tobikon aki namaangga doi mianoo mo lapamo kitayo susuungo baikon Yesus motubomo. ¹⁵Maka Yesus bantile doi yanila, "Poampakono doi posaapon kodunia tukon pobabotilangene do Bilitadoo Monondok moluwedoi Mian Bisa doi sasaibino kobanggapi. ¹⁶Komian mo aki namaangga naikon inukum. Bai komian mo maangga tukon sinau paisu salani, naikon salamat. ¹⁷Salaku bukutii baikon yanila maangga, do mianoo naikon moola siikayo koibiliis tobikon sambunggu; yanila naikon basilingan doi silingan-silingan lalomo yanila mo aki natingoniyo. ¹⁸Kalu yanila mataani binda kai monginum

lasum, yanila aki namalaat silaka. Kalu yanila binggakene kolimano doi mian-mian mo seselon bunggono, do mianoo naikon tangalin.”

Yesus biningkat doi sulugaa

(Luk. 24:50-53; Kis. L. 1:9-11)

¹⁹Salataa Yesus pobasalitai tukon yanila, yana biningkato doi sulugaa. Indaa yana mapalenta polaing tukon Mian Bisa. ²⁰Maka kona pololaing-pololaing ampakon babilitakene dobilitadoo moluwedoi Mian Bisa doi yayaa. Tukon Temeneno tulut balimang polaing-laing yanila tukon okitakene lolo doi mominasaingdinggon baikon donapoo bilitadoo bisa.]

NAPUPUSAN KOTULISAN LOOLUK BAILONG

[⁹Boi-boinedoo ampakon doi Petulus tukon tula-tulano, maka salitayo tukon paupalus sasaibino komo lapamo binontiikon doi yanila doi mudadoo. ¹⁰Lapa doiya, Yesus susuungo lolo doi napololaing-pololaing mopelengene doi tolopot kotalise bilita mo moliyous tukon motataap tentang kasalamatan mo akiyo kona pupusan.]

BILITA MONONDOK

LUKAS MO PELENGGENE

PANGANTOKON

Buku Bilita Monondok nia Lukas lolukonggene Yesus buno Tomundo Pasalamat Mian Bisa mo tetebaikene doi Islael miano tukon tuuk doi sasaibino kobanggapi. Doi nabuku nia lalomo Lukas tulise baikon Yesus lapamo binee limang moluwedoi Temeneno Na Loh sulano nababotilanggene ko Bilita Monondok moluwedoi Mian Bisa tuuk doi mian motalalais. Bilita Monondok nia pinalaatikanggon tuuno doi mian badaang tukon bula-bulaa kokaliangano konapo palaluu. Tokita koidan komeeng kotanda tetedesan doi Lukas nabuku nia lalomo, kona tutuuwan tuuno doi pasal-pasal tumbeno motuuk doi Yesus nalubatan, doibundu koidan doi napotutup taikon koidan doiyamo Yesus natobingkatan liba doi sulugaa. Kosalitano kona tuboan tukon kona tasabulan koagama Salani doiyamo salataa Yesus liba doi sulugaa tukon koidan komo tulise nabuku nia basalitakene doi Buku Lasul-lasul Salitano.

Obos koluano tukon konoomo (kitayo nabuku nia antoko doi bilit) koantoko badaang kona pokok salita mo tongo talaat doi buku Bilita Monondok nia lalomo. Andeno, malaekat nananian kaliangano tukon pototooli iyayon naduutiyano doi tempodoo Yesus nasinuungan, Yesus doi Temeneno Nabonua yana daano doi napau-pauwan, tukon koidan andean Samalia miano mo Monondok ko Noano tukon Pau mo Lapus. Nai buku nia pinailukon tuuno koidan doi sambeangan, Temeneno Na Loh, boine nabaleleanian lalomo Yesus tukon Mian Bisa natolosano kolalim.

Antoko*Pololukoni 1:1-4**Nasosuungan tukon napau-paunoan doi Yohanes Pasau Mian tukon Yesus 1:5-2:52**Yohanes Pasau Mian nameleleanian 3:1-20**Yesus nasinauwan tukon palasobaan doi butongo 3:21-4:13**Yesus nameleleanian mian badaang doi Galilea 4:14-9:50**Luwedoi Galilea taus doi Yelusalem 9:51-19:27**Minggu napupusan doi Yelusalem tukon napololani-konan 19:28-23:56**Yesus natuboan doi namatean, okitakanano kobutongo tukon tobingkatan kobutongo doi sulugaa 24:1-53***Pololukoni**

1 Teofilus mo monondok konoano, Badaang komian molapamo kakaate batulis tukon taatul tentang kadadian-kadadianoo kaliangano mo lapamo teali doi kita nia. ²Yanila batulis pokokonoi tukon mo sinalitaikon doi kita doi mian-mian mo kitayo susuungo do kadadian-kadadianoo doi natambuunan, tukon doibundu babilitakanggene kobilitano. ³Salataa yaku tukon telitio tuuno sasaibinodoo luwedoi natambuunan, yaku aanggene monondok momotulis meeng kolapulan mo taatul tuuk doi Tuan. ⁴Yaku lakukanggene doiya, sulano Tuan natoiyoo baikon oila komo lapamo Tuan otunggukene doiya takainomo bisa.

Napinopitoikonan Yohanes Pasau Mian Salani nasinuungan

⁵Singgatoo Helodes teali tomundo doi lipu Yudea, daano komeeng koimam kosambuno Zakalia. Yana tongusokon doi imam-imam Abia. Kona boloki kosambuno Elisabet, koidan tulunan imam. ⁶Konapotuboan langkai boloki sanaanggene ko Mian Bisa noano. Luaila loingiyo sasaibino kopalenta tukon

Temeneno na Ukum tutuuno. ⁷Yanila akiyo kona pau sabab Elisabet komba tukon yanila luaila motuwamo.

⁸Daano kooloyo meeng, singgatoos taambikon doi Abia malaat gililan, Zakalia ampakonggene kona limang buno meeng koimam doi Mian Bisa salaano. ⁹Tukon undian, mo biasamo linakukanggon doi imam-imam, Zakalia malaat obos usok doi Temeneno Nabonua lalomo tukon suayo kamangian. ¹⁰Daano mosuayo kamangian, komian badaang baladoa doi tonggulung. ¹¹Doiya kosinggatoos ko Temeneno namalaekat okitakene kobutongo doi Zakalia. Malaekatoos kokondong taambikon bakalinga doi meda nasinuaan kokamangian. ¹²Salataa Zakalia kitayo do malaekatoos yana pusing tukon matakut. ¹³Bai do malaekatoos bantile, "Inai matakut, Zakalia! Ko Mian Bisa lengelemo komu sambeang. Komu boloki Elisabet naikon mosuung meeng kopau malaneno. Ikoo sio musombuuyo sambu Yohanes doi yana. ¹⁴Ikoo naikon laba tuuno tukon badaang komian molaba kalu do paudoos sinuungo. ¹⁵Yana teali mian babasal doi Temeneno napokita, tukon yana aki nainume koanggul kai suka momosopot. Salataa sinuung Mian Bisa Na Loh komo kuasaiyo yana. ¹⁶Badaang ko Israel miano naikon kona binaba abali doi Mian Bisa, doi napoo Temeneno. ¹⁷Yana naikon teali Temeneno nasosumbolii mo bukuan tukon daano kona kuasa buno Elia. Yana podamekene kotama tukon pau, tukon mian mo aki naloingiyo naikon babayo abali doi loloon pikilan mo talakana. Tukon buno doiya yana sadiayo komeeng kotambuno kobanggapi mo tasadiamo tuuk doi Temeneno."

¹⁸"Bulaa kai daku toiyano do lobodoo naikon moteali?" Zakalia sadaiyo doi malaekatoos. "Yaku motuwamo, tukon daku boloki koidan motuwamo."

¹⁹Malaekatoos timbiliyo, "Yaku nia Gabriel. Yaku leleaniyo ko Mian Bisa tukon yanamo komo sumboliiyo yaku mopelenggene nabilita nia mo monondok doikoo. ²⁰Oila daku binantil, naikon teali nalaate kotembono. Bai badungga ikoo aki mumangangga, ikoo sio naaki namoola basilingan; ikoo naikon ponga polong doi oila daku binantiloos natealian."

²¹Daanoon mobuno doiya, komian momeenggon totiiliyo Zakalia. Yanila masaingding bulaando yana malumbit doi Temeneno Nabonua lalomo. ²²Tukon salataa yana tobuat, yana



Meeng kobubung doi Nasalet (1:26)

akimo namoola basilingan doi yanila. Yana baino mebee paloosan tukon limano, tukon tataap ponga. Maka domianoo toiyomo baikon yana lapamo mokita komeeng kopokita doi Temeneno Nabonua lalomo.

²³Salataa kabus kona tempo balimangan doi Temeneno Nabonua, Zakalia mule doi nabonua. ²⁴Aki namalumbit koikoidan, kona boloki Elisabet tianan, maka yana dungol doi nabonua lalomo lima kobituwon kona kalumbit. ²⁵Yana bantile, “Kona pupusan ko Temeneno tulungiyomo yaku tukon alapusemo daku tinotulaian.”

Yesus nasinuungan nabinabotilanggonan

²⁶Salataa Elisabet lapa tianan noom kobituwon, Mian Bisa sumboliiyo malaekat Gabliel ampakon doi Nasalet, meeng kokota doi lipu Galilea. ²⁷Gabliel sinumbolii doi meeng kopau boine, kosambuno Malia. Do pauboinedoo lapamo pobibianggon tukon meeng komian kosambuno Yusuf, Tomundo Daud natulunan. ²⁸Malaekatoos lubat doi Malia tukon bantile, “Kinatauan, ikoo Temeneno mo balakaatiyo tukon doi namonondokan! Temeneno polaing tukon ikoo!”

²⁹Mondongolii do malaekattoo nabantilan Malia ngginggim, tobikon mansa-mansadai doi noano lalomo oila komaanano do kinatauwanoo. ³⁰Maka do malaekattoo bantile doi yana, “Inai matakut, Malia, sabab ikoo pokokonoi doi Mian Bisa noano. ³¹Ikoo naikon tianan tukon suunge komeeng kopau, mo sio ikoo musombuikene Yesus. ³²Yana naikon teali babasal tukon naikon binantil Mian Bisa Napau Mo Tatandak Tuuno. Temeneno Mian Bisa naikon tealikene yana tomundo mobuno Tomundo Daud, nambumbu looluk. ³³Tukon yana naikon mapalenta bunu tomundo doi katulunan Yakub posidutukon. Kona batomundoan akiyo kona pupusan.”

³⁴“Bai yaku nia akiyoon kupotoikon komalane,” Malia bontiikene doi malaekattoo, “bulaando do lobodoo namoola teali?”

³⁵Malaekattoo timbiliyo, “Mian Bisa Na Loh naikon lubat doikoo, tukon Mian Bisa nakuasa lindungiyo ikoo. Doiyamo kosababpo do paudoo naikon mo sinuung binantil Moliyous, Mian Bisa Napau. ³⁶Neneeke: Elisabet, do tolidamudoo lapamo tianan noomo kobituwon, mau kai yana namotuwamo tukon komian bantile baikon komba. ³⁷Sabab doi Mian Bisa akiyo komo aki nateali.”

³⁸Maka Malia bantile, “Yaku nia Temeneno napeleleani; sodiiyomo nateali doi yaku bunomo domu bantilanoo.” Maka do malaekattoo ampakono mootinggale Malia.

Malia lubotiiyo Elisabet

³⁹Mosobit kona lapaan doiya, Malia ampakon doi meeng kokota doi Yudea doi lipu mobunggulkon. ⁴⁰Yana ampakon doi Zakalia nabonua, tukon salataa usok, yana mebee kinatauwani doi Elisabet. ⁴¹Tukon sambuno Elisabet lengele Malia nakinatauwan, do paudoo doi Elisabet tiano lalomo palabiyoko. Maka Elisabet Mian Bisa Na Loh kuasaiyomo, ⁴²maka wookon, “Ikoomo komo binalakaati doi sasaibino koboine! Binalakaati do paudoo naikon ikoo mo suunge! ⁴³Indee yaku tobikon Yesus tinano nalubat doi yaku? ⁴⁴Salataa yaku lengele komu kinatauwani, do paudoo yaku motiananggene biyok-biyoko doi

nalabaan. ⁴⁵Monondoko ikoo, sabab mangangga baikon oila komo Temeneno nabinantil doikoodoo naikon tealimo!”

Malia basyukuul

⁴⁶Malia bantile,

“Konoanggu nggaale ko Temeneno,

⁴⁷ tukon butonggu laba-laba

sabab ko Mian Bisa doiyamo daku Pasalamaton.

⁴⁸ Yana neneeke yaku, napeleleani mo tinotulai!

Tambuun doiya budodoo sasaibino kobangsa

bantile yaku sanaango.

⁴⁹ Sabab ko Mian Bisa Mobabasal Konakuasa

kubaiyo kolobo mobabasal doi yaku.

Kosambuno moliyous.

⁵⁰ Katulunan momeenggon katulunan

Temeneno mebee soyang

doi mian mo matakutene doi yana.

⁵¹ Tukon limano mo bukuan

yana poalaasene komian mobabanggaal,

tukon nggabute yanila namakisuut.

⁵² Kotomundo-tomundo inobuluson doi nakulusii

tukon komian motinotulai kinatandakon.

⁵³ Mian momalaal inokonii tukon sasaibino kona monondokan,

komo kaasa siniika tukon akiyo koalatino.

⁵⁴ Yana tulungiyo kona peleleani Israel,

loingiyo kona toon tinetebaikon

tukon nda mbumbu looluk.

⁵⁵ Temeneno aki natoliminggene kona teteba,

yana monondok konoano doi Abalaham

tukon nakatulunan polong posidutukon.”

⁵⁶Uga-ugaate tolu kobituwon kona kalumbit Malia podungoli tukon Elisabet, maka yana namule doi nabonua.

Yohanes Pasau Mian Salani nasinuungan

⁵⁷Polongo kotembono Elisabet namosuungan. Yana suunge komeeng kopau malaneno. ⁵⁸Tula-tulando mopololanikon tukon namotolutusan ndongoliiyo bulaando kona monondokan ko

Temeneno doi Elisabet, tukon yaniladoo polaing laba-laba tukon yana.

⁵⁹Salataa do paudoo alumo kooloyo kona umul, yanila lubat mosunate yana. Yanila yase sombuikene do paudoo Zakalia manulut tamano sambuno, bai kotinano bantile, ⁶⁰“Aki! Yana sio nasinombuikon Yohanes.”

⁶¹“Akiyo komeeng komian doi mumontolutusan kosambuno mobuno doiya,” yanila bantile doi yana. ⁶²Maka tukon isalat, yanila mansadai doi Zakalia sambu oila komo moola bineekon doi paudoo.

⁶³Zakalia mangkabi meeng kobatu tulis maka tulise, “Kosambuno Yohanes.” Yanila sasaibino masaingding. ⁶⁴Doiya kosinggatoo koidan Zakalia moolamo basalita tukon nggaale ko Mian Bisa. ⁶⁵Komian napokoolanikonan sasaibino matakut, tukon do bilitadoo tasabukono doi posaapon kolipu bunggono doi Yudea. ⁶⁶Sasaibino komian mo molongol doiya langgedoo bantil-bantil doi noano lalomo, “Oilamo kona tealian do paudoo naikon?” Sabab ko Temeneno lolainge yana.

Zakalia pelenggene kobilita moluwedoi Temeneno

⁶⁷Zakalia, do paudoo tamano, Mian Bisa Na Loh kuasaiyomo tobikon yana pelenggene ko Temeneno nateteba. Yana bantile,

⁶⁸ “Maimo nda nggaale ko Temeneno,

Mian Bisa doi bangsa Israel!

Yana lapamo lubat tulungio kona mian
tukon sodiiyomo yanila.

⁶⁹ Yana beena kita pasalamaton mo bukuan,
katulunan Daud, naata.

⁷⁰ Doi loolukonoo lolo doi nabi-nabi linilik,
Temeneno lapamo beekene kona paladandian,

⁷¹ sulano nasalamatene kita doi nda musu
tukon doi mian-mian nakuasa mo mosikitene kita.

⁷² Mookitakene kona monondokan konoano doi nda mbumbu,
dona paladandian mo moliyousoo naikon yana tapaatiyo.

⁷³⁻⁷⁴ Yana batotopi doi Abalaham tamanggita,
tukon paladandi sulano nasalamatene kita doi nda musu,

- sulano kita aki nda matakut moleleaniyo yana
 75 sidutu balimang doi yana
 tukon sanaangene konoano
 posidutukon doi nda tuboan.
- 76 Ikoo, daku pau, naikon mobinantil nabi
 Mian Bisa Mo Tatandak Tuuno.
 Ikoo binintokon matailukiyo ko Temeneno
 sulano nabukayo kololoon tuuk doi yana,
- 77 sulano napelengene doi namian
 baikon yanila naikon sinalamaton,
 kalu ko Mian Bisa lapamo ompuniyo yanila nalalim-lalim.
- 78 Konda Temeneno monondok konoano koidan mbokila;
 yana lubat salamatene kita.
 Buno oloyo
 mosumbot doi dodowasoono,
- 79 bunomo lakon yana mobeekene kona madialanan doi
 sasaibino komian
 mo tubo doi kalipookan lalomo tukon doi matakutan.
 Yana andane kita doi loloon namonondokan.”
- ⁸⁰Zakalia napaudoo tosuungimo kona babasalan tukon
 tosuungimo kona loh nabukuanan. Yana dungol doi padang
 lalomo, polong laate kotempono yana naokitakanano kobutongo
 doi bangsa Israel.

Yesus nasinuungan

(*Mat. 1:18-25*)

2 Doi ya kosinggato Tomundo Agustus mapalentakene
 sulano sasaibino kolayat doi Batomundoan Loma namong-
 gitulisene kobutongo sulano natinulis. ²Natinulisan kobanggapi
 sambuno tumbeno nia singgato Kilenius natealian gubelnul doi
 lipu Silia. ³Sasaibino komian doi ya singgato ampakon sulano
 namonggitulisene kobutongo doi nakota suwe-suwele.

⁴Yusuf lakon doi Nasalet doi Galilea ampakon doi Betlehem
 doi Yudea, Tomundo Daud nalipu sinuungan; sabab Yusuf
 tulunan Daud. ⁵Yusuf monggitulisene kobutongo polong Malia
 dona bibianoo mo daano motianan. ⁶Salataa yanila daanomo
 doi Betlehem laatemo kotempono Malia namosuungan. ⁷Yana

suunge komeeng kopau malaneno, napau langgongo. Do paudoo binungus tukon toik, maka kinoolo doi kooloan lalomo koantoko limbut; sabab yanila akimo namalaat tempat dungolan.

Padagai tukon malaekat

⁸Doi popookoo daano kopadagai iyayon mo daano badagai domba doi padang lalomo doi lipudoo. ⁹Sosinggot ko Temeneno namalaekat okitakene kobutongo doi yanila, tukon madialang laango moluwedoi Temeneno montontilang motalaangiyo yanila, tukon yanila matakut tuuno. ¹⁰Bai do malaekato bantile, “Inai matakut! Sabab yaku lubat babayo kobilita monondok tuuk doi komuyu – bilita mo sinanaanggon tuuno doi sasaibino komian. ¹¹Oloyo nia doi kota Daud lapamo tosuung ko Tomundo Pasalamat ikoo doiyamo Klistus, Temeneno. ¹²Naiyamo kopaloosano: Komuyu naikon pososuunggene komeeng kopau lumboon mobinungus tukon toik, tukon moolo doi meeng kobasoan.”

¹³Sosinggot do malaekato linoolaing badaang komalaekat bailong, mo nggaale ko Mian Bisa. Yanila bantile,

¹⁴ “Tanggaalo ko Mian Bisa doi timbu mo tatandak!

Tukon doi buta bungukono, kobanggapi namonondokan mo konooyo ko Temeneno noano!”

¹⁵Salataa do malaekat-malaekato tinggalemo yanila tukon abali doi sulugaa, do padagai-padagaidoo bantil meeng tukon bailong, “Mai nda ampakon doi Betlehem tukon nda kitayo do langgedoo mo teali, Temeneno mo popitoikene doi kita.”

¹⁶Yanila polaing ampakon tukon pososuungenemo Malia tukon Yusuf, tukon do paudoo lumboon momoolo doi basoan lalomo.

¹⁷Sambuno dopadagaidoo iyayon kitayo do paudoo, yanila salitayo oila do malaekato nabinantil tentang paudoo. ¹⁸Tukon sasaibino komian masaingding momolongol do padagaidoo iyayon nasalita. ¹⁹Bai Malia abese sasaibino doi noano lalomo tukon yana pikikene. ²⁰Padagai-padagaidoo iyayonoo abali doi padang lalomo maka nggaale tukon kabasale ko Mian Bisa, sabab sasaibino mo lapamo yanila lengele tukon kitayo, bisa bunomo domalaekato nabinantil.

Yesus binee sambu

²¹Salataa alu kooloyo kona sinuungan, do paudoo sinunato. Tukon yanila sombuikene Yesus, sambu malaekat mo beekene doi yana akiyoon tinano natianangene yana.

Yesus sinalakanggon doi Temeneno doi Temeneno Nabonua

²²Laatemo kotembono Yusuf tukon Malia nalakukanano koadat balatobatan manulut Musa naukum. Maka yanila babayo do paudoo doi Yelusalem sulano nasinalakanggon doi Temeneno. ²³Sabab doi Temeneno na Ukum lalomo totulis bunu naiya, “Samba-samba kopau malaneno langgongo, sio nasinalakanggon doi Temeneno.” ²⁴Yanila koidan kona makisuut mososubakon sosuba, doiyamo meeng kopasang tomisi sapatau, kai lua kotomisi lapatiing mo mongula, bunomo komo tinantukon doi Temeneno na Ukum lalomo.

²⁵Doiya kosinggato doi Yelusalem daano komeeng komian kosambuno Simeon. Yana mian monondok, mo matakutene ko Mian Bisa tukon daano montotiili tempono ko Mian Bisa nasalamatanano ko Israel. Mian Bisa Na Loh lolainge yana, ²⁶tukon ko Mian Bisa Na Loh lapamo popitoikene doi yana baikon yana akiyoon namate kalu akiyoon nakitayo ko Tomundo Pasalamat Mian Bisa mo paladandikene. ²⁷Tongo Mian Bisa Na Loh nalolaingano, Simeon usok doi Temeneno Nabonua. Doiya kosinggato Yusuf tukon Malia babayo Yesus usok, mo daanoon mopoipoisiko sulano nakubaiyo koupacala mo pinalentakon doi ukum agama. ²⁸Maka Simeon bingkate do paudoo tukon yana lambine, maka nggaale ko Mian Bisa, ²⁹ “Diabudodoo, Temeneno, ikoo lapamo daanokene komu paladandian.

Batadikenemo komu peleleani nia namate tukon monondok.

³⁰ Sabab tukon matangu susuunggu yaku lapamo kitayo ko Pasalamaton mo luwe doikoo.

³¹ Do Pasalamatonoo ikoo lapamo sadiakene tuuk doi sasaibino kobangsa:

³² bunomo kai madialan mo kadiolongiiyo kololoon motuuk doi bangsa-bangsa bailong, sulano nalubat doikoo;

doiyamo madialan mo lubatene kona inodotiiyan tuuk muumat Israel.”

³³Do paudoo tamano tukon tinano masaingding molengele oila doi Simeon nabinantil tentang doi yanila napaudoo.

³⁴Simeon balakaatiyo yanila tukon bantile doi Malia do paudoo tinano, “Napaunia lapamo Mian Bisa piliyo sulano naosilakayo tukon sulano nasalamatene doi badaangan ko Israel miano. Yana naikon teali paloosan doi Mian Bisa, mian badaang naikon mo tantange, ³⁵tukon kalu bunomo doiya tobukamo kopai yanila noano antoko. Kosusaan naikon tiike konoamu buno sabel mo mamangan.”

³⁶Daano koidan komeeng konabi boine mo motuwamo tuuno. Kosambuno Hana, Fanuel napau, doi suku Asyel. Pitumo kotaum kona lapaan osowaan, ³⁷Hana tealimo balu, tukon diabudodoo alu kolonomo sangkap kotaum kona umul. Akiyoon nadaano kona tinggalano ko Temeneno Nabonua. Oloyo popook yana sosuba idoo doi Mian Bisa tukon baladoa maka apata. ³⁸Pokokonoi doiya kosinggatoo koidan yana lubat, maka nggaale ko Mian Bisa tukon basilinganggene tentang do paudoo doi sasaibino komian mo totiiliyo kotempono ko Mian Bisa naosodiiyano ko Yelusalem.

Abali doi Nasalet

³⁹Salataa Yusuf tukon Malia lapa kubaiyo sasaibino komo tinuntut doi Temeneno na Ukum, yanila mulemo doi Nasalet doi Galilea. ⁴⁰Do paudoo tosuungimo kona babasalan tukon bukuano. Yana pandoi tuuno tukon Mian Bisa seseange tuuno.

Yesus doi Temeneno Nabonua

⁴¹Samba-samba kotaum Yesus tamano tinano ampakon doi Yelusalem molamekene ko Oloyo Paskah. ⁴²Tukon salataa Yesus songulomo lua kotaum kona umul, yanila ampakon doi lameanoo manulut nakabiasaan. ⁴³Salataa lapa do lameanoo yanila mule, bai Yesus, do paudoo, daano modungol doi Yelusalem, tukon kotamano tinano aki natoiiyo. ⁴⁴Yanila aanggene yana malaingo doi lombonganoo. Salataa lapa meeng kooloyo kona poampakonan maka nasodo yanila umboliiyo yana doi utus-utusoila. tukon doi yanila napotoikonan. ⁴⁵Bai yanila

aki naposusuungene, jadi yanila abali doi Yelusalem unggoliyo yana. ⁴⁶Lapa tolu kooloyo kona pai umboliyano, yanila laate yana doi Temeneno Nabonua lalomo. Yana daano moosulang mondongolii kogulu agama tukon mebee pasadai-pasadai. ⁴⁷Sasaibino komian molongol yana masaingding sabab kona potimbili-potimbilidoo bisa. ⁴⁸Kotamano tinano masaingding mokitayo yana. Kotinano bantile doi yana, “Pau, bulaando ikoo molakukangene naiya doi kami? Kotamamu tukon tinamu pakadako moumboliyo ikoo!”

⁴⁹Yesus timbiliyo, “Bulaando tama tukon tina moumboliyo yaku? Banggokai tama tukon tina aki natooyo baikon yaku sio nadaano doi Tamanggu nabonua lalomo?” ⁵⁰Bai yanila aki namangalatikene Yesus napotimbili.

⁵¹Doibundu Yesus mule polaing yanila doi Nasalet, tukon loingiyo doi yanila. Sasaibino do langgedoo kotinano abese doi noano lalomo. ⁵²Yesus momeenggon tosuungimo kona babasalan tukon tosuungimo kona pandoiyan, tukon Mian Bisa seseange tukon kobanggapi kilakene.

Bilita Yohanes Pasau Mian

(Mat. 3:1-12; Mlk. 1:1-8; Yoh. 1:19-28)

3 Doi taum kosongulono lima luwedoi Tomundo Tibelius namapalentaan, Pontius Pilatus natealian gubelnul doi Yudea, tukon Helodes nabapalentaan doi Galilea. Filipus, Helodes utuso nabapalentaan doi wilayah Itulea tukon Tlakhonitis, bai Lisantias bapalenta doi Abilene. ²Komo taaniyo koimam-imam babasal doiyamo Hanas tukon Kayafas. Doiyamo kotaumo ko Mian Bisa nabasilinganan doi Yohanes, Zakalia napau doi padang lalomo. ³Maka Yohanes ampakon doi yayaandomo doi posaapon kolipu Paisu Yoldan tukon pelengene ko Mian Bisa nabilita. Yohanes nggele-nggeleamon, “Pobadodoloon doi polalim-lalim, tukon komuyu sio posinau, sulano ko Mian Bisa naompuniyo komuyu.” ⁴Doiya pokokonoi tukon komo totulis doi Nabi Yesaya nakitab lalomo:

“Daano komian monggele-nggeleamon doi padang lalomo,
‘Sadiayo kololoon motuuk doi Temeneno,
apatale kololoon motuuk doi yana.

⁵ Samba-samba kopeak siokai pookuiyo,
samba-samba kobunggo tukon bunggo bungkukono
poapatale.

Kololoon mo patek-patek pokoloyose,
tukon loloon mo peak bunggul pokeseayo.

⁶ Komian doi posaapon kodunia nia naikon kitayo
ko Mian Bisa salamatene kobanggapi!’ ”

⁷Badaang komian molubat doi Yohanes sulano nasinau. Yohanes bantile doi yanila, “Komuyu mian molokis! Indee komo bantile baikon komuyu moola tongosodii doi Mian Bisa naukuman naikon mo lubat? ⁸Potudoikene tukon mukokubai baikon komuyu molapamo badodoloon doi polalim-lalim! Inai potambuun bantile baikon Abalaham daano mumbumbu. Neneeke: Doi batu-batu nia ko Mian Bisa moola kubaiyo Abalaham natulunan! ⁹Koolowang tasadiamo patape kayung polong doi anggol-anggolo. Samba-samba kokayung mo akiyo kosaono mo monondok tinape tukon sinakukon doi aung lalomo.”

¹⁰“Jadi, oila komo moola kami kubaiyo?” domianoo sadaiyo Yohanes.

¹¹Yohanes timbiliyo, “Mian mo daano lua kona bokukum, sio nabeekene komeeng doi mo akiyo koono; tukon komian mo daano kona kinaan sio naebe-ebese.”

¹²Pakabi-pakabi lulu koidan lubat doi Yohanes sulano nasinau. Yanila mansadai, “Tama Gulu, oila komo moola kami kubaiyo?” ¹³Yohanes timbiliyo, “Inai pokabiyo lobian badaang oila komo lapamo tinantukon.”

¹⁴Daano koidan kosuludadu mo mansadai, “Bulaando tukon kami? Oila komo moola kami kubaiyo?”

Yohanes timbiliyo, “Inai posakisaayo mau doi indee komiano tukon inai polambase komian nadoy tukon tuduan-tuduan moaki nabisa. Sukupo tukon pogaji!”

¹⁵Doiya kosinggato tambuuno komian momansa-mansadai, oilakai Yohanes doiyamo do Tomundodoo Pasalamat yanila mo totiiliyo. ¹⁶Doiyamo kosababpo Yohanes bantile doi yanila sasaibino, “Yaku sauwo komuyu tukon paisu, bai totiiliyo naikon lubat komian mo lobian babasal doi yaku. Mobukayo kona sapatu alosu yaku aki namoola. Yana naikon sauwo

komuyu tukon Mian Bisa Na Loh tukon bilat. ¹⁷Doi limano daano kokiapan sulano natapise sasaibino kona gandum polong bilisii. Kolabue pinototongikon doi longgo lalomo, bai sasaibino kobulung sinua doi aung lalomo mo aki naposo!”

¹⁸Bunomo doiya Yohanes naotunggulano komian tukon bula-bulaa kocala, doiya kosinggatoo nababilitakanano ko Bilita Monondok. ¹⁹Bai Helodes, pamalenta Galilea, Yohanes anuukene kona basoowaanan tukon Helodias, utuso naboloki, tukon sasaibino kokaliangano kona kulokisan bailong mo lapamo yana kubaiyo. ²⁰Bai Helodes tolongo suungiyo kona kulokisan tukon usekene Yohanes doi talunggu lalomo.

Yesus sinau

(Mat. 3:13-17; Mlk. 1:9-11)

²¹Salataa do mianoo sinaumo, Yesus koidan sinaumo. Tukon salataa yana daano mobaladoa, tobuka kotimbu, ²²tukon ko Mian Bisa Na Loh obulus doi bunggono pokakana kotomisi lapatiing. Maka linongol ko Mian Bisa alalo mobantile, “Ikoomo daku Pau sinoyang. Ikoomo komo kindendeke konoanggu.”

Yesus Klistus natulunan tinulisan

(Mat. 1:1-17)

²³Doiya singgat Yesus atambuune kona balimangan, yana kona umul uga-ugaatene tolu kolonomo kotaum. Manulut mian napalaat, yana Yusuf napau, Eli napau, ²⁴Matat napau, Lewi napau, Malkhi napau, Yanai napau, Yusuf napau, ²⁵Matica napau, Amos napau, Nahum napau, Hesli napau, Nagai napau, ²⁶Maat napau, Matica napau, Simei napau, Yosekh napau, Yoda napau, ²⁷Yohanan napau, Lesa napau, Zelubabel napau, Sealtiel napau, Neli napau, ²⁸Malkhi napau, Adi napau, Kosam napau, Elmadam napau, El napau, ²⁹Yesua napau, Eliezel napau, Yolim napau, Matat napau, Lewi napau, ³⁰Simeon napau, Yehuda napau, Yusuf napau, Yonam napau, Elyakim napau, ³¹Melea napau, Mina napau, Matata napau, Natan napau, Daud napau, ³²Isai napau, Obed napau, Boas napau, Salmon napau, Nahason napau, ³³Aminadab napau, Admin napau, Alni napau, Hezlon napau, Peles napau, Yehuda napau, ³⁴Yakub

napau, Ishak napau, Abalaham napau, Telah napau, Nahol napau, ³⁵Selug napau, Lehu napau, Peleg napau, Ebel napau, Salmon napau, ³⁶Kenan napau, Alpaksad napau, Sem napau, Nuh napau, Lamekh napau, ³⁷Metusalah napau, Henokh napau, Yaled napau, Mahalaleel napau, Kenan napau, ³⁸Enos napau, Set napau, Adam napau, Mian Bisa napau.

Yesus Ibiliis sobaiyo

(*Mat. 4:1-11; Mlk. 1:12-13*)

4 Yesus Mian Bisa Na Loh kuasaiyo salataa yana tinggale ko Paisu Yoldan. Ko Mian Bisa Na Loh lolainge yana doi padang lalomo. ²Idoo yana Ibiliis sobaiyo sangkap kolono kooloyo kona kalumbit. Sangkap kolonodoo kooloyo yana aki namakaan oioila. Jadi doibundu yana neemiyomo momalaal.


³Ibiliis bantile doi yana, “Ikoo Mian Bisa Napau, bolikon? Jadi, sumboliiyo naiya batu nia nateali loti.”

⁴Yesus timbiliyo, “Doi Kitab Moliyous lalomo totulis, ‘Kobanggapi aki namoola tubo luwe tongo doi loti tolong.’”

⁵Maka Ibiliis babayo Yesus doi lipu mo tatandak, tukon tolono sopiyoman Ibiliis tudoikene doi yana sasaibino kobatomundoan doi dunia. ⁶“Sasaibino kokakuasaan tukon nakaasaan nia yaku salakanggene doikoo,” Ibiliis nabantilan doi Yesus. “Sabab sasaibino lapamo bineekon doi yaku tukon yaku moola kubeekene doi indee komiano yaku mo yase beekene. ⁷Sasaibinodoo naikon teali komu langge, kalu ikoo tootuku sosubaiyo yaku.”

⁸Yesus timbiliyo, “Doi Kitab Moliyous lalomo totulis, ‘Sosubaiyo komu Temeneno Mian Bisa tukon leleaniyo yana tolong.’”

⁹Maka do Ibiliisoo babayo Yesus doi Yelusalem tukon abese yana doi Temeneno Nabonua tinggupo maka bantile doi yana, “Ikoo Mian Bisa Napau, bolikon? Jadi bakatuwongo naimbaa. ¹⁰Sabab doi Kitab Moliyous lalomo totulis, ‘Ko Mian Bisa naikon sumboliiyo kona malaekat-malaekat modagaiyo ikoo mono-monondok.’ ¹¹Tukon koidan, ‘Malaekat-malaekat naikon labete ikoo tukon yanila limano, sulano koaimu naaki natakait doi batu.’”



Meeng kobuku luluno (4:17)

¹²Yesus timbiliyo, “Doi Kitab Moliyous lalomo totulis, ‘Inai mosobaiyo komu Temeneno Mian Bisa.’”

¹³Salataa Ibiliis lapamo sobaiyo Yesus tukon sasaibino kona akal kaliangano, yana otinggalemo Yesus tukon montotiili tembo mo monondok.

Yesus atambuune kona limang doi Galilea

(Mat. 4:12-17; Mlk. 1:14-15)

¹⁴Doibundu Yesus abali doi Galilea; tukon ko Mian Bisa Na Loh kuasaiyomo yana. Bilita motuuk doi butongo tololongolo doi posaapon do lipudoo. ¹⁵Yana mongotunggul doi bonua-bonua kaleda tukon sasaibino komian nggaale yana.

Yesus aki natinalima doi Nasalet

(Mat. 13:53-58; Mlk. 6:1-6)

¹⁶Yesus ampakon koidan doi Nasalet, lipu yana nainakabasan. Doi oloyo Tadean, monulut nakabiasaan yana ampakon doi bonua kaleda. Yana kokondong sulano nabasayo ko Kitab Moliyous, ¹⁷tukon bineekon kobuku Nabi Yesaya. Yana bukayo do bukudoo luluno, maka nalaate naiya ayat nia,

¹⁸ “Ko Temeneno Na Loh daano doi yaku,
 sabab yana lapamo molantike yaku sulano kubabilitakene
 ko Bilita Monondok doi mian motalalais.

Yana bintekene yaku sulano kupopitoikene
 kona tongosodiiyan komian motinalunggu
 tukon natangalanan komian mopiit;
 sulano natongosodii komian mopinipik

¹⁹ tukon babotilangene kotembono ko Temeneno nalubatan
 mosalamatene kona mian.”

²⁰ Yesus lulune koidan do kitabdoo, tukon abalikene doi
 potugas, maka osulang. Sasaibino komian doi bonua kaledadoo
 pateekene yana. ²¹Tukon Yesus atambuunemo kona bantilan doi
 yanila, bunu naiya, “Ayat-ayat Kitab Moliyous nia doi oloyo nia
 sukupo doi tempo komuyu pondongoliiyano.”

²²Kona bantil-bantilan mo pelengene monondok tuuno,
 tobikon yanila sosibong tukon tombonio yana. Yanila bantile,
 “Bolikon kai yana Yusuf napau?”

²³Maka Yesus bantile doi yanila, “Pasti komuyu naikon
 mopakeyo naandean nia motuuk doi yaku, ‘Doktel, alinemo
 kobutomu susuumu. Komo minasaingdinggon kami mo lengele
 ikoo mokubaiyo doi Kapelnaum, kubaiyo koidan doi mukam-
 pung susuumu.’ ” ²⁴Yesus suungiyo, “Neneeke, akiyo konabi mo
 inangga doi nakampung susuungo. ²⁵Bai polengele: doi lounudoo
 Elia, singgatoos aki nalubat koudan tolu kotaum sembeleng kona
 kalumbit, teali komalaalan mo hebat tuuno doi posaapon kolipu.
 Doi ya singgatoos daano mobadaang kobalu-baluu doi Israel. ²⁶Mau
 kai nabuno doiya, ko Mian Bisa aki nasumboliiyo Elia ampakon
 doi sala komeeng luwedoi balu-baludoo bai tolongo doi meeng
 kobalu doi Salfat doi lipu Sidon. ²⁷Bunomo koidan doi lounu
 Nabi Elisa daano badaang komian doi Israel motakatolon mo
 minosikiton, bai akiyo komeeng komian doi yanila mo inalin
 tongo Naaman Silia mianoo.”

²⁸Sasaibino komian doi bonua kaledadoo nggimal tuuno
 salataa ndongoliiyo do langgedoo. ²⁹Yanila kokondong maka
 siikayo Yesus doi kota tonggulungo, tukon babayo doi bunggul
 motombing bibilo, doi naando yanila nabangunano kona pokota.

Yanila namakisuut duwekene yana doi motombing lalomo. ³⁰Bai Yesus tobuat doi mianoo namadaangan maka ampakon.

Mian mo inusoki ibiliis

(Mlk. 1:21-28)

³¹Doibundu Yesus ampakon ke kota Kapelnaum doi Galilea. Imbali yana mongotunggul mian doi oloyo Tadean. ³²Yanila masaingding mokitayo yana nacala mongotunggulan, sabab yana basilingan tukon nanggaanganan. ³³Idoo doi bonua kaleda daano komeeng komian mo kinuasaimo ibiliis. Do mianoo mangga-manggadidi. ³⁴“He Yesus, Nasalet miano, ikoo yase kubaiyo oila tukon kami? Ikoo lubat sulano musilakayo kami? Yaku toiyo indee ikoo: ikoo sosumbolii mo moliyous doi Mian Bisa!”

³⁵“Tade!” Yesus nggalaiyo do ibiliisoo. “Tobuato doi mian nia!” Maka do ibiliisoo tikakene do mianoo doi yanila sasaibino salaano, doibundu maka tobuato doi mianoo aki naasakite.

³⁶Sasaibino komian masaingding, tukon pobantikon meeng maka bailong, “Bukan maen kona bantil-bantilan. Tukon nanggaanganan tukon nakuasa, yana palentayo koibiliisoo motobuat, tukon yanila tobuat koidan!” ³⁷Maka bilita tentang Yesus tololongolo doi posaapon kowilayahdoo.

Yesus aline komian badaang nasesel

(Mat. 8:14-17; Mlk. 1:29-34)

³⁸Yesus tinggale do bonua kaledadoo, maka ampakon doi Simon nabonua. Simon namonianan moluko daano moseselon maligoot, tukon komian popitoikene doiya langgedoo doi Yesus. ³⁹Yesus ampakono doi bolokidoo namooloan, maka siikayo do maligootoo. Do maligootoo leal, tukon doi Simon namonianan moluko banggadudul bangun tukon leleaniyo yanila.

⁴⁰Salataa kooloyo sosopo, sasaibino komian babakene doi Yesus koutus-utusoila mo malaat sesel moimoiya kokalingano. Yesus binggakene kolimano doi yanila bunggono meeng-meeng tukon aline yanila. ⁴¹Do ibiliis-ibiliisoo tobuato doi mianoo badaang, maka nggele-nggeleamon, “Ikoomo kai ko Mian Bisa Napau!”

Bai Yesus nggalaiyo yanila tukon aki napataikene yanila mobasilingan, sabab yanila toiyo baikon yanamo ko Tomundo Pasalamat.

Yesus bangotunggul doi bonua-bonua kaleda lalomo

(Mlk. 1:35-39)

⁴²Salataa kooloyo mangatambuuno sumbot Yesus tinggalemo do kotadoo maka ampakon doi meeng kolipu mo kiis. Komian tambuuno moumboliiyo yana, tukon salataa yanila pososuunggene, yanila kakaate sulano inai yana natinggale yanila. ⁴³Bai Yesus bantile, “Bilita Monondok tentang bulaando ko Mian Bisa namapalentaan sio yaku kubabotilangene doi kota bailong, sabab tobikon doiyamo ko Mian Bisa bintekene yaku doi dunia.”

⁴⁴Tobikon doiya Yesus bangotunggul doi bonua-bonua kaledaan lalomo doi posaapon kolipu Yudea.


Yesus piliyo kona pololaing-pololaing tumbeno

(Mat. 4:18-22; Mlk. 1:16-20)

5 Doi meeng kotempo, Yesus kokondong doi Paisu Genesalet bibilo. Badaang komian mopodipo-dipoti sulano namolongol bilita doi Mian Bisa. ²Yesus kitayo kolua koduangan doi tapedoo; kotolosabang-tolosabang lapamo loboson doi duanganoo tukon daano yanila mokumesiyo kona pobuani. ³Yesus lakit doi meeng koduanganoo, doiyamo Simon naduangan, maka sumboliiyo Simon dudunggene kona duangan mododoon soisik kotape. Yesus osulang doi duangan lalomodoo tukon mongotunggul mian badaang.

⁴Salataa lapa mongotunggul, yana bantile doi Simon, “Babosemo doi naateanan, tukon pobanatene kopo buani sulano nakana koikan.”

⁵“Tama Gulu,” Simon timbiliyo, “bangga modoamo komai balimangan kakabukuan, bai aki mai matapu oioila! Bai sabab Tama sumboliiyo, monondokan; yaku naikon banatenemo do buanidoo koidan.” ⁶Sambuno lapa yanila kubaiyo doiya, yanila mantapumo badaang koikan polong yanila nabuani tambuuno tebeak. ⁷Tobikon doiya yanila mangkabi tulung doi yanila tula-tulano doi duanganoo bailong. Yanila tula-tulanodoo lubat maka



Meeng kobuani tukon duangan palako ikan (5:2)

yanila polaing-laing usokiyo do duanganoo molua moonoo tukon ikan polong do duanganoo adukono tanggalaup. ⁸Salataa Simon kitayo doiya, yana sosuba doi Yesus salaano, maka bantile, “Otinggalemo yaku, Temeneno! Sabab yaku mian mobaladosa!”

⁹Simon tukon sasaibino komian mo polaing yana masaingding mokitayo kona badaangan koikan yanila mo tapue. ¹⁰Bunomo koidan tukon Simon tula-tulano, doiyamo Yakobus tukon Yohanes, Zebedeus napau-pau. Yesus bantile doi Simon, “Inai momatakut! Tambuun diabudodoo naikon ikoo teali pobuani mian.”

¹¹Simon tukon tula-tulano kedele do duangan-duanganoo doi tape, doibundu tinggale sasaibino, maka laingemo Yesus.

Yesus aline komeeng komian motakatolon mo minosikiton

(Mat. 8:1-4; Mlk. 1:40-45)

¹²Daano kooloyo meeng, Yesus daanoon doi meeng kokota. Imbali daano komeeng komala-malane kobutongo moonoo takatol mo minosikiton. Salataa yana kitayo Yesus, yana sosuba doi Yesus salaano maka kabiyo, “Tama, kalu Tama yase, Tama moola mualine yaku!”

¹³Yesus taape do mianoo tukon bantile, “Yaku yase, tangalino!” Doiya kosinggato koidan kona sesel lapuso. ¹⁴Maka Yesus pantane do mianoo inai nasalitayo do lobodoo mau doi indee komiano, kona bantilano, “Ampakono doi imam, tukon kabiyo yana sulano natantukene ikoo molapamo tangalin. Maka ampakono mumososubakon sosuba pokakana Musa napinalentakon, teali bukutii doi mian baikon ikoo tutuumo molapamo tangalin.”

¹⁵Bai kobilita tentang Yesus pololokon tololongol doi yayaa, tukon badaang komian molubat mondongolii tukon sulano naaline yanila doi napai sesel. ¹⁶Salataa lapa doiya Yesus ampakon sambeang doi lipu mo kiis.

Yesus aline komeeng komian molemat

(Mat. 9:1-8; Mk. 2:1-12)

¹⁷Daano kooloyo meeng salataa Yesus daano momongotunggul, daano kobubulaa ko Falisi miano tukon gulu-gulu agama osulang idoo. Yanila lubat doi Yelusalem, tukon doi kota-kota Galilea tukon Yudea. Ko Temeneno nakuasa daanomo doi Yesus sulano naaline komian moseselon. ¹⁸Doiya kosinggato bubulaa komian molubat mobabaya komeeng komian molemat mo moolo doi balayon bungkono. Yanila kakaate mobabaya do mianoo doi bonua lalomo sulano namoola abese yana doi Yesus salaano. ¹⁹Bai sabab komian todudulo badaang imbali, yanila aki namoola mobabaya usok. Tobikon doiya yanila libakene yana doi bonua atono bungkono. Maka yanila lamase koato genting, tukon obulesene yana polaing-laing tukon nabalayon doi Yesus salaano doi mianoo badaang tanga-tangano. ²⁰Salataa Yesus kitayo yanila namangangaan mobabasal tuuno, yana bantile doi mianoo, “Utus, komu lalim lapamo inompuni.”

²¹Gulu-gulu agama tukon Falisi-falisi miano pobantikono meeng tukon bailong, “Indee komiano naiya mo balani totulaiyo ko Mian Bisa? Indee komo moola ompuniyo kolalim, kalu bolikon Mian Bisa susuungo?”

²²Yesus toiyoyo yanila napasadai. Jadi yana bantile, “Bulaando komuyu mansa-mansadai bunoo doiya doi noamuyu lalomo? ²³Inaando komo lobian mumuda mobantile, ‘Komu lalim lapamo inompuni’, kai mobantile, ‘Banguno tukon ampakono!’? ²⁴Bai

diabudodoo yaku naikon okitakene doi komuyu baikon doi dunia nia bungkono Manusia Napau komo balakuasa sulano naompuniyo kolalim.” Maka Yesus bantile doi mianoo mo lemat, “Banguno, bingkate komu tempat mooloan, tukon mulemo!”

²⁵Kosobiton mianoo bangun doi yanila sasaibino salaano, maka bingkate kona tempat mooloan, tukon mule maka nggaale ko Mian Bisa.

²⁶Yanila sasaibino masaingding tuuno maka nggaale ko Mian Bisa. Tukon noanoila momatakut, yanila bantile, “Helan tuuno kolangge moteali kita mo sakisiikangene doi oloyo nia!”

Yesus uange Lewi

(Mat. 9:9-13; Mlk. 2:13-17)

²⁷Salataa lapa doiya Yesus tobuat tukon kitayo komeeng kopakabi lulu, kosambuno Lewi, daano osulang doi nakantol. Yesus bantile doi yana, “Laingemo yaku.” ²⁸Lewi polaing kokondong otinggale sasaibino, maka malaingo Yesus.

²⁹Salataa lapa doiya Lewi mokubai lamean doi nabonua tuuk doi Yesus. Badaang kopakabi lulu tukon mian-mian bailong momalaing kaan polaing-laing tukon yanila. ³⁰Bubulaa ko Falisi miano tukon gulu-gulu agama lasayo aki nasanaang, maka bantile doi Yesus napololaing-pololaing, “Bulaando komuyu sasaibino kaan inum tukon pakabi lulu tukon mian moaki namonondok?”

³¹Yesus timbiliyo, “Mian mo makalikodong aki napalaluwo kodoktel; tongo mian mo seselon tolong. ³²Yaku lubat bolikon monguang mian mo aanggene kobutongo monondoko, bai mian mo daano kona lalim sulano yanila nabadodoloon doi yanila nalalim-lalim.”

Pogagaiyan doi apataan kaliangano

(Mat. 9:14-17; Mlk. 2:18-22)

³³Mian-mian bantile doi Yesus, “Yohanes napololaing tukon Falisi miano napololaing idan-idan apata tukon baladoa. Bai komu pololaing-pololaing kaan tukon inum.”

³⁴Yesus timbiliyo, “Oilakai komuyu moola posumboliiyo ko-mian molubat naapata doi lamean basowaanan, kalu kobabaabu

malaneno daano polaing-laing yanila? Tantu aki! ³⁵Bai naikon laate kotempono kobabaabu mala-malanedoo inala doi yanila. Doiyamo kosinggatooyanila naikon nabangapataiyan.”

³⁶Maka Yesus basalitakene doi yanila naiya andean nia, “Akiyo komian mo basiabai kalambi momotuwa tukon meeng kopatolo kotoik doi kalambi boolu. Sabab yana siake do kalambidoo mo boolu. Koikoidan do toikoo posiabai mo boolu aki nasosok tukon dokalambidoo mo motuwamo. ³⁷Bunomo koidan akiyo komian mo mabatun suka boolu doi koitan mo tuwamo lalomo, sabab do sukadoo moolu tealikene do koitanoo mapasa. Maka kosukano tokundang, tukon kokoitano manas. ³⁸Kosuka mo boolu sio nabinatun doi koitan mo boolu koidan. ³⁹Bunomo lakon akiyo komian mo yase monginum suka moolu, salataa lapa monginum suka motuwa. ‘Do sukadoo motuwa lobian kona tamisanan,’ kona bantilano.”

Pasadai tentang oloyo Tadean

(Mat. 12:1-8; Mlk. 2:23-28)

6 Doi meeng kooloyo Tadean, salataa Yesus alon doi meeng koanggul asino, kona pololaing-pololaing bapupuimo gandum. Yanila lesese do gandumoo tukon limano, maka kaane. ²Bubulaa ko Falisi miano bantile, “Bulaando komuyu molanggalemo kopalatulan-palatulan nda agama tukon kubaiyo komo pinantanggon doi oloyo Tadean?”

³Yesus timbiliyo, “Akiyon kai komuyu pobasayo tentang Daud nakinubai, singgatooyana tukon na mian-mian momalaal? ⁴Yana usok doi Temeneno Nabonua lalomo tukon mangala loti mo lapamo sinosubakon doi Mian Bisa, maka yana kaane. Doibundu bineekon koidan dolotidoo doi namian-mianoo. Banggokai manulut nda agama atulano, tongo imam-imam komo moola kaane do lotidoo.”

⁵Maka Yesus bantile, “Manusia Napau balakuasa doi oloyo Tadean.”

Mian kolimano sembeleng molemat

(Mat. 12:9-14; Mlk. 3:1-6)

⁶Doi meeng kooloyo Tadean bailong, Yesus ampakon mongotunggul doi bonua kaleda. Ido daano komian mo

lemat kolimano sembeleng. ⁷Bubulaa kogulu agama tukon Falisi miano yase umboliiyo Yesus nakasalaan sulano namoola tudowe yana. Jadi yanila pateekene momeenggon kai naikon yana aline komian doi oloyo Tadean. ⁸Bai Yesus toiyo yanila napikilan. Maka yana bantile doi mianoo mo lemat kolimano, "Mai kokondong diimbaa muka nia!" Mianoo bangun, maka kokondong idoo. ⁹Doibundu Yesus mansadai doi mian mo daano idoo, "Manulut agama, oila komo moola kita kubaiyo doi oloyo Tadean? Kubaiyo komo monondok kai kubaiyo komo kulokis? Salamaten komian kai osilakayo komian?" ¹⁰Yesus kitayo potikunggon doi yanila sasaibino, maka bantile doi mianoo, "Ulule kolimamu." Do mianoo ululemo kolimano, tukon dolimanodoo tangalino.

¹¹Bai do gulu-gulu agamadoo tukon Falisi miano nggimal tuuno, tukon tambuuno posadaikene kaliangano oila komo moola yanila kubaiyo motuuk doi Yesus.

Yesus mopili songulo lua kolasul

(Mat. 10:1-4; Mlk. 3:13-19)

¹²Doiya kosinggato Yesus tolibo doi meeng kobunggul sulano nabaladoa. Idoo yana baladoa doi Mian Bisa meeng kopopook. ¹³Salataa kooloyo lapamo talaang, yana uange kona pololaing-pololaing, maka molilik songulo lua komian doi yanila. Yana sombuikene domo songulodoo lua komian lasul-lasul. Doi yaniladoo doiyamo: ¹⁴Simon (mo binantil Petulus), tukon Andelias Simon utuso; Yakobus tukon Yohanes, Filipus tukon Baltolomeus, ¹⁵Matius tukon Tomas, Yakobus Alfeus napau, tukon Simon (mo binantil Patliot), ¹⁶Yudas Yakobus napau tukon Yudas Iskaliot komo doibundu teali dadaate Yesus.

Yesus mongotunggul tukon aline komian

(Mat. 4:23-25)

¹⁷Doibundu Yesus obulus doi bunggulo polaing-laing tukon do lasul-lasuloo, maka tade tukon kokondong doi meeng kotampat mo patal. Idoo daano komeeng kotambuno mobadaang kona pololaing-pololaing bailong tukon badaang komian mo lubat doi yayaa doi posaapon ko Yudea, Yelusalem, tukon kota-kota Tilus tukon Sidon mo doi tobun bibilo. ¹⁸Yanila lubat momondongolii Yesus tukon sulano nainalin doi

yanila nasesel-sesel. Yanila mo inusoki ibiliis lubat koidan tukon inalin. ¹⁹Sasaibino komian kakaate motaape Yesus, sabab daano kokuasa mo tobuat doi butongo mo aline yanila sasaibino.

Labaan tukon poloonan

(Mat. 5:1-12)

²⁰Yesus mbalenge kona pololaing-pololaing maka bantile,

“Kinatauan komuyu mian motalalais,

sabab komuyu daano anggota Mian Bisa naumat!

²¹Kinatauan komuyu mo malaal diabudodoo;

komuyu naikon inokobosuli!

Kinatauan komuyu mo kokiil diabudodoo;

komuyu naikon kokumbit!

²²Kinatauan komuyu kalu komuyu minosikiton, inakiyonggon, tinotulai tukon binasalitakon tobikon tongo sabab Manusia Napau! ²³Nabi-nabi looluk bunomo doiya kona kinubaiyan. Kalu do lobodoo teali komuyu siokai posanaang konoamuyu tukon poosuleng polaba, sabab babasal kotambono mo tasadia tuuk komuyu doi sulugaa.

²⁴Bai silakamo komuyu mo kaasa diabudodoo nia;

sabab komuyu lapamo toupiyo kona monondokan!

²⁵Silakamo komuyu mo bobosul diabudodoo nia;

sabab komuyu naikon malaal!

Silakamo komuyu mo kokumbit diabudodoo nia;

sabab komuyu naikon konomuyu poloon tukon kokiil!

²⁶Silakamo komuyu, kalu sasaibino komian nggaale komuyu; sabab bunomo koidan yanila natulunan nggaale konabi-nabi mokala-kala loolukoo.”

Seangano komusu

(Mat. 5:38-48, 7:12a)

²⁷“Bai doi komuyu mo molongolo doi yaku diabudodoo, yaku mebee nateteba nia: seseange komu musu-musu, tukon kubaiyo komo monondok doi mian mo mosikitonggon. ²⁸Balakaatiyo komian mo kutuke ikoo, tukon sambeanggene komian mo kulokisanggene ikoo. ²⁹Kalu komian tapiyo kopapaimu sembeleng, sodiiyomo yana natapiyo kopapaimu sembeleng koidan. Kalu komu jubah linambas, beekene koidan komu

kalambi. ³⁰Kalu komian makabi oioila doikoo, beekene doiya doi yana; tukon kalu komu lobo linambas, inaimo mokabiyo koidan. ³¹Polakukangene komian bailong buno komuyu moyase pokinubaikon doi yanila.

³²Kalu komuyu tolono seseange komian mo seseange komuyu, oila komu jasa? Mau komian mobaladosa toiyo seseange komian mo seseange yanila. ³³Tukon kalu komuyu tolono kubaiyo komonondokan doi mian mo kubaiyo komonondokan doikoo, oila komu jasa? Mau komian mobaladosa toiyo kubaiyo komo buno doiyadoo! ³⁴Tukon kalu komuyu tolono binggotiiyo doy tongo doi mian mo moola abalinggene, oila komu jasa? Mau komian mobaladosa bai toiyo binggotiiyo doy doi mian mobaladosa, maka nakabiyo naabalinggene. ³⁵Kona bisaan aki nabuno doiya! Komuyu kona bisaan sio posesange kopo musu tukon pokubaiyo kopokindokonan doi yanila. Komuyu sio pobeena babingkat, tukon inai pomoinikene namoola abalinggene. Kalu buno doiya, komu tambo naikon babasal tukon komuyu naikon teali Mian Bisa Mo Tatandak Tuuno napau-pau. Sabab ko Mian Bisa monondok konoano doi mian mo aki natoiyoy mantalima seang, tukon doi lobo nalokisan koidan. ³⁶Siokai komuyu pomamaasikene buno ko Tamamu koidan napomamaasikon!”

Hakimiano komian

(Mat. 7:1-5)

³⁷“Inai pohakimiyo komian bailong, sulano mau komuyu susuumuyu inai Mian Bisa nahakimiyo. Inai poukume komian bailong, sulano komuyu susuumuyu koidan ko Mian Bisa aki naukume. Ompuniyo komian bailong, sulano ko Mian Bisa koidan naompuniyo komuyu. ³⁸Beena doi mian bailong, sulano ko Mian Bisa koidan beena doikoo; komuyu naikon mantalima sabeat molobi-lobian mo lapamo inukul mono-monondok tuuk doikoo. Sabab koukulan komuyu mo pakeyo tuuk doi mian bailong naikon ko Mian Bisa pakeyo tuuk doikoo.”

³⁹Doibundu Yesus salitaikene doi yanila koandean buno naiya, “Kalu komian piit tandane komian mopiit bailong, pasti domo luailadoo naikon otuwong doi bitu lalomo. ⁴⁰Akiyo komulit mo

lobian kona babasalan doi nagulu. Bai komulit mo lapamo inotunggul, naikon sasaibino teali buno nagulu.

⁴¹Bulaando komuyu mokitayo kokayung bisilo doi utusomu matano lalomo bai kobalok mo doi matamu susuumu aki mupalatikanggene? ⁴²Bulaando kai komuyu moola bantile doi utusomuyu, 'Mai utus, kubuate kokayungoo bisilo luwedo matamudoo,' bai doi matamu lalomo susuumudoo daano kobalok mo aki mokitayo? He munafik! Buate loolukon kobalok mo daano doi matamu susuumu. Maka nasodo ikoo namoola kitayo tukon tontong tukon namoola mubuate kayung bisilodoo doi utusomu matano."

Batango tukon saono

(Mat. 7:16-20, 12:33-35)

⁴³"Kayung mo molumbang aki namasaokon saono mo lokis. Bunomo lakon kokayung mo aki namolumbang, aki nasaokene kosaono mo monondok. ⁴⁴Meeng kokayung tiningonii doi saono. Mosolot mosoniton aki nasaokene koala saono, tukon laing mosoniton aki nasaokene koanggul saono. ⁴⁵Komian monondok okitakene kolangge-langge monondok sabab konoano lobian kona monondokan. Komian mo lokis okitakene kolangge-langge mo lokis sabab konoano moonoo tukon kulokisan. Sabab oila kobabanggita nabinantil doiyamo komo tokumbe doi noanggita."

Pokubai bonua mo pandoi tukon pokubai bonua mo bonggu

(Mat. 7:24-27)

⁴⁶"Bulaando komuyu mouange yaku, 'Temeneno, Temeneno,' bai aki pokubaiyo oila daku binantil doikoo? ⁴⁷Tukon indee kai komiano komo moola kita pokakanakene komian mo lubat doi yaku, tukon molengele daku bantilan, tukon lakukanggene? – Tadukai kutudoikene doikoo –. ⁴⁸Yana pokakana komian salataa mo kokondong bonua .kaliyo ate-atean, maka nakubaiyo kona pandasi doi batu. Salataa daano kolomba tukon do paisudoo batango lupayo do bonuadoo, do bonuadoo aki namoola tolubang, sabab lapamo kinokondong doi pandasidoo bungukono mo monondok. ⁴⁹Bai komian mo molongol daku bantilan tukon aki nakubaiyo, doiya buno meeng komian mo

kekendenge kona bonua akiyo kona pandasi. Kalu dolombadoo lupayo, do bonuadoo polaing tolubang; tukon kona manasan todudulo tuuno!”

Yesus aline komeeng kosuludadu Loma kapalano napeleleani

(Mat. 8:5-13)

7 Salataa lapa momabantil do langge-langgedoo doi mianoo badaang, Yesus ampakon doi Kapelnaum. ²Idoo daano kosuludadu Loma kapalano mo daano kona ata yana mo seseange tuuno. Do atadoo seselon tukon adukono mate. ³Salataa do suludadudoo kapalano longoliyo tentang Yesus, yana mosumbolii moimoiya kokatua Yahudi miano moampakon doi yana sulano nakabiyo yana nalubat tukon naaline kona ata. ⁴Singgatoo polong doi Yesus, do mianoo kabiyo tukon tutuu sulano yana natulungiyo do suludadudoo kapalano. “Nasuludadu nia kapalano Tama moola natulunge,” yanila nabantilano doi Yesus, ⁵“sabab yana seseange konda bangsa tukon lapamo kekendenge kobonua kaleda tuuk doi kami.”

⁶Maka Yesus ampakon polaing-laing tukon yanila. Salataa Yesus kabimo polong doi bonuadoo, do suludadudoo kapalano utusemo kotula-tulano doi yana sulano nabantile, “Mau naakimo Tama nasusa-susa doi kubonua. Yaku aki namoola talimayo Tama doi kubonua. ⁷Doiyo kosababpo yaku susuunggu aki kubalani mangadap doi Tama. Jadi beenamo palenta tolong sulano daku peleleani natangalin. ⁸Sabab mau doi yakudoo loingiyo daku atasan napalenta tukon modoi bilit doi yaku daano koidan kosuludadu-suludadu mo sio naloingiyo daku palenta. Kalu yaku sumboliiyo komeeng kosuludadu, ‘Ampakon!’ yana koidan ampakon; tukon kalu yaku bantile doi bailong, ‘Mai dimbaa!’ yana kai lubat. Tukon kalu yaku palentayo daku ata, ‘Kubaiyo naiya!’ yana kai kubaiyo.”

⁹Yesus masaingding molengele doiya. Yana mbaleng tukon bantil doi mianoo badaang mo daano lolainge, “Bolikon lobo namian nia. Doi Israel miano akiyoon kumoposuonggon komangangaan babasal mobuno naiya!”

¹⁰Salataa do mianoo mo sinumbolii abali doi suludadudoo kapalano nabonua, do atadoo tangalino.

Yesus otuboiyo koidan komeeng kobalu napau

¹¹Aki namalumbit doibundu, Yesus ampakon doi kota Nain. Kona pololaing-pololaing tukon mian badaang ampakon polaing yana. ¹²Salataa Yesus koolaniyomo do kotadoo tataapono, ko mian-mian sodo mangantokon badan doi kota tonggulungo. Komo mate doiyamo pau malaneno, pau motongo meeng doi meeng kobalu. Badaang komian doi kotadoo molainge do bolokidoo. ¹³Salataa Yesus kitayo do boinedoo, yana seseange doi yana maka bantile, "Inai mokokiil, Tina!" ¹⁴Doibundu Yesus kolaniyo do badanoo tanggungano maka taape. Maka komo tanggunge tade. Yesus bantile, "He pau malane, yaku sumboliikon mubangun!" ¹⁵Pau malane mo lapamo matedoo, bangun osulang tukon basilingano. Maka Yesus salakanggene doi tinano.

¹⁶Sasaibino komian matakut tukon tambuuno nggaale ko Mian Bisa. Yanila bantile, "Meeng konabi mo babasal lapamo sumbot doi kita. Ko Mian Bisa lapamo lubat mosalamatene kona mian!"

¹⁷Bilita tentang Yesus nia tololongol potikunggon ko Yudea tukon doi lipu napokolanikonan.

Yohanes Pasau Mian nabito-bito

(Mat. 11:2-19)

¹⁸Yohanes napololaing-pololaing pailukene doi Yohanes sasaibino do kadadianoo. Maka Yohanes uange kolua komian kona pololaing ¹⁹maka nasumboliiyo yanila ampakon doi Yesus tukon mansadai, "Tamamo kai komian naikon mo lubat manulut Mian Bisa napaladandian, kai sio mai montotiili komian bailong?"

²⁰Doi Yohanes napololaing molua ampakono doi Yesus tukon bantile, "Yohanes Pasau Mian sumboliiyo kami mansadai doi Tama, banggon kai Tamamo do mianoo naikon mo lubat manulut Mian Bisa napaladandian, kai sio mai montotiili komian bailong?"

²¹Doiya kosinggato, Yesus aline komian badaang, tukon siikayo badaang ko ibiliis tukon kubaiyo badaang komian mopiit moola mongkita. ²²Jadi Yesus timbiliyo, "Abalimo doi Yohanes tukon bontiikene oila komo komuyu mo lengele tukon kitayo: mian piit mongkita, mian lemat ampakon, mian motakatolon

mo minosikiton tangalin, mian bongol molongol, mian momate tubo koidan, tukon Bilita Monondok moluwedoi Mian Bisa binabotilanggon doi mian-mian motalalais. ²³Kinatauwan doi mian mo akiyo kona alasan motolayo yaku.”

²⁴Sambuno lapa doi Yohanes nabito-bito ampakon, Yesus tambuuno basilingan doi mian badaang tentang Yohanes, nabantilano, “Komuyu ampakon doi padang lalomo indee kopo kinita? Kai meeng kobulung mbombuul mo puule? ²⁵Komuyu ampakon indee kopo kinita? Meeng komian mo bapakean monondok? Komian mo mapake pakean mobuno doiya tukon tubo sanaang mo dungol doi batomundoan! ²⁶Jadi, komuyu tobuat oila kopo kinita? Sulano kai po mongkita meeng konabi? Bisa, mala lobian doi meeng konabi. ²⁷Sabab Yohanes doiyamo komo minakisuuti doi ayat Kitab Moliyous nia lalomo, ‘Naiyamo daku bito-bito,’ Mian Bisa bantile,

‘Yaku naikon bintekene yana mantailukon loluk doikoo, sulano yana nabukayo kololoon tuuk doikoo!’”

²⁸“Neneeke,” Yesus bantile koidan, “doi dunia nia akiyoon daano komian mo lobian kona babasalan doi Yohanes Pasau Mian. Bai komian mo popoisik doi antala Mian Bisa namian, lobian kona babasalan doi Yohanes Pasau Mian.”

²⁹Sasaibino komian – tousokon kopakabi-pakabi lulu – molengele Yesus mobantile do langgedoo; yanilamo komian mo lapamo tulutiyo ko Mian Bisa nakakabi tukon yase Yohanes nasauwo paisu salani. ³⁰Bai ko Falisi-falisi miano tukon gulu-gulu agama aki nayase talimayo ko Mian Bisa natetel motuuk doi yanila butongo. Yanila aki nayase Yohanes nasauwo.

³¹Maka Yesus basilingan koidan, bantile, “Tukon oila yaku sio pikipikikene komian nia budodoo? Buno oilakai yanila? ³²Yanila buno labuk-labuk mo osulang doi labotan; kotambuno meeng nggele-nggeleamon doi mo bailong, ‘Kami maenggene kolagu momonondok tuuk doi komuyu, bai komuyu aki poyase salendeng! Kami mananikene kolagu matean, tukon komuyu aki pokokiil!’ ³³Yohanes Pasau Mian lubat – yana bangapatai tukon aki namonginum anggul – tukon komuyu bantile, ‘Yana inusoki setan!’ ³⁴Manusia Napau lubat – yana kaan tukon monginum – maka komuyu bantile, ‘Kitayo ndaiya mianoo! Modoko, nggolonguon, pakabi lulu tulano tukon mian baladosa tulano.’”

³⁵Mau kai nabuno doiya, ko Mian Bisa napandoiyan tokita doi sasaibino komian mo talimayo.”

Yesus doi Simon nabonua

³⁶Meeng ko Falisi miano, kosambuno Simon, undange Yesus nakaan. Yesus ampakon doi nabonua tukon osulang kaan.

³⁷Doi kotadoo daano koidan komeeng koboine mo tubo doi lalim lalomo. Salataa yana lengele Yesus daano mokaan doi Falisi mianoo nabonua, yana lubat tukon makanggi meeng kobotol pualam koantoko lisison mobabangi. ³⁸Yana kokondong doi Yesus tonggulungo koolaniyo koaino tukon kokiil maka mbetokiiyo Yesus aino tukon matano paisuno. Doibundu kotuuliyoyo Yesus aino yana itase tukon nabuuk maka umayo tukon kundongiiyo lisison mobabangi. ³⁹Salataa do Falisi miano mo uange Yesus kitayo do langgedoo, yana bantile doi noano lalomo, “Kalu kai naiya mian nia nabi, tantu yana toiyo indee miano do boinedoo mo singgile yana, tukon baikon do boinedoo tubo doi lalim lalomo!”

⁴⁰Maka Yesus bantile doi Simon, “Simon, daano kolobo meeng yaku moyase bontiikene doikoo.”

“Oode, Tama Gulu,” Simon timbiliyo, “bantilemo kai.”

⁴¹Yesus bantile, “Daano kolua komian mo basamea doi mian mo binggotiiyo doy. Komeeng komian basamea lima kosakato doy pelak, tukon komeeng koidan lima kolono kodoy pelak. ⁴²Domo luailadoo aki namoola tebeal do sameadoo, maka doi yaniladoo nasamea inakiyonggono. Nah indee komiano doi mianoo molua naikon komo lobian kona seangano do miano mo bingkotiiyo doy?”

⁴³“Yaku aangene do miano mo badaang tuuno kona samea inakiyonggon!” Simon timbiliyo.

“Komu palaat bisa,” Yesus timbiliyo. ⁴⁴Maka Yesus kitayo do boinedoo tukon bantile doi Simon, “Ikoo kitayo naboine nia? Yaku lubat doi mubonua, tukon ikoo aki musadiayo kopaisu sulano kukumosiyo koainggu; bai naboine nia lapamo kumosiyo koainggu tukon matano paisuno, tukon kotuuliyoyo tukon nabuuk

⁴⁵Ikoo aki mulolobotiyoyo yaku tukon pouma, bai naboine nia aki natade moumayo koainggu salataamo daku lubatan naimbaa.

⁴⁶Ikoo aki mukundongiiyo lisison doi olunggu, bai naboine nia

lapamo kundongiiyo lisison mobabangi doi ainggu. ⁴⁷Bisa, kona soyang mo babasalo okitakene baikon kona lalim mo badaang lapamo inompuni! Kalu komian moinompuni soisik, yana naikon meseang soisik koidan.”

⁴⁸Maka Yesus bantile doi boinedoo, “Komu lalim-lalim lapamo inompuni.”

⁴⁹Komian bailong mo osulang kaan polaing Yesus tambuuno pobantikon meeng maka bailong, “Indee namian nia kolalim momoola naompuniyo?”

⁵⁰Bai Yesus bantile doi boinedoo, “Sabab ikoo mangangga doi yaku, ikoo sinalamaton. Ampakono tukon monondok!”

Boine-boine mo tomboniiyo Yesus

8 Aki namalumbit doibundu, Yesus ampakon doi kota-kota tukon kampung-kampung, sulano nababotilangene ko Bilita Monondok baikon ko Mian Bisa tambuuno momapalenta bunu Tomundo. Songulo lua kona pololaing-pololaing lainge polaing yana. ²Bunomo koidan bubulaa koboine mo lapamo inalin doi ibiliis tukon nasesel. Yanila doiyamo Malia mo binantil Magdalena (pitu koibiliis mo lapamo liniat doi yana); ³koidan Yohana, Khuza naboloki, pagawe doi Helodes nakamali; Susana, tukon badaang koidan koboine bailong. Tukon napai ongkos susuungo, yanila tomboniiyo Yesus tukon napololaing-pololaing.

Andean mobatipas

(Mat. 13:1-9; Mlk. 4:1-9)

⁴Komian banggadudul lubat doi Yesus luwedo bubulaa kokota. Tukon salataa lapamo badaang komian pototongi, Yesus basalitakene doi yanila naiya andean nia: ⁵“Meeng kopolimang asi ampakon tipase kona kalibuang. Salataa yana daano mobatipason, daano kalibuang mo otuwong doi loloon. Kosoobos mian tudongiiyo tukon kobailong tomisi kaane. ⁶Daano koidan komo tuwong doi lipu mobatu-batuwon. Salataa kosopi-sopiino sumbot do tanamanoo molooyumo sabab kobutano motuul. ⁷Daano koidan kokalibuang mo otuwong doi sonit tangano. Do sonitoo tubo polaing do kalibuangoo tukon podipoti tobikon namate. ⁸Bai daano koidan kokalibuang

mo otuwong doi buta mo subul, maka tubo tukon sao sakat luunggon nasakat.”

Sala lapa basalitakene do andeanoo, Yesus bantile, “Kalu daano kotolingaimuyu pondongoliiyo!”

Bulaando Yesus momapake andean

(Mat. 13:10-17; Mlk. 4:10-12)

⁹Yesus napololaing-pololaing mansadaikene doi yana do andeanoo alatino. ¹⁰Yesus timbiliyo, “Komuyu lapamo binee pangalatian sulano potoiyo kolahasiano bulaando ko Mian Bisa namapalentaan buno Tomundo. Bai komian bailong inotunggul tukon andean, sulano yanila napalahatikangene, bai aki natoiyoyo oilamo komo teali; tukon yanila mondongolii, bai aki namangalati.”

Yesus talakangene koandean tentang meeng komian mobatipas

(Mat. 13:18-23; Mlk. 4:13-20)

¹¹“Naiyamo koalantino do andeanoo: Do kalibuangoo doiyamo Mian Bisa nabantilan. ¹²Kalibuang mo otuwong doi loloon inandekon doi mian mo mondongolii do bantilanoo. Bai ko Ibiliis lubat maka lambase do bilitadoo doi yanila noano, sulano yanila inai namangangga tukon nasinalamaton. ¹³Kalibuang mo otuwong doi lipu mo batuwon inandekon doi mian doiya singgat mo molongol do bilitadoo, yana talimayo tukon monondok konoano. Bai do bilitadoo aki namoonggol doi yanila noano lalomo. Yanila tolono soisikeen kona manganggaan, tukon doi tembo palasobaan nalubat, yanila akimo namangangga. ¹⁴Kalibuang mo otuwong doi sonit tangano inandekon doi mian mo molongol do bilitadoo, bai molilikene tentang yanila natuboan tukon yase tubo molobian tukon sanaang doi dunia nia lalomo. Sasaibinodoo podipoti yanila tobikon aki saokene kosaono mo monondok. ¹⁵Kalibuang mo otuwong doi buta mo subul inandekon doi mian mo molongol do bilitadoo, maka abese doi noano lalomo monondok tukon jujul. Yanila bataanggon polong saokene kosaono.”



Mosolot mo soniton (8:14)

Posi mo sinonggupi tukon gumbang

(Mlk. 4:21-25)

¹⁶“Akiyo komian mo suayo kona posi maka nasonggupiyo tukon gumbang, kai abese doi namooloan adeno. Yana naikon abese kona posidoo doi posidoo aino, sulano komian mo usok kitayo kona madialanan. ¹⁷Akiyo komo tosookon komo aki naikon natokita; tukon akiyo komo linasiakon komo aki naikon natobuka tukon tinoi.

¹⁸Tobikon doiya popalatikanggene mono-monondok oila komuyu nalinongol. Sabab komian mo daanomo naikon binee lobian badaang koidan; bai komian mo aki nadaano, soisik komo daano doi yana naikon inala koidan.”

Tinano tukon Yesus utus-utuso

(Mat. 12:46-50; Mlk. 3:31-35)

¹⁹Tinano tukon Yesus utus-utuso lubat doi yana, bai yanila aki napolong doi yana sabab komian todudul badaang. ²⁰Maka daano komeeng komian mo bantile doi Yesus, “Tama, tinamu tukon Tama utus-utuso daano doi tonggulung. Yanila yase pososuung tukon Tama.”

²¹Bai Yesus bantile doi yanila, “Mian-mian mo molongol Mian Bisa nabantilan tukon lakukanggene, yanila kotinanggu tukon utus-utusonggu.”

Yesus atadeo kosokoi

(Mat. 8:23-27; Mlk. 4:35-41)

²²Daano kooloyo meeng Yesus tukon napololaing-pololaing lakit doi duangan. “Mai kita nda ampakon imbali paisu sembeleng,” Yesus bantile doi yanila. Maka yaniladoo lengget. ²³Singgatoo yanila daano motalabut, Yesus moolo. Sosinggot puul kombombuul makansang doi paisudoo. Paisu tambuuno usok doi duanganoo lalomo, tobikon yanila sasaibino kabi nasilaka. ²⁴Yesus napololaing-pololaing ampakon doi yana maka bangune yana. Yanila bantile, “Tama Gulu, Tama Gulu, kita silakamo!”

Yesus bangun maka gilaiyo do mbombuuloo tukon do bokoloo mo daano babokolan. Mbombuul tukon do bokoloo tade maka dopaisudoo teali molino tuuno. ²⁵Maka Yesus bantile doi napololaing-pololaing, “Bulaando komuyu moaki poanggayo yaku?”

Yanila teali masaingding tukon matakut. Tukon yanila pobantikono meeng tukon bailong, “Indee kona bisaan namian nia mopalentayo kombombuul tukon bokol, tukon yana inangga!”

Yesus aline komian mo inusoki ibiliis

(Mat. 8:28-34; Mlk. 5:1-20)

²⁶Yesus tukon napololaing-pololaing banggadudul talabut polong doi kabupaten Gelasa, doi Paisu Galilea sembeleng. ²⁷Salataa Yesus loboson doi buta tina, yana linubotii meeng komala-malane mo inusoki ibiliis. Do mianoo luwedo kota. Malumbito yana akimo nabapakean tukon aki nayase dungol doi

bonua. Yana tongo yase dungol doi leng-leng lipu bakibulan.
²⁸Salataa kitayo Yesus, yana nggeleamon maka sosuba doi Yesus salaano tukon nggeleamon, “Yesus, Mian Bisa Napau Mo Tatandak Tuuno! Naikon ikoo bulaandekene yaku nia? Yaku kabiyo inai mosakisaayo yaku!” ²⁹Do mianoo bantile buno doiya sabab Yesus palentayo do ibiliisoo batobuat doi yana. Lapamo idan doibiliisoo nakuasaiyo yana tobikon mau kolimano tukon aino nalapamo binoboi tukon lante tukon yana dinagai tuuno, yana daano mobetele do lantedoo maka doibiliisoo babayo doi padang bone.

³⁰Yesus mansadai doi mianoo, “Indee kosambumu?”

“Kosambunggu ‘Legiun’,” do mianoo timbiliyo – sabab daano mobadaang koibiliis mo lapamo usok doi butongo lalomo. ³¹Do ibiliisoo kabiyo tukon tutuu sulano inai Yesus nasiikayo yanila doi Motombing Matean lalomo.

³²Loolani doi lipudoo daano badaang tuuno kobabung mo daano moumbolii kinaan doi bunggul peako. Do ibiliisoo kabiyo tukon tutuu doi Yesus sulano naminoolakon mousok doi babung-babungoo lalomo. Tukon Yesus loingiyo. ³³Maka do ibiliisoo tobuato doi mianoo tukon usok doi babung-babungoo lalomo. Maka do babung-babungoo obuleng tukon bakatuwong doi motombingoo bibilo doi paisudoo lalomo, doibundu tombulo.

³⁴Do pototooli babungoo kitayo oila komo lapamo teali. Maka yanila obuleng tukon pelengene do bilitadoo doi kota tukon potikunggon kokampung. ³⁵Maka komian ampakon sulano namokita oila komo teali. Yanila lubat doi Yesus, tukon idoo yanila laate do mianoo mo lapamo tosodii doi ibiliisoo daano moosulang kolaniyo Yesus aino. Yana lapamo bapakean tukon kona pikilan monondoko. Yanila teali matakut. ³⁶Yanila mo mokita do kadadianoo, basalitakene doi mian bulaando do mianoo nainalanan. ³⁷Maka sasaibino kobanggapi doi kabupaten Gelasadoo kabiyo tukon tutuu sulano Yesus naotinggale do lipudoo, sabab yanila sasaibino matakut tuuno. Jadi Yesus lakit doi duangan maka mule. ³⁸Mian mo lapamo tosodii doi ibiliisoo kabiyo doi Yesus sulano yana namoola malaing.

Bai Yesus sumbōliiyo yana naampakon, ³⁹yana bantile. “Mulemo tukon babotilangene oila komo lapamo Mian Bisa lakukangene doikoo.”

Maka do mianoo ampakono popitoikene doi potikunggon kota, oila komo lapamo Yesus lakukangene doi yana.

Yailus napau – Boine mo singgile Yesus

(Mat. 9:18-26; Mlk. 5:21-43)

⁴⁰Salataa Yesus abali doi paisu sembeleng, yana sinambut tukon monondok doi mian-mian sabab yanila daano mototiiliyo yana. ⁴¹Maka lubat komeeng komian pototooli bonua kaleda doi lipudoo. Kosambuno Yailus. Yana sosuba doi Yesus salaano tukon kabiyo tukon tutuu sulano Yesus nalubat doi nabonua, ⁴²sabab kona pau boine tongo meeng kona umul songulomo lua kotaum kabimo mate.

Daano Yesus moampakon doi Yailus nabonua komian dipe-dipete yana doi sasaibino kololoon. ⁴³Doi antalano daano koidan koboine meeng mo lapamo songulo lua kotaum kona seselonan ndendek kosauno mo posuungimo tukon nabolokonan. Yana akabusemo sasaibino kona buat sulano nabapakuli doi doktel, bai akiyo komo moola aline. ⁴⁴Do boinedoo kolaniyo Yesus doi tonggulung, maka singgile kona jubah bunduno. Doiya kosinggatoo do boinedoo sauno mondendek tademo. ⁴⁵Yesus mansadai, “Indee komo singgile yaku?”

Sasaibino komian bangakikon. Maka Petulus bantile, “Tama, daano badaang tuuno komian doi potikunggon Tama; yanila dipe-dipete Tama!”

⁴⁶Yesus bantile, “Bai daano komian mo singgile yaku. Yaku toiyo doiya, sabab daano kobukuanan mo sumbut doi yaku.” ⁴⁷Do boinedoo sadal sabab kona kokubai totoimo. Jadi lubat tukon mbombokon maka sosuba doi Yesus salaano. Maka yana basalitakene doi mianoo sasaibino salaano, bulaando yana mosinggile Yesus, tukon doiya kosinggatoo kona sesel tangalino. ⁴⁸Yesus bantile doi yana, “Kupau, sabab ikoo anggayo yaku, ikoo tangalin. Ampakono tukon selamat.”

⁴⁹Daano Yesus mobasilingan, meeng kososumbolii lubat doi Yailus nabonua. Yana bantile doi Yailus, “Tuan naboine matemo. Inaimo Tuan mokubaiyo susa Tama Gulu koidan.”

⁵⁰Salataa Yesus lengele doiya, yana bantile doi Yailus, “Inai momatakut. Anggayomo tolong tukon komu pau naikon tangalin.”

⁵¹Salataa polong doi Yailus nabonua, Yesus aki napataikene meeng komian mousok tukon yana tolongo Petulus, Yohanes,

Yakobus tukon tolongo do paudoo tamano tinano. ⁵²Sasaibino komian daano mokokiil tukon mandaung sabab do paudoo namatean. Bai Yesus bantile, “Inai mokokiil. Do paudoo aki namate, yana tolongo moolo!”

⁵³Yanila kokumbite Yesus, sabab yanila toiyo do paudoo boine matemo. ⁵⁴Doibundu Yesus taaniyo do paudoo limano maka bantile, “Banguno, Pau!” ⁵⁵Do paudoo naansaang abali doi paudoo, tukon sosinggot yana bangun. Lapa doiya Yesus sumboliiyo yanila mobeena kaan do paudoo. ⁵⁶Paudoo naolang tua masaingding tuuno. Bai Yesus pantane yanila mobabotilangene do langgedoo doi inde-indee komiano.

Yesus mobintokon songulo lua kona pololaing

(Mat. 10:5-15; Mlk. 6:7-13)

9 Yesus monguang songulo lua kona pololaing, maka beena kuasa doi yanila sulano nasiikayo koibiliis tukon aline kosesel. ²Doibundu yana sumboliiyo yanila ampakon aline komian moseselon tukon pelengene kobilita tentang bulaando ko Mian Bisa namapalentaan buno Tomundo. ³“Inai makanggi oioila tuuk doi muampakon,” Yesus bantile doi yanila, “Inai makanggi tonggat, kai pundi bangabosan doy, kai kinaan, kai doy, kai lua kopatolo kopakean. ⁴Doi yaando kai kopo tinalimaan podungolo idoo sampe komuyu otinggale do kotadoo. ⁵Tukon inaando komo aki natalimayo komuyu, salataa komuyu otinggale do kotadoo, potipasene koambata doi aimuyu salaano, buno meeng poingotii doi yanila.”

⁶Yesus napololaing-pololaing luwemo, maka ampakon doi kampung-kampung sulano napo babilitakene do Bilitadoo Monondok tukon aline komian moseselon doi yayaa.

Helodes bingung

(Mat. 14:1-12; Mlk. 6:14-29)

⁷Salataa Helodes, mapalenta doi Galilea, molengele tentang sasaibino kokadadianoo, yana bingung. Sabab daano komo bantile baikon Yohanes Pasau Mian tubomo koidan. ⁸Daano koidan mo bantile baikon Elia sumboto koidan. Komian bailing koidan bantile baikon meeng konabi doi nabi-nabi doi loolukoo

tubomo koidan. ⁹Helodes bantile, “Yaku lapamo sumboliyo komian mopatele Yohanes oluno. Bai namian nia, indee kona tutuuwan yana? Daano badaang komo lapamo yaku lengele tentang yana.” Maka Helodes kakaate sulano nakitayo Yesus.

Yesus mebee kaan lima koloon komian

(Mat. 14:13-21; Mlk. 6:30-44; Yoh. 6:1-14)

¹⁰Yesus nalasul-lasul abalimo tukon salitaikene doi Yesus sasaibino yanila mo lapamo kubaiyo. Yesus tobiyo yanila, maka ampakon polaing-laing yanila basusuunganggon doi kota Betsaida. ¹¹Bai salataa komian toiyo tentang do langgedoo, yanila lolaingemo Yesus. Yana talimayo yanila, maka basilingan doi yanila tentang bulaando ko Mian Bisa namapalentaan buno Tomundo. Tukon yana koidan aline komian moseselon doi antala yanila.

¹²Salataa kooloyo mangatambuuno sopok, domo songulodoo lua Yesus napololaing lubat doi yana tukon bantile, “Tama, natampatia tambasiil. Tadukai Tama nasumboliyo namian nia naampakon sulano yanila namoola moumbolii kinaan tukon tempat sambukonan doi kampung tukon doi desa-desa napololanikonan nia.”

¹³Bai Yesus timbiliyo, “Komuyu komo beena kaan.”

Yesus napololaing-pololaing bantile, “Kami tongo daano lima koloti tukon lua koikan. Oilakai kami sio mai ampakon mongoli kinaan tuuk sasaibino komian nia?” (¹⁴Daano uga-ugaate lima koloon komian mamalane idoo.)

Yesus bantile doi napololaing-pololaing, “Posumboliyo na mian-mian nia naosulang meeng-meeng kotambuno, uga-ugaat lima kolono komian meeng kotambuno.”

¹⁵Yesus napololaing-pololaingoo kubaiyo oilamo Yesus nabinantil doi yanila. ¹⁶Maka Yesus alayo do lotidoo molima tukon do ikanoo molua, doibundu maka lelengea doi timbu tukon batalima kase doi Mian Bisa. Lapa doiya yana bisi-bisiliyo do lotidoo tukon do ikanoo tukon limano maka beekene doi napololaing-pololaing sulano naobo-obosikene doi mianoo badaang. ¹⁷Yanila sasaibino kaan polong bobosul. Maka Yesus napololaing-pololaing pototongikene do kinaanoo labino kona kadaang songulo lua kobois.

Petulus napangakuan tentang Yesus

(Mat. 16:13-19; Mlk. 8:27-29)

¹⁸Daano kooloyo meeng, salataa Yesus daano mobaladoa susuungo, kona pololaing-pololaing lubat doi yana. Yesus sadaiyo doi yanila, “Manulut mian nabantilano, yaku nia indee?”

¹⁹Yanila timbiliyo, “Daano komo bantile Yohanes Pasau Mian. Daano koidan komo bantile Elia, kobailong koidan bantile meeng konabi doi loolukoo mo tubomo koidan.”

²⁰“Bai manulut komuyu susuungo, yaku nia indee?” Yesus sadaiyo.

Petulus timbiliyo, “Tama doiyamo ko Tomundo Pasalamat Mian Bisa mo dandiikene.”

Yesus basilingan tentang nasakisaawan tukon namatean

(Mat. 16:21-28; Mlk. 8:31 - 9:1)

²¹Maka Yesus bantile doi napololaing-pololaing, “Inai pobantil-bantile do langgedoo doi indee komiano.” ²²Yesus bantile koidan, “Ko Manusia Napau takainomo sio nabadaang kona pandalitaan tukon linawan doi tua-tua tukon imam-imam kapalano, tukon gulu-gulu agama. Yana naikon inakate, bai doi oloyo kotoluno naikon tubo koidan.”

²³Doibundu Yesus bantile doi sasaibino komian mo daano idoo, “Mian mo yase lolainge yaku, sio natoliminggene kona kopontingan susuungo, tanggunge kona sempang samba-samba kooloyo; tukon banggadudul lainge yaku. ²⁴Sabab komian mo yase palataangene kona tuboan, naikon kona tuboan lapus. Bai komian mo kulubaangene kona tuboan tuuk daku kopontingan, naikon salamatene. ²⁵Oila kountungo doi memeeng komian kalu sasaibino nadunia nia teali nalangge, bai yana rusak tukon lapus kona tuboan? ²⁶Kalu komian maaaa akuiyo yaku tukon daku otunggul, Manusia Napau koidan naikon maaaa momangakukene do mianoo salataa yana nalubatan naikon tukon nakuasa, tukon Tama nakuasa maka malaekat-malaekat nakuasa mo moliyous! ²⁷Potoiyo: doi antala komuyu dimbaa

daano komo aki naikon namate kalu akiyo naikon namokita ko Mian Bisa namapalentaan.”

Yesus nakinabasalan

(Mat. 17:1-8; Mlk. 9:2-8)

²⁸Uga-ugaat meeng kominggu kona lapaan Yesus naotung-gulkanano do langge-langgedoo, yana babayo Petulus, Yohanes tukon Yakobus doi meeng kobunggul bungkukono sulano nabaladoa. ²⁹Daano Yesus mobaladoa idoo, koduduso boliimo tukon kona pakean tealimo moute montootilang. ³⁰⁻³¹Sosinggoton lua komian, doiyamo Musa tukon Elia okitakene kobutongo tukon madialang laango doi sulugaa. Yanila pobasilingonii tukon Yesus tentang namatean mo akimo namalumbit koidan naikon ampakengenemo doi Yelusalem. ³²Doiya singgato Petulus tukon tula-tulano moolomo, bai sosinggoton bangun, tukon kitayo Yesus momontootilangan tukon do mianoo molua kokondong tukon yana. ³³Salataa do mianoo molua otinggalemo Yesus, Petulus bantile doi Yesus, “Tama Gulu, maamis tuuno kita naimbaa. Tadukai kami mokokondong tolu kosandung; komeeng tuuk Tuan, komeeng tuuk Musa, tukon komeeng koidan tuuk Elia.” (Petulus bantile buno doiya yana aki namangalatikene oila kona binantilo.)

³⁴Daano Petulus mobasilingan, lubat komeeng kobunong tukon songgupiyo yanila, tobikon yanila matakut. ³⁵Doibundu luwedo bunongoo tololongol kolalo mo bantile, “Naiyamo daku Pau pinilih. Polengele yana!”

³⁶Salataa tade do lalodoo, yanila kitayo Yesus baino susuungo idoo. Yesus napololaing-pololaing tongo aki nabiyok tentang sasaibinodoo, tukon aki napo bontiikene mau doi indee komiano oila komo lapamo yanila kitayo.

Yesus aline pau mo inusoki ibiliis

(Mat. 17:14-18; Mlk. 9:14-27)

³⁷Modoakon kooloyo Yesus tukon tolu kona pololaing obulus doi bungguloo, tukon mian badaang lubat doi Yesus. ³⁸Meeng komala-malane doi mian badaangoo tangano nggeleamon, “Tama Gulu, tulunge yaku kitayo daku pau – yana tolongo doiya daku pau! ³⁹Kalu doibiliisoo usokiyomo yana, yana

nggeleamon tukon kobutongo tidol-tidolo polong kobabano babiyoi. Ibiliisoo banggadudul sakisaayo yana tukon aki nayase kokoliat doi yana. ⁴⁰Lapamo yaku kabiyo doi Tama napololaing-pololaing mosiikayo ibiliisoo, bai yanila aki nanggoolayo.”

⁴¹Yesus timbiliyo, “Bukan maen komuyu nia! Komuyu bisa-bisa mian mo aki namololoi tukon akimo namangangga! Polong bulaa yaku sio podungoli komuyu tukon sabal doi komuyu? Babayo do paudoo doisumai!”

⁴²Daano do paudoo moampakon doi Yesus, do ibiliisoo tikakene yana tukon kubaiyo kobutongo tidol-tidol. Bai Yesus palentayo do ibiliisoo nabaliat tukon do paudoo tangalino. Maka do paudoo sinalakanggon doi tinano. ⁴³Sasaibino komian masaingding mokitayo ko Mian Bisa nakuasa mo buno doiya kona babasalan.

Yesus basilingangene koidan tentang namatean

(Mat. 17:22-23; Mlk. 9:30-32)

Singgato komian daano momasa-masaingding mokitayo sasaibino kona kinubai, Yesus bantile doi napololaing-pololaing, ⁴⁴“Popalaticangene mono-monondok tukon inai potoliminggene daku bantil-bantilan nia: Manusia Napau naikon sinalakanggon doi banggapi nakuasa.” ⁴⁵Bai doi Yesus napololaing-pololaingoo aki namangalaticene kona bantilanoo. Do langgedoo linasiakanggon doi yanila sulano yanila naaki namangalaticene. Bai yanila matakut momansadaikene do langgedoo doi yana.

Indee komo babasal?

(Mat. 18:1-5; Mlk. 9:33-37)

⁴⁶Doi antala Yesus napololaing-pololaing sumbot kopogaiyan tentang indee komiano doi yanila komo babasal. ⁴⁷Yesus toiyo yanila napikilan, tobikon doiya yana mangala meeng kopau mopoipoisik tukon sumboliiyo do paudoo nakokondong doi bibilo. ⁴⁸Maka yana bantile doi napololaing-pololaing, “Mian mo talimayo napau nia sabab yaku, koalantino talimayo yaku. Tukon mian mo talimayo yaku, talimayo yana mo utuse yaku. Sabab mian mo poipoisik doi antala komuyu, yanamo komo babasal!”

Mian mo aki nalawane komuyu, doi komuyu kona alaan

(Mik. 9:38-40)

⁴⁹Yohanes bantile, “Tuan, kami kitayo komian mosiikayo kosetan mangatas Tuan sambuno, tukon kami pantane yana, sabab yana bolikon luwedo kita.”

⁵⁰“Inai mopantane yana,” Yesus bantile doi Yohanes tukon napololaing-pololaing bailonggon, “sabab komian mo aki nalawane komuyu, koalatio ala doi komuyu.”

Meeng kokampung doi Samalia aki nayase talimayo Yesus

⁵¹Sambuno loolanimo kotembono Yesus nabiningkatan doi sulugaa, yana mangala kaputusan sulano naampakon doi Yelusalem. ⁵²Maka yana mosumbolii mian moampakon loolukoniyo yana. Do mian-mianoo mo sinumbolii ampakon, maka usok doi meeng kokampung doi Samalia sulano nasadiakene sasaibino kolangge doi Yesus. ⁵³Bai do mianoo doi kampung aki nayase talimayo Yesus, sabab tokita tuuno yana daano moampakon doi Yelusalem. ⁵⁴Maka doiya kosinggatoo Yesus napololaing-pololaing, doiyamo Yakobus tukon Yohanes toiyo tentang do langgedoo, yanila bantile, “Temeneno, oilakai Temeneno yase, kami mangkabi aung naobulus luwe doisumai timbu sulano nasilakayo na mian-mian nia?”

⁵⁵Yesus mbaleng, maka nggimoliiyo yanila. ⁵⁶Salataa lapa doiya yanila ampakon doi kampung bailong.

Badaang komian mo yase teali Yesus napololaing

(Mat. 8:19-22)

⁵⁷Daano Yesus tukon napololaing-pololaing banggadudulkene kona ampakonan, daano komian bantile doi Yesus, “Tama, yaku yase lolainge Tama doi yayaando!”

⁵⁸Yesus timbiliyo, “Asu lobo daano kona buang, tukon kotomisi daano kona telea, bai Manusia Napau akiyo kona tempat moolan.” ⁵⁹Maka Yesus bantile doi mian bailong, “Laingemo yaku.”

Bai do mianoo bantile, “Tama, pataikene yaku kumule looluk sulano kukibule kotamanggu.”

⁶⁰Yesus timbiliyo, “Sodiikenemo komian mate nakibule komian mate susuungo. Bai ikoo, ampakono tukon popitoikene kobilita baikon ko Mian Bisa lapamo atambuune kona mapalentaan.”

⁶¹Daano koidan komeeng komian bailong mo bantile, “Tama, yaku yase loolainge Tama, bai pataikene yaku kumule looluk sulano kupalamisi.”

⁶²Yesus bantile doi mianoo, “Komian mo lapamo tambuune kona bapajekoan, bai mbalenge kotonggulungo, aki namoola teali Mian Bisa namian.”

Yesus utuse kopitu kolono kona pololaing

10 Lapa doiya Temeneno molilik pitu kolono kopololaing koidan, maka bintekene yanila lua-lua komian polaing mantailukiyo yana doi meeng-meeng kokota tukon lipu yana mo lubotiiyo. ²“Hasil naikon mo pinupui badaang,” kona bantilano doi yanila, “bai kopolimang sulano nabapupui tongo soisik. Tobikon doiya, kabiyo doi asidoo tumbuno sulano namakapatu polimang sulano napupuiyo kona langge sinakakon hasilo. ³Yo, poluwemo! Yaku bintekene komuyu bunu domba doi asu lobo tanga-tangano. ⁴Inai momakanggi dombet kai pundi sadakaah, kai sapatu. Inai motade doi loloon tangano sulano mu mebee salam doi meeng komian koidan. ⁵Kalu komuyu usok doi meeng kobonua, bontiikene loolukon, ‘Boliisi namonondok nabonua nia lalomo.’ ⁶Kalu idoo daano komian mo yase dame, domu salam podameanoo naikon tataap doi yana; kalu aki, abalinggene domu salam podameanoo. ⁷Dungolo doi meeng kobonua tolong. Talimayomo oila komo bineekon koimbaa doikoo, sabab komian mo balimang daano konahaak mantalima tambono. Inai mobiyol-biyol doi meeng kobonua doi bonua bailong. ⁸Kalu komuyu lubat doi meeng kokota tukon imbali komuyu tinalima tukon monondok, pokaanemo oilamo komo sinadiakon idoo doi komuyu. ⁹Aline komian mo seselon doi kotadoo, tukon babotilangene doi mian idoo, ‘Ko Mian Bisa mosobit naikon atambuune kona mapalentaan

buno Tomundo doi komuyu.’ ¹⁰Bai kalu komuyu lubat doi meeng kokota tukon idoo komuyu aki potinalima, potobuat doi loloon tukon pobantile, ¹¹‘Oode kopo kota ambatano mo lambot doi aingami, kami tipasene bunu poingotii doikoo. Bai potoiyo baikon loolanimo kotembono ko Mian Bisa atambuune kona mapalentaan bunu Tomundo doi komuyu tanga-tangano!’ ¹²Neneke doi Oloyo Nakiamatan, ko Sodom miano naikon muda ko Mian Bisa naompuniano maka baino mian doi kotadoo!”

Kota-kota mo aki namaangga

(Mat. 11:20-24)

¹³“Silakamo komuyu, Kolazim! Tukon silakamo komuyu, Betsaida! Kalu andeno kolangge-langge minasaingdinggon mo kinubai doi komuyudoo tanga-tangano lapamo kinubai doi kota Tilus tukon Sidon, tantu kona mian imbali malumbito kona badodoolonan doi yanila nalalim-lalim, tukon mapake kopakean susaan maka mangabos abu doi yanila oluno bungkono. ¹⁴Doi Oloyo Nakiamatan ko Tilus tukon Sidon miano naikon lobian muda ko Mian Bisa naompuniyo kalu baino komuyu. ¹⁵Tukon komuyu, Kapelnaum! Komuyu pikikene, komuyu naikon inakatandak polong doi sulugaa? Aki! Tongo komuyu naikon sinakukon doi nalaka!”

¹⁶Maka Yesus bantil doi napololaing-pololaing, “Komian mo lengele komuyu, longoliyo yaku. Mian mo tolake komuyu, tolake yaku. Tukon mian mo tolake yaku, koidan tolake yana mo bintekene yaku.”

Naabalian kopitu kolono kopololaing

¹⁷Pitu kolono do pololaingoo abali tukon laba-laba tuuno. “Temeneno,” yanila bantile, “ibiliisoo loingiyo kami kalu kami palentayo yanila tukon Temeneno sambuno!”

¹⁸Yesus timbiliyo, “Yaku kitayo ko Ibiliis otuwong luwedo timbu pokakana kodidip. ¹⁹Potoiyo! Komuyu lapamo kubeena kuasa sulano komuyu moola tudange kobinda tukon manda sopit tukon lotoiyo sasaibino komusu nabukuanan, akiyo kolangge meeng mo moola silakayo komuyu. ²⁰Mau kai nabuno



Meeng komanda sopit (10:19)

doiya inai polaba-laba sabab doibiliisoo loingiyomo komuyu. Tadukai komuyu laba-laba sabab kosambumuyu totuliso doi sulugaa.”

Yesus laba

(Mat. 11:25-27, 13:16-17)

²¹Doiya kosinggatoo koidan, Yesus laba sabab ko Mian Bisa Na Loh kuasaiyomo. Yesus bantile, “Tama, Temeneno komo kuasaiyo kotimbu tukon buta! Yaku bakinatauwan doikoo sabab sasaibino doiya ikoo lasiakanggene doi mian mo pandoi tukon mopandoi tuuno, bai ikoo tudoikene doi mian-mian mo aki napandoi. Doiyamo komo sanaangene ko Tama noano.

²²Sasaibino kolangge lapamo Tama salakanggene doi yaku. Akiyo komeeng komian motingoniyo do Paudoo, tongo Tama. Akiyo koidan komo tingoniyo Tama tongo do Paudoo; tukon mian doi indee komiano do Paudoo moyase ontingoniikene ko Tama.”

²³Maka Yesus mbaleng doi napololaing-pololaing, doibundu bantile doi yanila basusuunganggon, “Pountungo komuyu sabab lapamo mongkita komuyu kitayo diabudodoo nia. ²⁴Sabab neneke: Badaang konabi tukon tomundo mo yase kitayo komo komuyu kitayo diabudodoo nia bai yanila aki nakitayo. Yanila yase molongol komo komuyu lengele diabudodoo nia, bai yanila aki nalengele.”

Andean Samalia miano mo monondok konoano

²⁵Doibundu meeng kogulu agama lubat sulano nadinggalayo Yesus. Yana mansadai, “Tama Gulu, yaku sio oila daku kinubai sulano moola mantalima tuboan mobisa tukon posidutukon?”

²⁶Yesus timbiliyo, “Oila komo totulis doi Kitab Moliyous lalomo? Bulaando komu palaat tentang do langgedoo?”

²⁷Do mianoo timbiliyo, “‘Seseange komu Temeneno Mian Bisa tukon totubo konoamu, tukon sasaibino kobutomu, tukon sasaibino komu bukuanan, tukon sasaibino komu pikilan,’ tukon ‘Seseange kotulamu pokakana ikoo seange kobutomu susuumu.’”

²⁸“Mupotimbilidoo bisa,” Yesus bantile, “Lakukanggene doiya, maka ikoo naikon tubo.”

²⁹Bai do gulu agamadoo yase mobisakene kobutongo. Yana mansadai, “Indee do tulanggudoo?”

³⁰Yesus timbiliyo, “Daano komeeng komala-malane lengget doi Yelusalem ampakon doi Yelikho. Doi loloon tangano yana pondikuk lobosiyo, linambas sasaibino kona langge, maka binobokii kabi namate, maka inotinggal tongokoolo doi loloon tukon kona pakol babasal. ³¹Pokokonoi meeng koimam ampakon doi loloonoo. Sambuno yana kitayo do mianoo, yana lilit doi loloon sembeleng, maka ampakon banggadudul. ³²Bunomo lakon koidan tukon meeng ko Lewi miano mo ampakon idoo; salataa yana kitayo do mianoo yana lolaniyo sulano napalatikanggene. Bai mau doi yanadoo lilit doi loloon sembeleng, maka ampakon banggadudul. ³³Bai doibundu meeng ko Samalia miano mo daano ampakon, alokon koidan idoo. Salataa yana kitayo do mianoo, konoano susa sabab naseangano. ³⁴Maka yana kolaniyo do mianoo maka kumesio kona pakol-pakol tukon anggul maka yana pakuliyo tukon lisison, doibundu yana tomboliyo do pakol-pakolodoo. Lapa doiya yana alakite domianoo doi naadalan susuungo maka babayo doi meeng kobonua tukon pakuliyo. ³⁵Modoakon kooloyo yana mangala lua kodoy pelak tukon beekene doi bonuadoo tumbuno maka bantile, ‘Po pakuliyomo yana, tukon

kalu daano kopebealo bailong, maka kubeyale, kalu yaku abali dimbaa.’ ”

³⁶Doibundu Yesus oppusiyomo kona salitadoo tukon pasadai nia, “Doi mianoo motolu inaando kai, manulut mupalaat, komo teali tulano do mianoo mo linampok?”

³⁷Gulu agamadoo mo sinadai timbiliyo, “Domianoo mo lapamo tulungiyo do mianoo.”

“Nah poampakono tukon pokubaiyo bunu doiya koidan!” Yesus bantile.

Yesus lubotiiyo Malta tukon Malia

³⁸Doibundu Yesus tukon napololaing-pololaing banggadudul-kenemo kona poampakonan maka polong doi meeng kodesa. Ido meeng koboine, kosambuno Malta, uange yana doi nabonua. ³⁹Malta daano koutuso moluko kosambuno Malia. Malia nia osulang kolaniyo Yesus mondongolii Yesus naotunggul-otunggul. ⁴⁰Bai Malta pasokon tuuno tukon balimang doi nabonua lalomo. Yana ampakon doi Yesus tukon bantile, “Temeneno, oilakai Temeneno aki mupopusinggon Malia mobatadikene yaku kubalimang susuunggu? Sumboliiyo yana natomboniiyo yaku!”

⁴¹“Malta, Malta!” Temeneno timbiliyo. “Ikoo molilikene tukon paso-pasokon mopikikene naiya tukon doiya; ⁴²banggokai komo ponting tongo meeng. Tukon Malia lapamo lilike komo monondok, mo aki naikon nainala doi yana.”

Yesus naotunggul tentang sambeangan

(Mat. 6:9-13, 7:7-11)

11 Daano kooloyo meeng Yesus sambeang doi meeng kotampat. Lapa sambeang, daano komeeng kona pololaing-pololaing mobantile, “Temeneno, soba otunggule kami mosambeang bunu Yohanes mootunggule kona pololaing-pololaing mosambeang.”

²Maka Yesus bantile doi yanila, “Kalu komuyu sambeang, pobantile bunu naiya,

‘Tama,

Ikoomo ko Mian Bisa mo Meeng.

Boliisi ikoo musinosubai tukon muinodotii.

³ Beena sasamba kooloyo
kokinaan kami mo palaluuwo.

⁴ Ompuniyo kombai lalim-lalim,
sabab kami koidan ompuniyo samba komian
mo daano kona sala doi kami.

Tukon inai mobatadikene nalapus komai manganggaan salataa
kami sinobai.' ”

⁵ Yesus bantil doi napololaing-pololaing, “Kalu andeno meeng
komian doi komuyu nokon ampakon doi tulano nabonua doi
popook pintanga, tukon bantile, ‘Tulando, binggotiiyaku tolu
koloti, ⁶sabab tulanggu daano doi naampakonan, sodo nasampu
doi bonua tukon akiyono daku kinaan motuuk doi yana!’ ⁷Kalu
andeno do tulamudoo ikoo mo lubotiiyo timbiliyo bunu naiya,
doi nabonua lalomo, ‘Inai mokubaiyo yaku susa! Tataapon
tokuncimo yaku tukon kupau-pau moolomo. Yaku aki namoola
bangun tukon mebee oioila doikoo!’ ”

⁸“Maka bulaandomo?” Yesus bantile banggadudul. “Yaku
bantile, oode! Mau kai ikoo nadaanoan kotulano, yana aki
naikon nayase bangun tukon mebee oioila doikoo. Bai tobikon
ikoo aki mumalasa mamaa sulano momangkabi doi yana
sidutu momeeng, maka yana naikon bangun koidan tukon
beena doikoo oila komo ikoo palaluuwo. ⁹Jadi, yaku bantile
doikoo: Manggabimo, maka komuyu naikon binee; umboliiyo,
maka komuyu naikon malaat; tokiyo, maka kotataapon naikon
binukakon doikoo. ¹⁰Sabab komian mo mangkabi naikon
mantalima; mian mo moumbolii naikon malaat, tukon mian mo
batoki naikon binukakon kotataapon. ¹¹Doi antalano komuyu
oilakai daano kotama komo beekene kobinda doi mupau, kalu
yana mangkabi ikan? ¹²Kai beena manda sopit, kalu yana
mangkabi nggalau? ¹³Mau kai komuyu polokis, komuyu toiyo
koidan beekene komo monondok doi mupau. Baino kai koidan
ko Tamamu doi sulugaa! Yana naikon beekene kona Loh doi
yanila mo mangkabi doi yana!”

Yesus tukon Beelzebul

(Mat. 12:22-30; Mk. 3:20-27)

¹⁴Daano komeeng kooloyo Yesus siikayo ibiliis natobuat doi
meeng komian moponga. Salataa do ibiliisoo tobuato, do mi-
anoo tambuuno mobasilangan. Badaang komian momasaingding,

¹⁵bai daano komo bantile, “Yana moola siikayo koibiliis sabab kuasa Beelzebul do ibiliisoo kapalano.”

¹⁶Daano koidan komian bailong mo yase dinggabayiyo Yesus, jadi yanila kabiyo yana nakubaiyo komeeng mo minasaingdinggon buno tanda baikon yana molubat luwedo Mian Bisa. ¹⁷Bai Yesus toiyo yanila namakisuut. Maka yana bantile doi yanila, “Kalu meeng konegala motongobos-oboso doi golongan-golongan mo pomusu-musu, do negaladoo akimo naikon nabataanggon. Tukon meeng kobonua tumbuno mo tongobos-oboso tukon pomusu-musumo meeng tukon bailong, naikon silakamo. ¹⁸Bunomo koidan doi Ibiliis lalomo nabatomundoan; kalu meeng kotambuno poakate tukon tambuno bailong, do batomundoanoo naikon tolubang. Komuyu bantile baikon yaku siikayo koibiliis sabab kuasa Beelzebul. ¹⁹Kalu buno doiya, tukon indee nakuasa komu pololaing-pololaing mosiikayo do ibiliisoo? Komu pololaing-pololaingoo susuungo komo okitakene baikon komuyu sala! ²⁰Bai yaku siikayo koibiliis tukon kuasa Mian Bisa, tukon doiya koalatio baikon ko Mian Bisa lapamo atambuune kona bapalentaan doi komuyu.

²¹Kalu meeng komian mo bukuan, tukon sukup kona sanjata, totooliyo kona bonua susuungo, sasaibino kona langge naikon salamet. ²²Bai kalu meeng komian lobian kona bukuanan molobosiyo yana tukon lungguiyo yana, maka do mianoo mo lobian kona bukuanan naikon lambasemo sasaibino kona sanjata binalaanggon do bonuadoo tumbuno, maka ebe-ebesemo sasaibino kona langge-langge.

²³Mian mo aki naloingiyo yaku tutuu lawane yaku, tukon mian mo aki natomboniyo yaku tutuu lusayo daku limang!”

Ibiliis naabalian

(Mat. 12:43-45)

²⁴“Kalu naikon koibiliis otinggalemo memeeng komian, do ibiliisoo boilingiyomo kolipu-lipu mo motuul sulano namoumbolii lipu natade-tadean, bai yana aki namalaat. Tobikon doiya, yana bantile, ‘Yaku naikon abali doi bonua mo lapamo yaku tinggale!’ ²⁵Salataa yana polong imbali, yana laatemo do bonuadoo bilisii tukon taatul. ²⁶Maka yana ampakon

tukon babayo kopitu koloh bailong mo lobian kona kulokisan doi yana. Doibundu yanila usok doi mianoo lalomo maka dungol idoo. Tukon doibundu do mianoo ndondoongo teali lobian kona kulokisan doi tumbeno.”

Namonondokan mo bisa

²⁷Salataa Yesus bantile buno doiya, meeng koboine doi antala mian badaangoo bantile doi Yesus, “Bisa kona monondokan koboine mo suunge tukon susuwe ikoo!”

²⁸Bai Yesus timbiliyo, “Lobian kona monondokan koidan komian mo molongol Mian Bisa nabantilan tukon moampakong-gene!”

Mian mokabiyo Yesus nakubaiyo komo minasaingdinggon

(Mat. 12:38-42)

²⁹Daanoon komian motokuuniyo Yesus, yana banggadudulke-ne kona salita, bantile, “Bisamo kai kona kulokisan komian doi lounu nia. Yanila kabiyo komeeng komo minasaingdinggon sulano yanila namoola mangangгаа doi yaku; bai yanila aki naikon nabinee meeng komo minasaingdinggon, tongo ma-saingdinganano Nabi Yunus. ³⁰Bunomo lakon Nabi Yunus teali meeng komasaingdingan doi kota Niniwe miano, bunomo lakon koidan Manusia Napau naikon teali meeng komasaingdingan motuuk doi mian doi lounu nia. ³¹Doi Oloyo Nakiamatan, Tomundo moluko moluwedoi lipu Lalom naikon nggimal polaing komian doi lounu nia, tukon tuduwo yanila. Sabab, sulano namondongolii Salomo napandoiyan mongotunggul, do Tomundo boinedoo kubaiyo kona ampakonon mo dodoon tuuno luwedoi dunia bunduno. Bai dimbaa diabudodoo daano komo lobian kona babasalan doi Salomo! ³²Doi Oloyo Nakiamatan, Niniwe miano naikon nggimal polaing komian doi lounu nia, tukon tuduwo yanila, sabab do Niniwe mianoo badodoloono doi yanila nalalim-lalim salataa Yunus mongotunggul doi yanila. Bai dimbaa diabudodoo daano komo lobian kona babasalan doi Yunus!”

11:29: Mat. 16:4, Mlk. 8:12

11:30: Yun. 3:4

11:31: 1Tomd. 10:1-10, 2Tun. 9:1-12

11:32: Yun. 3:5

Madialan tukon kalipookan

(Mat. 5:15, 6:22-23)

³³“Akiyo komian mo suayo kona posi maka naseekene kai kukupe tukon gumbang. Yana naikon abese do posidoo doi aino, sulano komian mo usok namoola kitayo kona madialanan. ³⁴Mata daano posi tuuk butonggita. Kalu komatamu molino, sasaibino kobutomu madialan tuuno. Bai kalu komatamu songgoliyon, sasaibino kobutomu teali kalipookan tuuno. ³⁵Tobikon doiya, pobada-badagai, inai do madialanoo mo daanomo doikoodoo nateali kalipookan. ³⁶Kalu sasaibino kobutomu madialan, tukon akiyo kosoobos komo kalipookan, maka sasaibino kobutomudoo madialan tuuno bunu diniolii posi panano.”

Yesus asalakene ko Falisi-falisi miano tukon gulu-gulu agama

(Mat. 23:1-36; Mlk. 12:38-40)

³⁷Sambuno Yesus basilingan, meeng ko Falisi miano uange yana kaan doi nabonua. Maka Yesus ampakono kaan idoo. ³⁸Falisi mianoo masaingding mokitayo Yesus kaan tukon aki nakumesiyo kolimano looluk manulut palatulan agama. ³⁹Tobikon doiya ko Temeneno bantile doi yana, “Takainomo komuyu Falisi-falisi miano kopo kabiasaan mokumesi manggo tukon pinggan tongo doi tonggulungo, bai doi butomuyu susuumu lalomo moonoo tukon matikasan tukon nakulokisan. ⁴⁰Komuyu longas! Bolikon kai Mian Bisa komo kubaiyo doi bagian tonggulungodoo, lapamo kubaiyo koidan doi lalomodoo? ⁴¹Komo daano doi manggodoo lalomo tukon doi mupingganoo doiyamo komo sio komuyu pobeekene doi mian motalalais. Tukon do caladoo, sasaibino naikon teali bilisii doikoo.

⁴²Silakamo komuyu, Falisi-falisi miano! Komu sinakakon hasilo bunu selasi tukon inggu tukon lamba-lamba bailong, komuyu beekene kosongulo koobos doi Mian Bisa, bai kokaa-dilan tukon seangano ko Mian Bisa komuyu aki popusinggene. Padahal doiyamo komo komuyu sio polakukanggene; tukon aki potolimangene kobai-bailong koidan.

⁴³Silakamo komuyu, Falisi-falisi miano! Komuyu yase kotampat-tampat mo monondok doi bonua kaleda lalomo, tukon yase inodotii doi labotan-labotan. ⁴⁴Silakamo komuyu! Komuyu bunu kibul mo akiyo kopaliasano, mo tinudo-tudongii mian bai aki nasinadali.”

⁴⁵Meeng kogulu agama bantile doi Yesus, “Tama Gulu tukon do bantil-bantilanoo, Tama totulaiyo kami koidan!”

⁴⁶Yesus timbiliyo, “Silakamo komuyu koidan, gulu-gulu agama! Komuyu tuntute kolangge-langge mo maaling tukon mebee palatulan-palatulan mo babalat, bai komuyu susuumuyu mau natongo kai soisik aki poyase tulungiyo komian moam-pakonggene. ⁴⁷Silakamo komuyu! Komuyu bangune kokibul motuuk doi nabi-nabi, mumbumbu looluk moakateyo. ⁴⁸Jadi komuyu susuumuyu akuiyo baikon komuyu satujuiyo oila komo lapamo pombumbu looluk kubaiyo; sabab takainomo yanilamo komo akateyo do nabi-nabidoo tukon komuyumo kai komo kubaiyo kona kibul. ⁴⁹Doiyamo kosababpo ko Mian Bisa Napandoiyan bantile, ‘Yaku naikon makapatu doi yanila nabi-nabi tukon kusosumboliiyon; kobailong naikon inakate tukon kobailong naikon linoilokis!’ ⁵⁰Mian Bisa kubaiyo doiya sulano komian nai lounu nia inukum sabab mangakatean mo kinubai doi sasaibino konabi salataa dunia napinasitakaan, ⁵¹mangatambuun Habel nainakatean polong doi Zakalia nainakatean, kona tealian doi pokalatanan kobalabaan tukon Temeneno Nabonua. Poanggayomo: Komian doi lounu nia bisa naikon inukum sabab sasaibino doiya.

⁵²Silakamo komuyu, gulu-gulu agama! Kunci sulano nabukayo kotataapon motoiyan inabos doi komuyu, bai komuyu susuumuyu aki poyase usok doi lalomo sulano poumboliiyo do motoiyanoo. Bai komuyu semba-sembe komian mo kakaate mousok doi lalomodoo!”

⁵³Salataa Yesus otinggale do tampatoo, gulu-gulu agama tukon Falisi-falisi miano nggimoliiyo Yesus tutuuno. Yanila tambuuno mopeka-pekaiyo yana sulano yana nayase basilingan tentang badaang kolangge. ⁵⁴Tukon daanoon mobuno doiya yanila palatikangene yana mono-monondok sulano napo lakoyo komeeng kolangge mo sala kona bantilano.

Poingotii motuuk doi mian mokadu-kadukon

(Mat. 10:26-27)

12 Doi libu-libuno komian podipot-dipoti polong daano komo tinudang-tudang koaino. Daanoon do mianoo mopototongi, Yesus bantile doi napololaing-pololaing, “Pobada-badagai ko Falisi miano napangaani, daku makisuut, yanila nakadu-kadukonan. ²Akiyo komo tosookon mo aki naikon natokita, tukon akiyo komo linasiakanggon komo aki naikon natinoi. ³Komo komuyu bantile doi popook, naikon tololongolo doi namodoakonan; tukon komo komuyu polisaukene doi mian tolingaino doi kombiang motatutup lalomo, naikon pinolonggon doi namolo-moloasan.”

Pomatakutene ko Mian Bisa

(Mat. 10:28-31)

⁴“Poneneeke, tula-tulanggu! Inaikai pomatakutene doi yanila mo akateyo kobutonggita bai aki namoola kubaiyo lobian doiya. ⁵Tadukai yaku tudoikene doikoo indee komo sio komuyu matakutene. Pomatakutene ko Mian Bisa! Sabab salataa lapa mangakate, yana balakuasa sakukene doi nalaka lalomo! Poanggayomo, yana komo sio komuyu matakutene.

⁶Lima kotomisi peleet binalukon koolino lua kodoy mopoipoisik tuuno. Mau kai nabuno doiya akiyo komeeng kotomisi Mian Bisa motoliminggene. ⁷Buuk doi olumu lapamo inait sasaibino, tobikon doiya inaikai matakut, komuyu lobian mododoon koanggano doi tomisi pepeleet!”

Akuiyano Klistus doi mian badaang salaano

(Mat. 10:32-33, 12:32, 10:19-20)

⁸“Poneneeke mono-monondok: Mian mo mangakukene doi mian badaang salaano baikon yana kupololaing, yana naikon Manusia Napau koidan akuiyo doi Mian Bisa namalaekat-malaekat salaano. ⁹Bai mian mo akiyenggene doi mian badaang salaano baikon yana kupololaing, yana naikon Manusia Napau akiyenggene doi Mian Bisa namalaekat-malaekat salaano.

¹⁰Kalu naikon komian mabantil meeng kolangge tantange Manusia Napau, yana moola inompuni; bai kalu yana totulaiyo ko Mian Bisa Na Loh, yana aki namoola inompuni.

¹¹Kalu komuyu binaba doi bonua-bonua kaleda sulano poinadili doi pamalenta salaano kai ponguasa, inaikai pomatakut bulaando kaliangano komuyu naikon kopo belaano kobutomuyu kai naikon oila komo sio pobantile. ¹²Sabab oila komo sio komuyu pobantile doiya naikon Mian Bisa Na Loh otunggukene doikoo nalaate kotembono.”

Andean mian mokaasa mo longas

¹³Meeng komian doi antala mian badaang bantil doi Yesus, “Tama Gulu, soba Tama sumboliyo koutusonggu nabeena yaku soobos doi tamanggami nabuat inotinggal.”

¹⁴Yesus timbiliyo, “Utus, indee kai komo bingkate yaku teali pamalenta kai pongobos doi popusaka lua komuyu?” ¹⁵Doibundu doi sasaibino komian mo daano idoo Yesus bantile, “Pobada-badagai kai tukon pobaingotii kai, inai napolong komuyu modoko. Sabab kobanggapi natuboan aki natokooton doi kaasaan mau kai kona buat nalobi-lobian.”

¹⁶Maka Yesus basalitakene naandean nia, “Daano komeeng komian mokaasa. Yana daano kona buta mo beena badaang kohasilo. ¹⁷Do mianoo mokaasa tambuuno pikikene doi noano lalomo, ‘Akiyono kotampat koidan daku abosano daku buta hasilo. Oila daku akal diabudodoo?’ ¹⁸Doibundu yana bapikil koidan tukon bantile doi butongo susuungo, ‘Ah, yaku daano daku akal; daku gudang-gudang yaku sumboliyo nalinopo maka kubangune komo lobian kona babasalan. Idoomo naikon daku abosano sasaibino daku gandum tukon daku langge-langge bailong.’ ¹⁹Doibundu naikon yaku bantile doi butonggu susuunggu, ‘Ikoo untungo! Sasaibino komonondok lapamo daano doikoo tukon aki naikon nakabus doi taun-taunggon. Balasanaango diabudodoo! Kaan tukon monginum tukon lasakanggene doi mutuboan!’ ²⁰Bai Mian Bisa bantile doi yana, ‘He longas! Popookia nia koidan ikoo naikon mate, maka indee naikon komo malaat sasaibino komu buat mo lapamo ikoo pototongikene tuuk doi butomudoo?’

²¹Bunomo doiya kona tealian tukon sasamba komian mo kakaate nateali kaasa motuuk doi butongo susuungo, bai aki nakakaate nateali kaasa doi Mian Bisa matano.”

Pomangangamo ko Mian Bisa

(Mat. 6:25-34)

²²Maka Yesus bantil doi napololaing-pololaing, “Doiyamo kosababpo yaku bantile, ‘Inai molilikene tentang komu tuboan, doiyamo oila komuyu naikon pokinaan, kai oilamo naikon komiyu napinake.’ ²³Kotuboan daano molobian luwedoi kinaan, tukon butonggita lobian luwedoi pakean. ²⁴Popalaticanggene kotomisi-tomisi gagak! Yanila aki namasakakon, aki nabapupui, aki koidan nadaano kona gudang kai longgo. Bai ko Mian Bisa pialayo yanila! Komuyu lobian mododoon koanggano doi tomisi-tomisi! ²⁵Indee kai antala komuyu mo tukon namolilikanano moola nakobulusane kona umul mau kai tongo soisik? ²⁶Kalu langge mopoipoisikoo akimo namoola komuyu kubaiyo, bulaando molilikene kaliangano langge-langge bailong? ²⁷Popalaticanggene bulaando kobunga-bunga bakung natubo; bunga-bungadoo aki nabalimang, aki koidan nabatonun. Bai Tomundo Salomo mo buno doiya kona kaasaan aki namapake pakean mo pokakana kona monondokan do bunga-bungadoo! ²⁸Bulung doi padang tubo oloyo nia bai modoa sinua kabus. Mau ko Mian Bisa nakindendeke do bulungoo buno doiya kona monondokan. Baimo kai komuyu! Bai komuyu soisik kopoo manganggaan! ²⁹Jadi, inai molilikene tukon bingung tentang oila naikon komuyu pokinaan tukon poininum. ³⁰Langge-langge mobuno doiya linolonggon doi mian mo aki natingoniiyo ko Mian Bisa. Banggokai ko Tamamu toiyo baikon komuyu palaluuwo sasaibino doiya. ³¹Bai komuyu sio pokakaate sulano ko Mian Bisa namapalenta doi mutuboan, maka kobailonggon naikon ko Mian Bisa beekene koidan doikoo.”

Buat doi sulugaa

(Mat. 6:19-21)

³²“Komuyu mo tongo soisik kona kadaang, inai matakut! Sabab ko Tamamu sanaang mobeekene doikoo kobalakaat doi na Bapamalentaan. ³³Balukene komu langge tukon beekene

kodoyno doi mian motalalais. Kubaiyomo doi butomu kodombet mo aki namoola mbules, doiyamo kobuat mo inabos doi sulugaa. Do buatao aki namoola lapus sabab kopondikuk aki namoola alayo tukon koatak aki namoola lusayo. ³⁴Sabab inaando komu buat, idoomo koidan konoamu!”

Peleleani mo basadia sidutu

³⁵“Pobada-badagai mosasalaane komeeng kolangge. Komuyu sio posidutu basadia mobapake tukon komu posi tataap inokoiti, ³⁶pokakana buno kopeleleani-peleleani mo daano basadia totiiliyo kona tuan abali doi lamean baasowaanan, kalu do tuanoo abali tukon tokiyo kotataapon, yanila naikon mosobit bukayo kotataapon. ³⁷Bukan maen kona untungan do peleleani-peleleanidoo linaat mo daano totiiliyo kotembono kona tuan nalubatan. Poanggayomo: do tuanoo naikon basa-basadia tukon sumboliiyo kona peleleani-peleleanidoo osulang, maka yana leleaniyo yanila. ³⁸Bukan maen kona untungan do peleleani-peleleanidoo kalu yaniladoo natuan laate yanila daano basadia mototiili, mau kai yana nalubat napintangamo kopopook kai lobiano kona talaatan doiya! ³⁹Neneeke naiya! Kalu andeno kobonua tumbuno toiyo jam bulaa naikon kopondikuk nalubatan, yana naikon dagaiyo sulano kopondikuk naaki nausok doi nabonua lalomo. ⁴⁰Tobikon doiya komuyu koidan sio pobasa-basadia, sabab Manusia Napau naikon lubat doi tembo komuyu mo aki posangka-sangkayo.”

Peleleani mo totobos tukon peleleani mo aki natotobos

(Mat. 24:45-51)

⁴¹“Temeneno, oilakai do otungguloo Temeneno otuuke doi kami kai doi sasaibino komian?” Petulus sadaiyo.

⁴²Temeneno timbiliyo, “Indee kopeleleani mo totobos tukon mopandoi tobikon natuan bingkate teali kapalano doi peleleani bailong sulano yana beena kaan yanila tapaat kotembono? ⁴³Bukan maen kona sanaangan do peleleanidoo kalu naikon kona tuan abali tukon laate yana daano balimang! ⁴⁴Poanggayomo: Do tuanoo naikon monggidagaikene sasaibino kona buat doi peleleanidoo. ⁴⁵Bai kalu do peleleanidoo bantil doi noano lalomo, ‘Daku tuan daano momalumbit maka naabali,’ maka

yana bobokiiyo sasaibino kopeleleani tukon kaan inum polong malangu, ⁴⁶maka kona tuan naikon lubat doi oloyo tukon jam mo aki natinoi-toi. Tukon do peleleanidoo natuan naikon bobokiiyo tutuuno tukon tinealikono pomeenggon nasib tukon domianoo bailong mo aki nataat doi Mian Bisa.

⁴⁷Peleleani mo toiyono kona tuan namongiasan, bai aki nabasabasadia tukon aki nakubaiyo kona tuan namongiasanoo, naikon inumbas kinobukuanggon. ⁴⁸Bai peleleani mo aki natoiyono kona tuan namongiasan, doibundu kubaiyo komeeng mo sala tobikon sio nainumbas, naikon inumbas tongo mamalaan. Sabab mian mo lapamo binee badaang, doiyanadoo naikon tinuntut badaang koidan. Tukon mian mo lapamo kinuasaikon badaang, doiyanadoo naikon tinuntut badaang koidan.”

Bolikon podamean bai pomusuan

(Mat. 10:34-36)

⁴⁹“Yaku lubat sulano kusumbetene kona sinuuwaan naiya dunia nia. Bukan maen kona monondokan kalu koaungoo lapamo kait! ⁵⁰Daano kosusa tuuno mo sio kuompokoniiyo. Tukon konoanggu susa tuuno kalu akiyoon doiya nateali. ⁵¹Katidoon kai komuyu aanggene yaku lubat sulano kubabayoo kopodamean doi dunia? Bolikon, bolikon podamean, tongo pomusuan. ⁵²Tambuuno diabudodoo, doi lima komian dobonuadoo tumbuno naikon pomusumo, tolu musuwo kolua, kai lua musuwo kotolu. ⁵³Tama naikon musuwo kona pau mala-malane tukon pau mala-malane musuwo kotamano. Tina lawane kona pau boine tukon pau boine musuwo kotinano. Kona monianan boine naikon musuwo kona monianan boineno tukon monianan boineno naikon musuwo kona monianan boine.”

Tingoniiyo kolounu paloosano

(Mat. 16:2-3)

⁵⁴Yesus bantile koidan doi mian badaang, “Kalu komuyu kitayo kobunong liba doi oloyo nasopokan sembeleng, komuyu banggadudul bantil, ‘Naikon udano.’ Tukon tutuu udan. ⁵⁵Kalu komuyu neemiyo kombombuul lubat doi lalom, komuyu bantile, ‘Naikon pintalo.’ Tukon tutuu pintal. ⁵⁶Komuyu mian mo yase kadu-kadukon! Komuyu moola tantukanggene kodapang tukon

kitayo kotimbu ndondoongo tukon dunia. Bulaando kolounu nia palo-paloosano aki namoola komuyu tantukangene?”

Popodamemo tukon musu

(Mat. 5:25-26)

⁵⁷ “Bulaando komuyu moaki poputusio oila komo bisa? ⁵⁸ Kalu daano komian mokalaakene komuyu doi pangadilan pokakaate tutuuno sulano namoola poalapayo do palakaladoo tukon yana modaano komuyu doi loloon tangano. Kalu aki, naikon yana salakangene komuyu doi hakim salaano tukon hakimoo naikon salakangene komuyu doi polisi, tukon dopolisidoo usekene komuyu doi talunggu lalomo. ⁵⁹ Poanggayomo! Komuyu aki naikon potobuat doi talunggu kalu akiyoon nakabus kona masakitan konoamu.”

Kalu aki badodoloon doi lalim, naikon silaka

13 Doiya kosinggato komian salitaikene doi Yesus mangana bubulaa ko Galilea miano Pilatus mo akateyo, singgato yanila daano mososubakene kona pososubakon doi Mian Bisa. ² Pikikene do salitadoo Yesus bantile, “Sabab do Galileadoo miano moinakate buno doiya, komuyu aangene doiya kolimbako yanila lobian kona lalim doi sasaibino ko Galilea miano bailong? ³ Tutuu aki! Bai poneneeke: kalu komuyu aki pobadodoloon doi polalim-lalim, komuyu sasaibino naikon mate koidan, buno yanila. ⁴ Bulaando kai koidan tukon songulo alu komian mo mate doi Siloam, singgato do menaladoo naticalano yanila? Komuyu aangene doiya otudoikene yanila lobian kona lalim doi sasaibino komian bailong mo dungol doi Yelusalem? ⁵ Tutuu aki! Idan koidan yaku bantile: Kalu komuyu aki pobadodoloon doi polalim-lalim, komuyu sasaibino naikon mate koidan buno yanila.”

Andean kayung ala mo aki nasao

⁶ Lapa doiya Yesus basalitakene koidan koandean nia, “Daano komeeng komian mototooli kayung ala doi anggul asino. Oloyo meeng yana ampakon moumbolii do kayungoo saono, aki namoposunggon mau nabaino meeng kosaono. ⁷ Jadi, yana bantile doi molimangedoo kona asi, ‘Kitayo, lapamo tolu kotaum daku lubatan momoumbolii doaladoo saono doi ala batango nia, bai aki kumoposunggon meeng kosaono.

Tapeyomo koiya kayungoo! Yana tongo akabuse kozat kinaan doi buta!’ ⁸Bai do polimang asidoo timbiliyo, ‘Sobiikenemo yana natubo meeng kotaum nia koidan, Tuan. Yaku naikon pasele kobuta potikunggon tukon obosiyo pupuk. ⁹Naanggo kai yana sao doi taum salaando nia. Bai kalu aki, moolamo Tuan namosumbolii natinape.’”

Yesus aline meeng koboine bobungkut doi oloyo Tadean

¹⁰Doi meeng kooloyo Tadean, Yesus mongotunggul doi meeng kobonua kaleda. ¹¹Idoo daano koboine mo masakit songulomo alu kotaum, sabab daano koibiliis doi butongo lalomo. Do boinedoo bobungkuto tukon aki namoola kokondong kokoloyos. ¹²Salataa Yesus kitayo, yana nggeleamon doi yana, “Tina, ikoo tangalino doi mupanakit!” ¹³Maka Yesus binggakene kolimano doi boinedoo bungguno, tukon doiya kosinggatoo yana kokondong kokoloyos maka nggaale ko Mian Bisa.

¹⁴Mokapalaiyo do bonua kaledadoo nggimal, padungga Yesus moaline komian moseselon doi oloyo Tadean, tobikon doiya yana bantile doi mian-mian, “Daano noom kooloyo tuuk balimangan; polubat doi oloyo-oloyodoo sulano poinalin, inai doi oloyo Tadean!”

¹⁵Temeneno timbiliyo, “Munafik komuyu nia! Doi oloyo Tadean sasaibino komian sodiiyo kona saapi kai naadalan doi natondok tukon babayo tobuat sulano nabeena monginum paisu doi nasaapi tukon naadalan. ¹⁶Nah, diabudodoo diimbaa daano komeeng koboine Abalaham natulunan, mo songulomo alu kotaum kona kalumbit Ibiliis nakuasaiyano. Oilakai yana aki namoola inosodiikon doi kuasadoo doi oloyo Tadean?” ¹⁷Yesus napotimbilidoo doiya kubaiyo Yesus namusu-musu mamaa tuuno; bai sasaibino komian bailong sanaang momokita sasaibino komo minasaingdinggon Yesus mo kubaiyo.

Andean mostol batuno

(Mat. 13:31-32; Mlk. 4:30-32)

¹⁸Yesus mansadai, “Kalu baikon ko Mian Bisa mapalenta, bulaando kai kondondoongo? Tukon oilakai yaku moola mopokakanakene? ¹⁹Kondondoongo bunu andean koidan: Meeng

komostol batuno inala meeng komian maka sakakene doi naasi. Do kalibuangoo tubo maka teali kayung, tukon kotomisi-tomisi mokubai telea doi kayung langa-langaanodoo.”

Andean lagi

(Mat. 13:33)

²⁰Idan koidan Yesus mansadai, “Kalu ko Mian Bisa mapalenta, tukon oilakai daku pokanakanano kona bunooan?
²¹Kondondoongo bunoo lagi meeng koboine mo alayo maka inaduk tukon sangkap kolono kolitel kotaligu polong tuboi sasaibino.”

Tataapon mo madipot

(Mat. 7:13-14, 21-23)

²²Ampakonan doi Yelusalem, Yesus lolo doi kota-kota tukon kampung-kampung maka mongotunggul. ²³Maka daano komian momansadai doi yana, “Tama, oilakai tongo soisik tolong komian naikon mo sinalamaton?”

²⁴Yesus timbiliyo, “Pokakaate sulano pousok doi tataapon mo madipot. Sabab, neneeke! Badaang komian mokakaate usok bai aki namoola. ²⁵Doiyo kosinggatoo dobonuadoo tumbuno bangun tukon taapikene kona tataapon, komuyu kokondong doi tonggungul tukon tambuuno batoki-toki maka bantile, ‘Tuan, bukayo kotataapon tuuk kami!’ Tuanoo naikon timbiliyo, ‘Yaku aki kutoiyo komuyu doi yaando!’ ²⁶Komuyu naikon timbiliyo, ‘Kami lapamo kaan monginum polaing Tuan, tukon Tuan lapamo mongotunggul doi loloon-loloon doi mai kota!’ ²⁷Bai do Tuanoo naikon bantile koidan, ‘Yaku aki kutoiyo komuyu doi yaando. Dampas naimbaa, komuyu mo kubaiyo kokulokisan!’ ²⁸Singgatoo doiyo komuyu kitayo Abalaham, Ishak tukon Yakub tukon sasaibino konabi mombesi doi Mian Bisa na Dunia Boolu lalomo, komuyu naikon kokiil tukon balasusa sabab komuyu susuumuyu siniika tobuat! ²⁹Komian badaang naikon lubat doi tolopot tukon doi talise, doi lembet tukon doi lalom, tukon naikon mbesi-mbesi doi Mian Bisa na Dunia Boolu. ³⁰Kona tutuuwan, daano komian doibundu naikon teali mian tumbeno, tukon daano komian tumbeno naikon teali mian doi bundukon.”

Yesus nasoyang doi Yelusalem

(Mat. 23:37-39)

³¹Doiya kosinggato koidan, daano kobubulaa ko Falisi miano lubat doi Yesus tukon bantile, “Inai podungol naimbaa! Podampas doi tempat bailong, sabab Helodes yase akateyo ikoo.”

³²Yesus timbiliyo, “Poampakono bontiikene doi mian mo akiyo kona totuukoo, ‘Oloyo nia tukon namodoa yaku siikayo koibiliis tukon aline komian moseselon, bai doi oloyo kotoluno, yaku naikon alapayo daku limang.’ ³³Mau kai nabuno doiya yaku sio kubangadudulkene koidan daku ampakonan oloyo nia, modoa tukon modoa niuwan, sabab aki namonondok komeeng konabi moinakate doi Yelusalem tonggulungo.

³⁴Yelusalem, Yelusalem! Nabi-nabi ikoo akateyo! Mian Bisa nasosumbo'ii ikoo sakule batu polong pomatekon! Bulaamo luunggon yaku yase modagaiyo sasaibino komu mian bunu manuk tinano soloupiyo kona pau doi kapilo adeno, bai ikoo aki muyase! ³⁵Tobikon doiya ko Mian Bisa akimo koidan nalolainge ikoo. Potoiyo, tambuun diabudodoo ikoo akimo naikon mukitayo yaku koidan, polong ikoo bantile, ‘Binalakaati yana mo lubat tukon Temeneno sambuno!’ ”

Yesus aline komeeng komian moseselon

14 Doi oloyo Tadean Yesus ampakon kaan doi meeng kopau langkai Falisi miano nabonua. Ido komian palatikanggene Yesus tukon mono-monondok. ²Maka lubat doi Yesus komeeng komian mo seselon balat koaino tukon limano boboongan. ³Maka Yesus mansadai doi gulu-gulu agama tukon doi Falisi-falisi miano mo daano idoo, “Manulut nda agama naatulan, moola kai kita aline komian moseselon doi oloyo Tadean kai aki?”

⁴Gulu-gulu agama tukon Falisi-falisi miano aki nabiyok. Maka Yesus uange do mianoo tukon aline yana, doibundu sumboliiyo yana ampakono. ⁵Lapamo doiya Yesus bantile doi mian, “Kalu

andeno meeng komian doi komuyu daano komeeng kona pau kai meeng kosaapi mo otuwong doi bubung lalomo doi oloyo Tadean, oilakai yana aki naikon namosobit kibute natobuat do paudoo kai do saapidoo doi oloyodoo koidan?”

⁶Bai akiyo komeeng komian momoola timbiliyo Yesus tentang do langgedoo.

Moloyos konoano tukon yase mebee

⁷Yesus kitayo daano komian lubat mo molilik tempat-tempat mo monondok tuuno. Tobikon doiya yana beekene naotunggulia doi yanila sasaibino. ⁸“Kalu kai komuyu kinolo doi lamean baasowaanan, inai poampakon osulang doi kulsi momonondok. Sabab inai-inaikene daano komeeng komian bailong mo lobian ponting doi komuyu molapamo kinolo koidan, ⁹maka do bonuadoo tumbuno mo lapamo koloyo komuyu luadoo, tobikon lubat doi komuyu tukon bantile, ‘Maaf, tampatia lapamo sinadiakon tuuk doi mian molubato.’ Maka tukon mamaa tuuno ikoo tapakisaa osulang doi tempat mo bunduno tuuno.

¹⁰Tobikon doiya kalu komuyu kinolo, piliyo kotampat mo doibundu tuuno, sulano kobonua tumbuno naikon nalubat tukon bantile doikoo, ‘Tulanggu mai osulang doi tempat mo lobian kona monondokan.’ Tukon kalu bunu doiya komuyu inodotii doi sasaibino komian molubat bailong salaano. ¹¹Sabab meeng komian mo katandake kobutongo naikon inekepende, bai komo ekependeyo kobutongo naikon inakatandak.”

¹²Maka Yesus bantile doi bonuadoo tumbuno, “Kalu kai ikoo koloyo komian motuuk doi lamean kaanan oloyo kai kaanan popook, inai mokolo tulamu kai utus, kai puli-puli, kai mupokoolanian mo kaasa. Sabab yanila naikon koloyo ikoo koidan, tukon kalu bunomo doiya ikoo mantalimamo posobolino domu kokubaidoo. ¹³Jadi kalu ikoo mokubai lamean, koloyo komian motalalais, mian mosasaton, mian molemat, tukon mian mopiit. ¹⁴Ikoo naikon binalakaati, sabab do mianoo aki naikon namoola soboliyo komu monondokan. Komu monondokan naikon Mian Bisa komo soboliyo doi tembo komian monondok nainotuboiyan doi matean.”

Andean lamean mo babasal

(Mat. 22:1-10)

¹⁵Doiya singgat daano komeeng komian mo kaan polaing-laing idoo molongol Yesus nabantilan, yana bantile, “Untung tuuno komian naikon mo kaan polaing tukon ko Mian Bisa kalu yana lubat bunu Tomundo!”

¹⁶Bai Yesus bantile doi mianoo, “Daano kotembono meeng daano komeeng komian mokubai lamean mo babasal tukon mokoloyo badaang komian. ¹⁷Salataa laatemo kotembono motuuk doi natambuunano kona lamean, do mianoo sumboliyo kona peleleani ampakon doi mokinolo tukon bantile, ‘Polubato, sasaibino lapamo tasadia!’ ¹⁸Bai yanila sasaibino, meeng komian doi meeng komian bailong tambuuno mangkabi maaf. Kotumbeno bantile doi peleleanidoo, ‘Yaku sodo mongoli meeng kobuta tambuno, tukon palaluu kuampakon mopalesayo. Maafkanggene yaku.’ ¹⁹Kobailong bantile, ‘Yaku sodo mongoli lima kopasang kosaapi, tukon yaku soba-sobayo do saapi-sapidoo. Maafkanggene yaku.’ ²⁰Kobailong koidan bantile, ‘Yaku sodo osowaan, tobikon doiya yaku aki kumoola lubat.’

²¹Peleleanidoo mule tukon bontiikene do langgedoo doi natuan. Tuanoo nggimal tuuno, maka bantile doi napeleleani, ‘Kosobiton ampakon doi loloon-loloon tukon kasangan-kasangan doi kota. Babayo doi sumai komian motalalais, komian mosasaton, komian mopiit tukon mian molemat.’ ²²Doibundu do peleleanidoo bantile doi natuan, ‘Tuan, tuan napalenta lapamo inapakonggon, bai kotampat daano badaang.’ ²³Maka do tuanoo bantile, ‘Poampakono doi loloon-loloon mobabasal tukon doi kasangan-kasangan doi kota tonggulungo, tukon osinggaange komian nalubat, sulano daku bonua namoono. ²⁴Poneneeke! Akiyo komeeng komian doi antala mianoo molubat mo lapamo kinolo naikon momakaan kinaan doi kulamean nia!’ ”

Meeng kopololaing natinoupi

(Mat. 10:37-38)

²⁵Badaang komian moampakon polaing Yesus. Yesus mbaleng tukon bantile doi yanila, ²⁶“Kalua komian molubat doi yaku, bai lobian kona seseangano kotinano, tamano, kona boloki, napau-

pau, utus-utuso, kai butongo susuungo, yana aki namoola teali kupololaing. ²⁷Mian mo aki nayase tanggunge kona sinempangan tukon lainge yaku, aki namoola teali kupololaing. ²⁸Kalu meeng komian doi komuyu yase kekendenge komeeng komenala, tantu yana naikon osulang moaite looluk kona ongkos sulano yana natoiyoo oilakai kona doy sukup sulano nakekendenge do menaladoo kai aki. ²⁹Sabab kalu tokita yana aki namoola kekendenge, banggokai kona pandasi lapamo kinubai, maka sasaibino komian mo kitayo do limangoo naikon kokumbite. ³⁰Yanila naikon bantile, 'Eh, namian nia kekendenge bai aki namoola alapayo!' ³¹Kalu meeng kotomundo mo daano kosongulo koloon kona suludadu yase poakate tukon tomundo bailong mo daano lua kolono koloon kona suludadu, tantu do tomundodoo naikon osulang pikikene looluk oilakai yana sukup bukuan sulano nalawane kona musudoo. ³²Kalu yana toiyo baikon yana aki nabukuan, tantu doi tembo namusu daano moodoon, yana naikon makapatu kona bito-bito sulano nakabiyo podame." ³³Doibundu Yesus bantile, "Bunomo doiya koidan tukon komuyu. Aki komeeng komian doi komuyudoo momoola teali kupololaing, kalu yana aki nakolubangkangene sasaibino."

Timuson mo matabal

(Mat. 5:13; Mlk. 9:50)

³⁴"Timusonoo monondok, bai kalu tealimo matabal, moola kai nakinotonoi koidan? ³⁵Akiyono kona totuuk koidan, mau motuuk doi asi, mau motuuk pupuk. Jadi tongo sinakukon tolong. Kalu daano kotolingaimuyu, ndongoliiyo!"

Domba mo lapus

(Mat. 18:12-14)

15 Daano kooloyo meeng, badaang kopakabi lulu tukon mian mo inaanggon lokis doi masalakat, lubat mondongolii Yesus. ²Falisi-falisi miano tukon gulu-gulu agama mangatambuuno nggimal-nggimal. Yanila bantile, "Seh, namian nia mantalima mian mo aki namonondok tukon koidan kaan polaing yanila!" ³Tobikon doiya Yesus salitaikene doi yanila koandean nia,



Domba mo lapus (15:4)

⁴“Kalu kai meeng komian doi komuyu daano kosakat kona domba, maka nalapus komeeng - oilakai naikon kona kinubai? Tutuu yana naikon otinggale do dombadoo mo siokolo siodoo doi padang bulung, tukon ampakon mo umboliiyo domo lapusoo polong laate. ⁵Tukon kalu yana pososunggenemo koidan do dombadoo, yana sanaang tuuno, tobikon yana tanggunge dombadoo doi bengeno, ⁶maka nababayo mule. Doibundu yana uange kotula-tulano tukon napokoolanikonan, tukon bantile, ‘Mai kita nda laba-laba. Daku domba mo lapus lapamo kuposunggene koidan!’ ⁷Nah, bunomo lakon koidan doi sulugaa daano kolaba-labaan mo lobian kona babasalan doi meeng komian mobaladosa mo badodoloon, maka baino doi mo sio kolono siodoo komian mo lapamo monondok tukon aki napalaluu badodoloon.”

Doy mo lapus

⁸“Kai ande kata meeng koboine daano kosongulo kona doy pelak, maka nalapus komeeng - oilakai naikon kona kinubai? Yana naikon suayo kona posi tukon salake kona bonua tukon umboliiyo doi yayaa polong pososunggene doydoo. ⁹Salataa yana pososunggene doydoo, yana uange kotula-tulano tukon napokoolanian, maka bantile, ‘Yaku sanaang tuuno molapamo

pososuungene daku doy mo lapus. Mai kita nda laba-laba!’
¹⁰Bunomo lakon kai koidan ko Mian Bisa namalaekat laba-laba kalu daano komeeng komian molokis mobadodoloon doi nalalim-lalim!”

Pau mo lapus

¹¹Yesus bantile koidan, “Daano komeeng kotama mo daano lua kona pau malaneno. ¹²Kopiyoto bantile doi yana, ‘Tama, beenggumo diabudodoo daku buat obos.’ Maka kotamano ebese kona buato doi napau molua. ¹³Bubulaa kooloyo doibundu do paudoo piyoto balukenemo kona obos pusakadoo maka ampakon doi lipu mo dodoon. Imbali yana akabusemo kona doy tukon tubo bebeamo. ¹⁴Sambuno kabuso kona doy sasaibino, teali doi lipudoo komalaalan tuuno, tobikon yana sakisaamo. ¹⁵Maka yana ampakon balimang doi meeng komian modungol idoo, mo sumboliiyo yana totooliyo kona babung doi naasi. ¹⁶Yana bunomo doiya kona malaalan maka baino kaane do babung-babungoo nakinaan. Mau kai yana namalaal, akiyo komeeng komian mobeena kaan doi yana. ¹⁷Doibundu yana toiyo tukon bantile, ‘Mian mo balimang doi tamanggu lobi-lobian kona kaanan, bai yaku dimbaa adukono mate laal! ¹⁸Yaku naikon lenggeto tukon ampakon doi tamanggu, tukon bantil doi yana: Tama, yaku baladosamo doi Mian Bisa tukon doi Tama. ¹⁹Akimo nateali koidan yaku inuanggon Tama napau. Anggapemo yaku meeng komian mobalimang doi Tama.’ ²⁰Maka yana lenggeto mule ampakon doi tamano.

Daano mododoon doi bonua, tamano kitayomo yana. Tukon napoloonganano tuuno tamano obuleng mololobotiyo, maka lebeke tukon umayo. ²¹‘Tama,’ do paudoo bantile, ‘yaku baladosamo doi Mian Bisa tukon doi Tama. Akimo nateali koidan yaku binantil Tama napau.’ ²²Bai kotamano uange kona peleleani-peleleani tukon bantile, ‘Mosobit! Mangala pakean mo monondok tuuno, maka popekeikene doi yana. Usokikene kosousolut doi limano saono tukon sapatu doi aino. ²³Lapa doiya mangala saapi napau mo malanak tukon keletemo. Kita naikon kaan tukon mbesi-mbesi. ²⁴Sabab daku pau nia lapamo mate, diabudodoo tubomo koidan; yana lapamo lapus, diabudodoo pinososuunggono koidan.’ Maka yanila tambuunemo kona balameanan.

²⁵Daanoon mobuno doiya, dopaudoo langgongo daanoon doi naasi. Salataa yana mule tukon loolanimo kobonua, yana lengele komusik alalo tukon osulengan. ²⁶Yana uange komeeng komian doi peleleanidoo, maka mansadai, 'Oila naiya komo daano doi bonua?' ²⁷Peleleanidoo timbiliyo, 'Tuan utuso piyoto abalimo! Tukon Tuan tamano mosumboliimo nakinolot kosaapi napau mo malanak, sabab yana lapamo laate kona pau daano mosalamat!'

²⁸Do pau langgongodoo nggimal tuuno tobikon yana akimo nayase usok doi nabonua. Maka kotamano tobuat tukon asi-asiyo yana nausok. ²⁹Bai yana bantile, 'Doi taum-taum lalomo yaku balimang kokobukuan tuuk doi Tamanggu. Aki nasidutu yaku bantayo ko Tamanggu napalenta. Tukon oilakai ko Tamanggu nabineekon doi yaku? Mau nabaino meeng kodomba akiyoon nasidutu ko Tamanggu beena doi yaku sulano kulame tukon tula-tulanggu! ³⁰Do Tamanggudoo napau lapamo akabuse ko Tamanggu nabuat tukon moluko mobalowa, bai sambuno yana abali, Tama menggeletene saapi napau mo malanak tuuk doi yana!' ³¹'Kupau,' tamano timbiliyo, 'ikoo daano sidutu dimbaa tukon yaku. Sasaibino daku lobo daano mulobo koidan. ³²Bai kita sio ndalame tukon tetedes, sabab domo utusomudoo piyoto lapamo mate, bai diabudodoo lapamo tubo koidan; yana lapamo lapus, bai diabudodoo lapamo pinososuonggon koidan.' "

Pangabos doy mo pandoi

16 Yesus bantile doi napololaing-pololaing, "Daano komeeng komian mokaasa. Yana daano komeeng komian kona pangabos doy mo ulusiyo kona buat. Do mianoo mokaasa malaat lapulan baikon kona pangabos doy akabusemo kona doy. ²Jadi yana uange dona pangabos doydoo tukon bantile, 'Oila nia yaku mo lengele tentang ikoo? Diabudodoo salakanggene doi yaku kolapulan mosukup tentang mubalimangan moulusiyo daku buat. Ikoo aki namoola teali koidan pangabos daku doy.' ³Maka do pangabos doydoo bapikil, 'Yaku sio oila daku kinubai diabudodoo? Daku tuan yase mobeletiyoyaku. Bapasolan, yaku aki kubukuan; bakaikabi, yaku maaaa. ⁴Yaku daano daku akal; kalu yaku naikon lapamo bineleti, yaku sio nadaano badaang kotulanggu mo yase asambuwo yaku doi yanila nabonua!' ⁵Jadi do pangabos doydoo uange memeeng komian mo basamea doi natuan. Doi mo tumbeno, yana bantile, 'Bulaa komu samea

doi kutuan?’ ⁶Do mianoo timbiliyo, ‘Sakat kogumbang kolisison Zaitun.’ Do pangabos doydoo bantile doi yana, ‘Nia komu samea sulato. Osulango tukon mosobit mutulise; lima kolono.’ ⁷Doibundu yana bantile doi mian koluano, ‘Tukon Utus, bulaa Utus nasamea?’ Do mianoo timbiliyo, ‘Sololoon kokalung gandum.’ Do pangabos doydoo bantile doi yana, ‘Nia komu samea sulato. Tulisemo alu kosakato.’

⁸Maka dopangabos doydoo nadungolan mo aki najujul nggaalemo kona pangabos doydoo sabab dona tindakanoo mo pandoikene; sabab komian doi dunia nia lobian kona pandoiyan moatule yanila naulusan doi mian mo tubo doi madialan lalomo.”

⁹Maka Yesus basilingan koidan, bantile, “Ndongoliiyo! Popakeyo nadunia nia nalobo sulano namalaat tulano, sulano kalu nadunia nia nalangge akiyono koanggano koidan, komuyu naikon tinalima doi lipu dungolan mo posidutukon. ¹⁰Mian mo moola inangga doi langge-langge mopoipoisik lalomo, moola nainangga koidan doi langge-langge mobabasal. Bai komian mo aki namoola inangga doi langge-langge mopoipoisik lalomo, aki namoola inangga doi langge-langge mobabasal lalomo. ¹¹Jadi, kalu manganai nadunia nia lalomo nalangge komuyu akimo namoola inangga, indee komo yase monggianggekene doikoo kokaasaan lohani? ¹²Tukon kalu manganai mian bailong nalangge, komuyu tokitamo aki namoola inangga, indee kai komo yase mebee doikoo oilamo komo teali mulangge?

¹³Akiyo komeeng komian moola balimang tuuk doi lua kobalimangan. Sabab yana naikon lobian kona seangano komeeng tukon doi mo bailongoo, kai yana naikon lobian kona satiaan doi nabalimanganoo mo meeng tukon doi bailongoo. Bunomo lakon doiya koidan tukon komuyu. Komuyu aki namoola balimang motuuk doi Mian Bisa tukon motuuk doi buat.”

Yesus nabantil-bantilan

(Mat. 11:12-13, 5:31-32; Mlk. 10:11-12)

¹⁴Falisi-falisi miano ndongoliiyo sasaibino komo Yesus bantile. Maka yanila kokumbite, sabab yanila yase kodoy. ¹⁵Bai Yesus bantile doi yanila, “Komuyumo komian motokita talakana doi

mian bailong salaano, bai ko Mian Bisa toiyo konoamu antoko. Sabab oila kobanggapi nainaanggon tatandak, ko Mian Bisa napokita pepende.

¹⁶Musa naatulan bineekon tukon nabi-nabi naotunggul, tataap pinake polong doi tembo Yohanes Pasau Mian. Salataa doiya kosinggato Bilita Monondok tentang bulaando ko Mian Bisa namapalentaan pokakana ko Tomundo binabilitakon banggadudul. Tukon komian pakisaayo kobutongo sulano nateali Mian Bisa namian. ¹⁷Bai tadukai timbu tukon buta komo mumuda kona lapusan, luwedoi meeng kohuluf ko Mian Bisa naukum lalomo aki nateali.

¹⁸Indee komo tinggale kona boloki maka naosowaan doi boine bailong, do mianoo balasina. Tukon komian mo osowaan tukon boine mo lapamo tingingal, balasina koidan.”

Mian mokaasa tukon Lazalus

¹⁹“Daano komeeng komian mo kaasa. Kona pakean pomaalingi, tukon kona tuboan samba kooloyo sanaang. ²⁰Doi nabonua tataapono salaano inosulang komeeng komian motalalais kosambuno Lazalus. Kobutongo moonoo dedeng. ²¹Yana yase totuiyo kotiano tukon ndemel puputo mo otuwong doi mianoo mokaasa nameda. Koasu lubat modalepe kona dedeng.

²²Mian motalalaisoo doibundu mate maka malaekat babayo doi tempat mosanaang doi Abalaham bibilo doi sulugaa. Mianoo mokaasa mate tukon tinadin. ²³Doi dunia mian momate yana sakisaa tuuno. Tukon do tembodoo yana mbalenge imbali doi bungkok, yana kitayo Abalaham doi tempat mo odoon tukon Lazalus daano doi Abalaham bibilo. ²⁴“Tama Abalaham!” do mianoo mokaasa nabantilano. “Seseange yaku. Sumboliiyo Lazalus nasemeke kolimano saono doi paisu lalomo maka nalubat mbetokiiyo koalepongu. Yaku sakisaa tuuno doi aung lalomo nia!”

²⁵Bai Abalaham timbiliyo, ‘Neneeke ikoo daku pau: doi mutuboan ikoo lapamo laate sasaibino komo monondok, bai Lazalus laate komo lokis. Diabudodoo yana sanaang dimbaa, tukon ikoo sakisaa. ²⁶Sangalaasan doiya doi nda pokalatanan ikoo tukon kami lapamo kinubai komeeng komotombing mo

babasal, sulano komian dimbaa aki namoola ampakon indoko tukon mian indoko aki namoola lubat doisumai!’²⁷ ‘Kalu buno doiya, Tama,’ do mianoo mokaasa nabantilano, ‘yaku kabiyo tukon tutuu Tama nasumboliiyo Lazalus doi tamanggu nabonua.’²⁸ Daano kolima koutusonggu idoo. Sumboliiyo Lazalus naingotiikene yanila, sulano inai napolong yanila otuwong doi tempat mosakisaa nia.’

²⁹Abalaham timbiliyo, ‘Doi yanila daanomo Musa nabuku-buku tukon nabi-nabi! Sodiiyomo yanila naloingiyo oila komo totulis doi bukudoo lalomo!’³⁰ Bai do mianoo mokaasa timbiliyo, ‘Doiya aki nasukup, Tama Abalaham. Bai kalu daano komian momate motubo koidan tukon lubat doi yanila, yanila naikon badodoloon doi yanila nalalim-lalim.’³¹ Bai Abalaham bantile, ‘Bai kalu yanila aki napopusinggene Musa napalenta tukon nabi-nabi, pasti yanila aki naikon namangangga koidan, mau nadaano komian momate mo tubo koidan.’”

Langge-langge mo mangaanikene komian mokubaiyo kolalim

(Mat. 18:6-7, 21-22; Mlk. 9:42)

17 Yesus bantile doi napololaing-pololaing, “Langge-langgedoo mo mangaanikene komian mokubaiyo kolalim tutuu naikon daano. Bai silakamo kai komian mo mangaanikene!² Tadukai kalu kobatu gilingan nabinoboikon doi bulungo, maka nasinakukon doi tobun lalomo kalu baino yana mangaanikene komeeng komian doi mian-mian mopoipoisik nia mokubaiyo kolalim.³ Tobikon doiya, pobadagai!

Kalu koutusomu baladosa, anuukene yana. Kalu yana manasal, ompuniyo yana.⁴ Kalu yana baladosa doikoo pitu luunggon meeng kooloyo tukon samba-samba luunggon nalubat doikoo tukon bantile, ‘Yaku mangkabi maaf,’ ompuniyo yana.”

Tentang manganggaan

⁵Kolasul bantile doi Temeneno Yesus, “Temeneno, ekeenggele komai manganggaan.”⁶ Temeneno timbiliyo, “Kalu komuyu kopo manganggaan kona kabasalan bunu mostol batuno, komuyu moola pobantile doi kayung mulbei nia batango, ‘Ikoo tokibut tukon tatanom doi tobung,’ pasti do kayungoo batango nia naikon loingiyo komu palenta.”

Meeng kopeleleani nalimang

⁷“Kalu andeno meeng komian doi komuyu daano kopeleleani mo bapajeko doi asi kai padagai domba. Kalu naikon do peleleanidoo abali, oilakai yana bantil doi yana, ‘Mai mosobit kaan’? ⁸Tantu aki! Kobaliko yana naikon bantile doi yana, ‘Sadiayo daku kinaan. Pakeyomo kopakean mo bilisii tukon totiiliyo yaku daano yaku mokaan tukon monginum; salataa lapa doiya ikoo moolamo mukaan.’ ⁹Peleleanidoo aki napalaluu nanggimal sabab lapamo loingiyo kona tuan napalenta, bolikon? ¹⁰Bunomo koidan komuyu. Kalu komuyu lapamo lakukene sasaibino komo pinalentakon doikoo, bantile, ‘Kami tolongo peleleani biasa; kami tongo lakukene komai limang!’”

Yesus aline kosongulo komian

¹¹Yesus naampakonan doi Yelusalem, loloiyo kosipato kolipu Samalia tukon Galilea. ¹²Salataa usok doi meeng kokampung, yana linubotii songulo komian mo seselon kokulito mo minosikiton. Yanila kokondong doi naadoonan ¹³tukon nggeleamon, “Yesus! Tuan! Seseange kami!”

¹⁴Salataa Yesus kitayo yanila, yana bantile, “Poampakon doi imam, kabiyo yanila napalesayo kobutomuyu.”

Daano yanila moampakon, lapuso yanila nasesel. ¹⁵Salataa meeng komian doi yanila toiyo baikon yana lapamo tangalin, yana abali laba-laba nggaale ko Mian Bisa. ¹⁶Maka doi Yesus salaano, yana sosuba tukon bakinatauan doi yana. Do mianoo meeng ko Samalia miano. ¹⁷Doibundu Yesus bantile, “Bolikon kai daano kosongulo komian komo inalin? Inaando domo siodoo koidan? ¹⁸Bulaando motongo namian nia mo lubat komo abali bakinatauan doi Mian Bisa?” ¹⁹Maka Yesus bantile doi mianoo, “Banguno, tukon ampakono. Sabab ikoo manganggamo doi yaku, ikoo tangalin.”

Tembono Mian Bisa lubat sulano namapalenta

(Mat. 24:23-28, 37-41)

²⁰Bubulaa ko Falisi miano mansadai doi Yesus koiyano ko Mian Bisa nalubatan sulano namapalenta. Yesus timbiliyo, “Mian Bisa namapalentaan aki natambuune tukon palo-paloosan

mo moola mian kitayo, ²¹tobikon komian moola bantile, ‘Mai kitayo, naiyamo yana!’ kai, ‘Imbali yana!’ Sabab ko Mian Bisa lapamo atambuune kona namapalentaan doi komuyu.”

²²Salataa lapa doiya Yesus bantile doi napololaing-pololaing, “Naikon lubat kotembono komuyu yase mokita meeng kooloyo moluwedoi Manusia Napau naoloyo-oloyo, bai komuyu aki moola kitayo. ²³Sio mian naikon nabantile doikoo, ‘Kitayo, idoo!’ kai, ‘Kitayo, dimbaa!’ Bai inaikai komuyu potobuat umboliiyo yana. ²⁴Buno kai kodidip tebeas doi timbu, tukon lalaangan doi samba kolipu, bunomo koidan kondoongo Manusia Napau doi oloyono. ²⁵Bai kotumbe-tumbeno yana sio nasinakisaa badaang tukon aki natinalima doi mian mobadaang doi lounu nia. ²⁶Doi oloyono Manusia Napau nainokitakonan, kondoongo bunu doi lounu Nuh looluko. ²⁷Mian kaan monginum, tukon osowaan; bunomo doiya kai banggadudul-banggadudul polong Nuh nausokon doi kapal lalomo tukon kolomba lubat tukon komian sasaibinodoo mate. ²⁸Koidan bunu doi lounudoo Lot. Komian kaan monginum, poboluki, basakakon tukon mokubai bonua. ²⁹Bai salataa Lot tobuat doi Sodom, doiya oloyodoo aung tukon balelang obulus luwedoi timbu tukon akateyo yanila sasaibino. ³⁰Bunomo lakon kondondoongo naikon kooloyono Manusia Napau nainokitakonan.

³¹Doi oloyodoo komian mo daano doi nabonua atono bunggono inaimo naobulus sulano naalayo kona lolonggu doi nabonua lalomo. Bunomo koidan komian mo daano doi naasi inaimo naabali doi nabonua. ³²Neneeke oilamo komo lapamo teali tukon Lot naboloki! ³³Mian mo kakaate mosalamatene kona tuboan, naikon lapus kona tuboan. Bai komian mo lapus kona tuboan naikon salamat. ³⁴Anggayomo: Doi popookoo, lua komian daano momoolo doi meeng kokoi, meeng komian naikon binaba tukon komeeng komian koidan inotinggal. ³⁵Lua koboine daano mobagiling gandum, meeng komian naikon binaba tukon komeeng komian koidan inotinggal. [³⁶Lua komian daano balimang doi naasi, meeng komian naikon binaba, tukon komeeng komian koidan inotinggal.]”

³⁷Yesus napololaing-pololaing mansadai, “Naando doiya naikon kona tealian, Temeneno?”

17:26: Teal. 6:5-8 17:27: Teal. 7:6-24 17:28-29: Teal. 18:20-19:25

17:31: Mat. 24:17-18, Mlk. 13:15-16 17:32: Teal. 19:26 17:33: Mat. 10:39, 16:25, Mlk. 8:35, Luk. 9:24, Yoh. 12:25

Yesus timbiliyo, “Naando kona daanoan kobadan, idoo daano kotomisi mokaane kobadan.”

Andean balu tukon hakim

18 Salataa lapa doiya Yesus basalitakene komeeng koandean sulano naotunggule kona pololaing-pololaing sulano yanila nasidutu sambeang tukon posusa konoamuyu. ²Yesus bantile, “Doi meeng kokota daano komeeng kohakim mo aki namatakutene ko Mian Bisa, tukon aki napopusinggon mau indee komiano koidan. ³Doi kotadoo daano koidan komeeng kobalu mo sidutu momeenggon mangadap doi hakimoo mokabiyo kona ulusan nabinela. ‘Tulungiyu yaku moposasalaan daku lawan,’ baludoo bantile. ⁴Bubulaa kona kalumbit do hakimoo aki nayase tulungiyu do baludoo. Bai doibundu do hakimoo bapikil, ‘Mau kai naaki kumatakutene ko Mian Bisa tukon aki kupopusinggon mau doi indee komiano, ⁵bai sabab nabalua nia sidutu ngganggue yaku, tadukai yaku belayo kona ulusan. Kalu aki, yana naikon sidutu momeenggon lubat tukon kubaiyo susa yaku.’”

⁶Maka ko Temeneno bantile, “Popalaticanggene oila kona binantil do hakimoo mo aki naadil! ⁷Nah, oilakai ko Mian Bisa aki naikon nabelayo kona mian susuungo naulusan mo bantile doi yana oloyo tukon popook? Oilakai yana naikon tunda-tundayo kotembono sulano natulunge yanila? ⁸Anggayomo: Yana naikon belayo mosobit yanila naulusan! Bai kalu naikon Manusia Napau lubat, oilakai naikon daano mopinososunggon komian mo mangangga doi yana doi dunia nia?”

Andean Falisi miano tukon pakabi lulu

⁹Yesus basalitakene koidan naandean nia mo inotuuk doi mian mo kitayo komian bailong aki nalobian doi yana, bai anggayo baikon kobutongo susuungo monondok. ¹⁰Yesus bantile, “Daano kolua komian mo ampakon doi Temeneno Nabonua sulano napo sambeang. Komeeng Falisi miano, kobailong meeng kopakabi lulu. ¹¹Do Falisidoo miano kokondong basusuunganggon maka sambeang, ‘Oh Mian Bisa, yaku mopolonggon kinatauhan doikoo, sabab yaku aki kubuno mian bailong, mo modoko, bangakakon, kai balolowa. Yaku basyukuul sabab yaku aki kubuno do pakabi luludoo. ¹²Yaku bangapatai lua luunggon meeng kominggu, tukon yaku sosubakene doikoo songulo

koobos doi sasaibino daku pandapatan.’ ¹³Bai do pakabi luludoo dodoon kona kokondongan tukon aki nabalani lelengea doi timbu. Tukon soiyo kooyopo yana bantile, ‘Oh Mian Bisa, seseange yaku, mian mobaladosa nia!’ ”

¹⁴“Poanggayomo,” Yesus bantile, “salataa mule doi bonua, do pakabi luludoo doiyamo ko Mian Bisa natinalima tukon bolikon do Falisi mianoo. Sabab memeeng komian mo atandake kobutongo naikon inekepende; tukon memeeng komian mo ekependeyo kobutongo naikon inakatandak.”

Yesus balakaatiyo kolabuk-labuk

(Mat. 19:13-15; Mlk. 10:13-16)

¹⁵Daano komian mobabaya kona labuk-labuk pauno doi Yesus sulano yana taape tukon balakaatiyo yanila. Salataa Yesus napololaing-pololaing kitayo doiya, yanila nggimoliyo do mianoo. ¹⁶Yesus uange do labuk-labukoo maka bantile doi napololaing-pololaing, “Sodiiyomo kolabuk-labuk nalubat doi yaku! Inai popantane yanila, sabab mian mobuno nia komo teali anggota Mian Bisa namian. ¹⁷Neneeke! Mian mo aki nalubat doi Mian Bisa bunu meeng kolabuk, aki naikon nateali anggota Mian Bisa namian.”

Tentang mian mokaasa

(Mat. 19:16-30; Mlk. 10:17-31)

¹⁸Meeng kotua-tua Yahudi mansadai doi Yesus, “Tama Gulu mo monondok, yaku sio oila daku kinubai sulano namoola mantalima tuboan mobisa tukon posidutukon?”

¹⁹“Bulaando ikoo mobantile yaku monondok?” Yesus sadaiyo doi yana. “Akiyo komo monondok, tongo Mian Bisa susuungo. ²⁰Ikoo lapamo toiyo ko Mian Bisa napalenta-palenta: ‘Inai mobalolowa, inai mangakate, inai pondikuk, inai moteali sakisii mokala-kala, tukon odotiiyo kotamamu tukon tinamu.’ ”

²¹“Sasaibino do palentadoo lapamo yaku loingiyo salataa doi kupaumalanekonan,” do mianoo bantile.

²²Molongol doiya, Yesus bantile, “Daano komeeng kolangge mo sio ikoo kubaiyo: Balukene sasaibino komu buat, beekene kodoyno doi mian motalalais, tukon ikoo naikon malaat buat

doi sulugaa. Lapa doiya lubato lainge yaku.” ²³Bai salataa do mianoo lengele doiya, yana susa sabab yana kaasa tuuno.

²⁴Yesus toiyo do mianoo susa konoano, tobikon doiya yana bantile, “Maaling tuuno komian mokaasa nateali anggota Mian Bisa namian! ²⁵Tadukai meeng kounta gampang tuuno nausok doi pakaut buango, kalu baino meeng komian mokaasa nausok doi Mian Bisa na Dunia Boolu.”

²⁶Mian badaang mondongolii Yesus mobantile buno doiya mansadai, “Kalu buno doiya, indee komo moola selamat?”

²⁷Yesus timbiliyo, “Komo aki nateali doi banggapi, teali doi Mian Bisa!”

²⁸Maka Petulus bantile, “Kitayo! Kami lapamo tinggale komai boloki tukon labuk sulano mai malaing Tama.”

²⁹“Pomangangga!” Yesus bantile, “Mian mo lapamo tinggale kona bonua kai naboloki, kai utuso kai tamano tinano kai nalabuk-labuk sabab leleaniyo ko Mian Bisa, ³⁰do mianoo naikon sinoboli bulaa luunggon kolipato naiya budodoo, tukon doi lounu naikon molubat yana naikon bineekon kotuboan mobisa tukon posidutukon.”

Yesus basalitakene tuuk kotolu luunggon tentang namatean

(Mat. 20:17-19; Mlk. 10:32-34)

³¹Yesus pototongikene kona pololaing-pololaing mosongulo lua, maka bantile, “Ndongoliiyo! Kita diabudodoo ampakon doi Yelusalem. Imbali, sasaibino konabi-nabi natinulis manganai Manusia Napau naikon tealimo. ³²Yana naikon sinalakanggon doi mian mobolikon Yahudi, naikon mo sosiboliiyo, totulaiyo tukon tupeiyo yana. ³³Yanila naikon sakisaayo tukon akateyo yana, bai doi oloyo kotoluno, yana naikon tubomo.”

³⁴Sasaibino doiya aki naminangalatikon mau soisik doi Yesus napololaing-pololaingoo. Koalatino dona bantil-bantilanoo sinookonikon doi yanila. Yanila aki natoiiyo yana basilingan tentang oila.

Yesus aline meeng komian mopiit bakaikabi

(Mat. 20:29-34; Mlk. 10:46-52)

³⁵Sambuno Yesus adukono polong doi Yelikho, meeng komian piit daano moosulang bakaikabi doi loloon bibilo. ³⁶Salataa yana ndongoliiyo komian mobadaangoo moalon, yana mansadai, “Daano kooila?”

³⁷“Yesus, Nasalet mianoo, alon,” yanila bantile doi yana.

³⁸Maka do mianoo mopiit nggeleamon, “Yesus, Daud napau! Seseange yaku!”

³⁹Mian-mian mo doi muka, nggimoliiyo tukon sumboliiyo yana natade. Bai yana kabasale kona nggeleamonan, “Daud Napau! Seseange yaku!”

⁴⁰Yesus tade tukon sumboliiyo komian babayo do mianoo mopiit doi yana. Salataa yana polong Yesus mansadai, ⁴¹“Oila komu iniyas yaku mo kubaiyo tuuk doikoo?”

“Tuan,” do mianoo mopiit timbiliyo, “yaku yase mokita.”

⁴²Maka Yesus bantile, “Kalu buno doiya, kitayo! Sabab ikoo mangangga doi yaku, ikoo tangalin.”

⁴³Doiya kotembono yana moolamo mokita, maka yana lolainge Yesus tukon bakinatauwan doi Mian Bisa. Sambuno do mianoo badaang kitayo do langgedoo, yanila sasaibino nggaale ko Mian Bisa.

Yesus tukon Zakheus

19 Salataa Yesus polong doi Yelikho, yana ampakon banggadudul pintosiiyo do kotadoo. ²Doi kotadoo daano komeeng kopakabi lulu kapalano mo kaasa. Kosambuno Zakheus. ³Yana yase kitayo indee komiano doi Yesusoo, bai sabab komian todudul badaang tukon yana susuungo pepende, maka yana aki namoola kitayo Yesus. ⁴Jadi, yana obuleng mantailukonio domianoo maka liba doi meeng kokayung, sulano namoola kitayo Yesus naapa koidan naikon mo alon idoo. ⁵Sambuno Yesus polong doi kayungoo, yana kitayo doi bungkok maka bantile, “Zakheus, obulus mosobit! Sabab yaku sio kulubat doi mubonua oloyo nia.”

⁶Zakheus moso-mosobit obulus maka talimayo Yesus tukon sanaang. ⁷Sasaibino komian mo kitayo do langgedoo tambuuno mondummuk. Yanila bantile, “Sse! Yana ampakon sambu doi mianoo mo aki namonondok nabonua!”

⁸Doibundu doi nabonua, Zakheus kokondong tukon bantile doi Yesus, “Temeneno, sembeleng daku buat naikon yaku beekene doi mian motalalais; tukon doi indee komian mo biasamo yaku tipuwo, naikon yaku bayale koidan doi yana sangkap luunggon kolipato!”

⁹Maka Yesus bantile, “Naiya kooloyono ikoo tukon sasaibino boloki tukon labuk Mian Bisa salamatenemo tukon binee tuboan



Ala batango langaano (19:4)

mo boolu, sabab ikoo koidan Abalaham nakatulunan. ¹⁰Manusia Napau lubat sulano umboliiyo tukon salamatene komian mo tapa.”

Andean doy mosoni

(Mat. 25:14-30)

¹¹Daano komian momondongolii Yesus mobasilingan, yana basalitakene komeeng koandean. Sabab, doiya kosinggatooyana daano moloolani ko Yelusalem, tukon komian aanggene baikon ko Mian Bisa mosobit naikon namapalenta buno Tomundo doi dunia. ¹²Yesus bantile, “Daano komeeng komian moinodotii mo ampakon doi lipu mo odoon sulano nabiningkat teali tomundo, doibundu abali. ¹³Akiyoon naluwe yana uange songulo komian napeleleani, maka beena yanila meeng-meeng posindool doy mosoni. ‘Pobadagango tukon nia doy nia modaanon yaku moampakon,’ kona bantilano doi yanila. ¹⁴Bai do lipudoo tumbuno misikitene yana. Jadi sambuno lapa yana luwe, yanila makapatu sosumbolii sulano napopitoikene, ‘Kami aki nayase namian nia nateali mai tomundo.’


¹⁵Bai do moinodotidoo biningkato teali tomundo, doibundu abali doi nalipu. Soisobiton yana uange kona peleleani-

peleleani namangadap, sulano natoiyoo bulaa kona untung yanila mo lapamo talimayo. ¹⁶Peleleani tumbeno lubat tukon bantile, 'Tuan, meeng komu doy mosoni Tuan nabineekon, yaku lapamo tealikene songulo.' ¹⁷'Monondok,' tuanoo bantile, 'ikoo peleleani momondok! Sabab langge-langge mo poipoisik ikoo moolamo inangga, yaku naikon tealikene ikoo kapalaiyo kosongulo kota.' ¹⁸Peleleani koluano lubat tukon bantile, 'Tuan, meeng kodoy mosoni Tuan nabineekon, yaku lapamo tealikene lima.' ¹⁹Tomundodoo bantile doi peleleanidoo, 'Ikoo naikon teali kapalaiyo lima kokota.' ²⁰Peleleani bailong lubat tukon bantile, 'Tuan, naiya Tuan nadoy; yaku abese doi lenso lalomo. ²¹Yaku matakutene doi Tuan, sabab Tuan mian mo balani. Tuan alayo oila komo bolikon Tuan koono, tukon Tuan mangala hasil doi lipu Tuan mo aki nabasakakon.' ²²Tomundodoo bantile doi yana, 'Ikoo peleleani mo lokis! Pokokonoi tukon mubantil-bantilan susuumu yaku naikon ukume ikoo. Ikoo toiyoo yaku mian mo balani: yaku alayo oila komo bolikon koonggunan tukon mangala hasil doi lipu mo aki kubasakakon. ²³Kalu bunoo doiyoo bulaa ikoo aki muusekene do doydoo doi bank sulano kalu naikon yaku abalimo yaku moola mantalima do doydoo tukon bungano?' ²⁴Doibundu tomundodoo bantile doi mianoo mo kokondong idoo, 'Alayo do doydoo doi yana tukon beekene doi peleleanidoo mo daano songulo kona doy maasoo.' ²⁵Bai mianoo bantile, 'Tuan, yana anomoo kosongulo.' ²⁶Tomundodoo timbiliyo, 'Neneeke: mian mo lapamo daano, doi yana naikon binee lobian badaang koidan. Bai mian mo aki nadaano mau meeng, oila komo daano doi yana inala koidan doi yana. ²⁷Tukon diabudodoo babayomo doi sumai daku musu-musudoo mo aki nayase yaku kuteali tomundo. Akateyo yanila sasaibino doi salaanggu!' "

Yesus usok Yelusalem tukon nggaangan

(Mat. 21:1-11; Mlk. 11:1-11; Yoh. 12:12-19)

²⁸Salataa Yesus bantilemo sasaibino doiyoo yana ampakon lukoniyo yanila moampakon doi Yelusalem. ²⁹Salataa loolanimo ko Betfage tukon Betania doi Zaitun Bunggulo, yana sumboliiyo lua kona pololaing ampakon loolukon. ³⁰"Poampakono doi kampungoo doi salaanggitadoo," Yesus bantile doi yanila, "kalu



Meeng kokeledai napau (19:30)

naikon komuyu usok imbali, komuyu naikon kitayo komeeng koadalan napau motokooton. Do adalanoo akiyoon nabiasa mian lokitiyo. Liate doi nakinootonan do adalanoo tukon babayo doi sumai. ³¹Kalu mian mansadai doikoo, ‘Bulaando komuyu mosodiiyo do adalanoo?’ bontiikene, ‘Temeneno palaluuwo.’”

³²Yesus napololaingoo molua ampakono, tukon laate sasaibino bisa buno dona binantilo. ³³Sodo yanila sodiiyo do adalanoo napau, kotumbuno bantile doi yanila, “Bulaando komuyu mosodiiyo do adalanoo?”

³⁴Yanila timbiliyo, “Temeneno palaluuwo.” ³⁵Maka yanila babayo do adalanoo napau doi Yesus. Doibundu yanila abese kona jubah doi adalanoo bungkuto maka tomboniiyo Yesus molakit doi bungkono. ³⁶Sodo yana alon tukon molokiti adalanoo, komian ambasene kona pai jubah doi loloon.

³⁷Salataa Yesus adukono polong doi Yelusalem, doi loloon mo tinokolui ko Zaitun Bunggulo, sasaibino kona pololaing-pololaing mo badaangoo tambuuno nggele-nggeleamon nggaale ko Mian Bisa tukon bakinatauwan doi yana sabab sasaibino komo minasaingdinggon lapamo yanila kitayo. ³⁸Yanila nggeleamon, “Binalakaati ko Tomundo mo lubat tobikon Temeneno sambuno! Namonondokan doi sulugaa, tukon natanggaalan ko Mian Bisa!”

³⁹Bubulaa ko Falisi miano doi antala mianoo badaang bantile, doi Yesus, “Tama Gulu, sumboliiyo Tama napololaing-pololaing natade.”

⁴⁰Yesus timbiliyo, “Poanggayomo! Kalu yanila tade, batu-batu nia naikon nggeleamon.”

Yesus kokiiliyo ko Yelusalem

⁴¹Salataa Yesus loolaniyomo tuuno ko Yelusalem, tukon kitayo do kotadoo, yana kokiiliyomo. ⁴²Bantile, “Mbalais, bulaando kona monondokan kalu oloyo nia ikoo toiyo oila komo moola lubatene kopodamean! Bai diabudodoo ikoo aki namoola kitayo. ⁴³Ikoo naikon toupiyo komeeng koloonu, naando komu musu kubaiyo kohalangan-halangan potikunggon ikoo; yanila naikon lobosiyo ikoo tukon desaaake ikoo doi sasaibino kopasu. ⁴⁴Yanila naikon akabuse ikoo polong sasaibino komu mian; tukon akiyo komeeng kobatu naikon yanila mosodiikene natosusun doi natangabosan, sabab ikoo aki mupalatikangene kotembono ko Mian Bisa nalubatan sulano nasalamatene ikoo!”

Yesus usok doi Temeneno Nabonua

(Mat. 21:12-17; Mlk. 11:15-19; Yoh. 2:13-22)

⁴⁵Yesus usok doi Temeneno Nabonua tukon tambuuno siikayo kopadagang-padagang idoo. ⁴⁶“Doi Kitab Moliyous lalomo,” yana bantile doi yanila, “totulis buno naiya: Mian Bisa bantile, ‘Daku bonua teali bonua sambeangan.’ Bai komuyu tealikene tempat pondikukan!”

⁴⁷Samba kooloyo Yesus mongotunggul doi Temeneno Nabonua lalomo. Imam-imam kapalano, tukon gulu-gulu agama, tukon katua-katua Yahudi yase akateyo yana, ⁴⁸bai aki namalaat loloon sulano nalakukanggene do langgedoo, sabab sasaibino

komian banggadudul mondongolii yana, tukon tatalik doi nabantil-bantilan.

Pasadai tentang Yesus nahaak

(Mat. 21:23-27; Mlk. 11:27-33)

20 Doi oloyo meeng, Yesus daanon mongotunggul tukon babilitakene ko Bilita Monondok moluwedoi Mian Bisa doi mian modaanon doi Temeneno Nabonua lalomo. Imam-imam kapalano, tukon gulu-gulu agama, polaing kokatua-katua Yahudi, lubat ²tukon bantile doi Yesus, “Soba bontiikene doi kami oila komu dasal mokubaiyo sasaibino nia? Indee komo beena haak doikoodoo?”

³Yesus timbiliyo, “Yaku yase koidan momansadai. Soba bontiikene doi yaku, ⁴Yohanes mansau mian tukon indee nahaak? Mian Bisa kai banggapi?”

⁵Maka yanila tambuuno mopopikilangene, “Kalu kita bantile, ‘Tukon Mian Bisa nahaak,’ yana naikon bantile, ‘Kalu buno doiya, bulaando komuyu aki pomangangga doi yana?’ ⁶Bai kalu kita bantile, ‘Tukon banggapi nahaak,’ sasaibino komian naikon sakule batu kita, sabab yanila anggayo baikon Yohanes meeng konabi.” ⁷Jadi yanila timbiliyo, “Kami aki mai toiyo.”

⁸Maka Yesus bantile doi yanila, “Kalu buno doiya mau yaku aki naikon kumobontiikon doikoo tukon indee nahaak yaku mokubaiyo sasaibino naiya.”

Andean polimang-polimang anggul asino

(Mat. 21:33-46; Mlk. 12:1-12)

⁹Yesus basalitakene doi mianoo, andean nia koidan, “Daano komeeng komian mo sakaiyo komeeng koanggul asino. Yana matambokene do asidoo doi bubulaa komo limange maka luwe taus doi lipu bailong tukon dungol malumbit idoo. ¹⁰Salataa laatemo kotembono bapupuiyan anggul saono, do asidoo tumbuno sumboliiyo kona peleleani doi polimang-polimango sulano natalimayo kona obos. Bai do polimang-polimango bobokiiyo do peleleanidoo tukon sumboliiyo yana mule tukon akiyo kona kinanggi. ¹¹Maka do asidoo tumbuno sumboliiyo koidan meeng kopeleleani bailong; bai do peleleanidoo binobokii koidan tukon do polimang-polimango totulaiyo,

maka sinumbolii mule tukon akiyo kona kinanggi. ¹²Doibundu do asidoo tumbuno sumboliiyo kona peleleani kotoluno. Bai do peleleanidoo binobokii koidan doi polimang-polimangoo tukon sinakukon doi asidoo tonggulungo. ¹³Doibundu do asidoo tumbuno bantile, ‘Yaku sio oila daku kinubai koidan? Yaku naikon sumboliiyo daku pau sineang susuungo. Tantu yana naikon yanila odotiiyo!’ ¹⁴Bai salataa do polimang-polimang asidoo kitayo do asidoo tumbuno napau, yanila pobotiiyonggon meeng tukon bailong, ‘Naiyamo yana komo haakiyo. Mai nda akateyo yana, sulano kita komo laate kona haak.’ ¹⁵Maka yanila boboiyo babayo doi asidoo tonggulungo maka yanila akateyo.”

Maka Yesus mansadai, “Nah, kalu do asidoo tumbuno abali, yana naikon oila kona kinubai doi polimang-polimangoo? ¹⁶Tantu yana naikon lubat tukon akateyo do polimang-polimangoo, maka nasalakangene do asidoo doi polimang-polimang bailong.”

Molongol doiya, bantilo komianoo doi Yesus, “Kona tutuuwan aki!”

¹⁷Yesus kitayo yanila maka bantile, “Kalu buno doiya, oila koalantino naiya ayatia doi Kitab Moliyous lalomo?

‘Batu mo aki napinake doi tukang bangunan, lapamo teali batu mo tutuu.’

¹⁸Sasaibino komian mo otuwong doi batudoo naikon manas; tukon indee do batudoo napinisa naikon mopipis teali ambata.”

Soal babealan lulu

(Mat. 22:15-22; Mlk. 12:13-17)

¹⁹Gulu-gulu agama tukon imam-imam kapalano toiyo baikon do andeanoo Yesus otuuke doi yanila. Tobikon doiya yanila yase lakoyo yana doiya singgat koidan, bai yanila matakutene komian badaang. ²⁰Jadi yanila mounggolii todanan mo monondok. Yanila matambo mian sulano nababunokon mian mo moloyos konoano, tukon sumboliiyo domianoo moodinggalayo Yesus tukon pasadai-pasadai, sulano yanila namoola salakangene yana doi haak tukon kakuasaan gubelnul. ²¹Maka do mianoo mo lapamo tinambo bantile doi Yesus, “Tama Gulu, kami toiyo baikon sasaibino Tama nabantilan tukon nainotunggukon bisa. Kami toiyo koidan Tama mongotunggul tukon natutuuwan

manganai Mian Bisa namongiasan motuuk doi banggapi, sabab Tama aki napiliyo komian. ²²Tobikon doiya soba Tama bontiikene doi kami, manulut palatulan nda agama, moola kai nda babeal lulu doi Tomundo kai aki?" ²³Bai Yesus toiy yanila naakal. Tobikon doiya yana bantile, ²⁴"Soba okitakene doi yaku komeeng kodoy pelak. Indee kai gambalo tukon sambuno naiya?"

"Tomundo!" yanila timbiliyo.

²⁵"Kalu bunu doiya," Yesus bantile doi yanila, "beekene doi Tomundo, oila komo Tomundo koono tukon komo doi Mian Bisa, oila komo Mian Bisa koono."

²⁶Tokita doi mian badaang salaandoo yanila aki namoola malaat meeng kokasalaan modaano doi Yesus. Yanila tongo tade tolong tukon masaingdingene kona potimbidoo.

Soal natuboan luwedoi matean

(Mat. 22:23-33; Mlk. 12:18-27)

²⁷Bubulaa kobenseno ko Saduki miano lubat doi Yesus. (Yanila doiyamo kobenseno napikilan baikon komian momate aki naikon natubo koidan.) Yanila mansadai doi Yesus, ²⁸"Tama Gulu, Musa tulise naukum nia tuuk kita: Kalu meeng komalamalane mate tukon akiyo kona pau, maka koutuso sio nakilayo kobaluno sulano nadaano kona tulunan doi mianoo mo lapamo mate. ²⁹Biasa daano kopitu komian montulutus. Kolanggongo osowaano, maka mate akiyon nadaano kona pau. ³⁰Doibundu koluno osowaan tukon baluno, bai yana koidan mate akiyo kona pau. ³¹Langge mo pokakana teali koidan tukon utuso kotoluno tukon banggadudul polong doi kopituno. ³²Doibundu do boinedoo mate. ³³Doi oloyono komian momate nainotuboiyan koidan, indee kai naboloki do boinedoo? Sabab domo pituiladoo lapamo pokila tukon yana."

³⁴Yesus timbiliyo, "Mian mo tubo nia budodoo osowaan, ³⁵bai mian mo moola sulano nainotuboi doi namatean, tukon tubo naikon doi lounu naikon mo lubat yanila aki naosowaan. ³⁶Kondoongo yanila bunu malaekat, tukon aki namoola mate. Yanila daano Mian Bisa napau-pau, sabab yanila inotuboi koidan doi namatean. ³⁷Musa susuungo okitakene tukon tontong baikon komian momate naikon inotuboi koidan. Doi natulisan

lalomo tentang do mosolotoo mokait yana bantile Mian Bisa pokakana 'Abalaham na Mian Bisa, Ishak na Mian Bisa tukon Yakub na Mian Bisa'. ³⁸Nah, do Mian Bisadoo bolikon mian mate na Mian Bisa! Yana mian-mian motubo na Mian Bisa! Sabab motuuk doi Mian Bisa, sasaibino komian tubo."

³⁹Bubulaa kogulu agama bantile, "Tama Gulu napotimbili monondok tuuno." ⁴⁰Tobikon yanila akimo nabalani koidan momansadaikene komeeng kolangge doi Yesus.

Soal Tomundo Pasalamat

(Mat. 22:41-46; Mlk. 12:35-37)

⁴¹Yesus mansadai doi yanila, "Bulaando kai momoola nabinantil baikon ko Tomundo Pasalamat Daud natulunan?"

⁴²Banggokai Daud susuungo bantile doi buku Mazmul lalomo,

'Temeneno bantile doi ku Temeneno:

Osulango doi bakalinganggu sembeleng,

⁴³ polong yaku tealikene komu musu-musu

taaluuk doikoo.'

⁴⁴Jadi kalu Daud bantile do Tomundo Pasalamatonoo, 'Temeneno', bulaando kona tealian yana mo Daud natulunan?"

Poingotii sulano bada-badagai doi gulu-gulu agama

(Mat. 23:1-36; Mlk. 12:38-40)

⁴⁵Daano komian molongol Yesus mobasilingan, yana bantile doi napololaing-pololaing, ⁴⁶"Pobada-badagai doi gulu-gulu agama. Yanila yase amba-ambakon tukon jubah mo bulusan, tukon yase inodotii doi labotan-labotan. Yanila yase kotampat-tampat motongodotii doi bonua kaleda lalomo tukon doi lamean-lamean. ⁴⁷Yanila kokoliyo kobalu-balu tukon lambase kona bonua. Tukon sulano napo tombukiyo doi yanila nakulokisanoo, yanila sambeang bulu-bulusan! Yanila naukuman naikon babalat!"

Meeng kobalu nasosubakon

(Mlk. 12:41-44)

21 Doi Temeneno Nabonua, Yesus kitayo komian mokaasa mousekene kona doy doi peti basosubakon lalomo.

²Yana kitayo koidan komeeng kobalu mo talalais tuuno,

mongusokon lua kodoy tambaga. ³Maka Yesus bantile, “Ndongoliiyo: nabalu nia mongusokon lobian kona kadaang doi sasaibino kobailong. ⁴Sabab yanila sasaibino beekene luwedo nalobianan kona buat. Bai nabalu nia, mau kai natalalais tuuno, beekene sasaibino komo daano doi yana moi yana palaluuwo susuungo tuuk doi natuboan.”

Yesus basilingan tentang Temeneno Nabonua naminanasan

(Mat. 24:1-2; Mlk. 13:1-2)

⁵Daano komian mo basilingan tentang bulaando ko Temeneno Nabonua namonondokan mobinubungai tukon batu mo monondok tukon langge-langge mo sinosubakon doi Mian Bisa. Maka Yesus bantile doi yanila, ⁶“Totiiliyo daano kotembono sasaibino komuyu mo kitayo nia naikon minanas; akiyono mau nabaino meeng kobatu dimbaa naikon mo totinggal tosusun doi natangabosan!”

Nasusaan tukon poloilokis

(Mat. 24:3-14; Mlk. 13:3-13)

⁷Yanila mansadai doi Yesus, “Tama Gulu, oilakai kotembono do langgedoo natealian? Tukon oilakai kopaloosano baikon molapamo polong kotembono do langgedoo natealian?”

⁸Yesus bantile, “Pobadagai, inai napolong komuyu inokolii. Badaang naikon komian molubat tukon babayo kosambunggu, tukon bantile, ‘Yakumo kai yana!’ tukon ‘Laatemo kotembono.’ Bai inaikai komuyu pololainge yanila. ⁹Inaikai koidan pomatakut kalu komuyu molongol kobilita tentang polobosian tukon ponggimakanan. Sasaibino doiya sio nateali loolukon. Bai doiya koalatio akiyoon baikon nalaate kotembono kona kiamatan.”

¹⁰Maka Yesus banggadudulkene kona salita, bantile, “Bangsadoo mo meeng naikon polobosi lawane kobangsa bailong, tukon negala momeeng naikon molobosio konegala bailong. ¹¹Doi yayaa naikon teali koleali mo babasal, silakaan malaalan tukon sesel. Naikon teali kolangge-langge mo minusikiton tukon mominatakauton doi timbu. ¹²Bai akiyoon sasaibino doiya nateali, komuyu naikon linako tukon sinakisaa. Komuyu naikon inadili doi bonua-bonua kaleda tukon inusokon doi talunggu lalomo. Tukon komuyu naikon sinalakanggon doi tomundo-tomundo salaano tukon mobalakuasa sabab komuyu kupololaing. ¹³Doiyamo komu todanan sulano mupelengene

ko Bilita Monondok moluwedoi Mian Bisa. ¹⁴Pobatetel baikon komuyu aki naikon pomatakut tentang oila komo sio pobantile motuuk doi mubelaano kobutomu. ¹⁵Yaku susuunggu naikon beena ikoo bantil-bantilan tukon pandoiyanoo, tobikon akiyo komeeng komian doi musu-musudoō momoola lawane kai akiyenggene oila kopo binantil. ¹⁶Komuyu naikon dinadaat doi tinamu tamamu, doi utus-utusomu, doi mumontolidanan tukon doi tula-tulamu. Kosoobos doi komuyu naikon yanila akateyo. ¹⁷Komuyu naikon minosikiton doi sasaibino komian sabab komuyu kupololaing. ¹⁸Bai meeng kobuuk doi olumu aki naikon nalapus. ¹⁹Kalu komuyu bataanggon tukon sabal, komuyu naikon selamat.”

Yesus basilingan tentang Yelusalem namanasan

(Mat. 24:15-21; Mlk. 13:14-19)

²⁰“Kalu komuyu kitayo ko Yelusalem suludadu namanasano, komuyu naikon toiyo baikon do kotadoo akimo namalumbit koidan naikon minanaso. ²¹Doiyo kosinggatoō siokai komian mo daano doi Yudea naobuleng doi bungkuko. Yanila mo daano doi kota lalomo sio natinggale do kotadoo, tukon yanila mo doi kota tonggulungo inai nausok doi kotadoo lalomo. ²²Sabab do oloyo-oloyodoo daano ‘Oloyo-oloyo Ukuman Nainotuwongan’, sulano tukon buno doiya tealimo oila komo lapamo totulis doi Kitab Moliyōus lalomo. ²³Bukan maen kona susaan do oloyo-oloyodoo motuuk doi boine mo tianan, tukon pau tinano mo daano mosusuwo kona pau! Nakampung nia naikon toupiyo kosusaan mo babasal, tukon ko Temeneno naikon ukume kobangsa nia. ²⁴Daano komo naikon inakate tukon sabel, daano koidan naikon komo binaba buno mian motinaan doi mian-mian nalipu; tukon mian mo aki natingoniiyo ko Mian Bisa naikon tudo-tudongiiyo Yelusalem polong kabus kotembono mo lapamo Temeneno tantukanggene tuuk doi yanila.”

Manusia Napau nalubatan

(Mat. 24:29-31; Mlk. 13:24-27)

²⁵“Totiiliyo doi oloyo, bituwon, tukon bituon-bituon pauno naikon natokita kopalo-paloosano. Doi dunia, kobangsa-bangsa naikon matakut tukon bingung mosasalaane kobokol alalo

tukon tobun liaako. ²⁶Kobanggapi naikon matakut tuuno mosasalaane oila naikon komo teali doi posaapon nadunia nia, sabab komo kuasaiyo kodapang naikon teali nggabut. ²⁷Doiyo kosinggatodoo Manusia Napau naikon lubat doi bunong lalomo tukon nakuasa tukon namonondokan mo babasal. ²⁸Kalu do langge-langgedoo tambuuno teali, banguno tukon bingkate koolumu, sabab naapa doiya koidan komuyu naikon sinalamatono.”

Ala batango teali meeng kootunggul

(Mat. 24:32-35; Mlk. 13:28-31)

²⁹Maka Yesus salitaikene doi yanila naandean buno naiya, kona bantilano, “Popalatikanggene koala batango tukon sasaibino kokayung batango bailong. ³⁰Kalu kolende-lendeno mulaimo tokita, komuyu toiyo baikon loolanimo koloonu napintalan. ³¹Bunomo koidan kalu komuyu kitayo do langge-langgedoo moteali, komuyu naikon toiyo baikon ko Mian Bisa mosobit naikon namapalenta buno Tomundo.

³²Potoiyo! Langge-langgedoo naikon teali akiyoon komian mo tubo diabudodoo nia mate sasaibino. ³³Timbu tukon buta naikon lapus, bai daku bantilan tataap posidutukon.”

Palaluu bada-badagai

³⁴“Dagaiyo kobutomu, inai napolong komuyu todudul nggabut bala-balamean tukon inume komo ininum momosopot, kai todudul pikikene kosoal-soal mutuboan, tobikon komuyu akipo batotobo salataa do oloyodoo sosinggoton tokita. ³⁵Sabab do Oloyodoo naikon lubat buno palako doi sasaibino komian doi dunia nia bungkono. ³⁶Pobada-badagai, tukon posambeang sidutu sulano komuyu pobukuan atasiyo sasaibino kolangge naikon mo teali tukon komuyu moola mangadap doi Manusia Napau.”

³⁷Yesus mongotunggul doi Temeneno Nabonua doi oloyo tukon doi popookodoo yana ampakon doi Zaitun Bunggulo tukon dungol idoo. ³⁸Samba kodowa-dowa sasaibino komian lubat doi Temeneno Nabonua sulano namondongolii Yesus naotunggul.

Pomeenggonan motuuk doi Yesus

(Mat. 26:1-5; Mlk. 14:1-2; Yoh. 11:45-53)

22 Lamekanano ko Loti Moakiyo kona Lagi mo sinombuikon Paskah naikon loolanimo. ²Imam-imam kapalano tukon gulu-gulu agama daano mounggolii loloon sulano Yesus nainakate secala aki natotoi, sabab yanila matakutene komian badaang.

Yudas yase dadaate Yesus

(Mat. 26:14-16; Mlk. 14:10-11)

³Doibundu Ibiliis usokiyo Yudas mo sinombuikon Iskaliot, doiyamo meeng komian doi songulo lua do Yesus napololaing. ⁴Tobikon doiya Yudas ampakon tukon pobisalai tukon imam-imam kapalano tukon padagai kapalano ko Temeneno Nabonua tentang bulaando yana namoola salakangene Yesus doi yanila. ⁵Yanila sanaang tuuno tukon dandiyo sulano nabeena doy doi yana. ⁶Yudas yasemo tukon tambuuno moumbolii todanan sulano nasalakangene Yesus doi yanila, tukon akiyo komian motoiyo.

Pasadiakon kinaan Paskah

(Mat. 26:17-25; Mlk. 14:12-21; Yoh. 13:21-30)

⁷Laatemo kooloyono ko Lamekanano ko Loti Moakiyo kona Lagi baikon kodomba kinolot sulano nakinaan doi Paskahdoo. ⁸Maka Yesus sumboliiyo Petulus tukon Yohanes, “Ampakono sadiayomo kokinaan Paskah motuuk doi kita.”

⁹“Inaando Tama nayasano komai sadiakanano?” yanila mansadai.

¹⁰Yesus timbiliyo, “Salataa komuyu usok doi kota, meeng komala-malane mo daano makanggi meeng koselekan moonoo paisu naikon pososuung tukon komuyu. Lainge yana doi bonua nausokan, ¹¹tukon bontiikene doi bonuadoo tumbuno; Gulu bantile, ‘Inaando kotampato sulano daku pololaing-pololaing tukon yaku makaan kinaan Paskah?’ ¹²Bonuadoo tumbuno naikon tudoikene doikoo komeeng kokombiang doi papak mo babasal, motasadiamo tukon lolongguno. Sadiayomo sasaibino indaa.”

¹³Maka Petulus tukon Yohanes ampakono maka laate sasaibino bisa buno doi Yesus nabantilano. Maka yaniladoo sadiayomo kokinaan Paskahdoo.

Temeneno napalajamuan

(Mat. 26:26-30; Mlk. 14:22-26; 1Kol. 11:23-25)

¹⁴Salataa laatemo kotembono motuuk makaanan kinaan Paskahdoo, Yesus poosulongii tukon napololaing-pololaing doi tempat palajamuan. ¹⁵Maka yana bantile doi yanila, “Yaku yase tuuno momakaan kinaan Paskah nia polong komuyu akiyoon kusakisaa. ¹⁶Sabab, poanggayomo: Yaku akimo naikon kumakaan nia koidan polong doi palajamuanoo alatino nai nokitakonon doi Mian Bisa na Dunia Boolu.”

¹⁷Lapa doiya Yesus bingkate kogalaas anggul, maka sambeang syukuul doi Mian Bisa, doibundu bantile, “Alayomo naiya, tukon ebe-ebesemo; ¹⁸sabab potoiyo: tambuun diabudodoo yaku aki naikon momonginum naanggulia koidan polong doi Mian Bisa nalapaan balakuasa tukon tutuuno.”

¹⁹Lapa doiya Yesus mangala loti. Tukon salataa lapa sambeang syukuul, yana bisi-bisiliyo do lotidoo tukon limano maka beekene doi yanila, tukon bantile, “Naiyamo kobutonggu [mo sinalakanggon tuuk komuyu. Kubaiyo naiyo sulano poneneeke yaku.” ²⁰Bunomo koidan salataa lapa kaan, yana beekene do galaas anggulo doi yanila tukon bantile, “Galaas nia daano Mian Bisa napaladandian mo boolu, mo sinahkanggon tukon saunggu – sau mo kinundang tuuk komuyu].”

²¹“Bai kitayo! Mian mo dadaate yaku daano polaing yaku dimbaa! ²²Manusia Napau takainomo naikon mate pokakana komo lapamo Mian Bisa tantukanggene; bai silakamo komian mo dadaate yana!”

²³Maka yanila tambuuno posada-sadai meeng tukon bailong, indee miano doi antala yaniladoo naikon komo lakukanggene do langgedoo.

Pogagaiyan tentang indee komo babasal

²⁴Doi antala pololaing-pololaing Yesus sumbot kopoodanggaan tentang indee doi yanila komo sio nainaanggon babasal

tuuno. ²⁵Yesus bantile doi yanila, “Bangsa natomundo-tomundo mo aki natingoniiyo ko Mian Bisa pipike kona layat, tukon kona pongulus-pongulus mosinombuikon ‘Padagai Layat’. ²⁶Bai komuyu aki namoola buno doiya. Kona tutuuwan, mian mo babasal doi antala komuyu sio nateali buno mo poipoisik tukon kopongulus sio nateali buno peleleani. ²⁷Indee kai komo lobian kona babasalan: mian mo osulang kaan doi meda, kai mian mo leleaniyo yana? Tantu do mian mo osulangoo. Bai yaku daano doi antala komuyu pokakana kopeleleani.

²⁸Doi sasaibino daku kasusaan, komuyu sio posidutu polaing-laing tukon yaku. ²⁹Bunomo kai Tama lapamo beena doi yaku haak sulano kumapalenta, bunomo kai koidan yaku naikon beekene doikoo do haakoo. ³⁰Tukon kalu buno doiya moola tulut balasanaang tukon yaku doi tembo yaku teali Tomundo. Tukon komuyu naikon osulang doi bungkuk songulo lua kokulusii tuuk mopalentayo songulo lua kobangsa Israel bensenno.”

Bantilan baikon Petulus akiyengene naikon Yesus

(Mat. 26:31-35; Mlk. 14:27-31; Yoh. 13:36-38)

³¹“Simon, Simon, ndongoliiyo! Ibiliis lapamo binee izin sulano naujio komuyu; buno gandum inalaas doi kulito tobikon inalaas doi mo kulokis. ³²Bai yaku lapamo sambeang tuuk ikoo, Simon, sulano komu mangangaan inai nabolii. Tukon kalu ikoo lapamo abali doi yaku, ikoo sio mukokobukuanggene koutus-utusomu.”

³³Petulus timbiliyo, “Temeneno, yaku basadia usok talunggu, tukon mate polaing-laing Temeneno!”

³⁴“Manganggamo Petulus,” Yesus bantile, “akiyoon komanuk nakokuwa oloyo nia, ikoo tolu mo luunggon muakiyengene yaku.”

Dombet, kaikandi kai sabel

³⁵Salataa lapa doiya Yesus bantile doi yanila, “Looluk salataa yaku bintekene komuyu tukon aki kupataikene komuyu makanggi dombet, kaikandi kai sapatu, oilakai komuyu kakulangan oioila?”

“Aki” yanila timbiliyo.

³⁶“Bai diabudodoo,” Yesus bantile, “indee komo daano kona dombet kai kandi, sio nakanggiyo; tukon indee komo akiyo kona sabel, sio nabalukene kona jubah sulano namongoli sabel. ³⁷Sabab, anggayomo, ayat Kitab Moliyous mo buno naiya kona bantilan, ‘Yana inaanggon buno mian molokis,’ sio nateali doi butonggu. Sabab oila komo totulis doi Kitab Moliyous lalomo manganai yaku lapamo teali diabudodoo.”

³⁸“Temeneno,” pololaing-pololaing Yesus bantile, “kitayo, dimbaa daano kolua kosabel.”

“Lapamo!” Yesus timbiliyo.

Yesus sambeang doi Zaitun Bunggulo

(Mat. 26:36-46; Mlk. 14:32-42)

³⁹Yesus tinggalemo kota tukon ampakon buno nakabiasaan doi Zaitun Bunggulo, tukon napololaing-pololaing ampakon tukon yana. ⁴⁰Salataa polong idoo yana bantile doi yanila, “Posambeang sulano komuyu naaki pobaladosa kalu komuyu sinobai.”

⁴¹Doibundu yana ampakon lobian dodoon soisik doi yanila, uga-ugaate pokakana kobatu sinakukon kona kododoon, maka ladanggene kotuulo tukon sambeang, ⁴²“Tama” kona bantilano, “kalu momoola, dedeengene doi yaku kosakisaawan mo sio kutoupiyo nia. Bai inai moloingiyo daku mongiasan, bai loingiyo Tama namongiasan.” [⁴³Meeng komalaekat lubat doi yana tukon kokobukuanggene. ⁴⁴Yesus sakisaa tuuno konoano tobikon pololokon yana sambeang tutuuno. Kona lumbos buno sau motulo-tulo doi buta.]

⁴⁵Lapamo sambeang, Yesus abali koidan doi napololaing-pololaing. Yana pososunggene yanila daano momoola sabab susa tuuno. ⁴⁶Maka yana bantile doi yanila, “Bulaando komuyu momoola? Pobanguno tukon posambeang sulano komuyu aki pokanakan sobaan.”

Yesus linako

(Mat. 26:47-56; Mlk. 14:43-50; Yoh. 18:3-11)

⁴⁷Daano Yesus mobasilingan, lubato komian meeng tambuuno. Yanila Yudas komo andane, daano komeeng komian Yesus

napololaing. Doibundu Yudas ampakon doi Yesus maka umayo.
⁴⁸Bai Yesus bantile doi yana, “Yudas, oilakai tukon muumaano yakudoo ikoo yase mokulokisanggene Manusia Napau?”

⁴⁹Salataa Yesus napololaing-pololaing mo daano idoo kitayo oila naikon komo teali, yanila bantile, “Temeneno kami lobosiyomo kai tukon sabel!” ⁵⁰Maka daano komeeng komian doi yanila bobokiiyo do imam babasaloo naata tukon sabel tobikon botol kotolingaino bakalingano.

⁵¹Bai Yesus bantile, “Banggalo!” Maka yana taape do mianoo tolingaino tukon tangalingene.

⁵²Doibundu Yesus bantile doi imam-imam kapalano tukon suludadu-suludadu modagaiyo ko Temeneno Nabonua, tukon katua-katua Yahudi mo lubat idoo sulano nalakoyo yana, “Oilakai naiya yaku nia kulokis, tobikon komuyu polubat tukon sabel maka tompide sulano polakoyo yaku? ⁵³Samba kooloyo yaku daano tukon komuyu doi Temeneno Nabonua, bai komuyu aki polakoyo yaku. Bai naiyamo kotembono kopoo kubaiyano, tembo kuasa lokis nabalakuasaan.”

Petulus akiyengene Yesus

(Mat. 26:57-58, 69-75; Mlk. 14:53-54, 66:72; Yoh. 18:12-18, 25-27)

⁵⁴Yanila lakoyo Yesus tukon babayo doi imam babasal nabonua. Petulus tunduwo doi nadodoonan. ⁵⁵Doi basaleanoo tanga-tangano inokoitimo koaung balalangan tukon Petulus ampakon osulang polaing tukon domianoo mo osulang potikunggon. ⁵⁶Daano komeeng kopeleleani boine mokitayo Petulus moosulang doi aung balalanganoo bibilo; maka do peleleanidoo boine palatikangene Petulus, doibundu bantile, “Namiania budodoo daano polaing-laing Yesus!”

⁵⁷Bai Petulus bangakiyonggon. Yana bantile, “Yaku tutuu aki kutingoniiyo do mianoo!”

⁵⁸Aki namalumbit, meeng komian bailong kitayo Petulus tukon bantile, “Ikoomo koidan komeeng komian doi yanila!”

Bai Petulus timbiliyo, “Aki, bolikon yaku!”

⁵⁹Uga-ugaat meeng kojam doibundu, meeng komian bailong koidan bantile tukon kokobukuan, “Takainomo namian nia Yesus napololaing, sabab yana Galilea miano!”

⁶⁰Bai Petulus timbiliyo, “Oila komu makisuut, yaku aki kutoiyo!”

Doiya kotembono, daano Petulus mobasilingan, kokuuwano komanuk. ⁶¹Yesus mbaleng tukon kitayo Petulus. Maka Petulus neneeke ko Temeneno lapamo bantile doi yana, “Akiyoon nakokuuwa komanuk oloyo nia, ikoo tolumo luunggon muakiyengene yaku.” ⁶²Maka tobuato Petulus idoo tukon kokiil yodi-yodi.

Yesus minae-maenggon tukon binobokii

(Mat. 26:67-68; Mlk. 14:65)

⁶³Komian mo daano mototooliyo Yesus, mae-maenggene tukon bobokiiyo yana. ⁶⁴Yanila kukupiyo komatano tukon sadaiyo doi yana, “Soba bantile indee komo bobokiiyo ikoo?” ⁶⁵Badaang koidan kobantilan-bantilan sosibolii yanila mo otuuke doi yana.

Yesus doi Pangadilan Agama salaano

(Mat. 26:59-66; Mlk. 14:55-64; Yoh. 18:19-24)

⁶⁶Dodowasoono, katua-katua Yahudi, imam-imam kapalano, tukon gulu-gulu agama pototongi, maka Yesus binaba doi yanila na Pangadilan Agama salaano. ⁶⁷“Bontiikene doi kami,” yanila bantile doi yana, “oilakai ikoo nia Tomundo Pasalamat?”

Yesus timbiliyo, “Kalu yaku bontiikene doikoo, komuyu aki naikon poanggayo. ⁶⁸Tukon kalu yaku mansadai doi komuyu, komuyu naikon aki potimbiliyo. ⁶⁹Bai tambuuno diabudodoo, Manusia Napau naikon osulang taalikon bakalinga doi Mian Bisa Mobabasal Konakuasa.”

⁷⁰Yanila sasaibino bantile, “Kalu buno doiya, ikoo nia Mian Bisa Napau?”

Yesus timbiliyo, “Bunomo kopoo bantilano.”

⁷¹Maka yanila bantile, “Akimo napalaluu koidan sakisii! Kita lapamo molongol doi suungo susuungo!”

Yesus doi Pilatus salaano

(Mat. 27:1-2, 11-14; Mlk. 15:1-5; Yoh. 18:28-38)

23 Sasaibino do mianoo kokondong, maka babayo Yesus doi Pilatus salaano. ²Idoo yanila tambuuno motuduwo Yesus. Yanila bantile, “Kami laatemo namian nia, atapayo kolayat. Yana bontiikene komian sulano inai nababeal lulu doi

Tomundo, sabab kona bantilano yana daano Klistus meeng kotomundo.”

³Maka Pilatus mansadai doi Yesus, “Kai tutuu ikoo Yahudi miano natomundo?”

Yesus timbiliyo, “Bunomo komu bantilano.”

⁴Maka Pilatus bantile doi imam-imam kapalano tukon do mianoo mobadaang, “Yaku aki kumalaat mau nabaino meeng kona kasalaan doi mian nia sulano nainukum yana.”

⁵Bai yanila pololokon desaake koidan, “Tukon kona otunggul, yana pangaluyomo ko Yudea miano sasaibino; tumbe-tumbe doi Galilea, tukon diabudodoo polongo koidan dimbaa.”

Yesus doi Helodes salaano

⁶Salataa Pilatus lengele doiya, yana mansadai, “Oilakai namian nia Galilea miano?” ⁷Salataa lapa binontiikon baikon Yesus kona lenggetan doi lipu mo daano Helodes mokuasaiyo, Pilatus kapatuwo Yesus doi Helodes, doiya kosinggato daano koidan doi Yelusalem. ⁸Helodes sanaang tuuno salataa kitayo Yesus, sabab malumbito yana namolongolan tentang Yesus tukon yase namokita. Yana moinikene namoola sakisiiyo Yesus mokubaiyo komo minasaingdinggon. ⁹Tobikon doiya Helodes pelenggene kona pasadai mobadaang doi yana, bai Yesus aki namotimbili. ¹⁰Imam-imam kapalano tukon gulu-gulu agama mangadap koidan idoo tukon tuduwe Yesus tuuno. ¹¹Helodes tukon naanggota suludadu maenggene tukon totulaiyo Yesus, maka pekeikene yana kopakean kabasalan, doibundu kinapatu koidan doi Pilatus. ¹²Doi oloyonodoo koidan Helodes tukon Pilatus, doi lolukonoo pomusu, posobato koidan.

Yesus kinonoi ukuman mate

(Mat. 27:15-26; Mlk. 15:6-15; Yoh. 18:39 – 19:16)

¹³Pilatus pototongikene koimam-imam kapalano, katua-katua, tukon layat, ¹⁴maka bantile doi yanila, “Komuyu babayo namian nia doi yaku tukon bantile baikon yana atapayo komian. Diabudodoo doi salaamuyu yaku lapamo palesayo yana, bai yaku aki kumalaat meeng kona kulokisan doi komuyu mo

tuduwe yana. ¹⁵Buno lakon Helodes napandapat, sabab yanadoo lapamo kapatuwo Yesusoo koidan doi kami. Namian nia aki nakubaiyo kooioila mo moola inukum tukon ukuman mate. ¹⁶Tobikon doiya yaku naikon bobokiiyo yana tukon doibundu yana sinodii.”

[¹⁷Doi samba kolamekanano ko Paskah, Pilatus sio namosodii meeng komian motinalunggu tuuk doi nalayat.] ¹⁸Sasaibino komian mo pototongi idoo nggeleamon, “Akateyo yana! Sodiiyo Balanabas tuuk doi kami!” ¹⁹(Balanabas tinalunggu sabab nggimalan mo teali doi kota tukon sabab namangakatean.)

²⁰Pilatus yase osodiiyo Yesus, tobikon doiya yana basilingan idan koidan doi mian badaangoo. ²¹Bai yanila nggeleamon, “Posempangemo yana! Posempangemo yana!”

²²Maka doi kotoluno luunggon Pilatus nggeleamon doi yanila, “Bai oila kona sala? Yaku aki kulaate meeng kona kasalaan mo moola inukum tukon ukuman mate! Yaku naikon umbase yana, maka nasinodii yana.”

²³Bai yanila banggadudul nggeleamon kokobukuan baikon Yesus sio nasinempanggon. Tukon doibundu yanila nanggeleamonan daano kohasilo. ²⁴Maka Pilatus otuwongikene doi Yesus koukuman mate buno do mianoo namongiangan, ²⁵tukon sodiiyo domianoo yanila mo kabiyo, doiyamo mian mo tinalunggu sabab nanggimalan tukon namangakatean. Doibundu Yesus sinalakangono doi yanila sulano napo kubaiyo baino bulaamo yanila nayasano.

Yesus sinempanggon

(Mat. 27:32-44; Mlk. 15:21-32; Yoh. 19:17-27)

²⁶Maka do yaniladoo babayomo Yesus. Doi loloon tangano, yanila pososuung tukon meeng komian kosambuno Simon, kona luwean doi Kilene, mo sodo usok doi kota. Yanila lakoyo yana, maka pinakisaa yana motanggunge Yesus nakayung sempang doi Yesus tonggulungo.

²⁷Badaang komian moampakon tunduwo doi Yesus tonggulungo – doi yaniladoo daano kobubulaa koboine. Do boi-boinedoo kokiiliyo tukon mandaunggene Yesus. ²⁸Bai Yesus mbalenge doi yanila maka bantile, “Boi-boine Yelusalem! Inai pokokiiliyo yaku! Pokokiiliyo kobutomu susuumu tukon mulabuk-labuk. ²⁹Sabab naikon lubat kotembono komian naikon bantile, ‘Bukan maen kona monondokan koboi-boine mo aki

nabiasa tianan, mo akiyoon nadaano kona pau tukon akiyoon nabiasa mosusu pau!’ ³⁰Doiyamo kosinggato komian naikon bantile doi bunggul-bunggul, ‘Pisaiyomo kami!’ Tukon doi bunggul-bunggul bungkukono, ‘Tonoiyomo kami!’ ³¹Sabab kalu bunu kayung mo daano motubo komian lapamo kubaiyo bunu naiya, oila koidan naikon yanila mo kubaiyo tuuk doi kayung mo lapamo motuul!”

³²Daano koidan kolua komian bailong – domo luailadoo mian lokis – yanila mo babayo sulano nainukum mate polaing-laing tukon Yesus. ³³Salataa polong doi lipu mo sinombuikon “Oluno tobongo”, yanila sempangemo Yesus tukon do mianoo molua molokis – komeeng doi bakalingano taikon tukon komeeng koidan doi Yesus bobono. ³⁴Maka Yesus sambeang, “Tama, ompuniyo yanila! Yanila aki napo toiyo oila yanila nakinubai.”

Yesus napakean inobos-obos idoo doi antala yanila tukon undian. ³⁵Komian kokondong idoo tukon mapatookon, modaano kokatua-katua Yahudi mototulaiyo Yesus tukon bantile, “Yana lapamo salamatenene komian bailong; soba kai diabudodoo yana nasalamatene kobutongo susuungo, kalu yana bisa-bisa Tomundo Pasalamat Mian Bisa mo piliyo!”

³⁶Kosuludadu-suludadu totulaiyo yana. Yanila lubat tukon beena anggul momeele doi yana, ³⁷tukon bantile, “Kalua ikoo tomundo Yahudi miano, salamatenene kobutomu!”

³⁸Doi babo taikon do kayungoo sempangngano Yesus, totulis nabantil-bantilan nia: “Naiyamo ko Tomundo Yahudi Miano.”

³⁹Daano komeeng domianoo molokis mo sinempang idoo totulaiyo Yesus. Yana bantile, “Ikoo Tomundo Pasalamat, bolikon? Nah, salamatenene kobutomu tukon kami!”

⁴⁰Bai domianoo molokis meeng koidan anuukene do tulanodoo, bantile, “Oilakai ikoo aki mumatakutene ko Mian Bisa? Ikoo posinggat-singgat inukum mate bunu yana. ⁴¹Tolongo konda ukuman lua kita takainomo pokokonoi tukon nda kokubai. Bai yana tutuu akiyo kona sala!” ⁴²Maka yana bantile, “Yesus, neneeke yaku, kalu ikoo lubat pokakana ko Tomundo!”

⁴³“Anggayomo,” Yesus bantile doi yana, “Oloyo nia ikoo naikon polaing yaku doi Fildaus.”

Yesus namatean

(*Mat. 27:45-56; Mlk. 15:33-41; Yoh. 19:28-30*)

⁴⁴Uga-ugaate batong songulo lua suung kooloyo, kooloyo akiyono kopanano, tukon posaapon do lipudoo teali kalipookan tuuno tukon polong batong tolu kikinobian. ⁴⁵Lalanse mo tagantung doi Temeneno Nabonua lalomo, mosiak teali lua. ⁴⁶Maka Yesus nggeleamon tukon alalo mobabasal, “Tama! Doi limamu kusalakangene kobutonggu!” Salataa bantile buno doiya, yana matemo.

⁴⁷Pasukan kapalano kitayo oila komo lapamo teali, yana nggaale ko Mian Bisa. Maka yana bantile, “Bisa yana aki nasala!”

⁴⁸Mian badaang mo lubat idoo, sulano namapatookon, kitayo oilamo komo teali. Yanila sasaibino mule tukon manasal konoano tutuuno. ⁴⁹Tukon sasaibino Yesus napomanaanggonan, tololo doboi-boinedoo mo lainge yana doi Galilea, mokokondong doi nadodoonan tukon kitayo sasaibino doiya.

Yesus natinadinan

(*Mat. 27:57-61; Mlk. 15:42-47; Yoh. 19:38-42*)

⁵⁰⁻⁵¹Daano komeeng komian kosambuno Yusuf, kona luwean doi kota Alimatea doi lipu Yudea. Yana meeng komian monondok mian mo inodotii, tukon daano mototiili tembono ko Mian Bisa namapalenta buno Tomundo. Mau kai yana anggota Pangadilan Agama, yana aki nasatujuiyo kokaputusan tukon do pangadilan agamadoo nakokubai. ⁵²Yusuf nia ampakon momangadap doi Pilatus tukon kabiyo sulano Yesus badano nabineekon doi yana. ⁵³Doibundu yana obulusene Yesus badano doi kayung sempang, maka bunguse tukon toik kafan moute moluwedoi linen. Lapa doiya yana abese doi kibuloo lalomo mo kinubai doi batu bungkono – kibuloo akiyoon napinake. ⁵⁴Oloyodoo oloyo Jumat; tukon oloyo Tadean kabimo mangatambuun.

⁵⁵Boi-boine mo lubat tukon Yesus moluwedoi Galilea lainge Yusuf tukon kitayo do kibuloo. Yanila kitayo koidan

bulaandomo Yesus badano nainabosan doi kibuloo lalomo.
⁵⁶Doibundu yanila mule maka sadiayo kolamuan-lamuan tukon lisison mobabangi sulano natinulu Yesus badano.

Doi oloyo Tadean, yanila tade mobalimang sulano tulutiyo koukum agama.

Yesus natuboa

(*Mat. 28:1-10; Mlk. 16:1-8; Yoh. 20:1-10*)

24 Doi Minggu oloyono, dodowasoono, do boi-boinedoo ampakono doi kibuloo momababa lampa-lampa mo lapamo yanila sadiayo. ²Doi kibuloo, yanila laate dobatudoo posunggupo lapamo tonggoling. ³Maka yanila usok doi kibuloo lalomo, bai aki naposusuunggene Yesus badano idoo. ⁴Daano yanila mokokondong idoo pusing mopikikene do langgedoo, sosinggot lua komian tukon mapake pakean montoontilang kokondong loolaniyo yanila. ⁵Yanila matakut tuuno, maka tootuku polong doi buta, daano do mianoo molua mobantile doi yanila, “Bulaando komuyu moumboliiyo komian motubo doi antala mian momate? ⁶Yana akiyo dimbaa. Yana tubomo! Neneeke oila komo lapamo yana bantile doikoo tembodoo yana modaano doi Galilea, ⁷baikon ‘Manusia Napau sio nasinalakanggon doi mian mobaladosa, maka nasinempanggon, tukon oloyo kotoluno yana naikon tubo.’”

⁸Maka do boi-boinedoila neneekemo Yesus nabantil-bantilan. ⁹Salataa lapa abali doi kibuloo, yanila basalitakene sasaibino domo tealidoo doi songulo meeng kolasul tukon sasaibino kopololaing bailong. ¹⁰Boi-boine mo popitoikene sasaibino doiya doi Yesus napololaing-pololaing, doiyamo: Malia Magdalena, Yohana tukon Malia Yakobus tinano, tukon boi-boine bailong mo polaing-laing tukon yanila. ¹¹Bai do lasul-lasuloo aanggene do boi-boinedoo tongo basalitakene komo aki-akiyo. Yanila aki namangangga do boi-boinedoo nasalita. ¹²Bai Petulus bangun tukon obuleng doi kibuloo. Maka tootuku yana kitayo doi lalom, maka kitayo tongo toik pabalun idoo. Petulus masaingding tuuno, maka mule tukon badaang kopasadai doi noano lalomo tentang oila komo lapamo teali.

Doi Emaus loloono tangano

(Mik. 16:12-13)

¹³Doi oloyodoo koidan, lua komian Yesus napololaing daano moampakon doi meeng kodesa kosambuno Emaus, uga-ugaate songulo meeng kokilo kona kodoon doi Yelusalem. ¹⁴Yanila basalita doi naampakonnan tentang sasaibino kokadadian mo lapamo teali. ¹⁵Daano yanila mobasa-basalita tukon popikilikene, Yesus lubat susuungo maka ampakon polaing-laing yanila. ¹⁶Yanila kitayo Yesus, bai daano komeeng komo kubaiyo yanila aki natingoniiyo yana. ¹⁷Maka Yesus bantile, “Oilakai kopo binisalakon doi loloon tangano nia?”

Yanila tade tukon dudusoila mosusa. ¹⁸Maka daano komeeng komian doi yanila, kosambuno Kleopas, mansadai doi Yesus, “Tama kai komeeng komian molubat-lubaton doi Yelusalem mo aki natoiiyo komo teali doibundu-bundu nia?”

¹⁹“Oila komo teali?” Yesus sadaiyo.

“Kokadadian mo teali tukon Yesus, mian doi Nasaletoo,” yanila timbiliyo. “Yana nabi; kona bantil-bantilan tukon nakokubai-kokubai balakuasa tuuno – mau manulut Mian Bisa napokita mau doi sasaibino komian napokita. ²⁰Imam-imam kapalano tukon nda katua-katua salakanggene yana sulano nainukum mate, tukon yanila sempanggene! ²¹Banggokai kami moinikene baikon yanamo komo bebaskanggene ko Israel! Tukon oloyo nia oloyo kotoluno salataa do langgedoo natealian. ²²Daano koidan, kobubulaa koboine tambikon doi kami lapamo kubaiyo kami ngginggim. Dodowa tuuno yanila ampakon doi kibil, ²³bai yanila aki naposusuungene kobadano imbali. Maka yanila abali tukon bantile baikon yanila kitayo komalaekat, tukon do malaekat-malaekato bantile baikon Yesus tubomo. ²⁴Bubulaa komian doi kami maka ampakon doi kibuloo tukon laate baikon oila do boi-boinedoo nabinantil bunomo doiya, tongo yanila aki nakitayo Yesus.”

²⁵Maka Yesus bantile doi yanila, “Komuyu bisa molongas! Todudul komuyu akiyo kopo paangga sasaibino komo lapamo nabi-nabi bantile! ²⁶Bolikon kai ko Tomundo Pasalamat sio natoupiyo looluk kosusaano, maka nasodo laate kona monondokan?” ²⁷Doibundu Yesus salitaikene doi yanila komo totulis doi Kitab Moliyous lalomo mokonoiiyo kobutongo, tambuun doi buku-buku Musa tukon buku-buku nabi-nabi.

²⁸Sambuno buno doiya yanila loolanimo dokampungoo yanila moompokoniiyo. Yesus okitaikene uga-ugaat yana ampakon banggadudul; ²⁹bai yanila taane. “Dungolo doi mai lipu,” yanila bantile doi yana, “diabudodoo loolanimo kona popookan tukon koidan tambuuno kalipookan.” Maka Yesus usok sulano namoolo doi napo tampatoo. ³⁰Doi tembo yanila polaing osulang kaan, Yesus mangala loti, balasyukuul doi Mian Bisa, bisi-bisiliyo do lotidoo tukon limano, maka beekene doi yanila. ³¹Doibundu yanila toiyo banggo doiya Yesus. Bai yana lapuso doi yanila napokita. ³²Yanila pobantikun meeng tukon doi bailong, “Bolikun kai nda lasaiyo konoanggita buno todup, salataa yana basilingan tukon kita doi loloon tangano tukon salitayo ko Kitab Moliyous nabantilan doi kita?”

³³Doiya kotembono koidan yanila kokondong maka abali doi Yelusalem. Imbali yanila laate domo songulodoo meeng Yesus napololaing daano mo pototongi tukon bailong. ³⁴Yaniladoo bantile, “Takainomo bisa ko Temeneno lapamo tubo koidan! Yana lapamo okitakene kobutongo doi Simon!”

³⁵Yesus napololaing domo luailadoo mo sodo lubat maka basalitakene yanila napangalaman doi ampakonan tangano, tukon bulaando yanila natingoniiyano ko Temeneno doi tembo yana mobisi-bisiliyo koloti.

Yesus okitakene kobutongo doi napololaing-pololaing

(Mat. 28:16-20; Mlk. 16:14-18; Yoh. 20:19-23; Kis. L. 1:6-8)

³⁶Daano yanila mobasalita, sosinggoton Yesus susuungo kokondong doi yanila tanga-tangano tukon bantile, “Kinatauan komuyu!”

³⁷Yanila ngginggim tukon matakut, sabab yanila aanggene kitayo kosetan. ³⁸Bai Yesus bantile, “Bulaando komuyu momatakut? Bulaando doi noamuyu lalomo daano mobalasaak? ³⁹Kitayo kolimangu tukon kitayo koaingu. Potoiyo, baikon yakumo nia! Taape tukon palatikanggene, sabab kosetan akiyo kosailo tukon bukuno, buno komuyu kitayo doi yaku.”

⁴⁰Yesus bantile buno doiya tukon okitakene doi yanila kolimano tukon aino. ⁴¹Tukon yanila akiyon namanganga, sabab todudul laba tukon masaingding, Yesus mansadai doi yanila, “Oilakai komuyu daano kopoo kinaan dimbaa?” ⁴²Yanila beekene doi yana meeng koikan patolo mosininanga. ⁴³Yesus alayo do ikanoo maka kaane doi yanila salaano.

⁴⁴Sala lapa doiya yana bantile doi yanila, “Naiyamo kolanggelanggeno mo lapamo yaku babotilanggene doikoo salataa yaku daano mopolaing-laing tukon komuyu: baikon komeeng kolangge mo totulis tentang yaku doi Musa nabuku-buku lalomo, nabi-nabi, tukon Mazmul, sio nateali.”

⁴⁵Doibundu Yesus bukayo yanila napikilan sulano naalatiyo ko Kitab Moliyous namakisuut. ⁴⁶Maka yana bantile doi yanila, “Doi Kitab Moliyous lalomo totulis baikon ko Tomundo Pasalamat sio nasakisaa tukon sio natubo koidan doi matean doi oloyo kotoluno. ⁴⁷Koidan baikon tongo Tomundo Pasalamat sambunodoo siokai napinolonggon doi sasaibino kobanggapi baikon kobanggapi sio nabadodoloon, tukon baikon ko Mian Bisa ompuniyo kolalim. Tukon do bilitadoo sio napinoobosiikon tambuun doi Yelusalem. ⁴⁸Komuyumo kai kona sakisii-sakisii doi sasaibinodoo. ⁴⁹Tukon yaku susuunggu naikon kapatuwo doikoo oila komo lapamo Tama paladandikene. Bai komuyu sio potataap montotiili doi kota nia polong ko Mian Bisa nakuasa liputiyo komuyu.”

Yesus biningkat doi sulugaa

(Mlk. 16:19-20; Kis. L. 1:9-11)

⁵⁰Salataa lapa doiya Yesus babayo yanila tobuat doi kota polong doi Betania. Idoe yana tidekene kolimano, maka balakaatiyo yanila. ⁵¹Daano yana mokubaiyo doiya, yana tobingkato doi sulugaa, maka pobabandakon yanila. ⁵²Yanila totuku sosubaiyo yana, doibundu abali doi Yelusalem tukon noanoila mo laba tuuno, ⁵³tukon banggadudul nggaa-nggaale ko Mian Bisa doi Temeneno Nabonua.

BILITA MONONDOK

YOHANES MO PELENGGENE

PANGANTOKON

Doi Bilita Monondok lalomo nia, Yesus linoolukonggon buno Mian Bisa na Bantilan mo bisa mo tealimo banggapi tukon daanomo modungol doi kita nia. Bunu komo binantil doi buku nia lalomo, Bilita Monondok nia tinulis tukon komakisuuto sulano komian mobacayo namoola anggayo baikon Yesus yanamo ko Tomundo Pasalamat mo pinaladandikon – yana Mian Bisa Napau susuungo. Koidan sulano nalolo komaanggaan doi yana yanila malaat tuboan (20:31).

Sambuno kopololukonidoo lolukenggenemo baikon ko Mian Bisa na Bantilan mo bisadoo doiyamo Yesus, doi buku nia natinambuunan sinalitakon bubulaa kokaliangano kolangge mominasaingdinggon Yesus mo kubaiyo. Kolangge-langge mominasaingdinggonoo otudoikene baikon Yesus doiyamo ko Tomundo Pasalamat mo pinaladandikon, yana Mian Bisa Napau. Memeeng kosalita motuuk doi langgedoo mominasaingdinggon linolaing tukon salita Temeneno Yesus napolalaitaiyan kopai mian mobadaang. Doi napolalaitaiyan-salитайanoo totingonii oila komo binantil doi langgedoo mominasaingdinggon. Doi bagian nia lalomo linolukonggon baikon daano komian mo maangga doi Yesus tukon tealimo napololaing, bai daano koidan komo apese yana tukon aki nayase anggayo yana. Pasal 13-17 tinulis doi nabulusanan tukon nabebelanan bulaando Yesus napokilakonan. kona pololaing-pololaing doi popookoo singgatoonalinakoan, tukon bulaando kona sadiaano tukon nakoonggoliano yanila noano doi popookoo. Pasal-pasal napupusan sinalitakon bulaando Yesus nalinakoan tukon napinalesaan, bulaando kona sinempanggonan, namatean tukon naabalian tubo koidan, tukon bulaando kona okitakangganano kobutongo doi napololaing sambuno yana tubomo koidan.

Salita motuuk doi meeng koboine mo linako daano

mobasinduwa (8:1-11), inusokon doi antala tanda kulung mobabasal sabab badaang konaskah tukon salinan-salinan doi lolukon moaki natinulis doiya salitadoo, sabea kobai-bailong inusokon moimoiya kotampat.

Doi Yohanes nabuku nia inakabasal doi babeean, doiyamo tuboan mobisa tukon posidutukon, Mian Bisa mo beekene lolo doi Klistus. Doiya pebeedoo tinambuuno doi dunia, tukon moolamo tinoupi doi mian badaang mo talimayo Yesus bunu meeng kololoon doi Mian Bisa, bunu mookitakene ko Mian Bisa, tukon pebee tuboan. Yohanes namangalaasanggonan doiyamo yana mangala ande-andean doi langge-langge mo tokita samba-samba kooloyo sulano naotudoikene kona bisa-bisaan kolohani, andeno: paisu, loti, madialan, pototooli tukon nadomba, anggul batango saano.

Antoko

Pololukoni 1:1-18

Yohanes Pasau Mian tukon mian badaang tumbe-tumbeno mo teali pololaing Yesus 1:19-51

Yesus nabaleleanian doi mian mobadaang 2:1-12:50

Oloyo-oloyo napupusan doi Yelusalem tukon mopooloolanikon ko Yelusalem 13:1-19:42

Yesus natuboan tukon nabatokitakangganano kobutongo 20:1-31

Potutupo: naokitakangganano kobutongo koidan doi Galilea 21:1-25


Bantilan mebee tuboan

1 Tumbe-tumbeno, kodunia akiyoon natinealikon, Bantilan anomo.

Bantilanoo ano polaing Mian Bisa tukon do Bantilanoo meengomo ko Mian Bisa.

²Doi tumbeno yana polaing ko Mian Bisa.

³Sasaibino kona tinealikon lolo doi yana, tukon sasaibino komo daano, akiyo kolangge meeng motinealikon moakiyo yana.



Kota Yelusalem (1:19)

- ⁴Bantilanoo tuboan uuno,
tukon tuboan mobeena madialan kobanggapi.
- ⁵Madialanoo diyoliiyo kokalipookan lalomo,
tukon kalipookanoo aki nanggoola posoiyo.
- ⁶Lubato komian Mian Bisa mo bintekene, Yohanes kosambuno.
- ⁷Yana lubat babotilanggene do madialanoo,
sulano sasaibino komian anggayo.
- ⁸Yana susuungo bolikon do madialanoo,
yana tolongo babotilanggene.
- ⁹Madialan motalakana lubat doi dunia mo diyoliiyo kobanggapi
sasaibino.
- ¹⁰Bantilanoo daano doi dunia,
dunia tinealikon lolo doi yana,
bai kodunia aki natingoniiyo yana.
- ¹¹Yana lubat doi nalipu susuungo
bai napolipuiyan aki natalimayo yana.
- ¹²Mau nadaano komian mo talimayo yana
tukon mangangga doi yana;

yanila binee haak nateali Mian Bisa napau,
¹³mo sinuung bolikon doi banggapi,
 sabab do tuboanoo moboolu doi Mian Bisa kona luwean.
¹⁴Do Bantilanoo tealimo banggapi,
 yana dungolo doi kita,
 tukon kita lapamo kitayo kona babasalan kona kuasa.
 Kona babasalanoo yana talimayo
 salaku Tama napau momeeng.
 Lolo doi yana kita kitayo ko Mian Bisa
 tukon naseang doi kita.
¹⁵Yohanes lubat buno nasakisii,
 yana babulitakangene:
 “Naiyamo yana yaku mo bantilemo:
 Yana naikon lubat doibundu
 bai lobian kona kuasa doi yaku,
 sabab akiyoon nadaano yaku, yana daanomo.”
¹⁶Yana daano kona seang;
 akiyo kona belentian,
 yana balakaatiyo kita.
¹⁷Ko Temeneno naatulan kita talimayo doi Musa.
 Bai ko Mian Bisa naseang tukon namonondokan
 inokitakonggon lolo doi Yesus Klistus.
¹⁸Akiyoon nadaano komo kitayo ko Mian Bisa,
 tolongo Tama napau momeeng,
 mo buno pokakana Tama tukon pomeenggon tuuno doi yana.
 Doiyamo kona batokitaan Tama doi kita.

Yohanes napinolonggon

(Mat. 3:1-12; Mlk. 1:1-8; Luk. 3:1-18)

¹⁹Pamalenta Yahudi doi Yelusalem mobintokon imam-imam tukon Lewi miano naampakon doi Yohanes tukon namansadaikene doi yana, “Ikoo naiya indee miano?”

²⁰Yohanes mangaku tukon tutuu, “Yaku bolikon Tomundo Pasalamat.”

²¹“Kalu buno doiya, ikoo indee miano?” yanila sadaiyo. “Kai ikoo Elia?”

“Bolikon,” Yohanes napotimbili.

“Kai ikoo meeng konabi,” yanila sadaiyo koidan.

“Bolikon,” yana timbiliyo.

²²“Kalu buno doiya, bantikene doi kami indee miano ikoo nia,” yanila bantile, “sulano kami nggoola beena potimbili doi mian mo bintekene kami. Indee komu bantilano kobutomu susuumu?”

²³Yohanes timbiliyo, “Yakumo nia Nabi Yesaya nabinantil:

‘Mian mo pelengene doi padang lalomo:

Keseayo ko Temeneno naloloon.’”

²⁴Falisi miano na mian-mian binitokon ²⁵mansadai, “Kalu ikoo bolikon Tomundo Pasalamat, bolikon Elia, bolikon koidan meeng konabi, bulaando ikoo momansau mian?”

²⁶Yohanes timbiliyo, “Yaku mansau mian tukon paisu. Bai doi tulamuyudoo daano komian komuyu akipo tingoniiyo. ²⁷Yana lubat doibundu tukon yaku, bai nasapatu alosu yaku aki nanggoola bukayo.”

²⁸Sasaibino doiya kona tealian doi Betania, doi Paisu Yoldan taalikon oloyo nasumbotan Yohanes namansauan mian.

Mian Bisa na Domba Pauno

²⁹Modoakon kooloyo, Yohanes kitayo Yesus lubat doi yana. Maka Yohanes bantil, “Pokitayo ndaiyamo ko Mian Bisa na Domba Pauno mo telese kobanggapi nalalim doi dunia. ³⁰Yanamo daku binantilo naikon lubat doi bundukon doi yaku, bai lobian kona babasalan doi yaku, sabab akiyoon kusosung yana daanomo. ³¹Akiyoon, yaku toiyo indee miano yanadoo. Baanggon yaku lubat mansau mian tukon paisu sulano kobangsa Israel tingoniiyo yana.”

³²Yohanes koidan pelengene nabilita nia, “Yaku kitayo ko Mian Bisa Na Loh obulus buno tomisi lapatiing doi timbu maka dungol doi bunggono. ³³Doiyo kosinggatoo yaku akiyoon kutoiyo indee yana. Bai Mian Bisa bintekene yaku sauwo tukon paisu lapamo bontiikene doi yaku, ‘Kalu ikoo kitayo ko Mian Bisa Na Loh obulus, maka dungol doi meeng komian, yanamo naikon komo mansau tukon Mian Bisa Na Loh.’ ³⁴Yaku lapamo kitayo susuunggu,” Yohanes bantile, “tukon yaku pelengene kobantilan baikon yanamo ko Mian Bisa Napau.”

Yesus napololaing-pololaing tumbeno

³⁵Modoakon kooloyo Yohanes daano doi lipudoo koidan tukon lua kona pololaing. ³⁶Sambuno yana kitayo Yesus alon, yana bantile, “Pokitayo! Naiyamo ko Mian Bisa na Domba Pauno.”

³⁷Yohanes napololaing molua lengele bantil-bantilanoo, maka ampakono lainge Yesus. ³⁸Yesus mbaleng doi tonggulungo, tukon kitayo yanila daano molainge yana. Yana mansadai, “Oila komuyu nainumbolii?”

Yanila timbiliyo, “Labi, naando Labi nadungolan?” (Silingan ‘Labi’ koalatio gulu.)

³⁹“Mai pokitayo,” Yesus bantile. Yanila ampakon tukon yana mokitayo inaando kona dungolan. Doiya kosinggatoo batong sangkap kinobiano. Oloyodoo yanila podungoli yana.

⁴⁰Daano komeeng doi mianoo molua mo lapamo mondongolii oila Yohanes nabinantilo tukon doibundu ampakon lolainge Yesus, doiyamo Andelias, Simon Petulus utuso. ⁴¹Soisobiton Andelias unggoliiyo Simon, utusodoo, tukon bantile doi yana, “Kami lapamo pososuung tukon Mesias!” (Mesias pokakana Klistus, doiyamo: Tomundo Pasalamat.) ⁴²Andelias antekene Simon doi Yesus.

Yesus sumboliyo Simon, maka bantile, “Ikoo Simon, Yona napau. Ikoo naikon sinombuikon Kefas.” (Kefas pokakanamo Petulus, koalatio: batu bunggo.)

Yesus uange Filipus tukon Natanael

⁴³Modoakon kooloyo Yesus tatukenemo sulano ampakon doi Galilea. Yana pososuung tukon Filipus, tukon bantile doi yana, “Mai laingaku!” ⁴⁴Filipus. kona lipu doi Betsaida, doiyamo Andelias tukon Petulus nadungolan. ⁴⁵Filipus pososuung tukon Natanael maka nabantile doi yana, “Kami lapamo pososuungene domianoo Musa mo bantile doi Mian Bisa na Buku Ukum lalomo, tukon nabi-nabi mo babulitakangene. Yanadoo Yesus doi Nasalet, Yusuf napau.”

⁴⁶Bai Natanael timbiliyo, “Moolakene kai kolangge meeng monondok lubat doi Nasalet?”

“Mai kitayo susuumu,” Filipus timbiliyo.

⁴⁷Yesus kitayo Natanael lubato, maka bantil doi yana, “Kitayo, ndaiya Israel miano motutuu. Akiyo kona kala doi yana.”

⁴⁸“Bulaando Tama tingoniiyo yaku?” Natanael sadaiyo Yesus. Yesus timbiliyo, “Akiyoon Filipus nauange ikoo, yaku kitayomo ikoo doi kayung taepa uunodoo.”

⁴⁹“Tama Gulu,” Natanael bantile, “Tama daano Mian Bisa Napau! Tama kai ko Tomundo bangsa Israel!”

⁵⁰Yesus bantile, “Ikoo mangangga tongo sabab yaku bantile baikon yaku lapamo kitayo ikoo doi taepa uunodoo? Langgelange mo lobian mododoon lobian babasal naikon ikoo kitayo!” ⁵¹Yesus bantile koidan, “Bisa, anggayomo, ikoo naikon kitayo kotimbu tobuka, tukon ko Mian Bisa namalaekat-malaekat liba obulus doi Manusia Napau.”

Lamean basowaanan doi Kana

2 Lua kopopook koidan daano kolamean osowaanan doi kota Kana doi Galilea, tukon Yesus tinano daano idoo. ²Yesus tukon napololaing-pololaing inuang doi lameanoo. ³Sambuno kosuka kabuso, kotinano bantile doi Yesus, “Yanila kobuso kona suka.”

⁴Yesus timbiliyo, “Tina inai mosumboliiyo yaku. Akiyoon napolong kotempono yaku mookitakene kobutonggu.”

⁵Bai Yesus tinano bontiikene kolombonua, “Pokubaiyomo indee kona binantil doi komuyu.”

⁶Idoo daano noom kogumbang mo inabos sulano komian nabakumosi loloiyo koadat Yahudi miano. Do gumbango koantoko meeng-meeng uga-ugaatene sakat kolitel. ⁷Yesus bontiikene doi lombonua-lombonuadoo, “Poontokiyo do gumbang-gumbango tukon paisu.” Yanila ontokiyo polong moonoo. ⁸Maka Yesus bantile doi yanila, “Diabudodoo mangala paisudoo soisik tukon babakene doi mokatuaiyo lameanoo.” Yanila babayomo paisudoo doi mokatuaiyo kolamean, ⁹tukon yana tamise dopaisudoo mo tealimo suka. (Yana aki natoiiyo doiyaa do sukadoo tolongo nalombonua mobatune do paisudoo komo toiyo.) Maka mokatuaiyo lameanoo koolaniyo babaabudoo malane, ¹⁰maka nabantile doi yana, “Sidutu komian tabayo kona suka mo monondok tuuno lolukon tukon kalu komian molubat

lungguwono momonginum, maka nasodo kosuka mo meelee. Bai Utus mangabos suka mo monondok tuuno polong budodoiya!”

¹¹Doiyamo komo minasaingdinggon tumbeno Yesus nakinubai. Yana kubaiyo doiya doi Kana doi Galilea. Tukon nakokubaidoo yana okitakene kona babasalan. Maka kona pololaing-pololaing anggayomo yana.

¹²Sambuno lapa doiya Yesus ampakono doi Kapelnaum polaing-laing tukon tinano, utus-utuso tukon pololaing-pololaingoo. Yanila dungol indaa moimoiya kooloyo kona kalumbit.

Yesus usok doi Temeneno Nabonua

(Mat. 21:12-13; Mlk. 11:15-17; Luk. 19:45-46)

¹³Sambuno Oloyo Babasal Paskah Yahudi lolanimo, Yesus ampakono doi Yelusalem. ¹⁴Temeneno Nabonua doi Yelusalem Yesus laate komian momabalukon saapi, domba, tukon tomisi lapatiing; tukon mian paisoboli doy osulang idoo. ¹⁵Yesus mangala meeng koalos pongumbas maka siikayo sasaibino do iyayonoo, mau domba tukon saapi, doi Temeneno Nabonua lalomo. Domianoo mo paisoboli doy nameda-meda yana anggalaupe tukon kona podoy tasabukon doi yayaa. ¹⁶Maka yana bantil doi mianoo momabalukon tomisi lapatiing, “Bingkate sasaibino naimbaa. Inai potealikene ko Tamanggu Nabonua pobolukiyan!” ¹⁷Maka kona pololaing-pololaing neneeke naikon koayat Kitab Moliyous nia, “Daku seang motuuk doi mu Bonua, oh Mian Bisa, suayo konoanggu.”

¹⁸Pamalenta Yahudi miano apese Yesus, yanila bantile, “Soba kubaiyo komu kuasa moinaanggon motokita doi kami baikon ikoo daano komu haak mokubaiyo bunoo doiya.”

¹⁹Yesus timbiliyo, “Polopoyomo na Bonua nia tukon tembo tolu kooloyo yaku kekendengemo koikoidan.”

²⁰Maka yanila bantile, “Sangkap kolono noom kotaum kona binangunan Temeneno Nabonua nia, tukon ikoo kuwotiyo kekendenge koidan tolongo tolu kooloyo?”

²¹Bai Temenenodoo Nabonua Yesus naminakisuutoo doiya butongo susuungo. ²²Sambuno lapa doibundu, Yesus inotuboimo doi namatean, kona pololaing neneekemo baikon do langgedoo

lapamo yana bantile. Jadi yanila anggayomo indee komo totulis doi Kitab Moliyous lalomo tukon indee komo lapamo Yesus bantile.

Yesus tingoniiyo sasaibino komian

²³Yesus daano doi Yelusalem doi tembo Lamekanano ko Paskah, badaang komian momaangga doi yana sabab minasaingdinggon yana nakinubai. ²⁴Bai Yesus susuungo aki naanggayo yanila sabab yana ontingoniiyo komian sasaibino. ²⁵Aki napalaluu mian mebee katalangan doi yana kaliangano indemo, sabab yana susuungo toiyo oila komo daano doi banggapi noano lalomo.

Yesus tukon Nikodemus

3 Daano komeeng komian balakaikene koagama doi Falisi miano kosambuno Nikodemus. ²Daano kopopook meeng yana lubat doi Yesus tukon bantil, “Tama Gulu, kami toiyo Tama Mian Bisa nasosumbolii. Sabab akiyo komeeng komian monggoola mongkubai langge meeng mososibong mo buno Tama nakinubai, kalu Mian Bisa aki nalolainge yana.”

³Yesus timbiliyo, “Poanggayomo, akiyo komeeng komian moteali Mian Bisa namian, kalu yana aki nasinuung koikoidan.”

⁴“Bulaando komian mobabasalo monggoola kai sinuung koidan,” Nikodemus bantile doi Yesus, “Moola kai yana usok koikoidan doi tinano tiano lalomo maka nasinuung koidan?”

⁵Yesus timbiliyo, “Bisa tuuno daku bantilan nia: kalu mian aki nasinuung tukon paisu tukon Mian Bisa Na Loh, do mianoo aki nateali Mian Bisa namian. ⁶Kobanggapi motubo doi dunia sinuung tukon doi tama-tinanggita, bai kalu doi cala lohani kita sosuung tukon Mian Bisa Na Loh. ⁷Inai masaingding kalu yaku bantile: komuyu sasaibino sio posinuung koidan. ⁸Kombombuul napuul inaando kona mongiasan; kita lengele kona lalo, bai aki nda toiyo kona lubatan tukon inaando kona tausan. Bunomo lakon doiya tukon mian mo sinuung tukon Mian Bisa Na Loh.”

⁹“Bulaando doiya nggoola nateali?” Nikodemus mansadai.

¹⁰Yesus timbiliyo, “Ikoo gulu doi Islael; bulaando ikoo aki mutoiyo? ¹¹Anggayomo: kami basilingan tolongo oila kaliangano kami mo toiyo, tukon kami mebee bantilan tolongo oila komo lapamo kami kitayo; bai komuyu aki poyase talimayo komai bantilan. ¹²Komuyu aki poanggayo kalu

yaku basalitakene doi komuyu kolangge-langge nai dunia nia; bulaando komuyu monggoola anggayo, kalu yaku basalitakene doi komuyu kolangge-langge doi sulugaa? ¹³Akiyo komeeng komian monggoola liba doi sulugaa, tolongo yana mo obuluso doi dunia, doiyamo Manusia Napau.

¹⁴Bunomo pokakana Musa molibakene kobinda tambaga doi meeng kokayung batango doi padang lalomo, bunomo lakon doiya Manusia Napau sio nalinibakon, ¹⁵sulano sasaibino komian mo maangga doi yana malaat tuboan mobisa tukon posidutukon.”

¹⁶Tobikon Mian Bisa namamaasikanano kobanggapi nai dunia nia, tobikon yana beekene kona na Pau mo meeng sulano doi inde-indee komiano komaangga doi yana aki nasilaka, bai malaat tuboan mobisa tukon posidutukon. ¹⁷Mangaani Mian Bisa kapatuwo kona Pau bolikon sulano naukume kodunia nia, bai sulano nasalamatene. ¹⁸Mian mo anggayo doi yana aki nainukum, bai mian mo aki namaangga lapamo Mian Bisa ukume, sabab yana aki naanggayo ko Mian Bisa Napau mo meeng. ¹⁹Yana tinuntut luwedoi langge nia: Madialanoo lapamo lubat doi dunia, bai kobanggapi tolongo yase kokalipookan maka baino doi madialan, sabab yanila nakokubai lokis. ²⁰Doi memeeng komian mo mongkubai lokis, mosikitene komadialan; yana aki nayase lubat doi namadialanan, sulano kona kokubai mo lokis aki natotingonii. ²¹Bai komian mo loingiyo ko Mian Bisa namongiasan, lubat doi namadialanan sulano nateali tokita oila kona kinubaidoo doiya daano pokokonoi ko Mian Bisa namongiasan.

Yesus tukon Yohanes Pasau Mian

²²Sala buno doiya Yesus tukon napololaing-pololaing ampakono doi Yudea. Yana dungol indaa moimoiya kotembo kona kalumbit tukon yanila mansau mian. ²³⁻²⁴Doiyo kosinggato Yohanes akiyoon nausok doi talunggu. Yana mansau mian doi Ainon, aki namododoon doi Salim, sabab indaa daano mobadaang kopaisu. Mian-mian lubat doi yana, tukon yana sauwo yanila.

²⁵Moimoiya Yohanes napololaing tambuuno ponggeeleki tukon Yahudi miano naatulan kaliangano babilisiian butong.

²⁶Yanila ampakon doi Yohanes, tukon bantile, “Tama Gulu, kai Tama daano moneneeke komian mo pololaing Tama doi Paisu Yoldan sembeleng, mo Tama otudoikene doi kami lolukonoo? Yana diabudodoo momansau mian koidan, tukon sasaibino komian ampakon doi yana!”

²⁷Yohanes timbiliyo, “Kobanggapi aki namoola malaat langgelangge kalu Mian Bisa aki nabeekene doi yana. ²⁸Komuyu susuungo lapamo lengele yaku mobantile, ‘Yaku bolikon Tomundo Pasalamat. Yaku sinumbolii poloolukoni yana.’ ²⁹Babaabu boine daano babaabu malane koono. Babaabu malane nasobat tolongo kokondong nggaupe yana tukon mondongolii, tukon sanaang molongol babaabu malane nalalo. Bunomo koidan tukon yaku. Diabudodoo yaku sanaang tuuno. ³⁰Yanamo komo palaluu tuuno, tukon yaku kinduungo napalaluu.”

Yanamo komo lubat doi sulugaa

³¹Komo lubat doi babo liisiyo sasaibino. Komo lubat doi dunia tongusokon dunia miano, tukon basalita tolongo langgelangge doi dunia. Yana mo lubat doi babo liisiyo sasaibino. ³²Yana basalita tolongo langge mo lapamo kinita tukon linongol, bai akiyo komeeng komian moanggayo kona bantilan. ³³Mian mo anggayo doi nabantilanoo, anggayo baikon ko Mian Bisa bisa. ³⁴Sabab komian Mian Bisa mo bintekene pelenggene ko Mian Bisa nabantil-bantilan, sabab ko Mian Bisa Na Loh lapamo bineekon totubo doi yana. ³⁵Tama seange kona Pau, tukon lapamo beekene sasaibino kona kuasa doi yana. ³⁶Mian mo maangga doi Yesus naikon yana malaat tuboan mobisa tukon posidutukon. Bai komian mo aki naloingiyo Yesus aki namalaat tuboan. Yana Mian Bisa ukume sidutu polong posidutukon.

Yesus tukon boine Samalia

4 Falisi-falisi miano lengele baikon Yesus malaat tukon mansau mian lobian badaang pololaing tukon mololainge Yohanes. (²Kona bisaan Yesus susuungo aki namansau mian tolongo napololaing-pololaing.) ³Sambuno Yesus toiyo baikon ko Falisi-falisi miano lapamo lengele do halloo, yana ampakon doi Yudea abali doi Galilea. ⁴Doi naampakonan yana sio naloloiyo ko Samalia. ⁵Maka Yesus polongo doi meeng kokota doi Samalia

kosambuno Sikhal, aki namododoon doi lipudoo lolukon Yakub mobeekene kona pau Yusuf. ⁶Idoo talaat Yakub nabubung. Yesus pakadak tuuno sabab naampakonon, tobikon doiya yana osulang doi bubungoo bibilo. Doiya kosinggatoo ugaate batong songulo lua suun kooloyo, ⁷⁻⁸tukon Yesus napololaing-pololaing lapamo ampakon doi kota yanila mongoli kinaan.

Boobus doiya meeng koboine Samalia lubat matambuk paisu. Yesus bantil doi yana, “Tina, momoola kumangkabi monginum?”

⁹Boinedoo Samalia timbiliyo, “Tuan Yahudi miano, yaku Samalia miano; bulaando Tuan mangkabi monginum paisu doi yaku?” (Sabab ko Yahudi miano akiyo kopotodulian tukon Samalia miano.)

¹⁰Yesus timbiliyo, “Kalu naikon ikoo toiyo ko Mian Bisa napebee tukon indee komo mangkabi monginum paisu doikoo, tantu ikoo susuumu mangkabi monginum paisu doi yana, tukon yana naikon beena ikoo paisu tuboan.”

¹¹Boinedoo bantile, “Tuan akiyo komu patambuk, naiya bubungia atean tuuno. Inaando Tuan komu malaatan paisu tuboan? ¹²Yakub, tamanggami natauwa, mobeekene kami nabubungia. Yana susuungo mangala napaisu ininum naimbaa; bunomo lakon kona labuk-labuk tukon naiyayon piniala. Kai Tuan aanggene Tuan lobian babasal tukon Yakub?”

¹³“Mian monginum napaisu nia yana molou koidan,” Yesus nabantilano, ¹⁴“bai komian mo monginum kopaisu naikon yaku mobeekene, aki naikon namolou koidan sidutu-posidutukon. Sabab kopaisu yaku naikon mobeekenedoo teali paisu matano doi butongo lalomo mo lomba sumbot tukon beena tuboan doi yana mobisa tukon posidutukon.”

¹⁵Boinedoo bantile, “Tuan, beena yaku paisudoo, sulano yaku akimo kumolou koidan; tukon akimo napalaluu kuabali naimbaa mangala paisu.”

¹⁶“Ampakono, uange komu langkai maka muabali naimbaa,” Yesus bantile.

¹⁷“Yaku akiyoon nadaano daku langkai,” boinedoo napotimbili.

“Bisa kana komu bantilan,” Yesus napotimban. ¹⁸“Sabab

ikoo osowaano lima luunggon, tukon komalane mupodungolian bolikon mulangkai.”

¹⁹“Diabudodoo yaku toiyo Tuan meeng konabi,” boinedoo nabantilano. ²⁰“Komai tulunan sosubaiyo ko Mian Bisa nai bunggul nia, bai Tuan natulunan bantile baikon tolongo doi Yelusalem kolipu komian nasosubaiyano ko Mian Bisa.”

²¹“Anggayomo,” Yesus bantile doi yana, “meeng kotembo naikon komian sosubaiyo Tama, bolikono nai bunggul nia, tukon koidan bolikon doi Yelusalem. ²²Komuyu Samalia miano sosubaiyo kolobo mo aki potingoniiyo, bai kami Yahudi miano sosuba doi Yesus kami mo tingoniiyo, sabab kokasalamatan lubat doi Yahudi miano. ²³Bai kotempono naikon nalubatan, lapamo lubat, baikon tukon Mian Bisa Na Loh nakuasa kobanggapi naikon sosuba doi Tama doiyamo Mian Bisa mo bisa pokakana kona mongiasan Tama. ²⁴Sabab ko Mian Bisadoo Na Loh, tukon tolongo nakuasa Mian Bisa Na Loh ko mian-mian nggoola sosubaiyo Tama bunomo lakon yana daano.”

²⁵Boinedoo bantile doi Yesus, “Yaku toiyo Tomundo Pasalamat (mo sinombuikon Klistus) naikon lubat. Kalu yana lubat, yana bontiikene doi kita sasaibino kolangge doi kita.”

²⁶“Yakumo naiya,” Yesus bantile, “yakumo diabudodoo pobasalitai tukon ikoo.”

²⁷Doiya kosinggatoo Yesus napololaing-pololaing abalimo. Yanila masaingding mokitayo Yesus pobasalitai tukon meeng koboine. Bai akiyo mau nabaino meeng komian doi yaniladoo mo mansadai doi boinedoo, “Tina indee komu palaluu?” kai mo mansadai doi Yesus, “Bulaando Tama pobasalitai tukon do boinedoo?”

²⁸Maka boinedoo tinggalemo kona gumbang idoo maka naobuleng doi kota tukon babotilanggene doi mian-mianoo indaa. ²⁹“Mai pokitayo komian mo bantikene yaku sasaibino kolangge mo biasa yaku kubaiyo. Kai yanamo do Tomundo Pasalamatoo?” ³⁰Maka dopai mian-mianoo tinggalemo konapo kota maka ampakono doi Yesus.

³¹Singat doiya napololaing-pololaing tobiyo Yesus mokaan. “Tama Gulu,” yanila bantile, “mai kaano.”

³²Bai Yesus timbiliyo, “Daano kokinaan doi yaku mo aki po toiyo.”

³³Maka dona pololaing-pololaing yanila posadaimo, “Kai daano komian mobabakene kokinaan doi yana?”

³⁴Maka Yesus bantile, “Daku kinaan doiyamo tolono loloiyo kona mongiasan bintekene yaku, tukon alapayo kolimang mo bineekon doi yaku. ³⁵Komuyu bantile, ‘Baimo sangkap kobituwon laatemo kobapupuian.’ Bai yaku bantile doikoo: Pombalenge koasi labuwedoo mo sonimo, laatemo kona pinupuian. ³⁶Komian mo bapupui tambuuno talimayo kona tambo tukon pototongikene kona hasil motuuk doi tuboan mo bisa tukon posidutukon. Maka komian mo masabukon tukon mian mo bapupui moola balasanaang posinggat-singgat. ³⁷Nasosombotiya bisa koidan, ‘Komeeng masakakon kobailong bapupui.’ ³⁸Yaku bintekene komuyu moampakon bapupui doi asi mo aki pomolimang; komian bailong balimango indaa, tukon komuyu mantalima koutungo doi yaniladoo nalimang.”

³⁹Badaang ko Samalia miano mondoong doi kotadoo momaangamo Yesus, sabab do boinedoo bantile, ‘Yana bantile doi yaku sasaibino kolangge mo biasa yaku kubaiyo.’ ⁴⁰Sambuno dopai Samaliadoo miano pososuung tukon Yesus, yanila kabiyo tukon sabole-bole sulano yana nandoong tukon yanila. Jadi Yesus ndoong idoo lua kooloyo kona kalumbit.

⁴¹Boobus doibundu lobian badaang koidan komian momaanga doi Yesus sabab oila kona inotunggulikon susuungo doi yanila. ⁴²Yanila bantile doi boinedoo, “Kami maangamo diabdoo, bolikon koidan sabab oila doikoodoo mubinontiikon doi kami, bai kami susuunggami lapamo molongol yana, tukon kami toiyo baikon yanamo ko Pasalamat dunia.”

Yesus aline komeeng kopagawe pamalenta napau moseselon

⁴³Sambuno lua kooloyo kona ndoongan doi Sikhhal, Yesus ampakon doi Galilea. ⁴⁴Yesus susuungo lapamo bantile, “Meeng konabi aki nainodotii kalu doi nalipu susuungo.” ⁴⁵Bai sambuno Yesus polong doi Galilea ko mian-mian indaa talimayo tukon sanaang konoano, sabab yanila daano doi Yelusalem doi Oloyo Babasal Paskah, tukon yanila lapamo kitayo sasaibino Yesus nakinubai.

⁴⁶Doibundu Yesus abalimo doi Kana doi Galilea, indaamo yana namoboliiian paisu teali suka. Doi kotadoo daano komeeng kopagawe pamalenta, kona pau anoon momasakit doi Kapelnaum. ⁴⁷Sambuno yana ndongoliiyo Yesus molubato doi

Galilea lengget doi Yudea, yana ampakon doi Yesus tukon kabiyo Yesus nalubat doi Kapelnaum sulano naaline kona pau mo kabimo mate. ⁴⁸Yesus bantil doi pagawe pamalentadoo, “Kalu komuyu aki pokitayo komo minasaingdinggon, komuyu aki pomaangga.”

⁴⁹“Tuan,” pagawe pamalentadoo timbiliyo, “mosobit lubat moakiyoon daku pau namate.”

⁵⁰Yesus bantile doi yana, “Ampakono, komu pau tangalino.”

Do mianoo anggayomo Yesus nabantilan, maka yana ampakon. ⁵¹Doi loloon tanga kona peleleani-peleleani ndobotiyo yana tukon bontiikene, “Tuan napau tangalino.”

⁵²Maka yana mansadai doi yanila batong bulaa do paudoo natambuunan tangalin. Yanila timbiliyo, “Kolubabi ugaatene batong meeng suun kooloyo kona maligoot lopus.” ⁵³Maka do paudoo tamano neneeke baikon doiyamo kona posinggatan Yesus nabontiikanano yana, “Komu pau totobomo.” Maka yana tukon sasaibino kopulino maangamo doi Yesus.

⁵⁴Doiyamo komo minasaingdinggon koluano luunggon Yesus mo kubaiyo doi Galilea sambuno yana lubat doi Yudea.

Sesel natangalinan doi paisu Betesda

5 Lapa doiya daano ko Yahudi miano nalamean, maka Yesus ampakon doi Yelusalem. ²Doi Yelusalem nggaup ko “Tataapon Domba” daano komeeng kopaisu, doi silingan Iblani sinombuikon Betesda. Ido daano kolima kokombiang. ³Doi kombiang-kombiangoo badaang komian masakit momoolo; daano komo piit, daano komo pelong, tukon daano komo lapit. [Yanila sasaibino montotiili do paisudoo naliaabokan. ⁴Sabab daano kotembono Temeneno namalaekat obulus doi paisudoo lalomo nakabuke kopaisuno. Tukon mian mo seselon indee komo tumbe tulak doi paisudoo lalomo singgato kopaisuno daano moliabokan mian naikon tangalin indeemo kona sesel yana mo toupiyo.] ⁵Doi lipudoo daano komeeng komalane mo seselon tolu kolonomo alu kotaum kolumbito. ⁶Yesus kitayo yana momoolo indaa, tukon toiyomo yana malumbito tuuno kona seselonan; maka Yesus sadaiyo doi yana, “Ikoo yase mutangalin?”

⁷Do mianoo moseselon timbiliyo, “Tama, akiyo komian naimbaa sulano nausekene yaku nai paisu nia lalomo doi



Loloon doi kota Yelusalem (5:1)

tembo paisuno modaano liabokan. Tukon nasodo kuampakon doi paisudoo, komian bailong lukono usok.”

⁸Maka Yesus bantile doi yana, “Banguno, bingkate komu balayon tukon ampakono.” ⁹Doiya kosinggatoo do mianoo tangalino. Yana bingkate kona balayon tukon ampakono.

Doiya halloo kona tealian doi oloyo Tadean. ¹⁰Tobikon doiya kopamalenta Yahudi bantile doi mianoo mo sodo tangalin, “Oloyo nia oloyo Tadean. Ikoo aki nanggoola bingkate komu balayon.”

¹¹Bai do mianoo timbiliyo, “Mian mo aline yaku budodoo, komo sumboliiyaku bingkate daku balayon tukon ampakon.”

¹²“Indee kai yana komo sumboliikon binggate komu balayon tukon ampakon?” yanila mansadai.

¹³Bai do mianoo mo lapamo tangalin kona sesel aki natoiyoyo indee komiano, sabab Yesus banggilapuso doi mianoo namadaangan.

¹⁴Boobus doibundu Yesus pososuung do mianoo doi Temeneno Nabonua lalomo, tukon bantile doi yana, “Doiyo budodoo ikoo lapamo tangalin. Inaimo momongkubai lalim koidan, sulano naaki mumataup langge mo lobian kona kulokisan.”

¹⁵Maka ampakono do mianoo tukon popitoikene doi pamalenta Yahudi baikon doiyamo Yesus komo aline daku sesel.

¹⁶Sambuno buno doiya yanila atambuunemo kona sakisaawano Yesus, sabab yana aline komian nasesel doi oloyo Tadean.

¹⁷Bai Yesus bantile doi yanila, “Kotamanggu sidutu balimang polong naiya, tukon yaku koidan balimang.”

¹⁸Bantil-bantilanoo kubaiyo kopamalenta Yahudi pololokon mougngolii loloon sulano napo akateo yana. Yanila kubaiyo doiya, bolikon tolongo sabab yana molumbaiyo koatulan agama kaliangano doi oloyo Tadean, bai koidan mangaani yana bantile baikon ko Mian Bisadoo Tamano; koalatio yana pokakanakene kobutongo tukon Mian Bisa.

Pau nakuasa

¹⁹Yesus timbiliyo dopai mian-mianoo buno naiya, “Poang-gayo, Pau aki nanggoola kubaiyo indee-indee kolangge tukon nakuasa susuungo. Yana tolongo moola kubaiyo kolangge yana mo kitayo doi Tamano nakinubai. Sabab komo Tama nakinubai doiyamo koidan do Paudoo nakinubai. ²⁰Sabab Tama seseange kona Pau tukon otudoikene doi yana sasaibino kona kinubai susuungo. Tolonggo Tama naikon otudoikene doi yana kokubai-kokubai mo lobian babasal koidan, polong komuyu masaingding. ²¹Tamadoo otuboiyo komian mate, tukon beena yanila tuboan mobisa tukon posidutukon; bunomo lakon doiya Pau mebee tuboan posidutukon doi mian mo yase nabinee tuboan. ²²Tama susuungo aki naukume mau indee komiano. Sasaibino kokuasa, motuuk doi baukuman lapamo beekene doi na Paudoo. ²³Tama kubaiyo doiya sulano sasaibino komian odotiiyo Pau pokakanamo yanila moodotiiyo Tama. Komian mo

aki naodotiiyo Pau aki koidan naodotiiyo Tama mo sumboliyo kona Pau.

²⁴Bisa tuuno daku bantil-bantilan nia: Mian mo timbikene daku bantil-bantilan, tukon anggayo doi yana mo bintekene yaku, malaat tuboan mobisa tukon posidutukon. Yana aki nainukum; yana tongosodiimo doi matean tukon malaat tuboan. ²⁵Poanggayomo: Naikon laate kotempono – bai lapamo polong kotempono – mian momate naikon molongol Mian Bisa Napau alalo. Tukon mian mo molongol yana naikon tubo. ²⁶Pokakana Tama susuungo tuboan nalubatan, yana tealikene kona Pau tuboan nalubatan koidan. ²⁷Yana lapamo beekene doi na Pau kohaak sulano tindokiiyo, sabab yana Manusia Napau. ²⁸Inai komuyu pomasaingding polengele niiya hallia, sabab kotempono naikon lubat baikon sasaibino komian mo mate lengele koalalo, ²⁹maka natobuat doi kibal. Mian mo lapamo mokubai monondokan naikon abali luwedoi matean tuuk doi tuboan. Bai mian mo lapamo mongkubai lokis yana tubo bai malaat ukuman.”

Kona tutuuwan kaliangano Yesus

³⁰“Yaku aki nanggoola mongkubai oioila motolongo kumongiasan susuunggu. Yaku tolongo mongukum pololoi tukon Mian Bisa napobintokon. Tukon daku putusan adil, sabab yaku aki kuloloiyo daku mongiasan susuunggu, bai Tama namongiasan mo bintekene yaku.

³¹Andeno yaku mebee bantilan motolongo tuuk doi butonggu susuunggu, do bantilanoo aki namoola inangga. ³²Bai daano komian bailong mo mebee bantilan motuuk doi yaku, tukon yaku toiyo dona bantilanoo bisa. ³³Komuyu lapamo mobintokon bito-bito doi Yohanes, tukon yana lapamo mebee bantilan mo bisa kaliangano doi yaku. ³⁴Hallia yaku bantile, bolikon sabab yaku palaluuwo kobantilan doi banggapi, bai sulano komuyu posinalamaton. ³⁵Yohanesdoo bunu posi mo kolot tukon tebeason kolaango. Tolongo aki namalumbit komuyu sanaang mantalima do laangodoo. ³⁶Bai daku bantilan lobian babasal doi Yohanes nabantilan. Oila daku kinubai budodoiya, doiya limang mo pinalentakon Tama doi yaku, natokitaan baikon Tama molapamo bintekene yaku. ³⁷Tukon Tama mo bintekene

yaku koidan mebee bantilan motuuk doi yaku. Komuyu akiyoon pomolongol alalo kai mokita duduso. ³⁸Kona bantil-bantilan akiyo komo tangabos doi noamuyu lalomo sabab komuyu aki pomaangga doi yaku nabobintokon. ³⁹Komuyu palajalio ko Kitab Moliyous sabab komuyu aangene baikon tukon cala doiya komuyu malaat tuboan mobisa tukon posidutukon. Tukon doi Kitab Moliyousoo daano mebee bantilan motuuk doi yaku. ⁴⁰Bai komuyu aki poyase lubat doi yaku sulano pomalaat tuboan posidutukon.

⁴¹Yaku aki kumounggolii taanggaan doi banggapi. ⁴²Yaku tingoniiyo komuyu. Yaku toiyo komuyu akipo mamaasikene ko Mian Bisa doi noamuyu lalomo. ⁴³Yaku lubat tukon kuasa Tamanggu, bai komuyu aki potalimayo yaku. Bai kalu mian bailong lubat tukon nakuasa susuungo, komuyu yase talimayo yana. ⁴⁴Bulaando komuyu nggoola anggayo, kalu komuyu mounggolii tanggaalan doi tulamuyu, tukon aki ponggoola mounggolii tanggaalan doi Mian Bisa mo Meeng? ⁴⁵Inai poaangene yaku asalakene komuyu doi Tamanggu salaano. Tolongo komo asalakene komuyu doiyamo Musa, yanamo kopo minoinikon. ⁴⁶Ande-andeno komuyu anggayo doi Musa, komuyu naikon anggayo yaku sabab kaliangano yakumo yana tulise. ⁴⁷Bai kalu komuyu aki poanggayo indee Musa natinulis, bulaando kopoo moolaan maangga oila daku binantil?"

Yesus mebee kaan lima koloon komian

(Mat. 14:13-21; Mlk. 6:30-44; Luk. 9:10-17)

6 Bubulaa kotembo doibundu Yesus ampakon doi Paisu Galilea sembeleng, mo sinombuikon Paisu Tibelias. ²Sambuno polong indaa, badaang komian momalaing yana sabab yanila lapamo mongkita komo minasaingdinggon yana mo kubaiyo tukon aline ko mian-mian momasakit. ³Yesus tolibo doi bunggul bungkokono, maka osulang idoo tukon napololaing-pololaing. ⁴Doiya kosinggato loolanimo ko Oloyo Babasal Paskah Yahudi. ⁵Sambuno Yesus kitayo potikunggon, yana kitayo komian potutuundu molubat doi yana. Maka yana bantil doi Filipus, "Inaando konda malaatan bangolian kinaan, sulano sasaibino namian nia namoola kaan?" (⁶Yesus lapamo toiyo



Danau Galilea (6:1)

indee naikon kona kinubai, bai yana bantile buno doiya sabab yana ujio Filipus.)

⁷Filipus timbiliyo, “Loti koolino lua kosakato kolupia aki naikon nasukup doi mian-mian nia, mau nabaino ponggidikon.”

⁸Yesus napololaing bailong, doiyamo Andelias, Simon Petulus utuso bantile, ⁹“Dimbaa daano kopau-pau malane tukon lima koloti tukon lua koikan. Bai bulaando kona tealian tuuk doi mian mobadaang nia?”

¹⁰“Sumboliiyo ndaiya mian-mianoo naosulang,” Yesus bantile. Doi lipudoo daano badaang kobulung, maka dopai mian-mianoo osulango doi bulungoo – uga-ugaate daano lima koolon komian mala-malane. ¹¹Doibundu Yesus alayo do lotidoo, maka libakene konasyukuul doi Mian Bisa. Lapamo doiya yana ebe-ebesemo do lotidoo doi mian badaang. Boobus yana ebe-ebese do ikanoo tukon yanila kaan polong biya-biyai. ¹²Sambuno lapa kaan sasaibino yanila bobosul, Yesus bantil doi napololaing-pololaing, “Popototongikene do kinaano labino; inai nadaano komo tangaison.” ¹³Maka yanila pototongikene songulo lua kobois momoono kolabino do kinaano lima koloti komo kinaan doi mianoo badaang.

¹⁴Sambuno mian badaangoo kitayo komo minasaingdinggon Yesus mo kubaiyo, yanila bantile, “Bisa, naiyamo ko Nabi mo

minoinikon molubat doi dunia!” ¹⁵Yesus toiyo yanila yase lubat sulano pakisaayo yana teali napo tomundo. Tobikon doiya yana ampakono dampas doi lipu mobabungkukon.

Yesus papakon doi paisu bungkukono

(Mat. 14:22-33; Mk. 6:45-52)

¹⁶Salataa kooloyo adukon kaput, Yesus napololaing-pololaing ampakono doi paisu. ¹⁷Maka yanila lakit doi duanganoo pintosiiyo do paisudoo kona tuduan doi Kapelnaum. Kooloyo kalipookano bai Yesus akiyoon nalubotiiyo yanila. ¹⁸Sambuno buno doiya do paisudoo tambuuno babokolan sabab mombuul makansang. ¹⁹Sambuno yanila talabut ugaate limamo kai noomo kokilo kona kodoon, yanila kitayo Yesus lubat doi napo duangan tukon ampakon doi paisu bungkukono. Yanila matakut tuuno. ²⁰Bai Yesus bantil doi yanila, “Inai pomatakut, naiya yaku!” ²¹Maka sanaang yanila noano talimayo yana doi duanganoo, tukon doiya kosinggato donna poduangan polong doi napo lipu pinakituu.

Mian badaang unggoliiyo Yesus

²²Modoakon kooloyo mian badaangoo mo daano dungol doi paisudoo sembeleng, toiyo budodoiya tolongo meeng koduangan indaa. Yanila toiyo Yesus napololaing-pololaing lapamo taus tukon do duanganoo, bai Yesus aki namalaing. ²³Doibundu moimoiya koduangan doi Tibelias lubat doi lipudoo tukon balabu lolani do mianoo badaang namakaan loti lapamo Temeneno mopolonggon syukuul. ²⁴Sambuno mian badaang kitayo baikon Yesus mau koidan napololaing-pololaing akiyo idoo, yanila lakito doi duangan-duanganoo tukon ampakono doi Kapelnaum umboliiyo Yesus.

Yesus, loti mo mebee tuboan

²⁵Sambuno mianoila pososuung tukon Yesus doi paisu sembeleng, yanila mansadai doi yana, “Tama Gulu, indee kosinggato Tama napolongan naimbaa?”

²⁶Yesus timbiliyo, “Bisa, komuyu mounggoliiyo yaku bolikon komuyu mangalatikene komakisuuto komo minasaingdinggon yaku mo kubaiyo, bai tolongo komuyu molapamo kaan polong bobosul. ²⁷Inai pobalimang sulano pomalaat kinaan mo moola kabus tukon boowan. Pobalimango sulano pomalaat kinaan

mo aki naboowan tukon mo beena tuboan mobisa tukon posidutukon. Kinaanoo naikon Manusia Napau komo beekene doi komuyu, sabab yana lapamo Tama Mian Bisa odduke.”

²⁸Maka yanila mansadai doi yana, “Indee komai kinubai sulano mai kubaiyo ko Mian Bisa namongiasan?”

²⁹Yesus timbiliyo, “Naiyamo ko Mian Bisa nainiyas doi komuyu: poanggayomo yana Mian Bisa mo sumboliiyo.”

³⁰“Kalu buno doiya,” yanila bantile, “indee kotandano mo moola Tama beekene sulano mai kitayo tukon anggayo doi Tama? Oila naikon Tama nakinubai? ³¹Kotumbungami makaan manna doi padang lalomo, pokakana mototulis doi Kitab Moliyous lalomo, ‘Yana beena yanila kinaan loti doi sulugaa.’”

³²Maka Yesus bantile doi yanila, “Poanggayomo: Bolikon Musa, bai Tamanggumo komo beena doi komuyu loti mo bisa doi sulugaa. ³³Sabab loti Mian Bisa nabineekon doiyamo yana mo obulus doi sulugaa tukon mebee tuboan kobanggapi doi dunia.”

³⁴“Tama,” yanila bantile, “beena kami do lotidoo sidutu.”

³⁵“Yakumo koloti beena tuboan,” Yesus bantile doi yanila. “Mian mo lubat doi yaku akimo namalaal koidan posidutukon. Tukon mian mo maangga doi yaku akimo namolou koidan polong posidutukon.”

³⁶“Bai buno kubantilano doi komuyu, mau komuyu molapamo kitayo yaku, komuyu aki pomaangga. ³⁷Sasaibino komian Tamangu mo beekene doi yaku yanila lubat doi yaku. Yaku aki kutolake indee komo lubat doi yaku. ³⁸Sabab yaku obulus doi sulugaa, bolikon sulano kukubaiyo daku mongiasan susuunggu, bai yana namongiasan sumboliiyo yaku. ³⁹Naiyamo kona mongiasan mo sumboliiyo yaku: sulano doi sasaibino komian mo bineekon doi yaku, akiyo komeeng molapus; bai sulano yaku kuotuboiyo yanila doi Oloyo Nakiamatan. ⁴⁰Bisa naiyamo ko Tamangu namongiasan: Sulano sasaibino komian mo kitayo Paudoo tukon anggayo yana malaat tuboan mobisa tukon posidutukon, tukon yaku otuboiyo koidan doi Oloyo Nakiamatan.”

⁴¹Yahudi mianoo daango tambuunemo nanggimoliiyano Yesus, sabab yana bantile: “Yaku loti mo obulus doi sulugaa.” ⁴²Yanila bantile, “Baanggon niiya Yesus, Yusuf napau? Kami tingoniiyo

kotamano tinano! Bulaando yana bantile baikon yana obulus doi sulugaa?"

⁴³Maka Yesus bantile doi yanila, "Inai ponggimal. ⁴⁴Akiyo komeeng komian momoola lubat doi yaku, kalu Tamanggu mo sumboliiyo yaku, aki nababayo yana doi yaku; tukon indee komo lubat naikon yaku otuboiyo doi Oloyo Nakiamatan. ⁴⁵Doi Nabi-nabi na Buku lalomo daano mototulis buno naiya, 'Sasaibino komian naikon Mian Bisa otunggule.' Jadi sasaibino komian mo molongol doi Tama tukon monggiotunggulkon doi yana, lubat doi yaku. ⁴⁶Doi ya aki nabisa baikon daano komian mo lapamo kitayo Tama. Tolongo yana komo lubato doi Mian Bisa, komo lapamo kitayo Tama.

⁴⁷Potoiyo: Mian mo maangga, malaat tuboan mobisa tukon posidutukon. ⁴⁸Yakumo koloti mo mebee tuboan. ⁴⁹Pombumbu makaan manna doi padang lalomo tukon yanila mate koidan. ⁵⁰Bai aki nabuno doiya dolotidoo mo obulus doi sulugaa; mian mo makaan do lotidoo aki namate. ⁵¹Yakumo koloti mo obulus doi sulugaa - loti mo beena tuboan. Mian mo makaan naiya loti nia malaat tuboan posidutukon. Loti naikon yaku mo beekene motuuk doi banggapi nai dunia nia doiyamo sailonggu."

⁵²Yanila lengele doiya, mian badaang Yahudi ponggeeleki meeng tukon meeng. "Bulaando naiya mian nia monggoola beekene kosailo doi kita sulano nda kaane?" yanila bantile.

⁵³Maka Yesus bantile doi yanila, "Poanggayomo: Kalu komuyu aki pomakaan Manusiadoo Napau sailo tukon monginum sauno, komuyu bisa-bisa aki potubo. ⁵⁴Mian mo makaan sailonggu tukon monginum saunggu malaat tuboan mobisa tukon posidutukon tukon yaku otuboiyo yana doi Oloyo Nakiamatan. ⁵⁵Sabab kosailonggu bisa-bisa kinaan, tukon kosaunggu bisa-bisa ininum. ⁵⁶Mian mo makaan sailonggu tukon moinum saunggu, pomeenggon tuuno tukon yaku, yaku tukon yana. ⁵⁷Tama mo tubodoo, sumboliiyo yaku tukon yaku tubo doi Tama. Bunomo lakon mian mo makaan sailonggu naikon yana tubo doi yaku. ⁵⁸Naiyamo koloti mo obulus doi sulugaa: bolikon loti mo buno tumbumuyu nakinaan. Sabab kaane do lotidoo, yanila mate koidan. Bai mian mo makaan loti nia yana malaat tuboan posidutukon."

⁵⁹Sasaibino doiya Yesus bantile tembo Yesus mongotunggul doi bonua kaledaan doi Kapelnaum.

Bantil-bantilan mo mebee tuboan mobisa tukon posidutukon

⁶⁰Sambuno lapa molongol Yesus nabantil-bantilan, badaang doi napololaing bantile, “Otunggul nia todudul babalat. Indee komo nggoola talimayo!”

⁶¹Yesus toiyoyo doi napololaing-pololaing nggimal doiya halloo. Maka yana bantile, “Oilakai komuyu alatio sala doiya bantil-bantilanoo? ⁶²Bulaando kona tealian naikon kalu komuyu kitayo Manusia Napau abali liba doi nadungolan tumbeno? ⁶³Komo kubaiyo kobanggapi tubo doiyamo Mian Bisa Na Loh. Banggapi nabukuanan akiyo kotakoso. Bantil-bantilan nia yaku mo bantile doi komuyu doiya Mian Bisa Na Loh nabantilan tukon bantil-bantilan mo mebee tuboan. ⁶⁴Mau nadaano koidan doi komuyu mo aki namaangga.” (Yesus toiyomo doi tumbe-tumbeno indee indee komo aki namaangga, tukon indee komo kulokisangene yana.) ⁶⁵Maka Yesus bantile koidan, “Doiyamo kokaliangano yaku bontiikene doi komuyu baikon akiyo komeeng komian monggoola lubat doi yaku, kalu Tama aki nameleosene.”

⁶⁶Tambuuno doiya kosinggatoo badaang kona pololaing motinggale yana, tukon akimo nayase momalaing koidan. ⁶⁷Maka Yesus mansadai doi songulo luadoo kona pololaing, “Oilakai komuyu naikon tinggale yaku?”

⁶⁸“Temeneno,” Simon Petulus bantile doi yana, “doi indee miano naikon komai tausan? Bantilan Temeneno momebee tuboan mobisa tukon posidutukon. ⁶⁹Kami lapamo anggayo tukon tutuu baikon Yesus bito-bito momoliyous doi Mian Bisa.”

⁷⁰Yesus timbiliyo, “Bolikon kai yaku komo piliyo komuyu mosongulo lua nia? Mau nadaano komeeng doi komuyu nia moteali ibiliis!” ⁷¹Yesus naminakisuuti doiyamo Yudas Simon Iskaliot napau. Sabab mau Yudas meeng komian pololaingo Yesus, bai yanamo komo kulokisangene Yesus.

Yesus tukon utus-utuso

7 Sambuno buno doiya Yesus ampakono doi yayaa doi Galilea. Yana aki nayase doi kabupaten Yudea sabab kopamalenta Yahudi natetel akateyo yana.

²Doiya kosinggato adukono lolani ko Oloyo Babasal Sandung Loon. ³Maka Yesus utus-utuso bantile doi yana, “Tinggalemo naiya lipu nia tukon ampakon doi Yudea, sulano komu pololaing-pololaing nggoola kitayo komu limang. ⁴Akiyo komian mo nggoola seekene kona kinubai, kalu yana yase natololongol. Kalu ikoo kubaiyo kolangge-langge pokakana doiya, sasaibino kolipu sio natoiyoy!” (⁵Sabab koutus-utuso susuungo aki naanggayo doi yana.)

⁶“Akiyoon nalaate kotembono doi yaku,” Yesus bantile doi yanila, “bai tuuk doi komuyu samba-samba kotembo moola. ⁷Nadunia nia aki namoola mosikitene komuyu. Bai yaku takainomo dunia mosikitene, sabab sidutu yaku bantile doi dunia nia baikon kona kokubai kulokis. ⁸Poampakono komuyu susuumuyu doi lameanoo. Yaku aki kuampakon sabab akiyoon nalaate kotembono.” ⁹Bunomo doiya Yesus nabantilano doi utus-utuso, tukon yana ndoongo doi Galilea.

Yesus daano doi lamean Sandung Loon

¹⁰Sambuno utus-utuso taus doi lameanoo, Yesus aki nabiyok-biyok ampakon susuungo komian akiyo komo toiyo. ¹¹Polapakon do lameanoo, kopamalenta Yahudi unggoliyo yana tukon masa-mansadaikene, “Inaando yana?”

¹²Badaang komian tambuuno polisaukene kaliangano yana. Daano komo bantile, “Yana mian monondok.” Daano koidan komo bantile, “Aki! Yana tolongo atapayo komian badaang natuboan.” ¹³Bai akiyo komeeng komian mobalani basilingan longolikene kaliangano yana sabab yanila matakutene kopamalenta Yahudi.

¹⁴Doi lameanoo tanga-tangano, Yesus usok doi Temeneno Nabonua, maka yana tambuun bangotunggul. ¹⁵Kopamalenta Yahudi masaingding tuuno tukon bantile, “Bulaando naiya mian nia mobadaang kolangge tinoi bai aki nasikolah?”

¹⁶Yesus timbiliyo, “Naiya kuinotunggulkon nia bolikon kuotunggul, bai yana naotunggul bitekene yaku. ¹⁷Mian mo yase loloiyo ko Mian Bisa namongiasan, naikon toiyo oilakai daku otunggul luwedo Mian Bisa kabai doi yaku susuungu. ¹⁸Mian mo mebee otunggul susuungo tolongo mounggolii nangginaalan kobutongo susuungo. Bai komian mo mounggolii tanggaan

moluwedoi Mian Bisa mo sumboliyo yana, doiya mian jujul, aki nabakala-kala. ¹⁹Baanggon Musa lapamo beekene Mian Bisa napalenta-palenta doi komuyu? Bai doi komuyudoo komo aki potulutiyo do palenta-palentadoo. Bulaando komuyu moyase akateyo yaku?"

²⁰Mian badaangoo timbiliyo, "Ikoo tando! Indee komo yase akateyo ikoo?"

²¹Yesus timbiliyo, "Tolongo meeng kolimang yaku mokubaiyo doi oloyo Kopituno, komuyu masaingdingo. ²²Musa beena komuyu atulan sulano pobasunat - mau do basunatanoo kona bisaan aki naluwe doi Musa, bai doi pombumbu loolukoo akiyoon nadaano Musa. Tobikon doiya, mau doi oloyo Tadean komuyu sunate komian. ²³Kalu komuyu kubaiyo doiya sulano naaki posalayo Musa naatulan doi basunatanoo, bulaando komuyu monggimoliyo yaku sabab yaku mootuboiyo ko mian-mian momasakit doi oloyo Tadean? ²⁴Inai poukume komian tolongo lobo mo tokita, bai sio natuuk doi naadilan."

Kai bisa Yesus Tomundo Pasalamat?

²⁵Boobus doiya daano bubulaa ko Yelusalem miano bantile, "Bolikon kai naiya domianoo mo inumbolii sulano nainakate? ²⁶Pokitayo yana basalita tukon bebas doi mian badaang salaano, tukon akiyo komian mo bantile inde-indee doi yana! Kai konda pamalenta-pamalenta daanomo komo toiyo yanamo naiya ko Tomundo Pasalamat? ²⁷Bai kalu do Tomundodoo Pasalamat lubat, akiyo komeeng komian motoiyo yaando kona lenggetan! Banggokai kita toiyo doiyaa kona lenggetan namian nia."

²⁸Doibundu Yesus daano mongotunggul doi Temeneno Nabonua lalomo, yana nggeleamon tukon alalo mo babasal, "Jadi komuyu toiyo indee yaku nia, tukon doiyaa daku lenggetan? Yaku aki kulubat tukon kumongiasan susuunggu. Yana bintekene yaku mo daano kona haak mobintekene yaku, tukon yana nggoola inangga. Bai komuyu aki potingoniiyo yana. ²⁹Yaku tingoniiyo yana, sabab yaku luwedoi yana, tukon yanamo komo bintekene yaku."

³⁰Doiya kosinggatoo yanila yase lakoyo Yesus, bai akiyo komo balani taaniyo yana, sabab akiyoon nalaate kotembono. ³¹Badaang doi mian-mianoo tambuuno maangga doi yana, tukon

bantile, “Kalu Tomundo Pasalamatoo lubat, oilakai lobian badaang komo minasaingdinggon monggoola yana kubaiyo tukon doi mian nia?”

Akalo Yesus nalinakoan

³²Falisi miano ndongoliiyo bulaando do mianoo badaang napolisaukanano kaliangano Yesus. Tobikon doiya yanila pomeenggon tukon imam-imam kapalano, yanila sumboliiyo komoimoiya kopototooli Temeneno Nabonua sulano yanila ampakon molakoyo Yesus. ³³Yesus bantile doi mian badaangoo doi Temeneno Nabonua lalomo, “Tolongo budodoiya yaku daano polaing komuyu. Nalapa doiya yaku naikon abalimo doi mo bintekenedoo yaku. ³⁴Komuyu naikon unggoliiyo yaku, bai aki poposusuunggene yaku; sabab komuyu aki nanggoola lubat doi lipu naando daku daanoan.”

³⁵Maka pamalenta Yahudi bantil doi meeng tukon doi bailong, “Mian nia yase ampakon doiya tobikon kita aki nda pososuunggene yana? Oilakai yana yase ampakon doi Yahudi miano mo dungol doi lipu bailong doi Yunani miano, tukon mongotunggul Yunani miano? ³⁶Indee komakisuuto tukon nabantilan baikon kita unggoliiyo yana bai aki nanggoola pososuunggene yana tukon baikon kita aki nda nggoola lubat doi lipu nadaanoan yana?”

Paisu mo mebee tuboan

³⁷Doi oloyo napupusan do lameanoo, doiyamo oloyo mo palaluu tuuno, Yesus kokondong doi Temeneno Nabonua lalomo tukon bantile, “Mian mo molou sio nalubat doi yaku sulano namonginum. ³⁸Doi mian mo anggayo yaku, totulis doi Kitab Moliyous, ‘Doi noano lalomo lombamo kopaisu mo mebee tuboan.’” (³⁹Yesus basilinganggene kaliangano ko Mian Bisa Na Loh, naikon doi mianoo mobadaang motalimayo tukon anggayo yana. Sabab doiya kosinggato Mian Bisa Na Loh akiyoon nabineekon; sabab Yesus akiyoon nakinabasal tukon doi namatean.)

⁴⁰Badaang komian mondongolii oila komo Yesus nabinantil, tukon doi yaniladoo daano komo bantile, “Naiya mian nia doiyamo Nabidoo!”

⁴¹Kobailong bantile, “Naiyamo ko Tomundo Pasalamat!”

Bai daano komo bantile, “Eh, bulaando ko Tomundo Pasalamat molubat doi Galilea? ⁴²Doi Kitab Moliyous lalomo totulis baikon Tomundo Pasalamat daano katulunan Daud tukon naikon lubat doi Betlehem, doiyamo Daud nalipu.” ⁴³Doibundu tambuuno komian badaang ponggeelekikene doi Yesus. ⁴⁴Daano komo yase lakoyo yana, bai akiyo komeeng komian monggoola taaniyo.

Pamalenta Yahudi aki namaangga

⁴⁵Sambuno dopadagaidoo Temeneno Nabonua mo sinumbolii ampakon lakoyo Yesus lubato koidan, imam-imam kapalano tukon Falisi mianodoo sadaiyo doi yanila, “Bulaando komuyu moaki pobabaya yana doisumai?”

⁴⁶Padagai-padagaidoo timbiliyo, “Eh, akiyon nadaano komeeng komian mobasilingan pokakana yana!”

⁴⁷“Oilakai mau komuyu koidan lapamo yana atapayo?” Falisi mianodoo bantile. ⁴⁸“Kai daano doi nda pamalenta-pamalenta kabai Falisi miano mo anggayo yana? ⁴⁹Bai mian badaang nia, yanila aki natingoniiyo Musa naukum, tukon mau nabulaandomo koidan bai yanila lapamo kinutuk.”

⁵⁰Daano komeeng komian doi Falisi mianodoo doiyamo Nikodemus mo biasa lubat doi Yesus. Nikodemus bantil doi mian Falisi bailong, ⁵¹“Manulut Ukum, meeng komian aki namoola inukum kalu akiyon kona palakala linongol tukon kokubai akiyon napinalesa.”

⁵²“Kai mau ikoo doi Galilea?” yanila timbiliyo, “Palesayo ko Kitab Moliyous! Ikoo naikon kitayo baikon akiyo konabi mo luwedei Galilea!”

Meeng koboine linaat balolowa

[⁵³Sambuno buno doiya, sasaibino komian mule doi nabonua.

8 Bai Yesus ampakon doi Zaitun Bunggulo. ²Modoakon kooloyo dowa-dowasoono yana ampakon koidan doi Temeneno Nabonua, badaang komian molubat doi yana. Yesus osulang, tukon tambuuno mongotunggul doi yanila. ³Daano yana mobangotunggul, gulu-gulu agama tukon mian-mian Falisi babayo doi yana meeng koboine mo linaat balolowa. Yanila



Zaitun Bunggulo (8:1)

sumboliyo boinedoo kokondong doi tanga-tanga, ⁴maka yanila bantile doi Yesus, “Tama Gulu, boine nia linaat daano balolowa. ⁵Doi Musa na Ukum lalomo daano koatulan baikon koboine mobuno naiya sio nasikoli batu pomatekon. Budodoiya bulaandomo Tama napopikikon?” ⁶Yanila mansadai buno doiya tuuk natimbiliyo sulano yanila nggoola asalakene yana. Bai Yesus tolongo tootuku, tukon batulis doi buta tukon limano saano. ⁷Sambuno yanila dadase, yana benggete kooluno tukon bantile doi yanila, “Mian mo akiyo kona lalim doi komuyu, sobiyomo yana mo sakule tumbe tukon batu doi boinedoo.” ⁸Lapa doiya Yesus tootuku koidan tukon batulis koidan doi buta. ⁹Sambuno yanila ndongoliyo Yesus mobantile buno doiya, ampakono yanila mootinggale do lipudoo, meeng tukon meeng tambuun doi momotuwa. Doibundu baino Yesus susuungo komo dungol idoo tukon doboinedoo mo daano kokondong doi natampat. ¹⁰Maka Yesus benggete kooluno tukon bantil doi boinedoo, “Inaandomo yanila sasaibino? Akiyo komo daano ukume ikoo?”

¹¹“Akiyo, Tama,” boinedoo timbiliyo.

“Monondok,” Yesus bantile, “yaku koidan aki kuukume ikoo. Budodoiya ampakono, inaimo balolowa koidan.”]

Yesus madialan dunia

¹²Yesus basilingan koidan doi mian badaang, kona bantilano, “Yakumo komadialan dunia. Mian mo loloiyo yaku aki

naampakon doi kalipookan lalomo, bai malaat tuboan madialan.”

¹³“Budodoiya ikoo mebee bantilan doi butomu susuumu,” Falisi mianodoo bantile doi yana, “Komu bantilanoo aki natutuu.”

¹⁴Yesus timbiliyo, “Mau kai kumebbee bantilan doi butonggu susuunggu, daku bantilanoo tutuu; sabab yaku toiyo daku lubatan tukon daku ampakonan. Komuyu aki potoiyo inaando daku lubatan tukon daku ampakonan. ¹⁵Komuyu tindokiiyo komian tolongo banggapi naakal; yaku aki kutindokiiyo mau meeng komian. ¹⁶Bai kalu andeno yaku tindokiiyo komian, daku putusan adil, sabab yaku aki nabaino susuunggu; Tama mo bintekene yaku daano pomeenggon yaku. ¹⁷Doi Musa na Ukum lalomo totulis bunu naiya: Kobantilan mo bisa doiyamo bantilan doi lua komian. ¹⁸Komo beena bantilan doi butongo daano lua – yaku tukon Tama mo bintekene yaku.”

¹⁹“Kotamamudoo inaando?” yanila bantile.

Yesus timbiliyo, “Komuyu aki potingoniiyo yaku mau Tamanggu. Ande-andeno komuyu tingoniiyo yaku, tantu komuyu tingoniiyo ko Tamanggu koidan.”

²⁰Sasaibino doiya Yesus bantile tembo yana daano mobangotunggul doi Temeneno Nabonua lalomo loolani kopeti sosubakon natangabosan. Bai akiyo komeeng komian mo lakoyo yana, sabab akiyon nalaate kotembono.

Doi lipu kuampakonan, komuyu aki ponggoola lubat

²¹Yesus bantil koidan doi yanila, “Yaku naikon ampakono, tukon komuyu naikon unggoliiyo yaku, bai komuyu sio pomate doi polalim lalomo. Doi lipu kutausan, komuyu aki ponggoola lubat.”

²²Maka pamalenta Yahudi bantile, “Ugaate yana akateyo kobutongo, sabab yana bantile, ‘Doi lipu kutausan, komuyu aki ponggoola lubat.’”

²³Maka Yesus bantil doi yanila, “Komuyu lubat doi bilit; bai yaku lubat doi babo. Komuyu doi dunia nia; yaku bolikon doi dunia. ²⁴Doiyamo kosababpo yaku bantile doi komuyu, baikon komuyu mate doi polalim-lalim lalomo. Tukon takainomo

komuyu mate doi polalim-lalim lalomo, kalu aki poanggayo baikon 'yakumo yana komo sinombuikon YAKU DAANO'."

²⁵"Ikoo indee miano kona tutuuwan?" yanila sadaiyo.

Yesus timbiliyo, "Indee kona tuukan yaku mobasalita koidan tukon komuyu! ²⁶Daano badaang kolangge motuuk doi komuyu yaku mo yase bantile tukon tindokiiyo. Bai yana mo bintekene yaku nggoola inangga. Tukon yaku popitoikene doi dunia oila komo yaku lengele doi yana."

²⁷Yanila aki naalatio baikon yana daano posalитай doi yanila tentang Tama. ²⁸Tobikon doiya Yesus bantile doi yanila, "Sio kalu komuyu lapamo katandake do Manusiadoo Napau, komuyu naikon toiyo baikon 'yakumo naiya komo sinombuikon YAKU DAANO', tukon komuyu naikon toiyo baikon akiyo komeeng daku kinubai motuuk doi butonggu susuunggu. Yaku tolongo bantile oila komo inotunggukon Tama doi yaku. ²⁹Tukon yana mo bintekene yaku daano pomeenggon yaku. Yana aki nabaino sodiiyo yaku susuunggu, sabab yaku sidutu kubaiyo oila komo sanaangene konoano."

³⁰Sambuno lapa Yesus bantile sasaibinodoo, badaang komian moanggayo yana.

Mian Bisa mo bisa osodiiyo komuyu

³¹Doibundu Yesus bantil doi Yahudi miano mo lapamo maangga doi yana, "Kalu komuyu tubo loingiyo daku otunggul komuyu bisa-bisa kupololaing, ³²maka komuyu tingoniiyo ko Mian Bisa mo bisa, tobikon doiya komuyu inosodiimo."

³³"Kami nia Abalaham natulunan," yanila bantile. "Akiyoon nadaano kami komo teali indeemo naata! Oila komu makisuut tukon mobantile, 'Komuyu naikon inosodiimo'?"

³⁴"Bisa tuuno daku bantilan nia," Yesus bantile doi yanila. "Mian mo mongkubai lalim, doiya lalim naata. ³⁵Tukon meeng koata aki namalaat dungolan mo tataap doi pulino, bai kopau malaat dungolan mopositudukon doi pulino. ³⁶Tobikon doiya, kalu paudoo osodiiyo komuyu, komuyu bisa-bisa tongosodii. ³⁷Takainomo yaku toiyo komuyu Abalaham natulunan. Mau komuyu yase akateyo yaku, sabab komuyu aki potalimayo daku otunggul. ³⁸Oila daku kinita doi Tamanggu, doiyamo daku

binantil. Bai komuyu kubaiyo oila tamamuyu nainotunggukon doi komuyu.”

³⁹Yanila timbiliyo, “Kotamanggami doiyamo Abalaham.”

“Ande-andeno komuyu bisa-bisa Abalaham napau,” Yesus bantile, “tantu komuyu kubaiyo indee Abalaham nakinubai. ⁴⁰Yaku pelengene doi komuyu kolobo mobisa yaku mondongoliyo doi Mian Bisa, bai komuyu tolongo yase akateyo yaku. Abalaham aki namokubai komo buno doiya! ⁴¹Komuyu kubaiyo oila kotamamuyu nakinubai susuungo.”

Yanila timbiliyo, “Kami bolikon pau-pau lolowa. Kotamanggami tolongo meeng, doiyamo Mian Bisa momeeng.”

⁴²Maka Yesus bantile doi yanila, “Ande-andeno Mian Bisadoo Tamamuyu, komuyu mamaasikene yaku, sabab yaku luwedo Mian Bisa. Yaku aki kulubat tolongo kumongiasan susuungu, bai yanamo komo bintekene yaku. ⁴³Oila kosababpo komuyu mo aki pomangalatikene oila daku binantil? Sabab komuyu aki ponggola loingiyo daku otunggul. ⁴⁴Ibiliis kotamamu, tukon komuyu yase loloiyo kotamamuyu namongiasan. Doi tumbe-tumbeno Ibiliisoo pangakate. Yana aki nasidutu daano doi namonondokan, sabab akiyo komonondokan doi yana. Kalu yana bakala-kala doiya bisa, sabab bunomo doiya kona kokubai. Yanamo kokala tukon kokala naluwean. ⁴⁵Bai yaku bantile komonondokan, tukon tobikon doiya komuyu aki poanggayo yaku. ⁴⁶Indee komiano doi komuyu nokon monggoola tudoikene baikon daano daku lalim? Kalu yaku bantile komo monondok, bulaando komuyu moaki poanggayo yaku? ⁴⁷Mian moluwedo Mian Bisa, molongol Mian Bisa nabantilan. Bai komuyu bolikon doi Mian Bisa, tobikon doiya komuyu aki poyase molongol.”

Yesus tukon Abalaham

⁴⁸Yahudi mianodoo timbiliyo Yesus, “Aki kai nakala komai bantilan baikon ikoo Samalia miano mo inusoki setan?”

⁴⁹Yesus timbiliyo, “Yaku aki kuinusoki setan. Yaku odotiiyo ko Tamanggu, bai komuyu totulaiyo yaku. ⁵⁰Yaku aki kumounggolii pongodotiiian motuuk doi yaku. Daano komeeng komo kakaatenggene daku tongodotiiian tukon yanamo komo mongukum. ⁵¹Bisa tuuno daku bantilan nia, mian mo loloiyo daku bantilan, posidutukon aki namate.”

⁵²Maka Yahudidoo miano bantile doi Yesus, “Budodoiyo kami toiyo ikoo nia bisa-bisa moinusoki setan! Abalaham lapamo

mate, bunomo lakon sasaibino konabi. Bai ikoo bantile, 'Mian mo loloiyo daku bantilan, posidutukon aki namate.' ⁵³Kalu Abalaham susuungo lapamo mate, tukon sasaibino koidan konabi lapamo mate, ikoo nia indee? Bulaando ikoo molobian babasal tukon tamanggami Abalaham!"

⁵⁴Yesus timbiliyo, "Andeno yaku mounggolii tongodotiiian motuuk doi butonggu susuunggu, pongodotiiianoo akiyo kotakoso. Komo odotiiyo yaku doiyamo Tamanggu komuyu mo aanggene po Mian Bisa, ⁵⁵banggokai komuyu aki potingoniiyo yana. Bai yaku tingoniiyo yana. Andeno yaku bantile baikon yaku aki kutingoniiyo yana, maka yaku meeng komian mokalaka-kala, pokakana bunu komuyu. Yaku tingoniiyo yana, tukon loloiyo kona bantilan. ⁵⁶Kotamamu Abalaham sanaang tuuno baikon yana naikon kitayo daku tembo. Yana lapamo kitayo tukon yana sanaang!"

⁵⁷Maka Yahudi miano bantil doi Yesus, "Komu umul akiyoon napolong lima kolono kotaum, tukon lapamo ikoo kitayo Abalaham?"

⁵⁸Yesus timbiliyo, "Bisa yaku bantile doi komuyu: akiyoon Abalaham nasinuung, yaku daanomo."

⁵⁹Maka Yahudi mianodoo mangala batu sulano napoo sakule; bai Yesus basookon, maka yana taus tinggalemo ko Temeneno Nabonua.

Yesus aline komian piit mongkita koidan

9 Singgatoos Yesus ampakon, yana kitayo komeeng komian mopiit salataamo doi nasinuungan. ²Pololaing-pololaing Yesus mansadai doi Yesus, "Tama Gulu, bulaando naiya mian nia mosinuung piit? Oilakai yana susuungo nalalim kabai tamano tinano daano kona lalim?"

³Yesus timbiliyo, "Yana piit bolikon nalalim susuungo kabai lalim doi naolang tua, bai sulano komian nanggoola kitayo ko Mian Bisa nakuasa mobalimang doi butongo lalomo. ⁴Kalu akiyoon nakaput, kita sio nda limange yana nalimang mo sumboliiyo yaku. Popook naikon lubato, akiyo komeeng komian monggoola balimang. ⁵Kalu yaku daanoon doi dunia, yakumo komadialan dunia."

⁶Sambuno yana bantile bunu doiya, Yesus batupekon doi buta, tukon pokobuikene dona tupedoo tukon buta. Boobus yana itosiikene doi mianoo mopiit matano, maka bantile doi yana, ⁷“Ampakono kumosiyo kodudusomu doi Kolam Siloam.” (Siloam koalatino ‘Binotokon’.) Maka do mianoo ampakon kumosiyo koduduso. Sambuno yana abali, yana nggoolamo mokita.

⁸Kona pokolanikonan-pokolanikonan tukon mian badaang mo akiyoon doiya kitayomo mobakabi-kabi, sasaibino bantile, “Bolikon kai yana nia domianoo mo tolongo osulang maka nabakabi-kabi?”

⁹Daano komo bantile, “Takainomo yana.” Bai daano kobailong mo bantile, “Bolikon, yana tongo posialung do mianoo.”

Bai do mianoo susuungo bantile, “Yakumo nia.”

¹⁰“Bulaando kona tealian ikoo moola monggita?” yanila bantile doi yana.

¹¹Yana timbiliyo, “Mian mo sinombuikon Yesusdoo komo mongkubai lapetak kidik, maka solitikene doi matangu tukon bantile, ‘Ampakono kumosiyo kodudusomu doi Kolam Siloam.’ Maka yaku ampakono. Tukon sambuno yaku kumosiso kodudusonggu, yaku nggoolamo mongkita.”

¹²“Inaando do mianoo?” yanila mansadai.

Yana timbiliyo, “Aki kutoiyo.”

Falisi miano solidikiyo kona tealian natangalinando

¹³⁻¹⁴Oloyodoo daano oloyo Tadean tembono Yesus pokobuikene kobuta tukon natupe kona kubaiyano do mianoo mopiit teali mongkita. Maka do mianoo budodoo mopiit binaba doi Falisi-falisi miano. ¹⁵Mau yanila mansadaikene doi yana bulaando ikoo monggoola mongkita. Yana timbiliyo, “Yana abese kolapetak doi matangu, maka yaku kumosiyo tukon yaku nggoolamo mongkita.”

¹⁶Moimoiya ko Falisi mianodoo bantile, “Aki nabisa mian mo kubaiyo nia kona luwean doi Mian Bisa, sabab yana aki naodotiiyo kooloyo Tadean.”

Bai komian bailong bantile, “Bulaando kona tealian mian mo daano kona lalim monggoola kubaiyo komo minasaingdinggon-minasaingdinggon pokakana naiya?” Maka tealimo koponggeelekiyan doi yaniladoo napikilan.

¹⁷Maka Falisidoo miano mansadai koidan doi mianoo, “Oila komu palaat kaliangano yana mo kubaiyo ikoo teali mongkita?”

“Yana nabi,” do mianoo nabantilano.

¹⁸Bai kopamalenta Yahudi aki napoyase anggayo baikon do mianoo tau-tausono piit tukon budodoiya nggoolamo mongkita. Tobikon doiya yanila uange koolang tua, ¹⁹tukon mansadaikene, “Kai bisa naiya mupau ikoo mo bantile sinuung piit? Bulaando yana nggoolamo mongkita diabudodoo?”

²⁰Do miano tinano tamano timbiliyo, “Takainomo naiya pau nia mai pau; tukon doi nasinuungan tausono piit. ²¹Bai bulaando kona tealian yana monggoolamo mongkita diabudodoo, kami aki mai toiyo. Tukon indee komo kubaiyo yana teali mongkita, mau doiya aki mai toiyo. Posadaiyomo doi yana, yana babasalo; yana nggoolamo timbiliyo susuungo.” ²²Tinano tamano do mianoo bantile bunu doiya sabab yanila matakutene kopamalenta Yahudi; sabab yaniladoo lapamo pomeenggon, baikon indee miano komo akuiyo Yesus modoiyamo ko Tomundo Pasalamat, akimo nanggoola usok doi bonua kaledaan. ²³Doiyamo kosababpo do mianoo tinano tamano bantile, “Yana babasalo; posadaiyomo doi yana.”

²⁴Maka yanila uange koidan do mianoo mo piit, tukon bantile doi yana, “Batotopimo baikon naikon bantile komo bisa. Kami toiyo do mianoo mian baladosa.”

²⁵“Kai yana daano kona lalim kai kiyo,” do mianoo timbiliyo, “yaku aki kutoiyo. Bai meeng kolangge yaku motoiyo; loolukon yaku piit, budodoiya yaku mongkitamo.”

²⁶Maka yanila bantile koidan doi yana, “Yana mongkubai oila doikoo? Bulaando kona kubaiyano ikoo moteali mongkita?”

²⁷Miano timbiliyo, “Lapamo yaku salitayo doi komuyu, bai komuyu aki poyase mondongolii. Bulaando komuyu yase mondongolii koidan? Ugaate mau komuyu yase teali napololaing-pololaing koidan?”

²⁸Maka yanila totosiiyo yana tukon bantile, “Ikoomo kona pololaing; kami bolikon! Kami pololaing Musa. ²⁹Kami toiyo baikon ko Mian Bisa lapamo posalитай Musa. Bai do mianoo, kami aki mai toiyo inaando kona luwean.”

³⁰Do mianoo timbiliyo, “Helan tuuno baikon komuyu moaki potoiyo inaando kona luwean, bai kai yana lapamo kubaiyo yaku nggoola mongkita. ³¹Kita toiyo baikon ko Mian Bisa aki namolongol mian modaano kona lalim, bai tolongo mian

mo odotiiyo ko Mian Bisa, tukon kubaiyo kona mongiasan. ³²Salataamo dunia nadaanoan akiyoon nasidutu tololongol daano komian mo kubaiyo komian sinuung piit moteali mongkita. ³³Kalu do mianoo bolikon doi Mian Bisa, yana naikon aki nanggoola mongkubai oioila.”

³⁴Yanila timbiliyo, “Oila? Ikoo moonoo tukon lalim salataa musinuungan, ikoo yase otunggule kami?” Maka doiya kotembono yana akimo napinataikon usok doi kaledaan.

Piit doi manganggaan

³⁵Yesus lengele baikon yanila siikayo do mianoo doi bonua kaledaan. Yana unggoliiyo do mianoo maka bantile doi yana, “Oilakai ikoo anggayo do Manusiadoo Napau?”

³⁶Mianoo timbiliyo, “Indee yana, Tuan? Tulung botiikanaku sulano yaku anggayo yana.”

³⁷“Ikoo lapamo kitayo yana,” Yesus timbiliyo, “Yanamo diabudodoo modaano pobasalitai tukon ikoo.”

³⁸“Yaku anggayo, Temeneno,” mianoo bantile, maka sosuba doi Yesus salaano.

³⁹Yesus bantile, “Yaku lubat doi dunia nia motindokiiyo; sulano mian mo piit nggoola mongkita, tukon mian monggoola mongkita teali piit.”

⁴⁰Moimoiya ko Falisi miano mo daano idoo lengele Yesus mobantile bunoo doiya, maka yanila mansadai doi yana, “Komu makisuut kami nia piit koidan?”

⁴¹Yesus timbiliyo, “Andeno komuyu piit, komuyu akiyo kopoo lalim. Bai sabab komuyu bantile, ‘Kami mongkita,’ koalatio komuyu daano kopoo lalim.”

Andean kaliangano domba tukon padagaino

10 “Bisa tuuno daku bantilan nia: Mian mo usok doi domba natondok lalomo lupayo kopagal, tukon aki naloloiyo kotataapon, bai liba loloiyo kololoon bailong, mianoo pondikuk tukon palambok. ²Bai mian mo usok loloiyo kotataapon, doiyamo padagai domba. ³Padagai tondok bukayo kotataapon doi yana, tukon kodomba-domba loloiyo koalalo singgatoos yana uange yanila tukon sambuno meeng-meeng tukon andane yanila tobuat. ⁴Sambuno dombadoo binaba doi tonggulung, padagaidoo ampakon matailukon, tukon do domba-dombadoo tunduwo yana sabab yanila tingoniiyo koalalo.

⁵Yanila aki nayase tuunduwo komian bailong, bai naikon bulenggene do mianoo, sabab aki napo tingoniiyo domianoo alalo.”

⁶Yesus basalitakene do ande-andeanoo, bai yanila aki naalatiyo oila kona totuuk.

Yesus, padagai monondok

⁷Maka Yesus bantil koikoidan, “Bisa tuuno daku bantilan nia: Yakumo kotataapon motuuk doi domba. ⁸Sasaibino komo lubat akiyoon nadaano yaku doiya pondikuk tukon palambok, bai dombadoo aki ndongoliiyo yanila alalo. Yakumo kotataapon. ⁹Indee komo usok mololo doi yaku naikon selamat; yana tobuat tukon usok malaat kinaan. ¹⁰Pondikuk lubat tolongo sulano pondikuk, tolongo mangakate sulano nalusayo. Bai yaku lubat sulano kobanggapi malaat tuboan – tuboan molobi-lobian.

¹¹Yakumo kopadagai monondok. Padagai mo monondok beekene kona ansaang motuuk doi nadomba-domba. ¹²Mian bailonggon mo bolikon padagai tukon bolikon koidan do dombadoo tumbuno, naikon dampas kalu yana kitayo koasu lobo molubat. Maka do dombadoo sinoku tukon pinoobiiton asu lobo. ¹³Mian balainggonoo obuleng, sabab yana balimang sulano natinambo. Yana aki napusinggene do domba-dombadoo. ¹⁴⁻¹⁵Yakumo kopadagai mo monondok. Pokakana bunu Tama tingoniiyo yaku tukon yaku tingoniiyo Tama, bunomo koidan yaku tingoniiyo daku domba-domba tukon yanila koidan tingoniiyo yaku. Yaku salakanggene daku ansaang motuuk doi yanila. ¹⁶Daano kodomba-domba bailong koidan mo baino koonggu, bai aki napototongi doi domba-domba tambuno nia. Yanila koidan sio kubabayo tukon yanila ndongoliiyo koalalonggu. Yanila sasaibino naikon teali meeng kona pototongan tukon meeng kona padagai.

¹⁷Tama mamaasikene yaku sabab yaku salakanggene daku ansaang, sulano natinalima koidan. ¹⁸Akiyo komeeng komian monggoola alayo doi yaku. Yaku salakanggene tongo kumongiasan susuunggu. Yaku balakuasa mosalakanggene, tukon balakuasa moalayo koidan. Doiyamo kolimang yaku mo talimayo doi Tamanggu.”

¹⁹Tobikon Yesus nabantile buno doiya, Yahudi miano tambuuno ponggeleki. ²⁰Badaang komo bantile, “Yana inusoki setan! Yana tindo! Oila kogunano komuyu mondongoliiyo yana?”

²¹Bai daano kobailonggon mo bantile, “Mian mo inusoki setan aki nabasingan buno doiya! Kai nggoola kosetan kubaiyo komian piit teali mongkita?”

Yahudi miano aki nayase talimayo Yesus

²²Doi Yelusalem komian badaang daano Molamekene Kooloyo Baselaan Temeneno Nabonua. Doi ya kosinggato tembo udan. ²³Yesus daano moampakon doi Salomo na Gandalian doi Temeneno Nabonua lalomo, ²⁴salataa Yahudi miano lubat pototongi potikunggon Yesus. Yanila bantile, “Polong doiyaa ikoo sodiikene kami sasaaki? Bantilemo kona bisa-bisaan, kalu ikoo bisa-bisa Tomundo Pasalamat.”

²⁵Yesus timbiliyo, “Lapamo kubontiikonggonmuyu, bai komuyu aki pomaangga. Limang-limang yaku mo limange lengget doi Tamanggu, mobeena tokitaan motuuk doi yaku. ²⁶Komuyu aki poanggayo sabab komuyu aki potongusokon doi kudomba-domba. ²⁷Daku domba-domba lengele koalalonggu. Yaku tingoniiyo yanila, tukon yanila loloiyo yaku. ²⁸Yaku beene yanila tuboan mobisa tukon posidutukon, tukon posidutukon yanila aki nasilaka. Akiyo komeeng komian monggoola alayo yanila doi limanggu. ²⁹Tamanggu mo lapamo beekene yanila doi yaku, lobian doi sasaibino. Tukon akiyo komeeng komian moalayo yanila doi Tamanggu limano. ³⁰Yaku tukon Tamanggu daano meeng.”

³¹Maka Yahudi miano mangala koidan batu sulano napo sakule Yesus. ³²Bai Yesus bantile doi yanila, “Komuyu lapamo kitayo yaku mokubaiyo badaang kolimang monondok, Tama nasinumboliikon doi yaku. Doi sasaibino limangoo, naando kai komo tealikene komuyu yase sakule yaku?”

³³Yahudidoo miano timbiliyo, “Bolikon kai komu limang-limangoo mo monondokoo kami yase sakule ikoo tukon batu, bai sabab ikoo mokulokisanggene ko Mian Bisa. Ikoo meeng kobanggapi, muyase bunekene kobutomu Mian Bisa.”

³⁴Maka Yesus timbiliyo, “Bolikon kai doi mu Buku Ukumoo lalomo daano mototulis: Mian Bisa bantile, ‘Komuyu naiya ilah’? ³⁵Kita toiyo baikon indee komo totulis doi Kitab Moliyous lalomo teali posidutukon. Jadi, kalu Mian Bisa mebee bantilan ‘ilah’ doi mian badaang mo talimayo kona bantilan, ³⁶bulaando komuyu mobantile yaku kulokisanggene ko Mian Bisa sabab yaku bantile yaku Mian Bisa Napau? Banggokai Tamanggu piliyo yaku tukon sumboliiyo doi yaku doi dunia nia. ³⁷Kalu yaku aki kulimange kolimang Tamanggu nasinumboliikon, inai pomangangga doi yaku. ³⁸Bai yaku mokubaiyomo, poanggayomo indee daku kinubaidoo, mau kai komuyu aki poyase mangangga doi yaku. Tukon bunu doiya komuyu toiyo tukon alatiyo baikon Tama daano pomeenggon tukon yaku, tukon yaku daano pomeenggon tukon Tama.”

³⁹Yanila mougolii loloon koidan napolakoyo Yesus, bai yana tongosodii doi yaniladoo.

⁴⁰Yesus abali doi Paisu Yoldan sembeleng, doi lipudoo Yohanes looluk namansauan banggapi, maka yana ndoong indaa. ⁴¹Badaang komian molubat doi yana. Yanila bantile, “Yohanes aki namongkubai komo minasaingdinggon, bai sasaibino kona binantilo namian nia bisa.” ⁴²Maka badaang komian indaa mangangga doi Yesus.

Lazalus namatean

11 Meeng komian kosambuno Lazalus ndoong doi Betania polaing-laing tukon utuso Malia tukon Malta. ²Malia doiyamo boinedoo mo kundongiiyo lisison babangi Yesus aino, maka soutiyo tukon nabuuk. Daano kotembo meeng Lazalus masakit. ³Doutusodoo molua pailukene doi Yesus, “Temeneno, utusonggami Temeneno mo mamaasikene masakit.”

⁴Sambuno Yesus lengele do bilitadoo, yana bantile, “Sesel nia aki naikon namatekene. Naiya teali sulano ko Mian Bisa inakabasal, tukon sulano bunu doiya Mian Bisa Napau inakabasal koidan.”

⁵Yesus mamaasikene Malta, Malia tukon Lazalus. ⁶Bai sambuno Yesus malaat bilita baikon Lazalus masakit, yana sangada ndoong lua kooloyo doi nalipu. ⁷Lapa doiya maka

nabantile doi napololaing-pololaing, “Mai kita abalimo doi Yudea.”

⁸Yanila timbiliyo, “Tama Gulu, akiyoon namalumbit Yahudi miano yase sakule Tama tukon batu maka naapa doiya Tama yase abali koidan indaa?”

⁹“Bolikon kai meeng kooloyo songulo lua kojama?” Yesus nabantilano. “Mian mo ampakon oloyo, aki natakait sabab yana kitayo kodunia momadialango. ¹⁰Bai komian mo ampakon doi kalipookan takait, sabab akiyo komadialan modaano doi yana.” ¹¹Bunomo doiya Yesus nabantilan. Doibundu yana bantile koidan, “Konda sobat Lazalus moolomo, bai yaku taus bangune yana.”

¹²Pololaing-pololaing Yesus bantile, “Temeneno, kalu Lazalus moolo, sio yana naikon natotobo.”

¹³Yesus namakisuut doiyamo Lazalus matemo. Bai yanila neneeke Yesus namakisuut Lazalus tolono moolo biasa. ¹⁴Tobikon doiya Yesus bantile doi yanila tukon tala-talaang, “Lazalus matemo. ¹⁵Bai yaku sanaang koidan yaku moakiyo indaa, sabab lobian kona monondokan doi komuyu, sulano komuyu moola maangga. Maimo doiya budodoo nda ampakon doi Lazalus.”

¹⁶Tomas mo binantil “I Pinga” bantil doi tula-tulano Yesus napololaing-pololaing, “Maimo nda lainge, mau nda mate polaing yana!”

Mo otuboiyo koidan tukon mebee tuboan

¹⁷Sambuno Yesus polong doi lipudoo, Lazalus sangkapo kooloyo kona kinibulan. ¹⁸Betania nggaup ko Yelusalem, uga-ugaate tolu kokilo kona kodoon. ¹⁹Badaang ko Yahudi mianc molapamo lubat molubotiiyo Malta tukon Malia tuuk hibule yanila sabab koitusoila momate.

²⁰Sambuno Malta lengele Yesus molubato, yana kobuaton motalimayo Yesus, bai Malia ndoong doi bonua. ²¹Malta bantile doi Yesus, “Temeneno, andeno Temeneno daano naimbaa doi tembodoo, tantu koitusonggami aki namate. ²²Mau nabuno doiya yaku toiyo baikon mau budodoiya nia koidan Mian Bisa naikon beena oila ko Temeneno nakinabi doi yana.”

²³“Koutusomuyu naikon abalimo tubo,” Yesus bantile doi Malta.

²⁴Malta timbiliyo, “Yaku toiyo Lazalus tubo koidan kalu mian mate inotuboi koidan doi Oloyo Nakiamatan.”

²⁵“Yakumo komo beena tuboan tukon mootuboiyo komian mate,” Yesus bantile doi Malta. “Mian mo mangangga doi yaku naikon tubo, mau nalapamo yana mate. ²⁶Tukon mian motubo mo anggayo yaku, posidutukon aki naikon namate. Ikoo anggayo doiya kubantilanoo?”

²⁷“Yesus,” Malta timbiliyo, “yaku anggayo Temeneno Mian Bisa Napau, Tomundo Pasalamat naikon mo lubat doi dunia nia.”

Yesus kokiil

²⁸Sambuno Malta bantile buno doiya, yana ampakon uange Malia, utuso tukon polisoukiyo yana, “Tama Gulu daano naimbaa; yana mansadaikene ikoo.” ²⁹Sambuno Malia lengele doiya, kosobiton bangun, maka ampakon pososuung tukon Yesus. ³⁰Doiyo kosinggatoo, Yesus akiyoon nausok doi kampung. Yana daanoon doi lipudoo Malta nalaatano. ³¹Yahudi miano mo daano hibule Malia doi bonua, kitayo Malia moso-mosobit bangun tukon kalual; jadi yanila ampakon loloiyo yana, sabab yanila aanggene yana ampakon doi kibil sulano nakokiil.

³²Sambuno Malia polong doi lipudoo Yesus tukon kitayo yana, Malia ladanggene kotuulo doi Yesus salaano tukon bantile, “Temeneno, ande-andeno Temeneno daano naimbaa doiyo kosinggatoo, tantu koutusonggami aki namate.”

³³Sambuno Yesus kitayo Malia mokokiil, tukon Yahudi miano mo lubat polaing Maliadoo kokiil koidan, konoano poloon tukon yana tokita poloon tuuno. ³⁴Maka yana sadaiyo doi yanila, “Doiyaa kopo tadinano yana?”

“Mai nda kitayo, Yesus,” yanila bantile.

Maka Yesus kokiilo. ³⁵⁻³⁶Maka Yahudidoo miano bantile, “Kitayo, bulaando kona seangano Lazalus!”

³⁷Bai doi yaniladoo daano komo bantile, “Yana kubaiyo komian piit teali mongkita, bulaando yana moaki nanggoola kubaiyo sulano Lazalus naaki namate?”

Lazalus inotuboi koidan

³⁸Yesus poloono koidan, maka naampakon doi kibuloo. Do kibuloo daano meeng koleeng mo sinunggup tukon batu mobabasal.

³⁹“Poliate koiya batunokon,” Yesus bantile.

Malta, utuso Lazalus matedoo, timbiliyo, “Bai Yesus, yana sangkapo kooloyo kona tinadinan. Tantu koboono boano!”

⁴⁰Yesus bantil doi Malta. “Bolikon kai lapamo kubantile doi komuyu: Kalu ikoo anggayo, ikoo kitayo bulaando kona babasalan ko Mian Bisa nakuasa!” ⁴¹Maka yanila saakene do batudoo. Doibundu Yesus lelengea doi timbu tukon bantile, “Kinatauhan, Tama sabab ikoo lapamo ndongoliiyo yaku. ⁴²Yaku toiyo ikoo sidutu ndongoliiyo yaku, bai yaku bantile naiya, tuuk doi mian badaang mo daano naimbaa; sulano yanila anggayo baikon ikoomo komo bintekene yaku.” ⁴³Salataa lapa bantile bunu doiya, Yesus nggeleamon tukon alalo mobabasal, “Lazalus, tobuat!” ⁴⁴Maka tobuato Lazalus mo matedoo. Limano tukon aino daano mototombuki toik pabalun, tukon koduduso daano mototombuki tukon toik potombuki duduso. “Liate kotoik pabalun sulano yana naloi ampakon,” Yesus bantile doi mianoo badaang modaano idoo.

Pomeenggonan motuuk doi lobosiano Yesus

(Mat. 26:1-5; Mlk. 14:1-2; Luk. 22:1-2)

⁴⁵Badaang doi Yahudi miano mo lubat lubotiiyo Malia, anggayomo Yesus, sambuno yanila kitayo do kadadianoo.

⁴⁶Bai moimoiya komian doi yanila ampakon doi Falisi miano maka pelengene oila komo lapamo Yesus kubaiyo. ⁴⁷Tobikon doiya Falisi-falisi miano tukon imam-imam kapalano mongkubai kombulan tukon Pangadilan Agama. Yanila bantile, “Kita sio nda mongkubai oila? Mian nia mongkubai badaang komo minasaingdinggon!” ⁴⁸Kalu tolono kita batadikene yana nabuno naiya sidutu sasaibino komian mangangga doi yana. Tukon doi napupusan pamalenta Loma naikon lubat tukon manase Temeneno Nabonua tukon sasaibino kobangsa nai nda lipu nia!”

⁴⁹Daano komeeng doi yaniladoo kosambuno Kayafas, imam babasal doi taumoo, bantile, “Komuyu akiyo kopo tinoi. ⁵⁰Oilakai komuyu moaki pomangalati baikon komian badaang, lobian komonondok meeng komian momate kalu baino sasaibino konda bangsa inakabus?” ⁵¹Kona bisaan Kayafas bantile doiya, bolikon doi napikilan susuungo. Bai bunu meeng koimam babasal doi taumoo yana tantukenemo baikon Yesus naikon mate tuuk doi Yahudi miano. ⁵²Tukon bolikon tolono tuuk

doi Yahudi miano, bai koidan tuuk mopototongikene tukon pomeengene ko Mian Bisa nalabuk-labuk mo pobandakono.

⁵³Tambuuno doi oloyodoo kopamalenta Yahudi pomeengono sulano akateyo Yesus. ⁵⁴Tobikon doiya Yesus akimo nabaakita-kon doi mian nabadaangan doi Yahudi miano. Yesus tinggalemo ko Yudea, maka naampakon doi kota kosambuno Eflaim lolani kopadang lalomo. Idoe yana ndoong tukon napololaing-pololaing.

⁵⁵Doiyo kosinggatoe lolanimo ko Oloyo Babasal Paskah Yahudi. Badaang komian doi kampung-kampung molapamo ampakon doi Yelusalem sulano najalanggene koupacala bakumosian butong moakiyoon nalaate do lameanoo. ⁵⁶Yanila umboliyo Yesus, tukon tembo pototongi doi Temeneno Nabonua, yanila bantil meeng doi bailong, “Bulaando komu palaat? Ugaate yana aki nalubat nai lamean nia.” ⁵⁷Yanila bantile bunoo doiya sabab imam-imam kapalano tukon Falisi-falisi miano lapamo kaluale kopalenta baikon mian mo toiyo inaando Yesus nadaanoan, sio napailukene sulano yana nalinako.

Yesus kinundongii lisison mobabangi doi Betania

(Mat. 26:6-13; Mlk. 14:3-9)

12 Noom kooloyo akiyoon nalaate ko Oloyo Babasal Paskah, Yesus ampakon doi Betania. Doi lipudoo baino Lazalus komo ndoong yana mo lapamo Yesus otuboiyo doi namatean. ²Indaa yanila okoniiyo Yesus, tukon Malta komo leleaniyo. Lazalus tukon mian-mian molubat osulang kaan polaing-laing tukon Yesus. ³Doibundu Malia lubat makanggi uga-ugaate sembeleng kolitel kolisison babangi nalwastu mo maaling koolino. Yana kundongiikene do lisisonnoo doi Yesus aino, maka soutiyo tukon nabuuk. Posaapon do bonuadoo tealimo babangi sabab do lisisonnoo boono. ⁴Bai Yudas Iskaliot, meeng komian doi Yesus napololaing – doibundu yana mokulokisangene – bantile, ⁵“Bulaando do lisisonnoo mobabangi moaki nabinalukon tolu kosakato kodoy suasa, tukon kodoyno bineekon doi mian motalalais?” ⁶Yudas bantile bunoo doiya bolikon kai yana otingoniiyo komian motalalais, bai sabab yana pondikuk. Yana biasa pulute kodoy kas polong kona inusol.

⁷Bai Yesus bantile, “Sodiiyomo koboinenokon! Yana kubaiyo naiya tuuk doi oloyo kutinadinan. ⁸Mian motalalais sidutu daano doi komuyu, bai yaku aki.”

Pomeenggonan motuuk lobosiano Lazalus

⁹Badaang ko Yahudi miano molengele baikon Yesus daano doi Betania, jadi yanila ampakon indaa. Yanila ampakon bolikon tolongo doi Yesus, bai koidan yanila yase mokitayo Lazalus mo lapamo inotuboi doi namatean. ¹⁰Doiyamo kosababpo imam-imam kapalano yase akateyo Lazalus koidan; ¹¹doiyamo kosababpo tobikon nabadaang ko Yahudi miano motinggale yanila tukon mangangamo doi Yesus.

Yesus usok doi Yelusalem tukon nggaangan

(Mat. 21:1-11; Mlk. 11:1-11; Luk. 19:28-40)

¹²Modoakon kooloyo mian badaang mo lapamo lubat lamekene ko Paskah yanila ndongoliiyo baikon Yesus daanomo doi loloon tangano lubat doi Yelusalem. ¹³Maka yanila mangala palem-palem loono maka yanila ampakon sambute Yesus tukon yanila tolo-toloukon, “Nggaale ko Mian Bisa! Binalakaati yana mo lubat tukon Temeneno sambuno. Binalakaati ko Tomundo Israel!”

¹⁴Yesus malaat meeng kokaladai molumboon, tukon yana lokitiyo. Maka tealimo komo totulis doi Kitab Moliyous lalomo:

¹⁵ “Inai momatakut, boine Sion!

Kitayo kopo Tomundo molubat,

molokiti meeng kokaladai molumboon!”

¹⁶Doiya kosinggato Yesus napololaing-pololaing akiyoon naalatiyo sasaibino doiya. Bai sambuno Yesus inakabasal doi namatean, maka yanila neneeke baikon komian badaang nakokubai motuuk doi yana lapamo totulis doi Kitab Moliyous lalomo.

¹⁷Mian badaang mo daano doiya singgat Yesus nauangano Lazalus tobuat doi kibil tukon otuboiyo doi namatean, banggadudul mebee katalangan doi Lazalus nai notuboiyanoo.

¹⁸Doiyamo kosababpo mian badaangoo ampakon doi Yesus sabab yanila lengele baikon yanamo komo mongkubai mominasaingdingonoo. ¹⁹Maka Falisi-falisi miano bantile meeng

tukon bailong, “Kita aki nda nggoola mongkubai oioila! Pokitayomo, sasaibino kodunia ampakono lainge yana!”

Moimoiya ko Yunani miano umboliiyo Yesus

²⁰Dopai mian mobadaangoo mo ampakon doi Yelusalem mobakaleda doi lameanoo oloyono daano komoimoiya ko Yunani miano. ²¹Yanila lubat doi Filipus tukon bantile, “Utus kalu nggoola, kami yase pososung tukon Yesus.” (Filipus kona luwean doi Betsaida doi Galilea.)

²²Maka Filipus ampakon bontiikene doi Andelias, boobus maka yanila luaila pelengene doi Yesus. ²³Yesus bantile doi yanila, “Laatemo kotembono Manusia Napau nainakabasilan. Bisa tuuno daku bantilan nia: ²⁴Kalu meeng kolabue batuno aki natiniduk doi buta tukon mate, do labuedoo batuno tolongo tataap meeng. Bai kalu do labuedoo batuno mate, maka nasodo sawokene badaang kolabue. ²⁵Mian mo seange kona tuboan teali lapus kona tuboan. Bai mian mo sikitene kona tuboan doi dunia nia yana piyalayo kotuboan mobisa tukon posidutukon. ²⁶Mian mo yase leleaniyaku sio nalainge yaku; sulano daku peleleani polaing-laing yaku inaando daku anoan. Mian mo leleani yaku naikon Tamanggu odotiiyo.”

Yesus basalitakene kaliangano namatean

²⁷“Konoanggu susa; oila daku binantil budodoi ya? Nggoola kai yaku bantile, ‘Tama, osodiiyo yaku diabudodoo’? Bai sulano kutoupiyo naiya sakistan nia naiyamo kona motuuk daku lubatan. ²⁸Tama, akabasale kosambumu!” Maka tololongol koalalo doi timbu mobantile, “Yaku lapamo akabasale, tukon yaku akabasale koidan.”

²⁹Mian badaang mo daano idoo komo lengele alalodoo. Yanila bantile, “Koiya selese!” Bai daano komo bantile koidan, “Bolikon! Malaekat komo basilingan doi yana!”

³⁰Maka Yesus bantil doi yanila, “Do alaloo molongol, bolikon tuuk doi yaku, bai tuuk doi komuyu. ³¹Diabudodoo laatemo kotembono dunia natinindokiiyan; diabudodoo kopamalenta dunia ngginolingo. ³²Bai yaku nia, kalu lapamo inakatandak

nai dunia nia bungkokono, yaku naikon kanggiyo sasaibino komian doi yaku.” ³³Yana bantile buno doiya sulano otudoikene bulaando kona tealian yana momate.

³⁴Mian badaangoo bantil doi yana, “Mololoi mai Buku Ukum, Tomundo Pasalamat yana tubo posidutukon. Bulaando ikoo nggoola bantile baikon Manusia Napaudoo sio nainakatan-dak doi buta bungkokono? Indee do Manusiadoo Napau?”

³⁵Yesus timbiliyo, “Tolongo budodoiya kona nadaanoan do madialanoo doi komuyu. Jadi, poampakono modaanoon do madialanoo, sulano komuyu akipoo linaat kalipookan. Mian mo ampakon doi kalipookan aki napoo toiyo inaando kona ampakanan. ³⁶Poanggayomo do madialanoo daanoon doi komuyu, sulano komuyu teali pau-pau madialan.”

Yahudi miano aki namangangga

Sodo lapa Yesus bantile buno doiya, yana ampakono indaa tukon aki nayase bangokitanggon doi yanila. ³⁷Mau nalapamo badaang komo minasaingdinggon Yesus nakinubai doi yanila salaano, yanila aki namangangga doi yana. ³⁸Maka tealimo oila Nabi Yesaya nabinantil,

“Temeneno, indeemo komiano komo anggayo komai bilita?

Doi indee miano ko Temeneno nakuasa nainokitakonggonan?”

³⁹Doiyamo kosababpo yanila aki namangangga, sabab Yesaya bantilemo koidan,

“Mian Bisa bantile,

⁴⁰ ‘Yaku opiite komatanoila, kubaiyo yanila noano matikas,

sulano komatanoila aki nanggoola mokita,

yanila napopikikon aki namangalati.

Sulano yanila aki naabali doi yaku,

maka yaku otuboiyo yanila.’ ”

⁴¹Yesaya bantile buno doiya sabab yana lapamo kitayo kona kinabasilan Yesus, tukon basilingan tuuk doi yana.

⁴²Mau nabuno doiya, badaang komian, buno kai pamalenta Yahudi miano anggayomo doi Yesus. Bai yanila aki nabalani mangakukene doiya tukon nabisaan tuuno, sabab yanila matakutene inai-inaikene Falisi miano aki napataikene yanila usok doi bonua kaleda. ⁴³Yanila lobian kona iyasano momalaat

panggaal doi banggapi tukon doi Mian Bisa napokindokan.

Yesus nabantilano naikon motindokiyo

⁴⁴Maka Yesus nggeleamon, “Mian mo anggayo doi yaku, bolikon doi yaku kona inangga, bai doiyanamo bintekene yaku. ⁴⁵Tukon mian mo kitayomo yaku, kitayomo yana mo bintekene yaku. ⁴⁶Yaku lubat doi dunia nia buno madialan, sulano sasaibino komian mo anggayo yaku aki nandoong doi kalipookan lalomo. ⁴⁷Mian mo mondongolii kuotunggul, bai aki naloingiyo – bolikon yaku komo ukume yana. Sabab yaku lubat bolikon ukume kodunia, bai sulano kusalamatene. ⁴⁸Mian mo tolake yaku tukon aki mondongolii daku bantilan, lapamo daano komo tindokiyo yana. Bantilan mo yaku pelengene, doiyamo komo tindokiyo yana doi Oloyo Nakiamatan. ⁴⁹Sabab yaku aki kubasalita doi kumongiasan susuunggu; Tama mo sumboliiyo yaku, yanamo komo bintekene yaku, oila komo moola yaku bantile tukon pelengene. ⁵⁰Tukon yaku toiyo dona palentadoo mebee tuboan mobisa tukon posidutukon. Maka yaku pelengene buno Tama nainotunggukon yaku.”

Yesus kumosiyo kona pololaing-pololaing aino

13 Meeng kooloyo akiyoon ko Oloyo Babasal Paskah, Yesus toiyo baikon laatemo kotembono kona tinggalano nadunia nia sulano abali doi Tamano. Yana mamaasikene ko mian-mian mo tealimo namian doi dunia nia, tukon yana tataap mamaasikene yanila polong doi napupusan.

²Yesus tukon napololaing-pololaing daanoon mokaan popook. Ibiliis usokiyo Yudas noano lalomo Simon Iskaliot napau sulano nakulokisanggene Yesus. ³Yesus toiyo baikon Tama beekenemo sasaibino kokuasa doi yana. Yana toiyo koidan baikon yana lubat doi Mian Bisa tukon naikon yana abali doi Mian Bisa. ⁴Sambuno buno doiya yana kokondong, bukayo kona jubah, tukon pagete anduk kooako. ⁵Lapa doiya yana mokundang paisu doi meeng kosombe, maka atambuune kumosiyo kona pololaing-pololaing aino tukon itase anduk mo tokooton doi oakodoo. ⁶Polong yana doi Simon Petulus, mo bantile, “Temeneno, bulaando Temeneno mo kumosiyo koaingu?”

⁷Yesus timbiliyo, “Budodoiya ikoo aki mumangalatikene oila daku kinubai nia, bai totiiliyo naikon ikoo mangalatikene.”

⁸“Inai, Temeneno,” Petulus bantile doi Yesus, “Inai Temeneno mokumosiyo koaingu!”

Bai Yesus timbiliyo, “Kalu yaku aki kukumosiyo koaimu ikoo akiyo komu potaamian tukon yaku.”

⁹Simon Petulus bantile, “Kalu buno doiya, Temeneno, inai motolongo aingu tolong bai liminggu maka olunggu koidan!”

¹⁰“Mian mo lapamo basau, lapamo bilisii sasaibino,” Yesus bantile doi Petulus. “Yana akimo napalaluu kinumosi koidan; baino aino. Komuyu nia lapamo bilisii bai aki nasasaibino.” (¹¹Yesus toiyomo indee naikon komo kulokisanggene yana. Doiyamo kosababpo yana bantile, “Komuyu naiya lapamo bilisii, bai aki nasasaibino.”)

¹²Sala lapa Yesus kumosiyo yanila aino, yana pakeyo koidan kona jubah maka osulang. Maka yana bantile doi yanila, “Komuyu kai alatiyo indee kolangge mo sodo lapa kukubaiyo doi komuyu? ¹³Komuyu uange yaku Gulu tukon Temeneno. Takainomo bunomo doiya. ¹⁴Kalu yaku buno Temeneno tukon po Gulu kumosiyo koaimu, komuyu koidan sio popokumosi aimuyu. ¹⁵Yaku mebee sontoh nia doi komuyu, sulano mau komuyu koidan kubaiyo indee komo lapamo yaku kubaiyo doi komuyu. ¹⁶Bisa tuuno daku bantilan nia: komeeng koata aki nalobian kona babasalan doi natuan dungolan, tukon meeng kobito-bito aki nalobian kona babasalan doi mian mo bintekene. ¹⁷Kalu komuyu lapamo toiyoyo sasaibino nia, monondoko kalu komuyu kubaiyomo.

¹⁸Oila daku binantil nia bolikon tuuk doi komuyu sasaibino. Yaku toiyoyo indee indee komo lapamo yaku lilike. Bai indee komo lapamo totulis doi Kitab Moliyous, sio nateali, doiyamo ‘Mian mo kaan polaing yaku, naikon lobosiaku.’ ¹⁹Langgedoo yaku pelengene doi komuyu budodoiya, akiyoon nateali, sulano kalu do langgedoo tealimo naikon, komuyu naikon anggayomo baikon yakumo yana mo binantil YAKU DAANO. ²⁰Bisa tuuno daku bantilan nia: Indee komo talimayo komian yaku mo bintekene, talimayo yaku. Tukon indee komo talimayo yaku, talimayo yana bintokanaku.”

Yesus tatukenemo kona linoilokisan

(*Mat. 26:20-25; Mlk. 14:17-21; Luk. 22:21-23*)

²¹Sala lapa Yesus bantile buno doiya, yana teali poloon tuuno. Maka yana bantile, “Bisa tuuno daku bantilan nia: Daano meeng komian doi komuyu komo kulokisangene yaku.”

²²Napololaing-pololaing pombaleng meeng tukon bailong tukon yanila masaingding sabab yanila aki napo toiyo indee komiano. ²³Pololaing Yesus mo seseange osulang doi Yesus bibilo. ²⁴Simon Petulus beena kodean doi yana sulano yana mansadai doi Yesus indee komiano mo minakisuuti.

²⁵Maka dona pololaing koolaniyo Yesus, tukon mansadai, “Indee yana, Temeneno?”

²⁶Yesus timbiliyo, “Mian mo yaku mobeekene koloti yaku mo kemeke doi mangko lalomo, doiyamo komiano.” Maka Yesus mangala meeng koloti patolo, yana kemeke doi mangko lalomo; maka beekene doi Yudas Simon Iskaliot napau. ²⁷Mosobit tuuno sambuno Yudas talimayo do lotidoo, Ibiliis usokiyomo konoano lalomo. Maka Yesus bantile doi yana, “Kubaiyomo mosobit oila komo ikoo yase kubaiyo.” ²⁸Akiyo komeeng doi yaniladoo mo osulang kaan idoo moalatiyo bulaando Yesus mobantile doi Yudas buno doiya. ²⁹Daano komo aangene Yesus bintekene Yudas mongoli meeng kolangge mo palaluu doi lameanoo, kai mebee doy soisik doi mian motalalais - sabab Yudas pangabos doy.

³⁰Sambuno Yudas talimayo do lotidoo yana polaing tobuat. Oloyo popooko.

Palenta mo boolu

³¹Sambuno lapa Yudas ampakon, Yesus bantile, “Budodoiya Manusia Napau inakabasal, tukon Mian Bisa inakabasal lolo doi yana. ³²Kalu Mian Bisa inakabasal lolo doi yana, mau yana inakabasal lolo doi butongo susuungo. Tukon Mian Bisa akabasale yana tukon soisobiton. ³³Daku pau-pau, yaku akimo kudungol malumbit tukon komuyu. Komuyu naikon umboliiyo yaku, bai pokakanamo mo lapamo yaku bantile doi pamalenta Yahudi, bunomo koidan daku bantilan doi komuyu; doi lipu kuampakonan, komuyu akipo nggoola lubat. ³⁴Palenta boolu

kubeekene doi komuyu: Poposeang meeng tukon bailong. Buno pokakana yaku seange komuyu, bunomo lakon doiya komuyu sio po poseang. ³⁵Kalu komuyu toiyo poseang, sasaibino komian toiyo baikon komuyu kupololaing-pololaing.”

Bantilan baikon Petulus otinggalemo Yesus

(Mat. 26:31-35; Mlk. 14:27-31; Luk. 22:31-34)

³⁶“Temeneno, Temeneno yase ampakon doiyaa?” Simon Petulus sadaiyo doi Yesus. Yesus timbiliyo, “Doi yaando daku ampakanan, budodoiya ikoo aki nanggoola malaing. Ikoo naikon lainge yaku doibundu.”

³⁷“Temeneno, bulaando yaku aki namoola lainge Temeneno budodoiya?” Petulus mansadai koidan. “Yaku yase mate tuuk doi Temeneno!”

³⁸Yesus timbiliyo, “Bisa kai ikoo moyase mate motuuk doi yaku? Mutoiyo, akiyoon nakokuuwa komanuk naikon, ikoo tolummo luunggon mubantile baikon ikoo aki mutingoniiyo yaku!”

Yesus yanamo kololoon doi Tama

14 “Inai nasusa konoamu,” Yesus bantile doi yanila. “Pomangangga doi Mian Bisa, tukon poanggayomo doi yaku koidan. ²Doi Tamanggu nabonua daano badaang kolipu dungolan. Yaku taus indaa sulano kusadiayo kodungolan motuuk doi komuyu. Yaku aki naikon kubantile buno doiya doi komuyu, kalu doiya aki nabisa. ³Kalu yaku lapamo sadaiyayo kopodungolan, yaku abali koidan tukon ndokiiyo komuyu, sulano inaando daku anoan, idoomo koidan kopoo dungolan. ⁴Doi lipu kutausan kololoono komuyu toiyo.”

⁵Maka Tomas bantile doi Yesus, “Temeneno, kami aki mai toiyo inaando Temeneno natausan, bulaando komai toiyano kololoono?”

⁶Yesus timbiliyo, “Yakumo kololoon sulano nda toiyo ko Mian Bisa tukon malaat tuboan. Akiyo komeeng komian momoola lubat doi Tama, kalu aki nalolo doi yaku. ⁷Kalu kai komuyu tingoniiyo yaku, tantu komuyu naikon tingoniiyo ko Tamanggu koidan. Budodoiya komuyu tingoniiyomo yana, tukon lapamo kitayo yana.”

⁸Maka Filipus bantile doi Yesus, “Temeneno, tudoikene Tama doi kami, sulano mai toiyu tuuno.”

⁹Bai Yesus timbiliyo, “Buunia kolumbi-lumbito daku polaingan komuyu, tukon koidan ikoo akiyoon mutingoniyo yaku, Filipus? Mian mo lapamo kitayo yaku, lapamo kitayo ko Tama. Bulaando ikoo nggoola bantile, ‘Tudoikene ko Tama doi kami?’ ¹⁰Filipus! Kai aki muanggayo, baikon yaku pomeenggon tukon Tama, tukon Tama pomeenggon yaku? Oila daku binotiikon doikoo, aki kubantile doi butonggu susuunggu. Tama mo daano pomeenggon tukon yaku, yanamo komo limange doiya sasaibino. ¹¹Poanggayo doi yaku, baikon yaku pomeenggon tukon Tama tukon Tama pomeenggon yaku. Kalu naakiyan, poanggayomo tobikon oila komo lapamo yaku kubaiyo. ¹²Bisa tuuno daku bantilan nia: Mian mo mangangga doi yaku, naikon kubaiyo oila mo lapamo yaku kubaiyo – kai lobian babasal kona kinubai koidan – sabab yaku ampakon doi Tamanggu. ¹³Tukon oilamo kopoo kinabi mo mangatas doi sambunggu, doiya naikon yaku kubaiyo tuuk doi komuyu, sulano Tama kinabasal lolo doi Pau. ¹⁴Oila kopoo kinabi luwedei sambunggu naikon yaku kubaiyo.”

Yesus paladandikene ko Mian Bisa Na Loh

¹⁵“Kalu komuyu mamaasikene yaku, komuyu naikon ampakonggene daku palenta. ¹⁶Yaku naikon kabiyo doi Tama, tukon yana naikon beekene doi komuyu meeng ko Potombonii bailong, naikon mondoong polaing komuyu polong posidutukon. ¹⁷Yanadoo Mian Bisa Na Loh mo okitakanggene ko Mian Bisa nabisa-bisaan. Dunia aki nanggoola talimayo yana, sabab aki napo kitayo kabai tingoniyo. Bai komuyu tingoniyo yana, sabab yana ndoong polaing komuyu tukon pomeenggon komuyu.

¹⁸Komuyu aki kutinggale meeng-meeng kopau pokakana kopau tuboon. Yaku naikon abali doi komuyu. ¹⁹Baino budodoiya tolong komian doi dunia akimo nakitayo yaku. Bai komuyu kitayo yaku. Tukon tobikon yaku tubo, mau komuyu bai tubo. ²⁰Kalu laate kooloyono, komuyu toiyu baikon yaku pomeenggon tukon Tama komuyu pomeenggon tukon yaku, tukon yaku pomeenggon komuyu.

²¹Mian mo talimayo daku palenta-palenta tukon kubaiyo, yanamo komo mamaasikanaku. Tamanggu naikon mamaasikene

komian mo mamaasikene yaku. Yaku bai naikon mamaasikene mianoo tukon okitakene kobutonggu doi yana.”

²²Yudas (bolikon Yudas Iskaliot) mansadai doi Yesus, “Temeneno, bulaando Temeneno yase okitakangene kobutomu doi kami bolikon mian doi dunia?”

²³Yesus timbiliyo, “Mian mo mamaasikene yaku, naikon loloiyo daku otunggul. Tamanggu naikon mamaasikene yana. Tama tukon yaku naikon lubat doi yana tukon podungoli yana. ²⁴Mian mo aki namamaasikanaku, aki naloloiyo daku otunggul. Otunggul komuyu mondongoliiyodoo, bolikon doi yaku, bai luwedoi Tama mo bintekene yaku.

²⁵Sasaibino doiya kubantile doi komuyu, modaano yaku podungoli komuyu. ²⁶Bai ko Mian Bisa Na Loh, Potombonii naikon Tama bintekene luwedoi sambunggu, yanamo komo otunggukene komuyu kolangge tukon ingotiikene komuyu sasaibino komo lapamo yaku bantile doi komuyu.

²⁷Monondok yaku otinggale doi komuyu. Kumonondokan susuunggu yaku mo beekene komuyu. Daku bineekon doiya bolikon bunu mian doi dunia nabineekon doi komuyu. Inai posusa, inai pomatakut. ²⁸Komuyu lapamo lengele daku bantilan, ‘Yaku naikon ampakon, bai yaku lubat koidan doi komuyu’. Kalu komuyu mamaasikene yaku, komuyu naikon sanaang yaku ampakon doi Tamanggu, sabab Tamanggu lobian kona babasalan doi yaku. ²⁹Yaku pailukene doiya budodoo doi komuyu, akiyon sasaibino nateali, sulano kalu tealimo, komuyu anggayomo. ³⁰Yaku akimo kubasalita lobian badaang koidan tukon komuyu, sabab laatemo kotembono kopamalenta dunia nalubatan. Bai yana aki nakuasaiyo kobutonggu. ³¹Mau sasaibino doiya sio nateali sulano dunia natoiyoo baikon yaku mamaasikene Tama tukon kubaiyo sasaibino Tama napinalentakon doi yaku.

Oh, maimo kita nda ampakon naimbaa.”

Yesus anggul batango mo bisa

15 Yesus bantile koidan, “Yaku anggul batango mo bisa, tukon Tamanggu komo limange kona asi. ²Meeng kopangano doi batangodoo mo aki nasao, pinatol, tukon pangano mo sao, pinupui koloono bailong tukon binilisii sulano nalobian badaang kosaano koidan. ³Komuyu lapamo bilisii sabab otunggul mo lapamo yaku beekene doi komuyu. ⁴Potataap



Anggul mo sinakakon pangano (15:5)

pomeenggon tukon yaku tukon yaku tataap pomeenggon tukon komuyu. Kokayung pangano susuungo aki nanggoola sao, kasuali yana tataap liit doi batango. Bunomo lakon doiya komuyu nggoola sao, kalu tataap pomeenggon tukon yaku.

⁵Yakumo koanggul batango, tukon komuyu kopanga-panganono. Mian mo tataap pomeenggon tukon yaku tukon yaku maka yana, naikon sao badaang; sabab kalu bolikon yaku, komuyu aki nggoola mongkubai oioila. ⁶Mian mo aki natataap pomeenggon tukon yaku, naikon sinakukon buno kayung pangano, boobus teali motuul. Kayung-kayung pangano mo buno doiya, naikon pinotongikon tukon sinakukon doi aung lalomo, maka nasinua. ⁷Kalu komuyu tataap pomeenggon tukon yaku tukon daku otunggul ano doi noamuyu lalomo, pomangkabimo doi Tama indeemo kopo iniyas; domu kakabidoo tinalima. ⁸Kalu komuyu sao badaang, Tamangu inakabasal; tukon buno doiya komuyu bisa-bisa teali kupololaing. ⁹Buno Tama mamaasikene yaku, bunomo lakon doiya yaku mamaasikene komuyu. Siokai komuyu potataap tubo buno mian yaku mo mamaasikene. ¹⁰Kalu komuyu ampakonggene daku palenta-palenta, komuyu tataap tuuno doi kumaasi, pokakana buno yaku tataap tuuno doi Tama namaasi sabab ampakonggene kona palenta-palenta.

¹¹Sasaibino naiya kubontiikene doi komuyu, sulano daku labaanoo daano doi noamuyu lalomo, tukon komu labaan teali

monondok. ¹²Naiyamo daku palenta: po poseseang meeng tukon bailong, pokakana buno yaku mamaasikene komuyu. ¹³Mian mo seange tuuno kona sobat-sobat doiya miano mo nggoola kona tuboan motuuk doi yanila. ¹⁴Komuyu daano kusobat-sobat, kalu komuyu kubaiyo kolangge mo yaku palentakene doi komuyu. ¹⁵Komuyu akimo kuaangene ata, sabab koata aki natoiyoyo oila komo daano tumbuno kubaiyo. Komuyu kuuange sobat, sabab sasaibino daku linongol doi Tamanggu lapamo kupailukene doi komuyu. ¹⁶Bolikon komuyu komo piliyo yaku. Yakumo komo piliyo komuyu, tukon sumboliiyo komuyu ampakon sulano posao badaang – saono mo aki nalokis. Maka Tama naikon beekene doi komuyu oilamo komuyu nakinabi doi yana moluwe tukon sambunggu. ¹⁷Naiyamo daku palenta doi komuyu: Poposeang meeng tukon bailong.”

Dunia mosikitene komuyu

¹⁸“Kalu kai dunia mosikitene komuyu, poneneeke baikon yaku lapamo lolukon dunia mosikitanaku. ¹⁹Andeno komuyu dunia namian, komuyu nia dunia mamaasikene sabab namian. Bai lapamo yaku lilike komuyu doi dunia, jadi komuyu bolikono dunia namian. Doiyamo kosababpo dunia namosikitene komuyu. ²⁰Poneneeke oila komo lapamo yaku pailukene doi komuyu, ‘Koata aki nalobian babasal doi moodungele.’ Kalu yanila lapamo sakisaayo yaku, yanila naikon sakisaayo komuyu koidan. Kalu yanila loloiyo daku otunggul, yanila loloiyo kopo otunggul koidan. ²¹Sasaibino doiya yanila kubaiyo tuuk doi komuyu, sabab komuyu pololaingo yaku, sabab yanila aki natingoniiyo yana mo bintekene yaku. ²²Kalu andeno aki kulubat tukon aki kubontiikene sasaibino doiya doi yanila, yanila aki nadaano kona lalim. Bai budodoiya yanila akiyono kona poalasan koidan motuuk yanila nalalim. ²³Mian mo sikitene yaku, mosikitene ko Tamanggu. ²⁴Kalu kai doi yaniladoo yaku aki kubaiyo kolanggelangge mo akiyoon idan mian bailong kubaiyo, yanila akiyo kona lalim. Bai budodoiya yanila lapamo kitayo oila daku kinubai, tukon yanila mosikitenemo yaku maka Tamanggu. ²⁵Takainomo bunomo doiya, sulano natealimo oila komo totulis

doi yanila na Buku Ukum lalomo, doiyamo: 'Yanila mosikitene yaku mau naakiyo kona poalasan.'

²⁶Yaku naikon mosumbolii doi komuyu komeeng ko Potombonii mo luwedei Tama. Yanamo ko Loh mobisa mo okitakene ko Mian Bisa nabisa-bisaan tuuno. Kalu yana lubat, yana mebee salita motuuk doi yaku. ²⁷Tukon komuyu koidan sio pobeena salita motuuk doi yaku, sabab komuyu lapamo polaing yaku salataa doi tembono.

16 Sasaibino doiya kupailukene doi komuyu sulano komuyu naaki podampas. ²Komuyu siniika doi bonua-bonua kaledaan. Tukon naikon lubat kotembono baikon komian mo akateyo komuyu naikon yana aanggene tulutiyo ko Mian Bisa. ³Yanila kubaiyo doiya doi komuyu sabab yanila akiyoon natingoniiyo ko Tamanggu mau yaku. ⁴Bai budodoiya yaku bantile doi komuyu, sulano doiya kalu naikon teali, komuyu poneneeke baikon yaku lapamo pailukene doi komuyu."

Mian Bisa Na Loh nalimang

"Langge nia aki kupailukene tumbeno doi komuyu, mangaani yaku daano polaing-laing komuyu. ⁵Bai budodoiya yaku naikon ampakon doi yana mo bintekene yaku; tukon akiyo komeeng doi komuyu momansadaikene doiya daku ampakanan. ⁶Budodoiya tolongo susa konoamu, padungga yaku mobantilemo do langgedoo doi komuyu. ⁷Bai yaku bantile komo bisa doi komuyu: Lobian monondok kona tuukan doi komuyu, mangaani kalu aki kuampakon, Potomboniidoo aki nalubat doi komuyu. Bai kalu yaku ampakon, yaku naikon sumboliiyo yana doi komuyu. ⁸Kalu yana lubat, yana naikon okitakangene doi dunia koalatio mobisa dolalimoo, doi oila komo bisa, tukon komo doi Mian Bisa naukuman. ⁹Yana naikon okitakangene baikon indee miano komo aki naanggayo yaku doiya lalim; ¹⁰baikon yaku bisa, tobikon yaku ampakon doi Tamanggu tukon akimo naikon pokitayo yaku koidan; ¹¹tukon baikon ko Mian Bisa atambuunemo kona baukumanan, mangaani kopamalenta doi dunia nia lapamo inukum.

¹²Badaang koidan komo yaku yase bontiikene doi komuyu, mau naiya budodoo komuyu akiyoon ponggoola talimayo. ¹³Bai kalu Lohdoo lubat, doiya yanamo komo okitakangene ko Mian Bisa nabisa-bisaan, komuyu linolaing sulano potingoniiyo sasaibino kona bisaan. Yana aki nabasalita tolongo butongo

susuungo bai yana bantile oila komo lapamo lengele, tukon yana naikon pailukene doi komuyu oila naikon komo teali oloyo doibundu. ¹⁴Yana akabasale yaku, mangaani oila kona pinolonggon doi komuyu, yanila talimayo doi yaku. ¹⁵Sasaibino komo daano doi Tama mau doiya bai koonggumo. Doiyamo komo mangaanikene tobikon kubantile baikon oila ko Loh napinolonggon doi komuyu, doiya talimayo doi yaku.”

Kosusaan tukon kolabaan

¹⁶“Baino soisik kotembono komuyu akimo pokitayo yaku koidan, tukon koidan baino soisik kotembono komuyu kitayo yaku.”

¹⁷Moimoiya Yesus napololaing tambuuno posadai meeng tukon bailong, “Oila komaanano yana mobantile doi kita: ‘Baino soisik kotembono komuyu akimo pokitayo yaku koidan, tukon baino soisik kotembono komuyu naikon kitayo yaku’? Oila komaanano koidan tukon: ‘Yaku ampakon doi Tamanggu’?” ¹⁸Yanila mansadai momeeng, “Oila komaanano, ‘soisik kotembo’? Kita aki nda mangalatikene yana salitayo kaliangano oila!”

¹⁹Yesus toiyo yanila yase mansadai doi yana. Jadi yana bantile, “Budodoiya yaku bantile, ‘Baino soisik kotembono, komuyu akimo naikon pokitayo yaku, tukon koidan baino soisik kotembono komuyu naikon kitayo yaku.’ Doiyamo kopo pinonggeelekikon doi komuyu nokon?”

²⁰Poanggayomo, komuyu naikon kokiil tukon uwookon, bai komian doi dunia tolongo tedes-tedes. Komuyu naikon susa konoamuyu, bai kopo susanoo bolii teali laba-labaan. ²¹Kalu meeng koboine adukono mosuung, yana susa, sabab laatemo kotembono kona sakisaawan. Bai kalu kona pau sosuungo, boinedoo toliminggenemo kona susaan mangaani yana laba baikon meeng kopau sosuungo doi dunia. ²²Bunomo doiya lakon komuyu: Budodoiya komuyu susa konoamuyu, bai yaku pososuung koidan tukon komuyu, maka konoamuyu naikon laba-laba; tukon akiyo komeeng komian monggoola alayo kopolabaano doi noamuyu.

²³Doi oloyodoo, komuyu akimo pomansadai oioila koidan doi yaku. Poanggayomo: Oilamo kopo kinabi doi Tama luwe sambunggu, doiya naikon Tama beekene doi komuyu. ²⁴Polong doi oloyo nia komuyu akiyon pomangkabi oioila moluwedoi

sambunggu. Pomangkabi, maka komuyu naikon mantalima, sulano kopoo labaan monondok.”

Dunia namanaangan

²⁵“Sasaibino naiya yaku bantile doi komuyu tukon andean. Bai naikon nalaate kotembono, yaku akimo kumongkubai andean koidan, bai yaku basalita tukon natala-talaangan doi komuyu Tama kaliangano. ²⁶Doi ya kotembono komuyu mangkabi doi Tama mangatas doi sambunggu; potoiyo, yaku aki naikon kumangkabi doi Tama motuuk doi komuyu, ²⁷sabab Tama susuungo seseange komuyu. Yana mamaasikene komuyu mangaani komuyu mamaasikene yaku, tukon anggayo baikon yaku lubat doi Mian Bisa. ²⁸Takainomo yaku luwedoi Tamanggu, tukon lapamo kulubat doi dunia lalomo. Bai budodoi ya yaku tinggalemo kodunia sulano kuabali doi Tamanggu.”

²⁹Maka Yesus napololaing-pololaing mansadai doi yana, “Budodoi ya Temeneno basilingan tukon tala-talaang akimo napake andean, ³⁰tukon kami toiyomo baikon Yesus toiyoko kolangge sasaibino. Akimo napalaluu daano komeeng komian momansadai oioila doi Temeneno. Mangaani doiyamo kami anggayomo Temeneno luwedoi Mian Bisa.”

³¹Yesus timbiliyo yanila, “Jadi budodoi ya komuyu anggayomo? ³²Neneeke! Kotembono naikon lubat, bai lapamo lubat, komuyu pinobabandakon. Komuyu mule doi pobonua meengmeeng tukon tinggale yaku susuunggu. Bai yaku aki natolongo susuunggu sabab ko Tamanggu daano polaing yaku. ³³Sasaibino naiya yaku bantile sulano komuyu pomalaat monondokan sabab pomeenggon tukon yaku. Doi dunia komuyu naikon sakisaa. Bai poekeenggele konoamuyu! Yaku lapamo lungguiyo kodunia!”

Yesus sambeangene kona pololaing-pololaing

17 Sambuno lapa bantile buno doi ya, Yesus lelengea doi timbu tukon bantile, “Tama, budodoi ya laatemo kotembono. Akabasalemo komu Pau, sulano komu Pau akabasale Tama. ²Tama lapamo mebee kuasa doi sasaibino kobanggapi doi mu Pau, sulano yana namebee tuboan mobisa tukon posidutukon doi sasaibino komian Tama mo beekene doi yana. Naiyamo kotuboan mobisa tukon posidutukon; ³sulano komian natingoniyo Tama, tolono yana ko Mian Bisa mo bisa, tukon tingoniyo Yesus Klistus Tama mo bintekene. ⁴Yaku

lapamo akabasale Tama doi dunia nia bungkokono tukon alapayo kona limang Tama mo beekene doi yaku. ⁵Tama! Akabasalemo yaku budodoiya doi Tama, tukon babasalan mo daano doi yaku pomeenggon Tama salataa dunia nia akiyoon napinasitaka.

⁶Yaku lapamo okitakanggene Tama doi mian badaang nai dunia nia mo lapamo Tama beekene doi yaku. Yanila Tama na mian-mian, tukon Tama lapamo beekene doi yaku. Yanila loingiyomo Tama nabantilan. ⁷Budodoiya yanila toiyomo baikon sasaibino Tama nabineekon yaku luwedo Tama. ⁸Lapamo kupelengene doi yanila kobantilan Tama mo beekene doi yaku; tukon yanila lapamo talimayo. Yanila toiyoyo baikon yaku bisa-bisa lubat doi Tamanggu tukon yanila anggayo baikon Tama komo bintekene yaku.

⁹Yaku sambeang tuuk doi komuyu. Yaku aki kusambeang motolongo tuuk doi dunia bai mian badaang doi dunia mo lapamo Tama beekene doi yaku, sabab yanila Tama koono. ¹⁰Sasaibino daku langge Tama nalangge koidan; tukon sasaibino Tama nalangge daano kulangge koidan. Yaku inakabasal doi yaniladoo. ¹¹Budodoiya yaku lubat doi Tama. Yaku akimo kundoong koidan doi dunia; bai yanila daanoon doi dunia. Tama mo moliyous! Dagaiyo yanila tukon kuasa Tama sambuno, doiya sambu mo lapamo Tama beekene yaku - sulano yanila teali meeng, pokakana bunu Tama tukon yaku koidan meeng. ¹²Modaanoon yaku polaing yanila, yaku lapamo dagaiyo yanila tukon kuasa moluwe Tama sambuno - sambu Tama mo beekene doi yaku. Yaku lapamo dagaiyo yanila tukon akiyo komeeng komian doi yaniladoo molapus; kasuali yana mo takainomo lapamo lapus; sulano tukon doiyadoo tealimo oila komo totulis doi Kitab Moliyous lalomo. ¹³Budodoiya yaku lubat doi Tamanggu. Sasaibino nia yaku bantile modaanoon yaku nai dunia nia; sulano yanila tukon totubo kona tuboan toupiyo daku labaan. ¹⁴Yaku lapamo pelengene Tama nabantilan doi yanila, tukon dunia nia mosikitene yanila, sabab yanila bolikon dunia koono, pokakana bunu yaku koidan bolikon dunia koono. ¹⁵Yaku aki kukabiyo sulano Tama nandokiiyo yanila doi dunia nia, bai yaku kabiyo sulano Tama nadagaiyo yanila doi Ibiliis. ¹⁶Pokakanamo bunu yaku bolikon dunia koono, mau

yanila bolikon koidan dunia koono. ¹⁷Tealikene yanila mumian motangalaas doi Tama luwedo nabisaan; Tama nabantilan doiyamo komo bisa. ¹⁸Pokakana Tama lapamo bintekene yaku doi dunia, bunomo koidan yaku bintekene yanila doi dunia. ¹⁹Tuuk yanila napalaluu, yaku salakanggene kobutonggu bunu Tama koono, sulano yaniladoo teali tongo Tama koono motangalaas lolo doi nabisaan.

²⁰Bolikon tuuk yanila nia daku sinambeanggon. Bai yaku koidan sambeang tuuk doi mian badaang naikon mo anggayo doi yaku doi napo bantilan yanila nia. ²¹Yaku kabiyo, Tama, sulano yanila sasaibino teali meeng bunu Tama pomeenggon yaku, tukon yaku maka Tama. Boliisi yanila nateali meeng tukon kita sulano komian doi dunia anggayo baikon Tama komo bintekene yaku. ²²Yaku lapamo beekene doi yanila kobabasilan Tama mo beekene doi yaku, sulano yanila teali meeng, pokakana bunu kita meeng; ²³yaku tukon yanila, tukon Tama maka yaku; sulano yanila bisa-bisa meeng. Maka dunia naikon toiyo baikon Tama komo bintekene yaku, baikon Tama mamaasikene yanila bunu Tama mamaasikene yaku.

²⁴Tama, yaku yase sulano yanila, mo Tama beekene doi yaku, daano polaing-laing yaku doi lipu kudaanoan, sulano yanila kitayo daku kinabasilan; doiyamo kabasilan Tama mo beekene doi yaku, sabab Tama mamaasikene yaku akiyoon kodunia natinealikon. ²⁵Tama mo adil! Dunia aki natingoniiyo Tama, bai yaku tingoniiyo Tama; tukon mian madaang nia toiyo baikon Tama komo bintekene yaku. ²⁶Yaku lapamo bontiikene Tama sambuno doi yanila; tukon yaku lapamo kubaiyo bunu doiya, sulano Tama namaasi doi yaku tataap doi noanoila lalomo tukon yaku pomeenggon yanila.”

Yesus linako

(Mat. 26:47-56; Mlk. 14:43-50; Luk. 22:47-53)

18 Sambuno lapa Yesus sambeang bunu doiya, yana tukon napololaing-pololaingoo ampakon doi Paisu Kidlon sembeleng. Ido daano komeeng koasi, maka Yesus tukon napololaing-pololaingoo usok doi asidoo. ²Yudas poloilokisoo, toiyo do lipudoo; sabab Yesus biasamo pototongi idoo tukon napololaing-pololaing. ³Maka Yudas ampakon doi lipudoo tukon babayo komeeng kopasukan suludadu Lomawi tukon moimoiya kopadagai Temeneno Nabonua imam-imam kapalano

mo sumboliyo tukon Falisi-falisi miano. Yanila makanggi sinapan, lantela tukon posi. ⁴Yesus toiyoo sasaibino komo naikon teali doi butongo. Jadi yana kolaniyo dopai mianoo badaang tukon mansadai, “Komuyu indee miano kopo inumbal?”

⁵“Yesus, Nasalet miano,” yanila timbiliyo.

“Yakumo nia,” Yesus bantile.

Yudas poloilokisoo daano mokokondong tukon yanila. ⁶Singgatoo Yesus bantil doi yanila, “Yakumo nia,” yanila sasaibino tangabalinggon maka tolubang doi buta. ⁷Yesus sadaiyo koidan doi yanila, “Indee kopo inumbal?”

“Yesus Nasalet miano,” yanila timbiliyo.

⁸“Lapamo kubantile yakumo nia,” Yesus bantile. “Tukon kalu bisa yakumo kopoo inumbolii, sodiiyomo yanila bailong naampakono.” (⁹Tukon nabantilano mobuno doiya, tealimo oila komo lapamo Yesus bantile loolukonoo: “Tama, doi mian badaang Tama mo beekene doi yaku, akiyo komeeng komian komo lapus.”)

¹⁰Simon Petulus mo makanggi meeng kobakoko, yana bubute maka tabase imam babasal naata botol kotolingaino bakalingano. Kosambuno do atadoo Malkus. ¹¹Maka Yesus bantil doi Petulus, “Usekene koidan komu bakoko doi salungo! Oilakai ikoo pikikene yaku aki naikon kuinume kopaisu doi galaas sakisaawan Tama mo beekene doi yaku?”

Yesus binaba mangadap doi Hanas

¹²Maka suludadu-suludadu Lomawi tukon nakomondaan tukon padagai-padagai Yahudi lakoyo tukon keete Yesus. ¹³Tumbe-tumbeno yanila babayo Yesus mangadap doi Hanas, Kayafas namonianan malane. Kayafas daano meeng koimam babasal doi taumo. ¹⁴Tukon yanamo komo lapamo beena otunggul doi pamalenta Yahudi baikon lobian monondok doi meeng komian momate motuuk doi sasaibino kobangsa.

Petulus Akiyenggene Yesus

(Mat. 26:69-70; Mlk. 14:66-68; Luk. 22:55-57)

¹⁵Simon Petulus tukon tulano meeng bailong lainge Yesus. Pololaingoo bailong imam babasal tingoniiyo; jadi yana usok polaing-laing tukon Yesus doi imam babasal nabonua basaleano,

¹⁶Bai Petulus montotiili doi tonggulung, doi tataapon. Doibundu pololaingoo bailong ampakon doi tonggulung tukon posalitai meeng koboine peleleani padagai tataapon, maka babayo Petulus usok doi lalom. ¹⁷Peleleani boinedoo padagai tataapon bantil doi Petulus, “Eh, bolikon kai ikoo koidan kona pololaing?”

“Bolikon,” Petulus timbiliyo.

¹⁸Doiya kosinggatoo kolipu kumelon, jadi kopeleleani-peleleani tukon padagai-padagaidoo yanila lapamo bangokoiti aung tukon yanila balalango idoo. Petulus ampakon doi aungoo maka kokondong balalang polong yanila.

Imam babasal sadaiyo Yesus

(Mat. 26:59-66; Mlk. 14:55-64; Luk. 22:66-71)

¹⁹Imam babasal sadaikene Yesus kaliangano doi napololaing-pololaing tukon naotunggul kaliangano. ²⁰Yesus timbiliyo, “Yaku sidutu basilingan tukon tala-talaang doi mian badaang salaano. Yaku sidutu mongotunggul doi bonua-bonua kaledaan tukon doi Mian Bisa Nabonua, lipu Yahudi miano napototongan sidutu. Aki nabiasa yaku mabantil oioila motosookon. ²¹Jadi bulaando Tuan momansadaikene yaku? Sadaiyo yanila mo lapamo molongol kuotunggul. Tantu yanila toiyo oila daku binantil.”

²²Sambuno Yesus bantile buno doiya, daano komeeng dopadagaidoo idoo tapiyo tukon bantile, “Balani tuuno ikoo bantile buno doiya doi imam babasal!”

²³Yesus timbiliyo, “Kalu yaku mabantil meeng kolangge mo sala, bantilemo naimbaa oila kona salaan! Bai kalu daku binantilo bisa, bulaando ikoo motapiyo yaku?”

²⁴Doibundu Hanas sumboliiyo komian babayo Yesus tukon kinoot doi Imam Babasal Kayafas.

Petulus akyenggene Yesus koidan

(Mat. 26:71-75; Mlk. 14:69-72; Luk. 22:58-62)

²⁵Simon Petulus daano mokokondong tukon balalang idoo. Mian badaang idoo bantil doi yana, “Bolikon kai ikoo komeeng kopololaingo mianoo?” Bai Petulus nggeelek, kona bantilano, “Bolikon!”

²⁶Meeng koimam babasal naata, doiyamo tolidano doi Petulus natinabas kotolingaino, bantile, “Baanggon aki kukitayomo ikoo doi asidoo mopolaing-laing tukon yana?”



Suludadu-suludadu Loma (18:27)

²⁷Maka Petulus nggelekiyo koidan, “Aki,” – tukon pokonoi doiya kosinggato komanuk kokuuwa.

Yesus mangadap doi Pilatus

(Mat. 27:1-2, 11-14; Mlk. 15:1-5; Luk. 23:1-5)

²⁸Dodowasoono yanila babayomo Yesus doi Kayafas nabonua doi gubelnul nabatomundoan. Yahudi miano yanila aki nausok doi batomundoano lalomo, sulano yanila naaki teali kulokis manulut atulan agama, sabab yanila malaing kaan kaanan Paskah. ²⁹Tobikon doiya Pilatus tobuat ampakon doi yanila tukon mansadai, “Oila kopo pangasalakon doi mian nia?”

³⁰Yanila timbiliyo, “Andeno yana akiyo kona sala, kami aki mai babayo doi Tama Gubelnul.”

³¹Pilatus bantile doi yanila, “Poleleiyo yana tukon potindokiiyo manulut poukum susuumuyu!”

Bai Yahudi miano timbiliyo, “Kami aki namoola ukume mate komian.” (32Naiya teali sulano natotoi oila Yesus nabinantil kaliangano naikon yana mate.)

33Pilatus usok koidan doi nabatomundoan tukon uange Yesus, maka sadaiyo, “Kai ikoo tomundo Yahudi miano?”

34Yesus timbiliyo, “Kai napasadai nia doikoo susuumu kabai daano komian bailong mo lapamo bontiikene doikoo kaliangano doi yaku?”

35Pilatus timbiliyo, “Oilakai yaku nia Yahudi miano? Komo beekene ikoo doi yaku mutulunano susuumu tukon imam-imam kapalano. Oila komo lapamo ikoo kubaiyo?”

36Yesus bantile, “Daku batomundoan bolikon doi dunia nia. Ande-andeno daku batomundoan nai dunia nia, daku mian badaang balajuang sulano yaku aki kubineekon doi pamalenta Yahudi. Bai bisa daku batomundoan bolikon doi dunia nia!”

37Maka Pilatus sadaiyo doi yana, “Kalu buno doiya, ikoo tomundo?”

Yesus timbiliyo, “Ikoo bantile baikon yaku tomundo. Yaku sosuung tukon lubat doi dunia daano meeng kopituu, doiyamo mebee salita doi nabisaan. Mian mo luwedo nabisaan doiya ndongoliiyo yaku.”

38Pilatus mansadai doi yana, “Oila komaanano dona bisaanoo?”

Yesus inukum mate

(*Mat. 27:15-31; Mlk. 15:6-20; Luk. 23:13-25*)

Maka Pilatus tobuat koidan doi nabatomundoan tukon bantil doi Yahudi miano, “Yaku aki kulaate meeng kona kasalaan doi yana. 39Bai mololoi pokabiasaan, yaku sidutu sodiiyo meeng komian doi talunggu doi Oloyo Babasal Paskah. Komuyu yase sulano kusodiiyo ko Yahudi miano natomundo motuuk doi komuyu?”

40Yanila timbiliyo, tukon nggele-nggeleamon, “Aki, inai yana, bai Balanabas!” (Balanabas meeng komian pondikuk.)

19 Doibundu Pilatus usok maka mosumbolii mian mo-umbase Yesus. 2Suludadu-suludadudoo mongkubaimo meeng kosapeyo doi kayung-kayung pangano mopalatadian, maka yanila songgoikene doi Yesus oluno. Lapamo doiya yanila

pekeikene kojubah mosamelaon doi yana, ³maka sidutu lubat doi yana tukon bantile, “Tubo kotomundo Yahudi miano!” Boobus yanila tapiyo yana.

⁴Lapa doiya Pilatus tobuat tukon bantile doi mian mobadaangoo. “Kitayo! Yaku babayo yana tobuat doi komuyu, sulano potoiyo yaku aki kumalaat mau nabaino meeng kona salaan.” ⁵Yesus tobuat tukon pakeyo kosapeyo mopalatadian tukon jubah mosamelaon. Pilatus bantile doi yanila, “Pokitayo do mianoo.”

⁶Sambuno imam-imam kapalano tukon padagai-padagaidoo kitayo Yesus, yanila nggeleamon, “Sempange yana! Sempange yana!”

Pilatus bantil doi yanila, “Poleleiyo yana, tukon posempangemo komuyu susu-muyu, yaku aki kumalaat meeng kona salaan doi yana.”

⁷Yahudi mianodoo timbiliyo, “Manulut komai ukum, yana sio nainukum mate sabab yana akuiyo kobutongo Mian Bisa Napau.”

⁸Sambuno Pilatus ndongoliyo yanila bantile bunoo doiya, yana lobian matakut koidan. ⁹Maka yana usok koidan doi nabatomundoan lalomo tukon sambuno Yesus binaba usok, Pilatus sadaiyo doi yana, “Ikoo komu luwean doiyaando?”

Bai Yesus aki namotimbili. ¹⁰Boobus Pilatus sadaiyo koidan, “Ikoo aki muyase basilingan tukon yaku? Mutoiyo, yaku balakuasa mosodiyo ikoo, tukon kuasa mosempangene ikoo!”

¹¹Yesus timbiliyo, “Kalu Mian Bisa aki nabeekene do kuasadoo doikoo, ikoo mau nabulaamo akiyo komu kuasa doi yaku. Tobikon doiya komian mo beekene yaku doikoo, lobian babasal kona lalim doikoo.”

¹²Sambuno Pilatus ndongoliyo doiya, yana balausaha sulano nasodiyo Yesus. Bai Yahudi miano nggele-nggeleamon, “Kalu Tuan sodiyo yana, Tuan bolikon Kaisal tulano! Mian mo akuiyo kobutongo tomundo, doiya Kaisal namusu!”

¹³Sambuno Pilatus ndongoliyo do bantil-bantilanoo, yana babayo Yesus tobuat maka yana osulange doi kulsi bangulusan doi tampatoo kosambuno Sowaan Batu. (Doi silingan Iblani kosambuno Gabata.)

¹⁴Doiyo kosinggato adukono batong songulo lua suun kooloyo, oloyo akiyon ko Oloyo Babasal Paskah. Pilatus bantile doi mian badaangoo, “Naiyamo kopoo tomundo!”

¹⁵Yanila nggele-nggeleamon, “Akateyo yana! Akateyo yana! Sempange yana!”

Pilatus mansadai, “Kai momoola kusempange kopo tomundo?”

Imam-imam kapalano timbiliyo, “Tongo Kaisal komai tomundo!” ¹⁶Boobus Pilatus beekenemo Yesus doi yanila sulano napo sempange. Yanila ndokiiyo Yesus, maka yanila ampakon babayo yana.

Yesus sinempanggon

(Mat. 27:32-44; Mlk. 15:21-32; Luk. 23:26-43)

¹⁷Yesus tobuat tukon tanggunge kona kayung sempang susuungo ampakon doi lipudoo mo sinombuikon “Mangabosan Olu”. (Doi silingan Iblani binantil Golgota.) ¹⁸Indaa yana sinempanggon. Posinggat-singgat tukon yana daano koidan lua komian bailong mo sinempanggon; komeeng doi bobono talikon, tukon komeeng doi bakalingano talikon tukon Yesus doi tanga-tanga. ¹⁹Doi kayung pesempango Yesus, Pilatus mosumboliikene inoliit kotulisan nia: “Yesus doi Nasalet, Yahudi miano natomundo.” ²⁰Badaang ko Yahudi miano mobasayo do tulisanoo, sabab do lipudoo Yesus nasinempangan aki naodoon doi kota. Tulisanoo lalomo silingan Iblani, Latin, tukon Yunani. ²¹Imam-imam kapalano bantile doi Pilatus, “Inai motulise ‘Yahudi miano na Tomundo,’ bai tulisemo, ‘Mian nia bantile, Yaku Yahudi miano na Tomundo.’”

²²Bai Pilatus timbiliyo, “Komo lapamo yaku tulise, tataap totulis.”

²³Sambuno suludadu-suludadudoo lapa sempanggene Yesus, yanila alayo kona pakean. Pakeanoo inobos sangkap: meeng-meeng malaat meeng koobos. Yanila alayo koidan kona jubah. Jubahdoo akiyo kona kinoitian – tinonum doi babu polong bilit. ²⁴Suludadu-suludadudoo yanila pobotiiinggon meeng tukon bailong, “Inai nda potoliyo najubah nia. Tadu nda mongkubai undian sulano natotong indee komo laate.” Doiya langgedoo teali sulano natakabai oila komo totulis doi Kitab Moliyous lalomo doiyamo:

“Yanila ebes-ebese daku pakean,
tukon mongkubai undian doi kujubah.”

Tukon bisa-bisa do suludadu-suludadudoo kubaiyo buno doiya.

²⁵Doi ponggaupan Yesus nasinempanggonan kokondong Yesus tinano utuso boine, Malia Klopas naboloki, tukon Malia Magdalena. ²⁶Sambuno Yesus kitayo kotinano tukon napololaing yana mamaasikene yanila modaano mokokondong idoo, Yesus bantile doi tinano, “Tina, naiyamo komu pau.”

²⁷Doibundu yana bantile doi napololaingoo, “Ndaiya tinamuyu.” Doiya kosinggato Yesus napololaing talimayomo Yesus tinano sulano nandoong doi napoo bonua.

Yesus namatean

(Mat. 27:45-56; Mlk. 15:33-41; Luk. 23:44-49)

²⁸Yesus toiyo baikon sasaibino doiya lapamo boobus, tukon sulano oilamo komo totulis doi Kitab Moliyous lalomo moola teali, yana bantile, “Yaku molou.”

²⁹Idoo daano komeeng komanggo momoono tukon suka paisuno mo meelee. Maka daano komeeng konggalanggang kinomok doi suka paisunodoo maka tinabokon doi meeng kokayung hisop pangano, maka tinutumikon doi Yesus suungo bibilo. ³⁰Yesus lemese do sukadoo paisuno tukon bantile, “Lapamo kabus!”

Maka yana totukukene kooluno tukon mate.

Yesus tinobok

³¹Kopamalenta aki nayase ko mian-mian mo daano tosempang kobadano taitude doi kayung sempang doi oloyo Tadean, baino kai naiya oloyo Tadeandoo Oloyo Babasal mo tangalaas. Sabab oloyo doiya singgato Yesus nasinempanggonan pokokonoi akiyoon oloyo Tadean, Yahudi miano mangkabi palamisi doi Pilatus sulano yanila nalotoiyo do mian-mianoo aino mo lapamo sinempanggon tukon obulusene do badan-badanoo doi kayung sempang. ³²Maka suludadu-suludadudoo ampakon tukon lotoiyo tumbe-tumbeno koaino domianoo molua mo sinempanggon posinggat Yesus. ³³Sambuno yanila polong doi Yesus, yanila kitayo yana lapamo mate. Jadi yanila akimo napo lotoiyo koaino. ³⁴Bai Yesus lisuko sinubok tukon kalait doi meeng komian doi suludadudoo; tukon mosobit tokundang kosau tukon paisu.

³⁵Mian mo kitayo susuungo kadadianoo, yanamo komo babotilangene doiya langgedoo, sulano komuyu anggayo. Tukon kona salitadoo bisa. ³⁶Langgedoo doiya teali sulano nateali oila komo lapamo totulis doi Kitab Moliyous lalomo, doiya “Akiyo komeeng kai luwedoi bukuno naikon nailotoan”. ³⁷Doi Kitab Moliyous lalomo koidan totulis: “Yanila naikon mbalenge yana mo lapamo yanila tebeke”.

Yesus natinadinan

(Mat. 27:57-61; Mlk. 15:42-47; Luk. 23:50-56)

³⁸Lapa doiya Yusuf doi Alimatea mangkabi palamisi doi Pilatus sulano napo babayo Yesus badano. (Yusuf daano meeng Yesus napololaing bai aki natotingonii, sabab yana matakutene kopamalenta Yahudi.) Pilatus loasene doi yana, jadi yanila ampakono leleiyo Yesus badano. ³⁹Nikodemus, mo loolukoo biasa lubat popook doi Yesus, ampakon polaing tukon Yusuf. Nikodemus mababa pobilat tukon kayung gahalu – sasaibino naiya uga-ugaate tolu kolono kokiloglam kona kadaang. ⁴⁰Do mianoo molua ndokiiyo Yesus badano maka yanila bunguse tukon toik moalus polaing tukon lambadoo mobabangi manulut Yahudi miano naadat bakibulan. ⁴¹Doi lipudoo Yesus nasinempanggonan daano komeeng koasi. Doi asidoo lalomo daano komeeng kokibul moolu, mo akiyon napinake batadinan mian mate. ⁴²Sabab do kibuloo lolani, tukon oloyo Tadean adukono minulai, yanila tadinemo Yesus indaa.

Kibul mo kosong

(Mat. 28:1-8; Mlk. 16:1-8; Luk. 24:1-12)

20 Doi minggu oloyono dowa-dowa, daano mokalipookan, Malia Magdalena ampakon doi kibuloo. Yana kitayo kobatu posunggupo lapamo sinaakon doi kibuloo buango. ²Maka yana obuleng umboliiyo Simon Petulus tukon pololaing Yesus mo seseange, tukon bantile doi yanila, “Yesus ndinikuko doi nakibul, tukon yaku aki kutoiyo inaando kona inabosan.”

³Maka Petulus tukon pololaingoo bailong ampakono doi kibuloo. ⁴Luaiia yanila obuleng, bai doi pololaingoo bailong lobian kona suutanan tukon Petulus, tukon yana komo polong

tumbe doi kibuloo. ⁵Yana mbalenge do kibuloo lalomo tukon kitayo dotoikoo pabalun daano motangabos idoo, bai yana aki nausok. ⁶Simon Petulus tuundu doibundu, maka banggadudul usok doi kibuloo lalomo. Yana kitayo do toikoo pabalun daano motangabos idoo, ⁷bai kotoik mo kinubai papagot Yesus oluno akiyono doi napokolanikonan bai toluluko tangalaas. ⁸Doibundu koidan dona pololaing mo polong tumbe doi kibuloo, usoko koidan. Yana kitayomo tukon anggayomo. (⁹Polong doiya kotembono yanila akiyoon naalatiyo oila komo totulis doi Kitab Moliyous lalomo baikon Yesus tubo doi namatean.) ¹⁰Sambuno lapa doiya Yesus napololaing-pololaing mulemo.

Yesus okitakene kobutongo doi Malia Magdalena

(Mat. 28:9-10; Mlk. 16:9-11)

¹¹Malia Magdalena kokondong doi kibuloo salaano tukon kokiil. Daano yana mokokiil, yana kitayo dokibuloo lalomo, ¹²maka yana kitayo lua komalaekat kona pakean moute. Malaekatoos osulang doi Yesus badano nainabosan, komeeng doi oluno talikon, tukon kobailong doi aino talikon. ¹³Malaekat-malaekatoos mansadai, “Tina, bulaando ikoo mokokiil?”

Malia timbiliyo, “Daku Temeneno lapamo inala, tukon yaku aki kutoiyo inaando yana kona inabosan.”

¹⁴Lapa bantile buno doiya, yana mbaleng doi tonggulungo tukon kitayo Yesus daano mokokondong idoo. Bai yana aki natooyo baikon doiya Yesus. ¹⁵Yesus mansadai doi yana, “Tina, bulaandokon ikoo mokokiil? Tina indee komu inumbal?”

Malia aanggene doiya do asidoo tumbuno, jadi yana bantile, “Tama, kalu Tama komo biyele yana badano naimbaa, tulung bontiikanaku inaando Tama naabosano yana, sulano yaku moola kundokiiyo.”

¹⁶Yesus bantile doi yana, “Malia!”

Malia mbalenge doi Yesus maka bantil tukon silingan Iblani, “Labuni!” (Koalatio “Gulu”.)

¹⁷“Inai motaaniyo yaku,” Yesus bantile doi yana, “sabab yaku akiyoon kuliba doi Tama. Bai potauso doi utus-utusonggu, tukon bontiikene doi yanila baikon diabudodoo yaku libamo doi Tamanggu tukon Tamamu, ku Mian Bisa tukon mu Mian Bisa.”

¹⁸Maka Malia ampakono babotilangene doi Yesus napololaing-pololaing baikon yana lapamo kitayo ko Temeneno tukon baikon Temeneno lapamo bontiikene sasaibinodoo doi yana.

Yesus okitakene kobutongo doi napololaing-pololaing

(*Mat. 28:16-20; Mlk. 16:14-18; Luk. 24:36-49*)

¹⁹Doi Minggudoo oloyono koidan, sambuno kalipookan Yesus napololaing-pololaing pototongimo doi meeng kobonua tukon tataapon-tataapon mo tinataapikono, sabab yanila matakutene kopamalenta Yahudi. Sosinggot Yesus lubat maka kokondong doi yanila tanga-tangano tukon bantile, “Kinatauwun monondok doi komuyu.”

²⁰Lapa yana bantile buno doiya, yana tудоikene doi yanila kolimano tukon lisuko. Sambuno yanila kitayo Yesus, yanila laba-laba tuuno. ²¹Maka Yesus bantile doi yanila idan koidan, “Kinatauwun monondok doi komuyu. Buno Tamanggu bintekene yaku, bunomo lakon yaku bintekene komuyu.” ²²Maka yana puulikene kona ansaang doi yanila tukon bantile, “Talimayo ko Mian Bisa Na Loh. ²³Kalu komuyu ompuniyo kopau meeng nalalim, Mian Bisa koidan ompuniyo. Kalu komuyu aki poompuniyo kopau meeng nalalim, maka Mian Bisa koidan aki naompuniyo.”

Yesus tukon Tomas

²⁴Tomas (mo sinombuikon “Pinga”), meeng komian doi songulo luadoo Yesus napololaing, aki napolaing tukon bailong singgatoos Yesus nalubatan. ²⁵Maka Yesus napololaing-pololaing bailong bantile doi Tomas, “Kami lapamo kitayo Yesus!”

Bai Tomas timbiliyo, “Kalu yaku akiyoon kumongkita kopaku bakaaso doi limano, akiyoon kuusekene kolimanggu saano doi pakudoo pakolo tukon akiyoon kuusekene kolimanggu doi lisuko, tutuu yaku akiyoon kumangangga.”

²⁶Meeng kominggu molapa Yesus napololaing-pololaing daano doi bonuadoo tukon Tomas daanomo koidan. Sasaibino kotataapon tinataapikono. Bai Yesus lubat tukon kokondong doi yanila tanga-tangano, maka bantile, “Kinatauwun monondok doi komuyu.” ²⁷Doibundu yana bantile doi Tomas, “Kitayo kolimanggu, tukon usekene kolimamu saano dimbaa. Ulule kolimamu tukon usekene doi lisukonggu. Inaimo mosasaaki koidan, bai anggayomo!”

²⁸Tomas bantile doi Yesus, “Ku Temeneno, tukon ku Mian Bisa!”

²⁹Maka Yesus bantil doi yana, “Ikoo mangangga sabab lapamo kitayo yaku, kai bulaa? Kinatauwan doi mian mo mangangga mau naaki nakitayo yaku!”

Buku nia natujuan

³⁰Daano mobadaang koidan komo minasaingdinggon-minasaingdinggon Yesus mo kubaiyo doi napololaing-pololaing salaano, bai aki natinulis nai buku nia. ³¹Bai sasaibino naiya tinulis, sulano komuyu anggayo baikon Yesus daano Tomundo Pasalamat, Mian Bisa Napau, tukon sabab mangangga doi yana, komuyu malaat tuboan.

Yesus okitakene kobutongo doi pitu kona pololaing

21 Lapa doiya Yesus okitakene kobutongo idan koidan doi Paisu Tibelias doi napololaing-pololaing. Buno naiya kona tealian: ²Daano kooloyo meeng Simon Petulus, Tomas mo sinombuikon Pinga, Natanael doi Kana luwedei Galilea, Zebedeus napau-pau, tukon lua Yesus napololaing bailong, daano mopototongi. ³Simon Petulus bantil doi tulano bailong, “Yaku yase ampakon bapukat ikan.”

“Kami malaing,” yanila bantil doi yana. Maka yanila taus lakit duangan. Bai doi popooko mau meeng koikan yanila aki namatapu. ⁴Sambuno tambuun sumbot kooloyo, Yesus kokondong doi paisudoo bibilo, bai yanila aki natingoniiyo baino Yesus. ⁵Yesus bantil doi yanila, “Labuk-labuk kai komuyu daano kopo ikan?”

“Akiyo,” yanila timbiliyo.

⁶Yesus bantil doi yanila, “Poisene kopoo buani taalikon bakalinga doi duanganokon, idoo komuyu matapu ikan.” Maka yanila sakukene donapo buani, bai yanila aki nanggoola bubute koidan sabab badaang koikan mokana doi buanidoo lalomo.

⁷Pololaing Yesus mo mamaasikene bantil doi Petulus, “Ndaiya Temeneno!” Sambuno Simon Petulus ndongoliiyo doiya baino Temeneno, yana pakeyo kona kalambi (sabab yana aki nabakalambi) maka yana basuapon doi paisu. ⁸Pololaing-pololaing bailong tuundu babose tukon duangan ampakon doi

buta tina, tukon yanila bubute momeeng konapo buani mo moono ikan. Yanila aki natodudul dodoon doi buta tina, uga-ugaate tolongo sakat kometel. ⁹Singgatoo yanila loboson doi duangan yanila kitayo daano koaung balano indaa tukon ikan doi bungkokono tukon loti. ¹⁰Yesus bantil doi yanila, “Soba babayo doi sumai bubulaa koikan mo sodo komuyu tapuwe.”

¹¹Simon Petulus lakit doi duangan, maka kedele kona buani doi buta tina. Dona buani moono tukon ikan mo babasal; sasaibino sakat lima kolono tolu kona kadaang. Mau nabuno doiya kona kadaang aki namosiak konapoo buani. ¹²Yesus bantil doi yanila, “Mai nda kaan.” Akiyo komeeng doi napololaing-pololaing mobalani mansadai, “Tama indee miano?” sabab yanila toiyo baikon yana Temeneno. ¹³Doibundu Yesus koolaniyo yanila, mangala do lotidoo tukon bekene doi yanila. Yana kubaiyo bunu doiya tukon ikanoo.

¹⁴Naiyamo kotoluno luunggon Yesus naokitakanano ko-butongo doi napololaing-pololaing sambuno yana tubo doi namatean.

Yesus tukon Petulus

¹⁵Sambuno lapa yanila kaan, Yesus bantil doi Simon Petulus, “Simon, Yona napau, kai ikoo lobian komu seangano yaku doi yanila nia naseangano yaku?”

“Bisa, Temeneno,” Petulus timbiliyo, “Temeneno toiyo yaku kilakene Temeneno.”

Yesus bantil doi yana, “Pialae daku domba-domba pauno.”

¹⁶Tuuk lua luunggon Yesus sadaiyo doi yana, “Simon Yona napau, kai ikoo seseangaku?”

“Bisa, Yesus,” Petulus timbiliyo, “Yesus toiyo yaku kilakene Yesus.”

Yesus bantile doi yana, “Pialayo daku domba-domba.”

¹⁷Tuuk kotoluno luunggon Yesus mansadai doi yana, “Simon Yona napau, kai ikoo kilakene yaku?”

Petulus teali poloon sabab Yesus sadaiyo doi yana polong tolu luunggon. Maka Petulus timbiliyo koidan, “Temeneno, Temeneno toiyo sasaibino kolangge. Temeneno toiyo yaku kilakene ko Temeneno!”

Maka Yesus bantil doi yana, “Pialayo daku domba-domba. ¹⁸Bisa tuuno daku bantilan nia: Singgatoo ikoo daanoon motabokon, ikoo susuumu pagete kooakomu, tukon

muampakon doiyaamo komu mongiasan. Bai kalu ikoo motuwamu naikon, ikoo baino ulule kolimamu, tukon baino mian bailong komo pagete ikoo tukon babayo ikoo doi lipu moaki muyase ampakon.”¹⁹(Tukon Yesus nabantil-bantilanoo otudoikene bulaando naikon Petulus namatean sulano naakabasale ko Mian Bisa.) Lapa doiya Yesus bantil doi Petulus, “Lainge yaku!”

Yesus tukon napololaing bailong

²⁰Tembodoo Petulus mbaleng, yana kitayo doi tonggulungo daano Yesus napololaing bailong mo minamaasikon. (Yanamo komo osulang pokoolanikon Yesus tembodoo napoo kaanan tukon mo mansadai doi yana, “Yesus, indee miano komo kulokisangene ko Temeneno?”) ²¹Kitayo yana, Petulus mansadai doi Yesus, “Yesus, bulaando tukon yana nia?”

²²Yesus timbiliyo, “Andeno yaku yase yana daanoon motubo polong daku lubatan, doiya bolikon muulusan. Bai ikoo, laingaku!”

²³Maka tololongolo kobulitano doi Yesus napololaing Yesus baikon napololaingoo aki namate. Banggokai Yesus aki nabantile, baikon pololaingoo aki naikon namate, bai: “Andeno yaku yase yana daano motubo polong daku lubatan, doiya bolikon muulusan.”

²⁴Dopololaingoo komo mebee katalangan doi kadadian-kadadianoo naiya. Yanamo koidan komo lapamo tulise. Tukon kita toiyo oila kona binantilo bisa.

Bantilan napupusan

²⁵Daano mobadaang kolangge bailong Yesus mo kubaiyo. Andeno sasaibinodoo tinulis meeng tukon meeng, yaku lasayo aki nasukup kolipu doi dunia nia sulano nainusokon sasaibino kobuku mo tinulisoo.

LASUL-LASUL SALITANO

PANGANTOKON

Lasul-lasul Salitano daano meeng koposuungino ko Buku Bilita Monondok Lukas mo pelenggene. Kona makisuut tuuno naiya Lasul-lasul Salitano nia doiyamo mobasalitakene bulaando kokaliangano Yesus napololaing-pololaing – tukon Mian Bisa Na Loh nalolaingano – mobabulitakene ko Bilita Monondok moluwedoi Yesus “doi Yelusalem, doi posaapon ko Yudea, doi Samalia, tukon polong doi dunia napupusan” (1:8). Buku nia daano mobasalitakene ko Salani miano naatambuunan konapo ampakongganano koagama tumbe-tumbeno doi Yahudi miano boobus teali meeng koagama doi posaapon kodunia. Komo tulise naiya buku nia yana palaluu koidan ekeenggele komian mobasayo baikon ko Salani miano bolikon kai meeng kosilakaan politik motuuk doi batomundoan Loma, bai koagama Salani bunu meeng kopokindokko agama Yahudi.

Lasul-lasul Salitano moola nainobos tolu koobos. Doi motolu nia koobos tokita kona babasalan kolipu inaando do Bilita Monondokoo kaliangano Yesus nabinasalitakonan tukon kaleda nainokokondongan: (1) tumbe-tumbeno ko Salani miano naampakongganano koagama doi Yelusalem sambuno Yesus tolibakon doi sulugaa; (2) nakinabasalan kolipu-lipu doi Palestina; tukon (3) nakinabasalan mo lobian kona babasalan koidan kotano-tano doi Tobun Tanga bibilo polong popuson ko Loma.

Meeng kolangge mo palaluu doi buku Lasul-lasul Salitano nia doiyamo Mian Bisa Na Loh mo lubat tukon kuasa doi mian badaang mo maangga doi Yelusalem doi tembo Pantekosta oloyono. Doi sasaibino kolangge-langgedoo moteali totulis doi buku nia lalomo totingonii baikon Mian Bisa Na Loh sidutu-posidutukon lolainge tukon ekeenggele kokaleda tukon napadagai-padagai. Bilita mo inotunggukon doi agama Salani tumbeno doiya kosinggato inapalus doi bula-bulaa kootunggul.

Langge-langge mo tinulis naiya buku nia lalomo okitakene koidan bulaando kona bisa-bisaan do bilitadoo doi Salani miano natuboan tukon doi pomeenggonan komontolitusan, doi kaledaan.

Antoko

Batotoboan motuuk doi babulitaan 1:1-26

a. Palenta labino tukon teteba moluwedoi Yesus 1:1-14

b. Yudas posobolino 1:15-26

Babulitaan doi Yelusalem 2:1-8:3

Babulitaan doi Yudea tukon Samalia 8:4-12:25

Paulus nabaleleanian 13:1-28:31

a. Ampakonan tumbeno doi babulitakanano ko Bilita Monondok 13:1-14:28

b. Pobisalaiyan doi Yelusalem 15:1-35

c. Ampakonan koluano luunggon doi babulitakanano ko Bilita Monondok 15:36-18:22

d. Ampakonan kotoluno luunggon doi babulitakanano ko Bilita Monondok 18:23-21:16

e. Paulus bunu meeng komian motinalunggu doi Yelusalem, Kaisalea, tukon Loma 21:17-28:31

1 Teofilus mo monondok,
Doi kubuku tumbeno lalomo lapamo kutalakanggene sasaibino Yesus nakinubai tukon nai notunggukon salataa naatambuunano kona limang, ²polong doi oloyo nalinibakonan doi sulugaa. Akiyoon Yesus naliba doi sulugaa, tukon kuasa Mian Bisa Na Loh yana beena pongotunggul-pongotunggul doi nalasul-lasul yana mo piliyo. ³Sambuno lapa Yesus mate, sangkap kolono kooloyo kona kalumbit Yesus yana biasa otudoikene tukon loloon mo tokita tuuno doi lasul-lasul baikon Yesus bisa-bisa motubomo. Yanila kitayo yana, tukon basilingan doi yanila bulaando ko Mian Bisa nabapalenta bunu Tomundo. ⁴Tukon doiya kosinggatoo yana pototongi tukon yanila, Yesus beekene kona palenta nia doi yanila, "Inai poampakon tinggale

ko Yelusalem. Totiili idoo polong doi Tamanggu nabeekanano kooila mo lapamo dinondiikon, doiyamo mo lapamodoo yaku pailukene doi komuyu lolukon. ⁵Sabab Yohanes mansau mian tukon paisu, bai baimo moimoiya kooloyo komuyu naikon sio po sinau tukon Mian Bisa Na Loh.”

Yesus biningkat doi sulugaa

⁶Salataa do lasul-lasuloo napototongan posinggat-singgat tukon Yesus, yanila mansadai doi yana, “Temeneno, oilakai budodoiya Temeneno yase ekekendenge koidan kobangsa Israe na Batomundoan?”

⁷Yesus timbiliyo, “Tamanggu susuungo komo tantukene kooloyono tukon kotembono. Doiya aki napalaluu komuyu toiyo, sabab doiya Tamanggu nahaak. ⁸Bai komuyu naikon malaat kuasa, kalu ko Mian Bisa Na Loh lubato doi komuyu. Tukon komuyu teali sakisii-sakisii doi yaku doi Yelusalem, doi sasaibino kokampung-kampung Yudea, doi Samalia, tukon polong doi dunia bunduno.” ⁹Lapamo Yesus bantile buno doiya, yana linibakon doi sulugaa doi matanoila salaano, tukon bunong tombukiyo yana doi napoo pambaleng.

¹⁰Daano yanila moleleagea doi dapang, tembodoo Yesus natolibakonan doi sulugaa, sosinggot daano kolua komian mobapakean moute kokondong doi yanila talikon. ¹¹“Eh, Galilea mian-miano,” do mianoo molua nabantilan, “bulaando komuyu motolongo kokondong koimbaa maka poleleagea doi dapang? Yesus komuyu mo kitayo motolibakon doi sulugaadoo doi salaamuyu, yana abali koidan buno do caladoo koidan komuyu mo kitayo budodoo.”

Posoboli Yudas

¹²Doibundu do lasul-lasuloo abalimo doi Yelusalem doi Zaitun Bunggulo, bungkukodoo tangabos uga-ugaate meeng kokilo metel kona odoonan doi Yelusalem. ¹³Doi Yelusalem yanila ampakon doi bonua tempat yanila naposapuan, maka yanila liba doi kombiang mo doi babo. Do lasul-lasuloo doiyamo, Petulus tukon Yohanes, Yakobus tukon Andelias, Filipus tukon Tomas, Baltolomeus tukon Matius, Yakobus Alfeus napau,

Simon Patliot tukon Yudas Yakobus napau; ¹⁴sasaibino yanila sidutu pomeenggon noa mopototongi sulano naposambeang. Yanila sambeang polaing koboi-boine tololo Malia Yesus tinano, tukon polaing Yesus utus-utus.

¹⁵Daano kooloyo meeng, yanila daanoon mopototongi - daano uga-ugaate sakat lua kolono komian mo pototongi - Petulus kokondong mobasilingan. Yana bantile, ¹⁶“Utus-utus! Oila komo totulis doi Kitab Moliyous lalomo, doiya sio nateali. Looluk lolo doi Daud, Mian Bisa Na Loh lapamo bantile tentang Yudas mokatuaiyo do mianoo mo lakoyo Yesus. ¹⁷Yudas daano meeng kotulanggita, tukon yana lapamo lilik koidan sulano namalaing balimang polaing-laing tukon kita.”

(¹⁸Yudas nia lapamo malaat buta nabakibulan luwedoi natambo bakulokisanggonan mo lokis. Yana otuwong tukon mate tukon kotiano tabata lua tukon kokombongo sumbot sasaibino. ¹⁹Sasaibino komian mo dungol doi Yelusalem toiyo doiya halloo. Doiyamo kosababpo doi yanila nasilingan lalomo yanila sombuikene do butadoo Akeldama, koalatio ‘Buta Sau’.)

²⁰“Sabab doi buku Mazmul daano mototulis buno naiya,

‘Sodiiyomo kona tempat dungolan nateali kiis;

inai nadaano komeeng komian modungol doi lalomo.’

Daano mototulis buno naiya koidan,

‘Sodiiyomo kona kadudukan nasinoboli mian bailong.’

²¹⁻²²Tobikon doiya, sio nadaano komeeng komian mo malaing kita moteali sakisii baikon Temeneno Yesus lapamo tubo koidan doi namatean. Doiya mianoo siokai meeng komian moluwedoi antala mian mo sidutu polaing tukon kita doi tempodoo nda mololaingan Temeneno Yesus doi yayaa, salataa Yohanes nabasauan mian polong doi tempono Yesus nalinibakonan doi sulugaa luwedoi kita tanga-tangano.”

²³Maka komian mo hadil idoo mebee galal lua komian, doiyamo Yusuf kosambuno meeng Balsabas (yana sinombuikon koidan Yustus), tukon Matias. ²⁴⁻²⁵Maka yanila sambeang. Yanila bantile, “Yesus, ikoo toiyo komian noano sasaibino. Yudas lapamo otuwong doi nabasambuan lasul tukon lapamo mate. Jadi tudoikene doi kami, indee komiano doi mian nia molua komo Temeneno yase sulano nabinee sambu mosoboliyo Yudas.”

²⁶Salataa lapa doiya do mianoo sambuno molua inundi, maka do undianoo tibus doi Matias. Jadi yana biningkat teali lasul sulano napolaing-laing domo songulodoo meeng kolasul bailong.

Mian Bisa Na Loh nalubatan

2 Sambuno lapa polong doi oloyo Pentakosta, sasaibino komian momangangga pototongi doi meeng kotampat.

²Sosinggot doimbaa tololongol komeeng kolobo mobulungan doi dapang bunu mbombuul momakansang konapuulan. Mian modaano moosulang doi bonuadoo sasaibino moonoo tukon do langgedoo alalo mobulungan. ³Maka yanila kitayo komian alep-alepo pokakana koaung mokolot dadul doi yayaa tukon total doi yanila meeng-meeng. ⁴Yanila sasaibino kinuasai tukon Mian Bisa Na Loh, maka yanila basilingan doi moimoiya kosilingan kaliangano. Yanila basilingan manulut oila komo Lohdoo beekene doi yanila sulano napobantile.

⁵Doiya kosinggatoo badaang ko Yahudi miano luwedoi moimoiya kolipu bailong doi posaapon kodunia, dungol doi Yelusalem. Yanila daano komian mo taat tuuno doi Mian Bisa. ⁶Salataa linongol do langgedoo alalo mobulungan, badaang tuuno komian molubat pototongi. Yanila sasaibino ngginggim molengele do mianoo momangangga momoola basilingan doi moimoiya kosilingan kaliangano. ⁷Tukon masaingding tukon naakiyan nabiyok yanila bantile, "Mian-mian mo basilingan nia sasaibino Galilea miano, bolikon? ⁸Bulaando kona tealian tobikon kita lengele yanila mobasilingan doi silingan lalomo doi kita nalipu memeeng? ⁹Kita mian luwedoi Paltia, Media, Elam, Mesopotamia, Yudea tukon Kapadokia; doi Pontus tukon Asia, ¹⁰doi Fligia tukon Pamfilia, doi Mesil tukon lipulipu Libia pokolanikon ko Kilene; daano doi kita komo lubat luwedoi Loma, ¹¹daano ko Yahudi miano tukon daano koidan ko mian-mian bangsa bailong mo lapamo usok agama Yahudi; daano koidan komo lubat luwedoi Kleta tukon luwedoi Alab. Kita sasaibino lengele yanila basilingan doi nda silingan lalomo memeeng manganai doi langge-langge mo minasaingdinggon Mian Bisa mo lakukanggene!" ¹²Tukon masaingding tukon aki nabiyok yanila sasaibino posadai meeng tukon meeng, "Oila komaanano naiya?"

¹³Bai daano komian bailong koidan mo totulaiyo. Yanila bantile, “Eh, ndaiya mianoo tolongo malangu!”

Petulus naotunggul

¹⁴Maka Petulus kokondong pososinggat tukon lasuloo mosongulo meeng bailong, boobus yana basilingan doi mian dangodoo. Tukon alalo mo babasal yana bantile, “Utus-utus, Yahudi miano tukon sasaibino komo dungol doi Yelusalem! Polengele mono-monondok, sabab nalangge nia palaluu yaku jelaskanggene doi komuyu. ¹⁵Mian nia aki namalangu, buno komuyu popasangka; sabab budodoiya sodo batong sio dowa-dowa. ¹⁶Bai naiya lapamo Mian Bisa babulitakene luwedoi Nabi Yoel:

¹⁷ Mian Bisa bantile, ‘Doi lounu napupusan

yaku naikon kundange daku Loh doi sasaibino komian.

Komu pau-pau mala-malane tukon mupau-pau boineno yana bontiikene doikoo kolangge-langge yaku mo bontiikene doi yanila.

Mian-mian mutabo yana kitayo kolangge-langge yaku mo tudoikene doi yanila.

Mumian-mian momotuwa yana olumon tentang olumon yaku mo beekene doi yanila.

¹⁸ Doi kupeleleani-peleleani-mau mala-malane mau kai boine-, sio kukundongiikene daku Loh doi oloyo-oloyodoo.

Yanila naikon bontiikene do langge-langgedoo yaku mo bontiikenemo doi yanila.

¹⁹ Yaku naikon madaanokon kuasa mominasaingdinggon doi dapang bungukono,

tukon langge-langge modeikon lobo dimbaa doi dunia bilito; naikon daano kosau tukon aung; bukol tukon tibolung.

²⁰ Oloyo naikon teali kalipookan,

bituwon teali memela pokakana kosau

akiyoon nalaate ko Temeneno na Oloyo, Oloyo mo babasal tukon motaanggadoo nalubat.

²¹ Doiya kosinggato, mian mo uang doi Temeneno naikon sinalamaton.’

²²Utus-utus Israe! miano! Polengele oila komo yaku mo bantile nia: Yesus Nasalet mianodoo lapamo Mian Bisa

beena limang motuuk doi utus. Doiya tokita tuuno doi mominasaingdinggon tukon langge-langge mobolikon langge ko Mian Bisa mo lakukanggene doi komuyu tanga-tangano luwedo Yesus. Sasaibino doiya utus toiyomo. ²³Pokokonoi natetel susuungo, Mian Bisa putuskanggene sulano nasalakanggene Yesus doi komuyu. Tukon salataa yana sinalakanggon, komuyu akateyo yana tukon komuyu batadikene mian-mian mokulokis nasempange yana. ²⁴Bai Mian Bisa otuboiyo yana koidan doi mian-mian momate antalano. Yana linomos tukon matean, bai Mian Bisa sodiiyo yana, sabab aki namoola yana mokinuasai budoo doi matean. ²⁵Manganai Yesus nia biasa Daud bantile,

‘Yaku sidutu kitayo ko Temeneno doi salaanggu;
yana lolainge yaku, sulano yaku aki kuinunggot mau kai
oioilamo.

²⁶ Doiyamo kosababpo konoanggu laba-laba tuuno,
kobabanggu mabantil pangga-panggaalan;
tukon kobutonggu nia montotiili
tukon sanaang doi kibil lalomo.

²⁷ Sabab ikoo aki mubatadikene daku jiwa natotinggal doi mian
momate nadunia lalomo.
Ikoo aki mubatadikene komu mian mo satiadoo namanas
tukon kabus.

²⁸ Ikoo lapamo tudoikene doi yaku kololoon motuuk doi tuboan
mo bisa.

Daku laba-labaan liba-liba sabab ikoo daano polaing yaku.’

²⁹Utus-utus, pobeenggu kaloasan, mobasilingan tukon tala-
talaang tentang Daud, tamanggita nakatulunan. Yana matemo
tukon tinadino koidan; kokibulo daanoon doi kita nia tanga-
tangano polong budodoiya. ³⁰Mian Bisa lapamo bateteba doi
Daud, tukon sumba, baikon daano komeeng komian kona
katulunan naikon Mian Bisa oduduke teali tomundo. Sabab
Daud toiyo do tetebadoo tukon mau yana bai meeng konabi
koidan, ³¹yana toiyo koidan oila komo Mian Bisa kubaiyo. Jadi
yana lapamo tantukene baikon ko Tomundo Pasalamat Mian
Bisa mo dondiikene, naikon tubo koidan doi namatean. Daud
bantile,

‘Yana aki nabinatadikon totinggal doi mian momate nadunia lalomo;

kobutongo aki nateali manas tukon kabus.’

³²Yesus naiyamo komo Mian Bisa otuboiyo koidan doi namatean. Kami sasaibino lapamo sakisiiyo doiya halloo.

³³Yana biningkat doi basambuan mo tatandak tukon Mian Bisa beena kakuasaan, maka yana talimayo ko Mian Bisa Na Loh mo lapamo dinondiikon doi Tama. Tukon doi komuyu budodoiya nia molengele tukon kitayo doiyamo do Lohdoo mo kundongiikene doi kami. ³⁴Daud susuungo aki naliba doi sulugaa, bai Daud bantile,

‘Temeneno bantile doi ku Temeneno:

Osulango doi bakalinganggu taalikon,

³⁵ polong yaku kubaiyo komu musu-musu sosuba doikoo!’

³⁶Doiyamo kosababpo sasaibino ko Islael miano sio napotoiyo tutuuno baikon Yesus komuyu mo sempanggedoo, Yesus doiya yanamo koidan komo lapamo Mian Bisa dondiikene nateali Temeneno tukon Tomundo Pasalamat!”

³⁷Salataa do mian-mianoo lengele doiya langgedoo, yanila noano susa tuuno. Maka yanila mansadai doi Petulus tukon lasul-lasuloo bailong, “Utus-utus, kami sio oila kombai kinubai?”

³⁸Petulus timbiliyo, “Pobadodoloon doi polalim-lalim. Tukon komuyu meeng-meeng sio sinau paisu salani luwedoi Yesus Klistus sambuno, sulano kopoo lalim-lalim inompuni. Maka Utus-utus naikon mantalima tambo Mian Bisa Na Loh moluwedoi Mian Bisa. ³⁹Sabab komo Mian Bisa nadinandikonoo doiya tuuk doikoo tukon mutulunan tukon tuuk koidan doi mian mo daano doi tempat-tempat mo odoon - doiyamo sasaibino komian nda Temeneno Mian Bisa mo uange sulano nalubat doi yana.”

⁴⁰Bunomo doiya Petulus nakatalangan doi yanila. Tukon daano mobadaang kona bantilan bailong koidan yana anjulkanggene doi yanila sulano yanila nalapaase kobutongo doi bangsa nia mo kulokis Mian Bisa mo ukume naikon. ⁴¹Badaang komian moanggayo oila Petulus nabinantil, maka yanila polaing sinaumo paisu salani. Kona kadaang do mianoo mo mangangga doiya singgat sosuungi koidan tolu koloon komian. ⁴²Tukon tutuu

yanila banggadudul monggiotunggul doi lasul-lasul tukon sidutu pototongi posinggat-singgat. Yanila kaan posinggat-singgat tukon sambeang posinggat-singgat.

Mian-mian momangangga nakokubai doi tuboan

⁴³Badaang tuuno komo minasaingdinggon do lasul-lasuloo mo kubaiyo tobikon sasaibino komian masaingding tukon matakut. ⁴⁴Mian momanganggadoo sasaibino banggadudul pomeenggon tukon oila komo daano doi yanila, yanila bapake posinggat-singgat. ⁴⁵Yanila balukene kona polangge-langge tukon yanila nabuat, maka napo obosikene kodoyno doi yanila sasaibino manulut meeng-meeng nakapalaluuwan. ⁴⁶Samba-samba kooloyo yanila pototongi doi Temeneno Nabonua; maka napokaan posinggat-singgat, tukon laba-laba tukon yanila aki nasombong-sombong doi yanila nabonua. ⁴⁷Yanila tolono nggaa-nggaaale ko Mian Bisa tukon yanila sinesiang doi sasaibino komian. Sasamba kooloyo kona kadaang yanila tosuungi sabab ko Temeneno beekene doi yanila komian budodoiya mo sinalamaton.

Mian lapit tinangalinggon

3 Daano kooloyo meeng Petulus tukon Yohanes ampakon doi Temeneno Nabonua tepat batong tolu kinobian, doiya kotembono tuuk sambeangan. ²Indaa doi tataapon babasaloo mo sinombuikon “Tataapon Monondok”, daano komeeng komalane mo lapit salataamo doi nasinuungan. Samba-samba kooloyo mianoo binaba indaa sulano nabakabi-kabi doi mian-mian mo usok doi Temeneno Nabonua. ³Sambuno do mian lapitoo kitayo Petulus tukon Yohanes mousok doi Temeneno Nabonua, yana kabiyo doi yanila sulano yana nabinee meeng kolangge. ⁴Maka yanila mbalenge yana, boobus Petulus bantile, “Mbalenge kami!” ⁵Maka mian lapitoo palatikanggene yanila tukon yana moinikene naikon momalaat meeng kolangge doi yanila. ⁶Bai Petulus bantile doi yana, “Yaku akiyo daku doy mau nakidik. Bai oila komo daano doi yaku, doiya yaku beekonggon: Tukon Yesus Klistus nakuasa Nasalet mianodoo,

papakono!”⁷ Maka Petulus taaniyo kolimano bakalinga do mianoo mopiit yana kedele maka kokondong. Banggadudul do mianoo aino tukon aino matano tealimo bukuan.⁸ Maka yana osuut kokondong, tukon mulaimo ampa-ampakon dombaa dombulo. Doibundu yana usok polaing-laing tukon Petulus maka Yohanes doi Temeneno Nabonua, tukon yana ampakon lua-luanggon nggaale ko Mian Bisa.⁹ Sasaibino komian kitayo yana moampakon tukon nggaa-nggaale ko Mian Bisa.¹⁰ Maka yanila sadaliyo baikon yanamo domo bakabi-kabidoo mo biasa osulang doi “Tataapon Monondok” doi Temeneno Nabonua. Yanila masaingding tuuno tukon masaingdingene oila komo teali doi yana.

Petulus naotunggul doi Temeneno Nabonua lalomo

¹¹Mianoo banggadudul momeeng lainge Petulus tukon Yohanes. Doiya kosinggatooyanila toluila polong doi gandalia mo sinombuikon “Salomo na Gandalia”, sasaibino komian lubat pokombuli doi yanila sabab masaingding.¹² Salataa Petulus kitayo do mian-mianoo mobadaang, yana bantile doi yanila, “Eh Israel mian-miano, bulaando Utus-utus momasaingdingene naiya hallia? Bulaando komuyu pateekene kami momeenggon? Kai komuyu aanggene naiya mian nia moola ampa-ampakon sabab daano kokuasa doi kami kai sabab kami motaat doi Mian Bisa?”¹³ Mian Bisa Abalaham mo sosubaiyo, Ishak tukon Yakub nda tulunan na Mian Bisa, do Mian Bisadoo lapamo akabasale Konapeleleani, doiyamo Yesus. Yesus doiyamo doi komuyudoo mo salakanggene doi pamalenta, tukon lawane doi Pilatus salaano, doiya kosinggatooy Pilatus yase osodiiyo.¹⁴ Yana moliyous tukon monondok, bai komuyu lawane yana tukon desaake sulano Pilatus nasodiiyo komeeng komian momangakate doi komuyu.¹⁵ Utus-utus akateyo Yesus, banggokai doi yanamo kotuboan naluwean motuuk doi sasaibino komian. Tukon Mian Bisa otuboiyomo yana koidan doi namatean. Kami lapamo sakisiiyo doiya halloo.¹⁶ Utus-utus lapamo kitayo tukon sakisiiyo oilamo komo teali doi mian nia mo lapit. Yana lapamo teali bukuan tukon sehato koidan sabab yana anggayo Yesus tukon kona kuasa. Tobikon namangangaan doi Yesus maka namian nia teali bukuan abali doi Utus-utus salaano sasaibino.

¹⁷Utus-utus! Budodoiya yaku toiyō baikon oila komo komuyu tukon pokatua-katua nalikukanggon motuuk doi Yesus, doiya komuyu kubaiyomo sabab komuyu aki potoiyo oila komo sio pokubaiyo. ¹⁸Tobikon doiya tealimo koidan oila komo lapamo Mian Bisa pailukene loolukonoo doi sasaibino kona nabi-nabi, baikon Tomundo Pasalamat mo pinaladandikon sio namandalita. ¹⁹Tobikon doiya Utus-utus, pobadodoloon doi polalim-lalim tukon posula doi Mian Bisa, sulano yana alapuse komu lalim. ²⁰Yesus lubat doi komuyu tukon komuyu toupiyo kosanaangan doi lohani. Tukon Temeneno sumboliiyo Yesus molubat doi komuyu, sabab yana lapamo Mian Bisa tantukene moteali Tomundo Pasalamat doikoo. ²¹Yesus dungol doi sulugaa polong ko Mian Bisa tealikene sasaibino boolu bunu mo lapamo Mian Bisa bantile doi nanabi-nabi doi lounu loolukonoo. ²²Musa biasa bantile, 'Mian Bisa komu Temeneno naikon yana sumboliiyo doikoo komeeng konabi doi mubangsa susuumu, bunu yana mosumboliiyo yaku. Komuyu sio pondongoliiyo sasaibino do nabidoo nabinontiikon doi komuyu. ²³Mian mo aki napalatikanggene oila do nabidoo nabinantil, do mianoo sinaakon doi Mian Bisa namian bailong tukon sinilaka.' ²⁴Nabi-nabi mo sidutu pelenggene kobulita moluwedoi Mian Bisa, tambuun doi Nabi Samuel tukon nabi-nabi bailong mo lubat doibundu, sasaibino babilitakene tentang nalounu nia. ²⁵Tetebateteba moluwedoi Mian Bisa nabi-nabi mo pelenggene doiya tuuk doi Utus-utus. Doi paladandianoo lalomo Mian Bisa mokubai tukon tumbungita, Mian Bisa bantile doi Abalaham bunu naiya, 'Doi mukatulunan yaku naikon balakaatiyo sasaibino kobangsa doi dunia nia.' Paladandianoo doiya tuuk doi komuyu koidan. ²⁶Doiyamo kosababpo ko Mian Bisa piliyo Konapeleleani, maka sumboliiyo yana lubat doi komuyu tumbe, sulano nabalakaatiyo komuyu. Kona cala mobalakaatiyo komuyu doiyamo tukon kubaiyo Utus-utus sasaibino teali badodoloon doi mutuboan mo lokis."

Petulus tukon Yohanes doi Pangadilan Agama salaano

4 Daanoon Petulus tukon Yohanes mobasalita tukon dopai mianoo, imam-imam kapalano tukon komondan padagai Temeneno Nabonua tukon Saduki miano lubat doi Petulus tukon

Yohanes. ²Yanila nggimal sabab Petulus tukon Yohanes bantile doi mian baikon Yesus lapamo tubo doi namatean. Tukon doiya kobukutiino baikon komian momate naikon tubo koidan. ³Jadi yanila lakoyo doi Petulus tukon Yohanes maka usekene doi talunggu lalomo. Badungga mopopooko, Petulus tukon Yohanes daanoon motinaan loolukon polong modoakon. ⁴Bai komian mo lapamo molongol Petulus tukon Yohanes naotungguloo badaango komo mangangga. Jadi kona kadaang yanila tosuungi teali uga-ugaate lima koloon komian.

⁵Modoakon kolobo komo Pangadilan Agama, pamalenta-pamalenta tukon gulu-gulu agama yanila pototongi doi Yelusalem. ⁶Yanila ampakon pososuung tukon Hanas Imam Mobabasal, tukon Kayafas, Yohanes, Aleksandel, tukon sasaibino komian mo tongusokon imam babasal napuli. ⁷Petulus tukon Yohanes binaba namangadap doi yanila, maka yanila mansadai, “Bulaando kopo kubaiyano do mianoo molapit teali tangalin? Tukon bukuanan oilakai indee miano nakuasa komuyu molakukanggene doiya?”

⁸Petulus, mo inusokimo Mian Bisa Na Loh timbiliyo, “Tuan-tuan katua bangsa tukon Tuan-tuan anggota pangadilan agama! ⁹Kami pinalesa doi oloyo nia sabab kami mongkubai lobo momonondok tulungiyu komian molapit, tukon tobikon Tuan-tuan yase toiyo bulaando do mianoo nainalinan. ¹⁰Nah, Tuan-tuan sasaibino sio potoiyo tukon sasaibino kobangsa Israel sio natoiyu baikon namian nia budodoiya mokokondong tukon kobutongo sehat doi Tuan-tuan salaano, tobikon bukuan tukon kakuasaan moluwedoi Yesus Klistus Nasaletoo miano. Tuan-tuan lapamo sempanggene Yesus, bai ko Mian Bisa lapamo otuboiyo yana koidan. ¹¹Yesus naiyamo komo minakisuuti doi ayat nia doi Kitab Moliyous lalomo,

‘Batu mo aki natapake doi komuyu tukang-tukang bangunan, tokita teali batu mo toloutama.’

¹²Tolongo luwedoi Yesus komian sinalamaton. Sabab doi posaapon kodunia doi antala banggapi akiyo komeeng komian kai mo malaat kakuasaan moluwedoi Mian Bisa sulano nasalamatene kita.”

¹³Anggota-anggota Sidang Pangadilanoo masaingding mokitayo Petulus tukon Yohanes nabalanian, oila koidan yanila toiyo

baikon do lasuloo molua daano mian biasa mo akiyo kona sikolah. Maka yanila sadal baikon do lasuloo molua daano mian mo polaing tukon Yesus. ¹⁴Bai yanila aki nanggoola mabantil oioila, sabab do mianoo mo lapamo tinangalinggon daano mokokondong idoo doi yanila salaano posinggat-singgat tukon Petulus maka Yohanes. ¹⁵Maka yanila sumboliiyo do lasuloo molua natobuat luwedoi luang sidangoo, doibundu yanila pobisalaikenemo. ¹⁶Yanila bantile, “Kita oila konda kubaiyano doi mian nia? Sasaibino komian mo dungol doi Yelusalem lapamo toiyo baikon mominasaingdinggonoo mo lual biasa nia, yanila luaila komo kubaiyo. Kita aki namoola akiyenggene doiya. ¹⁷Bai sulano naiya langge nia naaki natasabukon todudul luas koidan doi antala mian badaang, mai kita ancame yanila luaila baikon yanila aki namoola koidan mobasilingan mau doi meeng komian tukon pakeyo Yesus sambuno.”

¹⁸Maka yanila uange doi Petulus tukon Yohanes usok koidan, maka yanila bontiikene baikon Petulus tukon Yohanes akimo namoola koidan bantile kai bangotunggul tukon Yesus sambuno.

¹⁹Bai Petulus tukon Yohanes timbiliyo, “Popikikene susuumuyu oila komo kana doi Mian Bisa salaano; tulutiyo Tuan-tuan napalenta kai tulutiyo ko Mian Bisa napalenta. ²⁰Sabab kami aki namoola tade mosilingane manganai oila komo lapamo kami kitayo tukon lengele.” ²¹Anggota-anggota sidangoo aki namoola malaat meeng koalasan sulano ukume Petulus tukon Yohanes. Jadi yanila ancame do lasuloo molua, maka yanila sodiiyo luaila, sabab sasaibino komian nggaa-nggaale ko Mian Bisa sabab do kadadianoo. ²²Mian mo toupiyo do tangalinanoo lobiano sangkap kolono kotaum kona umul.

Mian-mian momangangga mangkabi balanian doi Temeneno

²³Sambuno lapa Petulus tukon Yohanes sinodii, yanila abalimo doi tula-tulano tukon basalitakene sasaibino oila koimam-imam kapalano tukon pamalenta-pamalenta Yahudi nabinantil doi yanila. ²⁴Sambuno do tula-tulano lengele, yanila sambeang posinggat-singgat tukon pomeenggon noa doi Mian Bisa. Yanila bantile, “Temeneno, ikoomo komo tealikene kotimbu tukon buta tukon tobun tukon sasaibino

koantoko. ²⁵Tukon mu Loh ikoo sidutu pobasingonii lolo doi tumbungami, Daud, doiyamo muata; ikoo bantile,

‘Bulaando ko mian-mian, mo aki natingoniiyo ko Temeneno, nggimal;

bulaando kobangsa-bangsa mongkubai tetel mo aki nabalaguna?’

²⁶ Tomundo-tomundo doi dunia batotobo sulano napolobosi, tukon sasaibino kokatua pomeenggon

molawane ko Temeneno tukon Tomundo Pasalamat.’

²⁷Sabab takainomo Helodes tukon Pontius Pilatus lapamo mongkubai kombulan tukon mian mo aki natingoniiyo ko Temeneno tukon koidan Israel miano doi kota nia. Yanila pokombuli tukon pomeenggon sulano napo lawane Yesus domu peleleani mo moliyousoo, mo lapamo ikoo bingkate teali Tomundo Pasalamat.

²⁸Yanila pomeenggon sulano napo mongkubai sasaibino kolobo, mo lapamo ikoo tantukene doi tumbe-tumbeno baikon doiya naikon nateali. Tukon ikoo tantukene doiya luwe mukuasa tukon mumongiasan susuumu. ²⁹Budodoiya, Temeneno, kitayomo bulaando yanila naancamano kami. Tukon pataikene kami, muata-ata nia, mobabilitakene komu bilita tukon aki mai matakut. ³⁰Beekenemo komutulungan sulano komian moseselon tinangalinggon tukon kuasa mominasaingdinggon-minasaingdinggon tukon langge-langge mominasaingdinggon mololoi nakuasa moteali tukon nabukuanan luwedo Yesus sambuno, Mupeleleani mo moliyousoo.”

³¹Sambuno lapa yanila sambeang, doi yanila natampat pototongiandoo unggot. Yanila sasaibino Mian Bisa Na Loh kuasaiyomo, tukon tambuuno basilingan tukon balani tuuno tentang bilita moluwedo Mian Bisa.

Sasaibino posinggat-singgat

³²Sasaibino komian mo manganggadoo tubo pomeenggon noa tukon pikilan. Akiyo komeeng komian kai luwedo yanila moaanggene baikon oila kona lobo daanoon susuungo. Sasaibino kolangge mo daano doi yanila, yanila pakeyo posinggat-singgat.

³³Tukon kuasa mo babasal, lasul-lasuloo mebee kasaksian baikon Yesus lapamo tubo koidan. Jadi ko Mian Bisa balakaatiyo tuuno

yanila. ³⁴Tukon akiyo komeeng doi yanila mo akiyo kona oioila. Sabab yanila mo daano kona buta kai nabonua, yanila balukene; maka do pongolinodoo yanila babayo ³⁵tukon yanila beekene doi lasul-lasuloo. Doibundu do doynodoo inobos-obos doi memeeng komian mo mapalaluu.

³⁶⁻³⁷Bunomo lakon doiya tukon Yusuf. Mau yana balukene kona buta, maka kopongolinodoo yana babayo tukon salakangene doi lasul-lasul. Yusuf nia daano meeng komian doi Lewi natulunan moluwedoi Siplus; lasul-lasul bantile yana koidan Balanabas (komaanano Pengibul).

Ananias tukon Sapila

5 Bai daano komeeng komala-malane kosambuno Ananias. Yana tukon kona boloki kosambuno Sapila, mabalukon koidan soobos kobuta yanila koono. ²Doy kopongolinodoo kosoobos yana taane tuuk butongo susuungo tukon kobai-longgon yana salakangene doi lasul-lasul. Yana lakukangene doiya tukon potoikono kona boloki. ³Maka Petulus bantile doi yana, “Ananias, bulaando ikoo mosodiiyo ko Ibiliis nakuasaiyo konoamu, polong ikoo bakala-kala doi Mian Bisa Na Loh, tukon aki mubiyok-biyok ikoo taane tuuk butomu susuumu kosoobos do doydoo moluwedoi babalukanan butadoo? ⁴Do butadoo doiya koomu moakiyoon ikoo mubalukene. Tukon sambuno lapamo do butadoo binalukon, kodoyno daanoon koomu koidan. Jadi bulaando modaano komu makisuut doi noamu lalomo sulano mukubaiyo komo buno doiya? Bolikon banggapi komu kinaakalai bai Mian Bisa!” ⁵Sambuno Ananias lengele do bantil-bantilanoo, yana tolubang, polaing mate. Sasaibino komian mo lengele tentang doiya kadadianoo teali matakut. ⁶Maka kotabo-tabo lubat balune Ananias badano, tukon yanila babayo doi tonggulung sulano natinading.

⁷Uga-ugaate tolu kojam koidan kona boloki usoko. Yana aki natoiiyo oila komo sodo lapa nateali. ⁸Petulus bantile doi yana, “Soba bontiikene doi yaku; Oilakai do butadoo ikoo tukon mulangkai mobalukenedoo, tolongo buno naiya koolino?” “Bisa, doiyamo koolino,” Ananias naboloki napotimbili.

⁹Maka Petulus bantile doi yana, “Bulaando ikoo tukon mulangkai mopomeenggon sulano posobaiyo ko Temeneno Na Loh? Mulengele! Komian mo tadine komu langkai lapamo abalimo. Yanila naikon babayo ikoo koidan doi tonggulung.”

¹⁰Tembodoo koidan Ananias nabolokidoo tolubang tukon mate doi Petulus salaano. Tukon tembo mian do tabo-tabodoo usok, yanila pososuunggene yana lapamo mate. Maka yanila babayo kobadano doi tonggulung tukon yanila tadine doi nalangkai kibulo bibilo. ¹¹Maka sasaibino komian mangangadoo tukon komian bailonggon mo lengele tentang do kadadianoo yanila tealimo matakut.

Kuasa-kuasa mominasaingdinggon tukon langge-langge mo deikon lobo

¹²Tobikon lasul-lasul nabaleleanian maka badaango komominaasaingdinggon tukon langge-langge modeikon lobo teali doi antala masalakat. Tukon pomeenggon noa sasaibino komian momangangga bakombul doi Salomo na Gandalia doi Temeneno Nabonua. ¹³Tukon mian bailong akiyo komo balani lubat pototongi tukon do mianoo manganggamo. Bai do mianoo manganggamo inodotii tuuno doi masalakat. ¹⁴Tukon pololokon malumbit pololokon tosuungi badaang komian mo mangangga doi Temeneno - mau mala-malane mau kai boine. ¹⁵Tobikon dokaadaannoo motealimo buno doiya, tobikon komian moseselon inabos doi namooloan bungkukono kai doi nabalayon, maka nakinanggi doi loloon, sulano yanila mau nabaino soisik moola kanakon Petulus momokouno, kalu Petulus alon idoo. ¹⁶Potutuundu ko mian-mian molubat doi kampung-kampung Yelusalem naponngaupan. Yanila babayo komian mo seselon tukon mian mo inusoki ibiliis. Tukon dopai mianoo sasaibino tinangalinggon.

Lasul-lasul sinakisaa

¹⁷Doibundu imam babasal tukon sasaibino kona pololaing-pololaing, doiyamo motongusokon Saduki miano, tambuuno mangala tindakan, sabab yanila masakito konoano. ¹⁸Lasul-lasuloo linako, maka binaba tukon inusokon doi talunggu lalomo. ¹⁹Bai dopopokoo meeng ko Temeneno namalaekat bukayo kotalunggu tataapono, maka babayo do lasul-lasuloo tobuat. Malaekatoos bantile doi lasul-lasuloo, ²⁰“Poampakono pokokondong doi Temeneno Nabonua tukon popailukene komian kotuboan kaliangano mo boolu nia.” ²¹Maka do lasul-lasuloo yanila loingiyo do malaekatoos nateteba. Dowa-dowa

tuuno yanila ampakono doi Temeneno Nabonua tukon mulaimo yanila bangotunggul idoo.

Daano buno doiya imam babasal tukon napololaing-pololaing lubat, maka kubaiyo kolapat babasal tukon pamalenta Yahudi. Doibundu yanila mosumbolii mian moampakon ndokiiyo dopai lasul-lasuloo doi talunggu lalomo sulano nabinaba mangadap doi yanila. ²²Bai sambuno dopai mian-mianoo mo sinumbolii polong doi talunggudoo, yanila akimo napolaate do lasul-lasuloo idoo. Jadi yanila abalimo, maka yanila lapulkanggene doi pangadilan. ²³“Doi tembo kami polong doi talunggudoo,” yanila bantile doi lapatoo lalomo, “kami laate kotalunggu tatapono daano motosupat mono-monondok, tukon kopadagai daanoon modagaiyo kotataapon. Bai salataa kami bukayo do tataaponoo, kami aki mai laate mau nabaino meeng komian doi talunggudoo lalomo.” ²⁴Salataa dosuludadudoo padagai Temeneno Nabonua tukon imam-imam kapalano lengele do lapulano, yanila pusinggenemo do lasul-lasuloo kaliangano tukon matakut naikon oila komo moola teali. ²⁵Doibundu lubat komeeng komalane mobabaya kobilita nia, “Polengele! Dopai mianoo Tuan-tuan mo taane doi talunggudoo budodoiyan daanoon mobangotunggul doi mian badaang doi Temeneno Nabonua!” ²⁶Maka do suludadudoo padagai Temeneno Nabonua pososingat kona padagai-padagai ampakono mondokiiyo do lasul-lasuloo koidan. Bai yanila aki napakisaayo do lasul-lasuloo, sabab yanila matakutene domianoo mobadaang; inai-inaikene dopai mianoo mobadaang naaki napoo sakule yanila tukon batu.

²⁷Lasul-lasuloo binaba usok mangadap doi pangadilan. Maka imam babasal palesayo yanila. ²⁸Yana bantile, “Lapamo kami pantane komuyu tukon momoonas sulano komuyu akimo pobangotunggul doi mianoo. Bai budodoiyan soba pokitayo oila kopo kinubaidoo! Komuyu sialkanggene kopoo otunggul doi kampung-kampung sasaibino doi Yelusalem miano, tukon komuyu tuduwe baikon kami komo mangaanikene kona matean do mianoo.”

²⁹Petulus tukon dolasul-lasuloo bailong timbiliyo, “Kami sio mai tulutiyo ko Mian Bisa tukon bolikon tulutiyo komanusia. ³⁰Yesus, komuyu mo sempangene, lapamo inotuboi koidan doi namatean doi tumbunggita na Mian Bisa. ³¹Tukon ko Mian

Bisa lapamo beena doi yana kadudukan tukon kakuasaan mo tatandak teali Katua tukon Pasalamat; sulano kobangsa Israeel binee todanan mobadodoloon doi napolalim-lalim tukon malaat kaampunan. ³²Kamimo kona sakisii-sakisii tentang sasaibinodoo – kami tukon koidan Mian Bisa Na Loh mo Mian Bisa beekene doi mian-mian mo tulutiyo kona palenta.”

³³Salataa koanggota-anggota Pangadilan Agama ndongoliiyo doiya, yanila nggimal tuuno, tukon yanila pomeenggon moakateyo do lasul-lasuloo. ³⁴Bai doi antala anggota-anggota pangadilan daano komeeng ko Falisi miano kosambuno Gamaliel. Yana gulu agama mo inangga tuuno doi sasaibino komian. Yana kokondong maka mobintokon mian mobabaya tobuat loolukon do lasul-lasuloo. ³⁵Doibundu yana bantile doi Pangadilan Agama, “Utus-utus Israeel miano! Popikikene namono-monondok tentang oila komo Utus-utus naikon lakukanggene motuuk doi mian nia. ³⁶Sabab loolukon biasa sumbut Teudas, mo anggape kobutongo mian babasal, tobikon uga-ugaate sangkap kosakato komian momalaing yana. Bai yana inakate tukon sasaibino kona pololaing-pololaing pobabandakono, tukon kona kagiatan lapus. ³⁷Lapa doiya, doiya kosinggatoo daano konatinulis, sumbut koidan Yudas, Galilea miano. Tobikon napengaluh, badaang koidan komian mo malaing yana. Bai yana koidan inakate, tukon sasaibino kona pololaing-pololaing pobabandakono. ³⁸Jadi budodoiyo tukon naiya kadadian nia, daku otunggul bunu naiya: inai pokubaiyo oioila naiya mian nia, posodiiyomo yanila. Sabab kalu otunggul tukon kagiatan yanila nia luwedoi banggapi, maka otunggul tukon do kagiatanoo naikon lapus. ³⁹Bai kalu doiya lubat luwedoi Mian Bisa, maka Utus-utus aki naikon namoola kalayo yanila. Bai naikon totingonii baikon Utus-utus tutumbokiiyo ko Mian Bisa.”

Gamaliel naotungguloo tinalima doi pangadilan. ⁴⁰Maka do lasul-lasuloo inuang, maka inumbas, doibundu pinantan momongotunggul koidan tentang Yesus. Lapamo doiya, maka nasodo yanila sinodii. ⁴¹Lasul-lasuloo tinggalemo do Pangadilan Agama tukon laba-laba sabab ko Mian Bisa lapamo toiyo yanila sio namalaat pototulai sabab Yesus. ⁴²Tukon samba-samba kooloyo doi Temeneno Nabonua tukon doi mian nabonua, yanila banggadudul bangotunggul tukon babulitakanggene ko Bilita Monondok tentang Yesus baikon yanamo ko Tomundo Pasalamat domo pinaladandikonoo.

Pitu komian potombonii

6 Yesus napololaing-pololaing pololokon malumbit pololokon sosuungi badaang. Doiya kosinggato ko Yahudi miano mobasilangan Yunani, teali aki nasanaang doi Yahudi mian-mianoo motuleng. Komo basilinganoo Yunani bantile, “Kombai boi-boine mo lapamo balu aki namalaat obos ongos samba-samba kooloyo mo inobos-obos doi mian.” ²Tobikon doiya, do lasul-lasuloo mosongulo lua pototongikene sasaibino kona pololaing tukon bantile doi yanila, “Aki namonondok kalu kami tade mobabilitakangene ko Mian Bisa nabantilan, sabab sio mongulus soal-soal kinaan. ³Jadi, tadukai Utus-utus komuyu pomolilik pitu komian mo monondok kona sipat tukon kinuasaimo Mian Bisa Na Loh tukon pandoi, mo moola kami palentayo mouluse nasoal-soal nia; ⁴sabab kami yase sambeang tukon babulitakangene ko Temeneno nabantilan.”

⁵Sasaibino do mianoo yase do lasul-lasuloo nagalal. Maka yanila piliyo Stepanus, meeng komian mo mangangga tuuno doi Yesus tukon kinuasaimo Mian Bisa Na Loh. Koidan toliliko: Filipus, Plokolus, Timon, Palmenas, tukon Nikolaus doi Antiokhia; yana bolikon Yahudi miano bai yana usoko agama Yahudi. ⁶Do mianoo mopitu inusulkanggon doi lasul-lasuloo, maka dopai lasul-lasuloo sambeango tukon mangkabi balakaat doi Temeneno motuuk doi yanila.

⁷Bunomo doiya kobilita moluwedoi Mian Bisa pololokono tololongol tukon Yesus napololaing-pololaing doi Yelusalem pololokono koidan tosuungi badaang. Tukon badaang koidan koimam-imam mo mangangga doi Yesus.

Stepanus linako

⁸Stepanus Mian Bisa balakaatiyo tuuno, tobikon yana mongkubai badaang kokuasa mominasaindinggon tukon langgelangge mobolikon langge doi antala masalakat. ⁹Bai daano ko mian-mian mo lawane yana; yanila daano anggota-anggota bonua kaledaan mo sinombuikon Bonua Kaleda Mian-mian mo Bebas. Anggota-anggota bonua kaledadoo daano Yahudi miano doi Kilene tukon Aleksandelia. Yanila tukon Yahudi miano doi Kilikia tukon Asia ponggeeleki tukon Stepanus. ¹⁰Bai yanila aki namoola bantayo oila komo Stepanus bantile, sabab ko Mian Bisa Na Loh beenamo yana pandoiyan

mobasilangan. ¹¹Tobikon doiya yanila matambo moimoiya komian sulano nabantile, “Kami lengele do mianoo totulaiyo Musa tukon Mian Bisa!” ¹²Bunomo kai doiya yanila natuduwan komian tukon pamalenta-pamalenta Yahudi, tukon gulu-gulu agama. Maka yanila ampakono molakoyo Stepanus, doibundu yanila babayomo Stepanus mo mangadap doi Pangadilan Agama. ¹³Tukon yanila mangadapene kosakisii-sakisii mo mebee katalangan-katalangan mo aki nabisa doi Stepanus. Sakisii-sakisiidoo bantile, “Mian nia sidutu totulaiyo ko Temeneno Nabonua mo moliyous tukon totulaiyo ko Mian Bisa napalenta-palenta Musa mo pelengene. ¹⁴Kami lapamo lengele yana mobantile, baikon Yesus doi Nasaletoo naikon lepeyo naiya Temeneno nia Nabonua, maka naboliyo sasaibino koadat-istiadat Musa mo obulusene doi kita!” ¹⁵Sasaibino komian mo daano mopototongi doi lapatoo Pangadilan Agama mbalenge Stepanus. Tukon doiya kosinggatoo Stepanus tokita koduduso buno malaekat duduso.

Stepanus napidato

7 Imam babasal mansadai doi Stepanus, “Oilakai do mianoo nabinantil sasaibino bisa?” ²Stepanus timbiliyo, “Utus-utus tukon Tama-tama! Soba polengele yaku! Akiyoon kotumbunggita Abalaham biyol doi Halan, doiya kosinggatoo daano modungol doi Mesopotamia, Mian Bisa mo monondok lubat doi yana, ³tukon bantile, ‘Otinggalemo komutano tukon kopulimu. Ampakon doi lipu yaku naikon mo tudoikene doikoo.’ ⁴Maka Abalaham otinggalemo kolipu Kasdim, maka biyol doi Halan. Sambuno Abalaham tamano mate, Mian Bisa kubaiyo Abalaham biyol doi lipu nia Utus-utus tukon Tama-tama sasaibino modungoliyo budodoo nia. ⁵Doiya kosinggatoo akiyo mau nabaino soobos doi lipu nia Mian Bisa beekene doi Abalaham sulano nateali Abalaham nalipu; mau kai nasalaal aki nabineekon doi yana. Bai Mian Bisa paladandikenemo baikon yana naikon mobeekene doi Abalaham sulano nateali Abalaham namilik doi nakatulunan. Doiya kosinggatoo Abalaham akiyoon nadaano kona pau. ⁶Bai naiya ko Mian Bisa nabantilan doi yana, ‘Komu katulunan naikon dungol buno mian molulubaton doi mian nalipu bailong. Dopai lipudoo tumbuno

naikon kubaiyo yanila ata tukon lokis-lokise yanila sangkap kosakato kotaum kona kalumbit. ⁷Bai yaku naikon ukume komian molokis-lokise yanila, tukon yanila koidan biyol doi lipudoo tukon yanila naikon sosubaiyo yaku doi tampat nia.' ⁸Sambuno lapa bantile buno doiya do paladandianoo Mian Bisa sahkanggenemo tukon upacala sunat. Maka sambuno lapa Ishak, Abalaham napau susuungo, Abalaham sunate yana salataa kona umul alu kooloyo. Doibundu Ishak sunate koidan kona pau, doiyamo Yakub. Tukon Yakub sunate koidan kona pau mosongulo lua, doiyamo komo teali Yahudi miano tama-tamano naluwean.

⁹Tamanggita-tamanggitadoo naluwean mosikitene Yusuf, sampe yanila balukene yana teali ata doi Mesil. Bai Mian Bisa loolainge yana, ¹⁰tukon osodiiyo yana doi sasaibino kosusaan. Mian Bisa beena doi yana pikilan tukon pandoiyan dosinggatoo yana namangadapan doi Filaun tomundo Mesil, tobikon Filaun tealikene yana gubelnul tano Mesil tukon mokuasaiyo Filaun nabatomundoan. ¹¹Doibundu teali kolaal mo babasal doi posaapon ko Mesil tukon Kanaan tobikon komian sakisaa tuuno. Kotumbunggita akimo namalaat kinaan. ¹²Salataa Yakub lengele doi Mesil daano kolabue yana sumboliiyo kona labuk-labuk, tumbunggita, ampakon indaa napo ampakonan tumbeno. ¹³Tembo yanila naampakonan koluano luunggon, Yusuf pailukene doi utus-utusodoo baikon yanamo Yusuf. Sodo doiya kosinggato dotomundodoo Mesil toiyo yanila Yusuf utuso. ¹⁴Doibundu Yusuf makapatu teteba doi tamano, Yakub, sulano kabiyo yana polong sasaibino kopuli-pulino nabiyol doi Mesil - sasaibino yanila daano kopitu kolono lima komian. ¹⁵Maka Yakub biyolo doi Mesil tukon idoomo kotumbunggita namatean. ¹⁶Yanila badano doibundu koidan binaba doi Sikhem tukon tinadin doi batadinan mo lapamo Abalaham oliyo tukon momondukon kodoy doi suku Hemol miano doi Sikhem.

¹⁷Salataa adukono loolani kotembono ko Mian Bisa naokkonoiyano kona janji doi Abalaham, kotulanggita doi Mesil sosuungimo kona badaangan. ¹⁸Doi napupusan daano komeeng kotomundo bailong mo aki natingoniiyo Yusuf, teali tomundo

doi Mesil. ¹⁹Tomundodoo tolongo mae-maenggene kotulanggita todudul kulokis doi tumbunggitadoo. Yana pakisaayo yanila moaisene konapoo pau-pau mo sodo sinuung sulano nasasabul tukon namate. ²⁰Doiya lounudoo Musa nasinuungan; yana meeng kopau lumboon mo monondok tuuno. Tolu kobituwon kona kalumbit kotamano napialaano doi nabonua, ²¹tukon sambuno yana sinakukon, Filaun naboine alayo yana, maka pialayo yana bunekene napau susuungo. ²²Sasaibino ko Mesil miano namotoiyan inotunggukon doi yana tukon yana teali meeng komian mo balakuasa tuuno doi bantilan mau doi lenggang.

²³Sambuno Musa kona umul sangkap kolonomo kotaum, sumbut kona mongiasan doi noano lalom sulano naampakon kitayo kondondoong kobangsa Israel miano. ²⁴Maka yana kitayo komeeng komian doi Israel mianodoo Mesil miano mosakisaayo; maka yana belayo do mianoo mo sinakisaa tukon akateyo do Mesiloo miano. ²⁵Musa aanggene kona bangsa naikon mangalatikene baikon ko Mian Bisa daano mopakeyo yana sulano nasodiiyo yanila. Bai tokita yanila aki napoalatiyo. ²⁶Modoakon yana kitayo koidan ko Israel miano lua mopoakate, maka yana kakaate podamekene yanila. Yana bantile, 'Komuyu nia mondoutus. Bulaando komuyu mopoakate?' ²⁷Bai do mianoo meeng mo bobokiiyo kotulano duwekene Musa doi bibil maka nabantile, 'Miano komo bingkate ikoo moteali padagai tukon pongulus doi kami? ²⁸Kai ikoo yase akateyo yaku koidan buno do Mesiloo miano ikoo moakateyo kolubabi?' ²⁹Sambuno Musa lengele oila do mianoo nabinantil, Musa dampas tinggale ko Mesil tukon dungol doi Midian. Indaa yana malaat lua kopau.

³⁰Sangkap kolono kotaum doibundu meeng komalaekat lubat doi Musa doi padang lalomo loolanikon ko Sinai Bunggulo. Malaekatoos lubat doi aung lalomo luwe mosolot mo daano kolot. ³¹Musa masaingding mokitayo doiya langgedoo, tobikon yana ampakon nggau-nggaupe sulano natoiiyo oila doiya. Maka yana lengele ko Temeneno alalo mobantile, ³²'Yakumo ko Mian Bisa tumbumuyu; yaku Abalaham na Mian Bisa, Ishak tukon Yakub.' Musa lolondong namatakutan tobikon akimo nabalani koidan mokitayo do sumolotoo. ³³Doibundu Temeneno bantile

koidan, 'Liate komu sandaal ikoo mo pakeyo nokon, sabab buta tempat mukokondonganokon daano buta mo moliyous. ³⁴Yaku lapamo kitayo tukon palatikanggene kona mosopotan tukon nasakisaawan daku mian doi Mesil. Yaku lapamo lengele yanila nakeluhan tukon yaku obulus sulano kuosodiiyo yanila. Budodoiya, maimo! Yaku naikon sumboliiyo ikoo abali doi Mesil.'

³⁵Musa nia Musa mo aki nainakui doi bangsa Israel tukon mo tinolak tukon nabantilan nia, 'Indee komo bingkate ikoo teali padagai tukon mai pongolus?' Bai mau nabuno doiya yanamo ko Mian Bisa nai numbolii sulano nateali padagai tukon pasalamat, tukon potombonii moluwedoi malaekat mo lubat doi yana doi mosolot mo laladoo. ³⁶Musa doiyamo komo pimpine kobangsa Israel nadampasan doi Mesil tukon kubaiyo kolangge-langge mominasaingdinggon tukon langge-langge modeikon lobo doi Mesil, doi Tobun Memela, tukon doi padang lalomo kona kalumbit sangkap kolono kotaum. ³⁷Yanamo koidan Musa mo bantile doi bangsa Israel, 'Mian Bisa naikon beena komuyu meeng konabi mo ililik doi komuyu nokoila, pokakana bunu yana lilike yaku.' ³⁸Musamo kai doi bangsa Israel tanga-tangano nadaanoan doi padang lalomo komo teali pangantala tuuk malaekat mo posilingonii doi yana doi Sinai Bunggulo tukon tumbunggita. Yanamo komo mantalima doi Mian Bisa bilita mo tubo sulano napinolonggon doi kita.

³⁹Mau kai nabuno doiya kitamo tumbunggita aki nayase taat doi yana. Yanila tolake yana tukon yase abali doi Mesil. ⁴⁰Yanila bantile doi Halun, 'Mongkubai dewa-dewa tuuk doi kami, sulano do dewa-dewadoo naloolainge kami. Sabab kami akimo mai toiyo oilamo naikon komo teali tukon Musadoo nakanggiyano kami dampas lengget doi Mesil!' ⁴¹Maka doiya kosinggatoo yanila mongkubaimo meeng timbalang mobuno saapi pauno, maka yanila mososubakon sosuba doi timbalang tukon yanila mongkubai lamean sulano napo sosubaiyo kolangge yanila mokubaiyo susuungo. ⁴²Maka ko Mian Bisa otinggalemo yanila tukon sodiingenemo yanila napo sosubaiyo kobituon-bituon doi timbu. Doiya pokokonoi tukon oila komo totulis doi nabi-nabi nabuku lalomo. Bunu naiya,

'Eh Israel miano! Bolikon tuuk doi yaku
komuyu metembel tukon mososubakon iyayon sangkap
kolono kotaum kolumbito doi padang lalomo.

⁴³ Sandung bapilogotan Molokh komu binababa
polaing-laing tukon potimbalang iyayon bapilogotan,
doiyamo Pilogot uuno;
doiyamo kopo lobo kinubai komuyu mososubaiyo.
Tobikon doiya yaku naikon sakukene komuyu polong dodoon
doi Babel sembeleng.'

⁴⁴Sandung tempat Mian Bisa nalubatan doi banggapi kona
talaatan doi tumbanggita doi padang lalomo. Do sandungoo
kinubai luwe Mian Bisa napalenta doi Musa tukon loingikene
kosontoh Mian Bisa mo otudoikene doi Musa. ⁴⁵Doibundu
do sandungoo tumbanggita babayo momeenggon singgatoon
yanila tukon Yosua naampakonan lobuute konda lipu nia doi
kakuasaan bangsa-bangsa Mian Bisa mo siikayo doi yanila
salaano. Sandungoo daano idoo popolonggon Daud nalounu.
⁴⁶Daud sanaanggene ko Mian Bisa noano tukon mangkabi
doi yana sulano yana nalinoason mongkubai meeng kobonua
motuuk doi Mian Bisa Yakub nasinosubaidoo. ⁴⁷Bai Salomo
komo kekendenge dobonuadoo motuuk doi Mian Bisa.

⁴⁸Mau ko Mian Bisa nababasal aki nadungol doi bonua
lalomo banggapi mo kubaiyo; sabab doi nabi nabuku totulis
buno naiya,

⁴⁹ 'Timbu doiya kukulusii,
tukon dunia kubatudangan.

Bonua oila kopoo kinokondong motuuk doi yaku?

Inaando kotampato daku tatadean?

⁵⁰ Bolikon baanggon yaku susuunggu, komo tealikene sasaibino?'
bunomo doiya ko Mian Bisa nabantilano.

⁵¹Todudulo kona matikasan konoamuyu Utus-utus tukon
bunomo doiya lakon kona maalingan kopoo taatan doi Mian
Bisa! Kotolingaimuyu bongolo tuuno doi Mian Bisa nabantilan!
Komuyu sasaibino bunu tumbumuyu; sidutu lawane ko Mian
Bisa Na Loh! ⁵²Oila daano konabi mo aki kotumbumuyu
nasakisaayo? Yanila akateyo kobito-bito doi Mian Bisa doi
loolukonoo mo lapamo babotilanggene baikon Mian Bisa

na Ata mo bisadoo naikon lubat. Bai budodoiya komuyu kulokisangene tukon akateyo do Mian Bisadoo na Ata. ⁵³Malaekat-malaekat lapamo pelengene ko Mian Bisa napalenta-palenta doikoo bai komuyu aki potulutiyo!”

Stepanus linambit batu

⁵⁴Buno doiya anggota-anggota Pangadilan Agama lengelemo sasaibino oila komo Stepanus nabinantil, yanila masakit konoano tukon nggimal tuuno doi yana. ⁵⁵Bai Stepanus mo inusokimo tukon Mian Bisa Na Loh, lelengea doi timbu. Yana kitayo ko Mian Bisa nababasalan tukon Yesus kokondong doi tempat mobalakuasa doi Mian Bisa bakalingano taalikon. ⁵⁶“Kitayo,” Stepanus bantile, “yaku kitayo kosulugaa motobuka tukon Banggapi Napau kokondong doi Mian Bisa bakalingano taalikon!”

⁵⁷Anggota-anggotadoo pangadilan yanila kukupe kopai tolingainoila maka koku-kokuweis, maka yanila posinggat molakoyo Stepanus. ⁵⁸Yanila keete yana doi kampung tonggulungo doibundu yanila sakule yana tukon batu. Mian mo masakisii doiya kadadianoo yanila abese konapoo pakean doi meeng kopau malane kosambuno Saulus. ⁵⁹Daanoon yanila molambite Stepanus, Stepanus uang, “Yesus, talimayo daku Loh!” ⁶⁰Maka yana ladangene kotuulo tukon nggeleamon tuuno, “Temeneno inai motonggungikene naiya dosa nia doi yanila!” Sambuno lapa bantile buno doiya yana matemo.

8 Tukon Saulus bai sanaang konoano doi Stepanus nainakateano.

Saulus sakisaayo kojemaat

Doi oloyodoo koidan koanggota jemaat doi Yelusalem tambuuno binuluk-buluk, tobikon sasaibino komian momanganga, alaasene kolasul-lasul, yanila sasabulo doi posaapon kolipu Yudea tukon Samalia. ²Mian mo matakutene ko Mian Bisa tadinemo Stepanus tukon yanila kokiiliyo yana tukon susa tuuno.

³Bai Saulus banggadudul mokakaate momanase kojemaat. Yana ampakon doi meeng-meeng kobonua tukon unguwo tobuatene komian momanganga, maka usekene yanila doi talunggu lalomo.

Bilita Monondok moluwedoi Mian Bisa binabotilanggon doi Samalia

⁴Dopai mian-mianoo momangangga mo lapamo topobanda-kon babulitakanggene ko Bilita Monondok moluwedoi Mian Bisa doi yayaamo. ⁵Filipus ampakon doi kota Samalia tukon babiletakene doi mianoo indaa tentang Tomundo Pasalamat Mian Bisa mo paladandikenemo. ⁶Salataa dopai mianoo lengele Filipus mobasilingan tukon yanila kitayo kokuasa-kuasa mominasaingdinggon Filipus mo kubaiyo, badaang doi yanila komo palatikanggene oila komo Filipus nabinantil. ⁷Sabab koibiliis lapamo tobuat tukon mangga-manggadede doi mianoo mobadaang mo inusokimo setan. Mian molapit tukon mopepeenggon badaang komo tinangalinggon. ⁸Maka komian doi Samalia laba-laba tuuno.

⁹Doi kotadoo daano komeeng komalane kosambuno Simon, mo lapamo moimoiya kotembo kona malumbitan mokubaiyo ko Samalia miano anggayo kona ilmuu motoiyan. Yana bantile doi yanila baikon yana meeng komian mo bolikon langge. ¹⁰Maka sasaibino komian doi kotadoo doi sasaibino komasalakat palatikanggene tuuno yana. "Naiya mian nia daano kobukuanan Mian Bisa mototingonii bunu 'Bukuanan Babasaloo,'" yanila nabantilano. ¹¹Malumbito tuuno yana nakuasaiyano komian tukon nakakuatan motoiyan, tobikon yanila tutuu mopalatikanggene yana. ¹²Bai Filipus babotilanggene doi yanila ko Bilita Monondok manganai bulaando ko Mian Bisa naikon nabapalentaan bunu tomundo tukon tentang Yesus Klistus, Tomundodoo Pasalamat. Maka yanila anggayomo naikon kobilita Filipus mo pelenggene, maka yanila sinaumo paisu salani - mau mala-malane mau boine. ¹³Simon susuungo koidan mangangga. Tukon sambuno sinau paisu salani, yana banggadudul malaingo Filipus. Kuasa-kuasa mominasaingdinggon mo teali kubaiyo Simon masa-masaingding.

¹⁴Lasul-lasul doi Yelusalem longoliyo baikon komian doi Samalia lapamo talimayo ko Mian Bisa nabantilan. Tobikon doiya yanila sumboliiyo Petulus tukon Yohanes ampakon doi Samalia. ¹⁵Salataa Petulus tukon Yohanes polong, yanila sambeang tuuk doi Samalia mianoo sulano yanila namalaat Mian Bisa Na Loh, ¹⁶sabab ko Mian Bisa Na Loh akiyoon nalubat mokuasaiyo mau nabaino meeng doi yaniladoo; yanila

sodo sinau paisu salani luwedo Yesus sambuno tolong. ¹⁷Maka Petulus tukon Yohanes abese kopai limano doi Samaliadoo miano; maka yanila mantalimamo Mian Bisa Na Loh.

¹⁸Simon kitayo baikon tobikon lasul-lasul limano moinabos doi mianoo, Mian Bisa Na Loh bineekon doi yanila. Tobikon doiya Simon mababa doy doi Petulus tukon Yohanes, ¹⁹maka bantile, “Beena doi yaku do kuasadoo koidan sulano kalu kolimanggu inabosikon doi indee komian, maka do mianoo naikon mantalima Mian Bisa Na Loh.”

²⁰Bai Petulus timbiliyo, “Silakamo ikoo tukon komu doy! Ikoo aangene ko Mian Bisa nabalakaat moola inoli tukon doy? ²¹Ikoo akiyo komu haak sulano mumalaing doi mai limangia lalomo, sabab konoamu aki namonondok doi Mian Bisa. ²²Tobikon doiya otinggalemo komu makisuutoo mo lokis, tukon kabiyo doi Temeneno sulano yana ompuniyo komu pikilan mo lokisoo! ²³Sabab yaku toiyo ikoo moonoo tukon noa moonas tukon kokulokisan kubaiyo ikoo ata.”

²⁴Maka Simon bantile doi Petulus tukon Yohanes, “Tulungiyoo mokabiyo doi Temeneno sulano naakiyo mau meeng kai moluwedo utus-utus nabinantildoo nateali doi yaku.”

²⁵Sambuno yanila mebee kasaksian tukon babotilangene ko Temeneno nabantilan, Petulus tukon Yohanes abalimo doi Yelusalem. Tukon doi ampakanan, yanila babotilangene ko Bilita Monondokoo doi badaang kokampung-kampung doi Samalia.

Filipus tukon meeng kopagawe mobabasal doi Etiopia

²⁶Meeng ko Temeneno namalaekat bantile doi Filipus, “Ayo polenggeto! Poampakono doi laiong taalikon doi loloon mopotaami ko Yelusalem tukon Gaza.” Doiyo loloonoo aki nalame. ²⁷⁻²⁸Maka Filipus tauso. Doiyo kosinggato daano komeeng kopagawe batomundoan Etiopia mo daano doi ampakanan lalomo mule doi nalipu. Doiyo mianoo meeng kopagawe mobabasal mo tanggung jawabpe sasaibino Kandake nabuat, tomundo boine doi Etiopia. Do mianoo lapamo ampakon doi Yelusalem sulano nasambeang doi Mian Bisa tukon budodoiyo daano moabali tukon naadalan. Daano yana moosulang doi naadalanoo yana basayo kobuku Nabi Yesaya. ²⁹Mian Bisa Na Loh bantile doi Filipus, “Ampakono koolaniyo ndaiya adalanoo.” ³⁰Maka Filipus ampakon koolaniyo do



Meeng kokota doi Yudea (8:32)

adalanoo, maka yana lengele do mianoo bacayo kobuku Yesaya. Filipus mansadai doi yana, “Oilakai Tuan mangalatikene doi Tuan nabinasadoo?”

³¹Do mianoo timbiliyo, “Bulaando daku mangalatian, kalu akiyo komo jelaskangene doi yaku?” Maka yana tobiyo Filipus doi adalanoo maka osulang polong yana. ³²Naiyamo koayat-ayato yana mo basayodoo,

“Yana buno domba mo linako sulano natinembel,
buno domba pauno mo aki nambeekon kalu kobuluno
ginunting,
bunomo doiya yana aki nabantile mau nabaino meeng
kobantilan.

³³ Yana tinotulai tukon kinubai tukon aki naadil.

Kona ansaang binubut doi dunia nia bungkukono
tobikon akiyo komeeng komian mo moola basalitakene
tentang kona tulunan.”

³⁴Pagawe mobabasal doi Etiopiadoo bantile doi Filipus, “Soba bontiikene doi yaku, indee kona minakisuuti naiya nabi nia? Butongomo kai susuungo kai mian bailong?” ³⁵Maka Filipus tambuuno basilingan; yana pakeyo doiya ayat-ayato buno

naatambuunano sulano nababotilangene ko Bilita Monondok tentang Yesus doi pagawe mobabasaloo. ³⁶Doi loloon tanga, yanila polong doi meeng kolipu mo daano kopaisu. Pagawedoo bantile, “Kitayo ndaiya daano kopaisu! Oilamo modaano mokulang koidan sulano musauwo yaku?”

[³⁷Filipus bantile, “Kalu Tuan anggayo tukon totubo konoamu, Tuan moola nasinau.”

“Yaku anggayo Yesus Klistus takainomo Mian Bisa Napau,” pagawe babasaloo doi Etiopia nabantilano.]

³⁸Maka yana sumboliiyo kona adalan tade; doibundu yanila luaila, Filipus tukon pagawedoo, obulus doi paisu lalomo tukon Filipus sauwomo yana. ³⁹Sambuno yanila tobuat doi paisudoo, Mian Bisa Na Loh alayomo Filipus luwe idoo. Pagawe babasaloo doi Etiopiadoo akimo nakitayo yana koidan. Tukon nalabaan pagawe babasaloo banggadudulkenemo kona ampakanan. ⁴⁰Baanggon Filipus daanomo doi Asdod. Tukon salataa yana banggadudulkene kona tausan, yana babilitakene ko Bilita Monondok tentang Yesus doi sasaibino kokota polong yana lubat doi Kaisalea.

Saulus nabadodoolonan

(Kis. L. 22:6-16, 26:12-18)

9 Mau nabuno doiya Saulus banggadudul momeeng yase ancame tukon akateyo Yesus napololaing-pololaing. Yana ampakon doi mobabasalkene koimam, ²tukon mangkabi sulat kuasa sulano naampakon doi Yahudi miano nabonua-bonua kaleda katua-katuano doi Damsyik, sulano kalu yana pososuunggene indaa komian mo mangangga doi Yesus, yana moola lakoyo yanila tukon babayo yanila doi Yelusalem.

³Daanon moompokonio ko Damsyik, salataa koolaniomo tukon do kotadoo, sosinggot daano komeeng konggilep moluwedoi timbu motalaangiyo doi Saulus. ⁴Yana tolubang doi buta maka nalengele komeeng koalaloo mobantile doi yana, “Saulus, Saulus! Oila kosababpo ikoo mosakisaayo yaku?”

⁵“Indee miano ikoo Tuan?” Saulus napasadai.

Do alaloo timbiliyo, “Yakumo Yesus, ikoo mo sakisaayo. ⁶Bai budodoiya banguno tukon usoko doi kota. Idoo naikon binotiikon doikoo oila komo sio mukubaiyo.”

⁷Mian mo malaing-laing Saulus ngginggim tukon yanila akimo namoola bukayo kopai alalo; sabab yanila lengele do alaloo bai

akiyo komeeng komian konapo kinita. ⁸Maka Saulus kokondong tukon bukayo komatano, bai komatano akimo namoola kitayo kooioila koidan. Jadi yanila taaniyo kolimano tukon tatandane yana usok doi Damsyik. ⁹Tolu kooloyo kona kalumbit yana aki namoola mokita tukon selama doiya yana aki nakaan kai monginum.

¹⁰Doi Damsyik daano komeeng kopololaing Temeneno Yesus kosambuno Ananias. Doi napokita lalomo, Temeneno basilingan doi yana. Temeneno bantile, “Ananias!”

Ananias timbiliyo, “Ya, Temeneno.”


¹¹Temeneno bantile, “Ya, ampakono budodoiya. Ampakono doi Yudas nabonua doi Loloon mo Mologyos. Mansadaikene indaa komian mo sinombuikon Saulus kona luwean doi kota Talsus. Doiya mianoo daano mosambeang, ¹²tukon doi meeng kona pokita lalomo yana kitayo komeeng komalane, kosambuno Ananias, lubat doi yana tukon abese kolimano doi yana sulano yana moola mokita koidan.”

¹³Ananias timbiliyo, “Temeneno yaku lapamo lengele badaang komian mobasilingan manganai mian nia, utamano manganai namasakisaawan-masakisaawan yana mo lakukanggene doi mumian doi Yelusalem. ¹⁴Tukon budodoiya yana lapamo lubat naimbaa tukon kaluasan doi imam-imam kapalano sulano nalakoyo komian sasaibino mo anggayo doikoo.”

¹⁵Bai Yesus bantile doi Ananias, “Ampakono kai! Sabab yaku lapamo piliyo yana sulano naleleaniyo yaku, sulano nababotilanggene tentang yaku doi bangsa-bangsa bailong mo aki nabalaagama Yahudi tukon doi tomundo-tomundo tukon koidan doi Israel miano. ¹⁶Tukon yaku susuunggu naikon tudoikene doi yana sasaibino kosakisaawan mo sio yana natoupiyo sabab yaku.”

¹⁷Maka Ananias ampakono doi bonuadoo tukon abese kolimano doi Saulusoo. “Utus Saulus,” Ananias bantile, “Temeneno Yesus Utus mo kitayo doi loloon tanga salataadoo Utus daano doi sumai, yanamo komo sumboliiyo yaku lubat sulano Utus namoola mokita koidan tukon Mian Bisa Na Loh mokuasaiyo.” ¹⁸Doiya kosinggato koidan daano komeeng kolobo mo bunu ikan anano toliat doi Saulusoo matano tukon yana moola mokita koidan. Maka yana banguno, maka sinau.

¹⁹Tukon sambuno kaan, yana tealimo bukuanan koidan.



Saulus inobuluson doi meeng kobois lalomo (9:25)

Saulus bangotunggul doi Damsyik

Saulus dungol doi Damsyik tukon Yesus napololaing-pololaing bubulaa kooloyo kolumbito. ²⁰Yana banggadudul ampakon doi bonua-bonua kaleda tukon tambuuno babotilangene baikon Yesus doiyamo Mian Bisa Napau.

²¹Sasaibino komian masaingding molengele Saulus. Yanila bantile, “Bolikon kai yana komo doi Yelusalem molapamo akateyo sasaibino komian mo anggayo doi Yesus? Yana lubat naimbaa doiyamo sulano nalakoyo tukon babayo yanila doi imam-imam kapalano!”

²²Bai Saulus pololokon bukuan kona pangaluh. Yana bantile kobukutii-bukutii tentang Yesus mominolakon doiyamo baikon ko Tomundo Pasalamat, polong ko Yahudi miano mo dungol doi Damsyik aki namoola bantayo koidan.

²³Sambuno lapa moimoiya kooloyo kona kalumbit Yahudi miano pomeenggono sulano napoo akateyo Saulus. ²⁴Bai yanila natetel totoi doi yana. Oloyo popook yanila totooliyo doi

kota tataapono babasal sulano akateyo yana. ²⁵Bai doi meeng kopopook, Saulus napololaing-pololaing ndokiiyo yana, maka obulusene doi meeng kobois lalomo lisiyo do kotadoo meselo.

Saulus doi Yelusalem

²⁶Saulus ampakon doi Yelusalem, tukon idoo yana kakaate napototongi tukon Yesus napololaing. Bai yanila matakutene yana, sabab yanila aki naanggayo baikon yana bisa-bisa lapamo teali Yesus napololaing. ²⁷Doibundu Balanabas lubat doi yana, maka babayo yana doi lasul-lasul. Balanabas basalitakene doi yanila bulaando Saulus nakitaano Yesus doi loloon tanga tukon bulaando Yesus nabasinganan doi yana. Balanabas pailukene koidan tentang bulaando Saulus nabalanian bangotunggul doi Damsyik tukon Yesus sambuno. ²⁸Maka doiya Saulus dungolo tukon yanila, tukon balani bangotunggul doi posaapon ko Yelusalem tukon Yesus sambuno. ²⁹Yana basalita tukon ponggeeki tukon Yahudi miano mo basilingan Yunani, bai yanila kakaate moakateyo yana. ³⁰Salataa mian mangangga bailong toiyomo tentang do langgedoo, yanila babayomo Saulus doi Kaisalea, doibundu yanila kapatuwo yana doi Talsus.

³¹Maka kojemaat doi posaapon ko Yudea, Galilea, tukon Samalia tealimo aman. Mian Bisa Na Loh tombonio, tukon matakutene ko Temeneno, jemaat-jemaato tosuungi bukuan tukon tosuungi badaang.

Petulus doi Lida tukon doi Yope

³²Petulus ampakono doi yayaamo kokampung molubotiiyo kojemaat-jemaat. Daano kooloyo meeng yana lubotiiyo ko Temeneno namian mo dungol doi Lida. ³³Indaa yana pososuung tukon meeng komala-malane kosambuno Eneas, molapit tukon akimo nabangun-bangun doi namooloan alumo kotaum kona kalumbit. ³⁴Petulus bantile doi Eneas, "Eneas, Yesus Klistus tangalinggenemo ikoo. Banguno tukon tulolosiyo komu mooloan." Sambuno buno doiya Eneas banguno. ³⁵Sasaibino komian doi Lida tukon Salon kitayo Eneas, maka yanila manganggamo doi Yesus.

³⁶Doi Yope daano komeeng koboine kosambuno Tabita. Yana meeng komian mo anggayo Yesus. (Kosambuno doi silingan Yunani lalomo doiyamo Dolkas koalatino donga.) Yana sidutu kai kubaiyo kolangge-langge mo monondok tukon

tulungiyo komian motalalais. ³⁷Doiya kosinggato yana masakit polaing mate. Sambuno sinau kobadano, yana inabos doi kombiang babo. ³⁸Kampung Yope aki natodudul pododoonggon tukon kampung Lida. Jadi doiya singgato Yesus napololaing-pololaing modaano doi Yope ndongoliiyo Petulus modaano doi Lida, yanila mosumbolii lua komian moampakon doi Petulus tukon nateteba nia, “Mosobit-sobit lubat doi sumai.” ³⁹Petulus banggadudul bangun tukon malaingo yanila. Sambuno polong indaa, yana binabamo doi kombiang babo. Sasaibino kobalu idoo tokuuniyomo Petulus maka kokiil tukon otudoikene doi yana kalambi-kalambi tukon jubah-jubah Dolkas mo koitikene doi yanila singgato yana daanoon motubo. ⁴⁰Petulus sumboliiyo yanila sasaibino motobuat, maka yana ladanggene kotuulo tukon sambeang. Sambuno lapa doiya yana sasalaane Dolkas badano tukon bantile, “Tabita, bangun!” Maka Dolkas bukayo komatano, tukon salataa yana kitayo Petulus, yana osulango. ⁴¹Maka Petulus taaniyo kolimano tukon tomboniiyo yana nakokondong. Doibundu Petulus uangemo domianoo momangangga idoo posinggat-singgat tukon do balu-baludoo, maka yana salakanggene doi Dolkas mo lapamo tubodoo doi yanila. ⁴²Bilita tentang do kadadianoo tololongol doi posaapon ko Yope, tobikon badaang komian momangangga doi Yesus mobuno Tomundo Pasalamat doi yanila. ⁴³Petulus dungol idoo moimoiya kooloyo koidan doi meeng komian pangala kayung kulito nabonua kosambuno Simon.

Petulus tukon Kolnelius

10 Doi Kaisalea daano komalane meeng kosambuno Kolnelius. Yana meeng kokapiteeng “Pasukan Italia”. ²Yana meeng komian mo matakutene ko Mian Bisa tukon sasaibino kopulino taat doi Mian Bisa. Yana badaang kona tulung doi Yahudi miano mo talalais, tukon yana sidutu sambeang doi Mian Bisa. ³Daano kooloyo meeng uga-ugaate batong tolu oloyo yana kitayo tukon tontong doi napokita lalomo, meeng ko Mian Bisa namalaekat molubat tukon uange yana, “Kolnelius!”

⁴Kolnelius mbalenge do malaekato tukon namatakutan maka bantile, “Daano kooila Tuan?”

Malaekato timbiliyo, “Komu sambeang tukon konoamu namonondokan lapamo Mian Bisa talimayo tukon Mian Bisa



Bonua doi Palestina atono (10:9)

neneeke ikoo. ⁵Budodoiya sumboliyo komian moampakon doi Yope uange Simon, kosambuno natutuuwan tuuno Simon Petulus. ⁶Yana daano modungol doi meeng komian pangala kayung kulito kosambuno Simon, mo dungol doi tobun bibilo.” ⁷Sambuno do malaekatoobobasalitai tukon Kolneliusoo ampakono, Kolnelius uange kolua komian napeleleani doi bonua tukon meeng koanggota suludadu napengawal mo mangangga. ⁸Kolnelius basalitakene doi yanila oila komo lapamo teali maka sumboliyo yanila ampakon doi Yope.

⁹Modoakon kooloyo, yanila daanoon doi napo ampakonan tukon adukono polong doi Yope, Petulus liba doi bonua bunggono sulano nasambeang. ¹⁰Yana malaalo tuuno tukon yasemo kaan. Kokinaan sodo nasinidak, yana malaat meeng kopokita. ¹¹Yana kitayo kotimbu motobuka tukon daano komeeng kolangge mobuno toik mo bebelan inulul doi dunia, tokooton doi sangkap kopasuno. ¹²Doi lalomo talaat sasaibino koiyayon kaliangano mosangkap koaino, sasaibino kolangge mo tolo-tolondok tukon tomisi mombosolo. ¹³Maka daano koalalo mobantil doi yana, “Petulus, bangun! Tembeliyomo tukon kaane!”

¹⁴Petulus timbiliyo, “Aki, Yesus! Yaku aki kumanaangene kaane kooioila mo pinatanggon kai najis.” ¹⁵Bai do alaloo bantil koidan doi yana, “Oila komo lapamo Mian Bisa bantile moola

kinaan, inaimo moaanggene doiya pinatanggon.” ¹⁶Pokitadoo abali polong tolu luunggon, doibundu do toikoo tobingkato doi sulugaa.

¹⁷Petulus pusing mopikikene oila komaanano dona pokitadoo. Petulus daano mopiki-pikikene, dopai mianoo Kolnelius mo sumboliiyo lubato doi Simon nabonua tukon yanila daanomo doi tataapon salaano. ¹⁸Maka yanila monguang mian tukon mansadai, “Kai diimbaa daano komian mo dungol, kosambuno Simon Petulus?”

¹⁹Petulus daano mokakaate natoiyoyo oilamo komaanano dona pokitadoo, Mian Bisa Na Loh bantile doi yana, “Eh Petulus, daano kotolu komian mounggoliiyo ikoo. ²⁰Ayo mosobit obulus doi bilit tukon inai mosasaaki momalaing yanila, sabab yakumo komo sumboliiyo yanila.” ²¹Maka Petulus obulus doi bilit tukon bantile doi mianoo, “Yakumo kai utus-utus nainumbolii. Utus-utus molubat tuuk oila?”

²²Yanila timbiliyo, “Kapiteeng Kolnelius komo sumboliiyo kami lubat dosumai. Yana meeng komian monondok tukon matakutene ko Mian Bisa, tukon sasaibino ko Yahudi miano odotiiyo yana. Meeng ko Mian Bisa namalaekat sumboliiyo yana nakabiyo Tuan mulubat doi nabonua sabab, doiya bunu potimbilino doi nasambeangan, yana sinumbolii momondongolii oila komo Tuan pailukene doi yana.” ²³Maka Petulus sumboliiyomo yanila usok sulano nadungol idoo.

Modoakon Petulus banguno tukon ampakono polaing-laing yanila. Moimoiya komian momangangga luwedoi Yope malaing koidan. ²⁴Meeng kooloyo molapadoo yanila polong doi Kaisalea. Indaa yanila lapamo tinotiili Kolnelius tukon utus-utuso maka tula-tulano napokilakonon yana mo lapamo uange. ²⁵Salataa Petulus polong, Kolnelius ampakon lobotiyoyo yana tukon sosuba doi salaano. ²⁶Bai Petulus taaniyo tukon ekekendenge yana, maka nabantile, “Banguno! Yaku susuunggu kai banggapi koidan.” ²⁷Daano yana mopobasalitai tukon Kolnelius, Petulus usok doi bonua lalomo. Idoo yana kitayo badaang komian molapamo pototongi. ²⁸Maka yana bantile doi yanila, “Utus-utus susuungo toiyo baikon ko Yahudi miano pinatanggon doi napo agama sulano nalubotiiyo kai potoikon tukon mian-mian moluwedoi bangsa bailong. Bai Mian Bisa lapamo otudoikene doi yaku baikon yaku aki namoola aanggene mau indee komiano koidan najis kai pinatanggon. ²⁹Doiyamo kosababpo salataa

Tuan kabiyo sulano yaku lubat, yaku aki kukabalatan lubat. Jadi budodoiya yaku yase toiyu bulaando Tuan kabiyo yaku lubat.”

³⁰Kolnelius timbiliyo, “Toludoo kooloyo mo lapa, uga-ugaate bunomo doiya kotembono, yaku daano mosambeang doi bonua batong tolu kino-kinobian. Sosinggoton daano komeeng komalane mokokondong doi salaanggu. Do mianoo napakean nggilep-nggilep. ³¹Yana bantile, ‘Kolnelius! Mian Bisa lapamo talimayo komu sambeang tukon neneeke naikon konoamu namonondokan. ³²Jadi sumboliiyo komian motaus doi Yope mouange komian meeng kosambuno Simon Petulus. Yana daano momoolo doi meeng komian mobabalukon kayung kulito nabonua kosambuno Simon; do bonuadoo doi tobun bibilo.’ ³³Doiyamo kosababpo yaku soisobiton sumboliiyo komian ampakon mouange Tuan. Tukon Tuan bisa-bisa monondok konoano tuuk lubat doisumai. Budodoiya kami sasaibino pototongimo dimbaa doi Mian Bisa salaano sulano mondongolii sasaibino ko Mian Bisa nasinumboliikon Tuan nabantile doi kami.”

Petulus napidato

³⁴Maka Petulus bantile, “Budodoiya yaku bisa-bisa sadaliyo baikon ko Mian Bisa lakukanggene sasaibino komian pokakana. ³⁵Mian mo matakutene ko Mian Bisa tukon mongkubaiyo kolangge mo kana, do mianoo Mian Bisa talimayo, aki napiliyo yana oila komiano. ³⁶Utus-utus lapamo toiyu kobilita antoko ko Mian Bisa mo pelengene doi bangsa Israel. Bilitadoo doiyamo manganai Bilita Monondok tentang podamean luwedo Yesus Klistus, doiyamo Temeneno sasaibino komian. ³⁷Komuyu toiyu oila komo lapamo teali doi posaapon ko Yudea, doiyamo tambuun doi Galilea sambuno lapa dobasauwanoo Yohanes mo otunggukene. ³⁸Komuyu toiyu baikon ko Mian Bisa lapamo piliyo Yesus Nasaletoo miano tukon beena doi yana Mian Bisa Na Loh tukon kuasa. Komuyu toiyu koidan baikon Yesudoo ampakon doi yayaa sulano mongkubai kokubai monondok; yana tangalingene sasaibino komian mo inusoki tukon Ibiliis, sabab ko Mian Bisa lolainge yana. ³⁹Kamimo naiya komian mo lapamo kitayo susuungo sasaibino kolangge-langge yana mo lakukanggene doi Yahudi miano nalipu tukon doi Yelusalem.

Mau kai nabuno doiya bai yanila sempanggene tukon akateyo Yesus. ⁴⁰Bai doi oloyo kotoluno Mian Bisa otuboiyomo yana koidan luwedoi namatean tukon okitanggene yana doi banggapi; ⁴¹aki nasasaibino komian, bai tolongo doi kami mo lapamo Mian Bisa piliyo doi loolukoo sulano teali nasakisii-sakisii: Kami kaan tukon inum tukon yana sambuno lapa yana tubo koidan doi namatean. ⁴²Tukon yana sumboliiyo kami mobabilitakene ko Bilita Monondokoo doi mian tukon mebee kasaksian baikon yanamo komo biningkat luwe Mian Bisa teali Hakim doi mian mo daanoon motubo tukon komian mo lapamo mate. ⁴³Sasaibino konabi-nabi basalita tentang doi yana. Yanila bantile baikon sasaibino komian mo mangangga doi Yesus, naikon tinolos kona lalim tukon kakuasaan moluwedoi Yesus.”

Mian mobilikon Yahudi malaat Mian Bisa Na Loh


⁴⁴Petulus daano mobasalita, Mian Bisa Na Loh obulus tukon kuasaiyo sasaibino komian mo molongol do bilitadoo. ⁴⁵Yahudi miano mangangga doi Yesus tukon malaing Petulus doi Yope, sasaibino masaingding mokitayo ko Mian Bisa mobeena koidan kona Loh doi bangsa bailong mo bolikon Yahudi. ⁴⁶Sabab yanila ndongoliiyo dopai mianoo mobasilitamo tukon moimoiya kosilingan kaliangano tukon nggaa-nggaaale kona babasalan ko Mian Bisa. Maka Petulus bantile, ⁴⁷“Soba kitayo, naiya pai mian nia lapamo malaat Mian Bisa Na Loh bunomo kita. Jadi moola kai komian mosemba-sembege yanila sulano nasinau tukon paisu?” ⁴⁸Maka Petulus sumboliiyo yanila nasinau luwe Yesus Klistus sambuno. Lapamo doiya yanila kabiyo, sulano Petulus nadungol tukon yanila moimoiya kooloyo kona kalumbit.

Petulus nalapulan doi jemaat Yelusalem

11 Lasul-lasul tukon mian mo mangangga doi posaapon ko Yudea ndongoliiyo baikon komian mo aki nabaagama Yahudi lapamo talimayo ko Mian Bisa nabantilan. ²Doibundu salataa Petulus ampakono doi Yelusalem, do Yahudidoo miano mo lapamo mangangga, mbisalakene Petulus. Yanila bantile, ³“Bulaando ikoo moampakon doi mian mo akiyon nasinunat nabonua? Tukon ikoo koidan pokaanggon posinggat-singgat tukon yanila!” ⁴Tobikon doiyamo Petulus talangkangene doi yanila sasaibino komo lapamo teali, tambuun luwedoi tumbeno. Petulus bantile,

⁵“Yaku daano mosambeang doi kota Yope, maka yaku kitayo komeeng kopokita. Yaku kitayo daano kolangge meeng mo buno meeng kotoik mo bebelan inobuluson luwedoi timbu, tokooton doi sangkap kopasuno, doibundu tade doi yaku taalikon. ⁶Salataa yaku palatikangene doi lalomo, yaku kitayo koiyayon-iyayon mosangkap koaino, iyayon-iyayon mombosolo, iyayon-iyayon mo tolo-tolondok tukon tomisi mombosolo. ⁷Maka yaku lengele komeeng koalalo mobantile doi yaku, ‘Yo bangun, Petulus! Tembele doiya tukon kaane!’ ⁸Bai yaku timbiliyo, ‘Aki, Temeneno! Akiyoon nasidutu yaku makaan kinaan mo pinatanggon kai najis.’ ⁹Bai do alaloo bantil koidan luwedoi timbu, ‘Lobo mo lapamo Mian Bisa bantile halaal inaimo kai nabinantil pinatanggon.’ ¹⁰Yaku kitayo do langgedoo polong tolu luunggon tukon doi napupusan sasaibino tobingkat koidan doi sulugaa. ¹¹Kana doiya kotembono koidan domianoo motolula moluwedoi Kaisalea, mo sinumbolii doi yaku, lubat doi kubonua dungolan. ¹²Maka ko Mian Bisa Na Loh sumboliiyo yaku ampakon polaing yanila tukon aki sasaaki. Konom komian utus nia malaing tukon yaku doi Kaisalea, tukon kami sasaibino usok doi Kolnelius nabonua lalomo. ¹³Doibundu Kolnelius basalitakene doi kami bulaando yana nakitaano komeeng komalaekat mokokondong doi nabonua tukon bantile, ‘Mobintokon mian moampakon doi Yope mouange komeeng komalane kosambuno Petulus. ¹⁴Yana naikon pailukene doi komuyu kobilita mo salamatenene ikoo tukon pulimu.’ ¹⁵Tukon salataa yaku atambuune basalita buno doiya,” bunomo doiya Petulus banggadudulkene kona salita, “Mian Bisa Na Loh lubat doi yanila, pokakana buno komo teali doi kita loolukonoo doi tumbe-tumbeno. ¹⁶Maka yaku neneeke, Temeneno sidutu bantile, ‘Yohanes mansau tukon paisu, bai komuyu naikon sinau tukon Mian Bisa Na Loh.’ ¹⁷Jadi tontong ko Mian Bisa mebeekon koidan doi mian mo aki nabaagama Yahudidoo balakaat mo pokakana yana mo beekene doi kita doi tembonodoo nda manganggaan doi Yesus Klistus. Tobikon doiya, aki nateali yaku mopantane ko Mian Bisa!”

¹⁸Sambuno ndongoliiyo doiya, yanila akimo nanggeelekiyo yana koidan. Maka yanila nggaa-nggaale ko Mian Bisa, yanila bantile, “Kalu buno doiya, komian mobolikon Yahudi



Kota Antiokhia doi lipu Silia (11:19)

binee todanan moluwedoi Mian Bisa sulano badodoloon doi napolalim-lalim tukon tingoniiyo kotuboan mo bisa!”

Jemaat doi Antiokhia

¹⁹Sambuno Stepanus inakate, komian mo anggayo Yesus tambuuno binuluk-buluk, tobikon yanila topobabandakon doi yayaa. Daano kobuleng polong doi Fenesia, tukon daano koidan komo polong doi Siplus tukon doi Antiokhia. Yanila babilitakene kobilita moluwedoi Mian Bisa tolongo doi Yahudi miano tolong. ²⁰Bai luwedoi do mianoo momangangga, mo luwedoi Siplus, tukon doi Kilene, daano koidan kopai mian mo ampakon doi Antiokhia tukon babilitakene ko Bilita Monondok tentang Yesusoo doi mian mo aki nabaagama Yahudi koidan. ²¹Ko Temeneno nakuasa daano doi yanila tobikon badaang komian moteali mangangga tukon salakangene kobutongo doi Temeneno.

²²Salita-salita tentang kadadian-kadadian nia polong koidan doi jemaat Yelusalem. Maka yanila sumboliiyo Balanabas ampakon doi Antiokhia. ²³Tukon Balanabas polong indaa, tukon kitayo bulaando ko Mian Bisa nabalakaatiyano do mianoo, yana laba tuuno. Maka yana kabiyo sulano yanila bisa-bisa motaat doi Temeneno tukon totubo konoano. ²⁴Balanabas nia mian monodok konoano tukon kinuasaimo Mian Bisa Na Loh tukon tutuu anggayo ko Temeneno tobikon badaang komian momalaing Temeneno.

²⁵Doibundu Balanabas ampakon doi Talsus umboliiyo Saulus. ²⁶Sambuno pososuong tukon Saulus, yana babayo Saulus doi Antiokhia tukon meeng kotaum moonoo yanila pototongi tukon anggota jemaat indaa tukon mongotunggul badaang komian. Doi Antiokhia indaamo komian mangangga doi Yesus tuuk tumbeno luunggon kona binantilan Salani miano.

²⁷Doi lounudoo daano komoimoiya konabi molubat luwedo Yelusalem ampakon doi Antiokhia. ²⁸Doi antalano yanila daano komeeng komian kosambuno Agabus. Luwe dolongan Mian Bisa Na Loh yana tantukangenemo baikon doi posaapon kodunia teali kolounu malaalan mo bolikon langge. (Tukon do langgedoo takainomo tealimo koidan doi tembodoo Kaisal Klaudius natealian tomundo.) ²⁹Maka sasaibino Yesus napololaingoo pomeenggon sulano namakapatu bantuan doi utus-utus mo dungol doi Yudea; suwe-suwele makapatu manulut kona tinondong. ³⁰Pomeenggonanoo linaksanakanggon koidan, maka Balanabas tukon Saulus sinumbolii sulano nababayo do bantuanoo doi gulu-gulu jemaat.

Kopangasakisaawan tubo-tuboimo

12 Doi lounudoo koidan Tomundo Helodes atambuunemo kona dodokanano koanggota-anggota jemaat. ²Luwe napalenta, Yakobus, Yohanes utuso inakate tukon bakoko. ³Salataa Helodes kitayo baikon dona kokubaidoo sanaanggene ko Yahudi miano noano, yana mongkubai koidan mo bunoo doiya; yana sumboliiyo komian molakoyo Petulus koidan. Doiyo langgedoo teali doi tembo Lamekanano ko Loti Moakiyo ko Lagino. ⁴Sambuno linako, Petulus inusokon doi talunggu lalomo. Sangkap kotambuno kosuludadu mobinontokon sulano

natotooliyo Petulus idoo – suwe-suwele kotambuno sangkap komian koanggota suludadu. Sambuno kolamean Paskah pupus, maka Helodes naikon palesayo Petulus doi mian badaang salaano. ⁵Jadi Petulus tinaan doi talunggu; bai koanggota-anggota jemaat banggadudul momeeng mosambeang tukon bisa-bisa doi Temeneno motuuk doi Petulus.

Petulus sinodii doi talunggu

⁶Doi popook akiyoon Helodes naikon nasasalaanikene Petulus doi mian badaang, Petulus moolo kinoot tukon lua kopokoot doi antala lua kosuludadu padagai. Doi talunggu tataapon, padagai-padagai bailong koidan daano modagaiyo kotalunggu. ⁷Sosinggot Temeneno namalaekat kokondong idoo tukon daano komeeng nggilep motalaang doi talunggudoo kombiango lalomo. Malaekatoos ungede-unggede Petulus polong yana bangun. Maka do malaekatoos bantile, “Eh, mosobit bangun!” Singgatoos koidan otuwongo dolante besidoo modoi Petulus limano. ⁸Lapamo doiya malaekatoos bantile, “Pakeyo komu pakean tukon keetemo komu sapatu alosos.” Maka Petulus pakeyomo kona pakean tukon keetemo kona sapatu alosos. Doibundu malaekatoos bantile koidan, “Pakeyo komu jubah tukon laingemo yaku.” ⁹Maka Petulus lainge do malaekatoos tobuat luwedoos talunggudoo lalomo. Bai Petulus aki natooyo baikon oila komo sodo kinubai luwe do malaekatoos doiya daano kai meeng kolangge mo bisa-bisa teali. Petulus aanggene doiya tolongo meeng kopokita. ¹⁰Salataa yanila lupaiyo kotataapon badagaian komeengo tukon koluanos, yanila polong doi tataapon besi, mo lolooyo kokota. Tataaponoo tobuta susuungo, maka yanila tobuta tukon ambakono lolooyo kololoon meeng pangano. Sosinggot do malaekatoos tinggalemo Petulus.

¹¹Lapamo doiya maka sodo Petulus tooyo oilamo komo teali doi yana, maka yana bantile, “Budodoiya yaku toiyomo baikon ko Temeneno bisa-bisa molapamo kapatuwe kona malaekat sulanos naosodiiyo yaku doi Helodes nakuasa tukon luwe sasaibino kolangge komo naikon bangsa Yahudi mo kubaiyo doi yaku.”

¹²Sambuno lapa yana tooyo doiya ndondoongoo, Petulus ampakono doi Malia nabonua, Yohanes tinano mo sinombuikon

koidan Malakus. Idoe badaang komian mopototongi tukon daano mosambeang. ¹³Petulus tokiyo kotataapon doi tonggung, maka komeeng kopeleleani boine kosambuno Lode, lubat sulano nabukayo kotataapon. ¹⁴Banggadudul tingoniiyo Petulus alalo. Tobikon nalabaan, yana moso-mosobit usok koidan akimo nabukayo kotataapon, maka pailukene komian idoe baikon Petulus daano doi tonggung. ¹⁵“Ikoo tindo!” yanila bantile. Bai Lode kokotikas baikon doiya bisa-bisa Petulus. Maka yanila bantile, “Doiya malaekato!”

¹⁶Daano mobuno doiya Petulus banggadudul momeeng tokiyo kotataapon. Maka salataa yanila bukayo kotataapon, tukon kitayo Petulus, yanila masaingding tuuno. ¹⁷Petulus mebee isalat tukon limano sulano yanila natanaang, doibundu yana basalitakene bulaando ko Temeneno molapamo babayo yana tobuat luwedo talunggu lalomo. Maka yana bantile, “Popailukene naiya doi Yakobus tukon utus-utus bailong koidan.” Lapamo doiya Petulus otinggalemo do tampatoo tukon ampakon doi tempat bailong.

¹⁸Modoakon dowa-dowa tealimo kokakacauwan doi antala suludadu-suludadu pototoolino. Yanila pusing tuuno oila komo teali manganai doi Petulus. ¹⁹Maka Helodes mosumbolii mian moumboliiyo Petulus, bai yanila aki namoola pososuunggene yana. Jadi Helodes mapalentakene sulano suludadu-suludadu pototoolinodoo nasinadai maka nainakate.

Sambuno lapa doiya Helodes ampakon doi Yudea tukon dungol moimoiya kolumbito doi Kaisalea.

Helodes namatean

²⁰Helodes nggimoliiyo tuuno komian doi Tilus tukon Sidon. Tobikon doiya yanila posinggat-singgat lubat momangadap doi yana. Tumbe-tumbeno yanila mangala noa doi Blastus, mo kapalaiyo Helodes nabatomundoan, sulano yana naala doi yanila. Doibundu yanila ampakono mangadap doi Helodes, maka kabiyo podame, sabab konapoo lipu tolongo moinikene kokinaan doi Helodes nalipu.

²¹Daano kooloyo meeng mo lapamo tinantukon, Helodes pakeyo kona pakean batomundoan maka osulang doi kulusii tukon tambuuno bapidato doi nalayat salaano. ²²Layat mo daanon mo mondongoliidoo nggele-nggeleamon, “Naiya pilogot alalo, bolikon banggapi alalo!” ²³Doiya kosinggatoo koidan

Temeneno namalaekat tapiyo Helodes, sabab yana aki naanggayo ko Mian Bisa. Helodes kinaan ngganggalang maka mate.

²⁴Jadi ko Mian Bisa nabantilan momeeng pololokon tolongol tukon pololokono bukuan.

²⁵Sambuno lapa Balanabas tukon Saulus alapayo konapoo limang, yanila abalimo doi Yelusalem tukon babayo Yohanes Malakus polaing-laing yanila.

Balanabas tukon Saulus pinili tukon sinumbolii

13 Doi jemaat Antiokhia lalomo daano konabi-nabi tukon gulu-gulu, doiyamo Balanabas, Simeon mo tinotumaikon Mopook, Lukius luwedo Kilene, Menahem napiniala posinggat-singgat Helodes, tukon Saulus. ²Salataa yanila daano mobakaleda doi Temeneno tukon bapuaasa, Mian Bisa Na Loh bantil doi yanila, “Popiliyomo Balanabas tukon Saulus motuuk doi yaku, sulano yanila nalimange kolimang mo lapamo yaku tantukene motuuk doi yanila.”

³Sambuno yanila bapuaasa tukon sambeang yanila abese kopai limano doi Balanabas tukon Saulus maka yanila sumboliiyo yanila luaila.

Doi Siplus

⁴Tobikon inosumbolii Mian Bisa Na Loh, Balanabas tukon Saulus lengget taus doi Seleukia. Doi Seleukia yanila talabut doi togong Siplus. ⁵Salataa polong doi Salamis, yanila babotilangene ko Mian Bisa nabantilan doi Yahudi miano nabonua kaleda. Yohanes Malakus tomboniiyo yanila doi yanila naampakonan lalomo.

⁶Posaapon do togongoo yanila ompokoniiyo polong doi Pafos. Indaa yanila pososung tukon komeeng ko Yahudi miano, kosambuno Bal Yesus. Yana meeng komian modaano kona motoiyan mo akuiyo kobutongo nabi. ⁷Selgius Paulus, gubelnul doi togongoo yana posobat tukon Bal Yesus. Gubelnuloo daano meeng komian mo pandoi tukon bijaksana. Yana uange Balanabas tukon Saulus sabab yana yase mondongolii Mian Bisa nabantilan. ⁸Bai Balanabas tukon Saulus Elimas tumbak-tumbak do pandoidoo motoiyan, sabab Elimas (doiyamo kosambuno doi silingan Yunani lalomo) kakaate sulano do gubelnuloo inai napolong mangangga doi Yesus. ⁹Bai Saulus – mo binantil koidan Paulus – kinuasaimo Mian Bisa Na Loh,

tobikon yana mbalenge do mopandoidoo motoiyan, ¹⁰maka bantile, “Eh bakokolii tuuno, pau molokis! Ikoo musu doi sasaibino komo monondok. Bulaando ikoo moaki muyase tade molusayo ko Mian Bisa natetel sulano nasalamatene kobanggapi? ¹¹Budodoiya kitayo, Temeneno ukume ikoo! Ikoo naikon teali piit, polong ikoo aki mumoola mokita oloyo panano koidan doi soisik kotembo.”

Doiya kosinggatoo koidan Elimas lasaiyo daano kobunom mo mopook motombukiyo komatano, tobikon yana ampakon nggaa-nggaam moumbolii mian motanda-tandane yana. ¹²Salataa do gubelnuloo kitayo oila komo lapamo teali, yana manganggamo doi Yesus; sabab yana masaingding tuuno naikon kootunggul tentang Temeneno.

Doi Antiokhia, Pisidia

¹³Doi Pafos, Paulus tukon tula-tulano talabut doi Pelga doi Pamfilia. Ido Yohanes Malakus otinggale yanila, maka abali doi Yelusalem. ¹⁴Doi Pelga, yanila banggadudulkene kona poampakon doi Antiokhia Pisidia, doibundu doi oloyo Tadean yanila ampakon osulang doi bonua kaledaan lalomo. ¹⁵Sambuno Musa na Buku tukon Nabi-nabi na Buku binasakono, gulugulu jemaat sumboliiyomo komian momansadai doi Paulus tukon tula-tulano, “Utus-utus, kalu Utus daano komu otunggul motuuk doi mian nia, yo pelenggenemo domu otunggul.” ¹⁶Paulus kokondong, maka tidekene kolimano mebee paloosan, doibundu bantile,

“Utus-utusonggu bangsa Israael tukon utus-utus mo bailonggon naimbaa mo taat doi Mian Bisa! Soba polengele yaku: ¹⁷Mian Bisa bangsa Israael lapamo piliyo kotumbunggita, tukon tealikene naiya bangsa nia bangsa mo babasal salataa yanila dungol doi Mesil buno mian molulubaton. Doibundu tukon kuasa mo babasal Mian Bisa babayo yanila tobuat doi Mesil. ¹⁸Yana tanaang telhadap yanila nakokubai doi padang lalomo sangkap kolono kotaum kona kalumbit. ¹⁹Pitu kobangsa yana momanase doi lipu Kanaan sulano naobos-obosikene do lipudoo doi bangsa

Israël nateali yanila nalipu. ²⁰Sasaibino doiya banggadudul sangkap kosakato lima kolono kotaum.

Sambuno lapa kobangobosan do lipudoo Kanaan, Mian Bisa beekene doi yanila kohakim-hakim. Hakim doibundu doiyamo Nabi Samuel. ²¹Doibundu yanila mangkabi meeng kotomundo. Mian Bisa beekene doi yanila Saul Kis napau luwedo suku Benyamin sulano nateali yanila natomundo sangkap kolono kotaum kona kalumbit. ²²Sambuno Mian Bisa beletiyu yana doi nabatomundoan, Mian Bisa bingkate koidan Daud teali yanila natomundo. Tukon naiyamo ko Mian Bisa nabinantil tentang Daud, 'Yaku lapamo laate Daud Isai napaudoo mo sanaanggene konoanggu. Yana meeng komian mo lakukanggene daku mongiasan.' ²³Luwedo Daud doiyamo ko Mian Bisa namasadiakanano kobangsa Israël meeng ko Tomundo Pasalamat, pokakana mo lapamo paladandikene. Tukon Yesus yanamo ko Tomundo Pasalamato. ²⁴Akiyoon Yesus natambuune kona limang, Yohanes lapamo babotilanggene doi Israël miano sulano yanila nabadodoloon luwedo yanila nalalim-lalim tukon sinau. ²⁵Tukon adukono pupus kona limang, Yohanes bantile doi mian, 'Indee kai miano yaku nia manulut komuyu popalaat? Yaku bolikon domianoo komuyu mototooliyo. Poneneeke, do mianoo naikon lubat sambuno lapa yaku; tuuk mobukayo kona sapatu yaku aki namoola.'

²⁶Utus-utus katulunan Abalaham, tukon sasaibino Utus-utus komo bailonggon dimbaa mo taat doi Mian Bisa! Mian Bisa lapamo kapatuwo doi kita kobilita kasalamatanoo; ²⁷sabab komian mo dungol doi Yelusalem tukon yanila pamalenta-pamalenta aki napo toiyo baikon yanamo do pasalamato. Yanila aki namangalatikene konabi-nabi naotunggul mo binasakan samba-samba kooloyo Tadean, tobikon yanila ukume Yesus. Bai tukon lakukanggene mo buno doiya mangaanikene baikon oila komo tinantukon doi nabi-nabidoo tealimo. ²⁸Mau kai yanila aki namoola pososunggene komeeng kokasalaan doi yana mo moola inukum tukon ukuman mate, bai yanila kabiyo doi Pilatus sulano yana inakate. ²⁹Tukon sambuno yanila okoobusemo kubaiyo sasaibino komo lapamo totulis doi Kitab

13:20: Samb. 2:16, 1Sam 3:20 13:21: 1Sam. 8:5, 10:21 13:22: 1Sam. 13:14, 16:12,
Saad 89:20 13:24: Mlk. 1:4, Luk. 3:3 13:25: Mat. 3:11, Mlk. 1:7, Luk. 3:16,
Yoh 1.20, 27 13:28: Mat. 27:22-23, Mlk. 15:13-14, Luk. 23:21-23, Yoh. 19:15
13:29: Mat. 27:57-61, Mlk. 15:42-47, Luk. 23:50-56, Yoh. 19:38-42

Moliyous lalomo tentang yana, yanila obulusene kobadano doi kayung sempang, maka inabos doi kibal lalomo. ³⁰Bai Mian Bisa otuboiyo koidan doi namatean. ³¹Doibundu moimoiya kooloyo kona kalumbit yana lubat okitakene kobutongo doi mian mo lapamo lubat tukon yana doi Galilea ampakon doi Yelusalem. Yanila doiyamo komo budodoo teali sakisii-sakisii motuuk doi yana doi Islael miano. ³²Jadi, budodoiya nia kami pelengene kobilitadoo monondok doikoo: Oila komo Mian Bisa lapamo paladandikene doi tumbunggita, ³³doiya yana lapamo kubaiyo doi kita tukon naotuboiyo Yesus koidan doi namatean. Sabab doi Mazmul koluan lalomo daano mototulis,

‘Ikoo daku Pau,

doi oloyo nia yaku lapamo teali Tamamu.’

³⁴Mian Bisa lapamo otuboiyo koidan yana doi namatean. Budodoiya yana akimo naikon koidan natoupiyo komatean doi kibal lalomo. Tentang doiya langgedoo Mian Bisa bantile,

‘Yaku naikon mebeekon doi komuyu teteba moliyous mo pasti naikon tinopati,

mo lapamo kudandikene doi Daud.’

³⁵Bunomo lakon koidan doi ayat lalomo bailong nabinantilan,

‘Ikoo aki naikon mubatadikene komu ata mo satiadoo nabooan doi kibal lalomo.’

³⁶Daud lapamo mate tukon kinibulo koidan posinggat-singgat tukon kotumbuno, sambuno lapa yana lakukanggene oila komo Mian Bisa nasinumboliikon yana kubaiyo. Daud badano lapamo manas kabus sasaibino. ³⁷Bai Yesus komo Mian Bisa otuboiyo koidan doi matean, Yesusoo aki namanas kabus. ³⁸⁻³⁹Tobikon doiya Utus-utus, siokai komuyu potoiyo baikon luwe Yesus nia bilita tentang potolos lalim pinailukon doikoo; komuyu sio potoiyo baikon samba komian mo mangangga doi yana, inosodii doi sasaibino kolalim mo aki namoola inapusanggon luwedo Mian Bisa napalenta-palenta Musa mo pelengene. ⁴⁰Doiyamo kosababpo komuyu sio popalatikanggene mono-monondok, inai napolong teali doi komuyu oila komo nabi-nabi nabinantil nia,

⁴¹ ‘Popalatikanggene mono-monondok, eh komuyu komian mo yase batotulai!

Komuyu naikon masaingdingene, maka mate!

Sabab doi lounu nia yaku daano mokubaiyo komeeng
kolangge,

komo komuyu susuumuyu aki naikon poanggayo,
mau kai nadaano komian motalakanggene doi komuyu.’ ”

⁴²Salataa Paulus tukon Balanabas otinggale do bonua kaledadoo, komian modaano doi bonua kaledaano, kabiyo yanila naabali koidan doi oloyo Tadean doi salaandoo, sulano natalakanggene nalobian banggadudul tentang do langge-langgedoo. ⁴³Sambuno lapa komianoo luwedei bonua kaledaano, Paulus tukon Balanabas linoolaing doi badaang komian Yahudi tukon bangsa bailong mo lapamo usok agama Yahudi. Maka do lasul-lasuloo otinauwo yanila sulano yanila nabanggadudul basosinggalanggon doi Mian Bisa nakuasa.

⁴⁴Doi oloyo Tadean salaandoo, adukon sasaibino komian doi kotadoo lubat momondongolii Temeneno nabantilan. ⁴⁵Salataa dopai Yahudi miano kitayo dopai mianoo mobadaang, yanila masakit konoano tuuno. Yanila totulaiyo Paulus tukon yanila bantayo sasaibino kona binantil. ⁴⁶Bai tukon lobian balani koidan Paulus tukon Balanabas basilingan banggadudul talang-talaangan. Yanila bantile, “Ko Mian Bisa nabantilan takainomo sio napinolonggon doi komuyu loolukon. Bai tobikon komuyu mo aki poyase talimayo, komuyu lapamo tantukene susuumuyu baikon komuyu aki namoola mantalima tuboan mobisa tukon posidutukon. Tukon budodoiya kami otinggale komuyu tukon ampakon doi bangsa bailong. ⁴⁷Sabab naiyamo ko Temeneno napalenta doi kami; Temeneno bantile,

‘Yaku lapamo tantukene komuyu moteali meeng komadialan
doi bangsa bailong mo bolikon Yahudi,
sulano komuyu polubatene kokasalamatan doi posaapon
kodunia.’ ”

⁴⁸Doi singgato ko bangsa bailong mo bolikon Yahudi molengele doiya, yanila sanaang tuuno, maka nggaa-nggaale ko Temeneno nabantilan. Tukon domianoo mo lapamo Mian Bisa tantukene sulano namalaat tuboan mobisa tukon posidutukon, do mianoo anggayo.

⁴⁹Ko Temeneno nabantilan tololongolo doi yayaa doi posaapon doi lipudoo. ⁵⁰Bai kosambu-sambu doi kotadoo tukon boi-boine moluwe golongan mian motatandak matakutene

ko Mian Bisa, Yahudi miano gololiyo. Yanila osumbete kopomusuan doi Paulus tukon Balanabas, tukon siikayo yanila luaila luwedo lipudoo. ⁵¹Maka do lasul-lasuloo otipasene koambata doi ainoila doi mianoo salaano doiya bunu meeng kotondo, maka ampakon doi Ikonium. ⁵²Pololaing-pololaing doi Antiokhia laba tuuno tukon kinuasaimo Mian Bisa Na Loh.

Doi Ikonium

14 Paulus tukon Balanabas toupiyo kolangge mo pokakana doi Ikonium. Yanila ampakon koidan doi Yahudi miano nakaledaan tukon basalita idoo mobuno doiya tobikon badaang ko Yahudi miano tukon mobolikon Yahudi miano teali mangangga doi Yesus. ²Bai ko Yahudi miano mo aki nayase mangangga asute komian mobolikon Yahudi, tobikon kubaiyo yanila mosikitene komian mangangga doi Yesus. ³Tobikon doiya Paulus tukon Balanabas dungol malumbit idoo. Tukon doi napo balanian yanila basilingan manganai Temeneno. Maka ko Temeneno bukutiikanggene baikon yanila nabilita tentang namaasi doiya bisa; yana beena doi yanila kuasa sulano napo kubaiyo kuasa mominasaingdinggon tukon langge-langge modeikon lobo. ⁴Bai komian doi kotadoo pototonggulung meeng tukon bailong; daano komo ala doi Yahudi miano tukon daano komo ala doi lasul-lasuloo.

⁵Maka ko Yahudi miano tukon kona posambu-sambu posinggat-singgat tukon mian-mian mobolikon Yahudi pomeenggon sulano naposakisaayo tukon napo sakule batu do lasul-lasuloo. ⁶Bai dopai lasul-lasuloo toiyo do ndondoongoo, maka yanila dampas doi Listla tukon Delbe, doiya kota-kota doi Likaonia, tukon doi lipu nappinggaupan. ⁷Indaa yanila babulitakanggene koidan do Bilitadoo Monondok.

Doi Listla tukon Delbe

⁸Doi Listla daano komeeng komala-malane mo lapit koaino salataa nasinuungan, tobikon yana aki nasidutu biasa amba-ambakon, sabab koaino todudul muyuk. ⁹Mianoo osulang indaa mondongolii Paulus mobasilingan. Paulus kitayo baikon do mianoo anggayo tukon tobikon doiya yana moola tinangalinggon. Maka Paulus mbalenge yana, ¹⁰tukon alalo mo

babasal Paulus bantile, “Kokondong kokoloyos!” Mianoo osuut kokondong maka ambakon. ¹¹Salataa komian badaang kitayo oila komo lapamo Paulus kubaiyo, yanila toloukon doi silingan Likaonia lalomo, “Pilogot-pilogot lapamo obulus doi dunia tukon banggapi butongo.” ¹²Maka Balanabas yanila sombuikene Zeus, tukon Paulus yanila sombuikene Helmes, sabab yanamo komo basilingan. ¹³Imam Pilogot Zeus, kopopialungo tangabos doi salaano, lubat momababa saapi-saapi langgilo tukon bunga-bunga doi kota tataapono babasal. Yana yase malaing tukon mian badaangoo momososubakon sosuba doi lasul-lasuloo.

¹⁴Salataa Balanabas tukon Paulus ndongoliiyo oila komo do mianoo yase kubaiyo, yanila bea-beake yanila napakean maka yanila obuleng doi mianoo mobadaang tanga-tangano, maka nggeleamon, ¹⁵“Eh, bulaando komuyu mokubaiyo naiya? Kami naiya banggapi koidan pokakanamo Utus! Kami daano naimbaa sulano babilitakene ko Bilita Monondok doi komuyu sulano komuyu potinggale kolangge-langge mo akiyo kogunano nia tukon polubat doi Mian Bisa mo tubo, motealikene kotimbu tukon buta tukon tobun tukon sasaibino komo daano doi lalomo. ¹⁶Doi tembo mo lapa ko Mian Bisa batadikenemo kobangsa-bangsa motubo naloingiyo kona mongiasan yanila suwe-suwele. ¹⁷Bai yana aki natoliminggene momebee bukutii-bukutii tentang kobutongo, doiyamo tukon mongkubaiyan kokubai momonondok. Yana beekene doi komuyu koudan luwedo timbu tukon polangge kinanggikon hasilo doi tembono. Yana beena kinaan doi komuyu tukon sanaangene konoamuyu.”

¹⁸Bai tukon do bantil-bantilanoo daano maaling koidan do lasul-lasuloo napantane do mian-mianoo mososubakon sosuba doi yanila.

¹⁹Moimoiya ko Yahudi miano mo lubat doi Listla luwedo Antiokhia doi Pisidia tukon luwedo Ikonium pangaluiyo komian mobadaangoo tobikon do mianoo mobadaang alamo doi yanila. Yanila sakule Paulus tukon batu, doibundu keete yana doi kota tonggulungo. Yanila aangene yana lapamo mate, ²⁰bai salataa dopai mianoo mo mangangga idoo kokondong potikunggon, yana bangun tukon usok abali doi kota. Modoakon yana tauso doi Delbe polaing-laing Balanabas.

Paulus tukon Balanabas abali doi Antiokhia

²¹Doi Delbe, Paulus tukon Balanabas babilitakene do Bilita Monondokoo tukon madaang komian moteali mangangga doi Yesus. Lapa doiya yanila abalimo doi Listla, doibundu doi Ikonium, maka doi Antiokhia doi Pisidia. ²²Doi kota-kotadoo yanila ekeenggele Yesus napololaing-pololaing noano tukon otinaukene do pololaing-pololaingoo natataap mangangga doi Yesus. “Kita sio nabadaang kosakisaa nda tinoupi loolukon, maka nasodo kita toupiyo kosanaangan doi Mian Bisa na Dunia Boolu,” bunomo doiya do lasul-lasuloo naotunggukanano doi Yesus napololaing-pololaing doi kotadoo. ²³Tukon samba-samba kojemaat, Paulus tukon Balanabas mongoduduk katua-katua tuuk doi jemaatoo. Maka tukon sambeang tukon bapuaasa, yanila salakangene katua-katuadoo doi Temeneno komo yanila mo anggayomodoo.

²⁴Sambuno doiya Paulus tukon Balanabas banggadudulkene-mo kona ampakonan yanila loloiyo kolipu Pisidia tukon polong doi Pamfilia. ²⁵Tukon sambuno lapa yanila babilitakene ko Mian Bisa nabantilan doi Pelga, yanila ampakono doi Atalia. ²⁶Luwe idoo yanila talabut koidan doi Antiokhia. Doiyamo kota tempat yanila loolukonoo nasinalaakanggonan doi maasi Mian Bisa, sulano yanila nalimange kolimang mo budodoiya lapamo yanila okoobuse.

²⁷Salataa polong doi Antiokhia, yanila pototongikene koanggota-anggota jemaat idoo, maka basalitakene sasaibino oila komo lapamo Mian Bisa kubaiyo lolo doi yanila. Yanila basalitakene koidan manganai bulaando ko Mian Bisa molapamo mobuka loloon sulano komian mobilikon Yahudi mangangga doi Yesus. ²⁸Doi kotadoo Paulus tukon Balanabas dungol malumbit tukon mian mangangga.

Kombulan doi Yelusalem

15 Moimoiya komian moluwedoi Yudea lubat doi Antiokhia tukon yanila otunggule komian momangangga doi Antiokhiadoo baikon kalu yanila aki nasinunat loloiyo Musa naatulan, yanila aki namoola sinalamaton. ²Paulus tukon Balanabas bantayo tuuno dopai mianoo napandapat. Doi

napupusan tinantukanggon sulano Paulus tukon Balanabas tukon moimoiya komian bailong moluwedoi Antiokhia ampakon doi Yelusalem sulano pobisalaikene masaaladoo tukon lasul-lasul tukon katua-katua indaa.

³Anggota jemaat doi Antiokhia antekene yanila polong doi kota tonggulungo, doibundu yanila ampakono loloiyo kokota Fenesia tukon Samalia. Indaa yanila basalitakene bulaando komian mobolikon Yahudi lapamo salakanggene kobutongo doi Mian Bisa. Do bilitadoo tutuu laba-labakene komian mo mangangga idoo. ⁴Salataa yanila polong doi Yelusalem, yanila tinalima tukon monondok doi jemaat, tukon doi lasul-lasul tukon katua-katua. Maka yanila basalitakene doi mianoo tentang sasaibino oila ko Mian Bisa mo lapamo kubaiyo doi yanila. ⁵Bai moimoiya komian motongusokon Falisi miano mo mangangamo, kokondong tukon bantile, “Mian bangsa bailong komo lapamo mangangadoo sio nasinunat tukon sabole-bole sio naloloiyo Musa naatulan.”

⁶Maka lasul-lasul tukon katua-katua pototongi sulano napo bisalakene doiya masaaladoo. ⁷Malumbit tuuno yanila napobeean pikilan. Doi napupusan Petulus kokondong tukon bantile, “Utus-utus! Komuyu susuumuyu toiyo baikon moimoiya kotembo mo lapa Mian Bisa piliyomo yaku luwedoi antala komuyu sulano babilitakene ko Bilita Monondokoo doi mian mobolikon Yahudi, sulano yanila molongol tukon anggayo. ⁸Tukon Mian Bisa komo toiyo kobanggapi noano lapamo otudoikene baikon yana talimayo yanila; yana otudoikene do langgedoo tukon beekene doi yanila ko Mian Bisa Na Loh bunomo komo lapamo beekenemo doi kitadoo koidan. ⁹Mian Bisa aki naposasalakene kita tukon yanila. Mian Bisa kokoliyousio yanila noano, sabab yanila mangangamo. ¹⁰Ah, oila kosababpo komuyu moyase tumbokiiyo ko Mian Bisa budodoiya tukon mebee meeng kokawajipan doi napololaing-pololaing nia, sabea kai kotumbunggita tukon kita susuunggita koidan aki namoola molaksanakanggene? ¹¹Kona bisaan, kita anggayo tukon kita sinalamaton tobikon Yesus namaasi doi kita; bunomo koidan yanila.”

¹²Maka tademo yanila sasaibino mo pototongi idoo. Doibundu yanila ndongoliyo Balanabas tukon Paulus mobasalitakene

koidan sasaibino kokuasa-kuasa mominasaingdinggon tukon langge-langge mobolikon lobo ko Mian Bisa mo lapamo kubaiyo lolo doi yanila doi antala mian-mian bangsa bailong mo bolikon Yahudi. ¹³Sambuno yanila lapa mobasalita, Yakobus bantile, “Utus-utus! Soba pondongoliyo yaku. ¹⁴Simon sodo lapa talangkanggene bulaando ko Mian Bisa doi tumbeno natudoikanano kona palahatian doi mian mobolikon Yahudi. tukon makisuut mopili luwedo doi yanila mian bailong komo naikon teali namian. ¹⁵Doiya pokokonoi tukon komo lapamo doi nabi-nabi tantukene. Sabab daano mototulis buno naiya,

¹⁶ ‘Lapamo doiya yaku naikon lubat koidan,’ Temeneno bantile,
 ‘yaku naikon bangune koidan Daud nabonua mo lapamo molopo,

tukon okindendeke kona molopoan,
 tukon ekekendenge koidan;

¹⁷ sulano sasaibino komian labinodoo umboliiyo ko Temeneno, posinggat-singgat sasaibino kobangsa bailong mo bolikon Yahudi mo lapamo yaku uange sulano nateali kumian.’

Bunomo doiya ko Temeneno nabantilano, ¹⁸komo lapamo pailukene doiya langgedoo salataa doi looluk.”

¹⁹“Jadi manulut kupalaat,” Yakobus nabantilano, “kita aki namoola kubaiyo susa komian mobolikon Yahudidoo mo salakanggenemo kobutongo doi Mian Bisa. ²⁰Bai kita sio nda motulis sulat doi yanila tukon otinauwo yanila sulano yanila naaki nakaane kokinaan monajis mo lapamo sinosubakon doi bapilogotan, kai makaan iyayon sailo motokoot mate, kai makaan sau. Tukon koidan sulano yanila nadedeengene kobutongo luwe kokubai-kokubai mo lokis. ²¹Sabab Musa naatulan lapamo salataa looluk binasakon doi samba-samba kooloyo Tadean doi bonua-bonua kaleda, tukon binabilitakon doi sasaibino kokota.”

Sulat doi bangsa-bangsa bailong mo lapamo mangangga

²²Lasul-lasul tukon katua-katua, posinggat-singgat tukon sasai-bino koanggota jemaatoo putusemo sulano napo mopomolilik moimoiya komian doi yanila komo naikon sinumbolii doi Antiokhia polaing-laing Paulus tukon Balanabas. Maka yanila lilike Silas tukon Yudas mo sinombuikon koidan Balsabas.



Pilogot-pilogot timbalango (15:20)

Namian nia luaila daano kai mian mo talakamuka doi antala mian mangangga doi Yelusalem. ²³Polaing-laing tukon do bito-bitodoo yanila makapatu koidan meeng kosulat kona bantilano bunu naiya,

“Doi sasaibino utus-utus mo luwedo i bangsa bailong mo bolikon Yahudi, mo dungol doi Antiokhia, Silia tukon Kilikia. Komai salam, lasul-lasul tukon katua-katua, doiyamo poutus-utus. ²⁴Kami lengele daano komoimoiya komian luwedo i antala kami mo lapamo ampakon doi komuyu tukon mobanggabut tukon kubaiyo pusing komuyu tukon yanila naotunggul-otunggul. Bai kami aki mai sumboliiyo yanila molakukanggene doiya. ²⁵Doiyamo kosababpo kami lapamo po pikilikene tukon sasaibino satuju sulano molilik moimoiya komian tukon sinumbolii yanila lubat doikoo. Yanila naikon ampakon polaing-laing tukon Utus Balanabas tukon Paulus kami mo seange. ²⁶Doi mian nia molua lapamo yanila bataangene yanila butongo tobikon nda Temeneno Yesus Klistus. ²⁷Jadi, kami sumboliiyo Yudas tukon Silas doi Utus-utus. Yanilamo komo naikon mopelengene susuungo secala bantilan doi komuyu kobilita mo totulis doi sulatia lalomo koidan. ²⁸Mian Bisa Na Loh lapamo satujuiyo – tukon kami koidan satuju – sulano komuyu inai pobinee limang-limang mo lobian motoong luwedo i limang-

limang komo palaluu nia tolong: ²⁹inai pokaane kokinaan mo lapamo sinosubakon doi bapilogotan; inai pokaane sauno, inai pokaane koyayon sailo mo tokoot mate, tukon podedeengene kokokubai-kokubai mo lokis. Kalu komuyu dedeengene kobutomuyu doi langge-langgedoo, komuyu lapamo kubaiyo kolangge mo monondok. Tolongo buno doiya, kinatauan!”

³⁰Sambuno palamisi, yanila mo sinumboliidoo tauso doi Antiokhia. Indaa yanila uange sasaibino koanggota jemaat napototongi maka pelengene do sulatoo. ³¹Salataa do anggota jemaato basayo do sulatoo, yanila sanaang tuuno do sulatoo antoko mo hibule yanila noano. ³²Yudas tukon Silas, mo daano kai nabi koidan, malumbit kona pobasalitaiyan tukon utus-utus mo mangangamo doi Antiokhiadoo sulano mebee dolongan tukon kakabalanian doi yanila. ³³Sambuno Yudas tukon Silas dungol indaa moimoiya kooloyo, komian manganga doi Antiokhiadoo kapatuwo yanila abali tukon sumboliyo yanila mopelengene kosalam doi mo sumboliyo yanila. [³⁴Bai Silas putusemo sulano tataap dungol doi Antiokhia.]

³⁵Paulus tukon Balanabas koidan dungol moimoiya kooloyo doi Antiokhia. Indaa yanila bangotunggul tukon babilitakene ko Temeneno nabantilan polaing-laing tukon mian badaang bailong.

Paulus tukon Balanabas pobabandakon

³⁶Aki namalumbit doibundu Paulus bantile doi Balanabas, “Mai kita abali molubotiiyo koutus-utus mo mangangamo doi Yesus doi sasaibino kokota-kota molapamo kita babilitakene ko Temeneno nabantilan; sulano kita nda kitayo bulaando kondondoongo yanila.” ³⁷Balanabas yase babayo Yohanes Malakus, ³⁸bai Paulus lasaiyo aki namonondok mobabayo Malakus, mo aki nayase balimang polaing-laing tukon yanila tukon mootinggale yanila doi Pamfilia. ³⁹Maka Paulus tukon Balanabas ponggeleki tuuno tobikon doi napupusan yanila pobabandakon; Balanabas alayomo Malakus tukon talabuto tukon yana doi Siplus. ⁴⁰Paulus piliyo Silas maka lengget tukon yana sambuno utus-utus doi Antiokhiadoo salakangene yanila doi Temeneno namaasi. ⁴¹Yanila boilingiyo ko Silia tukon Kilikia; indaa yanila ekeengele koanggota-anggota jemaat.

Timotius malaing Paulus tukon Silas

16 Paulus banggadudulkene kona ampakanan doi Delbe, doibundu doi Listla. Ido daano komeeng komian Yesus napololaing kosambuno Timotius. Kotinano meeng ko Yahudi miano, mo lapamo mangangga doi Yesus bai kotamano Yunani miano. ²Doi antala mian mangangga mo dungol doi Listla tukon doi Ikonium, Timotius totingonii bunu meeng komian mo monondok. ³Paulus yase sulano Timotius namalaing tukon yana; tobikon doiya yana sunate Timotius. Yana kubaiyo doiya, sabab ko Yahudi miano doi lipudoo sasaibino toiyo baikon Timotius tamano meeng ko Yunani miano. ⁴Doi samba-samba kokota komo yanila lubotiiyo, yanila polongikene doi mianoo mo anggayo kokaputusan-kaputusan mo lapamo tinantukanggon doi lasul-lasul tukon katua-katua doi Yelusalem. Yanila otinauwo koutus-utus mo lapamo manganggadoo sulano natulutiyo do atulan-atulanoo. ⁵Maka anggota-anggota jemaatoo sosuungi bukuan konapoo iman, tukon samba-samba kooloyo pololokon sosuungi koaito.

Doi Toloas: Paulus mongkita meeng kopokita

⁶Mian Bisa Na Loh aki napataikene Paulus tukon Silas mobabilitakene ko Mian Bisa nabantilan doi plovinsi Asia. Jadi konapoo ampakanan yanila banggadudulkene doi kabupaten Fligia tukon Galatia. ⁷Salataa polong doi palabatasan Misia, yanila toitambenge usok doi plovinsi Bitinia, bai Yesus Na Loh pantane yanila moampakon indaa. ⁸Jadi yanila lupaiyo ko Misia tukon banggadudul doi Toloas. ⁹Dopopookoo, doi Toloas, Paulus mongkita meeng kopokita. Doi pokitadoo lalomo yana kitayo komeeng ko Makedonia miano kokondong doi salaano maka kabiyo tukon tutuu sulano yana naampakon doi Makedonia sulano natulungiyo yanila. ¹⁰Sambuno Paulus malaat do pokitadoo, kami banggadudul batotobo sulano ampakon doi Makedonia. Sabab tukon yakin kami mangala kasimpulan baikon ko Mian Bisa sumboliiyo kami babilitakene ko Bilita Monondokoo doi mian indaa.

Doi Filipi: Lidia mangangga doi Mian Bisa

¹¹Kami otinggale ko Toloas tukon talabut banggadudul doi Samotlake, tukon modoakon doi Neapolis. ¹²Luwe idoo kami doi



Kota Filipi (16:12)

Filipi, meeng kokota doi kacamatan tumbeno doi Makedonia. Filipi daano jajahan batomundoan Loma. Indaa kami dungol moimoiya kooloyo. ¹³Doi oloyo Tadean kami ampakon doi paisu bibilo doi tonggulung kota tataapono babasal, sabab kami lasaiyo idoo daano kotampat sambeangan motuuk doi Yahudi miano. Maka kami osulang tukon basa-basalita tukon boi-boine mo popotongi doi tampatoo. ¹⁴Meeng komeeng doi antala yanila daano kai padagang toik mobotiki manampal, kosambuno Lidia tukon luwedoi Tiatila. Yana mamaasikene ko Mian Bisa, maka ko Temeneno galakangene konoano sulano yana natalimayo oilamo Paulus nainotunggukon doi yana. ¹⁵Lidia tukon sasaibino kona bonua tumbuno sinaumo. Sambuno lapa sinau yana undange kami. Yana bantile, “Kalu Utus-utus lasayo yaku bisa-bisa molapamo mangangga doi Yesus, pomaimo pomoolo doi kubonua.” Maka yana kandatiyo sulano kami loingiyo kona kakabi.

Paulus tinalunggu doi Filipi

¹⁶Daano kooloyo meeng salataa kami sodo ampakon doi tampat sambeangan, kami pososuung tukon meeng koboine; yana ata. Boinedoo inusoki ibiliis mo moola tantukene koka-dadian-kadadian komo naikon mo lubat. Tukon motantukene komian nanasib, boinedoo mebee kauntungan mo babasal doi

mian natampat balimanganoo. ¹⁷Do boinedoo banggadudul mololainge Paulus tukon kami maka nanggele-nggeleamon, “Naiya pai mian nia Mian Bisa naata mobabasal! Yanila lubat sulano napailukene doi Utus-utus bulaando kocalano komuyu malaat salamats!” ¹⁸Moimoiya kooloyo kona kalumbit do boinedoo banggadudul momeenggon nggele-nggeleamon buno doiya. Paulus lopus kona sabalan, maka yana mbalenge tukon bantile do lohdo, “Luwe Yesus Klistus sambuno yaku bintekene ikoo tobuat doi boine nia!” Doiya kotembono koidan ibiliisoo otinggalemo do boinedoo. ¹⁹Salataa domianoo nabalainggonan toiyo baikon kokasampatan yanila sulano namalaat do lapamo lopus, yanila lakoyo Paulus tukon Silas, maka kinoot luaila doi labotan mangadap doi pamalenta. ²⁰Yanila mangadapene Paulus tukon Silas doi pamalenta-pamalenta Loma, doibundu yanila bantile, “Naiya pai mian-mian nia Yahudi miano. Yanila banggabut doi nda kota. ²¹Yanila popitoikene komian nalakukangene koadat kabiasaan komo pototonggulung tukon nda atulan-atulan, Loma miano. Kita aki namoola talimayo kai tulutiyo do adat kabiasaanoo!” ²²Dopai mianoo badaang tulut lobosiyo Paulus tukon Silas; tukon pamalenta-pamalenta beake kona pakean doi butongo doi lasuloo molua maka sumboliiyo komian monanale yanila luaila. ²³Salataa yanila lobiano tuuno konainanalan, yanila inusokon doi talunggu lalomo. Kokapala talunggu sinumbolii dagaiyo yanila tukon mono-monondok. ²⁴Tobikon do palentadoo, kapala talunggudoo taane yanila doi talunggu kombiango mo atean tuuno, tukon yanila aino pinango doi balak.

²⁵Uga-ugaate pintanga kopopook Paulus tukon Silas daano mosambeang tukon mananikene konggaa-nggaalano ko Mian Bisa. Mian motinaan bailonggon daano mondongoliiyo yanila momanani. ²⁶Sosinggoton teali koleali mo babasal tuuno, polong pandasi talunggudoo talalaing tounggot. Sasaibino kotalunggu tataapono tobuka tukon kolante-lante pokoot sasaibino komian motinalunggu toliat. ²⁷Kapala talunggudoo ngginggim tabangun. Salataa yana kitayo kotalunggu tataapono tobukamo, yana bubute kona bakoko doi salungo sulano nabangakate sabab yana aanggene komian motinalunggu lapamo obuleng sasaibino. ²⁸Bai Paulus nggeleamon kobu-kobukuan, “Inai mobangakate! Kami sasaibino daano naimbaa!”

²⁹Kapala talunggudoo makabi lampu maka obuleng usok

doi lalomo, tukon koidan lolondong yana tootuku doi Paulus tukon Silas salaano. ³⁰Doibundu yana babayo yana tobuat tukon bantile, “Tuan-tuan oila komo sio yaku kubaiyo sulano kusinalamaton?”

³¹Paulus tukon Silas timbiliyo, “Manganggamo doi Temeneno Yesus! Ikoo naikon selamat – ikoo tukon sasaibino komian komo doi mubonua!” ³²Maka Paulus tukon Silas talakanggene ko Temeneno nabantilan doi kapala talunggudoo tukon doi sasaibino komian mo daano doi nabonua. ³³Doi popookoo tangano koidan, kapala talunggudoo babayo yanila maka kumesiyo yanila napakol-pakol. Maka yana tukon sasaibino komian komo doi nabonua banggadudul sinau. ³⁴Doibundu yana babayo Paulus tukon Silas doi nabonua tukon beena kaan doi yanila. Yana tukon sasaibino kona pulino sanaang tuuno sabab yanila budodoiya anggayo ko Mian Bisa.

³⁵Modoakon dodowa, pamalenta-pamalenta Loma mosumbolii polisi doi talunggu sulano napelengene kopalenta sulano Paulus tukon Silas nasinodii.

³⁶Kapala talunggudoo pailukene doiya langge-langgedoo doi Paulus. Yana bantile, “Tuan-tuan, pamalenta lapamo mebee palenta sulano osodiikene Tuan-tuan. Budodoiya Tuan-tuan moolamo pomule. Kinatauhan poambakono!”

³⁷Bai Paulus bantile doi polisidoo, “Kami negala Loma miano. Aki napinalesa, kami lapamo binobokii doi mian badaang salaano tukon inusokon doi talunggu lalomo. Tukon budodoiya yanila sumboliiyomo kami ampakon tukon diam-diam? Kami aki mai yase! Pobintekene do pamalentedoo nalubat susuungo doi sumai mosodiiyo kami.”

³⁸Polisidoo lapulkanggene doiya langgedoo doi pamalenta Loma. Salataa do pamalenta-pamalentedoo lengele baikon Paulus tukon Silas negala Loma miano, yanila tealimo matakut. ³⁹Maka yanila ampakon doi Paulus tukon Silas momangkabi maaf, doibundu antekenemo yanila luaila tobuat doi talunggu, tukon mobabayo sulano yanila ampakon luwedo kotadoo. ⁴⁰Paulus tukon Silas otinggalemo do talunggudoo maka ampakon doi Lidia nabonua. Sambuno lapa yanila pososuong dopai mian-mianoo momangangga indaa, tukon mebee dolongan doi yanila, Paulus tukon Silas ampakono.

Doi Tesalonika

17 Paulus tukon Silas banggadudulkenemo kona ampakonan loloiyo ko Amfipolis tukon Apolonia maka polong doi Tesalonika. Indaa daano ko Yahudi miano nabonua kaleda. ²Maka Paulus ampakono doi bonua kaledaanoo - pokakana komo biasa lakukanggene kalu daano komeeng kobonua kaleda Yahudi miano - maka posoboli pikilan tukon komian idoo manganai ayat-ayat Kitab Moliyous. Yana lakukanggene doiya tolu kooloyo Tadean potutuundu. ³Baladasalkan ayat-ayat doi Kitab Moliyous yana talakanggene tukon bukutiikanggene baikon ko Tomundo Pasalamat Mian Bisa mo paladandikene palaluu malaat sakisaawan tukon tubo koidan doi matean. "Yesus yaku mo babilitakene doi komuyudoo, yanamo ko Tomundo Pasalamat mo dinandikon," Paulus nabantilano. ⁴Moimoiya komian motealimo mangangga maka malaingo Paulus tukon Silas; bunomo koidan daano badaang ko Yunani miano komo matakut doi Mian Bisa, tukon badaang koidan koboi-boine motalakamuka.

⁵Bai ko Yahudi mian-miano masakit konoano. Yanila uange komian mo tolongo dombaa dombulo doi loloon-loloon tukon mobentuke kogolombolan panggabut. Maka yanila nggabute doi posaapon do kotadoo tukon libaiyomo komeeng komian manganggamo nabonua kosambuno Yason sulano umboliiyo Paulus tukon Silas, sabab yanila yase babayo Paulus tukon Silas doi tonggulung mangadap doi mian badaang. ⁶Bai salataa yanila aki napososuunggene Paulus tukon Silas, yanila keete Yason tukon moimoiya komian mangangga bailong doi pamalenta-pamalenta mo balakuasa salaano doi kotadoo. Yanila nggeleamon, "Naiya pai mian-mian nia banggabut doi yayaa! Budodoiya mau konda kota linubotiimo yanila, ⁷tukon Yason lapamo talimayo yanila doi nabonua. Yanila sasaibino akiyengene kokatatapan-katatapan Tomundo Loma sabab yanila bantile baikon daano koidan kotomundo bailong kosambuno Yesus." ⁸Tukon do bantil-bantilanoo yanila kubaiyo komian badaang tukon pamalenta doi kotadoo teali matakut. ⁹Maka dopai pamalentadoo sumboliiyo Yason tukon mian mangangga mo bailonggonoo mebeal doy tambo. Sambuno lapa doiya maka sodo yanila inosodiikon.

Doi Belea

¹⁰Doi popookoo dopai mian-mianoo momangangga modaano doi kotadoo sumboliiyo Paulus tukon Silas ampakon doi Belea. Sambuno polong idoo, Paulus tukon Silas ampakono doi Yahudi miano nabonua kaleda. ¹¹Kopai mian doi Belea pololokon tobuka kopai noano kalu baino mian doi Tesalonika. Tukon sanaang kopai noano yanila molengele kobilita tentang Yesus, tukon samba-samba kooloyo yanila solidikiyo ko Kitab Moliyous sulano napo toiyo oilakai Paulus naotungguloo bisa. ¹²Badaang doi antala yanila mangangga doi Yesus, tukon aki natolongo soisik koidan kopai Yunani miano motalakamuka, mo manganggamo; mau kai boine tukon kai malane. ¹³Salataa ko Yahudi miano doi Tesalonika lengele baikon Paulus babilitakene koidan ko Mian Bisa nabantilan doi Belea, yanilakai lubat doi Belea tukon baloobu maka kubaiyo komian idoo tealimo susa. ¹⁴Mosobit-sobit koutus-utus doi Beleadoo antekene Paulus doi tobin bibilo, bai Silas tukon Timotius tataap dungol doi kotadoo. ¹⁵Sambuno antekene Paulus polong doi Atena, utus-utusoo abalimo doi Belea tukon babayo koteteba moluwedoi Paulus sulano Silas tukon Timotius napotunduwo yana mosobit-sobit.

Doi Atena

¹⁶Daano Paulus mototiliyo Silas tukon Timotius doi Atena, konoano susa mokitayo do kotadoo moonoo tukon pilogot-pilogot. ¹⁷Tobikon doiya doi bonua kaledaan, Paulus posoboli pikilan ko Yahudi miano tukon mian bailonggon komo sosubaiyo ko Mian Bisa idoo. Bunomo koidan doi labotan-labotan sasamba kooloyo yana posoboli pikilan tukon samba-samba komian komo daano idoo. ¹⁸Gulu-gulu alilan Epikulos tukon alilan Stoa ponggeleki koidan tukon yana. Moimoiya doi yanila bantile, “Naiya mian nia oila kona tinoi? Kona pandoiyan tolono soisik, bai yana tolono badaang kona silingan!” Moimoiya komian bailong koidan bantile, “Buno langge yana babilitakene tentang dewa-dewa bangsa bailong.” Yanila bantile bunoo doiya, sabab Paulus basalitakene tentang Yesus tukon tentang natuboan koidan doi namatean. ¹⁹Maka yanila babayo Paulus doi pososuungan doi Bungkuko Aleopagus. Indaa yanila bantile doi yana, “Kami yase toiyo kootunggul boolu komo

ikoo babilitakene. ²⁰Sabab ikoo kamukakene kolangge-langge molongol sosibong doi tolingaingami. Tobikon doiya kami yase toiyo komaanano.” (²¹Sabab sasaibino komian doi Atena tukon mian moluba-lubaton mo dungol idoo yase tuuno akabuse konapoo tembo balasanaangan sulano napo molongol tukon basalita doi langge-langge mo boolu.)

²²Doi ya singgat Paulus kokondong doi mian badaangoo salaano mo bakombul doi Aleopagusoo, Paulus bantile, “Eh, Atena miano! Yaku kitayo baikon doi sasaibino kolangge komuyu tutuu baagama. ²³Sabab salataa yaku mbambakon potikunggon doi pokota nia tukon palatikangene kotampat-tampat musambeangan, yaku kitayo koidan komeeng kotampat basosubakonan sosuba; doi tampatoo totulis, ‘Doi Mian Bisa Moaki Natingoni.’ Jadi ko Mian Bisa komuyu mososubaiyo bai aki potingoniiyo, yanamo komo yaku babilitakene doikoo. ²⁴Ko Mian Bisa mo tealikene naiya dunia nia tukon sasaibino koantoko, doiyamo Temeneno mokuasaiyo kotimbu tukon buta. Yana aki nadungol doi bonua bapilogotan banggapi mokubaiyo. ²⁵Yana koidan aki napalaluu potombonii doi banggapi, sabab yanamo komo beena tuboan tukon ansaangan tukon sasaibino kolangge doi banggapi. ²⁶Doi meeng kobanggapi yana kubaiyo sasaibino kobanggapi tukon sumboliiyo yanila modungoliyo doi posaapon kodunia. Yanamo koidan komo tantukene salataa doi tumbe, oila kotembono tukon inaando yanila moola tubo. ²⁷Mian Bisa lakukanggene doiya, sulano yanila naumboliiyo yana. Boli-boliisi yanila napososuung tukon yana doi tembo napo umbo-umboliiyano. Bai kona tutuuwan ko Mian Bisa aki naodoon doi kita suwe-suwele. ²⁸Pokakana komo mian nabinantil, ‘Kita tubo tukon palabiyok tukon daano doi dunia nia tobikon yana nakakuasaan.’ Buno koidan komo binantil doi moimoiya komu tolosulat. Yanila bantile,

‘Kita sasaibino daanoon napau-pau.’ ²⁹Nah, sabab kita daanoon Mian Bisa napau-pau, kita aki namoola pokakanakene ko Mian Bisa buno pokakana kopatung mokinubai doi emas kai pelak kai batu mo kinubai manulut banggapi napandoiyan. ³⁰Lounu nda bodoano, Mian Bisa lapamo toliminggene, bai budodoi ya yana sumboliiyo sasaibino komian doi posaapon kodunia nabadodoloon doi nalalim-lalim. ³¹Sabab yana lapamo

tantukene komeeng kotembo sulano naadiliyo komian sasaibino nai dunia nia tukon adil. Doiya tugasoo naikon linakukanggon doi meeng komian mo lapamo Mian Bisa piliyo tuuk doiya. Tukon sulano sasaibino komian anggayo, Mian Bisa lapamo otuboiyo koidan do mianoo doi namatean!”

³²Salataa dopai mianoo lengele tentang tuboan koidan sambuno lapa mate, daano doi yanila komo kokumbite Paulus. Daano koidan komo bantile, “Kami yase mondongolii Utus mobasilingan koidan manganai naiya langge nia.” ³³Maka Paulus otinggalemo do pototongianoo. ³⁴Bai daano doi yanila komo ala doi Paulus tukon mangangga doi Yesus, doi antalano: Dionisius, anggota majelis Aleopagus, tukon meeng koboine kosambuno Damalis, tukon moimoiya komian koidan.

Doi Kolintus

18 Lapamo doiya Paulus otinggalemo ko Atena tukon ampakono doi Kolintus. ²Idoo yana pososung komeeng ko Yahudi miano kosambuno Akwila, kona lipu luwean doi Pontus. Akwila sodo lubat doi Italia tukon naboloki Pliskila. Yanila lubat doi Kolintus sabab Tomundo Klaudius sumboliiyomo sasaibino ko Yahudi miano tobuat luwedo Loma. Paulus ampakon molubotiiyo yanila luaila, ³maka dungol idoo tukon yanila tukon balimang polaing-laing yanila, sabab konapo mangambalan pokakana tukon Paulus, doiyamo mongkubai sabu-sabuwa. ⁴Bai samba-samba kooloyo Tadean, Paulus ampakon basa-basalita doi bonua kaledaan sulano nakubaiyo ko Yahudi miano mau kai Yunani miano, naanggayo Yesus.

⁵Sambuno Silas tukon Timotius lubat doi Makedonia, Paulus gunakanggene sasaibino kona tembo sulano nabasalitakene kobilita moluwedo Mian Bisa doi Yahudi miano baikon Yesus doiyamo ko Tomundo Pasalamat Mian Bisa mo lapamo paladandikene. ⁶Bai tobikon komian banggadudul momeeng tantange tukon asalakene yana, maka Paulus tipase koambata doi napakean teali paloosan sulano ingotiikene yanila naikon kokasalaan yanila. Yana bantile, “Kalu komuyu silaka, musalamo susuumu! Yaku lapaasemo kolimanggu! Tambuun budodoiya yaku naikon ampakon doi mian mobolikon Yahudi.” ⁷Maka Paulus otinggalemo yanila tukon ampakon dungol doi bonua meeng mo pokopili do bonua kaledaanoo. Bonuadoo kotumbuno meeng komian mo bolikon Yahudi, bai yana

sosubaiyo ko Mian Bisa. Mianoo kosambuno Titius Yustus. ⁸Bai Klispus, do bonuadoo kaledaan kapalano tukon sasaibino kona bonua tumbuno mangangamo doi Yesus. Tukon badaang koidan ko Kolintus miano bailonggon momolongol kobilita Paulus mo pelengene, tukon yanila anggayo doi Yesus maka sinau.

⁹Daano kopopook meeng doi napokita lalomo, Yesus bantile doi Paulus, “Inaikai momatakut! Basilingan momeeng tukon inai motade. ¹⁰Sabab yaku lolainge ikoo. Akiyo komeeng komian momoola kubaiyo ikoo lokis, sabab badaango komian nai kota nia daano kai kumian.” ¹¹Tobikon doiya Paulus dungol doi Kolintus meeng kotaum sembeleng kolumbito tukon otunggulkene ko Mian Bisa nabantilan doi yanila.

¹²Salataa Galio teali gubelnul Akhaya, Yahudi miano pomeenggon molawane Paulus tukon babayo yana doi pangadilan. ¹³Yanila pelengene kona potuduhan nia, “Naiya mian nia pangaluiyo komian badaang sulano nasosubaiyo ko Mian Bisa tukon kokubai mo pototonggulung tukon Musa naatulan!”

¹⁴Bunomo doiya Paulus natimbiliyano, Galio lapamo bantile doi mian-mian Yahudi, “Eh Yahudi miano! Kalu komo linakukanggon nia meeng kokasalaan kai kulokisan, takainomo kona tutuuwan yaku sio kusabal mondongoliyo naiya mulapulan nia. ¹⁵Bai naiya daano ponggeelekian manganai bantil-bantilan tukon sambu-sambu tukon poatulan-atulan susuumuyu! Jadi komuyu komo sio poalapayo. Yaku aki kumongulus langgelange mobuno naiya!” ¹⁶Maka Galio siikayo yanila tobuat. ¹⁷Maka yanila lakoyo Sostenes, kapala bonua kaledadoo, tukon nanale yana doi meda bangulusan salaano. Bai Galio aki namapaduli naikon doiya langgedoo.

Paulus abali doi Antiokhia

¹⁸Sambuno lapa doiya Paulus daano modungol malumbit doi Kolintus. Doibundu yana bantile selamat tinggal doi mian-mian momangangga idoo, maka talabut tukon Pliskila maka Akwila doi Silia. Doi Kengklea, Paulus daluwo kona buuk mo lapamo batadikene teali bulusan sabab nakaul doi Temeneno. ¹⁹Salataa polong doi Efesus, Paulus otinggalemo Pliskila tukon Akwila,

maka usok doi bonua kaledaan tukon posoboli pikilan tukon Yahudi miano idoo. ²⁰Yanila kabiyo sulano yana nadungol lobian malumbit tukon yanila, bai yana aki nayase. ²¹Mau kai nabuno doiya, singgatoon naikon naluwean, yana bantile, “Kalu Mian Bisa pataikene, yaku abali koidan dimbaa.” Sambuno lapa bantile bunoo doiya, yana luwemo doi Efesus.

²²Salataa obulus doi Kaisalea, yana ampakon doi Yelusalem sulano namebee salam doi anggota-anggota jemaat idoo, maka banggadudul doi Antiokhia. ²³Sambuno dungol idoo moimoiya kolumbito, yana tauso koidan molubotiiyo kolipu Galatia tukon Fligia sulano naekeengele komian mangangga naiman.

Apolos doi Efesus tukon Kolintus

²⁴Daano bunoo doiya, lubato kai doi Efesus meeng ko Yahudi miano kotosuungan doi Aleksandelia, kosambuno Apolos. Yana pandoi basalita tukon toiyo tuuno ko Kitab Moliyous antoko, ²⁵tukon lapamo inotunggul sulano natoiiyo kootunggul tentang Yesus. Maka tukon samangat mo lobi-lobian yana mongotunggul tukon teliti tentang Yesus, maka nasodo Yohanes nabasauwan kona tinoi. ²⁶Tukon nabalanian Apolos atambuune kona basalitaan doi bonua kaledaan tukon doiya singgat Pliskila tukon Akwila molongol naotunggul, yanila babayo yana doi bonua. Indaa yanila otunggukene doi yana tukon tapaat tuuno koidan tentang ko Mian Bisa natetel sulano nasalamatene komian lolo doi Yesus. ²⁷Doibundu Apolos makisuutiyo moampakon doi Akhaya. Maka ko mian-mian mo mangangga Yesus doi Efesus motulis sulat doi utus-utus mo mangangga doi Akhaya sulano yanila natalimayo Apolos. Tukon tembo Apolos lubat doi Akhaya, kona batulungian tokita tuuno balaguna doi mian-mian tobikon Mian Bisa namaasi lapamo mangangga doi Yesus. ²⁸Sabab tukon nataanggaan tuuno, Apolos kalayo ko Yahudi miano doi pogaga-gagaiyan lalomo doi mian badaang salaano. Tukon yana bukutiikanggene tukon ayat-ayat doi Kitab Moliyous baikon Yesus kai ko Tomundo Pasalamat mo pinaladandikon.

Paulus doi Efesus

19 Daano Apolos modaanon doi Kolintus, Paulus daano ompokoniiyo kobabono doi lipudoo maka polong doi Efesus. Indaa yana pososuung tukon moimoiya komian mo lapamo anggayo doi Yesus. ²Yana mansadai doi yanila, “Kai

lapamo Utus-utus mantalima Mian Bisa Na Loh salataa komuyu anggayo doi Yesus?"

Yanila timbiliyo, "Akiyoon. Bai kami aki mai sidutu molongol baikon modaano ko Mian Bisa Na Loh."

³"Kalu buno doiya, tukon basauwan oilakai komuyu mosinau?" Paulus sadaikene.

"Tukon Yohanes nabasauwan," yanila timbiliyo. ⁴Maka Paulus bantile, "Yohanes mansau mian sulano naokitakene baikon dopai mianoo lapamo badodoloon doi napolalim-lalim. Bai daano mobuno doiya koidan Yohanes pailukene ko Islael miano baikon yanila sio naanggayo doi mianoo naikon mo lubat doibundu tukon doi yanadoo, doiyamo Yesus."

⁵Salataa yanila lengele doiya, yanila sinaumo luwedo Yesus sambuno. ⁶Tukon singgato Paulus abesemo kolimano doi yanila, Mian Bisa Na Loh kuasaiyomo yanila, maka yanila tambuuno mobasalita tukon silingan-silingan lalomo mo sosibong tukon pelengene kobilita moluwedo Mian Bisa. ⁷Koaito yanila sasaibino daano uga-ugaate songulo lua komian.

⁸Doi motoludoo kobituwon Paulus balanimo basalita bangga-dudul tukon doi mianoo doi bonua kaleda tukon ponggeleki yanila sulano namolakene yanila tentang bulaando ko Mian Bisa nabapalentaan pokakana ko Tomundo. ⁹Bai moimoiya doi antala do mianoo matikas konoano tukon aki nayase mangangga. Doi mianoo sasaibino mo pokombuli salaano yanila totulaiyo kootunggul manganai Mian Bisa natetel sulano nasalamatene kobanggapi mololo doi Yesus. Tobikon doiya Paulus otinggalemo yanila, maka ampakon tukon Yesus napololaing-pololaing doi Tilanus nasikolaan lalomo. Idoo sasamba kooloyo yana posadai potimbili tukon mian-mian. ¹⁰Yana lakukene doiya langgedoo banggadudul lua kotaum kona kalumbit polong sasaibino komian mo dungol doi plovinsi Asia, mau Yahudi miano mau kai doi bangsa bailong sasaibino molongol Yesus nabantilan.

Skewa napau-pau

¹¹Mian Bisa lakukene kokuasa mominasaindinggon mo bolikon langge luwedo Paulus. ¹²Kalu lenso kai toik poboot Paulus oako mo biasa pakeyo binabakon doi mian momasakit, konapoo sakit tangalin tukon kosetan naloh tobuat doi yanila.

¹³Daano komoimoiya kotalapu Yahudi miano ampakon doi yayaa, momosiika setan naloh-loh doi mian. Talapu-talapudoo soba-sobayo koidan mopakeyo Yesus sambuno sulano nasiikayo setannoo naloh-loh. Yanila bantile doi setan nalohdoo, “Luwe Yesus sambuno Paulus mo babilitakenedoo, yaku siikayo ikoo!”

¹⁴Meeng koimam kapalano daano kopitu kona pau malaneno, kosambuno Skewa, mo lakukene do langge-langgedoo mobuno doiya.

¹⁵Bai setannoo naloh bantile doi yanila, “Yaku tingoniiyo Yesus tukon mau Paulus yaku tingoniiyo, bai komuyu nia indee?”

¹⁶Maka do mianoo mo inusoki setan tobiil maka kakate yanila tukon ganasu tuuno polong yanila obuleng luwedoi bonuadoo tukon poko-pokolon tukon koidan talalau, sabab yanila napakean bineak doi yanila butongo. ¹⁷Sasaibino ko Yahudi miano tukon bangsa bailong mo dungol doi Efesus lengele tentang do kadadianoo, maka yanila teali matakut. Maka Yesus sambuno momeenggon ngginaa-nggaal. ¹⁸Badaang komian mo tealimo mangangga doi Yesus, lubat moakuiyo doi mian badaang salaano yanila nakokubai-kokubai doi lounu loolukon. ¹⁹Tukon yanila mo moola ampakonggene konamontoiyan gunaguna, yanila pototongikene konapo buku-buku tukon yanila suayo doi mian nabadaangan salaano. Do buku-bukudoo olinu kalu pinosuungikon sasaibino koolino uga-ugaatene lima kolono koloon kodoy pelak. ²⁰Bunomo doiya tukon caladoo mo hebat tuuno ko Temeneno nabantilan momeeng tasabukon tukon momeeng bukuan kona pangalu.

Nggalangabutan doi Efesus

²¹Lapamo kadadian-kadadianoo, Paulus tataapenemo sulano naampakon doi Makedonia tukon Akhaya maka nabanggadudul doi Yelusalem. “Salataa lapamo indaa,” Paulus bantile, “yaku ampakon doi Loma koidan.” ²²Maka yana mobintokon lua komian doi napotombonii-potombonii, doiyamo Timotius tukon Elastus sulano naampakon doi Makedonia, modaano yana modungol moimoiya kooloyo koidan doi plovinsi Asia.

²³Uga-ugaate doiya kosinggatoon kona tealian konggalangabutan mo babasal doi Efesus sabab otunggul manganai doi Yesus. ²⁴Sabab doi kotadoo daano komeeng kotukang pelak kosambuno Demetlius, mo mongkubai dewa-dewa nabonua

motuuk Dewi Altemis. Do mianoo nausaha lubatene kopandapatan mo babasal doi napolimang-polimangoo. ²⁵Tobikon doiya yana mokombul napolimang-polimang tukon posinggat-singgat polimang-polimang tukang pelak bailong, maka nabantile, “Utus-utus! Utus toiyo baikon kita malaat pandapatan doi limang nia. ²⁶Budodoiyo Utus lapamo kitayo tukon lengele susuungo oila Paulus nakinubaidoo. Yana bantile baikon dewa-dewa banggapi mo kubaiyo doiya takainomo bolikon dewa. Tukon yana lapamo malaat pandapatan mokubaiyo badaang komian mangangga naikon kona otunggul, bolikon tolongo naimba doi Efesus, bai kasikon posaapon kolipu Asia koidan. ²⁷Kobahano doiyamo baikon naiya ndalimangia naikon malaat sambu molokis. Tukon bolikon tolongo doiya, bai tukon Dewi Altemis nabonua koidan naikon inanggon akiyo kotakoso tukon kona babasalan tinudo-tudongii; bai kai yana dewi mo sinosubai doi sasaibino komian doi Asia tukon posaapon kodunia!”

²⁸Bunomo doiya dopai mianoo molengeledoo yanila noano tealimo moonas, maka yanila wowookon, “Tubo Altemis, dewi Efesus miano!” ²⁹Maka do nggabutanoo tebeason polong doi posaapon kokota-kota. Doibundu golombolan panggalanggabutoo lakoyo Gayus tukon Alistalkus, doiyamo Makedonia miano mo lainge Paulus doi naampakonon, maka keete yanila doi stadiun kotadoo. ³⁰Paulus yase usok lolainge yanila, bai komian mo anggayomo Yesus indaa pantane yana. ³¹Moimoiya kopamalenta mobabasal doi plovinsi Asiadoo, mo posobat tukon Paulus, mobintokon mian mopailukene doi Paulus sulano yana aki naokitakene kobutongo doi stadiunoo. ³²Daano mobuno doiya mian-mian mo pototongi doi stadiunoo lapamo tealimo nggabut. Daano komo nggele-nggeleamon buno naiya, daano komo nggeleamon buno doiya, sabab doi mian badaangoo badaang komo aki natoiyoo, oila kosababpo yanila pototongi idoo. ³³Kosoobos doi mianoo aanggene Aleksandel kona poondosuuk, sabab yanamo komo Yahudi miano dudunggene doi muka. Maka Aleksandel mebee paloosan tukon limano sulano namangkabi nabinee todanan nabelayo kobutongo doi mianoo salaano. ³⁴Bai bunoo doiya yanila kitayo baikon yana Yahudi miano, yanila posinggat mowookon kabukabukuan, “Tubo Altemis, dewi Efesus miano!”

³⁵Kona pupusan juluu tulis doi kotadoo moola amankanggene do mianoo mobadaang. Yana bantile, “Efesus tumbuno! Samba-

samba komian toiyo baikon Efesus kai kokota komo pialayo ko Dewi Altemis nabonua tukon batu moliyous mo otuwong luwedoi timbu. ³⁶Akiyo komeeng komian momoola bantayo do langgedoo. Tobikon doiya potademo tukon inai polakukene komeeng kolangge tukon ndia-ndia. ³⁷Naiya mian nia, komuyu babayo doi sumai bolikon yanila lapamo ndikuke kodewa nabonua kai tobikon yanila lapamo totulaiyo konda dewi. ³⁸Kalu Demetlius tukon dona polimang-polimango daano komeeng kona pangaduan moluwedoi meeng-meeng komian, tadikenemo yanila nababayo donapo ulusan doi pangadilan. Kopangadilan tobuka tuuk doiya tukon kopamalenta-pamalenta sidutu daano. ³⁹Bai kalu daano koidan komeeng kolangge mo bailong komo komuyu moyase, doiya sio nainalapa doi lapat umum mo sah. ⁴⁰Sabab oila komo teali oloyo nia moola silakaiyo kita. Kita moola nda tinudu mongkubai nggabutan, sabab kita akiyo komeeng konda alasan sulano nda obisakene naiya nggabutan nia.” ⁴¹Sambuno mobantile sasaibino doiya, do julu tulis kotadoo sumboliiyomo do mianoo mobadaang namule.

Paulus ampakon doi Makedonia tukon Yunani

20 Salataa kondondoongo doi Efesus tanaango koidan, Paulus kombule kojemaat tukon beena dolongan doi yanila. Doibundu yana mabantil kinatauhan dungolo maka yana banggadudulkene kona ampakan doi Makedonia. ²Yana duutiyo kolipu-lipu Makedonia tukon mebee badaang kootunggul motuuk doi mian mo mangangga doi Yesus indaa sulano namebee dolongan doi yanila. Doibundu yana ampakon doi Yunani. ³Tolu kobituwon kona kalumbit yana dungol indaa. Maka salataa yana daano mobato-batotobo talabut ampakon doi Silia, daano kobilita baikon ko Yahudi miano pomeenggon sulano naakateyo yana. Tobikon doiya yana putusemo sulano naabali lolo doi Makedonia. ⁴Sopatel Pilus napau mo luwedoi Belea ampakon polaing-laing yana; buno koidan Alistalkus tukon Sekundus Tesalonika miano, tukon Gayus Delbe miano. Koidan Timotius, Tikhikus tukon Tolofimus, mian moluwedoi Asia. ⁵Yanila lukoniyo kami maka totiiliyo kami doi Toloas. ⁶Sambuno lapa Lamekanano Loti Moakiyo ko Lagino, kami talabut tinggale ko Filipi. Sambuno lima kooloyo doibundu kami pokombuli koidan tukon yanila doi Toloas. Indaa kami dungol meeng kominggu.

Napupusan Paulus nadutiyano ko Toloas

⁷Minggu popook kami pototongi sulano kaan posinggat socala mondoutusan, Paulus basa-basalita tukon komian, sabab namodoakon yana bapikilo molengget. Polong pintanga kopopook Paulus banggadudul basalita. ⁸Doi kombiang babo lalomo, tempat mai pototonganoo, daano badaang koposi. ⁹Meeng kotabo kosambuno Eutikus osulang doi lolombong. Sabab Paulus aki natade-tade basilingan, do tabodoo tealimo pipiit tuuno polong yana tomboosokon doi lolombongoo, maka otuwong doi bilit luwedoi tingkat kotoluno. Tembo yanila nabingkatano, yana lapamo mate. ¹⁰Bai Paulus obulus doi bilit, maka lubanggene kobutongo doi tabodoo maka nalebeke. Paulus bantile, “Inai mokhawatil, yana daanoon motubo!” ¹¹Doibundu Paulus liba koidan doi babo, maka namongobos-obos loti tukon kaan posinggat-singgat. Sambuno lapa kona kalumbit mobasalita tukon do mianoo polong dowa-dowa, Paulus lenggeto. ¹²Komian badaang mobabaya mule do tabodoo tubo doi nabonua. Yanila lasayo sanaang tukon tohibul.

Doi Toloas ke Miletus

¹³Kami ampakon doi kapal maka talabut matailuk doi Asos sulano mai lobotiyo Paulus doi kapal idoo. Yana lapamo moatule buno doiya sabab yana naikon badombalaakon lolo bendal. ¹⁴Sambuno pososuung doi Asos, Paulus soisobiton liba doi kapal maka kami talabut ko Metilene. ¹⁵Luwe indaa kami talabut koidan, tukon modoakon polong doi tempat mo posasalaanggon tukon Khios. Lua kopopook kami polong doi Samos tukon modoakon koidan doi Miletus. ¹⁶Paulus lapamo tataapkanggene sulano naaki nasapu doi Efesus, sulano inai nasakukene kotembo doi lipu Asia. Yana yase tuuno moso-mosobit polong doi Yelusalem doi oloyono kolamean Pentakosta.

Paulus mabantil bantil-bantilan pobabandakonan doi Efesus

¹⁷Luwedoi Miletus Paulus makapatu teteba dombala Efesus sulano nakabiyo doi gulu jemaat indaa nalubat pososuung tukon yana. ¹⁸Sambuno yanila lubat, Paulus bantile doi yanila, “Utus-utus toiyo bulaando daku tuboan namalumbitan nia doi antala komuyu salataamo oloyo tumbeno yaku lubat doi Asia. ¹⁹Tukon

napependean konoanggu tukon namadaangan komatanggu paisuno, yaku balimang tuuk Temeneno doi sakisaawan tanga-tangano komo yaku toupiyo sabab tetel lokis doi Yahudi miano. ²⁰Utus toiyo baikon yaku aki kumata-matakut mobontiikene doi utus-utus oila komo balaguna doikoo. Yaku mongotunggul komuyu doi pososuungan-pososuungan mobadaang komian doi bonua-bonua. ²¹Mau doi Yahudi miano mau doi bangsa bailong yaku sidutu mebee poingotii sulano yanila badodoloon luwedoi yanila nalalim-lalim tukon lubat doi Mian Bisa, tukon namangangga doi Temeneno Yesus. ²²Diabudodoo sulano motaatiyo ko Mian Bisa Na Loh napalenta, yaku ampakon doi Yelusalem. Tukon yaku aki kutoiyo oilamo komo teali naikon doi yaku indaa. ²³Yaku tolongo toiyo baikon doi samba-samba kokota, ko Mian Bisa Na Loh lapamo tukon tegas mopailukene doi yaku, baikon yaku naikon inusokon doi talunggu, tukon naikon sakisaa. ²⁴Bai yaku aki kupopusinggon daku tuboan nia, asal yaku lapamo alapayo daku tugas nia Temeneno Yesus mo beekenemo doi yaku, tukon asal kusatia polong doi kutuboan napupusan tuuk basalitakanano ko Bilita Monondokoo tentang Mian Bisa namaasi.

²⁵Yaku lapamo lubotiiyo Utus-utus sasaibino tukon lapamo babilitakene koidan tentang bulaando ko Mian Bisa nabapalentaan mobuno Tomundo. Budodoiyo yaku piki-pikikene akimo naikon nda pososuung koidan tukon Utus-utus. ²⁶Tobikon doiya tukon tegas yaku bantile doikoo doi oloyo nia baikon kalu daano doi antala komuyu komo silaka naikon, doiya bolikono kusala. ²⁷Aki nabiasa yaku dampas luwedoi kulimang sulano kutalakanggene doi komuyu sasaibino ko Mian Bisa natetel. ²⁸Siokai komuyu podagaiyo kobutomuyu tukon pobadagai kai koidan sasaibino koanggota jemaat mo lapamo Mian Bisa Na Loh salakanggene doi komuyu sulano dinagai; sabab komuyu lapamo biningkat moteali padagai do anggota jemaatoo. Siokai komuyu podagaiyo ko Mian Bisadoo naanggota jemaat pokakana kopadagai domba, sabab ko Mian Bisa lapamo tealikene do anggota jemaatoo koonamo nalangge susuungo luwedoi napaudoo susuungo namatean. ²⁹Dokuampakonano, pasti naikon lubat koasulobo-asulobo mo balani doi komuyu tanga-tangano. Tukon komian komo komuyu


mo dagaiyodoo naikon tealimo do asulobo-asulobo nakinaan.
³⁰Bai luwedoi antala Utus-utus susuungo naikon sumbot komian mo basalitakene kobilita mo aki natalakana. Yanila kubaiyo buno doiya sulano komian mo lapamo mangangga doi Yesus nateali tapa tukon mololoi yanila. ³¹Tobikon doiya pobada-badagai! Neneeke baikon doi tolu kotaum kona kalumbit tukon badaang komatangu paisuno, oloyo popook yaku aki biasa tade mobangotunggul doi samba-samba komian doi komuyu.

³²Budodoi ya yaku salakangene komuyu doi Mian Bisa sulano yana komo pialayo komuyu tukon sulano komuyu pobataani doi bilita Mian Bisa namaasi. Ko Mian Bisa daano kona kuasa sulano naekeengele komuyu tukon mebee balakaat-balakaat mo lapamo sadiakene tuuk sasaibino kona mian. ³³Akiyoon nabiasa yaku momomooti doy kai pakean doi meeng komian. ³⁴Utus susuungo toiyo, baikon tukon bukunggu susuungu yaku balimang sulano nakoonoioy daku kapalaluan tukon tula-tulanggu mo malaing yaku. ³⁵Doi sasaibino kolangge yaku lapamo mebee sontoh doikoo baikon tukon balimang kakabukuan buno naiya kita sio nda tulungiyo komian mo aki nabukuan. Sabab kita sio nda neneeke naikon oilamo komo Yesus susuungo lapamo bantile, 'Lobian koanggano mebeean tukon doi mantalimaan.' "

³⁶Sambuno Paulus lapa basalita, yana ladanggene kotuulo tukon yanila sasaibino maka sambeang. ³⁷Yanila sasaibino kokiil maka lebeke Paulus tukon bantile, selamat jalan. ³⁸Yanila susa toloutama sabab Paulus bantile baikon yanila akimo napokitayo yana koidan. Maka yanila antekene polong doi kapal.

Paulus ampakon doi Yelusalem

21 Kami palamisi tukon gulu-gulu jemaat Efesusoo, doibundu otinggalemo yanila. Maka kami talabut banggadudul doi togong Kos; tukon modoakon kami polong doi togong Lodos. Luwe idoo kami talabut banggadudul doi pakala balabuanno. ²Doi Patala kami pososunggene kokapal komo yase doi Fenesia. Maka kami lakit doi kapaloo tukon kami luwemo ³tukon talabut polong kami kitayo kotogong Siplus doi bobonggami taalikon; bai kami talabut banggadudul konoikene ko Silia. Kami ampakon lolo tano doi Tilus, sabab idoo do kapaloo mai lakitan daano mobangobuluson muatan. ⁴Doi tampatoo kami ampakon lubotiiyo komian mo



Kota Tilus (21:3)

anggayo Yesus, maka dungol tukon yanila meeng kominggu kona kalumbit. Luwedoi Mian Bisa Na Loh napobontiikon yanila otunggule Paulus sulano naaki naampakon doi Yelusalem. ⁵Bai salataa kabus kotembono motuuk komai dungolan idoo, kami otinggalemo yanila tukon banggadudulkenemo komai ampakonon. Yanila sasaibino polaing-laing tukon napai boloki maka nalabuk yanila antekene kami polong doi kota tonggulungo. Indaa doi tobun bibilo, kami sasaibino osulang maka sambeang. ⁶Lapa doiya kami pokanggi lima paumeng tukon paumeng, maka kami lakito doi kapal tukon yanila koidan mulemo doi napoo bonua.

⁷Kami talabut banggadudul luwedoi Tilus polong doi Ptolemis. Indaa kami ampakon lubotiiyo koutus-utus mo mangangga, sulano mebee kinatauwan doi yanila, tukon dungol meeng kooloyo doi yanila. ⁸Modoakon kami luwemo koidan, maka polong doi Kaisalea. Idoe kami ampakon doi gulu injil kosambuno Filipus, maka dungol doi nabonua. Yana daano meeng komian doi pituiladoo mo pinili doi Yelusalem. ⁹Sangkap kona pau boine lapamo Mian Bisa beena kosanggupan sulano babilitakene kobilita moluwedoi Mian Bisa. ¹⁰Sambuno moimoiya kooloyo kami indaa lubat luwedoi Yudea komeeng

konabi kosambuno Agabus. ¹¹Yana lubat doi kami maka naalayo Paulus napabaan oako. Tukon do pokoot oakodoo yana keete koaino tukon limano susuungo maka nabantile, “Naiyamo ko Mian Bisa Na Loh nabinantil: Kotumbuno naiya pabaan nia oako naikon kinoot pokakana naiya doi Yelusalem doi Yahudi miano, tukon sinalakanggon doi mian mobolikon Yahudi.”

¹²Salataa kami ndongoliiyo doiya, kami tukon sasaibino koutus mo dungol doi Kaisaleadoo kabiyo tutuuno doi Paulus sulano yana inai naampakon doi Yelusalem. ¹³Bai yana timbiliyo, “Oila kona totuuk Utus mokokiil bunu naiya sampe kubaiyo konoanggu nia teali susa? Yaku lapamo basadia bolikon tolongo sulano kulinako indaa, bai koidan mau kai kumate tobikon Yesus.” ¹⁴Paulus aki nayase lengele kami, maka kami tade mopantane yana. “Sodiiyomo baino Temeneno namongiasan komo teali,” komai bantilano.

¹⁵Sambuno dungol idoo moimoiya kooloyo, kami tulolosiyo-mo komai lolonggu, maka kami taus doi Yelusalem. ¹⁶Moimoiya koutus luwedo Kaisalea moampakon koidan polaing-laing tukon kami sulano napo antekene kami doi Manason nabonua, sabab doi nabonua komai mooloan. (Manason daano meeng ko Siplus miano mo malumbito kona tealian Yesus napololaing.)

Paulus lubotiiyo Yakobus

¹⁷Sambuno kami polong doi Yelusalem, utus-utus idoo talimayo kami tukon sanaang kopai noano. ¹⁸Modoakon Paulus ampakon polaing-laing kami molubotiiyo Yakobus; sasaibino kogulu-gulu jemaat daano idoo koidan. ¹⁹Sambuno lapa bangadat doi yanila, Paulus basalitakene doi yanila sasaibino kolangge mo lapamo Mian Bisa kubaiyo mololoi doi yana doi antala mian mobolikon Yahudi. ²⁰Sambuno lapa molongol Paulus nasalitadoo, yanila sasaibino nggaale ko Mian Bisa. Doibundu yanila bantile doi Paulus, “Utus Paulus! Utus sio mutoiyo baikon daanomo doi libu-libuso ko Yahudi miano mo manganggamo doi Yesus. Yanila sasaibino mian-mian mo tulutulutan taatiyo Musa naatulan. ²¹Tukon budodoiya yanila ndongoliiyo baikon Utus otunggule sasaibino ko Yahudi miano komo dungol doi antala bangsa bailong, sulano nalapaase Musa naatulan. Utus otunggule yanila naaki napo sunate kona pau-

pau kai loloiyo koadat-adat Yahudi. ²²Budodoiya ko Yahudi miano mo lapamo manganggadoo tantu naikon lengele baikon Utus modaanomo dimbaa. Jadi, budodoiya bulaandomo? ²³Kona monondokan tulutiyomo komai otunggul. Daano kosangkap komian naimbaa lapamo mongkubai toon doi Temeneno. ²⁴Ah, siokai Utus muampakon mongkubai acala bakiliyousian butong posinggat-singgat tukon yanila, tukon tanggunge yanila naonggos sulano yanila nabuuk moola dinalulu. Tukon nabuno doiya naikon totingonii doi sasaibino komian baikon oila kona pai linongol tentang Utus aki nabisa, sabab Utus susuungo ampakonggene Musa naatulan. ²⁵Bai manganai mian mo bolikon Yahudi mo manganggamo doi Yesus, kami lapamo makapatu sulat doi yanila tentang komai kaputusan baikon yanila aki namoola kaane kokinaan mo lapamo sinosubakon doi pilogot, aki namoola kaane kosau, kai kaane koyayon sailo motokoot mate, tukon aki namoola mongkubai kokubai-kokubai mo lokis.”

²⁶Maka Paulus ampakon tukon do mianoo mosangkap maka mongkubai upacala bakiliyousian butong posinggat-singgat tukon yanila doi namodoakanan kooloyo. Doibundu yanila usok doi Temeneno Nabonua sulano nabotiikene moiya kooloyo koidan maka nasodo do upacala bakiliyousianoo nalapa tukon sosuba motuuk doi yanila suwe-suwele nasinosubakon.

Paulus linako doi Temeneno Nabonua

²⁷Salataa do tembodoo mopitu kokinobianoo adukono pupus, daano komoimoiya ko Yahudi miano moluwedoi Asia kitayo Paulus doi Temeneno Nabonua lalomo. Maka yanila baloobukene doi mianoo madaang, doibundu taaniyo Paulus, ²⁸maka wowookon, “Eh Israel miano, tulung! Naiyamo komiano mo ampakon doi yayaa momongotunggul doi sasaibino komian kootunggul-otunggul mo tantaange ko Israel miano, tantaange Musa naatulan tukon tantaange naiya Temeneno nia Nabonua. Tukon budodoiya yana tolongo babayo komian mobolikon Yahudi miano sulano nausok doi Temeneno Nabonua lalomo, tukon kubaiyo manggilit naiya tampatia mo moliyous!” (²⁹Yanila bantile bunu doiya sabab yanila lapamo kitayo Tolofimus Efesus

mianodoo doi kota polaing-laing Paulus; tukon yanila aanggene Paulus lapamo babayo yana doi Temeneno Nabonua lalomo.)

³⁰Posaapon kota teali nggalanggabut, tukon sasaibino komian obu-obuleng pototongi. Yanila lakoyo Paulus tukon tandane yana tinobuatonggon doi Temeneno Nabonua. Tembodoo doiya koidan Temeneno Nabonua tataapono tinutupo. ³¹Daano do bito-bitodoo mokakaate akateyo Paulus, daanomo komian mobantikene doi suludadudoo Loma kapalano baikon posaapon komian doi Yelusalem daano monggalanggabut. ³²Tuluus do suludadudoo kapalano mangala bubulaa kopolwila tukon suludadu maka moso-mosobit ampakon tukon yanila doi tampatoo monggalanggabut. Salataa do mianoo badaang kitayo do komandaano tukon napasukan, yanila tademo mononoliyo Paulus. ³³Suludadudoo kapalano ampakon doi Paulus maka nalakoyo, tukon sumboliiyo komian makeete yana. Doibundu do suludadudoo kapalano mansadaikene manganai indee doi Paulusoo tukon oila komo lapamo lakukanggene. ³⁴Kosoobos doi mianoo badaang timbiliyo bunu naiya tukon kosoobos koidan timbiliyo bunu doiya. Kaadaan bunu doiya monggabut tobikon do suludadudoo kapalano aki namoola toiyo oila kona tutuuwan komo lapamo teali. Tobikon sabab doiya yana mapalentakenemo mian sulano Paulus nabinaba doi malkas. ³⁵Salataa yanila babayo yana polong doi tukal, do bito-bitodoo mbuolo tuuno tobikon Paulus sio sasaibino kosuludadu napotombonikene. ³⁶Yanila tinuudukon doibundu doi golombolan bito-bitodoo komo wowookon, "Akateyo yana!"

Paulus belayo kobutongo

³⁷Sambuno adukon usok doi malkas lalomo, Paulus bantile doi suludadudoo kapalano, "Moola kai yaku basilingan naapa doiya tukon Tuan?"

"Oila ikoo moola basilingan Yunani?" suludadudoo kapalano sadaiyo. ³⁸"Kalu bunu doiya, ikoo bolikon do Mesiloo miano komo buunia mokubaiyo kopo lobosian maka babayo obulenggene kosangkap koloon komian monggabut tukon makanggi sinapan usok doi padang lalomo?"

³⁹Paulus timbiliyo, “Yaku Yahudi miano; yaku penduduk doi kota Talsus, kota mo tololongol doi Kilikia. Tolong izinkangene yaku mobasilingan doi mianoo.”

⁴⁰Maka sambuno Paulus binee izin mobasalita, Paulus kokondong doi tukal, maka mebee tanda tukon limano. Sasaibino komian teali tenang. Doibundu Paulus basalita doi yanila tukon silingan Iblani. Paulus bantile,

22 “Tama-tama tukon Utus-utus sasaibino! Yaku lolu-kene daku belaano kobutonggu doi komuyu. Soba polengele!” ²Salataa yanila lengele Paulus mobasilingan tukon silingan Iblani, yanila pololokon tenang koidan. Maka Paulus banggadudulkenemo kona katalangan. ³“Yaku Yahudi miano,” Paulus bantile, “yaku sinuung doi Talsus doi kabupaten Kilikia, bai yaku babasal doi Yelusalem nia tukon yaku inotunggul mono-monondok doi meeng kogulu babasal Gamaliel doi atulan lalomo komo Musa mo beekene doi tumbungita. Buno pokakana Utus-utus sasaibino naimbaa doi oloyo nia, mau yaku tutuu giat tuuk doi Mian Bisa. ⁴Yaku sakisaayo polong mate do pololaing-pololaingoo otunggul booludoo. Yanila sasaibino, mau mala-malane mau boi-boine, yaku lakoyo tukon usekene doi talunggu lalomo. ⁵Imam babasal susuungo tukon sasaibino komo Pangadilan Agama moola mebee kasaksian baikon yaku aki kukala-kala. Sabab yanilamodoo komo beena yaku sulat pangantokon mo inotuuk doi Yahudi miano doi Damsyik. Tukon do sulatoo yaku moola momalako indaa komian mo mangangga doi otungguloo, tukon babayo yanila doi Yelusalem sulano nainukum.”

Paulus basalitakene kona pangalaman

(Kis. L. 9:1-19, 26:12-18)

⁶“Tempodoo yaku daano doi loloon tanga doi kuampakonan tukon adukono polong doi Damsyik, pas suun kooloyo, daano komeeng kolangge laango mo madialan tuuno sosinggoton momotontilang luwedoi timbu potikunggon yaku. ⁷Yaku tolubang doi buta maka yaku lengele komeeng koalalo mobantile doi yaku, ‘Saulus, Saulus! Bulaando ikoo mosakisaayo yaku?’ ⁸Maka yaku mansadai, ‘Indee miano ikoo, Tuan?’ ‘Yakumo Yesus Nasalet mianodoo ikoo mo sakisaayo,’ kona potimbili.

⁹Kopai mian mo daano idoo mopolaing-laing yaku yanila kitayo do langgedoo laango, bai yanila aki nalengele doalaloo mo bantil-bantil doi yaku. ¹⁰Maka yaku mansadai koidan, 'Yaku sio kumongkubai oila, Yesus?' Yesus timbiliyo, 'Banguno tukon ampakono usok doi Damsyik. Indaa maka nasodo ikoo naikon mubinontiikon mangana sasaibino komo Mian Bisa nainiyas mukubaiyo.' ¹¹Yaku teali piit sabab do langgedoo laango monggalunge komatanggu. Jadi kotula-tulanggu taaniyo yaku usok doi Damsyik.

¹²Idoo daano komeeng komian kosambuno Ananias. Yana meeng komian mo mangangga tukon taat moambakonggene Musa naatulan. Sasaibino ko Yahudi miano mo dungol doi Damsyik anggayo tuuno yana. ¹³Yana lubat mokitayo yaku, maka kokondong doi lisukonggu taalikon tukon bantile, 'Utus Saulus, siokai ikoo mumokita koidan!' Tembodoo doiya koidan yaku bangune koolunggu, maka yaku kitayo yana. ¹⁴Doibundu yana bantile doi yaku, 'Ko Mian Bisa tumbunggita lapamo piliyo ikoo sulano mutoiyo kona mongiasan, tukon mokita Yesus, Mian Bisa na Ata mo kubaiyo ko Mian Bisa namongiasan tukon lengele Yesus alalo susuungo. ¹⁵Ikoo naikon teali sakisii tuuk babilitakanano doi sasaibino komian oila komo lapamo ikoo kitayo tukon lengele. ¹⁶Budodoiyo inaimo koidan mototiili malu-malumbit. Banguno, tukon beekenemo kobutomu nasinau. Uwang doi Temeneno sulano ikoo muinosodii doi mulalim-lalim.' "

Mian Bisa sumboliiyo Paulus nabangotunggul doi mian bailong mo bolikon Yahudi

¹⁷"Yaku abali doi Yelusalem, tukon salataa yaku daano mosambeang doi Temeneno Nabonua, yaku kinuasaimo Mian Bisa Na Loh. ¹⁸Yaku kitayo ko Temeneno; yana bantile doi yaku, 'Mosobit tinggale ko Yelusalem, sabab komian naimbaa aki naikon natalimayo komu kasaksian tentang yaku.' ¹⁹Yaku bantile, 'Yesus, yanila toiyo tuuno baikon yaku lapamo usokiyo kobonua-bonua kaleda sulano kulakoyo yanila tukon nanale komian mo mangangga doikoo. ²⁰Bunomo doiya koidan salataa komu sakisii Stepanus nainakatean, yaku susuunggu daano idoo tukon setujuiyo do mangakateanoo. Tukon yakumo komo

dagaiyo ko mian-mian mo akateyo yana napakean.’ ²¹Bai ko Temeneno bantile koidan doi yaku, ‘Ampakono, sabab yaku naikon bintekene ikoo doi tampat mo odoon doi mian mobolikon Yahudi.’ ”

²²Domianoo daano mobanggadudul mondongolii Paulus mobasalita, bai doi nabantilan bindunodoo yanila wookon kakabukuan, “Akateyomo kai komian mo bunu koiya. Yana akimo napatas natubo!” ²³Doi napowookonan yanila tipasene konapo jubah, tukon koambata kobung doi dapang. ²⁴Maka do suludadu Lomadoo kapalano sumboliiyo Paulus nabinaba doi malkas sulano yana napinalesa idoo tukon kakalasan sulano natinoi oila kosababpo ko Yahudi miano mowookon bunu doiya motuuk doi yana. ²⁵Bai doi tembo Paulus lapamo binoboi sulano nainumbas, Paulus bantile doi pelwila mo kokondong idoo, “Oilakai minoolakon nainumbas komian batomundoan Loma kalu akiyon yana napinalesa?”

²⁶Linongol doiya, pelwiladoo ampakono doi suludadudoo kapalano tukon bantilan, “Oila naiya komo naikon Tama lakukanggene? Naiya mian nia walga negala Loma!”

²⁷Maka do suludadudoo kapalano ampakon doi Paulus tukon sadaiyo, “Soba pailukanaku, oilakai ikoo walga negala Loma!”

“Oode,” Paulus bantile, “yaku walga negala Loma.”

²⁸Suludadudoo kapalano bantile koidan, “Yaku teali walga negala Loma tukon mebeal badaang tuuno!”

Paulus timbiliyo, “Bai yaku sinuung salaku walga negala Loma.” ²⁹Tembodoo doiya koidan anggota-anggota suludadu mo yase palesayo Paulusoo, saakon tukon do suludadudoo kapalano teali matakut sabab yana lapamo keete Paulus, banggokai Paulus walga negala Loma.

Paulus doi Pangadilan Agama salaano

³⁰Suludadu Lomadoo kapalano yase tuuno motoiyo oila kona tutuuwan komo mangaanikene ko Yahudi miano moasalakene Paulus. Tobikon doiya modoakon yana uange koimam-imam kapalano tukon mobabasakene koagama Yahudi sulano napototongi. Maka Paulus liniato doi nakinootan, doibundu binaba mangadap doi yanila sasaibino.

23 Paulus sumboliyo dopai anggota-anggotadoo pangadilan agama maka nabantile, “Utus-utusonggu! Polong doi oloyo nia yaku aki kulasaiyo mosala doi Mian Bisa doi noanggu lalomo manganai daku tuboan.” ²Sambuno Paulus bantile bunu doiya, Imam Babasal Ananias mobintokon mian komo kokondong doi Paulus lisuko taalikon motapiyo Paulus babano. ³Maka Paulus bantile doi imam babasalo, “Mian Bisa pasti tapiyo ikoo, mian mo kakadukon moliyous! Ikoo osulang indokon palesayo yaku manulut Musa naatulan, padahal ikoo susuumu lumbaiyo do atulanoo tukon mobintokon mian motapiyo yaku!”

⁴Dopai mian badaangoo doi Paulus lisuko taikon bantile doi Paulus, “Ikoo totulaiyo ko Mian Bisa naimam babasal!” ⁵Paulus timbiliyo, “Oh, yaku aki kutoiyo, Utus-utus, baikon yana imam mobabasal. Takainomo doi Kitab Moliyous lalomo daano mototulis, ‘Inaikai ikoo mototulaiyo komo katuaiyo mubangsa.’”

⁶Paulus kitayo baikon kosoobos dopai anggota-anggota pangadilan agamadoo daano ko Saduki miano tukon kosongobos koidan daano ko Falisi miano. Tobikon doiya yana bantile doi pangadilan agamadoo, “Utus-utus! Yaku meeng ko Falisi miano, katulunan Falisi. Yaku pinalesa dimbaa sabab yaku anggayo baikon komian mate naikon tubo koidan.” ⁷Salataa yana bantile bunu doiya, dopai Falisi miano tukon Saduki miano yanila mulaimo ponggeeleki, sampe do lapatoo nggabut teali lua kotambuno. (⁸Sabab ko Saduki miano pikikene baikon komian momate akimo natubo koidan, sabab komalaekat akiyo, tukon koloh-loh koidan akiyo; bai ko Falisi miano anggayo naikon kona daanoan sasaibinodoo.) ⁹Maka sumbuto koponggeelekian mo hebat tuuno. Moimoiya ko Falisi miano mo teali gulu agama kokondong tukon tantaange tutuu. Yanila bantile, “Manulut koonggami naiya mian nia akiyo kona sala mau nabaino soisik! Ugaate daano koloh kai malaekat mo basilingan doi yana!”

¹⁰Ponggeelekianoo teali hebat sampe do suludadudoo kapalano matakut inai-inaikene Paulus naikon yanila kemele. Jadi yana sumboliyo kona pasukan ampakon ndokiiyo Paulus

doi mianoo mobadaang tanga-tangano tukon babayo yana doi malkas.

¹¹Modoakon popook koidan Yesus kokondong doi Paulus bibilo tukon bantile, “Ekeenggele konoamu! Ikoo lapamo mebee komu kasaksian manganai yaku doi Yelusalem. Ikoo sio mumebee do kasaksianoo doi Loma koidan.”

Pomeenggonan sulano Paulus nainakate

¹²Modoakon dowa-dowa, ko Yahudi miano mulaimo mongkubai pomeenggonan. Yanila batotopi aki nakaan kai monginum paisu kalu yanila akiyoon napoo akateyo Paulus. ¹³Daano molobian sangkap kolono komian mo mongkubai do pomeenggonanoo. ¹⁴Yanila ampakon doi imam-imam kapalano tukon katua-katua Yahudi maka bantile, “Kami lapamo batotopi posinggat-singgat, aki naikon mai kaan kai monginum oioila kalu kami akiyoon mai akateyo Paulus. ¹⁵Jadi, budodoiya Utus-utus tukon anggota-anggota Pangadilan Agama siokai pomakapatu sulat motuuk doi suludadudoo Loma kapalano sulano pokabiyo yana nababayo Paulus koidan namangadap doi komuyu, nai-naikon komuyu yase palesayo koidan kona palakala tukon lobian teliti. Tukon kami naikon siap sulano moakateyo yana mau naakiyoon yana napolong naimbaa.”

¹⁶Bai Paulus utuso boine napau lengele do tetel napomeenggonanoo. Maka yana ampakon doi malkas tukon pailukene doiya langgedoo doi Paulus. ¹⁷Paulus maka uange komeeng kopolwila tukon bantile doi yana, “Babayomo naiya pau nia doi suludadudoo kapalano; yana yase lapolkanggene komeeng kolangge doi yana.” ¹⁸Polwiladoo babayo do paudoo doi suludadudoo kapalano tukon bantile, “Paulus domo tinaanoo, uange yaku tukon kabiyo doi yaku sulano kubabayo napau nia doi Tama; yana yase lapolkanggene komeeng kolangge.”

¹⁹Suludadudoo kapalano taaniyo do paudoo limano, maka babayo dopaudoo susuungo doi sembeleng maka sadaiyo, “Ikoo yase momapailukon oila doi yaku?”

²⁰Do paudoo timbiliyo, “Yahudi miano lapamo pomeenggon sulano kabiyo Tuan nababayo Paulus mangadap doi Pangadilan Agama namodowa, nai-naikon yanila yase palesayo koidan kona ulusan tukon lobian teliti. ²¹Bai Tuan inaikai motulutikene doi yanila nakakabidoo, sabab daano molobian sangkap kolono komian komo basookon sulano nalakoyo yana doi

loloon. Yanila sasaibino lapamo batotopi aki naikon nakaan tukon monginum paisu kalu yanila akiyoon napo akateyo Paulus. Budodoiya kai yanila lapamo basadia; baino mototiili Tuan napotimbili doi yanila.”²² Suludadudoo kapalano bantile, “Inai mobontiikene mau doi inde-indee komiano baikon ikoo molapamo lapolkanggene nia doi yaku.” Maka yana sumboliiyomo do paudoo namule.

Paulus kinapatu doi Feliks

²³Doibundu do suludadudoo kapalano monguang lua komian kopolwila, maka yana bantile doi yanila, “Sadiyayomo kolua kosakato kosuludadu polaing kopitu kolono kosuludadu molakit adalan tukon lua kosakato kosuludadu momangkanggi kalait sulano napo taus batong sio doi popokia nia koidan doi Kaisalea. ²⁴Masadiakene koidan adalan sulano Paulus nalokitiyo tukon pobabayo yana tukon selamat polong doi Gubelnul Feliks.”²⁵ Maka suludadudoo kapalano motulis surat kona bantilano buno naiya,

²⁶“Komo Mulia Gubelnul Feliks. Salam moluwedoi Klaudius Lisias! ²⁷Naiya mian nia lapamo linako doi Yahudi miano tukon adukono yanila akateyo, kalu yaku aki kulubat tukon kupasukan tukon moasalamatene yana; sabab yaku lengele baikon yana walga negala Loma. ²⁸Sabab yaku yase toiyono kona bisa-bisaan kokasalaan komo yanila motudukanggene doi yana, maka yaku babayo yana doi Pangadilan Agama. ²⁹Tokita yana aki namongkubai mau nabaino meeng kolangge komo pantas nainukum tukon ukuman mate kai natinalunggu. Tuduhan yanila doi yana tongo napotaamian tukon atulan-atulan agama yanila susuungo. ³⁰Doibundu yaku pinailukonggon baikon daano kotetel lokis moluwedoi Yahudi miano motuuk doi yana. Jadi banggadudul yaku kapatuwo yana doi Tuan Gubelnul. Tukon yaku lapamo sumboliiyo kapala ponuduhno babayo yanila napangaduan motuuk doi yana doi Tuan.”

³¹Maka dopai anggota-anggota suludadudoo ampakonggenemo yanila natugas. Yanila alayo Paulus maka babayo yana do popookoo polong doi Antipatlis. ³²Modoakon yanila batadikenemo kopasukan molakit adalan banggadudulkene kona ampakonan tukon Paulus, tukon yanila susuungo abalimo doi malkas. ³³Salataa pasukan molakit adalanoo polong doi Kaisalea, yanila pelengene do suratoo doi gubelnul, maka yanila

salakangene Paulus doi yana. ³⁴Sambuno lapa do gubelnuloo mobasayo do sulatoo, yana sadaiyo doi Paulus inaando kona luwean. Salataa yana toiyo baikon Paulus kona luwean doi Kilikia, ³⁵yana bantile “Mondoko! Yaku naikon palesayo komu ulusan, kalu naikon komian komo kalaakene ikoo lapamo lubat naimbaa.” Maka yana mapalentakene sulano Paulus natinaan doi Helodes nabatomundoan lalomo.

Yahudi miano kalaakene Paulus

24 Lima kooloyo doibundu, Imam Babasal Ananias tukon katua-katua Yahudi ampakon doi Kaisalea polaing tukon meeng kopangacala kosambuno Teltulus. Yanila mangadap doi Gubelnul Feliks tukon lolukengene yanila napangaduan motuuk doi Paulus. ²Salataa Teltulus inuang doi muka, yana tuduwo Paulus bunu naiya,

“Tuan Gubelnul Mo Mulia! Doi Tuan nataaniyano kami komai lipu aman. Tukon luwe Tuan napandoiyan lapamo badaang kopalabaikan komo linaksanakanggon motuuk doi mai bangsa. ³Sasaibino doiya kami talimayo momeenggon tukon mopolonggon kinatauwon tukon pongodotiiian mo lobi-lobian doi yaandomo kai koidan. ⁴Bai sulano inai natangaison badaang Tuan natembo, yaku kabiyo sanaang nalengele komai pangaduan nia mo palus. ⁵Kami laate naiya mian nia panggallengabut mo bahaya. Doi yayaandomo yana osumbetene konggallengabutan doi antala Yahudi miano tukon yana teali kapalano kogelakan Nasalet miano. ⁶Yana lapamo mosobae mokubaiyo manggilit ko Temeneno Nabonua. Bai kami lakoyo yana. [Kami makisuutiyo mopalesayo yana manulut mai agama naatulan susuungo. ⁷Bai suludadudoo kapalano Lisias leleiyo Paulus doi kami, ⁸tukon palentayo sulano indee komo kalaakene yana namangadap doi Tuan.] Kalu Tuan palesayo naiya mian nia, Tuan susuungo naikon ndongoliyo luwedo doi yana kokobenalan moluwedo sasaibino komo kami mo adukangene nia motuuk doi yana.” ⁹Ko Yahudi miano komo idoo koidan talalaing motuduwo Paulus tukon obisakene sasaibino komo doi Teltulus nabinantil.

Paulus belayo kobutongo doi Feliks salaano

¹⁰Maka gubelnuloo beena tanda doi Paulus baikon yana moola mobasilangan. Maka Paulus bantile, “Yaku toiyo Tuan lapamo teali hakim nai lipu nia doi taum-taum kolumbito.

Doiya kosababpo yaku lasayo sanaang mololukenggene daku pembelaan nia doi Tuan salaano. ¹¹Tuan moola solodikiyo susuungo baikon aki nalobian doi mo songulodoo lua kooloyo mo lapa yaku ampakon sambeang doi Yelusalem. ¹²Tukon aki nabiasa ko Yahudi mian-miano laate yaku moponggeeleki tukon meeng kai komian kai mopototongikene komian sulano namongkubai nggalanggabutan mau doi Temeneno Nabonua mau kai doi bonua-bonua kaleda lalomo kai doi yayaamo tolong doi kota lalomo. ¹³Yanila kai aki namoola bukutiikanggene konapoo tuduhan-tuduhan komo yanila mo pelenggene doi Tuan motuuk doi yaku. ¹⁴Takainomo yaku sio kuakuiyo doi Tuan baikon yaku sosubaiyo ko Mian Bisa tumbunggami manulut Yesus naotunggul komo yanila aanggene sala. Bai yaku daano moanggayo naikon sasaibino komo totulis doi Musa na Buku lalomo tukon Nabi-nabi na Buku. ¹⁵Buno pokakana yanila, yaku koidan daano daku moinian doi Mian Bisa baikon sasaibino komian naikon tubo koidan sambuno lapa mate – mian-mian momonondok, mau kai mian lokis! ¹⁶Doiyamo kosababpo yaku sidutu kakaate mono-monondok, sulano konoanggu lalomo nabilisii motuuk doi Mian Bisa tukon bilisii motuuk doi banggapi.

¹⁷Salataa moimoiya kotaum akimo kudungol doi Yelusalem, yaku abalimo indaa sulano kubabayo kobantuan doy doi kubangsa tukon sulano mososubakon sosuba doi Mian Bisa. ¹⁸Doiya kosinggato yaku daano molakukene doiya, yanila pososuungene yaku doi Temeneno Nabonua, sambuno lapa yaku alapayo daku acala bakiliyousan butong. Akiyo komian mobadaang mopolaing yaku, tukon akiyo koidan konggabutan idoo doiya kosinggatoodo. ¹⁹Tolongo daano komoimoiya ko Yahudi miano indaa molubat doi plovinsi Asia. Yanilamo kai komo siokai nadaano naimbaa sulano napelenggene yanila napangaduan doi Tuan, kalu yanila daano komeeng kolangge kona popangaduan motuuk doi yaku. ²⁰Kai batadikenemo naiya mian nia susuungo komo lolukenggene kolokisan oilamo yanila napai linaat doi yaku salataa yaku sinasalaanikon doi Pangadilan Agama. ²¹Yanila nalinaat tolono naiya bantilan nia tolong komo yaku bantile doi yanila salaano, doiyamo bantilan: Yaku

pinalesa oloyo nia sabab yaku anggayo baikon komian momate naikon inotuboi koidan.”

²²Maka Feliks mo lapamo motoi badaang tentang Yesus naotunggul, opupusemo do lapat palakaladoo. “Yaku naikon putusemo naiya ulusan nia,” kona bantilano, “kalu suludadudoo kapalano Lisias lapamo lubat.” ²³Maka yana mapalentakene kopolwila komo balatanggung jawab doi Paulusoo sulano natataap taane Paulus, bai tukon beena soisik kabebasan doi yana tukon napinataikon kotula-tulano nabeena oilamo Paulus nainiyas.

Paulus doi Feliks tukon Dulusila salaano

²⁴Bula-bulaa kooloyo doibundu Feliks lubat, linubotii naboloki kosambuno Dulusila; yana meeng ko Yahudi miano. Maka Feliks mosumbolii mian mondokiiyo Paulus, doibundu Feliks mondongolii Paulus basalita tentang manganggaan doi Klistus. ²⁵Bai salataa Paulus banggadudulkene kona salita tentang kajujulan tukon taanano komoot tukon tentang ukuman doi Oloyo Nakiamatan, Feliks teali matakut maka bantile, “Ikoo moolamo ampakon budodoiya. Yaku naikon uange ikoo koidan kalu daano kotodanan.” ²⁶Daano bunu doiya Feliks moinikene naikon momalaat doy luwedei Paulus. Doiyamo kosababpo yana badaang luunggon namobintokon mian mondokiiyo Paulus sulano basalita tukon yana.

²⁷Salataa lua kotaum, Pelkius Festus soboliyomo Feliks doi natealian gubelnul. Tukon tobikon Feliks yase mangala noa doi Yahudi miano, yana batadikene Paulus doi talunggu lalomo.

Paulus liba doi ulusan natatandakan

25 Tolu kooloyo sambuno lapa Festus polong doi lipudoo, yana ampakono luwedei Kaisalea ko Yelusalem. ²Indaa koimam-imam kapalano tukon sambu-sambu Yahudi pelenggenemo doi yana yanila napangaduan motuuk doi Paulus. Yanila banggadudul momeenggon oluuliyo Festus ³sulano luwe namonondokan konoano doi yanila, yana yase sumboliiyo komian mobabaya Paulus doi Yelusalem; sabab yanila pomeenggono moakateyo Paulus doi loloon tanga. ⁴Bai Festus timbiliyo, “Paulus daano motinaan doi Kaisalea, tukon yaku

susuunggu kai akimo namalumbit koidan naikon abalimo indaa. ⁵Jadi, tadikenemo kai komian motalakamuka doi antala komuyu naampakon polaing-laing yaku ko Kaisalea tukon mopoulusene yana indaa, kalu takainomo yana lapamo lakukanggene komeeng kosalaan.”

⁶Sambuno lapa dungol doi Yelusalem uga-ugaate alumo kai songulomo kooloyo koidan, Festus abalimo doi Kaisalea. Modoakon yana mongkubaimo lapat bangulusan tukon mapalentakene sulano Paulus binaba namangadap. ⁷Salataa Paulus lubat, Yahudi miano mo lapamo lubat doi Yelusalem kokondong doi napotikunggonan tukon mulaimo yanila pelenggene kona potuduhan-tuduhan mo motoong motuuk doi yana. Bai yanila aki namoola bukutiikanggene do tuduhan-tuduhanoo. ⁸Doi nababelaan lalomo, Paulus bantile, “Yaku aki kumongkubai mau meeng kooioila komo sala motuuk doi Musa naatulan kai motuuk doi Temeneno Nabonua kai motuuk doi Tomundo Loma.”

⁹Bai Festus yase mangala noa doi Yahudi miano. Maka yana mansadai doi Paulus, “Yase kai ikoo ampakon doi Yelusalem sulano muinulus indaa doi salaunggu manganai do tuduhan-tuduhanoo?”

¹⁰Paulus timbiliyo, “Yaku daano mokokondong doi mobabasalkene ko Tomundo Loma; tukon doi tampatoo doiya yaku sio kuinulus. Tuan susuungo toiyo baikon yaku akiyo dakusala motuuk doi Yahudi miano. ¹¹Kalu yaku lupaiyomo koatulan tukon mongkubai meeng kolangge komo moolamo kuinukum tukon ukuman mate, yaku sanaang moinakate. Bai kalu yanila natuduhan-tuduhan aki nabisa, akiyo komeeng komian momoola salakangene yaku doi yanila. Yaku kabiyo kupinalesa doi bangulusan Tomundo!”

¹²Salataa lapa popikili tukon napotunggul-pongutunggul, Festus bantile, “Ikoo kabiyo mupinalesa doi bangulusan Tomundo, jadi ikoo sio muampakon mangadap doi Tomundo.”

Paulus doi Aglipa tukon Belnike salaano

¹³Aki nabula-bulaa kolumbito doibundu, Tomundo Aglipa tukon Belnike lubat ko Kaisalea sulano namabantil salamet doi Festus. ¹⁴Salataa yanila moimoiyamo kooloyo konapoo daanoan idoo, Festus talangkangenemo Paulus napalakala doi Tomundo Aglipa. Festus bantile, “Daano naimbaa komeeng

komian motinaan Feliks mo tinggale. ¹⁵Tempodoo yaku daano doi Yelusalem, imam-imam kapalano tukon Yahudi miano nakatua-katua yanila pelenggene konapoo tuduhan-tuduhan motuuk doi mianoo tukon kabiyo sulano yaku otuwengemo koukuman doi yana. ¹⁶Bai yaku timbiliyo baikon ko Loma miano aki namoola tolongo salakanggene bunu doiya balang komeeng komian motinudu sulano nainukum, kalu do mianoo motinudu akiyoon naposasalaan tukon mokalaakene yana tukon nabinee todanan mobelayo kobutongo. ¹⁷Jadi, salataa yanila lubat doisumai, yaku aki kumontotiili malu-malumbit. Modoakon yaku banggadudul mongkubai lapat banggulan tukon mapalentakene sulano do mianoo nabinaba mangadap. ¹⁸Salataa do pakalaakon-pakalaakonoo kokondong pelenggene konapoo tuduhan, yanila aki namopolonggon meeng kolangge molokis pokakana komo yaku pikikene yanila naikon pelenggene. ¹⁹Yanila tolongo posasala konapoo palaat tukon yana manganai agama yanila susuungo tukon manganai meeng komian mo sinombuikon Yesus. Doiya mianoo lapamo mate, bai Paulus kakatikas baikon doiya mianoo tubo. ²⁰Sabab yaku bingo manganai bulaando yaku kumoola malaat katalangan-katalangan manganai doiya palakaladoo, yaku mansadai doi Paulus, oilakai yana yase ampakon doi Yelusalem tukon moinulus indaa luwedo napalakaladoo. ²¹Bai Paulus kabiyo sulano kona ulusan nalinibakon doi natatandakan; yana kabiyo sulano yana natataap dungol doi natinaan polong kona palakala Tomundo naputusiano. Tobikon doiya yaku mapalentakene sulano yana natinaan banggadudul, polong yaku malaat todanan sulano mokapatuwo yana doi Tomundo.” ²²Maka Aglipa bantil doi Festus, “Yaku susuunggu kai yase mondongolii doiya mianoo.” “Modoa Tuan moola mondongolii,” Festus timbiliyo.

²³Modoakon kolobo Aglipa tukon Belnike lubat tukon kinubai koupacala mobabasal. Yanila usokiyo kobanggulan kombiango polaing-laing tukon mobabasalkene kosuludadu tukon paupaulanggaino doi kotadoo. Luwe Festus napalenta, Paulus binaba usok. ²⁴Maka Festus bantile, “Tomundo Aglipa tukon doi mian modaano sasaibino! Naiya mian nia lapamo kinalaakon doi yaku doi sasaibino ko Yahudi bangsano, mau komo doi Yelusalem mau kai komo naimbaa. Yanila tuntute tukon nggele-nggeleamon baikon yana akimo namoola binatangon tubo. ²⁵Bai yaku aki kumalaat mau nabaino meeng kolangge

yana mo lapamo kubaiyo mo moola inukum tukon ukuman mate. Tukon koidan yana susuungo lapamo kabiyo kona palakala nainulus doi bangulusan Tomundo, yaku lapamo putusgangene sulano kinapatu yana doi Tomundo. ²⁶Bai yaku akiyoon kumalaat meeng kokatalangan mo tegas manganai butongo sulano natinulis doi kusulat lalomo motuuk doi Tomundo. Doiyamo kosababpo yaku mohadapgangene yana doi Tuan-tuan sasaibino, toloutama doi Mo Mulia Tomundo Aglipa! Daku makisuut doiyamo sulano kalu lapamo naiya bapalesaan nia, nadaano daku bahan sulano kutulise. ²⁷Sabab manulut kupalasaan, bolikono kai natampat momakapatu meeng komian motinaan tukon aki nabinantil kokasalaan-kasalaano mo kinonoikon doi yana.”

Paulus belayo kobutongo doi Aglipa salaano

26 Aglipa bantile doi Paulus, “Ikoo linoason mobasilingan sulano mubelayo kobutomu.” Maka Paulus bingkate kolimano maka pelengene kona pombelaan bunu naiya nia,

²“Ko Mulia Tomundo Aglipa! Yaku lasayo utung tuuno sabab yaku moola mopelengene daku belaano kobutonggu doi Tomundo salaano manganai sasaibino kopangaduan komo inajukanggon doi Yahudi miano motuuk doi yaku; ³toloutama tuuno sabab Tomundo toiyo tutuu koadat istiadat tukon masaala-masaala Yahudi miano. Luwe do sababpoo, yaku kabiyo sanaango kai Tomundo mondongolii daku katalangan tukon sabal.

⁴Sasaibino ko Yahudi miano toiyo bulaando daku tuboan salataa yaku daano mopaumalanekon. Yanila toiyo baikon salataa yaku teali mian paumalane, yaku tubo doi antala kubangsa susuunggu doi Yelusalem. ⁵Lapamo malumbit yanila natoiyano tentang yaku. Tukon kalu yanila yase, yanila moola mebee kasaksian baikon salataa doi tumbe yaku lapamo tubo bunu Falisi miano tukon loingiyu sasaibino kopalatulano komo ketaat tuuno doi mai agama lalomo. ⁶Tukon budodoiya yaku kokondong naimbaa sulano kupinalesa sabab yaku anggayo naikon kopaladandian komo kinubai luwe Mian Bisa doi tumbungita. ⁷Doiya paladandianoo doiyamo koidan komo minoi-moinikon doi songulo lua kobenseno bangsa Israel,

tobikon yanila sambeang doi Mian Bisa oloyo popook. Tukon tobikon yaku anggayo naikon do paladandianoo, Tomundo mo mulia, yaku inasalakon doi Yahudi miano. ⁸Bulaando utus-utus Yahudi miano aki namoola anggayo baikon ko Mian Bisa otuboiyo koidan komian momate?

⁹Loolukonoo yaku susuunggu kai pikikene baikon yaku sio kulakukangene sasaibino kolangge-langge sulano motantaange Yesus doi Nasaletoo. ¹⁰Tukon takainomo doiyamo kai komo lapamo yaku kubaiyo doi Yelusalem. Tukon sulat kuasa moluwedoi imam-imam kapalano, yaku lapamo mongusokon doi talunggu lalomo badaang komian komo satia doi Mian Bisa. Yaku malaing koidan mosotujuiyo baikon yanila inotuwongi ukuman mate. ¹¹Badaang luunggon yaku sakisaayo yanila doi bonua-bonua kaledaan, sulano mopakisaayo yanila naotinggale oila yanila nainangga. Buno doiya kona moonasan konounggu motuuk doi yanila, sulano doi kota-kota bailong kai yaku ampakon molelengene yanila indaa.”

Paulus basalitakene kona pangalaman

(Kis. L. 9:1-19, 22:6-16)

¹²“Tukon do makisuutoo doiya koidan yaku mababa sulat kuasa moluwedoi imam-imam kapalano tukon ampakon doi Damsyik. ¹³Tukon doiya kosinggatoo yaku doi loloon tanga, salataa suun kooloyo, Tomundo mo mulia, yaku kitayo komeeng kolangge panano luwedoi timbu mo lobian kona talaangan tukon doi oloyo. Do panadoo talaangiyo potikunggon yaku, tukon potikunggon komian mo ambakon polaing-laing yaku. Kami sasaibino tolubang doi buta. ¹⁴Maka yaku lengele koalalo mobantil doi yaku tukon silingan Iblani, ‘Saulus, Saulus! Bulaandokon ikoo mobanggadudul momeenggon sakisaayo yaku? Ikoo naikon lasayo masakit susuumu, kalu ikoo banggadudul momeenggon lawane yana napimpinan mo teali mutuan.’ ¹⁵Maka yaku bantile, ‘Indee kai miano ikoo, Tuan?’ Tukon Yesus timbiliyo, ‘Yakumo Yesus ikoo mo sakisaayo. ¹⁶Banguno tukon kokondong! Yaku okitanggene kobutonggu doi ikoo tukon makisuut sulano mobingkate ikoo nateali kupeleleani. Ikoo sio mubabilitakene doi mian bailong oila komo ikoo kitayo doi oloyo nia tentang yaku tukon tentang oila komo yaku naikon

tudoikene doikoo naikon doi oloyo-oloyo salaando. ¹⁷Yaku naikon osodiiyo ikoo doi bangsa Israel tukon doi bangsa-bangsa bailong, mo bolikon Yahudi. Yaku naikon sumboliiyo ikoo ampakon doi yanila sulano mubilate yanila matano, ¹⁸sulano yanila natobuat doi kalipookan tukon usok doi madialanan lalomo; sulano yanila natongosodii doi Ibiliis nakuasa, maka kinuasai doi Mian Bisa. Maka tukon mangangga doi yaku yanila nalalim-lalim tinolos tukon yanila naikon tealimo Mian Bisa namian mo tolilik.’ ”

Paulus talakanggene kona limang

¹⁹“Tobikon doiya, Tomundo Aglipa, yaku sidutu kakaate motaatiyo doi bakitaan mo lapamo yaku talimayo doi Mian Bisadoo. ²⁰Tukon tuluus talaang yaku pailukene doi mian baikon yanila sio napo badodoloon doi yanila nalalim-lalim tukon salakanggene kobutongo doi Mian Bisa tukon okitakene yanila natuboan lalomo baikon yanila lapamo badodoloon doi napai lalim-lalim. Yaku pailukene doiya langgedoo tumbe-tumbeno doi Damsyik, doibundu doi Yelusalem tukon doi posaapon ko Yudea tukon doi antala komian mobolikon Yahudi. ²¹Maka tobikon doiyamo ko Yahudi miano lakoyo yaku doi Temeneno Nabonua tukon kakaate moakateyo yaku. ²²Bai polong budodoiya nia yaku linindungi Mian Bisa, sahingga yaku moola kokondong dimbaa sulano kumebbee kasaksian doi sasaibino komian – mobabasal kai mopoipoisik. Oila komo yaku mo bantile nia aki kai nasangalaasan tukon doi oila komo lapamo nabi-nabi tantukene tukon Musa; ²³doiyamo baikon ko Tomundo Pasalamat do Mian Bisadoo mo paladandikene sio nasakisaa, tukon teali mian tumbeno mo tubo koidan sambuno lapa mate; sulano tukon doiya yana moola mobabilitakene komadialan – doiyamo kasalamatan – mau doi Yahudi miano mau kai doi mobolikon Yahudi.”

²⁴Daano Paulus moloolukenggene kona pombelaano, Festus wookon, “Ikoo lapamo tando Paulus! Komu motoiyanoo badaang lapamo tealikene ikoo tando!” ²⁵Bai Paulus timbiliyo, “Yaku aki kutando, Mo Mulia. Bantil-bantilan yaku mobantiledoo bisa tukon sumbot doi pikilan mo sehat. ²⁶Tomundo Aglipa susuungo toiyo tutuu naikon do langge-langgedoo.


Doiyamo kosababpo yaku balani mobasilingan doi Tomundo salaano tukon tuluus talaang. Yaku anggayo akiyo mau meeng moluwedoi langge-langgedoo komo akiyoon Tomundo natoiyoy, sabab sasaibino doiya aki nateali doi tempat-tempat mo tosookon. ²⁷Komo Mulia Tomundo Aglipa, oilakai Tomundo anggayo naikon oila komo nabi-nabi nabinantil? Yaku pikikene Tomundo anggayo!”

²⁸Maka Aglipa bantile doi Paulus, “Ikoo neneeke gambang mokubaiyo yaku teali Salani miano doi tembo nia lalomo mo dudul?” ²⁹“Doi tembo mo dudul kai doi tembo nabulusanan,” Paulus timbiliyo, “Yaku sambeang doi Mian Bisa sulano Tomundo tukon Tuan-tuan sasaibino mo mondongolii yaku doi oloyo nia namoola teali bunoyaku nia – kasuali talunggu nia, natantuan!”

³⁰Napupusan tomundo, gubelnul tukon Belnike, tukon sasaibino komo bailonggon kokondongo. ³¹Salataa daano doi tonggulung, yanila pobontiikono pau meeng maka bailong, “Naiya mian nia aki namongkubai meeng kolangge mo moola yana inukum tukon ukuman mate kai tinalunggu.” ³²Maka Aglipa bantile doi Festus, “Naiya mian nia moolamo nasinodii, kalu andeno yana aki natuntute kona palakala nainulus doi pangadilan Tomundo.”

Paulus talabut doi Loma

27 Sambuno pinutuskanggon baikon kami sio mai talabut doi Italia, Paulus tukon moimoiya komian motinalunggu bailong sinalakanggon doi Yulius, pasukan suludadu kapalano Loma mo sinombuikon, “Lesimen Tomundo”. ²Kami lakit doi kapal mo lubat doi Adlamitium, doibundu kami lenggeto tukon do kapaloo mo lapamo basadia talabut doi palabuhan-palabuhan plovinsi Asia. Alistalkus, meeng ko Makedonia miano mo lubat doi Tesalonika, talabut koidan polaing-laing tukon kami. ³Modoakon kami polong doi Sidon. Paulus pinalalukon tukon monondok tuuno doi Yulius. Yana minoolakon nalubotiiyo kotula-tulano sulano yanila namoola beena doi yana oilamo komo pinalaluu. ⁴Luwe idoo kami banggadudulo motalabut. Badungga kombombuul mosusule kokapal salaano, kami talabut banggadudul manisikiyo kotogong Siplus bibilo mo adukon tosookon doi mbombuul. ⁵Doibundu kami pintosiiyomo kotobun mo posalaanggon tukon Kilikia tukon Pamfilia maka



Balabuan Monondok (27:8)

polong doi Mila doi tano Likia. ⁶Idoo do pelwiladoo malaat meeng kokapal luwedoi Aleksandelia mo yase talabut doi Italia. Maka yana biyele kami doi kapaloo.

⁷Moimoiya kooloyo kolumbito komai talabutan kunung tuuno, tukon susa tuuno doibundu kami polong potimbang kokota Knidus. Doibundu tobikon mbombuul daano koidan kulokis, kami aki namoola banggadudul motalabut kojulusan tumbeno. Maka kami talabut kosalatan togong Kleta lisiyo ko Salmone Tadunono sulano indaa kami topopoki doi mbombuul.

⁸Tukon susa tuuno kami talabut momanisikiyo do togongoo polong kona pupusan kami lubat doi meeng kotampat mo sinombuikon Labuan Monondok, moaki natodudul odoon doi kota Lasea.

⁹Doiya singgat Oloyo Babasal Podamean ko Yahudi miano lapamo tolupai. Kami lapamo badaang komai tembo mopuus, tobikon bolikono tembono koidan kotalabutan tukon aman. Tobikon doiyamo Paulus mebee otinau doi yanila, ¹⁰“Utus-utus, manulut daku palaat, kita silaka tuuno kalu kita talabut banggadudul. Kita naikon toupiyo kokalugian mobabasal bolikon tolongo nda muatan tukon nda kapal, bai mau kita moola nasilaka.” ¹¹Bai do pelwiladoo anggayo tuuno kojulagangoo tukon kapiteeng kapal kalu baino Paulus nabantilan. ¹²Polabuhanoo idoo takainomo aki namonondok kalu kapal-kapal nabalabu idoo kalu doi timul tembono. Tobikon doiya badaang koawak kapal mosotuju sulano talabut koidan mootinggale do palabuhanoo sabab yanila yase kakaate polong

doi Feniks tukon dungol indaa polapakon kotembo timul. Feniks daano kai pelabuhan doi Kleta komo sasalaan doi balat daya tukon balat laut.

Sokoi doi tobun

¹³Doiya kosinggatoo kombombuul lalom puul tukon poi-poniak. Maka koawak kapal aangene yanila moolamo napo talabut koidan. Jadi yanila bonggalemo komuatan maka yanila talabut manisikiyo kotogong Kleta. ¹⁴Bai aki namalumbit doibundu puul kosokoi – doiyamo mbombuul mo sinombuikon mbombuul Timul Laut – puul doi buta tina, ¹⁵tukon beese komai kapal. Sabab aki namoola kokapal motalabut banggadudul mosusule kombombuul, maka kami baino batingaakon tolong tukon batadikenemo kapal natalalin mbombuul nababayo. ¹⁶Kami topoopoki soisik, salataa kami lupaiyo doi lalom taalikon kotogong Kauda mo poipoisikoo. Idoe tukon susa tuuno kami moola kuasaiyo komai kapal kukusi. ¹⁷Salataa lapa do kukusidoo linibakon doi kapal, do kapaloo susuungo kinoonggolimo tukon mapake alos mo kinoot potikunggon do kapaloo. Sabab minatakuton nakoyol doi bone Siltis mo pepelat, kokadut inobuluson maka kokapal binatangon mbombuul nalaline. ¹⁸Kombombuul banggadudul makansang, sahingga modoakon kooloyono komuatan kapal mulaimo sinakukon doi tobun lalomo. ¹⁹Oloyo bailonggon koidan awak-awak kapaloo yanila sakukenemo koidan kopakakas-pakakas kapal doi tobun tukon yanila limano susuungo. ²⁰Samba-samba kooloyo kolumbito kami aki mai mokita oloyo tukon bituon pauno, tukon kombombuul kai banggadudul momeenggon mosokoion. Napupusan lapuso komai moinian mosalamat.

²¹Moimoiya kotembo kona kalumbit do mianoo akimo nakaan. Maka Paulus ampakon kokondong doi tanga-tanga yanila maka bantile, “Utus-utus! Kalu komuyu lapamo loingiyo daku otinau, tukon aki nda talabut luwedei Kleta, kita aki nda motoupi sasaibino kokalusakan tukon kalugian nia. ²²Bai budodoiya yaku kabiyo tukon tutuu sulano komuyu pokabasale konoamuyu. Akiyo kai komeeng komian doi Utus komo naikon mate; kita naikon tongo kapal nia komo lapus tolong. ²³Sabab kolubongi malaekat moluwedei Mian Bisa komo yaku sosubaiyo, doiyamo Mian Bisa komo totooliyaku, lubat doi

yaku. ²⁴Malaekatoo bantile, 'Inai matakut, Paulus! Sabab ikoo naikon mangadap doi Tomundo. Tukon luwe namonondokan ko Mian Bisa noano doikoo, sasaibino komian komo talabut tukon ikoo naikon selamat sabab ikoo.' ²⁵Tobikon doiya, Utus-utus, siokai Utus pokabasale konoamuyu! Sabab yaku mangangga doi Mian Bisa baikon sasaibino naikon teali buno komo bantilemo doi yaku. ²⁶Bai kita naikon tapapanggon doi meeng kotogong bibilo."

²⁷Doi popook kosongulono sangkap kami daano motalantolanto doi Tobun Adlia. Uga-ugaatene pintangamo kopopook koawak kapal yanila lasaiyo dokapaloo adukono loolaniyo kobuta tina. ²⁸Jadi yanila mongulul alos tukon batuno sulano napo ukule kotobun naateanan. Totoi do tampatoo naateanan adukon sangkap kolono kometel. Aki namalumbit doibundu yanila ukulemo koidan, maka talaat kotobun doi tampatoo kona ateanan adukono tolu kolono kometel. ²⁹Yanila matakutene kokapal nakoyol doi batu nggalanggang, jadi yanila obulusene kosangkap komuatan taalikon doi puus tukon yanila moinikene kalu moola moso-mosobit modowa. ³⁰Aki napelek-pelek pala awak kapal sosobae obuleng luwedo kapaloo. Yanila obulusene kokukusi doi paisu tukon bakabai kakaadukon yase moobulusene komuatan doi kapal mboyoko. ³¹Bai Paulus bantil doi pelwila tukon palajulit-palajulit komo doi kapaloo, "Kalu naawak kapal nia aki nabatingaakon doi kapal, Utus-utus sasaibino aki namalaat selamat." ³²Tobikon doiya do palajulit-palajulitoo tuase do kukusidoo alos, tobikon do kukusidoo talalin.

³³Doiya singgat akiyoon nasumbot kooloyo panano, Paulus bintekene sulano yanila sasaibino nakaan. Paulus bantile, "Lapamo songulo sangkap kooloyo kolumbito Utus sasaibino tolongo montomontiili tolong doi kaadaan silakaan lalomo tukon aki namakaan oioila. ³⁴Yaku bontiikene, pomakaan soisik. Doiya namonondokan doi komuyu, sulano komuyu pobukuan koidan. Sabab Utus sasaibino naikon selamat tukon akiyo kooioila." ³⁵Sambuno lapa bantile buno doiya Paulus mangalamo loti tukon mangkabi kinatauan doi Temeneno doi yanila salaano sasaibino. Doibundu yana ebe-ebese do lotidoo maka yanila kaane. ³⁶Maka yanila sasaibino basamangato koidan tukon tulut kaan koidan. ³⁷Sasaibino komo daano doi kapaloo daano kolua kosakato pitu kolono noom komian. ³⁸Salataa

sasaibino kaan polong bobosul, yanila sakukene komuatan gandum doi tobun sulano kokapal nateali mimilaan.

Kapal koyol

³⁹Sambuno kooloyo lapamo madialan, awak kapal kitayo kobuta tina, bai yanila aki natoiyu buta tina oila ndoia. Yanila kitayo komeeng kominanga tukon kobibilo. Jadi yanila makisuutiyo mokoyoli kokapal indaa kalu moola. ⁴⁰Maka koalosalos muatan tinuas maka do muatan-muatanoo binatangadikono tumbul doi tobun. Polaing tukon doia koidan yanila sodiiyo koalos pokoot uling. Doibundu yanila libakene kadut doi taalikon kapal mboyoko sulano mbombuul napuule do kapaloo maju tujuiyo kotokoluan. ⁴¹Bai do kapaloo koyol doi bone. Doi mboyok taalikon koyolo tukon akimo nabiyok, sedangkan taalikon doi puas manas moinumbas bokol mo makansang.

⁴²Palajulit-palajulit doi kapaloo baniat moakateyo sasaibino komian motinaan, sabab yanila matakutene inai-inaikene naikon nadaano komo kayak doi buta tina tukon obuleng. ⁴³Bai do pelwiladoo cogaayomo konapoo niatoo sabab yana yase salamatene Paulus. Yana sumboliiyo sasaibino komian motoiyo kayak nabasuapon loolukon tukon nakayok doi tape; ⁴⁴komo bai-bailonggon sio natuundu tukon bataani doi dopi-dopi kapaloo binduko. Tukon loloon bunu doiyamo kami sasaibino salamat polong doi buta tina.

Doi Malta

28 Sambuno polong doi buta tina tukon salamat, maka nasodo kami toiyo baikon do togongoo kosambuno Malta. ²Kotumbuno do togongoo monondok tuuno doi kami. Yanila talimayo kami sasaibino tukon monondok tukon okoitiyo koaung tuuk kami sabab tambuuno lubat koudan tukon kodapang kai kumelon. ³Paulus mangatambun kayung, tukon abese do kayung-kayungoo doi aung bungkono. Daanoon yana mokubaiyo doia, komeeng kobinda mosumbot, sabab namoonasan do aungoo, maka nakakate tukon nakaleyo kolimano. ⁴Salataa do togongoo tumbuno kitayo do bindadoo motongulul doi Paulus limano, yanila pobotiiyonggon meeng tukon bailong, "Naiya mian nia tantumo pangakate, sabab mau kai nalapamo luput luwe kosilakaan doi tobun, Dewi Keadilan aki nabatadikene yana natubo." ⁵Bai Paulus tipasene

do bindadoo doi aung lalomo, tukon aki nalasayo masakit mau nabaino soisik. ⁶Yanila pikikene naapa doiya Paulus limano naikon boboongano kai sosinggaton yana naikon tuwong mate. Bai salataa montotiili moimoiya kolumbito tukon akiyo kolangge meeng molual biasa komo teali doi yana, yanila napikilan tobolii maka yanila bantile baikon Paulus daano kai dewa.

⁷Aki naodoon doi tampatoo daano kobuta Publius koono, pamalenta mobabasal doi togongoo. Tukon sanaang konoano yana talimayo kami bunu natamu tolu kooloyo kolumbito. ⁸Doiyo kosinggatoo kotamano daano momasakit, kanakon maligoot tukon masakit kotiano. Paulus ampakon duutiyo do langgaidoo momasakit maka sambeang tukon abese kolimano doi bungkukono sahingga yana tangalin. ⁹Tobikon kadadianoo sasaibino komian mo seselon doi togongoo lubat doi Paulus, tukon yanila tinangalinggon. ¹⁰Yanila mebeekon doi kami badaang kotambo, tukon salataa kami naikon talabut, yanila mababa doi kapal sasaibino komo kami palaluuwo tuuk doi mai ampakanan.

Luwedoi Malta ko Loma

¹¹Sambuno lapa tolu kobituwon indaa, kami lengget luwedo togongoo lakit komeeng kokapal moluwedoi Aleksandelia komo po pupuson kotembo timul balabu doi togongoo. Doiyo kapaloo mapake lambang, “Dewa Pinga Kastol tukon Poluks”. ¹²Kami balabu doi kota Silakusa tukon dungol idoo tolu kooloyo. ¹³Luwe idoo kami talabut koidan manisikiyo kotape polong doi kota Legium. Modoakon kombombuul tambuuno puul doi lalom, sahingga tolono lua kooloyo kami polongo doi kota Putioli. ¹⁴Idoo kami pososuong komoimoiya komian mo manganggamo doi Yesus, tukon luwe yanila naundangan kami podungoli tukon yanila meeng kominggu kolumbito. Maka kami ambakono doi Loma. ¹⁵Utus-utus doi Loma mo manganggamo doi Yesus ndongoliiyo kobilitano tentang doi kami, sahingga yanila lubat polong doi Labotan Apius tukon Tolu ko Bonua Sambuan sulano natalimayo kami. Salataa Paulus pososuong tukon yanila, yana mangkabi kinatauan doi Mian Bisa tukon konoano teali moonggol.

Doi Loma

¹⁶Salataa polong doi Loma, Paulus minoolakon nadungol susuungo tukon natinotooli doi meeng kosuludadu.

¹⁷Sambuno tolu kooloyo, Paulus uange kotokoh-tokoh Yahudi miano. Tukon sambuno lapa yanila pototongi, yana bantil doi yanila, “Utus-utus! Yaku aki kubalasala oioila motuuk doi nda bangsa, kai lupaiyo koadat kabiasaan komo kita talimayo luwedoi tumbungita. Mau kai nabuno doiya yaku linako doi Yelusalem tukon sinalakanggon doi Loma miano. ¹⁸Salataa daku palakala pinalesamo, yanila yase bebaskanggene yaku, sabab tokita yaku aki kumongkubai meeng kokasalaan komo pantas inukum tukon ukuman mate. ¹⁹Bai sabab ko Yahudi miano tantaange, tapakisaa yaku tuntute daku palakala nainadili doi pengadilan Tomundo Loma. Yaku kubaiyo doiya bolikon sabab yaku daano kolangge meeng inadukanggon motuuk doi kubangsa susuunggu. ²⁰Tukon doiyamo kai kosababpo yaku kabiyo kuposusuung tukon komuyu sulano basa-basalita; sabab yaku tinalunggu, tobikon Pasalamaton mo minoi-moinikon doi bangsa Israel.”

²¹Maka yanila bantile doi yana, “Kami akiyoon mai mantalima meeng kosulat luwedoi Yudea manganai doi Utus. Tukon akiyo komeeng koutus kai moluwe indaa komo lubat mababa bilita manganai Utus kai babisala mo lokis manganai Utus. ²²Bai kami yase koidan molongol tentang Utus namanganggan, sabab kami sasaibino lapamo lengele komian mototulaiyo kootunggul Utus mo taaniyodoo.”

²³Maka yanila tukon Paulus matantukon meeng kooloyo sulano naposusuung. Doi oloyodoo badaang komian molubat doi Paulusoo natampat dungolan. Luwe dodowa polong kinobian Paulus talakanggene tukon babilitakene doi yanila kobilita tentang bulaando ko Mian Bisa namapalentaan pokakana ko Tomundo. Tukon momapake ayat-ayat moluwedoi Musa na Buku tukon Buku Nabi-nabi, Paulus kakaate mokubaiyo yanila mangangga tentang Yesus. ²⁴Daano komo mangangga naikon oila komo Paulus nabinantil, bai daano koidan komo aki namangangga. ²⁵Tukon napoo palaat mo posasala yanila tinggalemo do tampatoo, sambuno Paulus

bantile doi yaniladoo, “Takainomo kana tuuno oila ko Mian Bisa Na Loh nabinantil moluwedoi Nabi Yesaya doi tumbumuyu!

²⁶Mian Bisa bantile,

‘Ampakono bantile doi bangsa nia:

Komuyu naikon banggadudul molengele, bai aki pomangalati;

komuyu naikon banggadudul mopalaticanggene bai aki

potoiyo oila komo teali.

²⁷ Sabab nabangsa nia napikilan lapamo teali mokisul,

kopai tolingaino tealimo bongol

tukon kopai matano lapamo inopiit.

Naiya teali sulano yanila matano inai namokita,

yanila tolingaino inai molongol,

yanila napikilan inai namangalati,

tukon inai naabali doi yaku,

maka yaku naikon tangalingene yanila.’ ”

²⁸Doibundu Paulus bantile, “Utus-utus sio potoiyo baikon bilita tentang kasalamatan mo luwedoi Mian Bisa budodoo lapamo pinolonggon doi bangsa-bangsa bailong mo bolikon Yahudi. Yanila naikon tulutiyono!” [²⁹Sambuno lapa Paulus bantile buno doiya, ko Yahudi mianodoo tinggalemo do tampatoo tukon pogagai meeng maka bailong.]

³⁰Lua kotaum kona kalumbit Paulus dungol doi Loma, doi bonua mo sabele susuungo. Yana sanaang momantalima sasaibino komian komo lubat duutiyo yana. ³¹Tukon balani yana pailukene doi yanila tentang bulaando ko Mian Bisa namapalentaan pokakana ko Tomundo tukon tentang Yesus Klistus. Paulus kubaiyo doiya tukon bebas, tukon aki nasinembang-sembarang.

PAULUS NASULAT DOI JEMAAT LOMA

PANGANTOKON

Paulus nasulat doi jemaat Loma kona tuukan sulano yanila namontotiili Paulus nalubatan doi yanila. Kalu natetel, Paulus naikon daano mobalimang bula-bulaa kotempo indaa doi Salani miano, doibundu tukon yanila napotombonii, yana yase taus doi Spanyol. Paulus tulise nasulatia tuuk doi otunggukanano koalatio koagama Salani tukon atulan-atulano mososok doi Salani miano natuboan.

Sambuno lapa pelengene kona salam doi jemaat Loma miano, tukon popitoikene doi yanila tentang napai sambeang tuuk yanila, Paulus lolukengene kona tema nai nasulatia: "Tukon do Bilita Monondokoo Mian Bisa tudoikene bulaando kona potaamian kobanggapi tukon Mian Bisa napokindondokonan koidan; kololoono doiyamo tukon mangangga doi Mian Bisa, doi tumbe polong doi napupusan" (1:17).

Sambuno lapa doiya Paulus otunggukene dona temadoo. Sasaibino komian - mau Yahudi mau mobolikon Yahudi - palaluu kinindondok kopotaamian tukon Mian Bisa, sabab sasaibino daanomo doi lalim lalomo nakuasa. Kona potaamian kobanggapi tukon Mian Bisa teali monondok koidan kalu kobanggapi anggayo ko Yesus Klistus. Doibundu Paulus otunggukene kokaliangano dotuboanoo moolu doi banggapi mo toupiyo kalu pomeenggon tukon Klistus. Tuboan mooludo tubo sabab daano kona potaamian mooolu tukon Mian Bisa. Mian mo lapamo mangangga doi Yesus, tubo monondok tukon Mian Bisa, tukon Mian Bisa Na Loh osodiiyo yana doi lalim nakuasa tukon matean. Doi pasal 5-8 Paulus otunggukene koidan kona makisuut ko Mian Bisa naatulan-atulan tukon Mian Bisa Na Loh nakuasa doi mian momaangga natuboan lalomo. Doibundu Paulus otunggukene ko Yahudi miano tukon mobolikon Yahudi miano tongusokon doi Mian Bisa natetel motuuk doi banggapi. Paulus bantile

baikon Yesus moinakiyonggon doi Yahudi miano doiya lapamo tongusokon doi Mian Bisa natetel lalomo sulano natulunge kobanggapi luwedoi namaasi mololo doi Yesus Klistus. Paulus anggayo baikon ko Yahudi miano aki nasidutu naikon tolake Yesus. Doibundu Paulus tulise bulaando kokaliangano komian sio natubo buno Salani miano, komo tutuu tuuno doiyamo bulaando kokubaiyano doseango napotaamian komian bailong. Tuuk doiya Paulus molilik pokok-pokok mobuno naiya: meleleani Mian Bisa, Salani miano nakawajiban doi negala tukon tulando Salani, tukon bula-bulaa kopalasoalan motuuk doi mian noano. Paulus tutupe kona sulatia tukon teteba-teteba susuungo tukon nggaa-nggaalano ko Mian Bisa.

Antoko

Pololukoni tukon tema 1:1-17

Banggapi napalaluuano kokasalamatan 1:18-3:20

Loloon kasalamatan doi Mian bisa 3:21-4:25

Tubean boolu sabab pomeenggon tukon Klistus 5:1-8:39

Islael daanomo doi Mian Bisa natetel lalomo 9:1-11:36

Salani miano nakalakuan 12:1-15:13

Potutup tukon salam susuungo 15:14-16:27

1 Utus-utus sasaibino doi Loma Mian Bisa mo seseange tukon mo lapamo Mian Bisa uange sulano teali namian.

Mian Bisa lapamo piliyo tukon bingkate yaku sulano kubabotilangene ko Bilita Monondok moluwedoi Mian Bisa. ²Bilita Monondokoo lapamo Mian Bisa dondiikene doi lounu loolukoo lolo doi nabi-nabi tukon lapamo totulis doi Kitab Moliyous lalomo. ³Bilita Monondokoo manganai Mian Bisa Napau, nda Temeneno Yesus Klistus. Kalu buno banggapi, yana daano katulunan Daud, ⁴bai kalu buno Temeneno yana tokita daano Mian Bisa Napau. Doiya totoimo tukon kuasa mo bolikon langge lolo luwedoi natuboan doi namatean. ⁵Lolo doi yana koidan Mian Bisa beekene doi yaku kokalunia moteali lasul, sulano yaku - tuuk odotiiyo Klistus - babayo komian doi sasaibino kobangsa sulano namangangga tukon loingiyo. ⁶Komo minakisuuti tukon sasaibino kobangsa doiyamo komuyu koidan



Loloon babasal doi kota Loma (1:6)

mo daano doi Loma; komuyu nokon lapamo inuang sulano nateali Yesus Klistus namian. ⁷Doiyamo kosababpo yaku batulis doikoo.

Kinatauwan Mian Bisa Tamanggita tukon Temeneno Yesus Klistus mobeena balakaat tukon monondokan doikoo.

Doa syukuul

⁸Tumbe-tumbeno loloiyo Yesus Klistus, yaku bakinatauwan doi Mian Bisa sabab Utus-utus sasaibino; sabab posaapon kodunia lapamo molongol baikon komuyu moanggayomo tuuno doi Klistus. ⁹Yaku sidutu neneeke komuyu kalu yaku sambeang. Mian Bisa komo sakisiyo baikon oila daku babilitakene bisa. Yanamo ko Mian Bisa yaku mo leaniyo tukon noanggu sasaibino tukon babotilangene ko Bilita Monodok tentang na Pau. ¹⁰Yaku kabiyo tukon tutuu doi Mian Bisa, boliisi yana nayase pataikene yaku diabudodoo moduutiyo komuyu. ¹¹Sabab yaku yase tuuno moposusuung tukon komuyu sulano yaku moola obosikonggon kokalunia moluwedoi Mian Bisa Na Loh sulano naekeengele komuyu. ¹²Daku makisuut doiyamo sabab kita singgat-singgat lapamo mangangga doi Yesus Klistus, maka kita moola pokoonggoli.

¹³Utus-utus! Yaku yase sulano komuyu potoiyo baikon badaang luunggon daku batodanganan moduutiyo komuyu bai

sidutu daano koalangan. Yaku yase sulano doi komuyudoo daku limang daano kohasilo bunomo daku balimangan modaano kohasilo doi antala mian mo bolikon Yahudi doi tempat-tempat bailong. ¹⁴Sabab yaku daano daku kawajiban motuuk doi sasaibino kobangsa; mo lapamo mangalati tukon mo akiyoon namangalati, mo daano kona pendidikan mau kai mo akiyoon nadaano kona pendidikan. ¹⁵Doiyamo kosababpo yaku yase tuuno mobabotilangene do Bilita Monondokoo doi komuyu mo dungol doi Loma koidan.

Bilita Monondokoo nakuasa

¹⁶Yaku anggayo tuuno naikon do Bilita Monondokoo, sabab do bilitadoo doiyamo Mian Bisa nabukuanan sulano nasalamatene sasaibino komian mo mangangga; tumbe-tumbeno Yahudi miano, tukon bangsa bailong koidan. ¹⁷Sabab tukon do Bilita Monondokoo, ko Mian Bisa okitakene bulaando kona cala kobanggapi napotaamian tukon Mian Bisa nateali monondok koidan; kona cala doiyamo, mangangga doi Mian Bisa, doi natambuunan polong doi napupusan. Doiya buno pokakana komo totulis doi Kitab Moliyous lalomo, "Mian mo mangangga doi Mian Bisa tobikon kona potaamian tukon Mian Bisa teali monondok koidan tobikon do mianoo naikon tubo!"

Banggapi nakasalaan

¹⁸Doi sulugaa Mian Bisa tudoikene kona nggimalan doi sasaibino kolalim tukon banggapi nakulokisan, sabab kokulokisan kubaiyo kobanggapi sulano natingoniiyo kootunggul mobisa tentang Mian Bisa. ¹⁹Oila komo moola banggapi toiyo tentang Mian Bisa lapamo tontong doi banggapi noano lalomo, sabab Mian Bisa susuungo lapamo okitakene doiya doi banggapi. ²⁰Salataa ko Mian Bisa tealikene kodunia, sipat-sipat Mian Bisa mo aki natokita, doiyamo ndondoong nabunoan Mian Bisa tukon nakuasa posidutukon, lapamo moolamo kobanggapi mangalatikene mololoi sasaibino komo lapamo tinealikon. Jadi kobanggapi sasaibino akiyono tuuno kona alasan sulano naokobisakene kobutongo. ²¹Kobanggapi tingoniiyo ko Mian Bisa, bai kobanggapi aki yana buno Mian Bisa tukon aki koidan nabakinatauan doi yana. Kobalino kobanggapi pikikene komo

boli-bolikon; yanila noano teali kalipookan. ²²Yanila lasaiyo kobutongoila pandoi, banggokai yanila longas. ²³Bolikonono Mian Bisa posidutukon yanila nasinosubai, baimo kai timbalang-timbalang mo buno mahluk mo moola mate; doiyamo banggapi, tomisi, iyayon mo sangkap koaino, tukon iyayon mo dadul.

²⁴Tobikon doiya ko Mian Bisa sodiikenemo yanila nakinuasai konoanoila namongiasan sulano nakubaiyo komo kulokis, tobikon yanila lakukanggene kolangge-langge mo manggilit doi butongoila. ²⁵Mian Bisa mo bisa, yanila soboliyo tukon lobo mo aki nabisa. Bolikon Motealikene baimo domo tinealikonoo doiyamo komo sinosubai tukon yanila nalineleani. Banggokai domo tealikenedoo komo siokai nangginaal posidutukon! Amin.

²⁶Sabab kobanggapi kubaiyo komo buno doiya, maka ko Mian Bisa sobiikenemo yanila loloiyo konoanoila mo lokis. Yanila naboi-boine akimo natatalik doi mala-malane buno komo biasa doi banggapi, baimo tatalik doi tulano boine. ²⁷Mau mala-malane koidan; yanila akimo koidan napokokonoi mokubaiyo kona hubungan tukon boine, baimo kai memeeetene kotulano malane. Mala-malane kubaiyo kona kokubai mo akamaayo kotulano mala-malane, tobikon yanila mantalima posoboli mo pokakana tukon yanila nakokubai mo lokisoo.

²⁸Kona sabab kobanggapi aki nalasayo palaluu tingoniiyo ko Mian Bisa, maka ko Mian Bisa sodiikene yanila napikilan nateali rusak, tobikon yanila kubaiyomo kolangge-langge yanila mo aki namoola kubaiyo. ²⁹Yanila noano moonoo tukon sasaibino komo lokis, mo aki nakana; moonoo tukon modokoan, koboanan tukon palasaan mesikit, moonoo tukon yase mangakate, poakate, batipu, tukon mabatuulikon, yanila yase basalitakene komian bailong, ³⁰yase mokulokisanggene komian bailong sambuno; yanila sosombong tukon akiyo kona atulan, mo sikitene ko Mian Bisa tukon yase banggal-banggaal. Yanila pandoi moumbolii loloon mooloo sulano namakabai kulokisan. Yanila lungguiyo kona olang tua; ³¹yanila aki nayase namangalati komian bailong; yanila aki nataat tukon akiyo kona seang doi banggapi bailong. ³²Yanila toiyo, baikon manulut Mian Bisa naukum, mian mo lakukanggene sasaibino doiya sio nainukum mate. Mau kai nabuno doiya yanila kubaiyo koidan do langge-langgedoo; tukon koidan setujuiyo komian bailong nalakukanggene.

Mian Bisa naukuman

2 Tobikon doiya, Utus-utus, indee kai Utus tobikon Utus yase moasalakene komian bailong? Utus akiyo komu oioila sulano mubelayo kobutomu! Sabab kalu Utus asalakene komian bailong, banggokai Utus susuungo kubaiyo kokokubai mo pokakana buno yanila, maka Utus otuwongikene koukuman doi butongo susuungo koidan. ²Kita toiyo baikon kalu ko Mian Bisa otuwongikene koukuman doi mian mo kubaiyo kokokubai-kokubai mo buno doiya, ko Mian Bisa nakaputusanoo bisa. ³Bai komuyu, Utus-utus, mokubaiyo susuungo koidan kolanggelange komuyu mo tuduwo doi mian bailong! Tukon komuyu pikikene komuyu moola lolos doi Mian Bisa naukuman? ⁴Kai komuyu pandang enteng ko Mian Bisa namaasi tukon kona monondokan konoano tukon nasabalan mo buno doiya kona babasalan? Tutuu komuyu toiyo baikon ko Mian Bisa tudoikene kona monondokan konoano sabab yana yase sulano komuyu pobadodoloon doi polalim-lalim. ⁵Bai komuyu motikas konoamuyu tukon aki poyase babolii. Tobikon doiya komuyu susuumuyumo komo kubaiyo komu ukuman teali tosuungi babalat doi Oloyo Nakiamatan, kalu ko Mian Bisa okitakene kona nggimalan tukon otuwenge kona ukuman mo adil. ⁶Sabab ko Mian Bisa naikon soboliyo sasamba komian pokakana tukon nakokubai. ⁷Mian Bisa beena tuboan mobisa tukon posidutukon doi yanila mo taat mongkubai monondok sulano namalaat komo monondok, mo inodotii tukon posidutukon. ⁸Bai komian mo utama kene kobutongo susuungo tukon aki nayase taat doi Mian Bisa, baimo mololoi mo kulokis, do mianoo Mian Bisa naikon nggimoliiyo tuuno. ⁹Sasamba komian mo yase kubaiyo komo lokis naikon sakisaa tukon mondolita; tumbe-tumbeno Yahudi miano, tukon koidan bangsa-bangsa bailong. ¹⁰Bai sasaibino komian mo yase kubaiyo komo monondok naikon binee monondokan tukon inodotiiian tukon Mian Bisa beena kasanangan; tumbe-tumbeno doi Yahudi miano, bunomo koidan bangsa bailong. ¹¹Sabab ko Mian Bisa lakukanggene sasaibino komian pokakana.

¹²Mian badaang bangsa bailong baladosa aki natoiiyo koatulano koagama Yahudi. Jadi yanila inukum bolikon do

ukumoo. Bai Yahudi miano baladosa lapamo toiyo do ukumoo; tobikon doiya yanila naikon tinuntut koidan luwedo ukumoo. ¹³Sabab komian pomondokon koidan tukon Mian Bisa, bolikon sabab do mianoo molapamo toiyo koagama Yahudi atulano, bai sabab yana molakukangene oila komo totulis doi ukumoo lalomo. ¹⁴Mian-mian bangsa bailong aki natingoniiyo koatulan agama Yahudi. Bai kalu yanila namongiasan susuungo mokubai oila do ukumoo napinalentakon, yanilamo noano susuungo komo teali atulan motuuk doi yanila, mau kai yanila naaki natingoniiyo koagama Yahudi naatulan. ¹⁵Yanila nakalakuan otudoikene baikon oila do ukumoo napinalentakon totuliso doi yanila noano. Luwedo noanoila mosanaang bukutiikanggenemo do langgedoo, sabab yanila susuungo daano kotembono inasalakon tukon daano kotembono yanila napikilan binisakon. ¹⁶Bunomo doiya naikon komo teali doi oloyo mo lapamo tinantukonoo. Doi oloyodoo – manulut Bilita Monondok yaku mo babotilangene – Mian Bisa lolo doi Yesus Klistus, naikon hakimiyo sasaibino kolaasia doi noanggita tukon pikilan sasaibino komian.

Yahudi miano tukon ukum agama Yahudi

¹⁷Bai diabudodoo bulaandomo tukon Utus-utus susuungo? Utus akuiyo kobutomu Yahudi miano. Utus bataani doi agama Yahudi naatulan tukon Utus banggaal modaano kona potaamian Utus tukon Mian Bisa. ¹⁸Utus malaat otunggul-otunggul doi atulanoo, tobikon Utus toiyo ko Mian Bisa namongiasan tukon toiyo tantukangene naando komo monondok. ¹⁹Utus anggayo baikon Utus daano mokatuaiyo komian mopiit tukon madialan doi yanila mo daano doi kalipookan; ²⁰Utus pongotunggul mian mo daano palus kona pikilan, tukon gulu mian mo longas. Utus anggayo baikon doi agama Yahudi naatulan lalomo, Utus malaat sasaibino kopangatahuan tukon otunggul mo bisa. ²¹Utus otunggule komian bailong; nah, bulaando Utus moaki muotunggule kobutomu susuumu? Utus mongotunggul mian sulano inai napondikuk, banggokai Utus susuungo pondikuk! ²²Utus mongotunggul mian sulano inai nabalolowa, banggokai Utus susuungo balolowa! Utus mesikitene kobapilogotan, banggokai Utus susuungo mangala langge-langge doi bonua-bonua bapilogotan. ²³Utus babanggaalkene baikon Utus daano Musa naukum, banggokai Utus totulaiyo ko Mian

Bisa tukon aki muloingiyo kona ukum. ²⁴Doi Kitab Moliyous lalomo totulis bunu naiya, “Tobikon komuyu, Yahudi miano, maka ko Mian Bisa sambuno kinulokisanggon doi antala bangsa-bangsa bailong.”

²⁵Kalu Utus taatiyo koukum agama Yahudi, maka Utus nasunat daano kona guna koidan. Bai kalu Utus aki nabiasa loingiyo kolangge-langge mo pinalentakon doi ukumdoo lalomo, maka Utus nasunat akiyono koanggano tuuno. ²⁶Kalu meeng komian bolikon Yahudi mo aki nasinunat, mololoi agama Yahudi atulano, bolikon kai ko Mian Bisa naangganano bunu mian mo lapamo sinunat? ²⁷Tukon mian mo aki nasinunatoo naikon asalakene Utus Yahudi miano, sabab Utus daano koagama Yahudi naatulan tukon Utus sinunat, bai Utus lupaiyo do ukumoo. Yanila aki nasinunat, bai yanilamo komo loingiyo koagama Yahudi naatulan. ²⁸Sabab ko Yahudi miano mo bisa bolikon kai mian mo tongo sambuno balang Yahudi miano; tukon komian mo tutuu sinunat bolikon kai mian mo sinunat secala dunia. ²⁹Kobalino meeng ko Yahudi miano mo bisa doiyamo mian konoano balajiwa Yahudi; tukon sunat mo bisa doiyamo sunat moluwedoi noanggita Mian Bisa Na Loh mo limange, bolikon mosinasat doi buku lalomo. Mian mobuno doiya mantalima panggaal moluwedoi Mian Bisa, bolikon doi banggapi.

3 Kalu bunu doiya, oilakai kountungo moteali Yahudi miano? Tukon oila kogunano mololoi kosunat atulano? ²Tutuu badaang kogunano! Tumbe-tumbeno, sabab doi Yahudi miano ko Mian Bisa monggianggakene kona bantil-bantilan. ³Bai bulaando kai kalu kosoobos ko Yahudi miano aki nataatiyo? Oilakai tobikon doiya ko Mian Bisa aki nateali taatiyo? ⁴Tantu aki! Sabab tontongo ko Mian Bisa sidutu bisa, mau kai nasasamba komian bakokolii. Doi Kitab Moliyous lalomo totulis, “Siokai ikoo mutotoi bisa oilamo komo binantil doi lalom, tukon ikoo manaang salataa ikoo hinakimi.”

⁵Bai kalu ko Mian Bisa nakaadilan teali tokita pololokon, tobikon kita kubaiyo komo aki nakana; oilamo komo moola kita bantile? Baikon ko Mian Bisa aki naadil kalu yana ukume kita? (Takainomo napasadai nia moola secala banggapi.) ⁶Takainomo

aki! Sabab kalu ko Mian Bisa aki naadil, bulaandomo kai yana momoola hakimiyo nadunia nia?

⁷Bai kalu takainomo kokubai mo aki nakana, oila komo kana tentang Mian Bisa pololokon totingonii tobikon yana ngginaal, bulaando komian mo kubaiyo kolokisoo daano moinasalakon bunu mian mobaladosa? ⁸Tukon bulaando kita aki namoola mobantile, “Tadukai kita mokubai lokis sulano nasumbut komo monondok?” Takainomo daano komian mo totulaiyo yaku tukon bantile baikon yaku lapamo bantile bunu doiya. Komian mobuno doiya pantaso Mian Bisa naukume.

Akiyo komeeng komian mo lakukanggene ko Mian Bisa namongiasan

⁹Nah, oilamo kai konda kadudukan bunu Yahudi miano lobian kona monondokan kona kadudukan doi bangsa bailong? Tutuu aki! Lapamo yaku lolukenggene baikon mau Yahudi miano mau kai bangsa bailong, sasaibino lapamo dosa kuasaiyo.

¹⁰Bunomo mo totulis doi Kitab Moliyous lalomo,

“Akiyo komeeng komian mo talakana,

¹¹ akiyo komeeng komian mo mangalati tukon akiyo komeeng komian mo sosubaiyo ko Mian Bisa.

¹² Sasaibino komian lapamo dedeenggene kobutongo doi Mian Bisa;

sasaibino lapamo tapa.

Akiyo komeeng komian nakokubai mo kana; mau meeng komian aki!

¹³ Yanila kekeoko bunu kiful mo tobuka.

Batipuan lomba doi yanila alepo,

tukon yanila suungo bibilo sumbetene kobakala-kalaan,
buno binda upaso.

¹⁴ Yanila suungo moonoo tukon kutuk tukon ngginimoliiyan.

¹⁵ Yanila nanggaisanan mosobit kalu yasemo momasakisaa tukon mangakate mian.

¹⁶ Kona manasan tukon susaan, yanila sabukene doi yayaa.

¹⁷ Yanila piit doi loloon momonondok,

¹⁸ tukon aki naodotiiyo ko Mian Bisa.”

¹⁹Diabudodoo kita toiyo baikon sasaibino komo totulis doi agama Yahudi atulano lalomo, daano motuuk doi mian mo daano doi ukumoo nakakuasaan. Tukon bunomo doiya akiyo komeeng komian momoola mebeekon alasan oioila koidan tukon posaapon kodunia moola Mian Bisa natuntute. ²⁰Sabab akiyo komeeng komian mominoolakon pomondokon tukon Mian Bisa sabab do mianoo kubaiyo kolangge-langge mo talaat doi atulan agama lalomo. Bai do atulanoo tongo otudoikene doi banggapi baikon kobanggapi baladosa.

Bulaando ko Mian Bisa momoolakene kobanggapi pomondokon tukon yana

²¹Bai diabudodoo ko Mian Bisa lapamo otudoikene kololoon bulaando kobanggapi pomondokon tukon yana; tukon nacaladoo akiyo kona potoikonan tukon atulan agama Yahudi. Buku-buku Musa tukon buku-buku nabi-nabi okitakene do langgedoo, ²²baikon ko Mian Bisa moolakene kobanggapi pomondokon tukon yana; tongo kalu banggapi mangangga doi Yesus Klistus. Mian Bisa kubaiyo naiya tuuk sasaibino komian mo mangangga doi Klistus; sabab akiyo kona posasalaan: ²³Sasaibino komian lapamo baladosa tukon odoono doi Mian Bisa mo salamatene yanila. ²⁴Tongo tobikon Mian Bisa namaasi tolong mo beekene tukon cuma-cuma, banggapi napotaamian tukon Mian Bisa teali monondok koidan; kona cala doiyamo: Yesus Klistus sodiiyomo kobanggapi. ²⁵Mian Bisa kulbankanggene Yesus Klistus sulano tukon dona mateanoo kobanggapi inokitakon tosodiimo doi kasalaan kalu yanila mangangga doi yana. Mian Bisa kubaiyo bunu doiya sulano tудоikene kona kaadilan. Sabab doi lounu loolukoo ko Mian Bisa lapamo okitakene kona sabalan doi banggapi nalalim-lalim tobikon yana aki naukume yanila. ²⁶Bai diabudodoo yana tindokiiyo kolalim sulano okitakene konaadilan. Tukon cala doiya yana otudoikene baikon kobutongo bisa; tukon sasamba komian mo mangangga doi Yesus, inokitakon pokakana komian mo lapamo pokindok koidan tukon Mian Bisa.

²⁷Tobikon doiya akiyono koidan konda alasan sulano nda bangga-banggaal. Bulaando mobuno doiya? Oilakai ugaate kita molakukanggene komo totulis doi agama Yahudi atulano?

Bolikon. Bai tobikon kita manganggamo. ²⁸Sabab kona dumbakan daano bunu naiya: Mian moinokitakon pokindok koidan tukon Mian Bisa, bolikon sabab yana lakukanggene oila komo totulis doi atulan agama Yahudi, bai kai sabab yana mangangga doi Yesus Klistus.

²⁹Kai naaki do Mian Bisadoo Mian Bisa Yahudi miano tolong? Bolikon kai yana Mian Bisa bangsa bailong koidan? Oode, takainomo yana bangsa bailong na Mian Bisa koidan! ³⁰Sabab ko Mian Bisa tongo meeng. Yanamo komo moolakene ko Yahudi miano pokindok koidan tukon Mian Bisa sabab yanila manganggamo. Tukon yanamo koidan komo moolakene kobangsa bailong pokindokon koidan tukon Mian Bisa; doiya koidan sabab yanila manganggamo. ³¹Oilakai naiya koalatio baikon sabab kita mangangga doi Klistus, kita sakukene koagama Yahudi naatulan? Aki natutuu! Tongo kai tukon nda manganggaanoo, kita odotiiyo do atulanoo.

Abalaham teali sontoh

4 Kalu bunu doiya, oilamo komo moola kita bantile tentang Abalaham, tumbungita? Bulaando kai kona pangalaman? ²Kalu kolangge-langge nakinubai mangaanikene ko Mian Bisa talimayo yana bunu mian mo sanaanggene ko Mian Bisa noano, maka daano koidan kona alasan doi yana sulano nabanggal-banggaal. Bai yana aki namoola banggaal doi Mian Bisa salaano. ³Doi Kitab Moliyous lalomo totulis, “Abalaham mangangga doi Mian Bisa, tukon sabab kona manganggaan nia Mian Bisa talimayo yana bunu mian mo sanaanggene ko Mian Bisa noano.” ⁴Mian mo balimang, mantalima tambo; tukon dona tambo aki nainaanggon bunu meeng kosabeat, sabab doiya daano nahaak. ⁵Bai daano komian mo aki namoinikene dona usaha susuungo; yana monggianggakene kobutongo doi Mian Bisa mo okitakene komian baladosa tongosodii doi nakasalaan. Luwedoi namanganggaanoo doiyamo ko Mian Bisa talimayo do mianoo bunu mian mo sanaanggene ko Mian Bisa noano. ⁶Bunomo lakon doiya Daud napalaat koidan; doiya kosababpo yana mabantil selamat kinatauhan doi mian mo Mian Bisa lapamo talimayo bunu mian mo sanaanggene konoano, akimo

ko Mian Bisa napalaatikangene do mianoo nakokubai-kokubai.
Daud bantile bunu naiya,

⁷ “Salamat kinatauwani komian mo inompuni kona
kasalaan-kasalaan

tukon nalalim-lalim lapamo Mian Bisa kibule!

⁸ Salamat kinatauwani komian nalalim-lalim mo aki
Temeneno natuntute!”

⁹Oilamo kai nabantilan nia salamat kinatauwani naiya tongo inotuuk doi mian mo loingiyo koatulan basunatanoo? Kai koidan doi mian moaki naloingiyo kopalatulan basunatan? Lapamo kami bantile loolukonoo baikon Abalaham Mian Bisa talimayo bunu mian mo sanaangene ko Mian Bisa noano, sabab Abalaham mangangga doi Mian Bisa. ¹⁰Nah, oilamo kai kotembono ko Mian Bisa naokitakanano do langgedoo? Akiyoon kai lapamo Abalaham sinunat? Takainomo akiyoon yana nasinunat, bolikon nalapaan. ¹¹Yana sinunat doibundu, tukon do nasunatoo tongo bunu paloosan baikon ko Mian Bisa lapamo natalimayo bunu mian mo sanaangene ko Mian Bisa noano, sabab mangangga doi Mian Bisa. Yana Mian Bisa talimayo doi tembo yana akiyoon namoloingikon kopalatulan sunat. Tukon Abalaham teali tama secala lohani doi sasaibino komian mo mangangga doi Mian Bisa, tukon kona sabab Mian Bisa lapamo talimayo bunu mian mo sanaangene konoano, mau kai yanila aki naloingiyo kopalatulan sunat. ¹²Abalaham koidan tama lohani tuuk mian mo loingiyo kopalatulan sunat. Yana tama lohani yanila bolikon tongo sabab yanila moloingi palatulan sunat, bai koidan sabab yanila tubo tukon mangangga doi Mian Bisa, pokakana Abalaham doi tembo yana akiyoon natulutiyo kopalatulan sunat.

Mian Bisa najanji tinalima sabab mangangga doi Mian Bisa

¹³Mian Bisa paladandi doi Abalaham tukon nakatulunan baikon nadunia nia naikon teali Abalaham nalangge. Mian Bisa paladandi bunu doiya bolikon sabab Abalaham nataatiyano koagama Yahudi atulano, bai sabab yana mangangga doi Mian Bisa tobikon yana Mian Bisa talimayo bunu mian mo sanaangene konoano. ¹⁴Sabab kalu tongo mian mo taatiyo

do atulanoo agama Yahudi tolong naikon komo talimayo oila ko Mian Bisa nadinandikon, maka do manganggaanoo doi Mian Bisa akiyo kona totuuk tuuno, tukon ko Mian Bisa najanji akiyo. ¹⁵Agama Yahudi atulano lubatene ko Mian Bisa naukuman. Bai kalu aki nadaano koukuman, aki nadaano kopalangalan.

¹⁶Jadi do Mian Bisadoo najanji luwedoi mian namanganggaan doi Mian Bisa. Doiya teali meeng kotambono doi sasaibino Abalaham nakatulunan baikon do janjidoo bineekon doi yanila bunu meeng kosabeat doi Mian Bisa; bolikon tongo doi yanila mo taatiyo koatulan agama Yahudi tolong, bai koidan doi yanila mo mangangga doi Mian Bisa pokakana bunu Abalaham mangangga doi yana. Sabab Abalaham daano tamanggita secala lohani. ¹⁷Sabab ko Mian Bisa bantile bunu naiya doi Abalaham, “Yaku lapamo tealikene ikoo tama tuuk doi bangsa badaang.” Bunomo lakon doiya ko Mian Bisa nabeekanano do janjidoo doi Abalaham, tukon Abalaham mangangga doi yana. Yanamo ko Mian Bisa mo otuboiyo komian momate; yanamo koidan ko Mian Bisa mo tukon nabantilan tolong kabai oila komo akiyon nadaano teali daano. ¹⁸Abalaham banggadudul moinikene tukon anggayo mau naakiyono komoinian koidan. Tobikon doiya yana teali tama doi badaang kobangsa. Bunu mo totulis doi Kitab Moliyous lalomo, “Komu katulunan naikon teali badaang tuuno.” ¹⁹Abalaham doiya kotembono toiyo baikon yana aki namungkin koidan modaano kona katulunan, sabab kobutongo todudulo motuwa tukon kona umul adukono sakat kotaum; baino kai koidan Salah, nabolokidoo, komba. Bai Abalaham namanganggaan aki nabolii. ²⁰Yana tataap mangangga tukon aki nabata-bata naikon doi Mian Bisa najanji. Tongo namanganggaan tosuungi bukuan, tobikon yana nggaa-nggaaale ko Mian Bisa. ²¹Yana mangangga tuuno baikon ko Mian Bisa moola lakukanggene oila komo lapamo paladandikene. ²²Doiya kosababpo Abalaham Mian Bisa talimayo bunu mian mo sanaangene ko Mian Bisa noano. ²³Bantilan, “tinalima bunu mian mo sanaangene ko Mian Bisa noano” totulis bolikon tongo tuuk doi Abalaham susuungo tolong, ²⁴bai koidan tuuk doi kita. Kita koidan naikon tinalima bunu mian mo lapamo sanaangene ko Mian Bisa noano, sabab kita mangangga doi

Mian Bisa mo otuboiyo Yesus, nda Temeneno, doi matean.
²⁵Yesusoo lapamo sinalakanggon sulano nainakate sabab nda lalim-lalim; maka yana Mian Bisa otuboiyo koidan sulano namoolakene kita pokindokon tukon Mian Bisa.

Pokindokon koidan tukon Mian Bisa

5 Diabudodoo kita lapamo pokindokon koidan tukon Mian Bisa, sabab kita mangangga. Tukon doiyamo kosababpo kita tubo doi podamean lalomo tukon Mian Bisa lolo doi nda Temeneno Yesus Klistus. ²Sabab kita mangangga doi Yesus, maka yana moolakene kita molasaiyo ko Mian Bisa namaasi, tukon do maasidoo doiyamo kita tubo diabudodoo. Tobikon doiya kita laba-laba sabab kita daano konda moinian baikon kita naikon daano motoupi kona monondokan Mian Bisa mo beekene! ³Tukon lobian doiyadoo, kita lakon laba-laba doi sakisaa lalomo, sabab kita toiyo baikon kosakisaa kubaiyo komian teali moonggol, ⁴tukon domoonggolanoo naikon kubaiyo komian taane koudian; naiyamo komo sumbetene komoinian. ⁵Moinian mo buno naiya aki naikon naokimaayo kita, sabab konoanggita lapamo Mian Bisa totuiyo tukon namaasi. Mian Bisa lakukanggene doiya tukon lolo doi na Loh, mo lapamo beekene doi kita.

⁶Salataa kita daano doi ndondoong akiyono kodaya, Klistus mate tuuk doi kita doi tembo mo tapaat Mian Bisa mo tantukanggene; banggokai kita mian mo dodoon doi Mian Bisa. ⁷Mau kai doi meeng-meeng komian mo adil bai maaling komian moyase mate. Ugaatene tuuk doi meeng komian monondok, daano koidan komian mo balani mate. ⁸Bai ko Mian Bisa okitakene kona maasi doi kita salataa Klistus mate tuuk kita doi tembodoo kita daano mian mobaladosa. ⁹Diabudodoo kita lapamo pokindok koidan tukon Mian Bisa mololoi Klistus namatean; tobikon doiya pasti kita naikon sinalamaton koidan luwedoi Mian Bisa nanggimalan doi Klistus. ¹⁰Kalu doi lounu kita pomusu tukon Mian Bisa, kita pinoodamekon tukon yana lolo doi na Pau namatean, baino kai koidan diabudodoo molapamo konda potaamian tukon Mian Bisa mondoko koidan, tantu kita naikon sinalamaton mololoi Klistus natuboan. ¹¹Tukon lobian doiyadoo, kita laba-laba koidan luwe Mian Bisa

namonondokan mololoi nda Temeneno Yesus Klistus. Sabab mololoi Klistus, kita diabudodoo lasaiyo konda potaamian mo monondokoo tukon Mian Bisa.

Adam tukon Klistus

¹²Lalim usok doi dunia lalomo luwedo meeng komian, tukon luwedo lalimoo sumbot komatean. Kona akibat, komatean landa doi sasaibino kobanggapi, sabab sasaibino kobanggapi baladosamo. ¹³Akiyoon koatulan agama Yahudi nabineekon, lalim daanomo doi dunia nia lalomo. Bai kolalim aki natinuntut sabab akiyo koatulan mo moola linumpai. ¹⁴Mau, doi Adam nalounu polong doi Musa nalounu, komatean kuasaiyo sasaibino kobanggapi. Bai komian mo aki namokubai palanggalan tukon cala mo pokakana bunu Adam nakinubai, do mianoo tulut koidan matean nakuasaiyo.

Adam daano timbalan doi yana naikon mo lubat doibundu. ¹⁵Bai domo luailadoo aki napokakana; sabab ko Mian Bisa nabineekon lobian mododoon kona babasalan kalu pinosasalakon tukon Adam napalanggalan kinubai. Meeng komian napalanggalan mangaanikene badaang komian momate. Bulaando koidan lobian babasal kona akibat doi Mian Bisa namaasi tukon natambo kasalamatan bineekon doi madaangan komian, luwe namonondokan konoano doi meeng komian, doiyamo Yesus Klistus. ¹⁶Mian Bisa natambo koidan lobian odoon kona babasalan doi meeng komian nalalimoo. Sabab sambuno lapa meeng komian lakukanggene do palanggalanoo, tobuat kokaputusan, "salamo". Bai salataa badaango komian mokubaiyo kolalim lubato ko Mian Bisa natambo mo okitakene, "Aki nasala". ¹⁷Tobikon meeng komian napalanggalan, komatean landa doi yayaa lolo doi mianoo momeeng. Bulaando lobian babasal koidan kona akibat oila doi meeng komian bailong nakinubai, doiyamo Yesus Klistus. Luwedo yana, ko Mian Bisa beekene kona maasi doi badaang komian, tukon cuma-cuma mominoolakon yanila pokindok koidan tukon Mian Bisa; yanila naikon balakuasa doi dunia luwe Klistus.

¹⁸Jadi, bunomo doiya meeng komian napalanggalan mangaanikene sasaibino kobanggapi inukum, bunomo lakon koidan meeng komian nakokubai mo loingiyo ko Mian Bisa


namongiasan, mangaanikene sasaibino komian sinodii doi nakasalaan tukon binee tuboan. ¹⁹Tukon bunomo lakon badaang komian moteali mian mobaladosa sabab meeng komian moaki nataat, bunomo lakon koidan badaang komian mominoolakon pokindokon koidan tukon Mian Bisa sabab meeng komian motaat doi Mian Bisa.

²⁰Komo beekene koagama Yahudi atulano doiyamo Mian Bisa susuungo. Bai pololokon kobanggapi kakaate motaatiyo do atulanoo, pololokon yanila lupaiyo tukon baladosa doi Mian Bisa. Mau napololokon kobanggapi kubaiyo kolalim, ko Mian Bisa pololokon seseange yanila. ²¹Nah, kita sio nda mate sabab kita kubaiyo kolalim. Bai ko Mian Bisa seseange kita tukon beena loloon doi kita sulano pokindokon koidan tukon yana. Tukon sabab nda potaamian tukon Mian Bisa lapamo monondok koidan, yana mebeekon tuboan mobisa tukon posidutukon doi kita luwedo nda Temeneno, Yesus Klistus.

Mate doi lalim tukon tubo pomeenggon tukon Klistus

6 Kalu buno doiya, oilakai komo moola kita bantile? Siokai kita momeenggon kubaiyo kolalim sulano napololokon Mian Bisa seseange kita? ²Tantu aki! Lalim akimo nabalakuasa doi kita, jadi, bulaando namoola kita tubo banggadudul momeenggon kubaiyo kolalim? ³Utus-utus kai toiyo baikon doi tembo nda sinauwan, kita pomeenggon tukon Klistus Yesus? Naiya koalatio kita pinomeenggon tukon namatean. ⁴Tukon do sinauwanoo, kita kinibul tukon Klistus tukon malaing mate posinggat yana, sulano buno Klistus nai notuboiyan doi matean luwe Tama nakuasa mo moliyous, bunomo lakon kita moola ompokoniiyo kotuboan mo boolu.

⁵Kalu kita lapamo teali pomeenggon tukon Klistus sabab kita malaing mate posinggat yana, kita naikon teali meeng tukon yana koidan sabab kita polaing inotuboi koidan buno yana. ⁶Kita toiyo baikon konda sipat loolukon buno banggapi molapamo inakate posinggat-singgat Klistus doi kayung sempang sulano kokuasa nda sipat mo baladosadoo naminanas; tukon buno doiya kita akimo koidan nda teali ata doi lalimoo. ⁷Sabab kalu memeeng komian momate do mianoo inosodiimo doi lalimoo nakuasa. ⁸Kalu kita lapamo mate posinggat Klistus,



Kayung sempang doi bunggul bungono (6:6)

kita anggayo baikon kita koidan naikon tubo posinggat yana. ⁹Sabab kita toiyo baikon Klistus lapamo inotuboi doi matean tukon yana naikon akimo namate koidan; komatean akimo nakuasaiyo kobutongo. ¹⁰Komatean Klistus mo toupiyo doiyamo do mateanoo doi dosa. Doiya teali idan luunggon tolong tuuk sidutu-posidutukon. Tukon tuboan nalinoloi diabudodoo nia doiyamo tuboan motuuk doi Mian Bisa. ¹¹Komuyu sio koidan poanggene kobutomuyu matemo doi lalim, bai tubo doi potaamian mo moonggol tukon Mian Bisa lolo doi Klistus Yesus.

¹²Inaimo mosodiikene kolalim nakuasaiyo komu tuboan sulano Utus inai muloingiyo komu mongiasan mo lokis. ¹³Inaikai koidan Utus mosalakangene kobutomu naanggota doi lalim nakuasa sulano napinake doi makisuut-makisuut mo lokis. Bai salakangene kobutomu doi Mian Bisa bunu mian mo lapamo biniyol luwe matean doi tuboan. Salakangene kobutomu sasaibino doi Mian Bisa sulano napinake tuuk molakukangene ko Mian Bisa namongiasan. ¹⁴Lalim aki namoola kuasaiyo komuyu sabab komuyu akimo potubo koidan doi atulan agama Yahudi bai tongo luwe Mian Bisa namaasi.

Ata doi Mian Bisa namongiasan

¹⁵Budodoiya, oila kona kasimpulan? Moola kai kita baladosa, sabab kita akimo koidan nda kinuasai agama Yahudi

naatulan, baikai luwedo Mian Bisa namaasi kuasano? Tutuu aki! ¹⁶Komuyu kai toiyu baikon kalu komuyu salakanggene kobutomuyu doi memeeng komian sulano nalakukanggene kona mongiasan maka komuyu daano do mianoo naata komuyu mo taatiodoo – kai lalim naata mo babayo komuyu doi matean, kai ata mo taat doi Mian Bisa, tukon kalu buno doiya pokindokon koidan doi Mian Bisa. ¹⁷Bai syukuul doi Mian Bisa! Sabab looluk komuyu teali lalim naata, bai budodoiya komuyu tukon sasaibino konoamuyu taatiyo kootunggul mobisa mo lapamo bineekon doikoo. ¹⁸Komuyu lapamo inosodii doi lalim, tukon budodoiya teali ata motuuk doi Mian Bisa namongiasan. ¹⁹Sabab komu pikilan todudul muyuk, yaku mapake sontoh-sontoh baataan sulano namoola komuyu mangalati. Loolukon komuyu salakanggene kobutomuyu sasaibino buno ata doi langge-langge mo manggilit tukon mo lokis motuuk doi makisuut mo lokis. Bunomo koidan diabudodoo, siokai komuyu posalakanggene kobutomuyu buno ata doi Mian Bisa namongiasan motuuk doi Mian Bisa namakisuut-makisuut mo tantu.

²⁰Tembo komuyu kinubai ata doi lalim, komuyu akimo pokinuasai doi Mian Bisa namongiasan. ²¹Doi tembodoo oila koutungo komuyu mo talimayo doi langge-langge naiya budodoo nia komuyu maaaa molakukanggene? Kokubai-kokubaidoo tongo babayo komatean! ²²Bai diabudodoo komuyu lapamo sinodii doi lalim, tukon teali Mian Bisa naata. Komu untung doiyamo baikon Utus tubo tongo tuuk Mian Bisa tukon do langgedoo lubatene kotuboan mobisa tukon posidutukon. ²³Sabab komatean doiyamo patambo lalim; bai tuboan mobisa tukon posidutukon polaing Klistus Yesus nda Temeneno doiya sabeat Mian Bisa mo beekene tukon cuma-cuma.

Atulan basowaanan daano sontoh

7 Utus-utusonggu! Utus sasaibino lapamo tingoniiyo koatulan. Jadi, komuyu toiyu baikon atulan nakuasa doi memeeng komian balalaku doi mianoo kalu daano motubo. ²Meeng koboine mo daanomo kona langkai, andeno tokooton luwe do andeanoo doi nalangkai tongo kalu kona langkai daano motubo. Kalu kona langkai mate, do bolokidoo tosodiimo doi atulanoo mo tokooton doi nalangkai. ³Kalu do boinedoo tubo tukon mala-malane bailong doi tembo nalangkai modaano tubo, maka do boinedoo binantil balolowa. Bai kalu nalangkai

mate, maka secala atulan, do boinedoo lapamo tosodii. Tukon kalu yana osowaan koidan doi malane bailong, maka yana aki nabololowa. ⁴Buno koidan kohallo tukon komuyu, Utus-utusonggu. Doi agama Yahudi naatulan komuyu lapamo mate, sabab komuyu lapamo pinomeenggon tukon Klistus butongo tukon tealimo yana nalangge mo lapamo inotuboi koidan doi matean. Yana inotuboi doi matean sulano kita teali daano kogunano doi Mian Bisa doi nda tuboan lalomo. ⁵Sabab, looluk kita tubo loloiyo kobanggapi nasipat-sipat. Doi tembodoo komongiasan mo baladosa, mo sumbot sabab nadaanoan koatulan agama, taaniyo tuuno doi butonggita lalomo. Doiyamo kosababpo kita molakukanggene kolangge-langge mo lubatene komatean. ⁶Bai diabudodoo kita akimo nda tokooton doi atulan agama Yahudi. Kita lapamo mate doi atulan loolukonoo mo kuasaiyo kita. Kita akimo koidan tubo tukon cala mo malumbito, loingiyo koatulan mo totulis. Diabudodoo kita tubo manulut cala moolu Mian Bisa Na Loh mo tudoikene doi kita.

Atulan tukon lalim

⁷Kalu buno doiya, oilamo komo moola kita bantile? Baikon koatulan agama Yahudi kulokis? Tantu aki! Bai do atulanoo komo otunggule yaku tentang lalim. Yaku aki naikon kutoiyo do modokodoo oila, kalu koatulan agama aki nabantile, "Inaikai momodoko." ⁸Luwe agama naatulan, kolalim malaat todanan sulano naosumbete sasaibino kolobo mo minomooton mokinodokoi doi noanggu lalomo; sabab kalu koatulan agama akiyo, maka dolalimoo mate. ⁹Yaku looluk daku tuboan akiyon nadaano koatulan agama. Bai salataa koatulan agama sumbut, kolalim tambuuno tubo tukon yaku mate. ¹⁰Maka do atulan agamadoo, kotumbeno minakisuuti sulano namebee tuboan, tongo olubatene komatean doi yaku. ¹¹Tobikon luwe do atulan agamadoo, lalim mangala todanan motipuwo tukon akateyo yaku.

¹²Atulan agama moluwedoi Mian Bisa, tukon sasamba kopalenta doi atulanoo lalomo kona lubatan luwedoi Mian Bisa, jadi adil tukon monondok. ¹³Nah, oilakai naiya koalantino baikon domo monondokoo olubatene komatean doi yaku? Tantu aki! Do lalimoo komo lubatene komatean. Tukon mapake

monondok, kolalim otubatene komatean doi yaku, sulano kosipat-sipat lalim tokita tukon tontong. Luwe Mian Bisa napalenta-palenta, kona bukutii bulaando kona lokisan kolalim.

Ponggelekiyan doi banggapi butongo lalomo

¹⁴Kita toiyo baikon koatulan agama Yahudi luwedo Mian Bisa Na Loh; bai yaku nia banggapi molemah. Yaku lapamo binalukon sulano teali lalim naata. ¹⁵Sabab yaku susuunggu aki kumangalatikene daku palabuatan. Langge-langge yaku mo yase kubaiyo, doiya yaku aki kulakukanggene; bai kolangge yaku mo misikitene, doiya komo yaku lakukanggene. ¹⁶Nah, kalu yaku lakukanggene kolangge-langge mo posasala tukon daku iniyas, doiya koalatino yaku akuiyo baikon do atulan agama Yahudido monondok. ¹⁷Jadi, bolikono koidan yaku kona tutuuwan komo lakukanggene doiya, bai lalim komo kuasaiyo kobutonggu. ¹⁸Yaku toiyo baikon akiyo komeeng kolangge komo monondok doi butonggu; doiyamo doi kusipat lalomo buno banggapi. Sabab daano daku mongiasan sulano kukubaiyo komo monondok, bai yaku aki kumoola moampakonggene. ¹⁹Yaku aki kukubaiyo komonondok komo yaku yase kubaiyo; baimo kai yaku kubaiyo kolangge-langge mo kulokis, yaku mo aki kuyase kubaiyo. ²⁰Kalu yaku kubaiyo kolangge-langge yaku mo aki kuyase kubaiyo, doiya koalatino bolikon kai yaku komo kubaiyo do langge-langgedoo, bai lalim mo kuasaiyomo kobutonggu.

²¹Jadi, yaku mangala kaputusan baikon naiyamo atulan nia komo taaniyo kokakuasaan; doiyamo baikon kalu yaku yase kubaiyo komo monondok, maka tongo mo kulokis tolong komo sumbut doi yaku. ²²Konounggu yase naikon ko Mian Bisa naatulan, ²³bai yaku toiyo baikon doi butonggu lalomo daano koidan koatulan bailong mo taaniyo kokakuasaan – doiyamo atulan mo aki napokokonoi tukon atulan kupikilan monondok mo moola akuiyo. Doiyamo kosababpo yaku tokooton doi atulan lalim mo balakuasa doi butonggu lalomo. ²⁴⁻²⁵Nah, buno naiya daku ndondoong; yaku taatiyo ko Mian Bisa naatulan tukon daku pikilan, bai tukon daku sipat banggapiyan, lalim kuasaiyo yaku. Bukan maen kona silakaan yaku nia! Indee kai komo yase salamatenene yaku doi butonggu nia mo babayo yaku

doi matean? Syukuul doi Mian Bisa! Yana yase salamatene yaku luwedo Yesus Klistus.

Tubeoan mo tulutiyo ko Mian Bisa Na Loh

8 Budodoiya akiyono koidan koukuman doi yanila mo tubo pomeenggon tukon Klistus Yesus. ²Sabab ko Mian Bisa Na Loh naatulan mo kubaiyo kita tubo pomeenggon tukon Klistus Yesus lapamo sodiiyo yaku doi atulan mo mangaanikene kolalim tukon matean. ³Oila komo aki namoola atulan agama lakukanggene, sabab kita banggapi molemah, doiya lapamo Mian Bisa lakukanggene. Mian Bisa kalayomo kolalim nakuasa doi banggapi natabiat lalomo tukon kapatuwe kona Pau susuungo, mo lubat pokakana tukon banggapi mo baladosa, sulano naapusanggene kolalim. ⁴Mian Bisa kubaiyo doiya sulano kona mongiasan inokitakon doi agama Yahudi naatulanoo moola inampakonggon doi butonggita lalomo mo tubo tulutiyo ko Mian Bisa Na Loh tukon bolikon tulutiyo kobanggapi natabiat. ⁵Mian mo tubo motulutiyo kobanggapi natabiat, banggadudul pikikene oila komo iniyas doi banggapi natabiat. Bai komian mo tubo tulutiyo ko Mian Bisa Na Loh, banggadudul pikikene oila ko Mian Bisa Na Loh nainiyas. ⁶Kalu komu pikilan banggapi natabiat kuasaiyo, maka kona akibat matean. Bai kalu komu pikilan Mian Bisa Na Loh kuasaiyo, maka kona akibat doiyamo tubeoan maka sanaangan tukon Mian Bisa. ⁷Mianno napikilan mokinuasai tukon banggapi nasipat, do mianoo pomusu tukon Mian Bisa; sabab do mianoo aki naloingiyo ko Mian Bisa naatulan; tukon takainomo yana aki naloingiyo ko Mian Bisa naatulan. ⁸Komian mo tubo moloingiyo kobanggapi nasipat, aki namoola sanaangene ko Mian Bisa.

⁹Bai komuyu aki potubo moloingi kobanggapi nasipat. Komuyu tubo tulutio Mian Bisa Na Loh - kalu, kona tutuuan, Mian Bisa Na Loh tutuu balakuasa doi butomuyu lalomo. Mian mo akiyo ko Loh Klistus, do mianoo bolikon Klistus namian. ¹⁰Bai kalu Klistus tubo doi butomu lalomo, maka mau kai kobutomu naikon namate sabab lalim, bai ko Mian Bisa Na Loh beena tubeoan doikoo, sabab komu potaamian tukon Mian Bisa lapamo monondok. ¹¹Kalu ko Mian Bisa Na Loh, mo otuboiyo Klistus doi matean, tubo doi butomu lalomo, maka yana mo otuboiyo Klistus doi mateanoo, naikon otuboiyo kobutomu

koidan domo moola matedoo. Yana lakukanggene doiya tukon na Loh mo tubo doikoo.

¹²Doiyamo kosababpo, Utus-utus, kita daano konda tanggung jawab; bai bolikon tanggung jawab doi banggapi nasipat; kita aki napalaluu tubo loingiyo kona mongiasan. ¹³Sabab kalu komuyu tubo mololoi banggapi nasipat, maka komuyu naikon mate; bai kalu tukon kuasa Mian Bisa Na Loh, komuyu banggadudul moakateyo komu kokubai-kokubai mo baladosa, maka komuyu naikon tubo. ¹⁴Ko mian-mian mo Mian Bisa Na Loh motuntune, daanon Mian Bisa napau-pau. ¹⁵Sabab ko Mian Bisa Na Loh, mo beekene doi komuyu, aki kai nakubaiyo komuyu teali ata tobikon komuyu tubo doi matakutan lalomo. Kobalino do Mian Bisadoo Na Loh tealikene komuyu Mian Bisa napau-pau. Tukon do kuasadoo Mian Bisa Na Loh kita uange do Mian Bisadoo "Tama, oh Tamanggu!" ¹⁶Mian Bisa Na Loh polaing-laing tukon kita naloh okitakene baikon kita daano Mian Bisa napau-pau. ¹⁷Nah, kalu kitadoo daano napau-pau, maka mau nai kita nia daano napangalus naikon mo mantalima balakaat-balakaat Mian Bisa mo sadiakene tuuk doi napau-pau. Kita naikon mantalima polaing-laing tukon Klistus oila komo lapamo Mian Bisa sadiayo doi yana; sabab kalu kita sakisaa polaing Klistus, kita naikon kinabasal koidan polaing yana.

Namonondokan mo posidutukon

¹⁸Sasaibino kosakisaawan kita mo toupiyo budodoiya, manulut daku palaat, aki namoola pinosasalakon tukon namonondokan naikon mo inokitakon doi kita. ¹⁹Sasaibino kodunia montotiili tukon poloon tuuno naikon kotembono ko Mian Bisa naokitakanano kona pau-pau. ²⁰Sabab kodunia sinodiikono sulano nateali manas, bolikon sabab namongiasan susuungo, bai sabab ko Mian Bisa sodiikenemo bunu doiya. Mau kai nabuno doiya daano koidan komoinian nia: ²¹baikon daano kotembono meeng kodunia naikon inosodii doi kuasa mo manase tukon naikon tulut minaladekakon inakabasal polaing tukon Mian Bisa napau-pau.

²²Kita toiyo baikon polong doi tembo naposaapon kodunia bebe sabab sakisaa bunu meeng koboloki mosakisaa doi

tembo namosuungan pau. ²³Tukon bolikono tongo posaapon kodunia komo bebe; kita susuunggita bebe doi noanggita. Kita lapamo mantalima Mian Bisa Na Loh buno Mian Bisa nasabeat tumbeno, maka kita daano koidan montotiili Mian Bisa nasodiiyano kobutonggita sasaibino tukon tealikene kita napau-pau. ²⁴Sabab tukon moinian, maka kita sinalamaton. Bai kalu oila doi kitadoo momoinikene kita lapamo kitayo, maka doiya bolikono koidan moinian. Sabab indee kai komo daano momoinikene komeeng kolangge mo lapamo kitayo? ²⁵Bai kalu kita moinikene komeeng kolangge mo akiyoon nda kitayo, maka kita montotiili tukon sabal.

²⁶Bunomo koidan ko Mian Bisa Na Loh lubat tulunge kita kalu kita lemah. Sabab kita aki nda toiyo bulaando kona tutuuwan konda sambeangan; do Lohdoo susuungo mangadap doi Mian Bisa tuuk mokabiyo doi kita tukon poloonan tuuno tobikon aki namoola nabantile. ²⁷Maka ko Mian Bisa mo toiyo kobanggapi noano lalomo, mangalatikene do Lohdoo namongiasan; sabab do Lohdoo kabiyo doi Mian Bisa tuuk doi Mian Bisa namian, tukon pokokonoi ko Mian Bisa namongiasan.

²⁸Kita toiyo baikon ko Mian Bisa atule sasaibino kolangge, tobikon olubatene komo monondok doi mian mo seseange yana tukon mo inuang pokokonoi tukon kona tetel. ²⁹Yanila mo lapamo Mian Bisa piliyo, lapamo koidan tinantukon doi tembono sulano nateali pokakana tukon na Pau, doiyamo Yesus Klistus. Tukon nabuno doiya do Paudoo teali kotumbeno doi antala badaang koutus-utus. ³⁰Bunomo doiya ko Mian Bisa nauangano yanila mo lapamo yana tantukene loolukon; tukon doi yaniladoo mo inuang, minoolakon pokindokon koidan tukon yana. Tukon yanila mo minoolakon pokindokon koidan tukon Mian Bisa, mangala obos tuboan doi Mian Bisa lalomo susuungo.

Mian Bisa namaasi tukon palantalaan Yesus Klistus

³¹Oila komo moola binantil budodoiya tentang sasaibino doiya? Kalu Mian Bisa ala doi kita, indee komo moola lawane kita? ³²Na Pau susuungo aki naseseange, bai yana salakanggene tuuk kita sasaibino nakopontingan; bulaa kai yana aki naikon

nabeekene doi kita sasaibino kolangge bailong? ³³Indee kai komo moola gugate kita Mian Bisa namian lilik, kalu ko Mian Bisa susuungo okitakene baikon kita aki nda sala? ³⁴Oilakai daano komian mo yase salakene kita? Yesus Klistus naikon komo belayo kita! Yanamo komo lapamo mate, kai inotuboi koidan doi matean tukon daano doi Mian Bisa doi tempat mo balakuasa. ³⁵Oilakai daano komo moola alangiyo Klistus naseangano kita? Moola kai kokasusaan naalangiyo, kai kasukalan, kai poloilokisan, kai malaalan, kai talalaisan, kai silakaan, kai matean? ³⁶Doi Kitab Moliyous lalomo totulis buno naiya,

“Sasaibino kooloyo kami tubo doi silaka matean lalomo sabab ikoo.

Kami kinubai buno domba naikon mo tinembel.”

³⁷Aki! Tongo doi lalomodoo sasaibino kita malaat kamanangan mo bisa doi yana mo seseange kita! ³⁸Sabab yaku anggayo tuuno baikon doi posaapon kodunia, mau matean mau tuboan, mau malaekat mau ponguasa, mau polobosian-polobosian naiya budodoo, mau polobosian-polobosian doi lounu naikon mo lubat kai bukuanan-bukuanan bailong; ³⁹mau langge-langge doi timbu, mau langge-langge doi dunia lalomo kai oilamo kobailong, sasaibino aki namoola alangiyo ko Mian Bisa moseange kita, buno komo lapamo tudoikene luwe Klistus Yesus, nda Temeneno.

Mian Bisa tukon namian mo topili

9 Oila komo naikon yaku mobantile nia doiya bisa sabab yaku Klistus koono. Yaku aki kubakala-kala. Noanggu lalomo Mian Bisa Na Loh komo lolainge, ekeenggele yaku koidan baikon daku bantilan nia bisa. ²Yaku susa tuuno tukon konoanggu susa, ³sabab utus-utusonggu momeeng bangsa tukon yaku. Sabab tuuk yanila, yaku susuunggu yase ko Mian Bisa nakutuke tukon napinoalaason tukon Klistus. ⁴Yanila daano mian mo ililik tukon Mian Bisa tealikene yanila napau-pau susuungo, tukon okitakene kona kuasa doi yanila. Yana kubaiyo kona paladandian tukon yanila tukon beena doi yanila agama atulano. Mian Bisa popitoikene doi yanila bulaando yanila sio nabakaleda tukon yanila lapamo koidan mantalima kona

paladandian. ⁵Yanila daano tumbunggita nakatulunan. Klistus secala banggapian kona luwean doi yanila nabangsa. Yana lobian tatandak doi sasaibino kobanggapi. Ngginaal ko Mian Bisa sidutu-posidutukon! Amin.

⁶Yaku aki kumakisutiyo mobantile baikon ko Mian Bisa napaladandian akimo nateali koidan; bai bolikon sasaibino ko Israel miano doiya mian Mian Bisa mo lilike. ⁷Aki nasasaibino Abalaham nakatulunan Mian Bisa napau-pau. Sabab ko Mian Bisa bantile doi Abalaham, “Tongo Ishak nakatulunan komo binantil mukatulunan.” ⁸Doiya koalatio baikon Abalaham nakatulunan komo teali Mian Bisa napau-pau; doiya tongo nakatulunan mo sinuung sabab Mian Bisa napaladandian; tukon bolikon sasaibino kona katulunan. ⁹Sabab ko Mian Bisa napaladandian daano bunu naiya, “Doi tembo mo tinantukon, yaku naikon abali, tukon Salah naikon malaat meeng kopau mamalane.”

¹⁰Tukon naiya koidan: Libka mosuung lua kona pau malamane doi meeng kotama, doiyamo Ishak tumbunggita. ¹¹Akiyoon do paudoo molua nasinuung, Mian Bisa lapamo tantukanggene kona lilikan tuuk doi nabanggadudulan. Mian Bisa napilianoo aki natokooton doi oila komo moola mian lakukanggene, bai tokooton doi Mian Bisa naponguang susuungo. Sabab salataa doi Libka napau mamalane moluadoo akiyoon namoola kubaiyo kolobo monondok kai mo kulokis, ¹²Mian Bisa lapamo bontiikene doi Libka, “Kolanggongo leleaniyo kopiyoto.” ¹³Doi Kitab Moliyous lalomo totulis baikon ko Mian Bisa bantile bunu naiya, “Yakub yaku seseange, bai Esau yaku misikitene.” ¹⁴Oila konda kasimpulan budodoiya? Baikon do Mian Bisadoo aki kai naadil? Takainomo tantumo ko Mian Bisa adil! ¹⁵Sabab ko Mian Bisa bantile doi Musa, “Yaku naikon otudoikene komaasi doi mian mo yaku yase tudoikene komaasi, tukon yaku naikon otudoikene koposeangan doi mian yaku mo yase otudoikene koposeangan.” ¹⁶Jadi, ko Mian Bisa nakaputusanoo aki nabaino tokooton doi banggapi namoloyosan kai doi banggapi nakakaatean, bai doi Mian Bisa namonondokan konoano doi namian lilikoo. ¹⁷Sabab doi Kitab Moliyous lalomo totulis, “Mian Bisa bantile doi Tomundo Mesil, ‘Yaku tealikene

ikoo tomundo tuuk doi meeng komakisuut nia, doiyamo sulano tukon ikoo, yaku okitakene daku kakuasaan tukon kubaiyo kosambumu tololongol doi posaapon kodunia.’” ¹⁸Jadi, ko Mian Bisa mamaasikene memeeng komian, kalu ko Mian Bisa yase buno doiya koidan. Tukon ko Mian Bisa mangaanikene memeeng komian teali matikas konoano, kalu ko Mian Bisa pakituuwo bunodoiya koidan.

Mian Bisa nanggimalan tukon Mian Bisa noano namonondokan

¹⁹Nah, Utus naikon bantile doi yaku, “Kalua buno doiya bulaando ko Mian Bisa modaano yase asalakene kobanggapi? Bolikon kai akiyo komeeng komian momoola halangiyo ko Mian Bisa namongiasan?” ²⁰Bai Utus! Utus tongo banggapi biasa. Tukon Utus aki namoola balani motimbili doi Mian Bisa! Moola kai kopoot bunga mansadai doi mian mo kubaiyo, “Bulaando ikoo mokubaiyo yaku buno naiya?” ²¹Bolikon kai komian mo kubaiyo kopoot bungadoo daano konahaak kubaiyo kobuta tobunanoo manulut noano namongiasan? Luwedo kokopolo kobuta tobunan, do mianoo daano konahaak mokubai lua kokaliangano kopoot bunga: meeng komonondok, tukon kobailong kinduung namonondok.

²²Bunomo koidan lakon tukon oilamo ko Mian Bisa nakinubai. Yana batetel sulano natipase kona nggimalan tukon okitakene kona kakuasaan. Bai yana sabal doi yanila mo sio nainukum sabab kubaiyo yana nggimal. ²³Mian Bisa koidan batetel sulano naotudoikene doi kita komonondokan moloblobian mo kundongiikene doi kita mo sineang-seang. Kita lapamo sinadiakon sulano nda mantalima do monondokanoo. ²⁴Kitamo kai komo lapamo inuang, bolikon tongo doi bangsa Yahudi, bai koidan doi bangsa bailong. ²⁵Sabab doi buku Nabi Hosea lalomo, Mian Bisa bantile,

“Mian-mian mo bolikon kumian,
naikon kubantile ‘Kumian’.

Bangsa mo aki kusea-seange,
naikon kubantile ‘Kukokasi’.

²⁶ Tukon doiyaa kotampato kona binantilan doi mian, ‘Komuyu bolikon kumian,’

idoo do mianoo naikon sinombuikon Mian Bisa napau-pau mo tubo.”

²⁷Nabi Yesaya bantile tukon tegas manganai bangsa Israel, “Bisa kai koaito kobangsa Israel pokakana kobone doi tobun, tongo soisik tolong komo naikon selamat. ²⁸Sabab ko Mian Bisa naikon mosobito otuwenge koukuman doi dunia nia antoko.”

²⁹Yesaya bantile buno naiya koidan, “Koandeino ko Mian Bisa Babasal kona kuasa aki naotinggale doi kita kokatulunan, pasti kita sasaibino lapamo teali buno Sodom tukon Gomola.”

Potaamian antala Mian Bisa namian tukon Bilita Monondok mo luwedoi Mian Bisa

³⁰Jadi, kokasimpulano doiyamo nia: Bangsa-bangsa bailong mo bolikon Yahudi aki nakakaate sulano yanila napotaamian tukon Mian Bisa teali monondok koidan. Bai sabab yanila anggayo, maka ko Mian Bisa kubaiyo kopotaamian yanila tukon yana teali monondok koidan. ³¹Kobalino, ko Yahudi miano sidutu kakaate motaatiyo koatulan sulano kona potaamian yanila tukon Mian Bisa teali monondok koidan. Bai yanila aki nabalahasil. ³²Bulaando yanila moaki nabalahasil? Sabab yanila lakukanggene doiya aki naluwe manganggaan doi Mian Bisa, baimo luwe yanila nakakaatean susuungo. Maka yanila otuwong tasambekon doi “Batu Sambekonan”. ³³Manganai do batudoo doi Kitab Moliyous lalomo totulis buno naiya,

“Popalatikanggene naiya: Doi Sion lapamo kubinggakene komeeng kobatu

naikon mo tealikene komian tasambekon;

doiyamo meeng kobatu babasal naikon mo tealikene komian otuwong.

Bai mian mo anggayo doi yana

aki naikon napau-pauno konoano.”

10 Utus-utus! Yaku poloon tuuno sulano daku bangsa nasinalamaton. Tukon yaku tutuu sambeang doi Mian Bisa tuuk doi yanila. ²Yaku balani bantile baikon yanila samangat tuuno mangangga doi Mian Bisa. Bai yaniladoo nasamangat aki nadasalkanggene motoiyan mo luwedoi Mian Bisa. ³Yanila aki natoiyoyo ko Mian Bisa nacala mokubaiyo kobanggapi napotaamian tukon yana moteali monondok koidan.

Tukon sabab yanila yase loingiyoyanila nacala susuungo, maka yanila aki namololoi kocala ko Mian Bisa natinudoikon. ⁴Atulan agama lapamo Klistus daanokene. Jadi memeeng komian mo mangangga doi Klistus, kona potaamian tukon Mian Bisa tealimo monondok koidan.

Kokasalamatan daano motuuk doi sasaibino komian

⁵Musa tulise baikon komian mo pomonondokon tukon Mian Bisa luwedoi agama atulano, do mianoo naikon tubo sabab loingiyoyanila do atulan agamadoo. ⁶Bai manganai cala mian pomondokon tukon Mian Bisa luwe manganggaan doi Mian Bisa, Kitab Moliyous bantile bunobunonaiya, “Mau kai naaki ikoo mubantile doi noamu lalomo, ‘Indeemo kai naikon komo liba doi sulugaa?’ (alatino babayo Klistus obulus), ⁷kai ‘Indeemo naikon komo loboson doi dunia mian mate?’ (koalatino bingkate Klistus liba doi matean).” ⁸Kona makisuut bunobunonaiya, “Bilita doi Mian Bisadoo loolani tuuno doikoo; doi babamu tukon noamu lalomo.” Doiyamo kobilita kami mo babilitakene; bilita baikon komian sio namangangga. ⁹Sabab kalu Utus mangaku tukon suumu baikon “Yesus doiyamo Temeneno”, tukon Utus mangangga doi noamu lalomo baikon ko Mian Bisa lapamo otuboiyo Yesus doi matean, maka Utus naikon selamat. ¹⁰Sabab tukon mian noano mo mangangga, tobikon ko Mian Bisa talimayo yana bunobunonaiya mo pomondokon tukon Mian Bisa. Tukon mian babano momangaku, tobikon yana sinalamat. ¹¹Doi Kitab Moliyous totulis, “Mian mo mangangga aki naikon nainokimaa.” ¹²Doiya tealimo doi sasaibino komian, sabab akiyo kona posasalaan antala Yahudi miano tukon mian bangsa bailong. Mian Bisa mo meengoo daano Temeneno motuuk sasaibino komian. Yana mebee balakaat mo lobi-lobian doi sasaibino komian mo mangkabi tulung doi yana. ¹³Doi Kitab Moliyous lalomo totulis, “Sasaibino komian mo nggeleamon doi Temeneno, naikon selamat.”

¹⁴Bai bulaando kai komian momoola nggeleamon doi Temeneno kalu yanila akiyoon namangangga? Tukon bulaando kai yanila momoola mangangga doi Temeneno kalu yanila akiyoon namolongol tentang yana? Koidan, bulaando kai yanila momoola molongol tentang Temeneno, kalu akiyo komo

babilitakene? ¹⁵Tukon bulaando kai komian momoola babayo do bilitadoo kalu yanila aki nabinintokon? Doi Kitab Moliyous lalomo totulis bunu naiya, “Bukan maen kona monondokan komian molubat mo babayo ko Bilita Monondok moluwedoi Mian Bisa!” ¹⁶Bai aki nasasaibino komian mantalima do Bilita Monondokoo. Sabab Yesaya bantile, “Temeneno, indee kai komo anggayo komai bilita?” ¹⁷Doiya kosababpo komian moteali mangangga sabab yanila molongol bilita, tukon kobilita linongol sabab daano komian mo babotilangene tentang Klistus.

¹⁸Bai yaku mansadai: Oilakai bisa yanila akiyoon namolongol do bilitadoo? Pasti lapamo! Sabab doi Kitab Moliyous lalomo totulis bunu naiya,

“Yanila alalo tololongolo doi posaapon kodunia,
yanila nabantil-bantilan lapamo polong doi lipu bunduno.”

¹⁹Yaku mansadai koidan: Oilakai bangsa Israel akiyoon namotoi? Sodiiyomo do pasadaidoo tumbe-tumbeno Musa natimbiliyo. Musa bantile, “Bunu naiya ko Mian Bisa nabantilano,

‘Yaku naikon kubaiyo komuyu masakit konoamuyu doi
bangsa mo bolikon umat
tukon yaku naikon kubaiyo komuyu nggimal doi meeng
kobangsa mo longas.’ ”

²⁰Yesaya pololokon koidan balani. Yana bantile, “Bunu naiya ko Mian Bisa nabantilano,

‘Komian mo aki naumboliiyo yaku, lapamo pososunggene
yaku;
tukon yaku okitakene kobutonggu doi yanila mo aki
namansadaikene tentang yaku.’ ”

²¹Bai manganai bangsa Israel Yesaya bantile, “Bunu naiya ko Mian Bisa nabantilan, ‘Sasamba kooloyo yaku ulule kolimanggu doi meeng kobangsa mo matikas konoano tukon aki nataat.’ ”

Mian Bisa namonondokan konoano doi bangsa Israel

11 Yaku mansadai: Oilakai ko Mian Bisa lapamo sakukene kona mian susuungo? Tantu aki! Yaku susuunggu meeng ko Israel miano katulunan Abalaham, tukon doi suku Benyamin. ²Aki! Mian Bisa aki nasakukene kona mian mo lapamo lilike salataa doi looluk. Utus-utus toiyo oila komo

totulis doi Kitab Moliyous lalomo manganai Elia, salataa yana popitoikene kosoal Israe! doi Mian Bisa. Elia bantile,³ “Temeneno, komian lapamo akateyo komu nabi-nabi tukon momanase kotampat-tampat mososubakonon sosubakon motuuk doikoo. Totinggal yaku susuunggu tukon yanila yase akateyo yaku.”⁴ Oilakai ko Mian Bisa napotimbili doi Elia? Mian Bisa timbiliyo, “Yaku lapamo otinggale kopitu kolono komian motuuk doi butonggu susuunggu. Yanila akiyoon nabiasa mososubaiyo ko Dewa Baal.”⁵ Bunomo koidan budodoiya nia: Daano kosoisik koaito komian mo lapamo Mian Bisa lilike sabab namaasi.⁶ Yana lilike yanila luwe namaasi tukon bolikon luwe yanila nakokubai. Sabab kalu do Mian Bisadoo namolilikan luwedo! banggapi nakokubai, maka ko Mian Bisa namaasidoo bolikon kai maasi mo bisa.

⁷Jadi, bulaandomo? Israe! miano aki nalaate oila komo yanila konapo inumbal. Komo malaat tongo meeng kotambuno poipoisik doi mian mo lapamo Mian Bisa lilike. Kobailong sasaibino teali matikas konoano doi Mian Bisa naponguang.⁸ Sabab doi Kitab Moliyous lalomo totulis buno naiya, “Ko Mian Bisa kubaiyo yanila noano tukon yanila napikilan kalipookan; tukon polong nai tembo nia yanila matano aki namoola mokita tukon yanila tolingaino aki namoola molongol.”⁹ Daud bantile koidan,

“Sodiiyomo yanila nalame-lamean teali palako doi yanila
susuungo,
tukon teali buang, tempat yanila naotuwongan tukon
manas!

¹⁰ Sodiiyomo yanila napokita teali kalipookan sulano yanila aki
namoola mokita;
tukon sodiiyomo yanila teali aki namoloyos posidutukon.”

¹¹Yaku mansadai koidan: Salataa ko Yahudi miano otuwong, oilakai doiya teali sulano yanila namanas? Aki nabuno doiya! Bai sabab yanila baladosa, maka kobangsa bailong naikon sinalamaton, tobikon mangaanikene ko Yahudi miano masakit konoano doi bangsa bailong.¹² Sabab bangsa Yahudi daano kona sala tukon aki naloloiyo ko Mian Bisa namongiasan, maka bangsa-bangsa bailong Mian Bisa balakaatiyo. Baimo kai kalu

kopataamian kobangsa Yahudi tukon Mian Bisa teali monondok koidan; tantu lobian babasal koidan kobalakaat naikon Mian Bisa nabineekon!

Kasalamatan bangsa-bangsa bailong mo bolikon Yahudi

¹³Bai budodoiya kona monondokan yaku mobasilingan doi Utus-utus mo bolikon Yahudi! Buuniamo, buno meeng kolasul motuuk doi bangsa-bangsa mo bolikon Yahudi, yaku holomatiyo tuuno daku limang nia. ¹⁴Yaku moinikene yaku moola osumbutene konoa masakit doi kubangsa susuunggu, sulano tukon doiya loloonoo yaku moola salamatene kosoobos doi yanila. ¹⁵Sabab yanila Mian Bisa tolake, maka kona potaamian kodunia tukon Mian Bisa teali monondok koidan; baimo kai kalu yanila Mian Bisa talimayomo! Tantu doiya pokakanamo buno komian momate tubo koidan!

¹⁶Kalu meeng kopatolo koloti tumbeno lapamo bineekon doi Mian Bisa, doiya koalatio sasaibino kona loti bineekon doi Mian Bisa koidan. Tukon kalu kokayung anggolo daano Mian Bisa koono, doiya koalatio kolanga-langaano daano koono koidan. ¹⁷Kosoobos doi kayung zaitun langa-langaano – doiyamo Yahudi miano – molapamo linengei. Tukon doi nalinengeiyanoo inosulikon kokayung zaitun mosolot langaano, doiyamo Utus-utus mo bolikon Yahudi. Utus sinumbokiikon idoo sulano Utus nalasaiyo sasaibino komo monondok luwedo tuboan lohani Yahudi miano. ¹⁸Tobikon doiya inaikai komuyu moambangene yanila mo lapamo linengei buno do kayungoo langaano. Komuyu sio poneneeke baikon komuyu tongo langaano tolong. Tukon bolikono langaano komo beena kaan doi anggolo, bai anggolo komo beena kaan doi langaano.

¹⁹Bai Utus naikon bantile, “Oode, bai do langa-langanodoo pinatol sulano yaku moola sinumbokiikon doi batango!” ²⁰Doiya bisa tuuno. Bai yanila sinakukon sabab aki namangangga, bai kai Utus tinalima sabab Utus mangangga. Jadi inaikai Utus teali banggaal doi yana; kobalino Utus sio mumatakut. ²¹Sabab kalu ko Mian Bisa aki nalasayo moseange sulano nasakukene ko Yahudi miano mo buno do kayung-kayungoo langa-langaano tuuno, inai moambangene yana naikon malasa seang mosakukene ko Utus. ²²Jadi dimbaa kita kitayo bulaa kona monondokan ko Mian Bisa tukon bulaa kona motikasan koidan. Yana tindokiiyo motikas doi yanila mo baladosa, bai yana monondok konoano

doi Utusoo - asal Utus tataap tubo doi namonondokan. Kalu aki, maka Utus koidan naikon sinakukon. ²³Tukon manganai Yahudi mianodoo, kalu yanila tade doi nasikap moaki namangangga, maka yanila naikon tinalima koidan; sabab ko Mian Bisa balakuasa sulano natalimayo yanila koidan. ²⁴Utus mo bolikon kona luwean doi Yahudi bangsa modaano buno langaano doi zaitun batango mo solot. Nah, kalu Utus, podangaanikene tukon Utus nasipat, moola nasinumbokiikon doi zaitun batangodoo tuuno, baimo kai koidan ko Yahudi miano mo inandekon tukon zaitun batango tuuno langa-langaano. Tantu lobian kona gampangan koidan doi Mian Bisa sulano naabalinggene yanila doi napo zaitun batango yanila susuungo.

Mian Bisa naseangano sasaibino kobanggapi

²⁵Utus-utus! Yaku moinikene komuyu inai molasayo lapamo toiyo sasaibinodoo. Sabab daano komeeng kolangge Mian Bisa mo yase, bai mo akiyoon mian natoiyoo. Tukon yaku yase komuyu potoiyo; doiyamo nia: Kosoobos ko Yahudi miano motikas konoano, bai doi yanila nandondoongoo naikon banggadudul tongo polong koaito mian-mian mobolikon Yahudi komo lubat doi Mian Bisa lapamo tasadia. ²⁶Bunomo lakon sasaibino ko Yahudi miano naikon salamat. Sabab doi Kitab Moliyous lalomo totulis buno naiya,

“Tomundo Pasalamat naikon lubat, luwedoi Sion;
yana naikon apuse sasaibino kona kulokisan doi Yakub
nakatulunan.

²⁷ Yaku naikon boboiyo napaladandian nia tukon yanila
doi tembo yaku ompuniyo yanila nalalim-lalim.”

²⁸Sabab ko Yahudi miano aki nayase mantalima Bilita Monondok moluwedoi Mian Bisa, maka yanila teali Mian Bisa namusu; tukon doiya maka teali kauntungan doi Utus-utus mo bolikon Yahudi. Bai sabab Mian Bisa molilike, maka do Yahudi mianodoo Mian Bisa tataap seseange sabab tumbunoila.

²⁹Sabab kalu Mian Bisa lilike komian tukon balakaatiyo do mianoo, ko Mian Bisa aki nabiasa abali talike oila komo lapamo yana kubaiyo. ³⁰Loolukon komuyu aki potaat doi Mian Bisa. Bai diabudodoo ko Mian Bisa lapamo okitakanggene baikon komuyu tongosodiimo doi kasalaan, sabab ko Yahudi miano

aki nataat. ³¹Bunomo lakon koidan tukon do Yahudi mianodoo. Diabudodoo nia yanila aki nataat doi Mian Bisa, sulano komuyu poinokitakon tongosodiian doi kasalaan. ³²Sabab ko Mian Bisa lapamo sodiikene sasaibino kobanggapi doi naakiyan nataat nakuasaiyo, sulano yana namoola tudoikene kona seangano doi yanila sasaibino.

Nggaalano ko Mian Bisa

³³Bisa tuuno ko Mian Bisa nakaasaan! Bisa babasal kona pandoiyan tukon namongotoiyan! Indee kai komo moola selidikiyo kona kaputusan? Indee kai komo moola mangalatikene yana nacala-cala balimangan? ³⁴Doi Kitab Moliyous lalomo totulis bunu naiya,

“Indee kai komo toiyo ko Temeneno napikilan?

Indee kai komo moola mebee otunggul doi yana?

³⁵ Indee kai komo biasa beena lobo meeng doi Temeneno tobikon namoola tuntute kopoulosobolino?”

³⁶Mian Bisa komo tealikene sasaibino kolangge. Sasaibino kona luwean doi Mian Bisa tukon doiya tuuk doi Mian Bisa. Tanggaal ko Mian Bisa tuuk sidutu-posidutukon! Amin.

Tubo tuuk Mian Bisa

12 Utus-utus! Ko Mian Bisa monondok tuuno doi kita. Doiyamo kosababpo yaku kabiyo tukon tutuu sulano komuyu pososubakene kobutomuyu bunu meeng kososubakon motubo mo kusus tuuk doi Mian Bisa tukon mo sanaanggene konoano. Komu manganggaan doi Mian Bisa siokai nabuno doiya. ²Inai mololoiyo nadunia nia namongiasan. Sodiiyomo ko Mian Bisa nakubaiyo kobutomu teali boolu, sulano komuyu tobolii. Tukon kalu bunu doiya komuyu moola toiyo ko Mian Bisa namongiasan – doiyamo oila komonondok tukon mo sanaanggene konoano tukon mo talakana.

³Mian Bisa lapamo beena doi yaku kona monondokan. Doiya kosababpo yaku mongotinau Utus-utus sasaibino: Inaikai molasaiyo kobutomu lobian tatandak doi mo tutuu. Tadukai komuyu ponilaiyo kobutomuyu nandondoong tukon poekependeyo konoamuyu; meeng-meeng komian nilaiyo kobutongo manulut nakamampuan Mian Bisa mo beekene doi yana sabab yana

mangangga doi Yesus. ⁴Kobutonggita daano badaang kona anggota. Sasamba koanggota daano kona limang susuungo. ⁵Bunomo koidan tukon kita. Mau kai kita sasaibino nabadaang, bai kita pokakana meeng kobutonggita sabab kita pomeenggon doi Klistus. Tukon kita meeng-meeng komian potaami meeng tukon bailong buno anggota-anggota doi meeng kobutonggita. ⁶Kita meeng-meeng komian daano kona kalunia baleleanian mo posasala. Kalunia-kaluniadoo Mian Bisa beekene doi kita luwe namaasi. Tobikon doiya kita sio nda pakeyo do kalunia-kaluniadoo. Komian mo daano kona kalunia sulano nababilitakene kobilita moluwedoi Mian Bisa sio nababilitakene do bilitadoo moluwedoi Mian Bisa manulut nakamampuan mo daano doi yana. ⁷Mian mo daano kona kalunia motuuk motulungian mian bailong, sio natutuuno tulungiyo komian bailong. Mian mo daano kona kalunia sulano namongotunggul, sio natu-tuuno mongotunggul. ⁸Mian mo daano kona kalunia motuuk mobeean samangat doi mian bailong, sio natutuu mobee samangat doi mian bailong. Mian mo daano kona kalunia motuuk mendebean doi mian bailong oila komo daano doi yana, sio nalakukanggene doiya tukon noano nasanaangan secala natalakanaan. Mian mo daano kona kalunia motuuk katuaiyo sio natutuu katuaiyo. Mian mo daano kalunia motuuk motudoikonan seang doi mian bailong, sio nalakukanggene tukon noa sanaang.

⁹Seseange tukon sanaang. Misikitene komo lokis, tukon bataani doi oila komo monondok. ¹⁰Siokai Utus-utus poposeanggon meeng tukon bailong tukon polasaiyo buno mian mo montolutus doi meeng kobonua lalomo, siokai komuyu po matailukiyo beena adat. ¹¹Pobalimang tukon molole. Inai mobea. Balimango motuuk doi Temeneno tukon samangat moluwedoi Mian Bisa Na Loh. ¹²Siokai Utus mumoini doi Temeneno tukon laba, sabal doi susaan lalomo, tukon tataap sambeang. ¹³Tulungiyo muosukupe ko Salani miano bailong nakapalaluuwan tukon talimayo Utus-utus mopomeenggon manganggaan Utus mo aki natingoniyo, tukon noa sanaang doi mubonua lalomo.

¹⁴Kabiyomo doi Mian Bisa sulano yana nabalakaatiyo komian mo lokis doikoo. Oode, kabiyu ko Mian Bisa nabalakaatiyo

yanila, inai mokutuke. ¹⁵Poloingi molaba tukon komian mo laba-laba, tukon kokiil tukon yanila mo kokiil. ¹⁶Potubo pokindok meeng tukon bailong. Inaikai mobati-batinggai, bai pokonoikene kobutomu tukon mian kona kadudukan mo pepende. Inai moaanggene kobutomu lobian pandoi doi natutuuan.

¹⁷Kalu komian kubaiyo lokis doikoo, inaikai mobalase tukon nalokisan. Kubaiyomo oila komo inaanggon monondok doi sasaibino komian. ¹⁸Doikoo tambikon, kakaatemo mumoola laate sulano mutubo dame tukon sasaibino komian. ¹⁹Utus-utusonggu! Inai mobalase konggimalan, sodiiyomo Mian Bisa komo ukume. Sabab doi Kitab Moliyous lalomo totulis, "Yakumo komo balase. Yaku naikon komo ukume yana, Temeneno bantile." ²⁰Kobalino, kalu komu musu malaal, beena yana kaan; tukon kalu yana molou, beena yana monginum. Sabab tukon kubaiyo mobuno doiya, Utus naikon kubaiyo yana teali mammaa. ²¹Inai mosodiikene kobutomu kolokis nalungguiyo, bai siokai Utus mulungguiyo domo lokisoo tukon namonondokan.

Kawajiban doi pamalenta

13 Meeng-meeng komian siokai nataat doi pamalenta, sabab akiyo kopamalenta mo aki namalaat kakuasaan moluwedoi Mian Bisa. Tukon pamalenta mo daano nia budodoo nia, ampakonggene kona kakuasaan mopinalentakon luwedoi Mian Bisa. ²Doiyo kosababpo komian mo lawane kopamalenta pokakana tukon molawane oila komo lapamo Mian Bisa tantukanggene. Tukon komian mo kubaiyo bunu doiya naikon mantalima ukuman. ³Sabab komian mo kubaiyo komonondokan aki namatakut doi pamalenta. Tongo mian mo kubaiyo kolokis komo sio namatakut. Kalu Utus yase sulano Utus aki mulasayo matakut doi pamalenta, Utus sio mukubaiyo komo monondok, maka Utus naikon ngginaal. ⁴Sabab kopamalenta daano Mian Bisa naata mo balimang tuuk mumonondokan. Bai kalu Utus kubaiyo kolokis, takainomo Utus sio mumatakutene doi yana, sabab bolikon akiyo kotakoso yana mobalakuasa sulano naukume komian. Yana daano Mian Bisa naata, mo otuwenge ko Mian Bisa naukuman, doi mian mo kubaiyo komo lokis.

⁵Doi ya kosababpo Utus sio muta at doi pamalenta - bolikon tongo sabab Utus aki nayase inukum, bai koidan sabab noamu lalom alalo.

⁶Doiyamo koidan kona alasano bulaando Utus mobabeal lulu, sabab kopamalenta daano Mian Bisa napeleleani mo ampakonggene natugasia mo tongo naiya. ⁷Jadi bealemo doi pamalenta oilamo komo sio Utus nabeale doi yana. Bealemo kolulu, kalu Utus sio mubabeal lulu; tukon bealemo kolulu kalu Utus sio mubabeal lulu; tukon babealo lulu kalu Utus sio nababeal lulu. Odotiyo yanila mo sio nainodoti tukon holomatiyo yanila mo sio nainolomati.

Kawajiban doi mian tulano

⁸Inaikai mobasamea mau oioila doi indee komiano koidan, alaasene basameaan maasi doi meeng maka bailong. Sabab komian mo seange kotulano banggapi, lapamo lakukene sasaibino Musa naatulan. ⁹Sabab koagama Yahudi naatulan, doiyamo: Inai balolowa, inai mangakate, inai pondikuk, inai momemeetene oila komo ano doi mian bailong; sasaibinodoo polaing-laing tukon koatulan-atulan bailong, lapamo pinutusi teali meeng koatulan motolong, doiyamo, "Seseange kotulamu pokakana ikoo mosesange kobutomu susuumu." ¹⁰Mian mo seseange komian bailong, aki naikon nakubaiyo komo lokis doi mianoo. Jadi komian mo seseange kotulano doiya mian mo lapamo lakukanggene sasaibino kosalat agama naatulan.

¹¹Sangalaasan sasaibinodoo komuyu toiyo baikon nalounu nia daano ikoo mulounu sulano mubangun doi mumooloan. Sabab tembonomo sulano kita nda sinalamaton lapamo loolani nia budodoo nia doi tembo mosodo kita tambuun mangangga. ¹²Kopopook adukono lapa; tukon naapa doiya koidan naikon modoamo. Jadi, tadumo kai kita nda tade mokubaiyo kokokubai-kokubai mokalipookan. Kita sio nda kindeke kobutonggita tukon tompide momadialan. ¹³Kita sio nda kubaiyo kolangge-langge momonondok bunu komo biasa mian kubaiyo doi oloyo namadialang; inai mobalamean babasal lobian kona batas, kai malangu. Inai balolowa, kai mobati-batinggai. Inai poakate, kai masakit konoamu. ¹⁴Sodiiyomo ko Temeneno

Yesus Klistus komo tantukanggene oilamo komuyu komo sio pokubaiyo. Tukon inai moloingiyo kobanggapi natabiat mo baladosa sulano naambambule kona moot.

Inai mosalakene koutusomu

14 Mian mo aki nayakiniyo naikon oila kona inangga sio natinalima tukon monondok doi antala Utus-utus. Inai mopogagai tukon yana manganai napandilian-pandilian. ²Daano komian konapandapat baikon yana moola kaane oila komo daano. Bai daano komian bailong mo lemah kona koyakinan; yana lasayo baikon yana tongo moola makaan kaulon-kaulon tolong. ³Mian mo kaane oila komo daano inai poanggape hina komian mo kaane tongo kinaan motutuu; tukon komian mo makaan tongo kinaan motantu, inaikai koidan posalakene komian mo kaane sasaibino, sabab ko Temeneno lapamo talimayo yana. ⁴Indee kai Utus tobikon Utus sio muadiliyo komian bailong naata? Kai do atadoo otuwong kai bangun, doiya daano natuan naulusan. Tukon takainomo do atadoo naikon kokondong kokoloyos, sabab ko Temeneno moola nakubaiyo kokondong kokoloyos.

⁵Daano komian bailong lasayo daano komeeng kooloyo motantu molobian kona pentiingan doi oloyo-oloyo bailong, bai komian bailong koidan aanggene baikon do oloyo-oloyodoo pokakanamo. Sodiikenemo meeng-meeng komian natantukanggene konapandapat susuungo. ⁶Mian mo pentikanggene kooloyo-oloyo motantu, do mianoo kubaiyo buno doiya sulano naodotiiyo ko Temeneno. Mian mo kaane sasaibino, kubaiyo buno doiya sulano naodotiiyo ko Temeneno, sabab yana basyukuul doi Mian Bisa luwe do kinaanoo. Bunomo koidan tukon komian mo makaan tongo kinaan motantu; do mianoo koidan odotiiyo ko Temeneno tukon balasyukuul doi Mian Bisa. ⁷Akiyo komeeng komian doi kita mo tubo tuuk butongo susuungo; tukon akiyo komeeng komian doi kita mo mate tuuk butongo susuungo. ⁸Kalu kita tubo, kita tubo tuuk doi Temeneno. Tukon kalu kita mate, kitadoo mate tuuk doi Temeneno. Jadi tubo kai mate, kita daano Temeneno nalange. ⁹Klistus lapamo mate tukon abali tubo. Doiyamo kosababpo yana teali Temeneno doi mian mo tubo tukon koidan tuuk doi mian mo lapamo mate. ¹⁰Jadi,

Utus-utus! Tuuk oila mosalakene utusomu mo pomeenggon manganggaan? Tukon tuuk oila Utus moaanggene yana hina? Kita sasaibino naikon mangadap doi Mian Bisa sulano nda inadili. ¹¹Doi Kitab Moliyous lalomo totulis,

“Kona tutuuwan,” Temeneno bantile,

“meeng-meeng komian naikon sosuba doi salaanggu;
tukon meeng-meeng komian naikon mangaku baikon
yakumo ko Mian Bisa.”

¹²Jadi kita meeng-meeng sio nda mangakukene sasaibino konda kinubai doi Mian Bisa.

Inai momangaanikene koutusomu natapa

¹³Tobikon doiya inaikai kita meeng tukon meeng poasalakon. Tadukai nda kakaate sulano komuyu aki pokubaiyo komeeng kolobo mo mangaanikene komeeng koutus mopomeenggon manganggaan togoda tukon baladosa. ¹⁴Sabab yaku pomeenggon tukon Yesus, maka yaku anggayo tuuno baikon akiyo komeeng kolangge doi luwean lokis; bai do langgedoo lokis doi meeng-meeng komian, kalu do mianoo aangenemo lokis. ¹⁵Bai kalu tukon oila Utus nakinaan, meeng koutus mopomeenggon mangangga kinosokiti konoano, maka Utus akimo koidan mutindokiiyo luwedoi seang. Kalu Klistus lapamo mate tuuk meeng-meeng komian, inaimo kai mosodiikene do mianoo nalinusak tongo oila Utus nakinaan. ¹⁶Doiyamo kosababpo inaimo kai mosodiikene oila komo monondok doi komuyu, nainanggon aki namonondok doi mian bailong. ¹⁷Sabab kalu ko Mian Bisa mapalenta meeng-meeng komian natuboan, oila komo moola yana kaane kai inume, aki koidan napenting. Komo penting doiyamo baikon do mianoo naloingiyo ko Mian Bisa namongiasan, toupiyo konoa namolinoan, tukon mantalima laba-labaan Mian Bisa Na Loh mo beekene. ¹⁸Mian mo meleleani Klistus secala bunu doiya, do mianoo sanaanggene ko Mian Bisa noano, tukon mian-mian bailong halagaiyo.

¹⁹Tobikon doiya konda pinakituu siokai nasidutu tuuk doi langge-langge mo kubaiyo kopomeenggonan tukon pobangun. ²⁰Inaikai, sabab soal kinaan, Utus lusayo oila komo lapamo Mian Bisa limange. Sasaibino kokinaan takainomo moola kinaan; bai kalu oila Utus nakinaan mangaanikene komian

bailong baladosa, maka Utus salamo. ²¹Tadukai aki mumakaan sail kai monginum anggul kai lakukanggene kooioila kalu do langgedoo mangaanikene komeeng koutus mopomeenggon mangangga teali baladosa. ²²Sodiiyomo kai oilamo Utus nainanggadoo, Utus lakukanggene doi Mian Bisa salaano tuuk doi Utus susuungo. Komian mo akiyo kona alasan sulano nalasayo kona sala doi oila kona inaanggon kana, do mianoo sanaang. ²³Bai komian mo lasayo mata-matakut sulano nakaane komeeng kolangge, doibundu kaane do kinaanoo, do mianoo Mian Bisa asalakene; sabab do mianoo aki nabolotindak manulut namangangaan tentang oila komo kakana tukon mo sala. Tukon oilamo komo linakukanggon tukon aki nda yakiniyo doiya lalim.

Sanaangene komian bailong, inai kobutomu susuungo

15 Kita mo tutuu anggayomo naikon oilamo kita nainangga, siokai nda sabal doi mian mo lemah kona mangangaan nakabalatan-kabalatan. Inaikai kita yase sanaangene kobutonggita susuungo. ²Kobalino kita memeeng sio nda sanaangene koutusondoo noano tuuk doi namonondokari, sulano kona mangangaan tosuungi moonggol. ³Sabab Klistus aki napikikene kobutongo nasanaangan susuungo. Doi Kitab Moliyous lalomo totulis buno naiya, “Sasaibino kososibolii mo kinonoikon doikoo lapamo otuwong doi yaku.” ⁴Sasaibino komo totulis doi Kitab Moliyous lalomo doiya tuuk otunggul kita. Sabab kootunggul kita mo talimayo doi Kitab Moliyous tealikene kita sabal tukon bukuan tobikon kita moola moini doi Mian Bisa. ⁵Boliisi ko Mian Bisa, mo beekene kosabalan tukon pongibulan doi banggapi, tulunge komuyu sulano potubo tukon pomeenggon noa, moloingi sontoh Klistus Yesus. ⁶Tukon pomeenggon noa Utus sasaibino polaing-laing moola nggaale ko Mian Bisa, Tamanggita Yesus Klistus.

Bilita Monondok tuuk doi bangsa-bangsa mo bolikon Yahudi

⁷Sabab doiya siokai Utus-utus mantalima meeng tukon bailong tukon noa sanaang, buno pokakana Klistus koidan talimayo komuyu sulano pokabasale ko Mian Bisa. ⁸Sabab, neneeke, baikon Klistus lapamo leleaniyo ko Yahudi miano

sulano naotudoikene baikon ko Mian Bisa satia doi nadaa-nokanano kona paladandian doi tumbunggita. ⁹Yesus kubaiyo koidan kobangsa-bangsa bailong mokabasale ko Mian Bisa sabab namonondokan konoano doi yanila. Doi Kitab Moliyous lalomo totulis bunu naiya,

“Sabab doiya yaku naikon nggaale ikoo doi antala bangsa-bangsa, yaku naikon mananikene nggaalano motuuk doi sambumu.”

¹⁰Daano mototulis bunu naiya koidan,

“Polaba-labamo polaing ko Mian Bisa namian mo tolilik, hai bangsa-bangsa!”

¹¹Tukon naiya koidan,

“Ponggaale ko Mian Bisa, hei sasaibino kobangsa, siokai sasaibino kobanggapi nanggaale yana!”

¹²Tukon nia koidan Yesaya nabinantil,

“Doi Isai natulunan naikon sumbut komeeng komian naikon mo palentayo kobangsa-bangsa; doiyanamodoo kobangsa-bangsadoo namoinian.”

¹³Mian Bisa doiyamo kopo moinian. Boliisi yana naontokiyo konoamu tukon sasaibino kolaba-labaan tukon namonondokan sabab komuyu anggayo doi yana, sulano tukon ko Mian Bisa Na Loh kuasa komuyu pololokon moini doi Mian Bisa.

Kona sabab-sabab Paulus tulise tukon tegas

¹⁴Utus-utusonggu! Yaku anggayomo baikon daano badaang tuuno kolangge mo monondok doikoo. Komuyu toiyo sasaibino tukon moola mongotunggul meeng maka bailong koidan. ¹⁵Bai manganai langge-langge motantu, yaku ingotiikene komuyu tukon tegas nai sulatia lalomo, sabab ko Mian Bisa lapamo beekene doi yaku do tugasoo. ¹⁶Yana lapamo tealikene yaku peleleani Klistus Yesus sulano nainutus doi bangsa-bangsa mo bolikon Yahudi. Tukon yaku bolotindak bunu imam, mo babilitakene ko Bilita Monondok doi Mian Bisa, sulano komian mo bolikon Yahudi teali meeng kososubakon doi Mian Bisa mo moola yana talimayo. Boliisi ko Mian Bisa Na Loh nakubaiyo yanila teali meeng kososubakon mo tongo kusus doi Mian Bisa. ¹⁷Jadi, tobikon yaku lapamo pomeenggon tukon Klistus

Yesus, maka yaku moola lasayo banggaal doi kulimang motuuk Mian Bisa. ¹⁸Yaku balani basilingan bunu doiya tongo manganai oila komo lapamo Klistus lakukangene luwedoi yaku motuuk tealikene komian mo bolikon Yahudi taat doi Mian Bisa. Yaku lakukene doiya tukon bantil-bantilan mau kai tukon palabuatan, ¹⁹mo pinoolainggon tukon langge-langge mominasaingdinggon; sasaibino doiya Mian Bisa Na Loh nakuasa. Bilita Monondok tentang Klistus yaku lapamo pelengene sasaibino doi mian, tambuun doi Yelusalem polong ke Ililikum. ²⁰Daku tetel doiyamo mobabilitakene ko Bilita Monondok moluwedoi Mian Bisa doi lipu-lipu inaando komian moakiyoon namolongol tentang Klistus. Sabab yaku aki kuyase mokekendenge kobalimangan doi pandasi mian bailong mo abese. ²¹Doi Kitab Moliyous lalomo totulis,

“Mian mo akiyoon namantalima bilita tentang yana, naikon kitayo;
tukon yanila mo akiyoon namolongol, naikon mangalati.”

Paulus natetel moampakon doi Loma

²²Doiya kosababpo biasamo yaku tahalangi moduutiyo komuyu. ²³Bai diabudodoo daku limang doi lipu-lipudoo lapamo tolimang. Doi taum-taum lalomo yaku yase duutiyo komuyu. ²⁴Totiili kalu yaku alon doi mukota doi kuampakonan lalomo doi Spanyol, yaku moinikene moola nda pososuung tukon komuyu tukon polaba-labakon naapa tukon komuyu. Lapamo doiya yaku moinikene komuyu moola tomboniiyo yaku tuuk daku ampakonan doi Spanyoloo. ²⁵Bai diabudodoo nia yaku yase doi Yelusalem sulano kubabayo kobantuan doi Mian Bisa namian imbali. ²⁶Sabab kojemaat-jemaat doi Makedonia tukon Akhaya lapamo satujuiyo sulano namebee sumbangan doi utus-utus mo talalais doi antala Mian Bisa namian doi Yelusalem. ²⁷Tukon sanaang konoano yanila putusiomo sulano nakubaiyo doiya. Takainomo kona kanaan yanila sio natulungiyo koutus-utus mo talalais doi Yelusalemoo; sabab luwedoi Yahudi miano do mianoo mobolikon Yahudi lapamo mantalima balakaat-balakaat moluwedoi Mian Bisa. Jadi, do mianoo mobolikon Yahudi patut koidan tulungiyo ko Yahudi miano tukon balakaat-balakaat buat. ²⁸Kalu yaku lapamo alapayo daku limang nia,

tukon salakanggene doi yanila doi Yelusalemoo do sumbanganoo mo lapamo tokombul, maka yaku naikon lenggeto doi lipu Spanyol loloiyo komu kota. ²⁹Kalu yaku lubat doikoo, pasti yaku lubat tukon badaang kobalakaat doi Klistus motuuk doi komuyu.

³⁰Demi nda Temeneno Yesus Klistus, tukon demi soyang Mian Bisa Na Loh mo beekene, yaku kabiyo tukon tutuu doikoo, boliisi komuyu potulut sambeang tutuu polaing-laing yaku doi Mian Bisa tuuk doi yaku. ³¹Posambeang sulano ko Mian Bisa nasodiiyo yaku doi mian limano mo aki namangangga doi Yudea, tukon sulano daku tugas kubabaano kosumbangan doi Yelusalem natinlima tukon noa sanaang doi Mian Bisa namian imbali. ³²Tukon buno doiya, kalu ko Mian Bisa yase, yaku moola lubat doikoo tukon noa mo sanaang. Tukon yaku naikon malasa tohibul doi komuyu tanga-tangano. ³³Boli-boliisi ko Mian Bisa, mo beekene komonondokan doi banggapi, loolainge Utus sasaibino. Amin.

Salam susuunggu

16 Yaku yase tudoikene koutusonggita boine, Febe. Yana motomboniiyo kojemaat doi Kengklea. ²Potalimayo yana bunu kai meeng komian doi Temeneno namian. Takainomo bunomo doiya ko mian-mian mo mangangga doi Mian Bisa sio namantalima meeng maka bailong. Tulungiyo yana, kalu yana mapalaluu bantuan doi komuyu, sabab yana susuungo lapamo motombonii badaang komian - tongusokon yaku.

³Pelenggene daku salam doi Pliskila tukon Akwila, tula-tulanggu mo polaing-laing balimang tuuk doi Klistus Yesus. ⁴Yanila kabi namate sabab yase salamatene yaku. Yaku bakinatauwan doi yanila - tukon bolikon tongo yaku, bai sasaibino kojemaat bangsa bailong mo bolikon Yahudi koidan bakinatauwan doi yanila. ⁵Pelenggenemo koidan daku salam doi jemaat mo pototongi doi yanila nabonua.

Salam doi Epenetus yaku mo seseange. Yanamo komian mo tumbe-tumbeno mangangga doi Klistus doi lipu Asia. ⁶Daku salam koidan doi Malia. Yana lapamo balimang bunu doiya tuuno tuuk komuyu. ⁷Pelenggenemo koidan daku salam doi Andolonikus tukon Yunias. Yanila meeng kobenseno tukon

yaku tukon biasamo usok talunggu polaing-laing yaku. Akiyoon kumangangga doi Klistus, yanila lapamo mantailuk mangangga. Yanila totingonii doi antala lasul-lasul.

⁸Salam doi Ampliatus, yaku mo seseange sabab yana polaing-laing tukon yaku lapamo pomeenggon tukon Temeneno. ⁹Pelenggene daku holomat doi Ulbanus, tulanggita mo balimang polaing-laing tukon kita tuuk doi Klistus. Koidan daku holomat doi Stakhis yaku mo seseange. ¹⁰Salam doi Apeles. Kona satiaan doi Klistus lapamo tolobukutii. Salam koidan doi Alistobulus pulino, tukon doi Helodion. ¹¹Yana meeng kobenseno tukon yaku. Koidan salam doi utus-utus mopomenggon manganggamo doi Nalkisus pulino lalomo.

¹²Daku salam doi Tlifena tukon Tlifosa mo balimang tuuno moleleaniyo ko Temeneno, tukon doi Pelsis yaku mo seseange. Yana koidan balimango kobukuan tuuk doi Temeneno. ¹³Salam doi Lufus tukon tinano, mo doi yaku buno tinangu susuunggu. Lufus daano meeng komian Temeneno mopiliyo mo ngginaal. ¹⁴Pelenggenemo daku salam doi Asinklitus, Flegon, Helmes, Patlobas, Helmas tukon sasaibino koutus pomeenggon mangangga mo polaing-laing tukon yanila. ¹⁵Salam doi Filologus tukon Yulia; doi Neleus tukon utuso moluko; doi Olimpasi tukon doi sasaibino komian mangangga polaing-laing tukon yanila.

¹⁶Popobee salam-salaman secala monondok buno utus Salani. Sasaibino kojemaat Klistus pelenggene yanila nasalam doi Utus-utus.

Otinai napupusan

¹⁷Utus-utus! Yaku kabiyo tukon tutuu: Pobai-baingotii doi mian mo sumbetene kopoalaasan tukon nggabute komian namangangaan doi Temeneno. Do langgedoo posasala tukon oila komo lapamo inotunggukon doikoo. Pododoonggon doi mian mobuno doiya. ¹⁸Sabab komian mo kubaiyo buno doiya bolikono balimang motuuk doi Klistus nda Temeneno, bai tuuk akabuse yanila noano susuungo naminooton. Tukon budukan tukon bantil-bantilan mo maamis, yanila kokoliiyo komian mo aki natoiiyo kooioila. ¹⁹Sasaibino komian lapamo toiiyo baikon komuyu satia doi otunggul tentang Bilita Monondok mo luwedei Mian Bisa. Tukon yaku sanaang do langgedoo manganai

komuyu. Yaku yase sulano komuyu pandoi manganai langge-langge mo monondok, tukon longas manganai langge-langge mo lokis. ²⁰Mian Bisa mebee monondokan doi banggapi, naikon mosobito mangabos Ibiliis doi mukakuasaan bilito tukon yana manase.

Boliisi Utus-utus nasidutu Yesus Klistus nda Temeneno nabalakaatiyo kita!

²¹Timotius, tula-tulanggu, pelengene kona salam doi komuyu. Bunomo koidan Lukius, Yason tukon Sosipatel, mo meeng bensenno tukon yaku.

²²Komo tulise naiya sulatia, yaku Teltius. Yaku mabantil salam montolutusan doi komuyu.

²³Gayus kapatuwe kona salam doikoo. Yaku sambukon doi nabonua tukon mai jemaat koidan bakaleda idoo. Elastus, moabese kodoy doi kota, kapatuwo kona salam doikoo. Bunomo koidan konda utus Kwaltus.

[²⁴Boliisi konda Temeneno Yesus Klistus nabalakaatiyo Utus sasaibino. Amin.]

Potutup surat

²⁵Tanggaal ko Mian Bisa! Yana balakuasa moekeenggele Utus namangangaan pokokonoi tukon do Bilita Monondokoo moluwedoi Mian Bisa yaku mo babotilanggene tentang Yesus Klistus. Yaku babotilanggene do bilitadoo pokokonoi tukon oila ko Mian Bisa nainokitakon; doiyamo tentang Mian Bisa natetel mo lapamo doi abad-abad kona malumbitan aki komian natoiyoo.

²⁶Bai diabudodoo luwedoi Mian Bisa napalenta posidutukon, do teteloo lapamo inokitakon tukon binotiikon doi sasaibino kobangsa luwe tulisan-tulisan pala nabi, sulano yanila sasaibino mangangga tukon taat doi Mian Bisa. ²⁷Yanamo komeengmeengo ko Mian Bisa, yana babasal kona pandoiyan.

Boliisi yana nainosuun tatandak sidutu-posidutukon luwedoi Yesus Klistus! Amin.

Komai holomat,
Paulus, Klistus Yesus naata

PAULUS NASULAT KOMEENGO DOI JEMAAT KOLINTUS

PANGANTOKON

Paulus nasulat tumbeno doi jemaat Kolintus tinulis sulano nabahase kosoal-soal mo sumbut doi jemaat lalomo mo lapamo Paulus ekendenge doi jemaat Kolintus. Do soal-soaloo doiyamo bulaa kokaliangano kotuboan tukon komaanggaan doi Salani. Doiya kosinggatoo ko Kolintus daano komeeng kokota Yunani, ibu kota plovinsi Akhaya mo tongusokon doi wilayah pamalentaan Loma. Kota nia, kopodungolino badaang kokaliangano kobangsa, tololongol sabab nakamajuan doi lalomo badaangan, kona kabudayaan tatandak bai koidan kona susila pende doiya kosababpo idoo daano moimoiya koagama kaliangano.

Komo teali tuuno Lasul Paulus pikikene doiyamo poalaa-sanoo tukon ponggimakonan doi jemaat lalomo, tukon doi basinduwaan tukon baosowaanan, posasagalan, atulan doi jemaat lalomo, Mian Bisa Na Loh nakalunia, tukon doi mian mate motubo. Tukon otunggul mo lobian, Paulus otudoikene bulaando do Bilitadoo mo Monondok moluwedoi Mian Bisa naasalakanano do soal-soaloo motabantil.

Pasal kosongulono tolu okitaikene koseang loloono mo bisa. Naiya pasalia bunu meeng kopasal mo totoiy tuuno doi sasaibino kopasal bailong doi buku nia.

Antoko

Pololukoni 1:1-9

Kaleda nanggabutan 1:10-4:21

Soal basinduwaan tukon tuboan doi mondopuliyen 5:1-7:40

Salani miano tukon mian mo aki nasosubaiyo ko

Mian Bisa 8:1-11:1

Jemaat natuboan tukon sambeangan 11:2-14:40

Klistus natuboaan doi namatean tukon ko Salani miano doi namatean 15:1-58

Mendebeean motuuk doi Salani miano doi Yudea 16:1-4

Langge-langge doi butongo tukon potutupo 16:5-24

1 ¹⁻³Utus-utus Mian Bisa najemaat doi Kolintus! Utus lapamo Mian Bisa uange sulano nateali namian sabab Utus Klistus Yesus namian, polaing-laing doi sasaibino komian inaando kona daanoan komo sosubaiyo konda Temeneno Yesus Klistus, doiyamo konapo Temeneno tukon nda Temeneno koidan. Yaku, Paulus, tukon utusonggita Sostenes, moinikene sulano ko Mian Bisa Tamanggita tukon nda Temeneno Yesus Klistus mebee balakaat tukon namonondokan doikoo. Yaku tulise naiya sulatia buno meeng kolasul Yesus Klistus, Mian Bisa susuungo mo oduduke tukon luwe koidan doi namongiasan.

Balakaat-balakaat moluwedoi Mian Bisa mololo doi Yesus Klistus

⁴Yaku sidutu bakinatauwan doi Mian Bisa kokaliangano komuyu, sabab komuyu lapamo mantalima maasi doi Mian Bisa mololo doi Klistus Yesus. ⁵Sabab komuyu lapamo teali Klistus namian, maka komu tuboan kaasakene kolangge sasaibino. Komu motoiyan doi sasaibino kolangge atean tuuno, tukon komuyu pandoi bangotunggulkene doiya motoiyanoo. ⁶Doiya tudoikene baikon kobilita kaliangano Klistus lapamo kai tangabos doi noamu lalomo, ⁷tobikon komuyu akipo kakulangan mau nabaino meeng kobalakaat, samantala komuyu mototiiliyo konda Temeneno Yesus Klistus nalubatan tukon sasaibino komian kitayo. ⁸Klistus susuungo naikon dagaiyo komuyu polong doi napupusan; sulano doi tembo yana lubat koidan, komuyu polinaat akiyo kososiboliino. ⁹Ko Mian Bisa moola nainangga tutuuno. Yanamo ko Mian Bisa mo lapamo uange komuyu sulano ¹⁰poteali pomeenggon tukon na Pau, doiyamo Yesus Klistus, nda Temeneno.

Poliitonan doi jemaat lalomo

¹⁰Utus-utus! Tukon doi nda Temeneno Yesus Klistus sambuno, yaku kabiyo sulano komuyu sasaibino pomeenggon bantilan;

sulano naakiyo kopoalaasan doi komuyu. Siokai komuyu pomeenggon, pomeenggon noa tukon pikilan. ¹¹Sabab, komian badaang doi Kloe solipuan popitoikene doi yaku baikon daano koponggeelekian doi komuyu. ¹²Daku minakisuuti doiyamo baikon doi komuyu daano komo bantile, “Yaku lainge Paulus,” daano koidan komo bantile, “Yaku lainge Apolos,” kobailong bantile, “Yaku lainge Petulus,” daano kobailong bantile. “Yaku lainge Klistus.” ¹³Bulaando Klistus motongobos-obos! Paulus aki namate sinempang motuuk doi komuyu! Komuyu aki posinau paisu salani sulano poteali Paulus napololaing-pololaing, bolikon?

¹⁴Kinatauwan aki kusauwo paisu salani mau nabaino meeng komian doi komuyudoo, sangalaasan Klispus tukon Gayus. ¹⁵Inai nadaano meeng komian mobantile baikon yaku lapamo sauwo paisu salani yana sulano nateali pololaing yaku. (¹⁶Oo, ide, Stepanus tukon napokalualga, memang yakumo komo sauwo paisu salani yanila. Bai kobai-bailonggon, kalu kuneneeke, akiyono komian bailong yaku mo sauwo paisu salani.) ¹⁷Klistus bintekene yaku bolikon sulano kusauwo komian, bai sulano kubabotilangene Bilita Monondok moluwedoi Mian Bisa; tukon doiya sio kukubaiyo tukon bolikon kupandoiyan basilingan secala banggapi, sulano kokuasa molengget doi Klistus namatean doi kayung sinempang aki nabaino palasuma.

Mian Bisa nakuasa tukon napandoiyan tangabos doi Klistus

¹⁸Sabab doi mian badaang mo ompokoniiyo kosilakaan, kobilita kaliangano Klistus namatean doi kayung sempang babunokon kala-kala. Bai doi kita Mian Bisa mo salamatenene, doiya bilitadoo bunu meeng ko Mian Bisa nakokubai motudoikene kona kuasa. ¹⁹Sabab doi Kitab Moliyous lalomo, ko Mian Bisa bantile,

“Kona pandoiyan mian mosaleh naikon kunggalanggabute,
tukon pangalatian mian badaang kona motoiyan naikon
yaku alapuse.”

²⁰Jadi, oila kona totuuk do mian badaangoo mosaleh? Oilamo kona totuuk doi yanila mo daano kona ilimuu? Oila kona totuuk

komian mopandoy pikikene nadunia nia? Ko Mian Bisa lapamo tudoikene baikon nadunia nia napandoiyan akiyo kotakoso!

²¹Sabab mau nabulaandomo kobanggapi napandoiyan, yana aki namoola tingoniiyo ko Mian Bisa kalu tolono napandoiyan susuungo. Bai sabab ko Mian Bisa napandoiyan, maka yana salamatene komian badaang mo mangangga doi yana luwe dobilitadoo kami mo babilitakene komian doi dunia nia mo tolono aanggene akiyo kotakoso. ²²Ko Yahudi miano palaluuwo komo minasaingdinggon bunu meeng kobukutii, tukon Yunani miano palaluuwo tuuno kopandoiyan doi dunia nia. ²³Bai kita nia tolono babilitakene Klistus mo mate doi kayung sempang. Doiya bilitadoo singgunge ko Yahudi miano napalasaan, tukon mian badaang mobolikon Yahudi miano tolono aanggene kala-kala. Tukon mian mobolikon Yahudi miano aanggene meeng kobodoan. ²⁴Bai doi mian badaang mo lapamo Mian Bisa uange – mau doi Yahudi miano mau doi mobolikon Yahudi miano – doiya bilitadoo bunu meeng ko Mian Bisa nakokubai motudoikene kona kuasa tukon napandoiyan. ²⁵Sabab komo tokita bodo doi Mian Bisa, daano lobian kona pandoiyan doi banggapi napandoiyan; tukon komo tokita matalamuyuk doi Mian Bisa, daano lobian kona bukuanan doi banggapi nabukuanan.

Kuasa Mian Bisa tukon banggapi nakelemahan

²⁶Utus-utus! Coba poneneeke bulaando kopoo tuboan salataa ko Mian Bisa nauangano komuyu. Tolono soisik tolong doi komuyudoo komo pandoi, kabai mobalakuasa, kabai motatandak kona sambu dinudukon manulut banggapi napokita. ²⁷Sabab takainomo ko Mian Bisa sangaja lilike komo inaanggon bodo doi dunia nia, sulano komian badaang mopandoi doi dunia nia teali mammaa. Tukon ko Mian Bisa lilike komo inanggon lemah doi dunia nia, sulano ko mian-mian mo bukuan nateali mammaa. ²⁸Ko Mian Bisa lilike komo inaanggon pau-pauno, talalais, tukon baikon nadunia nia mo aanggene akiyo kotakoso, sulano ko Mian Bisa namanase nadunia nia nainaanggon palaluu. ²⁹Tukon nabuno doiya akiyo komeeng komian momoola banggaalkene kobutongo doi Mian Bisa salaano. ³⁰Tolono Mian Bisa susuungo komo kubaiyo

tobikon Utus pomeenggon tukon Klistus Yesus. Luwedoi Klistus, kita tinealikon pandoi. Tukon luwedoi yana koidan ko Mian Bisa kubaiyo kita pokindokon tukon kobutongo, tealikene kita namian mo tangalaas, tukon bebaskangene kita. ³¹Jadi, bunomo komo totulis doi Kitab Moliyous lalomo, “Komian mo yase banggaal-banggaal, sio nabanggaalkene doi oilamo ko Temeneno mo lapamo lakukangene.”

Bilita kaliangano Klistus namatean doi kayung sempang

2 Utus-utus! Tembodoo yaku lubat doikoo tukon babotilangganano doikoo kaliangano ko Mian Bisa natetel mo akiyoon kodunia natoiyoo, yaku aki kupakeyo daku pandoiyan doi dunia kai basilingan tukon bantil-bantilan mo monondok. ²Sabab yaku lapamo niatene baikon kalu yaku daanoon mopolaing tukon komuyu, yaku aki kumopolonggon oioila, tolono kaliangano doi Yesus Klistus; baikon yana lapamo mate doi kayung sempang. ³Salataa daano yaku tukon komuyu, yaku matalamuyuk tukon busak-busak matakut. ⁴Bilita yaku mo pelengene doikoo yaku aki kupelengene tukon bantil-bantilan mo babayo manulut banggapi napandoiyan. Yaku pelengene doiya tukon cala mo bukutiikangene baikon ko Mian Bisa Na Loh balakuasa. ⁵Yaku kubaiyo bunoo doiya, sulano komu mangangaan doi Klistus aki naluwe doi banggapi napandoiyan, bai luwedoi Mian Bisa nakuasa.

Mian Bisa napandoiyan

⁶Mau kai nabuno doiya, daano doi mian badaangoo kona tuboan doi lohani lapamo mono-monondok, takainomo yaku basilingan kokaliangano pandoiyan. Bai naiya pandoiyan nia bolikon pandoiyan doi dunia, kabai pamalenta-pamalenta napandoiyan doi lounu nia, kona kakuasaan molapus. ⁷Do pandoiyanoo yaku mo lakukanggenemo doiya pandoiyan moluwedoi Mian Bisa. Do pandoiyanoo dunia aki natoiyoo, bai ko Mian Bisa lapamo sadiakene komo tuuk kona monondokan doi kita akiyoon nadunia nia napinasitaka. ⁸Akiyo komeeng doi pamalenta-pamalenta doi lounu nia komo toiyoo do pandoiyanoo. Sabab kalu kai yanila toiyomo, tantu yanila akimo napo

sempanggene ko Temenenodoo mo babasal. ⁹Kobalino doiya langgedoo daano buno komo totulis doi Kitab Moliyous lalomo,

“Oilamo komo aki nabiasa kinita kai bangga pi moola nalengele,

tukon moaki nabiasa sumbut doi bangga pi napikilan, doiyamo ko Mian Bisa nasinadiakon

tuuk doi mian badaang mo mamaasikene yana.”

¹⁰Bai ko Mian Bisa lapamo okitakene doi kita tukon palantalaan na Loh. Mian Bisa Na Lohdoo solidikiyo sasaibino kolangge, polong doi Mian Bisa natetel-tetel mo sosookon tutuuno.

¹¹Sabab komo toiyoyo memeeng komian noano tolongo do mianoo naloh susuungo, bolikon? Bunomo koidan ko Mian Bisa. Komo toiyoyo ko Mian Bisa noano tolongo Mian Bisadoo Na Loh susuungo! ¹²Tukon kita aki nabineekon koloh dunia nia, bai tolongo Loh mo luwedoi Mian Bisa, sulano kita sasaibino toiyoyo komo lapamo Mian Bisa beekene doi kita.

¹³Tobikon doiya, kalu kami jelaskanggene kolangge-langge kaliangano doi Mian Bisa motuuk doi mian-mian mo daano ko Mian Bisa Na Loh, kami aki mai pelengene tukon bangga pi napandoiyan, bai tolongo luwe otunggul doi Mian Bisa Na Loh. ¹⁴Mian mo akiyo ko Mian Bisa Na Loh, aki namoola mantalima oila do Lohdoo nainokitakon. Sabab doiya mianoo langge-langgedoo nabinantil tolongo buno meeng kokabodokan tolong. Doiya mianoo aki namoola mangalatikene, sabab doiya langge-langgedoo tolongo moola tiningonii tukon secala lohani.

¹⁵Mian mo daano ko Mian Bisa Na Loh moola nilaiyo sasaibino kolangge, bai akiyo komeeng komian momoola nilaiyo yana.

¹⁶Doi Kitab Moliyous lalomo totulis,

“Indee komo toiyoyo ko Temeneno napikilan?

tukon indee komo moola otinauwo yana?”

Kitamo komo daano kopikilan mo pōkakana tukon Klistus!

Peleleani-peleleani Mian Bisa

3 Utus-utus, kona tutuuwan yaku aki namoola basilingan tukon komuyu pokakana tukon mian mo daano ko Mian Bisa Na Loh. Yaku tolongo moola basilingan tukon komuyu pokakana tukon komian mo daano tubo loloiyo koloh dunia namongiasan; pokakana komian mo daano pau-

pau kona manganggaan doi Klistus. ²Loolukon yaku tolongo moola mebee doi komuyu pau-pau nakinaan, bolikon mian mobabasal nakinaan; sabab komuyu akiyoon namoonggol kopoo manganggaan. Bai budodoiya komuyu akiyoon namoonggol kopoo manganggaan, ³sabab komuyu daano motubo loloiyo kobanggapi natabiat. Sabab kalu komuyu daano moabos noa tukon poliiton kotula-tulamuyu, bolikon kai doiya meeng kolangge mookitakene baikon komuyu daano motubo loingiyo kobanggapi natabiat, pokakana komian badaang mo aki natingoniiyo ko Mian Bisa? ⁴Kalu daano komo bantile, “Kami loingiyo Paulus,” tukon kobailong bantile, “Yaku loingiyo Apolos,” bolikon kai doiya otudoikene baikon Utus nakalakuan buno mian badaang doi dunia?

⁵Kona tutuuwan Apolos indee miano? Tukon indee miano Paulus? Kami tolongo Mian Bisa napeleleani-peleleani, mo lapamo andane komuyu sulano poanggayo Klistus. Kami tolongo ampakonggene kolimang Temeneno mo tugaskanggene doi kami memeeng. ⁶Yaku sakakene tukon Apolos tiposiiyo paisu, bai Mian Bisa susuungo komo kubaiyo tubo dolangedoo mosinakakon. ⁷Jadi komo penting tolongo Mian Bisa, sabab yanamo komo otuboiyo. Komo sakakene tukon mo tiposiiyo paisu aki napenting; ⁸luaila tongo pokakana. Yanila memeeng tolongo mantalima tambo doi napo pakadakan. ⁹Kami tolongo mian badaang mo polaing-laing balimang tuuk doi Mian Bisa nalimang; tukon komuyu pokakana ko Mian Bisa naasi.

Utus-utus daano buno Mian Bisa nabonua koidan. ¹⁰Tukon pandoiyan Mian Bisa mo beekene, yaku pokakana meeng koahli mongkubai bonua lapamo yaku kubaiyo kona pandasi do bonuadoo, tukon mian bailong komo kubaiyo do bonuadoo doi pandasidoo bungkukono. Doi memeeng komian sio napalaticanggene mono-monondok bulaando kona kubaiyano do bonuadoo doi pandasidoo bungkukono. ¹¹Sabab ko Mian Bisa susuungo lapamo abese Yesus Klistus pokakana komeeng kopandasi motuuk doi bonuadoo; akiyo kopandasi bai-bailong. ¹²Daano komo mongkubai bonua doi pandasidoo tukon mapake mosoni, daano komo mapake pelak, daano komo mapake batu motambongan, daano koidan komo mapake kayung, bulung momotuul kai kayung momongula. ¹³Doi memeeng komian

nalimang naikon tokitamo kalu Yesus lubato koidan. Sabab doi oloyodoo bilat komo kubaiyo tokita doi meeng-meeng komian nalimang. Bilat komo ujio tukon komo tantukanggene kona moonggolan doi limangoo. ¹⁴Kalu do bonuadoo moi nokokondong doi pandasidoo bungkukono taangene kobilat nasuayo, doiya mianoo naikon mantalima tambo. ¹⁵Bai kalu mian nalimang mosuwa, yana lugi; yana susuungo naikon selamat, bai bunu mian mo lolos mololoi bilat.

¹⁶Kai Utus toiyo baikon komuyunokon Mian Bisa Nabonua? Tukon baikon ko Mian Bisa Na Loh dungol doi komuyu? ¹⁷Kalu daano komian mo manase ko Mian Bisa Nabonua, ko Mian Bisa naikon manase do mianoo. Sabab ko Mian Bisa Nabonua tolongo Mian Bisa tolong komo dungol, tukon komuyumo do bonuadoo.

¹⁸Inai nadaano komeeng komian doi komuyudoo motipuwo kobutongo susuungo. Kalu daano komian doi komuyudoo molasaiyo kobutongo pandoi kalu mian doi dunia napokita, doiya mianoo sio nateali bodo, sulano yana nabisa-bisa teali pandoi. ¹⁹Sabab komo inaanggon pandoi doi mian doi dunia nia, doiya doi Mian Bisa napambaleng mian mobodo. Doi Kitab Moliyous lalomo totulis, “Ko Mian Bisa osinggaange ko mianmian mopandoi doi yaniladoo napandoiyan susuungo.” ²⁰Daano koidan mototulis bunu naiya, “Ko Temeneno toiyo baikon komian badaang mopandoi napikilan doiya pikilan mo akiyo kona totuuk.” ²¹Tobikon doiya, inai nadaano komeeng komian mo nggaa-nggaale kobanggapi, sabab sasaibino lapamo bineekon teali mulangge: ²²Paulus, Apolos, Petulus, dunia nia, kotuboan tukon matean, naiya lounu nia kai lounu salaan do, sasaibino doiya koomu. ²³Tukon komuyu Klistus koono, tukon Klistus Mian Bisa koono.

Lasul-lasul Klistus

4 Poakuiyo kami peleleani-peleleani Klistus, mo balatanggung jawab kobabilitakanano ko Mian Bisa natetel-tetel mo akiyoon mian doi dunia natoiyoo. ²Kotumbe-tumbeno komo pinalaluu doi peleleanidoo mo bunu doiya doiyamo baikon yana sio namolole doi natuan. ³Kalu yaku aki nateali soal oila komo komuyu – kabai indee miano – koidan popikikene kobutonggu.

Sabeakai oila daku pinikikon doi butonggu susuunggu mau doiya aki nateali soal. ⁴Yaku aki kulasae sala doi indee kolanggeno, bai doiya bolikon bukutii baikon bisa-bisa yaku akiyo daku sala. Temeneno komo tantukene daano daku sala kai akiyo. ⁵Sabab doiya, akiyoon nalaate kotembono, inai komuyu moso-mosobit motantukene baikon memeeng komian daano kona sala kabai akiyo. Pototiiliyomo nalaate ko Temeneno nalubatan. Yanamo komo bukayo sasaibino kolaasia-laasia mo tosookon doi kalipookan lalomo. Yanamo komo bongkale sasaibino koniat mo tangabos doi banggapi noano lalomo. Doiya kosinggatoo maka nasodo meeng-meeng komian mantalima panggaal doi Mian Bisa komo pantas yana talimayo.

⁶Utus-utus! Komo tuuk doi mukopontingan, yaku lapamo otuuke doi Apolos tukon doi butonggu susuunggu. Kona makisuut sulano kami teali mokitaan tukon komuyu moola balajal oila koalatio kobantilanoo, "Pobataani doi palatulanoo mo daano." Tukon buno doiya akiyo komeeng komian doi komuyudoo momoola banggal-banggaalkene komeeng komian, maka totulaiyo komian bailong. ⁷Indee kai komo tealikene Utus molobioniiyo komian bailong? Bolikon kai sasaibino kolangge Utus tongo talimayo doi Mian Bisa? Jadi, bulaando muyase banggaalkene kobutomu, mobula-bulaa oila komo daano doi Utus bolikon meeng kolangge mo bineekon? ⁸Takainomo komuyu akimo pomapalaluu oioila koidan! Komuyu kaasamo! Komuyu tealimo tomundo! Tukon kami aki. Mondoko tuuno komuyu bisa-bisa tealimo tomundo, sulano kami namoola nda polaing-laing mobapalenta. ⁹Sabab kalu manulut daku palaat, kami nia lasul-lasul, lapamo Mian Bisa tealikene buno banggapi namokitaan tukon doi malaekat napambaleng. Kami buno mian badaang moakiyo kotakoso mo binee ukuman mate doi mian mobadaang salaano tukon mian doi dunia tolotoloukoniyo. ¹⁰Sabab Klistus, kami buno mian mo longas, tukon komuyu Salani miano komo pandoi! Kami aki mai bukuan, komuyu komo bukuan! Kami tinotulai, bai komuyu ngginaanggaal! ¹¹Polong doi tembo nia kami toupiyo komalaalan tukon molouwan; komai pakean baino doi butonggami; komian sakisaayo kami; kami aki mai malaat dungolan motataap; ¹²kami babuku tuuno sulano mai malaat kapalaluuwan. Kalu kami kinutuk, kami soboliyo tukon balakaat; kalu kami linokis-

lokis, kami sabal; ¹³kalu komian bantil-bantile kami lokis, kami soboliyo tukon bantil-bantilan mo monondok. Kami aki mai lobian luwedoi lembut doi dunia nia; polong doi oloyo nia kami tataap pinokakanakon kolangge momanggilit doi dunia nia.

¹⁴Yaku tulise naiya doikoo bolikon sulano nakubaiyo komuyu mammaa, bai yaku otunggule komuyu bunu kupau-pau susuunggu. ¹⁵Sabab yaku komo teali tamamuyu, mau kai nabuno Salani miano, komuyu songulomo koloon kopo gulu. Doi potuboan bunu mian badaang mo pomeenggon tukon Klistus, yaku komo teali tamamuyu, sabab yaku komo babayo ko Bilita Monondok kaliangano Klistus doi komuyu. ¹⁶Tobikon doiya yaku kabiyo tutuuno sulano komuyu loloiyo sontoh yaku. ¹⁷Tuuk doiya yaku lapamo bintekene Timotius nalubat doikoo. Bunu Klistus napololaing, yana pokakana daku pau susuunggu yaku mo seange. Yana pau mo moola inangga. Yana naikon tandaikene komuyu kaliangano kotuboan yaku mo loloiyomo sambuno lapa yaku mangangga doi Klistus, doiyamo kona cala kotuboan yaku otunggulikenemo doi memeeng kojemaat doi samba-samba kolipu.

¹⁸Daano komoimoiya komian doi komuyudoo tealimo banggal-banggal, sabab yanila aanggene yaku akimo kulubotiiyo ikoo. ¹⁹Bai kalu ko Temeneno beena todanan yaku lubotiiyo koidan ikoo tukon akimo namalumbit. Sio nalaatemo doiya kotembono, yaku naikon kitayo koidan oila komo moola do mian badaang mo banggal-banggal nakinubaidoo; aki natolongo yanila nabantilan tolong. ²⁰Sabab kalu ko Mian Bisa palentayo memeeng komian natuboan, doiya langgedoo totingonii doi mianoo nabukuanan tubo, bolikon tolongo nabantil-bantilan. ²¹Jadi polilikemo oilamo kopoo iniyas tuuno! Kai komuyu yase sulano kulubat otunggule komuyu tukon tutuuno kai yaku tolongo lubat otunggule komuyu tukon mantalamuyuk tukon poseangan?

Basinduwaan doi jemaat lalomo

5 Yaku lapamo mantalima lapulan baikon doi komuyudoo daanomo kokokubai-kokubai basinduwaan mo lobi-lobiano: Daano doi utusonggitadoo komo loloiyo kona silaabo. Mian badaang mo aki natingoniiiyo ko Temeneno bai yanila

aki namongkubai kokubai mobuno doiya! ²Mau kai nabuno doiya, Utus daano mobanggal-banggaal. Kona balino Utus sio mususa, tukon sio Utus kaluale komian mo kubaiyo doiya langgedoo. ³⁻⁴Doi potokitaan, yaku dodoon doi komuyu, bai doi mian noano yaku daano doi komuyu. Jadi yaku yase mokubai tindakan pokakana yaku daano polaing-laing tukon komuyu, “Tukon Yesus Klistus sambuno, yaku okitakene baikon komian mo lapamo kubaiyo kokokubai mobuno doiya kona manggilitan, sio nainukum!” Kalu komuyu pototongi poanggape baikon yaku daano doi komuyudoo, tukon koidan nda Temeneno Yesus nakuasa, ⁵komuyu sio pobeekene doiya mianoo doi Ibiliis sulano doiya mianoo butongo nasilaka tukon buno doiya kona loh sinalamaton kalu laate kotembono ko Temeneno nalubatan koidan.

⁶Aki namoola komuyu banggal-banggaal. Ugaate komuyu lapamo toiyo naiya pelibahasa nia, “Lagi mo soisik kubaiyo sasaibino koadonan teali tuboi!” ⁷Sakukene loolukon do lagidoo mo malumbito, doiyamo lagi lalim, sulano komuyu nateali pokakana koadonan mo boolu, bilisii doi lagi lalimoo mo malumbit, tukon yaku toiyo baikon komuyu takainomo buno doiya. Sabab ko Paskah lamekanano kita sasalaanemo, sabab Klistus mo teali buno domba Paskah lapamo kinulbankanggon. ⁸Jadi, maimo nda lamekene donda lameanoo tukon loti mo akiyo kona lagi, doiyamo loti mo andekene kona moliyousan tukon sasaibino kolangge pokonoi ko Mian Bisa noano. Inai nda lamekene do Paskahdoo tukon loti mo tasambul lagi mo malumbito, doiyamo lagi lalim tukon kulokisan.

⁹Doi kusulat loolukonoo lalomo, yaku pailukene ikoo sulano naaki pobelgaul tukon mian motolosinduwaon. ¹⁰Komo yaku makisuutiyo bolikon mian motolosinduwaon kabai momodoko, kabai ponipu kabai mososubaiyo kosetan mo aki natoiyoo ko Mian Bisa tutuuno. Bolikon! Yaku aki kumakisuutiyo yanila; sabab kalu komuyu dodooniyo yanila, maka tantumo komuyu sio pokalual nai dunia nia. ¹¹Daku makisuut doiyamo, baikon komuyu inai pobelgaul tukon mian mo akuiyo kobutongo Salani miano, bai do mianoo basinduwa, kabai modoko, kabai mian mososubaiyo kopilogot, kabai yase lokis-lokise komian

bailong, kabai nggolonguon, kai mian mpondikukan. Osulang pokaanggon doiya mianoo inai!

¹²⁻¹³Takainomo koadiliyano komian badaang mobolikon Salani miano bolikon kuulusan. Mian Bisa susuungo komo adiliyo yanila. Bai doi muanggota-anggota jemaat, bolikon kai komuyu susuungo komo adiliyo yanila? Doi Kitab Moliyous lalomo totulis, "Siikayo komian molokis modaano doi komuyudoo."

Makalaakonon utus doi pangadilan

6 Bulaandokon modaano doi komuyudoo komo balani ampakon doi hakim mo aki natoiyoo ko Mian Bisa, sulano nakalaakene koutusonggita mopomeenggon manganggaan, kalu yana daano kona posalakonan tukon do utusoo? Bulaando yana aki nakabiyo doi Mian Bisa namian nauluse doiya palakaladoo? ²Oilakai komuyu aki potoiyo baikon ko Mian Bisa namian moola adiliyo nadunia nia? Jadi, kalu komuyu moola adiliyo nadunia nia, kai komuyu aki naikon pomoola uluse dopalakala-palakala pangadilanoo mo akiyo koalaino? ³Oilakai komuyu akipo toiyo baikon kita naikon adiliyo komalaekat-malaekat? Lobi-lobian koidan palakala-palakala natuboan samba-samba kooloyo! ⁴Maka kalu sumbut kopalakala-palakala mobuno doiya, kai naikon komuyu kalaakene doi mian mo akiyo kona limang doi jemaat lalomo? ⁵Bisa-bisa tolongo mongkubai maa! Tantu doi komuyudoo daano meeng komian mo sukup kona pandoiyan momoola alapayo koulusano doi utus-utus sasaibino mo Salani miano napoliitonan! ⁶Bai kobalino meeng ko Salani miano ampakon doi mian mobolikon Salani miano sulano nakalaakene kona palakala doi utusoo mo Salani!

⁷Mau naaki naampakon popalakalai doi mian mobolikon Salani miano; modaano kopoliitonan doi komuyudoo doiya bunomo meeng kona salaan doi komuyu. Lobian monondok kalu komuyu kinubai aki naadil, kabai inolugi! ⁸Bai komuyu susuungo komo kubaiyo komian bailong tukon aki naadil. Komuyu susuungo koidan mo olugiyo mian bailong. Tukon doiya komuyu kubaiyo doi utus-utusonggita mopomeenggon manganggaan! ⁹Komuyu kai toiyo baikon komian badaang mo aki naloingiyo ko Mian Bisa namongiasan, aki nateali Mian Bisa namian? Inai potongokolii! Mian badaang molokis

kona kokubai, mian badaang mo ososubaiyo kopilogot, mo basinduwa, mo kubaiyo kokokubai mo minamaakon doi tulano malane susuwele kabai boi-boine susuwele, ¹⁰mo pondikuk, mo modoko, nggolonguwon, mo yase lokis-lokise komian bailong, tukon mo olugiyu komian bailong – sasaibino mian mobuno doiya aki naikon nateali Mian Bisa namian. ¹¹Daano komoimoiya doi komuyudoo loolukonoo kona kokubai buno doiya. Bai budodoiya komuyu inokitakonggon bilisiimo doi polalim. Komuyu lapamo teali Mian Bisa namian mo tangalaas. Komuyu lapamo pokindokon koidan ko Mian Bisa, sabab komuyu anggayomo Yesus Klistus tukon sabab kuasa Loh moluwedoi nda Mian Bisa.

Pakeyo kobutomu sulano mumuliakene ko Mian Bisa

¹²Daano komo bantile baikon meeng-meeng komian moola kubaiyo sasaibino kolangge. Bai kalu yaku aki nasasaibino daano kogunano. Jadi mau kai nasasaibino moola kukubaiyo, bai yaku aki kupataikene kobutonggu nakinuasai mau oioilamo. ¹³Daano koidan komo bantile baikon kokinaan tuuk doi mian tiano, tukon komian tiano dinaanokon tuuk doi kinaan. Bai kolua-luanodoo naikon Mian Bisa akiyenggene. Kobanggapi butongo aki namoola pinake mokubaiyo kolangge mo lokis, bai tolono tuuk leleaniyo ko Temeneno. Tukon ko Temeneno pialayo do butongoo. ¹⁴Mian Bisa lapamo otuboiyo Yesus doi namatean, bunomo koidan ko Mian Bisa naikon otuboiyo kita tukon nakuasa.

¹⁵Utus-utus toiyo baikon kobutomu daano anggota Klistus butongo. Jadi, moola kai kumangala komeeng koanggota Klistus butongo maka kutealikene meeng koanggota balolowa butongo? Doiya aki nateali! ¹⁶Kabai ugaate komuyu akiyoon potoiyo baikon komian mo posombuli tukon meeng komian mobalolowa, teali pomeenggon tukon do mianoo mobalolowa! Sabab doi Kitab Moliyous lalomo totulis, “Kolua-luano teali meeng.” ¹⁷Bai komian mo pomeenggono kobutongo tukon Temeneno, ko Temeneno Na Loh tukon do mianoo naloh teali meeng.

¹⁸Podedeenggene kokokubai-kokubai mo lokis, sabab sasai-bino kolalim bailong komian mo kubaiyo, teali bolikon doi mianoo butongo. Bai komian mo mongkubai langge mo lokis,

koalatino mongkubai lalim doi butongo susuungo. ¹⁹Komuyu sio potoiyo baikon kobutomuyudoo Mian Bisa Na Loh nadungolan. Do Lohdoo dungol doi komuyu. Tukon Mian Bisa susuungo komo beekene do Lohdoo doi komuyu. Utus butongo bolikon koomu. Doiya Mian Bisa koono. ²⁰Ko Mian Bisa lapamo oliyo komuyu tukon lapamo beale botol. Tobikon doiya, pakeyo kobutomu mono-monondok sulano ko Mian Bisa nakinabasal.

Pasadai-pasadai kaliangano basowaanan

7 Budodoiya yaku yase basilingan kokaliangano soal-soal komuyu mo bantile doi posulat lalomo. Kalu meeng komala-malane aki naosowaan, doiya monondok. ²Bai sulano naaki natogoda sulano naaki nakubaiyo kolangge-langge mo aki namoola, lobian monondok memeeng komala-malane tadukai nadaano kona boloki susuungo tukon memeeng koboine sio nadaano kona langkai susuungo. ³Kolangkai sio nalakukanggene kona kawajiban bunu meeng kolangkai doi naboloki, tukon koboloki sio nalakukanggene kona kawajiban bunu meeng koboine doi nalangkai; memeeng sio nalakukene kona kawajiban doi bailong. ⁴Koboloki aki nakuasaiyo kobutongo susuungo; komo kuasaiyo kobutongo doiyamo nalangkai. Bunomo koidan kolangkai aki nakuasaiyo kobutongo susuungo; komo kuasaiyo kobutongo doiyamo naboloki. ⁵Inai napoalaas meeng tukon doi bailong doi babolokian tukon balangkaiyan. Moola kalu tongo soisik kotembo, asal suwe-suwele lapamo potoikon. Tukon kalu bunu doiya memeeng moola sambeang tukon aki nataganggu. Bai doibundu, siokai komuyu po pokoolanikon koidan bunu meeng kolangkai boloki. Kalu aki nabuno doiya, komuyu naikon loloiyo koibiliis nabudukan, sabab komuyu aki pobukuan motaane kopoo moot.

⁶Yaku bantile naiya bolikon bunu meeng kopalenta, bai meeng kootinau. ⁷Kona tutuuwan yaku lobian yase kalu sasaibino komian teali bunu yaku. Bai memeeng lapamo mantalima kalunia mo tantu moluwedoi Mian Bisa. Meeng komian mantalima kalunia naiya, kobailong daano kona kaluniadoo.

⁸Doi mian badaang mo akiyoon naosowaan tukon doi boiboine mo balu, naiya daku otinau: Lobian monondok kalu Utus tataap tubo susuumu bunu yaku. ⁹Bai kalu Utus aki mumoola

taane komu moot, Utus tadukai muosowaan. Sabab lobian kona monondokan kalu Utus osowaan kalu mobaino komu moot tokumbe-kumbe. ¹⁰Doi yanila mo lapamo osowaan, naiya daku palenta: (Kona tutuuwan bolikon yaku komo mebee naiya palenta nia, bai Temeneno.) Meeng koboine mo lapamo osowaan inai nabauntale kona langkai. ¹¹Bai kalu yana bauntalemo, yana sio natataap aki naosowaan, kabai sulaiyo dona langkai. Tukon meeng kolangkai aki namoola bauntale kona boloki. ¹²Doi bai-bailonggon daku otinau doiyamo: – naiya kuotinau susuunggu, bolikon Temeneno – kalu meeng ko Salani miano mangala meeng koboine mo aki namangangga doi Klistus, tukon kona boloki yase tubo tukon yana, do mianoo aki namoola bauntale dona bolokidoo. ¹³Tukon kalu meeng koboine Salani miano mangala langkai meeng komalane mo aki namangangga doi Klistus, tukon dona langkaidoo yase tubo tukon yana, maka do bolokidoo aki namoola bauntale dona langkaidoo. ¹⁴Sabab dolangkaidoo mo aki namangangga minoolakon sulano nateali Mian Bisa namian sabab dona poalaanoo tukon boloki mo lapamo teali Mian Bisa namian. Bunomo koidan boloki mo aki namangangga minoolakon sulano nateali Mian Bisa namian, sabab dona poalaanoo kolangkai mo lapamo teali Mian Bisa namian. Kalu aki nabuno doiya, yanila napau-pau tantu pokakanamo komian moaki namangangga napau-pau, banggokai do pau-paudoo inaanggon bunu Mian Bisa namian. ¹⁵Bai kalu do mianoo mo aki namangangga bauntale kona boloki kai nalangkai mo Salanimu, inai mopantane yana. Doi langge nia Utus boine kabai Utus malanedoo bebas, sabab ko Mian Bisa yase sulano Utus tubo tukon monondok. ¹⁶Sabab Utus meeng koboloki – mo manganggamo doi Temeneno – bulaandokon kai Utus momoola toiyo tukon tutuu baikon Utus aki namoola salamatene komu langkai? Bunomo koidan Utus meeng kolangkai Salani miano, bulaandokon kai Utus motoiyo tukon tutuu baikon Utus aki namoola salamatene komu boloki?

Tubo pokakana Utus linolaing Temeneno

¹⁷Siokai memeeng atule kona tuboan loloiyo ko Mian Bisa nalolaingano bunu mo lapamo Mian Bisa tantukene doi yana singgato Mian Bisa nauangano sulano namangangga doi

yana. Doiyamo koatulan yaku mo otunggukene doi samba-samba kojemaat. ¹⁸Umpamano, kalu meeng komian lapamo sinunat salataa yana mantalima ponguang doi Mian Bisa, maka inai do mianoo nakakaate sulano akiyenggene do tanda-tanda sunatoo. Bunomo koidan kalu meeng komian akiyoon nasinunat salataa yana mantalima ponguang doi Mian Bisa, inai do mianoo nakabiyo nasinunat. ¹⁹Sabab mololoi koatulan basunatan kai aki nda mololoi kolua-luanodoo akiyo koalantino oioila. Komo penting tolono nda loloiyano kopalenta-palenta Mian Bisa. ²⁰Siokai namemeeng komian natataap tubo doi nandondoong lalomo buno tembodoo yana namantalimaan Mian Bisa naponguang. ²¹Kalu salataa Utus inuang, Utus daano komeeng kona ata, mau naaki Utus-utus nasusa-susa mopikikene doiya langgedoo. Bai kalu Utus naikon malaat todanan sulano teali bebas, pakeyomo doiya todananoo. ²²Sabab meeng koata mo lapamo mangangga doi Temeneno, doiya Temeneno namian mo bebas. Tukon meeng komian mobebas mo mangangga doi Temeneno, doiya Klistus napeleleani. ²³Mian Bisa lapamo oliyo Utus tukon lapamo botol koolino. Tobikon doiya, inaikai Utus mobeekene kobutomu sulano nateali banggapi naata. ²⁴Jadi, Utus-utus, bulaando komu ndondoong doi tembodoo inuang, siokai Utus natataap tubo buno doiya polaing tukon Mian Bisa.

Doi mian-mian mo akiyoon naosowaan tukon balu-baluu

²⁵Budodoiya kokaliangano doi mian-mian mo akiyoon naosowaan. Kokaliangano doiya langgedoo, yaku aki kumantalima palenta-palenta moluwedoi Temeneno. Mau kai nabuno mian mo tongo Temeneno namaasi moola nainangga, yaku yase beena otinau.

²⁶Nda neneeke sasaibino kosusaan naiya budodoo, yaku lasayo lobian kona monondokan kalu komian tataap loloiyo kona tuboan buno kona tuboan budodoo naiya. ²⁷Kalu Utus daanomo komu boloki inaikai mokakaate mopobauntal tukon domo bolokidoo. Kalu Utus akiyoon muyase osowaan, tadukai naaki mumounggoli boloki. ²⁸Bai kalu Utus osowaan, doiya bolikon lalim. Bunomo koidan kalu meeng koboine osowaan, koalantino yana aki nabaladosa. Tolono, doi yaniladoo mo osowaano badaang kosusaan konapo sinasalaan. Tukon yaku yase Utus tongosodii doi susaan-susaanoo.

²⁹Daku makisuut bunu naiya, Utus-utus: Kita akimo nabadaang konda tembo. Atambuunemo budodoiya, doi meeng-meeng komian mo daanomo kona boloki siokai natubo adukon bunu mian moakiyo kona boloki; ³⁰mian mo kokiil, tubo adukon bunu yana aki nasusa konoano; mian mo kokumbit adukon bunu yana aki nalaba-laba; mian mo lapamo mongoli, adukon bunu yana akiyo kona oioila; ³¹tukon mian mo balimang doi langge-langge dunia, siokai natubo adukon bunu yana aki napopusinggon doiya langge-langgedoo. Sabab akimo namalumbit naiya dunia nia, doi ndodoongo mo bunu naiya, naikon lapus!

³²Yaku yase sulano Utus nabebas doi susaanoo. Komian mo akiyo kona boloki yana ettenge kona pikilan doi langge-langge kokaliangano Temeneno, sabab yana yase sanaangene ko Temeneno. ³³Bai komian mo daanomo kona boloki badaang kona pinikikon doi langge-langge nai dunia nia, sabab yana yase sanaangene kona boloki noano; ³⁴kona sabab napikilan tongobos-oboso. Meeng koboine mo akiyo kona langkai, kabai meeng kopau boineno, naikon badaang kona pinikikon langge-langge kaliangano Temeneno, sabab yana yase sulano kona jiwa tukon butongo nateali Mian Bisa namian. Bai meeng koboine mo lapamo daano kona langkai, kona pikilan ettenge doi langge-langge nai dunia nia, sabab yana yase sanaangene kona langkai noano.

³⁵Yaku tulise sasaibino doiya tuuk doi mumonondokan susuumu, bolikon komakisuuto linalanggon naiya tukon linalanggon doiya. Komo yaku yase tolono sulano Utus nakubaiyo komo kana tukon mo bisa, tukon sulano Utus namoola ettenge komu pikilan doi Temeneno.

³⁶Kalu memeeng komian lasayo aki naampakonggene komo bisa doi nabibiyen, kalu yana aki namoola taane kona moot, tukon yana yasemo poala do boinedoo, tadikenemo yana nakubaiyo oilamo kona linasa mo monondok. Yana aki nabaladosa, kalu yana poalamo. ³⁷Bai kalu memeeng komian lapamo mongkubai kaputusan doi noano lalomo sulano naaki naosowaan tukon kona bibiyen tukon dona kaputusanoo aki napakisaayo, maka doiya nakinubaidoo monondok, asal yana kubaiyo tukon doi nasanaangan. ³⁸Kona tutuuwan, inian mo osowaan monondok kona kokubai, tukon mian mo aki naosowaan lobian monondok kona kokubai.

³⁹Meeng koboine mo lapamo osowaan yana tokooton doi langkai bai tolongo kalu dona langkaidoo daano motubo. Kalu kona langkai matemo, do boinedoo bebaso osowaan koidan tukon mian bailong yana mo yase; asal dona osowaananoo baasowaanan Salani. ⁴⁰Bai yana naikon lobian utung kalu akimo naosowaan koidan. Doiya kupandapat susuungu, bai yaku lasayo baikon doi yakudoo mobantile doiya tukon kuasa Mian Bisa Na Loh.

Kokaliangano kinaan mo bineekon pokakana komeeng kososubakon doi bapilogotan

8 Budodoiya kaliangano kokinaan mo bineekon pokakana komeeng kososubakon doi pilogot. Takainomo bisa buno mian nabantilano, “Kita sasaibino pandoimo.” Bai pandoiyan mokubaiyo komian teali bangga-banggaal, sabea kai koseang mobangune komian butongo. ²Mian mo aanggene baikon yana badaang kona tinoi, kona bisa-bisaan akiyoon natoiyu komo bisa-bisa tuuno. ³Bai komian mo bisa-bisa seseange ko Mian Bisa, yana Mian Bisa tingoniiyo.

⁴Kokaliangano soal kaanano kokinaan mo lapamo sinosubakon doi pilogot, kita toiyu baikon kobapilogotan balaanggene kolangge-langge mo aki nabisa-bisa tukon mo akiyo. Tukon kita toiyu koidan baikon ko Mian Bisa tolongo meeng; akiyo kobailong. ⁵Takainomo badaang koidan komo binantil ilah tukon temeneno; mau komo daano doi timbu mau komo daano doi dunia bungukono. ⁶Bai doi kita, ko Mian Bisa tolongo meeng. Yana Tama mo tealikene sasaibino kolangge. Tolongu doi yana konda tuboan. Tukon ko Temeneno tolongo meeng koidan, doiyamo Yesus Klistus. Luwedoi yana sasaibino kolangge tinealikon, tukon sabab doi yana maka kita malaat tuboan.

⁷Mau kai nabuno doiya, aki nasasaibino komian toiyu doiya langgedoo. Daano komo loolukon biasa sosubaiyo kopilogot. Jadi, tobikon doiya polong doiya budodoo yanila daano molasae baikon kokinaan, mo lapamo sinosubakon doi pilogot, doiya kinaan bapilogotan. Maka kalu yanila kaane doiya kinaanoo, yanila lasaiyo baladosa; sabab yanila namangangaanoo akiyoon namoonggol. ⁸Kona bisaanoo doiya kinaanoo susuungu aki nakubaiyo pootamikene kita tukon Mian Bisa natealikene lobian konda pokilakonon. Kalu kita kaane doiya kinaanoo, kita aki



Yunani miano natemeneno (8:5)

nda malaat oioila kountungo. Koidan kalu kita aki nda kaane doiya kinaanoo mau kita aki nda lugi oioila.

⁹Bai, pobadagai! Inai nasampe teali baikon komian bailong teali baladosa – sabab kona manganggaan akiyoon namoonggol – sabab Utus bebas mokubaiyo kooioilamo. ¹⁰Daku makisuut bunu naiya: Andeno Utus, komo moonggolo komu manganggaan, daano moosulang kaan doi balambeaan. Doibundu daano komeeng komian mokitayo Utus moosulang kaan doi balambeaanoo. Kalu do mianoo kona manganggaan akiyoon namoonggol, bolikon kai naapa doiya kubaiyo do mianoo balanikene kaane dokinaanoo mo lapamo bineekon doi pilogotoo? ¹¹Tukon tobikon doiya, maka Utus namanganggaan tealikene do mianoo namanganggaan mo akiyoon namoonggol teali tapa. Banggokai Klistus mate tuuk do mianoo koidan. ¹²Tukon kalu Utus mongkubai kasalaan mobuno doiya doi utus-utus Salani miano – doiya Utus lusake yanila namanganggaan mo daano lemah – maka Utus baladosa doi Klistus. ¹³Doiyamo kosababpo, kalu kokinaan mangaanikene koutusonggu baladosa maka yaku akimo kumakaan sail koidan. Sabab inai-inaikene koutusonggu baladosa sabab yaku.


Lasul nahaak-haak tukon nakawajiban-kawajiban

9 Bolikon kai yaku mian mobebas! Bolikon kai yaku lasul? Kai baanggon yaku akiyoon kukitayo Yesus, nda Temeneno? Kai komuyu bolikon kulimang hasilo motuuk doi Temeneno? ²Kalu komian bailong aki naakuiyo yaku meeng kolasul, mau nasoisik komuyu akuiyo doiya! Sabab komu tuboan Salani miano doiya bukutii baikon yaku meeng kolasul.

³Kalu komian asalakene yaku, yaku timbiliyo buno naiya: ⁴Kai yaku aki kubelhaak mantalima kinaan tukon paisu sabab daku balimangan? ⁵Kai yaku aki kubelhaak babayo komeeng koboloki Salani miano napolaing-laing yaku doi kuampa-ampakonan, pokakana ko Temeneno Yesus utus-utuso nakinubai tukon doi lasul-lasul bailong, talalaing Petulus? ⁶Kabai tolono yaku tukon Balanabas komo sinumbolii moumbal kinaan? ⁷Akiyo komeeng koanggota suludadu mo sio naokoniiyo kobutongo susuungo doi angkatan molobosidoo! Akiyo kopetani mo masakakon anggul doi nakombungoo maka naaki namakaan do angguloo hasilo doi nakombungoo! Akiyo kopototooli iyayon mo mopiala domba, maka naaki namonginum susu doi nadomba-dombadoo!

⁸Yaku pelengene doiya bolikon tolono beldasarkan mo biasa doi kupengalaman samba-samba kooloyo, bai sabab doi Kitab Moliyous lalomo linoolukonggon doiya langgedoo. ⁹Doi Musa nabuku lalomo totulis, “Kosaapi mo daano pipike kogandum sulano natoliat gandumoo batuno doi kulito, inai nasinigot kobabano.” Do saapidoo kai komo Mian Bisa palatikangene? ¹⁰Kabai doiya komo minakisuuti tuuk kita? Takainomo doiya totulis tuuk doi kita. Sabab komian mo limange kokombung tukon mian mo bilisiyo kona gandum takainomo yana limange tukon moinikene namantalima soobos doi balimanganoo hasilo. ¹¹Kami lapamo basabukon kalibuang lohani doi mutuboan lalomo. Maka kalu kami mantalima balakaat-balakaat doi pobuato, oilakai doiya koalatio kami tuntute todudul badaang doi komuyu? ¹²Kalu komian badaang bailong daano kona haak momoinikene naiya doi komuyu, bolikon kai kami komo lobian komai haak doi yanila?

Bai yaku akiyoon kugunakangene do haakoo. Kobalino yaku



Saapi mo daano mo tudongiiyo kogandum (9:9)

yase tuuno motanggunge sasaibino kolangge kalu baino yaku mosumbetene komeeng kolangge mo sembange kobabilitakanano ko Bilita Monondok tentang Klistus. ¹³Utus tantu toiyo baikon komian mo balimang doi Mian Bisa Nabonua lalomo yanila mantalima kinaan moluwedoi Mian Bisa Nabonua. Tukon mian badaang mo uluse kososubakon abosano, yana malaat soobos doi sosubakonoo mo sinosubakon idoo. ¹⁴Buno koidan ko Temeneno lapamo tantukene baikon komian mo babilitakene ko Bilita Monondok doiya sio namalaat kaanan doi nababilitaanoo.

¹⁵Mau kai naakiyoon naidan kupakeyo do haak-haakoo. Tukon yaku tulise naiya sulatia bolikon kai koidan tukon makisuut sulano doiya hal-haloo nakinubaimo budodoiya doi yaku. Lobian monondok yaku mate kalu baino molapus langge mo yaku mobanggaalkenedoo. ¹⁶Sabab, kalu doiya tolongo soal babilitakene ko Bilita Monondok moluwedoi Mian Bisa, maka yaku aki kubalahaak mobanggal-banggaal, sabab ko Mian Bisa lapamo bintekene yaku sulano kukubaiyo. Silakamo yaku, kalu yaku aki kubabilitakene ko Bilita Monondokoo! ¹⁷Umpamano yaku ampakonggene do limangoo moluwedoi kumongiasan susuunggu, maka yaku moola kumoinikene momalaat tambo. Bai yaku babilitakene do Bilitadoo mo Monondok sabab doiya

pinalalu tuuno. Yaku Mian Bisa bintekenemo sulano kulimange doiya. ¹⁸Kalu bunu doiya, oila daku tambo? Naiya kotambono: baikon yaku moola babilitakene ko Bilita Monondokoo aki kutonggungikene doi meeng komian sulano natamboyo yaku, sabab yaku aki kutuntute daku haak-haak bunu meeng kopopolonggon Bilita Monondok.

¹⁹Yaku nia bolikon indee miano naata; yaku bebas. Mau kai nabuno doiya, yaku lapamo tealikene kobutonggu nia ata doi sasaibino komian. Yaku lakukene doiya sulano kumoola manangkangene komian badaang tuuk doi Klistus. ²⁰Komo doi Yahudi miano, yaku babunokon Yahudi miano sulano kumoola manangkangene ko Yahudi miano tuuk doi Klistus. Komo doi mian-mian mo tubo mololoiyo Musa naukum, yaku babunokon bunu kai mian motokooton doi ukumoo, mau kai yaku kona tutuuwan aki kutokooton doi ukumoo. Yaku kubaiyo doiya sulano kumoola kedele yanila nateali Klistus napololaing. ²¹Komo bolikon Yahudi miano, yaku babunokonggon meeng komian mobolikon Yahudi miano, mo tubo aki naloingiyo Musa naukum. Yaku kubaiyo doiya sulano yaku moola kedele yanila nateali Klistus napololaing. Bai doiya akiyo koalantino baikon yaku aki kumolole doi Mian Bisa napalenta-palenta; bai yaku kinuasai Klistus napalenta-palenta. ²²Doi mian mo aki namoonggol kona manganggaan tanga-tangano, mau yaku kai babunokonggon bunu meeng komian kona manganggaan mo aki namoonggol sulano yaku moola kedele yanila nateali pololaing Klistus. Pendeknya, yaku teali doi sambu-sambu tuuk doi sasaibino komian sulano mau nabulaando kololoono koidan bai yaku moola salamatenene kosoobos doi yaniladoo.

²³Sasaibino doiya yaku lakukene tuuk doi Bilita Monondokoo moluwedoi Mian Bisa, sulano mau yaku talalaing binalakaati. ²⁴Utus toiyo baikon doi tandingan lalomo sasaibino komo malaing yanila obuleng, bai tolono meeng komian komo malaat tambo. Tobikon doiya poobuleng bunu doiya sulano Utus malaat tambono. ²⁵Doi meeng komian mo daano doi latihan lalomo, yana dagaiyo kobutongo doi sasaibino kolangge. Yana lakukene doiya sabab yana yase nainooni tukon inoon bunga doi namalaatan nomol, doiyamo bunga mo tolono soisik kotembo molooyumo. Bai nai kita nia dagaiyo kobutonggita doi sasaibino kolangge sabab kita yase nda ininooni inoon bunga mo aki naikon namolooyu. ²⁶Doiyamo kosababpo yaku obuleng

tukon makisuut mo tantu. Buno doi tandingan popukulan, yaku aki kubapukul sabalangan. ²⁷Yaku latiyo kobutongo tukon kakabukuan sulano namoola yaku kuasaiyo. Yaku kubaiyo buno doiya, sabab yaku aki kuyase napolong teali baikon nasambuno yaku tobiyo komian bailong namalaing doi tandinganoo lalomo, yaku susuunggu tinolak.

Poingotii kaliangano pilogot

10 Utus-utus! Utus siokai muneneeke oila komo tealimo doi nda tulunanoo salataa yanila nalaingano Musa. Yanila sasaibino linolaing tukon bunong, tukon polong salamat yanila mopintosiiyo ko Tobun Memela. ²Sulano nateali Musa napololaing-pololaing, yanila sasaibino sinau doi bunong lalomo tukon doi tobunoo lalomo. ³Yanila sasaibino makaan kinaan lohani mo pokakana, ⁴tukon monginum paisu lohani mo pokakana. Yanila sasaibino monginum paisu doi bungkuko batu lohani mo loolainge yanila; do bungkukodoo batu doiyamo Klistus susuungo. ⁵Mau nabuno doiya, Mian Bisa aki nasanaangene kosoobos mobadaang doi yaniladoo, tukon doiyamo kosababpo yanila bada-badano tasabukon doi padang gulun.

⁶Sasaibino doiya teali sontoh doi kita, tuuk ingotiikene doi kita sulano inai memeeetene kolangge-langge mo lokis mobuno yanila. ⁷Koidan sulano kita inai nda sosuba doi pilogot buno soobos doi yanila nakinubai. Doi Kitab Moliyous lalomo totulis, "Maka bangsadooila tambuuno kaan inum, tukon osuleng sosubaiyo kopilogot." ⁸Kita aki namoola kubaiyo kolangge-langge mo lokis buno yaniladoo soobos nakinubai. Sabab, lua kolono tolu koloon komian doi yaniladoo komo mate doi meeng kooloyo sabab yanila kubaiyo doiya. ⁹Kita aki namoola soba-sobayo ko Temeneno buno yanila soobos mo kubaiyo loolukonoo, tobikon yanila mate tinukuk binda moupason. ¹⁰Kita aki namoola koidan mondommuk; pokakana komo kinubai doi yaniladoo soobos, tobikon yanila inakate Malaekat Matean.

¹¹Sasaibino doiya langgedoo teali doi yanila sulano nateali sontoh doi mian badaang bailong. Tukon sasaibino doiya totulis

koidan teali tondoan doi kita. Sabab kita tubo budodoiya doi lounu napupusan.

¹²Mian mo akuiyo kobutongo kokondong doi moonggolan, siokai nabada-nabadagai; inai nabaino yana otuwong. ¹³Samba-samba kosobaan Utus mo toupiyo doiya daano meeng kosobaan mo biasa banggapi toupiyo. Bai ko Mian Bisa molole doi paladandian. Yana aki nabatadikene Utus sinobai lobian doi mominoolakon. Salataa Utus malaat sobaan, yana beena loloon doikoo sulano muteali bukuan tukon sulano Utus namoola bataanggon.

¹⁴Tobikon doiya, Utus-utus yaku mo seange, siokai komuyu pomositene kososubaan doi pilogot. ¹⁵Yaku bantile doi komuyu bunu mian mo pandoi. Siokai komuyu susuungo potimbongiiyo nia kubantilan nia. ¹⁶Salataa doi nda monginuman anggul tukon mangkabi kinatauan doi Mian Bisa, bolikonoo doiya naotudoikanano baikon kita pomeenggon tukon Klistus doi namatean lalomo? Tukon doi tembodoo nda obos-obosano koloti sulano nda kaane posinggat-singgat, bolikonodoo doiya otudoikene baikon kita pomeenggono doi Klistus butongo? ¹⁷Sabab tolongo meeng koloti tolong, tukon kita sasaibino kaane do lotidoo mo meeng, maka naiya kita nia mo badaang bunu meeng komian butongo.

¹⁸Soba palatikanggene ko Yahudi miano. Yanila mo kaane kokinaan mo sinosubakon doi basosubakonan bungkukono, doiya mian-mianoo pomeenggon do tampatoo. ¹⁹Oila daku minakisuuti tukon doiya? Bapilogotan kai kinaan mo sinosubakon doi pilogotoo akiyo koalatio. ²⁰Oilamo komo sinosubakon doi tampatoo basosubakonan motuuk doi pilogot aki nasinosubakon doi Mian Bisa, bai tolongo doi ibiliis. Tukon yaku aki kuyase komuyu mopomeenggon tukon ibiliis. ²¹Komuyu aki namoola monginum anggul doi Temeneno nagalaas tukon pososinggatene koanggul doi ibiliis koidan nagalaas. Komuyu aki namoola kaan doi Temeneno nameja, tukon koidan doi ibiliis nameja. ²²Kabai kita yase kubaiyo sulano ko Temeneno namasakit konoano? Kai kita lobian konda bukuanan tukon Temeneno?

²³Komian nabantilan, "Kita moola nda kubaiyo oila konda iniyas." Bisa! Bai aki nasasaibino doi kita mo yase kubaiyo

daano kogunano. “Kita moola kubaiyo oilamo konda iniyas” – bai aki nasasaibinodoo kita mo yase bangune konda tuboan. ²⁴Inaikai nadaano komeeng komian mobalajuang motolongo tuuk nakopontingan susuungo. Memeeng komian siokai nabalajuang tuuk doi mian bailong nakopontingan.

²⁵Komuyu moola pokaane kosail oilamo komo binalukon doi labotan sail. Mau naaki posolidikiyo loolukon, mau kai nadaano kopo sasaaki doi noamuyu lalomo. ²⁶Sabab doi Kitab Moliyous lalomo totulis, “Naiya dunia nia tukon sasaibino koantoko doiya Temeneno koono.”

²⁷Kalu komuyu kinolo kaan luwedoi meeng komian mo bolikon Salani miano, tukon kalu komuyu talimayo do pokolodoo, pokaanemo oila komo sinidokiikon doikoo. Mau naaki posolidikiyo inaando kona luwean doiya kinaanoo, sulano naakiyo kosasaaki doi noamu lalomo. ²⁸Bai kalu daano komo bantile doikoo, “Naiya kinaan nia lapamo sinosubakon doi pilogot,” inaikai mokaane doiya kinaanoo, sabab komuyu palatikanggenemo doiya mianoo nakopontingan tukon doi noamuyudoo lalomo naboti-botikan. ²⁹Daku makisuut bolikon noamu naboti-botikan bai do mianoo noano naboti-botikan.

Tantu daano komo mansadai, “Ah, bulaando daku mongiasan motolongo mian bailong noano nakokila komo popookiyo? ³⁰Kalu yaku makaan kinaan tukon bakinatauwun doi Mian Bisa, bulaando komian mosalakene yaku mokaane do kinaanoo, saba kai yaku lapamo bakinatauwun doi Mian Bisa?”

³¹Oilamo Utus nakinubai – Utus makaan kabai monginum – kubaiyomo sasaibino doiya tuuk doi kabasalano ko Mian Bisa sambuno. ³²Mutubo babunokon doiya, sulano Utus aki mukubaiyo komian bailong teali baladosa; kai doi yaniladoo Yahudi miano kabai bolikon Yahudi miano, kabai Mian Bisa najemaat. ³³Potubo pobabunokon yaku. Yaku kakaate mosanaangene sasaibino komian noano doi sasaibino kolangge, akiyo komakisuut-makisuut kopontingan butongo susuungo. Daku tujuan sulano yanila sasaibino namoola sinalamaton.

11 Pololoiyon daku lenggang, pokakana mau yaku moloingiyo Klistus nalenggang.

Kokaliangano mapakean toik posunggup mian oluno doi tembo nda bakaledaan

²Yaku nggaale komuyu sabab komuyu sidutu neneeke yaku tukon loingiyo kootunggul yaku mo beekene komuyu. ³Bai yaku yase sulano komuyu potoiyo koidan kolangge meeng, doiyamo baikon doi memeeng komala-malane komo teali nakapala doiyamo Klistus; komo teali boloki kapalano doiyamo nalangkai, tukon komo teali Klistus nakapala doiyamo Mian Bisa. ⁴Kalu doi memeeng komala-malane doi tembo nasambeangan kabai doi nababilitakanano kobilita moluwedoi Mian Bisa doi mian mobadaang salaano, maka namapake toik posunggup oluno, maka doiya mianoo totulaiyo Klistus. ⁵Tukon kalu komeeng koboine doi tembo doi nasambeangan kabai doi nababilitakanano kobilita moluwedoi Mian Bisa doi mian namadaangan salaano, aki napake toik posunggup oluno, maka do boinedoo mongkubaikene maa kona langkai mo teali kapala doi butongo susuungo. Doiyamo pokakanamo do boinedoo oluno modinalulumo. ⁶Sabab kalu meeng koboine aki nayase mapake toik posunggup oluno tadukai dona buuk nadinalulu. Bai kalu komeeng koboine kona buuk dinalulu kai ginunting, doiya meeng kopototulai doi yana. Tobikon doiya tadukai yana napake toik posunggupi oluno. ⁷Komala-malane aki napalaluu mapake toik posunggupi oluno, sabab yana okitakene ko Mian Bisa napelibadi tukon kona kabasalan. Bai koboine tolono okitakene komala-malane nakabasalan, ⁸sabab komala-malane aki natinealikon luwedoi boine, bai boine komo tinealikon luwedoi mala-malane. ⁹Mala-malane aki koidan natinealikon tolono tuuk doi boi-boine nakapalaluuwan, bai boine tinealikon tuuk doi mala-malane nakapalaluuwan. ¹⁰Tobikon doiya, sulano komalaekat noano nateali sanaang, meeng koboine siokai napake toik posunggupi oluno bunu meeng kotanda baikon yana nalangkai komo kuasaiyo. ¹¹Mau kai nabuno doiya doi natuboan lalomo bunu Salani miano, koboine aki nakokondong susuungo tangalaas doi mala-malane, tukon koidan komala-malane aki nakokondong susuungo, tangalaas doi boi-boine. ¹²Sabab mau kai doboinedoo tumbe-tumbeno tinealikon luwedoi mala-malane,

bai koidan naapa kai domala-malanedoo sosuung doi boine; tukon sasaibino kolangge luwedo Mian Bisa.

¹³Soba Utus-utus popikikene naiya langge nia: Kai monondok meeng koboine nasambeang doi Mian Bisa doi mian namadaangan, akiyo kona posunggupi oluno? ¹⁴Doi nda pangalaman umum, komuyu lapamo inotunggulkon baikon kalu komala-malane bulusan kona buuk, doiya meeng kolangge mo aki namonondok. ¹⁵Bai kalu boine, kobuuk bineekon doi yana, sulano tosunggupi kooluno tukon kalu kona buuk bulusan doiya meeng kotambongan doi yana. ¹⁶Jadi, kalu daano komo ponggelekikene naiya masaala nia, tolongo meeng daku binantil doiyamo baikon mau doi kita mau kai Mian Bisa naanggota jemaat bailong sasaibino, tolongo meeng kona kabiasaanoo doi jemaat lalomo; komo sangalaasan doiya akiyo.

Temeneno napalajamuan

¹⁷Kokaliangano naiya momeeng nia, yaku aki kunggaale komuyu. Doi pototongan bakaledaan akiyo kohasilo mo monondok, tolongo mo lokis. ¹⁸Kotumbe-tumbeno yaku lengele, baikon doi pototongan lalomo daano kosoobos komo ponggeleki. Tukon yaku pikikene doiya bilitadoo badaang komo bisa. ¹⁹Takainomo pantaso nasumbot kopoonggelekiyan doi komuyu, sulano natotonganii ko Salani miano mo bisa. ²⁰Bai doi tembo popototongan, doi komuyudoo mokubaiyo bolikon Temeneno napalajamuan. ²¹Sabab doi pokaananoo, komuyu suwe-suwele momangala dokinaanoo, sampe daano komo akimo nasamba, sedangkan kobailong teali malangu. ²²Bulaando mobuno doiya? Baanggon kai Utus aki nadaano komu bonua? Utus moola mukaan tukon inum idoo! Kai banggon Utus yase kulokisanggene ko Mian Bisa najemaat tukon tealikene mammaa komian momasikiin? Oilamo komo sio kubantile naikon doi komuyu? Siokai yaku nggaale komuyu? Aki! Mau nabulaandomo yaku aki kunggaale komuyu.

²³Sabab komo yaku otunggulikene doi komuyu, doiya yaku talimayo doi Temeneno susuungo: baikon doi popookoo salataa Yesus, nda Temeneno nakinulokisanan, yana mangala loti, ²⁴tukon salataa yana bakinatawan doi Mian Bisa motuuk doi lotidoo, yana bisi-bisiliyo do lotidoo tukon limano, maka nabantile, "Naiyamo kobutonggu mo sinalakanggon tuuk doi komuyu. Pokubaiyomo naiya, sulano potandayo

yaku.” ²⁵Bunomo lakon salataa lapa kaan, yana mangala kogalaas anggul maka bantile, “Naiya anggulia daano komeeng kopaladandian Mian Bisa mo boolu, mosinahkanggon tukon saunggu. Kalu komuyu inume naiya, pokubaiyo naiya sulano potandayo yaku.” ²⁶Takainomo dopo makaanan loti tukon pomonginuman anggul nia, komuyu babilitakene ko Temeneno namatean, polong doi nalubatan.

²⁷Tobikon kai doiya, mian mo kaane ko Temeneno naloti tukon inume ko Temeneno naanggul tukon kokubai mo aki napantas, doiya mianoo baladosa doi Temeneno mo lapamo kulbankanggene kobutongo tukon sauno. ²⁸Jadi, memeeng komian sio napalesayo kobutongo loolukon, maka namoola makaan do lotidoo tukon monginum do anggulo. ²⁹Sabab kalu komian makaan loti tukon monginum anggul tukon tolongo bapiada baikon do palajamuanoo pokokonoi tukon ko Temeneno butongo, do mianoo makaan loti tukon monginum anggul tolongo malaat ukuman doi Mian Bisa doi butongo susuungo. ³⁰Doiyamo kosababpo badaang doi komuyudoo komo masakit tukon akimo nabukuan, tukon daano koidan komo mate. ³¹Bai kalu kita palesayo kobutonggita looluk, kita aki Mian Bisa naukume. ³²Bai kalu Mian Bisa ukume kita, yana umbale kita, sulano kita naaki nda kanakon ukuman polaing-laing naiya dunia nia.

³³Tobikon doiya, Utus-utusonggu, kalu komuyu pototongi mokaan doi Temeneno napalajamuan, komuyu sio popototiili. ³⁴Kalu daano komo malaal, yana sio namakaan loolukon doi nabonua. Kalu komuyu palatikanggene naiya langge nia, kopototongan-pototongan doi pobakaledaan aki nalubatene koukuman moluwedoi Mian Bisa motuuk doi butomu susuumu. Kokaliangano langge-langge bailong, naikon yaku talangkanggene doikoo, kalu yaku lubat koidan.

Kalunia moluwedoi Mian Bisa Na Loh

12 Budodoiya kokaliangano kalunia-kalunia mo bineekon moluwedoi Mian Bisa Na Loh. Doiya kaliangano yaku yase Utus-utus natoiyoo komo bisa. ²Neneeke baikon salataadoo komuyu akiyoon potingoniiyo ko Temeneno, komuyu tagoda mololoiyo kopilogot mo ponga. ³Komuyu sio potoiyo baikon

komian mo linolaing Mian Bisa Na Loh aki namoola bantile, “Yesus kinutuk!” Bunomo koidan akiyo komeeng komian momoola bantile, “Yesus Temeneno!” kalu do mianoo aki nalinolaing Mian Bisa Na Loh.

⁴Daano komoimoiya kokaliangano kokalunia moluwedoi Mian Bisa Na Loh bai sasaibino bineekon luwedoi Lohdoo mo meeng. ⁵Daano kokaliangano kolimang motuuk leleaniyo ko Temeneno, bai ko Temenenodoo mo lineleani, Temeneno mo meeng koidan! ⁶Daano komoimoiya kokaliangano limangano ko Temeneno nalimang, bai komo beena bukuanan doi balimanganoo doi memeeng komian doiyamo Mian Bisa mo meeng koidan. ⁷Tuuk doi nda monondokan sasaibino, Mian Bisa Na Loh balimang doi samba komian secala memeeng. ⁸Doi meeng komian, Lohdoo beena kasanggupan sulano nabasilangan tukon nainanggaan. Doi bailong Lohdoo mo pokakana beena kasanggupan sulano natalangkanggene kaliangano ko Mian Bisa. ⁹Lohdoo mo meeng koidan beena doi meeng komian bailong, mosanggup tuuno sulano namangangga doi Klistus; bainokai doi bailong Lohdoo beena kuasa sulano naaline komian nasesel. ¹⁰Doi meeng komian beena kuasa sulano nakubaiyo kolangge mominasaingdinggon tukon doi mian bailong binee kalunia sulano babilitakene ko Mian Bisa natetel-tetel. Doi mian bailong koidan Lohdoo beena kasanggupan sulano natoiyoo posasalakene indeemo kokalunia moluwedoi Mian Bisa Na Loh tukon komo bolikon. Daano komo beena kasanggupan sulano nabasilangan tukon moaisalomo kosilingan mo minasaingdinggon, tukon daano koidan komo binee kasanggupan sulano natalakanggene koalatio do silingan-silinganoo. ¹¹Sasaibino doiya Loh mo meengoo koidan komo limange; memeeng komian binee kalunia mo posasala mololoi Lohdoo namongiasan.

Badaang koanggota bai meeng kobutongo

¹²Klistus bunomo banggapi butongo; butongodoo meeng, bai daano badaang koanggotano. Sasaibino do anggotadoo, mau kai nabadaang, bai tolongo meeng kobutongo. ¹³Bunomo koidan kita sasaibino, mau Yahudi miano mau mian mobolikon Yahudi, ata-ata mau mian badaang mobebas; kita sasaibino lapamo sinau luwedoi Lohdoo mo pokakana, sulano kita nda

tinealikon pomeenggon doi Klistusoo butongo. Kita sasaibino koidan toupiyo do Lohdoo mo meeng totubo tuuno.

¹⁴Sabab do butongoo aki natolongo meeng koanggotano bai badaang koanggotano. ¹⁵Kalu aino bantile, “Yaku bolikon limanggu, tobikon doiya yaku aki kutongusokon doi butongoo,” doiya aki nabalalatii baikon do ainodoo aki natongusokon doi butongoo. ¹⁶Tukon kalu kotolingainggita bantile, “Sabab yaku bolikon mata, maka yaku aki kutongusokon doi butongo,” doiya koidan aki nabalalatii do tolingainggitadoo aki natongusokon doi butongo. ¹⁷Kalu ande-andeno totubo kobutonggitadoo teali mata, bulaando do butongodoo moola molongol? Kabai kalu totubo butongodoo teali tolingaino, bulaando do butongodoo nasoomanggene? ¹⁸Kita kitayo baikon ko Mian Bisa mo abese koanggota-anggotadoo doi butongo. Memeeng inabos doi abosano manulut ko Mian Bisa namongiasan. ¹⁹Kalu sasaibino tolono meeng koanggotano, inaando kai komo sinombuikon butongo? ²⁰Jadi, takainomo daano mobadaang koanggotano, bai kobutongo tolono meeng.

²¹Tobikon doiya, mata aki namoola bantil doi limano, “Yaku aki kupalaluuwo ikoo!” Kabai oluno bantil doi aino, “Yaku aki kupalaluuwo ikoo!” ²²Kobalino do butongodoo naanggota-anggota mo malamuyukoo, kita palaluuwo tuuno; ²³tukon do anggota-anggotadoo kita mo aanggene akiyo kogunano, tobikon doiyamo koanggota-anggota kita mo beena lobian badaang konda anggaano. Butongo anggota-anggotano mo tokita aki namonondok, doiyamo konda pinalatikanggon tuuno. ²⁴Kobutongo anggota-anggotano mo tokita monondok, aki napalaluu kita palatikanggene. Ko Mian Bisa lapamo susune kobutonggita buno doiya tobikon koanggota-anggota mo akiyo koanggano bineekon lobian badaang koanggano. ²⁵Tukon buno doiya do butongodoo aki natongobos-obos; susuwele anggota palatikanggene meeng tukon bailong. ²⁶Kalu meeng koanggota sakisaa, sasaibino do anggotadoo sakisaa; kalu meeng koanggota ngginaal, sasaibino koanggota bailong laba-laba.

²⁷Utus sasaibino komuyu daanoon Klistus butongo tukon komuyu susuwele doiyamo koanggotano doi butongodoo. ²⁸Bunomo lakon doiya doi jemaat lalomo, ko Mian Bisa lapamo tantukanggene kona abosano doi samba-samba komian; Tumbe-tumbe lasul; koluano, nabi-nabi, kotoluno gulu-gulu; maka doi yaniladoo mo mongkubai langge-langge mominasaingdinggon,

doibundu yanila mo binee kalunia sulano naaline komian nasesel, kabai sulano natulungiyo komian bailong, kabai sulano nakatuaiyo, kabai motuuk basilinganan tukon bula-bulaa kosilingan kaliangano mo minasaingdinggon. ²⁹Yanila bolikon sasaibino lasul, kabai nabi, kabai gulu. Aki nasasaibino daano kona kuasa momongkubai langge mominasaingdinggon, ³⁰kabai sulano aline komian nasesel, kabai mobasilingan doi bula-bulaa kosilingan kaliangano silingan mo minasaingdinggon, kai momoola alatikanggene do silingan-silingano. ³¹Tobikon doiya, siokai komuyu pobausaha tutuuno sulano pomalaat kalunia-kalunia mo bisa tutuuno.

Mau natundu nia yaku otudoikene doikoo kololoon mo monondok tuuno.

Maasi

13 Mau kai yaku namoola basilingan tukon bula-bulaa kobanggapi nasilingan, mau kai tukon malaekat nasilingan idanggon, bai yaku aki kumamaasikene komian bailong, maka daku bantil-bantilanoo tolongo buno langge alalo moakiyo koalatio. ²Mau kai kupandoi mobabilitakene kobilita moluwedoi Mian Bisa, tukon mangalaticanggene sasaibino kolangge-langge mo atean, tukon toiyo sasaibino kolangge-langge tukon mangangga doi Mian Bisa tobikon moola biyele kobunggul, bai yaku aki kumamaasikene komian badaang bailong, maka yaku akiyo koalatio oioila. ³Mau kai nasasaibino koonggumo, yaku beekene doi mian motalalais, tukon yaku beekene kobutonggu nasinua, bai yaku aki kumamaasikene komian bailong, maka doiya sasaibino akiyo kona totuuk tuuno.

⁴Mian mo mamaasikene komian bailong, sabal tukon monondok konoano. Yana akiyo kopoliitonan, aki nabukal-bukal konoano, aki nabanggal-banggaal. ⁵Yana aki nabatinggai, aki nakasal, yana aki napakisaayo komian bailong sulano naloingiyo kona mongiasan susuungo, aki namosobit nanggoliiton, tukon aki naabos noa. ⁶Mian mo mamaasikene komian bailong, aki nayase kokokubai molokis, yana tolongo yase kokokubai momonondok. ⁷Yana taanggene salaanggene sasaibino kolangge tukon yase anggayo naikon komonondok tuuno doi memeeng komian; mau doi langge mo bulaandomo kona ndondoong do

mianoo modaano kona seang aki nalapus kona moinian tukon nasabalan mototiiliyo sasaibino kolangge.

⁸Aki naidan naikon daano kotembono doiyaa komian aki napalaluu poseang-seang. Budodoo naiya daano komian mo pandoi mopolengene kobilita moluwedoi Mian Bisa, bai sio yana naikon natade mopolengene do bilitadoo. Budodoiya daano komo pandoi basilingan doi bubulaa kosilingan kaliangano mo minasaingdinggon, bai sio yana naikon natademo basilingan doi silingan-silinganoo. Budodoiya daano komian mo toiyo badaang kolangge, bai sio oila yanila natinoidoo naikon tomilingene. ⁹Tobikon, konda motoiyan tukon konda sanggupan mopolengene kobilita moluwedoi Mian Bisa, akiyoon natalakana. ¹⁰Sio naikon nalaate kotembono Mian Bisa kubaiyo sasaibino monondok, tukon domo akidoo namonondok naikon lapus.

¹¹Salataa yaku daano pau mopoipoisik, yaku basilingan buno pau mopoipoisik, daku palasaan buno pau mopoipoisik tukon daku pikilan buno pau mopoipoisik. Budodoiya yaku babasalo, daku kalakuan doi paupaunoanoo yaku sakukenemo. ¹²Oilamo konda kinita budodoiya nia tolongo buno bayangan mo kabul doi sulumiin. Bai sio naikon nda kitayo tutuuno tukon tontong. Budodoiya yaku akiyoon kutoiyo sasaibino, bai sio kutoiyo sasaibino buno ko Mian Bisa toiyo sasaibino kokaliangano doi butonggu.

¹³Jadi, doi tembo nia daano kotolu kolangge komo sio nda lakukangene: mangangga, moini tukon pomamaasikon. Komo penting tuuno doi langge nia motolu doiyamo mamaasikene komian badaang bailong.

Bula-bulaa koponjolasan kokaliangano kalunia moluwedoi Mian Bisa Na Loh

14 Siokai komuyu pokakaate sulano pomamaasikene komian badaang bailong. Tukon koidan pokakaate sulano pomantalima kalunia-kalunia Mian Bisa Na Loh mo beekene, tukon komo utama tutuuno kasanggupan mopolengene ko Mian Bisa natetel-tetel doi banggapi. ²Mian mo basilingan tukon silingan mo minasaingdinggon, doiya mianoo bolikon basilingan doi banggapi; yana basilingan doi Mian Bisa. Akiyo komian mo mangalatikene oilamo kona binantil, sabab Mian Bisa Na Loh komo tealikene yana mabantil langge-

langgedoo tolongo Mian Bisa komo toiyo. ³Kobalino mian mo pelengene kobilita moluwedoi Mian Bisa, pelengene doi banggapi; tuuk keenggele yanila, sulano nabeena samangat doi yanila tuuk hibule yanila. ⁴Mian mo basilingan tukon silingan mo minasaingdinggon tolongo ekeenggele kobutongo susuungo, baimo kai komian mo pelengene kobilita moluwedoi Mian Bisa tulungiyo kojemaat nateali maju.

⁵Kona monondokan kalu Utus sasaibino moola basilingan tukon bubulaa kosilingan kaliangano mo minasaingdinggon. Bai komo mo monondok tutuuno doiyamo kalu Utus moola babilitakene ko Mian Bisa natetel-tetel. Sabab komian mo pelengene kobilita moluwedoi Mian Bisa, lobian kona taanggaan tukon doi mian mo moola basilingan tukon bubulaa kosilingan mo minasaingdinggon; posasala kohallo kalu doi mian mo basilingan tukon bula-bulaa kokaliangano kosilingan mo minasaingdinggonoo bai yana moola jelaskanggene oila dona binantilo, sulano sasaibino koanggota jemaat laate toiyo konamototuuk. ⁶Kalu andeno yaku lubat doikoo tukon yaku basilingan tukon bubulaa kosilingan kaliangano mo minasaingdinggon, oila konatotuuk doiya doi komuyu? Akiyo konatotuuk mau tolongo soisik! Posasala kohallo, kalu yaku mabantil meeng kolangge moluwedoi Mian Bisa, kabai yaku jelaskanggene komeeng kolangge kaliangano doi Mian Bisa, kabai yaku mopolonggon bilita moluwedoi Mian Bisa, kai yaku bangotunggul.

⁷Komusiik pakakaso mo akiyo kona ansaang mau nabaino soisik, buno suling tukon kasapi, kalu kona tanda-tanda aki naminaenggon tukon tontong, bulaando komian natoiyano indee laguno komo minaenggon? ⁸Meeng kosontoh koidan: Kalu kotolompet tolongo pinuuk sabalangan, indee miano komo batotobo molobosi? ⁹Bunomo koidan tukon mukasanggupan sulano nda basilingan tukon bula-bulaa kosilingan kaliangano mo minasaingdinggon. Kalu Utus tukon do kasanggupanoo mabantil bantil-bantilan mo aki natontong, akiyo komeeng komian mo moola mangalatikene oilamo Utus nabinantilo. Domu bantil-bantilanoo lapus akiyo kona tinudo. ¹⁰Doi dunia nia daano kobulaa kosilingan, bai akiyo mau nabaino meeng do silingan-silinganoo mo aki nadaano koalatio. ¹¹Bai kalu yaku aki kumangalatikene dosilinganoo memeeng komian mobantile, maka domianoo mo pakeyo do silinganoo buno

mian mososibong doi yaku; bunomo koidan yaku telhadap doi yana. ¹²Kokaliangano komuyu, yaku toiyo komuyu yase tuuno pomalaat kalunia-kalunia moluwedoi Mian Bisa Na Loh. Bai komo utama tuuno, sio komuyu pokakaate sulano potulungiyo kojemaat nateali maju.

¹³Doiyamo kosababpo komian mo basilingan doi silingan mo minasaingdinggon, siokai nakabiyo doi Mian Bisa sulano yana nabinee kasanggupan sulano natalakanggene oilamo domo binantilo. ¹⁴Sabab kalu yaku sambeang tukon silingan mo minasaingdinggon, daku loh takainomo sambeang, bai daku pikilan aki nabalimang. ¹⁵Jadi, sio oila daku kinubai? Naiya naikon daku kinubai: Yaku sambeang tukon kuloh, bai yaku naikon sambeang koidan tukon daku pikilan. Yaku naikon manani tukon daku loh, bai yaku yase manani tukon daku pikilan. ¹⁶Sabab kalu Utus bakinatauwan doi Mian Bisa tukon tolono muloh, tukon daano komian bailong mo aki namangalatikene kosilingan mominasaingdinggon mo luwedoi Mian Bisadoo Na Loh, maka doiya mianoo aki namoola bantile, "Yaku setuduiyo" doi sambeang basyukuulanoo; sabab yana aki natoiyoyo oilamo doi Utus nabinantilo. ¹⁷Mau kai domu sambeangan bakinatauwan doi Temeneno monondok tuuno, bai do sambeanganoo akiyo kona totuuk doi mianoo bailong.

¹⁸Yaku bakinatauwan doi Mian Bisa sabab yaku susuunggu moola basilingan doi bula-bulaa kosilingan kaliangano mo minasaingdinggon lobian doi Utus-utus sasaibino. ¹⁹Mau kai doi pototongian lalomo doi sosubaiyano ko Temeneno, yaku yase tuuno momapake lima kobantilan mo moola mian mangalatikene baimo kai doi loloongo kobantilan mopinake doi silingan mo minasaingdinggon. Yaku yase tuuno komo buno doiya sulano namoola yaku mongotunggul mian.

²⁰Utus-utus! Inai pobapikil buno labuk-labuk. Doi hal kulokisan, siokai komuyu tataap buno labuk pauno. Bai doi popikilan lalomo, siokai komuyu poteali mian mo babasalo.

²¹Doi Kitab Moliyous lalomo totulis buno naiya,

"Temeneno bantile, 'Tukon palantalaan mian badaang, mo basilingan tukon silingan mo minasaingdinggon, yaku naikon basilingan doi mian nia.

Doiyamo tukon palantalaan mian badaang molulubaton, yaku basilingan doi kumian;

mau kai nabuno doiya, yanila aki nayase mondongolii daku bantilan.' ”

²²Jadi kalunia sulano nda basilingan tukon bubulaa kosilingan mo minasaingdinggon doiya baino meeng kotanda doi mian mo aki namangangga, bolikon tuuk doi mian mo mangangga. Tukon kokalunia mobontiikene ko Mian Bisa natetel doi banggapi doiya meeng kotanda motuuk doi mian mo maangga, bolikon tuuk doi mian mo aki namaangga. ²³Tobikon doiya, kalu andeno pototongian doi jemaat lalomo, sasaibino koanggota jemaat basilingan doi bula-bulaa kosilingan mo minasaingdinggon, maka nalubat komoimoiya komian doi tonggulung, kabai mian badaang mo bolikon Salani miano, tantu do mian badangoo aanggene komuyu sasaibino tandomo! ²⁴Bai kalu Utus-utus sasaibino pelengene kobilita moluwedoi Mian Bisa, maka nalubat komeeng komian mo bolikon Salani miano kabai mian bailong, maka dohal-haloo Utus mo babilitakene sasaibino naikon otudoikene do mianoo nalalim-lalim tukon tealikene yana sadal doi nalalim-lalimoo. ²⁵Hal-hal mo tosookon doi noano lalomo inokitakon, tobikon yana naikon poipoisik kobutongo maka nasosubaiyo ko Mian Bisa. Yana naikon akuiyo baikon ko Mian Bisa bisa-bisa daano doi komuyudoo.

Komai limang doi jemaat lalomo

²⁶Jadi, Utus-utus, oila koalatio sasaibino doiya? Kalu komuyu pototongi pososubaiyo ko Temeneno, daano komo manani, daano komo bangotunggul, daano komo pelengene komeeng kolangge moluwedoi Mian Bisa, daano komo basilingan tukon silingan mo minasaingdinggon, tukon daano komo jelaskangene oila domo binantilo. Bai sasaibino doiya sio nakinubai tukon bangotunggulan tukon doi namonondokan sasaibino. ²⁷Kalu daano komo yase basilingan doi silingan mo minasaingdinggon, siokai nalua kabai kona badaangan tolu komian sada komo paisoboli. Tukon sio nadaano komo jelaskangene oila do mianoo mo basilingan nabinantil. ²⁸Kalu akiyo komo moola jelaskangene, maka mian badangoo mo basilingan tukon silingan mo minasaingdinggon tadu nabaino aki nabiyok-biyok doi pototongianoo lalomo. Tadukai nabaino yanila bantil-bantil doi noanoila lalomo doi Mian Bisa. ²⁹Lua

kabai tolu komian komo toiyo kobilita moluwedoi Mian Bisa sio napelenggene do bilitadoo tukon kobailonggon timbo-timbongiiyo oila domo binantilo. ³⁰Bai kalu ande-andeno do bilitadoo moluwedoi Mian Bisa sumbot doi meeng komian bailong mo osulang doi pototongianoo, maka domianoo mo daano mobasilangan, sio natade. ³¹Tukon cala mo buno doiya, Utus-utus sasaibino, meeng tukon meeng, moola pelenggene kobilita moluwedoi Mian Bisa; sulano sasaibino moola mantalima otunggul tukon teali mangangga momeenggon. ³²Kalunia moluwedoi Loh sulano pelenggene kobilita moluwedoi Mian Bisa moola domianoo pelenggene tukon monondok do bilitadoo. ³³Mian Bisa doiya Mian Bisa mo yase kokokubai motaatul; yana bolikon Mian Bisa mo yase kokokubai monggabut.

Pokakana komo teali doi sasaibino ko Mian Bisa najemaat, ³⁴koboine sio naaki nabiyok kalu daano kopototongan doi jemaat. Yanila aki naminoolakon basilangan. Yanila aki namoola mataani sambu; doiya pokokonoi tukon agama atulano. ³⁵Kalu yanila yase toiyo komemeeng kolangge, yanila sio namasadaikene doi napoo langkai doi bonua. Kubaiyo mammaa tuuno kalu meeng koboine basilangan doi pototongan jemaat lalomo.

³⁶Oilamo ko Mian Bisa nabinantil lubat doi komuyu? Kabai tolono doikoo tolong do bantilanoo napinolonggonan? ³⁷Kalu daano komian mo lasayo daano kona kalunia sulano napelenggene kobilita moluwedoi Mian Bisa, kabai yana daano kona kalunia bailong moluwedoi Mian Bisa Na Loh, do mianoo sio natoiyoo baikon oila daku tinulis nia daano meeng kopalenta moluwedoi Temeneno. ³⁸Bai kalu daano komo aki natalimayo naiya, inai popalatikangene yana.

³⁹Tobikon doiya, Utus-utus, pokakaate sulano popelenggene kobilita moluwedoi Mian Bisa, bai inai popantane komian mo yase basalita doi bula-bulaa kokaliangano kosilangan mo minasaingdinggon. ⁴⁰Bai sasaibino sio nakinubai tukon monondok kabai taatul.

Klistus nai notuboiyan koidan doi namatean

15 Tukon budodoiya, Utus-utus, yaku yase komuyu poneneeke koidan do Bilitadoo Monondok moluwedoi Mian Bisa yaku mo pelenggene loolukonoo doikoo. Komuyu talimayomo, tukon mangangamo doi Klistus sabab do Bilitadoo

Monondok. ²Kalu komuyu bataani moonggol doi oilamodoo yaku mo pelenggenedoo maka do Bilitadoo Monondok salamatene komuyu; kasuali kalu Utus mangangga bai aki namangalatikene.

³Oilamo daku pinolonggon doi Utus-utus doiya lapamo yaku talimayo loolukon. Komo penting buno mo totulis doi Kitab Moliyous lalomo, yaku pelenggene doikoo baikon Klistus mate sabab nda lalim-lalim; ⁴baikon yana tinadin, bai doibundu yana inotuboi koidan doi oloyo kotoluno. Doiya koidan totulis doi Kitab Moliyous lalomo. ⁵Yaku popitoikene koidan doikoo baikon Klistus mo inotuboidoo koidan otudoikene koidan kobutongo doi Petulus, tukon koidan doi lasul-lasul mosongulo lua. ⁶Lapa doiya yana okitakene kobutongo koidan doi lobian lima kosakato kona pololaing sasaibino. Kona badaangan doi mian badaangdoo modaano motubo diabudodoo, tolongo moimoiya komian komo matemo. ⁷Lapa doiya koidan Klistus okitakene kobutongo doi Yakobus tukon doibundu doi sasaibino kolasul.

⁸Doibundu tutuuno yana okitakene kobutongo doi yaku koidan - yaku komo buno pau moakiyoon nalaate kotembono kona sinuungan! ⁹Yaku daano komeeng ko Temeneno nalasul mo aki nainodotii. Yaku aki nateali binantil lasul, sabab lapamo yaku sakisaayo ko Mian Bisa najemaat. ¹⁰Bai sabab Mian Bisa namaasi yaku teali pokakana naiya kutuboan nia budodoo. Tukon aki napalasma ko Mian Bisa moompuniyo yaku. Tukon yakumo komo lobian daku balimangan doi sasaibino kolasul bailonggon. Bai doiya kona bisaan bolikon kukakaatean; doiya Mian Bisa nausaha mo mamaasikene yaku, tukon mololainge yaku doi kubalimangan. ¹¹Jadi, mau indee miano kopo mantalimaan Bilitadoo Monondok - oilakai doiya luwedei yaku kabai doi lasul-lasul bailonggon - doiya aki nateali soal. Komo penting tolongo asal kami pelenggenemo do Bilitadoo mo Monondok tukon Utus anggayomo.

Kobanggapi nainotuboiyan koidan doi namatean

¹²Kalu doi kamidoo mo babilitakene doiyamo Klistus lapamo inotuboi koidan doi namatean, bulaando daano doi komuyudoo

komo bantile baikon komian momate akimo nainotuboi koidan?
¹³Kalu bisa komian momate akimo nainotuboi koidan, doiya koalantino Klistus aki nainotuboi koidan doi namatean. ¹⁴Tukon kalu andeno Klistus aki nainotuboi doi namatean maka akiyo kona totuuk kami mopailukene kooioila tukon akiyo kona totuuk koidan komuyu momangangga, sabab dopoo manganggaanoo akiyo kona dasal oioila. ¹⁵Lobian koidan doiya, tokita baikon kami kala-kala kaliangano Mian Bisa, sabab kami babilitakene baikon ko Mian Bisa lapamo otuboiyo koidan Klistus doi namatean, banggokai ko Mian Bisa akimo naotuboiyo yana koidan - kalu takainomo bisa komian momate akimo nainotuboi koidan! ¹⁶Sabab kalu komian momate akimo nainotuboi koidan, maka Klistus akimo nainotuboi doi namatean koidan. ¹⁷Tukon kalu Klistus akimo nainotuboi koidan maka komu manganggaanoo tolongo bunu monii balang; doiya koalantino komuyu daano doi lalim lalomo tukon akiyo kopoo minoinikon oioila. ¹⁸Doiya koalantino koidan baikon ko Salani miano mo lapamo mate, koidan akiyo konapo minoinikon. ¹⁹Kalu konda minoinikon doi Klistus tangatang doi nda tuboan doi dunia nia lalomo, maka doi sasaibino kobanggapi doi dunia nia lalomo, kitamo komo soe tuuno!

²⁰Bai kona tokitaan Klistus lapamo inotuboi koidan doi namatean. Naiyamo kotambono baikon komian badaang mo lapamo mate naikon inotuboi koidan. ²¹Sabab komatean usok doi dunia lalomo tukon sabab meeng komian, bunomo lakon tubo koidan doi matean bineekon doi banggapi tukon lolo doi meeng komian koidan. ²²Bunomo lakon sasaibino kobanggapi mate sabab tongusokon meeng tukon Adam, bunomo koidan sasaibino naikon inotuboi, sabab tongusokon teali meeng tukon Klistus. ²³Bai susuwele naikon inotuboi manulut naobos: tumbe-tumbeno Klistus; doibundu totiili doi tembo yana lubat koidan, maka natuundu komian badaang naobos mo tongusokon doi Klistus namian. ²⁴Lapa doiya maka nateali kokiamat. Doi tembodoo Klistus lungguiyamo sasaibino kopamalentaan, sasaibino kakuasaan tukon sasaibino kobukuanan; maka yana naikon salakangene kona kakuasaan pokakana kotomundo, doi Mian Bisa Tamanggita. ²⁵Klistus sio namapalenta momeenggon polong ko Mian Bisa tealikene sasaibino Klistus namusu taaluk

doi Klistus. ²⁶Musu doibundu yana mo lungguiyomo doiyamo matean. ²⁷Doi Kitab Moliyous lalomo totulis buno naiya, “Ko Mian Bisa tealikene sasaibino kolangge taaluuk doi yana.” Tontong tuuno baikon komo minakisuuti tukon “sasaibino kolangge” doiya aki natongusokon ko Mian Bisa susuungo, mo tealikene sasaibino langgedoo taaluuk doi Klistus. ²⁸Bai sambuno sasaibino tinaklukanggon doi Klistus napamalentaan, maka yana susuungo, doiyamo Mian Bisa Napau, naikon salakanggenemo kobutongo doi Mian Bisa mo lapamo tealikene sasaibino kolangge taaluuk doi yana. Maka ko Mian Bisa susuungo komo palentayo sasaibino.

²⁹Kalu komian momate aki nainotuboi koidan, bulaando modaano komian mo sinau tuuk doi mian momate? Oila kogunano yanila mokubaiyo doiya halloo? Kalu bisa komian mate aki naikon nainotuboi koidan, oila kogunano yanila mokubaiyo doiya halloo? ³⁰Tukon oila kokubaiyano koidan kami moyase sasalaane kosusaan samba kotembo? ³¹Utus-utus! Samba kooloyo yaku taane kosakisaa sabab yaku banggaalkene kopoo tuboan sabab komuyu lapamo mangangga doi Klistus Yesus, nda Temeneno. ³²Kalu doiya tolongo tuuk doi banggapi tolong, oila kountungo doi yaku sulano baladuang pokakana mopooakate koyayon-iyayon mobalani doi kota nia, doi Efesus? Kalu komian momate aki nainotuboi koidan, nah, lobian komo monondok nda loloiyo kososombotia, “Mai nda kaan inum tukon basana-sanaang, sabab namodoa kita naikon matemo.”

³³Inai potongokolii! Polembelikonan mo lokis kubaiyo rusak konda tuboan mo monondok. ³⁴Potoiyo budodoiya, tukon inaimo pomongkubai lalim koidan. Kona tutuuwan komuyu sio pomammaa, baikon doi komuyudoo daano komo akiyoon natingoniyo ko Mian Bisa.

Banggapi butongo sambuno lapa inotuboi koidan doi namatean

³⁵Ugaate daano komo mansadai, “Bulaando kai komian momate nainotuboi koidan? Butong mo bulaando komo bineekon doi yanila, nalapa yanila inotuboi koidan?” ³⁶Bodo tuuno! Kalu Utus masakakon kalibuang doi buta, do kalibuangoo aki natubo, kalu do kalibuangoo aki namate loolukon. ³⁷Tukon do kalibuangoo Utus mo sakakene doi

butadoo lalomo – ugaatene gandum kalibuango kabai kalibuang bailong – doiya do kalibuango batuno tolong, aki nasasaibino nasinakakonoo naikon tubo. ³⁸Mian Bisa susuungo komo kubaiyo kondondoongo do kalibuango manulut napambaleng momonondok tuuk doi mosinakakonoo. Doi memeeng koka-libuang kaliangano, Mian Bisa komo kubaiyo kondondoongo dokalibuango susuwele.

³⁹Komahluk-mahluk butongo mo daano kona ansaang sasaibino aki napokakana. Kobanggapi butongo sangalaasan, koiyayon koono butongo sangalaasan; kotomisi-tomisi sangalaasanggon kobutongo, tukon koikan-ikan sangalaasan koidan kobutongo.

⁴⁰Bunomo koidan tukon kolangge-langge doi timbu tukon kolangge-langge doi buta. Kolangge-langge doi timbu susuwele daano kona monondokan susuungo, tukon kolangge-langge doi buta bunomo lakon. ⁴¹Kooloyo namonondokan posasala kobituwon namonondokan. Kobituon-bituon pauno koono sangalaasan kona monondokan. Malah do bituon-bituonoo pauno susuwele posasala koidan kona monondokan.

⁴²Bunomo kohalloo tukon komian badaang momate mo inotuboi koidan. Komian butongo mo tinadingoo doiya mian butongo mo moola boowan, bai komian butongo mo inotuboidoo koidan, doiya mian butongo mo aki namoola manas. ⁴³Salataa komian butongo natinading, do mianoo butongo kulokiso tukon muyuko; bai salataa nainotuboiyan koidan, yana tealimo monondok tukon bukuan. ⁴⁴Salataa natinadinan, butongo butong moluwedoi dunia; bai salataa tubo koidan, maka do butongo butong moluwedoi Mian Bisa Na Loh komo beekene. Daano komian butongo mo luwedoi dunia, tukon daano koidan komian butongo mo luwedoi Mian Bisa. ⁴⁵Doi Kitab Moliyous lalomo totulis bunu naiya, “Kobanggapi tumbeno, doiyamo Adam, teali mahluk mo tubo,” bai Adam doibundu doiya Loh mo mebee tuboan. ⁴⁶Komo lubat tumbeno loolukon doiya jasmani, bolikon mo lohani. Komo lohani lubat doibundu. ⁴⁷Adam tumbeno tinealikon luwedoi buta, bai Adam koluano luwedoi sulugaa. ⁴⁸Komian badaang doi dunia nia pokakanamo Adam tumbe-tumbeno, mo tinealikon luwedoi buta, bai kosulugaa miano doiya pokakanamo yana mo lubat doi sulugaa. ⁴⁹Bunomo lakon kita budodoiya bunomo Adam mo

tinealikon luwedoi buta, maka naikon kita teali buno yana mo luwedoi sulugaadoo.

⁵⁰Daku makisuut, Utus-utus, doiyamo: butonggita mo tinealikon luwedoi sau tukon sail, aki namoola usok doi Mian Bisa na Dunia Boolu; tukon butonggita mo moola mate aki namoola teali monondok.

⁵¹Popalatikangene naiya laasia nia: Aki nasasaibino kita naikon mate, bai kita sasaibino naikon tobolii. ⁵²Doiya halloo naikon sosinggot teali tukon tolongo sopiyoman, salataa tolompet napinuukan bunduno. Sabab sambuno do tolompetoo alalo tololongol, komian badaang momate naikon inotuboimo koidan tukon butonggita mo monondok, tukon kita sasaibino naikon binolii. ⁵³Kobutonggita mo moola mate nia sio nasinoboli tukon butonggita mo aki namoola mate, tukon butonggita mo luwedoi dunia nia sio nasinoboli tukon butonggita mo luwedoi sulugaa. ⁵⁴Kalu kobutonggita moola mate lapamo sinoboli tukon mian butongo mo aki namoola mate, tukon butonggita mo luwedoi dunia lapamo sinoboli mian butongo mo luwedoi sulugaa, doiyamo kosinggato maka nateali oila komo totulis doi Kitab Moliyous lalomo, "Komatean lapamo inapusanggon, komanaangan lapamo linaat!"

⁵⁵ "Oh matean, inaando komu manaangan?"

Oh matean inaando komu kuasa?"

⁵⁶Komatean nakuasa doiyamo dosa, tukon kodosa ampakong-gene kona kakuasaan lolo doi ukum agama. ⁵⁷Bai kinatauhan doi Mian Bisa; yana mobeena kita manaangan moluwedoi Yesus Klistus nda Temeneno!

⁵⁸Tobikon doiya, Utus-utus kukinilakon, siokai komuyu pobukuan tukon moonggol. Pobalimang sidutu tuuk Temeneno tukon tutuu, sabab komuyu toiyo baikon sasaibino komo komuyu limange tuuk doi Temeneno, doiya aki napalasma.

Potombonii motuuk doi tulanggita Salani miano

16 Budodoiya kokaliangano doy bantuan komuyu mo salakangene doi tulamuyu Salani miano, yaku bontiikene doi komuyu sulano pokubaiyo napokokonoi koalal

yaku mo beekene doi jemaat Galatia. ²Doi oloyo komeengo samba-samba kominggu, siokai Utus-utus sasaibino pomangabos doy, susuwele napokonoikene kona pandapatan. Poabese doiya doydoo polong yaku lubat, sulano laate doiya kosinggatoo akimo napalaluu kinombul koidan. ³Siokai kulubato, maka kumosumbolii mian-mian mo lapamo komuyu sotujuiyo. Yaku naikon beena doi yanila sulat kuasa, sulano yanila nababayo do doydoo bantuan doi Yelusalem. ⁴Tukon kalu natokita monondok baikon mau yaku ampakon koidan tukon yanila, maka yaku naikon ampakon polaing yanila.

Paulus natetel

⁵Yaku naikon lubotiiyo komuyu kalu lapamo yaku lupaiyo ko Makedonia, sabab yaku batetel mosampu indaa. ⁶Moola kai yaku naikon dungol bubulaa kooloyo tukon komuyu, ugaate napolapakon koudan tembono. Lapa doiya komuyu moola tomboniiyo yaku banggadudulkene daku ampakonan doi lipu bailong. ⁷Yaku aki kuyase lubotiiyo komuyu tolono sampukon balang. Kalu ko Temeneno pataikene, yaku yase dungol adukon malumbit tukon komuyu.

⁸Naiya budodoo yaku daano modungol doi kota nia, doi Efesus polong kooloyo Pentakosta. ⁹Badaang kotodanan naimbaa doi balimangan-balimangan mo daano kogunano, mau kai nabadaang komian mo tumbak-tumbak.

¹⁰Kalu Timotius lubat, potalimayo yana tukon monondok sulano yana lasayo monondok tukon komuyu, sabab yana bunomo yaku koidan mobalimang tuuk Temeneno. ¹¹Inai sampe daano komo pandange enteng yana. Potomboniiyo yana sulano namoola banggadudulkene kona ampakonan abali doi yaku tukon selamat, sabab yaku totiiliyo kona lubatan tukon utus-utus bailonggon.

¹²Kokaliangano doi utusonggita Apolos, lapamo moimoiya luunggon kupailukene yana sulano yana napolaing koutus bailong mo ampakon lubotiiyo komuyu. Bai yana akiyoon nayakiniyo baikon yana sio naampakono naiya budodoo. Mau nabuno doiya kalu daano kotodanan naikon, tantu yana lubat.

Sulat napupusan

¹³Siokai komuyu pobadagai tukon pokokoonggol doi potuboan lalomo buno Salani miano. Potindokiiyo tukon balani tukon poteali bukuan. ¹⁴Sasaibino kopo kinubai, pokubaiyo tukon seang.

¹⁵Utus tantu toiyomo Stepanus tukon nakalualga; yanila kotumbe-tumbeno mo teali Salani miano doi Akhaya. Yanila tukon noano totubo mobalimang kusus moleleaniyo ko Mian Bisa namian. ¹⁶Yaku pailukene tukon tutuuno sulano komuyu poloingiyo kona atulano domianoo badaang mo buno doiya, maka mian badaang bailong mo balimang pomeenggon tukon meleleani polong yanila.

¹⁷Yaku sanaang tukon Stepanus nalubatan, Foltunatus tukon Akhaikus. Yanila buno posoboli komuyu doi yaku. ¹⁸Yanila tealikenemo konoanggu laba-laba, pokakana yanila sanaanggene konoamu. Mian badaang mobuno doiya sio poodotiiyo.

¹⁹Koanggota-anggota jemaat doi Asia mopolonggon salam doi komuyu. Akwila tukon Pliskila maka anggota jemaat mo pototongi doi bonua yanila makapatu salam Salani mo pontiing tuuno. ²⁰Sasaibino utus naimbaa mopolonggon salam doi komuyu.

Popolaing-laingo tukon monondok bunu utusonggita Salani.

²¹Yaku suungiyo naimbaa kosalam yaku mo tulise susuunggu: *Salam molengget doi yaku, Paulus.*

²²Mian mo aki namaasikene ko Temeneno, sodiiyomo yana nakinutuk!

Malanatha – Kombai Temeneno, lubato!

²³Boliisi ko Temeneno Yesus nabalakaatiyo Utus.

²⁴Polaing koseang doi Utus sasaibino mo pomeenggon tukon Klistus Yesus.

Komai holomat,
Paulus

PAULUS NASULAT KOLUANO DOI JEMAAT KOLINTUS

PANGANTOKON

Paulus nasulat koluano doi jemaat Kolintus tinulis doi tempodoo Paulus namaalingan kona posuungan tukon anggota jemaat. Daano koanggota-anggota moluwedoi jemaatoo naikon mo apese Paulus tuuno, bai Paulus okitakene baikon yana yase pokindokon koidan. Yana okitakene kona laba-labaan tuuno salataa do halloo tealimo.

Doi tumbeno taalikon doi nasulat nia Paulus basalitakene kona potaamian tukon anggota jemaat doi Kolintus. Yana mongotunggul idoo buluando yana monggimal tuuno doi natinumba-tumbakan tukon doi natinotulaiyan kobutongo do anggota jemaatoo mo kubaiyo. Salataa yana lolukenggene doiya langgedoo, yana koidan ckitakene kona labaan baikon doi nggimalanoo olubatene kobadodoloonan tukon kopomeenggonan. Doibundu yana kabiyo sulano koanggota jemaatoo namokombul bantuan sulano natulungiyo kopai Salani miano mo tubo talalais doi Yudea. Doi napasal-pasal bunduno Paulus lolukenggene kona belaano kobutongo doi nabasambuan meeng kolasul doi moimoiya komian doi Kolintus mo anggape kobutongo susuungo lasul mobisa, tuduwo Paulus buno meeng kolasul mokala.

Antoko

Pololukoni 1:1-11

Paulus tukon jemaat doi Kolintus 1:12-7:16

Bantuan motuuk doi Salani miano doi Yudea 8:1-9:15

*Paulus nabelaano kona kuasa buno meeng
kolasul 10:1-13:10*

Potutupo 13:11-14

1 Utus-utus Mian Bisa najemaat doi Kolintus tukon sasaibino ko Mian Bisa namian doi posaapon ko Akhaya.

Yaku, Paulus, lasul Klistus Yesus, mo biningkat tongo Mian Bisa namongiasan polaing-laing tukon utusonggita Timotius, ²moinikene boliisi ko Mian Bisa Tamanggita tukon Yesus Klistus beena balakaat tukon namonondokan doi komuyu.

Paulus basyukuul doi Mian Bisa

³Tanggaal ko Mian Bisa, doi nda Temeneno Yesus Klistus. Yana Tama mo monondok konoano tuuno, tukon yana Mian Bisa komo beena bukuanan kobanggapi noano. ⁴Yana ekeenggele konoanggami doi samba-samba kosusaan kami mo toupiyo, sulano tukon do bukuanano kami mo talimayo doi Mian Bisadoo, mau kami moola ekeenggele sasaibino komian noano mo daano doi susaan lalomo. ⁵Kosakisaa-sakisaa Klistus mo toupiyo doiya badaango luunggon kami motoupi. Tukon lolo doi Klistus koidan, konoanggami kinoonggoli tuuno. ⁶Kalu kami toupiyo kosusaan, doiya daano tuuk ekeenggele konoamu, tuuk doi mukasalamatan. Kalu konoanggami inokoonggol, maka komiu koidan tulut inokoonggol tobikon komuyu teali sabal doi kasusaan-kasusaan lalomo bunomo komai motoupiyan. ⁷Kami moinikene tukon akimo mbai sasaaki kaliangano doi Utus, sabab kami toiyo baikon komuyu tulut susa tukon kami. Tobikon doiya komuyu koidan tulut mokoonggol posinggat-singgat kami.

⁸Utus-utus! Kami yase komuyu potoiyo kaliangano susaan komai tinoupi doi wilayah Asia. Kosusaan kami mo toupiyo babalat tuuno dedekene kami, tobikon kami akimo mai moinikene naikon motubo koidan; ⁹mai lasa-lasayo buno lapamo kami binee ukuman mate. Bai doiya langgedoo teali sulano kami aki moinikene nda bukuanan susuungo, bai tolongo doi Mian Bisa mo otuboiyo komian momate. ¹⁰Yanamo komo lapamo salamatene kami doi mateanoo mo babasal. Tukon yanamo koidan komo salamatene kami doi oloyo-oloyo doibundu, sabab tolongo doi yana komai moiniyan. ¹¹Kami anggayo baikon tukon posambeang motuuk doi kami, Mian Bisa naikon salamatene koidan kami doi silakaan. Mian Bisa balakaatiyo kami buno meeng kopotimbili badaang kosambeang motuuk doi kami,

tukon sabab doiya badaang komian mobakinatauan doi Mian Bisa.

Paulus boliiyo kona tetel

¹²Kami banggaal, sabab konoanggami ekeenggele kami baikon komai tuboan nai dunia nia - kotutuuno komai potaamian tukon Utus - lapamo kami ampakonggene tukon sanaang kabai moliyous. Kami lakukanggene doiya, bolikon banggapi napandoiyan, bai tolongo Mian Bisa komo beena bukuanan. ¹³⁻¹⁴Komai tinulis doikoo daanoon tolongo langge-langge mo moola komuyu basae tukon mangalatikene. Budodoiya komuyu akipo mangalatikene kami tutuuno, bai yaku moinekene naikon komuyu bisa-bisa momangalatikene kami. Tukon buno doiya, doi tembo Temeneno Yesus nalubatan naikon, komuyu naikon banggaal doi kami, bunomo lakon kami banggaal doi komuyu.

¹⁵Sabab do manganggaanoo maka kotumbe-tumbeno yaku niatkanggene molubotiiyo komuyu sulano komuyu pomalaat balakaat lua luunggon nalua-lua. ¹⁶Daku makisuut molubotiiyo doi kuampakonan doi Makedonia tukon yaku sampu koidan doi komuyu doi kuabalian, sulano komuyu pomoola tomboniiyo yaku banggadudulkene daku ampakonan doi Yudea. ¹⁷Bai yaku boliiyomo daku niatoo; nah, oilakai doiya okitakene baikon pondilian aki namoonggol? Salataa mongkubai niat, oilakai yaku kubaiyo koniat tolongo kumongiasan susuunggu, naapa doiya binantil, "Oode", tukon naapa doiya "Aki"? ¹⁸Tolongo Mian Bisa komo moola inangga, daku paladandian doi Utus bolikon kai "Oode" tukon "Aki". ¹⁹Sabab Yesus Klistus Mian Bisa Napau, Silas napinolonggon doi komuyudoo, Timotius tukon doi yakudoo susuunggu bolikon kai mian "Oode" tukon "Aki". Kobalino yana buno kai potimbili "Oode" doi Mian Bisa. ²⁰Sabab mololoi yana Mian Bisa lapamo bantile, "Oode" doi sasaibino kona janji. Doiyamo kona luwean sampe kita bantile, "Amin" doi Mian Bisa sabab Yesus Klistus. Kami kubaiyo buno doiya sulano ko Mian Bisa naikanakabasal. ²¹Mian Bisa susuunggo komo tealikene kami tukon Utus moonggol pomeenggon tukon Klistus; yanamo koidan komo lilike kita tuuk doi butongo. ²²Tuuk doiya ko Mian Bisa lapamo sahkanggene kita teali namian tukon beekene kona Loh doi noanggita lalomo

buno meeng kotambo baikon yana naikon beekene doi kita sasaibino kona pinaladandikon.

²³Mian Bisa daku sakisii - sabab yana toiyo konoanggu nabinantil - baikon yaku aki nateali ampakon doi Kolintus, sabab yaku aki kuyase kubaiyo konoamu nasusa. ²⁴Yaku aki kupakisaayo komuyu kaliangano oila komuyu kopoo inangga, sabab komuyu lapamo mangangga tuuno doi Klistus. Yaku tolono balimang polaing tukon komuyu sulano komuyu pololokon monondok.

2 Tobikon doiya yaku lapamo mongkubai kaputusan sulano akimo nalubat koidan doikoo tukon polubotiiian kubaiyo komuyu susa. ²Sabab kalu yaku kubaiyo susa komuyu, indee kai koidan komo moola hibule yaku, kalu bolikon dopai mian-mianoo koidan mo lapamo yaku kubaiyo susa konoano? ³Doiyamo kosababpo yaku motulise do sulatoo motuuk doi komuyu. Yaku akimo kuyase molubotiiyo komuyu maka nabaino komuyu teali susa banggokai komuyumo komo kubaiyo laba yaku. Sabab yaku moinikene baikon kalu yaku laba, maka Utus sasaibino laba koidan. ⁴Yaku batulis doikoo tukon noa mo susa kabai motoong tukon seselet badaang komatanggu paisuno. Daku makisuut bolikon kai sulano komuyu nateali susa, bai sulano komuyu potoiyo baikon yaku seseange tuuno komuyu.

Ompuniano doi mo sala

⁵Kalu daano komo kubaiyo kosusaan, maka langgedoo yana kubaiyo bolikon tuuk doi yaku, bai tuuk doi Utus sasaibino bai kalu aki tuuk doi soobos doi Utuso. Yaku aki kuyase monggimoliiyo tuuno doi yana. ⁶Doi mian mo buno doiya, koukuman mo bineekon doi yana komo badaang luunggon Utus sukupo. ⁷Budodoiyo komuyu sio poompunio yana tukon pobeena dolongan koidan doi yana sulano yana naaki nasusa tuuno konoano. ⁸Tobikon doiya yaku kabiyo, sulano komuyu koidan potudoikene doi yana baikon komuyu bisa-bisa moseange yana. ⁹Yaku tulise do sulatoo doikoo tukon makisuut ujio komuyu, oilakai komuyu sidutu yase loingiyo kootunggul-otunggul moluwedoi yaku. ¹⁰Kalu komuyu lapamo ompunio komian mo posalakon ikoo maka yaku ompuniyo do mianoo. Sabab oila komo lapamo yaku ompunio - kalukai daano komo palaluu inompuni - doiya yaku ompunio doi Klistus salaano tuuk doi komuyu namonondokan. ¹¹Yaku lakukene doiya sulano

ko Ibiliis naaki namangala kasampatan sulano nakuasaiyo kita; sabab kita toiyo kona niat-niat.

Paulus namatakutan konoano doi Toloas

¹²Doi tembodoo kupolongan doi Toloas tukon makisuut sulano babilitakene ko Bilita Monondok kaliangano Klistus, Temeneno bukaemo daku loloon sulano kubalimang doi lipudoo.

¹³Bai yaku aki kusabal sabab aki kupososuung tukon utusonggita Titus indaa. Maka kumangkabi palamisi doi lipudoo tumbuno maka kutaus doi Makedonia.

Komanaangan sabab Klistus

¹⁴Bai kinatauan doi Mian Bisa! Yana sidutu lolainge kami komai malaingan moampakonggene Klistus namanaangan sabab kami tubo pomeenggon yana. Mian Bisa pakeyo kami sulano kobilita kaliangano Klistus natasabukon pokakana kolangge boono mobabangi mo sinoomanggon doi yayaa. ¹⁵⁻¹⁶Sabab kami bunu kamangian boono mo babangi, Klistus mo suayo tuuk doi Mian Bisa. Doi mian-mian mo daano moampakoniyo kokulokisan, kami naiya pokakana koboo matean mian mo mangakate; bai kalu tuuk doi mian-mian mo daano sinalamaton, kami pokakana koboo mobabangi mo babayo kotuboan. Eh, indee kai komo moola lakukene naiya limangia? ¹⁷Kami aki mai bunu doi mian mobadaang mo lakukanggene kobilita moluwedoi Mian Bisa pokakana kolangge mobinadaganggon. Komai makisuut doiya moliyous, sabab kami Mian Bisa komo bintekene. Tukon Mian Bisa susuungo komo kitayo baikon kami pelengene do bilitadoo pokakana Klistus napeleleani.

Peleleani-peleleani paladandian mo boolu

3 Oilakai naiya kona tokitaan kai adukon bunu kami nggaale kobutonggami koidan? Kabai moola nateali kami palaluu sulat panggaal tuuk komuyu, kabai doi komuyu, bunu komo pinalaluu mian badaang bailong? ²Utus kai susuungo komo teali sulat panggaal doi kami, mo totulis doi noanggami lalomo mo moola tiningonii tukon meeng-meeng komian moola basayo. ³Yanila memeeng komian moola kitayo baikon Utus bunu meeng

kosulat Klistus mo tulise, mo kinapatu lolo doi kami. Doiya sulatoo tinulis bolikon tukon tinta, bai tukon Mian Bisa Na Loh mo tubo; bolikon koidan doi batutulis bungkukono, bai doi bangga pi noano.

⁴Kami bantile buno doiya, sabab komai manganggaan doi Mian Bisa lolo doi Klistus. ⁵Kami akiyo komeeng komai alasan sulano mai okitakene baikon kami moola lakukanggene naiya limangia, bai Mian Bisa komo beena bukuanan doi kami. ⁶Yanamo komo tealikene kami moola teali peleleani motuuk doi meeng kopaladandian mo boolu; paladandian mo luwedo Mian Bisa Na Loh, bolikon doi ukum mo totulis. Sabab domo tinulisoo babayo komatean, bai Mian Bisadoo Na Loh mebee tuboan.

⁷Doi tembo paladandianoo mo babayo komatean doiya kinubai tukon ukil-ukile doi batu, ko Mian Bisa laango montoontilang kopanano doi Musa duduso. Kolaango mobuno doiya kona montoontilangan tobikon kobangsa Islael aki namoola mbalenge Musa duduso, mau kai dolaangodoo adukon akiyo doiya kosinggatoo. Nah, kalu kokubaiyano do paladandianoo mo babayo komateanoo sinahkanggon tukon nalalangan mo buno doiya kona babasalan, ⁸tantu kona kinubaiyan kopaladandian mo bineekon doi Mian Bisa Na Loh, sinahkanggon tukon lobian koidan kona lalaanganan. ⁹Kalu do paladandianoo mo ukume kobanggapi bunomo doiya kona lalaanganan, tantu lobian kona lalaanganan koidan doi paladandianoo mo moolakene kobanggapi pokindokon tukon Mian Bisa. ¹⁰Moola nabinantil baikon oila komo lalaangan doi lolukonoo, akimo nalalaangan koidan sabab kona lalaanganan budodoo nia. ¹¹Kalu meeng kolobo tolongo soisikeen kona taanan, bunomo lakon kolaango, tantu meeng kolobo mo bisa lobian kona lalaanganan koidan.

¹²Tobikon kai kami daano komai moinian mobuno doiya, maka kami balani bantile buno doiya. ¹³Kami aki mai buno Musa mo songgupiyo koduduso tukon kokudung sulano kobangsa Islael aki namoola momokita ko Temeneno laango moadukon poso tukon lapus doi duduso. Yanila napikilan totutupu. ¹⁴Tukon polong doi oloyo nia kona pai pikilan

daano mototutup tukon kokudung doi tembo yanila nabasaano kobuku-buku kaliangano doi paladandianoo mo malumbitoo. Kokudungoo tolongo moola toliat kalu komian pomeenggon tukon Klistus. ¹⁵Budodoiya nia, kalu yanila basayo Musa nabuku-buku, kokudungoo daano mosunggupiyo yanila napikilan. ¹⁶Bai kalu memeeng komian lubat mangadap doi Temeneno, kokudungoo liniato doi mianoo duduso. ¹⁷Nah, Temenenodoo mo minakisuuti naimbaa doiyamo Loh. Tukon inaando ko Loh Temeneno nadaanoan, idoomo koidan kona daanoan kobebasan. ¹⁸Budodoiya kodudusonggita sasaibino aki-mo natinonggupi kokudung, tukon kita okitakene ko Temeneno nalalaanganan. Tukon tobikon doiya kita banggadudul binolii teali pokakana yana; pololokon malumbit kita teali pololokon lalaanganan. Kolalaanganoo luwedoi Loh, tukon Lohdoo doiyamo Temeneno.

Buat moluwedoi sulugaa doi natangabosan lalomo mo luwedoi buta

4 Kami lakukangene naiya limangia sabab Mian Bisa namonondokan konoano. Doiyamo kosababpo sampe kami aki mai lungguon. ²Kami aki mai mapake cala-cala mokalipookan mo mongkubai maa. Kami aki yase balimang tukon bakakala kabai moputa-putale ko Mian Bisa nabantilan. Kami leleaniyo ko Mian Bisa tukon noanggami mo sanaang mololoi doi namongiasan. Tobikon doiya, kami moinikene doi sasaibino komian nilaiyo kami tukon monondok doi noano lalomo. ³Kalu Bilita Monondokoo komai binabilitakon daano komo akiyoon koidan napinahami, maka tolongo mian badaang mo ompokoniiyo kosusaan tolong komo aki napahamiyo. ⁴Ilah molokis kuasaiyomo naiya dunia nia tutupemo komian badaang napikilan mo aki namangangga. Yanamo komo hala-halangiyo yanila sulano yanila aki namokita madialan moluwedoi Bilita Monondokoo kaliangano Klistus nababasilan, mo buno Mian Bisa gambalo. ⁵Bilita kami mo pelengene bolikon kai bilita kaliangano doi kami. Bilitadoo doiya bilita tentang Klistus; baikon yana daano Temeneno; tukon kami napeleleani sabab yana. ⁶Mian Bisa mo bantile, "Siokai luwedoi kalipookan lalomo maka nasumbut komadialan," Mian Bisa doiyamo kona sumbutan do madialanoo doi noanggita lalomo, sulano konda

pikilan teali madialan sulano nda pahamiyo ko Mian Bisa nalalaangan mo montoontilang doi Klistus duduso.

⁷Bai do buatoo lohani mo monondokoo kami babayo doi butonggami mo akiyo koanggano nia mo kinubai luwedei buta. Tukon buno doiya totingoniimo baikon do kuasadoo nababasilan kona tangabosan doi Mian Bisa bolikon doi kami. ⁸Kami minusu doi sasaibino kolangge, bai kami aki madipot. Kami pusing, bai kami aki mai putus asa. ⁹Badaang komo musuiyo kami, bai kami aki nabaino dungol susuunggami. Tukon mau kai kami idan-idan mai inumbas polong otuwong, bai kami aki mai mate. ¹⁰Sidutu kami lasayo Yesus namatean doi butonggami, sulano kona tuboan koidan teali totingonii doi butonggami. ¹¹Daano kami tubo, kami sidutu motokutikon tukon matean sabab Yesus, sulano kalu buno doiya Yesus natuboan koidan moola inokitakon doi butonggami mo akiyo kotakoso. ¹²Naiya koalatio baikon doi butonggami lalomo komatean daano mogiat ampakonggene kona kakuasaan, bai kami laba baikon tuboan komo daano mo giat doi butonggami lalomo.

¹³Doi Kitab Moliyous lalomo talaat naiya bantilan nia, “Yaku mangangga, doiyamo kosababpo sampe yaku basilingan.” Nah, tukon samangat mangangaan mo buno doiya koidan, kami basilingan sabab kami mangangga. ¹⁴Kami yakiniyo baikon ko Mian Bisa mo lapamo otuboiyo koidan Temeneno Yesus, yana otuboiyo kami koidan tukon Yesus, naikon mongotuboi komuyu tukon kami doi salaano. ¹⁵Sasaibino doiya daano mukopontingan. Sabab kalu badaango komian motoupiyo ko Mian Bisa namaasi, pololokon badaang koidan kokinatawan mo pinolonggon doi Mian Bisa; tukon kalu buno doiya ko Mian Bisa hinolomati.

Tubean tukon mangangaan

¹⁶Doiyamo kosababpo kami aki naputus asa. Mau kai kami secala tuboan doi dunia pololokon tosuungi kona manasan, bai secala konoanggami kinubai boolu samba-samba kooloyo. ¹⁷Tukon susaan mo aki namoindukon nia, kami mo toupiyo soisikeen, naikon yana lubatene doi kami komeeng komondokan

mo bolikon langge tukon posidutukon. Do monondokanoo lobian odoon kona babasalan kalu pinotimbongiikon tukon do susaanoo susuungo. ¹⁸Sabab kami aki mai palahatikanggene kolangge-langge mo tokita, bai tolongo mo aki natokita. Komo tokita tolongo soisik kona bataanggonan, bai komo aki natokitadoo bataanggon sidutu polong posidutukon.

5 Sabab kami toiyo kalu bonua - doiyamo butonggita - kita mo dungoliyo doi dunia nia ilombak, ko Mian Bisa naikon masadiakene doi kita meeng kobonua doi sulugaa, Mian Bisa mo kubaiyo tukon moonggol sidutu-posidutukon. ²Doi bonua lalomo budodoo nia, kita mondommuk sabab kita peleenggene tuuno modungol doi nda bonuadoo lalomo doi sulugaa. ³Bonuadoo doiyamo butonggita mo boolu. ⁴Kalu daano kita modungol doi bonuadoo lalomo doi dunia nia, kita mondommuk sabab konda tanggungan motoong. Bolikon kai kita yase tongosodii doi butonggita nai dunia nia, bai sabab kita yase mapake butong mo doi sulugaadoo, sulano kobutonggita mo moola mate komo tubo kuasaiyo. ⁵Komo moolakene doiya doi kita tolongo Mian Bisa susuungo, tukon yana beekene kona Loh doi kita buno meeng kotambo.

⁶Sabab doiya konoanggami sidutu moonggol. Kami toiyo baikon kalu kami daano modungol doi butonggami nja, kami pododoonggon tukon dobonuadoo naikon kami modungoliyo tukon Temeneno. ⁷Sabab kami tubo tolongo mangangga doi Klistus, bolikon alaskanggene oila komo moola kinita, ⁸doiyamo kosababpo konoanggami namoonggol. Kami yase tuuno sulano mai poalaas kobutonggami nia, sulano namoola podungoli tukon Temeneno. ⁹Tobikon doiya kami kakaate tutuuno sulano nasanaang konoano, mau tembo kami doi mai bonua dimbaa kabai indaa. ¹⁰Sabab bisa kita sasaibino naikon inantokon doi Klistus napangadilan, tukon memeeng komian malaat pabalos mololoi tukon nakokubai doi dunia nia - kokubai momonondok kai kokubai molokis.

Pomonondokonan tukon Mian Bisa lolo doi Klistus

¹¹Kami toiyo oila koalatio komatakutan doi Temeneno; doiyamo kosababpo kami kakaate moekeengele komian

kaliangano butonggami. Ko Mian Bisa tingoniiyo tutuuno kami, tukon yaku moinikene mau komuyu potingoniiyo kami doi noamuyu lalomo. ¹²Mau buno naiya kami aki kai mai kabiyo sulano ponggaale kobutonggami. Kami tolongo yase mebee meeng koalasan mo monondok doikoo sulano teali tanggaal doi kami, sulano komuyu potoiyo bulaando komuyu potimbiliyano komian badaang tolongo kitayo komian duduso tukon bolikon nalenggang. ¹³Kalu kami memang tokita tandomo, doiya takainomo tuuk doi kopontingan Mian Bisa. Tukon kalu kami tokita sehat, doiya tuuk doi mukopontingan. ¹⁴Klistus namaasi komo kuasaiyo kami; tukon kami sadaliyo baikon kalu meeng komian lapamo mate tuuk doi sasaibino komian, maka doiya koalantino baikon sasaibino komian lapamo mate. ¹⁵Klistus mate tuuk doi sasaibino komian, sulano komian badaang mo tubo, akimo natubo tolongo tuuk doi butongo susuungo, bai tuuk doi Klistus mo lapamo mate tukon inotuboi koidan tuuk doi yanila nakopontingan.

¹⁶Tobikon doiya, kami akimo mai nilaiyo komian manulut banggapi napotoi. Bisa kami biasa nilaiyo Klistus doi segi banggapi, bai naiya budodoo akimo. ¹⁷Mian mo lapamo pomeenggon tukon Klistus, tealimo banggapi moboolu tutuuno. Komo malumbito akiyono – sasaibino tealimo boolu. ¹⁸Sasaibino doiya Mian Bisa komo limange. Lolo doi Klistus ko Mian Bisa kubaiyo kita pomonondokon tukon yana, maka bintekene kita sulano komian badaang bailong mominoolakon pokokindokon tukon Mian Bisa.

¹⁹Kami babotilangene baikon tukon palantalaan doi Klistus, ko Mian Bisa kubaiyo kobanggapi pokindokon koidan kobutongo. Mian Bisa kubaiyo doiya aki natuntute kobanggapi nakasalaan-kasalaan mo lapamo kubaiyo tuuk doi butongo. Mian Bisa lapamo bintekene kami sulano mai babilitakene bilitadoo.

²⁰Jadi kami naiya Klistus nabito-bito. Lolo doi kami Mian Bisa susuungo komo pelenggene kona teteba. Tukon Klistus sambuno, kami kabiyo tutuuno, potalimayo ko Mian Bisa naululano kolimano mo moolakene komuyu pokindokon tukon yana. ²¹Klistus aki nabaladosa, bai ko Mian Bisa tealikene yana tanggunge konda dosa, sulano kita pokindokon tukon Mian Bisa sabab pomeenggon tukon Klistus.

6 Sabab kami balimang polaing-laing tukon Mian Bisa, maka kami kabiyo tutuuno inaikai komuyu polai-lainggene Temenenodoo noano namonondokan. ²Doi Kitab Moliyous lalomo, Mian Bisa bantile,

“Doi tembo mo minoolakon, yaku lapamo lengele ikoo, tukon doi oloyo kasalamatan, yaku tulungiyomo ikoo.”

Neneeke tutuuno, budodoiya naiyamo kotembono domo minoolakonoo. Budodoiya naiyamo kooloyono sulano nasinalamaton!

³Kami aki mai yase komai baleleanian nainasalakon. Tobikon doiya kami kakaate aki mai mebee alasan mau nabaino doi meeng komian sulano nakubaiyo do langgedoo. ⁴Kobalino, doi sasaibino kolangge, kami tudoikene baikon nai kami nia Mian Bisa napeleleani. Sabab, sasaibino kosusaan kaliangano lapamo kami toupiyo tukon sabal. ⁵Kami sinakisaa, tinalunggu, tukon pinook; kami balimang kobukuan, nakana doimbaa aki mai moolo tukon daano komo akiyono kokinaan. ⁶Tukon mai molyosan, pandoiyan, sabal tukon noa monondok, kami okitakene baikon kami nia daano Mian Bisa napeleleani. Tukon koidan moinikene doi Mian Bisa Na Loh motulungiyo, tukon koidan seang mo moliyous, ⁷tukon koidan babilitakene kobilita mo luwedo Mian Bisa tukon Mian Bisa nakuasa, kami otudoikene baikon kami nia Mian Bisa napeleleani. Kami bataani doi Mian Bisa namongiasan pokakana komeeng komai tombide doi molobosian kai posilaton butonggita. ⁸Kami inodotii, bai tinotulai koidan; ngginaal, tukon binakala-kalakon koidan. Mau kai mai molyos, kami binantil kala-kala. ⁹Kami inaanggon aki natololongol, bai sasaibino komian tingoniiyo kami. Kami inaanggon mate, bai kona tokitaan kami daano motubo. Mau kai kami sinakisaa kami aki namate. ¹⁰Mau kai konoanggami susa, bai kami sidutu laba-laba. Kami tokita talalais, bai badaang komian molapamo kami tealikene kaasa. Tokita kami akiyo komai langge-langge, bai kona bisaan sasaibino kolangge-langge daano doi kami.

¹¹Utus-utus mo kinilakon doi Kolintus! Kami lapamo pailukene doikoo. Sasaibino konoanggami antoko lapamo mai bantile. ¹²Kami aki mai tutupe konoanggami motuuk doi komuyu, tolongo komuyu komo tutupe konoamuyu doi

kami. ¹³Budodoiya tadumo kai kubasalita pokakana kulabuk susuungu. Bukayomo konoamuyu doi kami.

**Otunggul doi mian-mian
napangalu mo akiyo kona mangangga**

¹⁴Inaikai poyase teali tulumu ko mian-mian mo aki namangangga doi Yesus; doiya aki napokokonoi. Inaando kona tealian komonondokan mopomeenggon tukon kulokisan! Aki nateali komadialan mopomeenggon tukon kalipookan. ¹⁵Aki nateali Klistus pomeenggon Ibiliis. Oilakai kona pokakanaan ko Salani miano tukon mian mobolikon Salani? ¹⁶Oilakai kona potaamian ko Temeneno Nabonua tukon bonua pilogot? Kita nia Temeneno Nabonua, doiyamo Mian Bisa mo tubo, Mian Bisa susuungo bantile,

“Yaku dungol doi yaniladoo tanga-tangano,
tukon tubo polaing-laing yanila.

Yaku teali yanila na Mian Bisa,
tukon yanila teali kumian.

¹⁷Tobikon doiya,
potinggalemo komian badaang mo aki natingoniiyo Mian
Bisadoo,

tukon alaase kobutomu doi yaniladoo.

Inaikai popomeenggon tukon mo lokis,
maka yaku naikon talimayo komuyu.

¹⁸Yaku teali Tamamuyu,
tukon komuyu teali kupau-pau,
bunomo doiya Temeneno Mobabasal Konakuasa
nabantilano.”

7 Utus-utus mo kinilakon! Sasaibino do janjidoo tuuk doi kita. Tobikon doiya siokai kita nda bilisiiyo kobutonggita doi sasaibino komo kanggilitiyo konoanggita. Siokai kita matakutene ko Mian Bisa, sulano kita nda malaat tuboan motangalaas tuuk doi yana tukon talakana.

Paulus nalabaan

²Potalimayo kami doi noamuyu lalomo. Kami akiyo komai sala doi meeng komian, tukon aki mai akakene komian. Kami

aki mai mangala kauntungan mau doi indee miano. ³Yaku bantile bunu doiya, bolikon kai yaku asalakene komuyu. Sabab bunu doi yakudoo mo bantile loolukon, kami seseange tuuno komuyu, tukon kita nia tula-tulando potubokon pomatekon. ⁴Yaku daano daku paangga tuuno doi komuyu. Tukon yaku banggaal tuuk doi komuyu! Mau kai mai toupiyo kosusaan mobadaang konoanggu tohibul sabab komuyu. Konoanggu bisa-bisa molaba!

⁵Salataa kami polong doi Makedonia, kami aki mai moola tadekene komai pakadakan. Doi sasaibino kolangge kami malaat susaan: doi langge bailong poonggeelekiyan, doi noano lalomo susuungo matakut. ⁶Bai kinatauwani, ko Mian Bisa sidutu ekeenggele doi mian mo putus asa konoano; yana mokindendeke konoanggami tukon Titus nalubatan. ⁷Konoanggami tohibul bolikon kai tolono Titus nalubatan, bai koidan sabab yana pelengene bulaando konoano nasanaangan sabab komuyu. Yana bontiikene doi kami baikon komuyu poloon tuuno moposusuung tukon yaku; baikon komuyu sasaaliyo naikon kopoo kokubai loolukon tukon budodoiya yase belayo yaku. Doiya halloo tealikene yaku pololokon laba koidan.

⁸Mau kai daku sulat nakubaiyo susa konoamu, yaku aki kusasaaliyo motulise do sulatoo. Takainomo doiya kosinggato yaku kitayo daku sulatoo tealikene komuyu susa - mau kai natolono soisik kopoo susaan mau kai yaku manasal koidan. ⁹Bai doiya budodoo yaku sanaang - bolikon kai sabab donoamuyudoo nasusaan, bai doiyamo posusaanoo tealikene tobolii kopoo kalakuan. Takainomo dopo susaanoo pokokonoi tukon Mian Bisa namongiasan. Jadi, kami aki mai olugiyo komuyu. ¹⁰Sabab do susaanoo mobuno doiya kohasilo noa natoboliiian mo lubatene kokasalamatan. Tukon doi mian moaki namanasakene doiya langgedoo. Kobalino, dosusaanoo mo tolono pokokonoi tukon banggapi namongiasan doiya kohasilo matean. ¹¹Soba komuyu pokita-kitayo oila kohasilo doikoo dosusaanoo mo pokokonoi tukon Mian Bisa namongiasan! Kohasilo doiyamo komuyu tutuu kakaate sulano pokindeke modaano mokabul! Komuyu teali mosikitene kolalim, komuyu matakut, komuyu poloon, komuyu teali mokolokot, komuyu

yase ukume komo sala! Doi sasaibino naiya soalia komuyu lapamo tudoikene baikon komuyu akiyo kopoo sala.

¹²Jadi, mau kai nalapamo yaku tulise do sulatoo, yaku tulise bolikon sabab do mianoo mo sala. Bolikon kai sabab domianoo mo sakisaa sabab do kasalaanoo. Yaku tulise do sulatoo sulano doi Mian Bisa salaano, komuyu susuumuyu sadaliyo bulaando kona babasalan kopoo palahatian doi kami. ¹³Doiyamo kosababpo tobikon konoangami nasanaang. Sangalaasan dona sanaanganoo, kami lobi-lobian koidan sinanaanggon sabab kami kitayo Titus nasanaangan konoano; konoano sanaang sabab Utus sasaibino. ¹⁴Yaku takainomo lapamo banggal-banggaalkene komuyu doi yana. Kinatauan, komuyu moaki kubaiyo mamaa yaku. Sasaibino komo biasa kami bantile doikoo doiya bisa. Bunomo koidan oila komo kami banggal-banggaalkene kaliangano komuyu doi Titus tokita bisa koidan. ¹⁵Budodoiya yana pololokono seange komuyu, sabab yana neneke bulaando Utus sasaibino nayasano moloingiyo kona katuaiyano tukon bulaando komuyu potalimaano yana tukon odotiiyo tukon anggayo. ¹⁶Yaku sanaang tuuno, sabab komuyu moola inangga doi sasaibino kolangge.

Doy potulungi moluwedoi mian-mian Salani

8 Utus-utus, kami yase komuyu potoiyo koidan kaliangano bulaando kona monondokan ko Mian Bisa doi anggota-anggota jemaat doi Makedonia. ²Yanila lapamo inuji tukon susaan-susaan mo motoong. Bai doi susaan-susaanoo lalomo, yanila tolono laba-laba tukon sanaang tuuno konoano motulungiyo komian bailong, mau kai doi yaniladoo natalalais tuuno. ³Yaku moola pastikanggene baikon yanila namendebee manulut yanila naminoolakon, bai daano komo lobian. Akiyo komo bintekene, ⁴yanila kabiyo tuuno doi kami kalu momoola yanila namalaing momotombonii momebee tulung doi Mian Bisa namian doi Yudea. ⁵Yanila mebee lobian mododoon doi oila komai minoinikon. Yanila tumbe-tumbeno salakanggene kobutongo doi Temeneno, doibundu kami koidan, pokokonoi tukon Mian Bisa namongiasan. ⁶Doiyamo kosababpo kami

bontiikene tuuno doi Titus - mo tambuune naiya usaha nia - sulano yana banggadudulkene naiya usaha nia mo monondok doi komuyudoo koidan. ⁷Komuyu totoimo doi sasaibino kolangge-langge: Komuyu totoimo doi manganggaan lalomo, doi bantilano kopandapat, doi motoiyan lalomo, doi bula-bulaa kokaliangano kousaha, tukon doi poseang lalomo doi kami. Tobikon doiya, monondoko komuyu koidan totingonii doi usaha nia lalomo mo monondok.

⁸Yaku aki kubontiikene doiya buno meeng kopalenta. Bai tukon motudoikon bułaando kona giatan komian bailong natulungiano kotulano, yaku koidan yase toiyo inaando kona polongan komu seang. ⁹Sabab komuyu toiyo tuuno baikon Yesus Klistus nda Temeneno seange tuuno kita. Yana kaasa, bai yana kubaiyo kobutongo teali talalais tuuk mukopontingan, sulano tukon natalalaisano, komuyu teali kaasa.

¹⁰Manulut daku palaat, kanamo tuuno kalu komuyu alapayomo oila komo komuyu atambuune doi taumoo molapa. Sabab komuyumo kai komo tumbe-tumbeno mo pikikene tukon moatambuune naiya usaha nia. ¹¹Nah, budodoiya siokai komuyu poampakonggene manulut doi pokamampuan. Siokai komuyu kokolokot sulano poalapayo do usahadoo, bunomo lakon komuyu loolukonoo momokolokot mosodo doipoo atambuunano. ¹²Kalu komuyu yase mebee, maka ko Mian Bisa naikon talimayo domu bineekonoo moluwedoi oila komo daano doikoo, bolikon aki alaskangene doi oila komo akiyo doikoo.

¹³⁻¹⁴Yaku bisa tuuno aki kumakisuutiyo mobebaskangene komian bailong doi tanggung jawab, tukon mokotoongiyo komuyu. Bai komuyu nia budodoo daano mosukup kopoo langge, maka takainomo komuyu posukupiyo yanila nakakulangan. Kalu kai komuyu kakulangan, tukon yanila daanomo doi nasukupan, maka nasodo yanila bantuwo komuyu. Tukon kalu buno doiya kolua-luano singgat-singgat lineleani. ¹⁵Doi Kitab Moliyous lalomo totulis,

“Mian mo badaang kona buat,
 aki nalobian,
 tukon mian mo soisik kona buat,
 aki nakakulangan.”

Titus tukon tula-tulano mo binontokon polaing-laing

¹⁶Babasal komai kinatauwan doi Mian Bisa sabab yana lapamo babayo Titus mopokakana kona mokolokotan tukon kami motulungiyo komuyu! ¹⁷Sabab Titus aki natolongo yase daanokene komai kakabi, bai mau yana kokolokot sulano natulungiyo komuyu luwedoi namongiasan susuungo tukon yana tataapenemo sulano nalubotiiyo komuyu. ¹⁸Polaing tukon yana kami kapatuwo komeeng koutus koidan mo inangga doi sasaibino kojemaat sabab kona limang babilitekene ko Bilita Monondok moluwedoi Mian Bisa. ¹⁹Tukon sangalaasan doiya, mianoo mobinanti lapamo ililik koidan tukon jemaat-jemaat tantukangenemo sulano napolaingene kami doi mai ampakonon. Sabab kami kubaiyo komai ampakonon sulano mai pelengene do potulungidoo, sulano ko Temeneno nainakabasal tukon sulano komuyu pokitayo baikon kami yase momotulungi.

²⁰Kami badagai tutuuno sulano naakiyo komian mo asalakene kami doi halloo mai polongganano do potulungidoo mo babasal. ²¹Kami yase bajalanggon tukon mloyos bolikon tolono doi Temeneno salaano, bai mau doi banggapi salaano koidan.

²²Polaing-laing tukon Titus maka doi utusoo mobinanti, kami koidan kapatuwo komeeng koutus bailong. Kami lapamo ujio yana moimoiya luunggon tukon tokita yana sidutu yase motulungi. Tukon budodoiya, yana pololokono yase tulungiyo komuyu sabab yana oduduke kona moinian mo babasal doikoo. ²³Kaliangano Titus, yana daano tulanggu, mo balimang tukon yaku motulungiyo komuyu. Tukon kaliangano doi utusoo molua, mo ampakon polaing yana, yaniladoo mian badaang jemaat-jemaat mo bintekene tukon teali binanggaakon doi Klistus. ²⁴Kami moinikene komuyu pookitekene kopoo seang doi yanila sulano sasaibino kojemaat toiyo baikon komuyu seseange yanila tukon oila komo kami banggaalkene kaliangano komuyu doiya bisa tuuno.

Potombonii motuuk doi tulanggita Salani miano

9 Kona bisaan akimo napalaluu koidan yaku mobatulis doi komuyu kaliangano potulungidoo mo kinapatu doi Mian Bisa namian doi Yudea. ²Yaku toiyo komuyu yase motulungi,

tukon yaku tausono banggaalkene komuyu doi mian badaang doi Makedonia. Yaku bantile doi yanila, baikon salataamo doi taumoo mo lapa utus-utus doi Akhaya lapamo basadia mebee tulungan. Tukon mumokolokotan lapamo okitakene kosoobos mobabasal mokolokotan doi yaniladoo. ³Budodoiya yaku binteke Titus tukon do utusoo molua doikoo sulano oila komo kami bangga-banggaalkene kaliangano komuyu naaki nabaino bunu moakiyo kona kanaan. Jadi, komuyu siokai pobatotobomo, sabab yaku bantile doi yanila baikon komuyu lapamo sadiayo doiya. ⁴Yaku balo sasaakiyo kalu-kalu daano komian badaang doi Makedonia mo malaing polaing-laing yaku doiya kosinggato daku lubatan doi komuyu. Tukon kalu yanila laate baikon komuyu akiyoon pobasadia, wah, babasal komai mammaawan naikon, sabab lapamo bantile baikon kami anggayo tuuno ikoo! Tukon komuyu kai naikon mammaa koidan. ⁵Doiyamo kosababpo yaku lasayo palaluu bintekene yaniladoo doikoo loolukon sulano naatule do potulungidoo komuyu molapamo teengene. Yaku kubaiyo doiya sulano kalu yaku lubat, dopoo potulungidoo lapamo tasadia. Tukon nabuno doiya, totingonii baikon domu potulungidoo doiya bineekon tukon noa sanaang, tukon bolikon pinakisaa.

⁶Poneneeke! Mian mo motipason kalibuang kidik-kidik naikon malaat hasilo mo soisik koidan. Bai komian mo masabukon kalibuang mobada-badaang naikon malaat hasilo mo badaang koidan. ⁷Memeeng komian siokai namebee tukon sanaang konoano. Inai namebee tukon bata-bata kai tapakisaa, sabab ko Mian Bisa mamaasikene komian mo mebee tukon sanaang konoano. ⁸Mian Bisa belkuasa momebee balakaat doi komuyu mo badaang tuuno, sulano komuyu sidutu malaat oila komo komuyu palaluuwo; tutuu komuyu naikon lobian kopo kubaiyano komonondokan tukon baamalan. ⁹Doi Kitab Moliyous lalomo totulis bunu naiya kaliangano ko Mian Bisa,

“Yana sabu-sabukene doi mian motalalais;

kona monondokan konoano sidutu-posidutukon.”

¹⁰Mian Bisa komo sadiayo kokalibuang doi mian momasabukon tukon kinaan motuuk doi kita. Yana koidan naikon mosadiayo tukon mokadaange oila komo komuyu mo tipase, sulano konoamu namonondokan tosuungi koidan. ¹¹Tukon bunu doiya

komuyu naikon inosukupi doi sasaibino kolangge tobikon komuyu sidutu moola mebee tukon noa sanaang. Tukon domu bine-bineekonoo kami mo ebe-ebese, kubaiyo badaang komian mobakinatauwani doi Mian Bisa. ¹²Sabab kokubai nia momonondok komuyu mo kubaiyo bolikon tolongo naikon osukupiyo ko Mian Bisa namian nakakulangan, bai koidan naikon tealikene badaang komian mobakinatauwani doi Mian Bisa. ¹³Tukon dopoo batulungianoo komuyu mookitakene, badaang ko Salani miano doi Yudea naikon monggaale ko Mian Bisa sabab yanila kitayo komu mololean doi Bilita Monondok kaliangano Klistus doi komuyudoo molainge. Koidan, yanila nggaale ko Mian Bisa, sabab komuyu monondok konoamuyu tuuk moebe-ebese doi yanila tukon doi sasaibino komian bailong oila komo daano doikoo. ¹⁴Maka yanila sambeanggene komuyu tukon palasaan poseangan sabab ko Mian Bisa monondok konoano tuuno doikoo. ¹⁵Siokai kita nda basyukuul doi Mian Bisa sabab kona bineekonoo mo bolikon langge.

Paulus palataangene kona meleleanian

10 Budodoiya yaku, Paulus, yase sumbetene komeeng kolangge doikoo. Yaku nia, manulut mian nabantilano, mantalamuyuk kalu posasalaan tukon komuyu, bai balani kalu pokododoonggon. Nah, sabab namantalamuyukan tukon namonondokan Klistus noano, ²yaku kabiyo tutuuno inai pokubaiyo yaku teali balani doi komuyu kalu naikon yaku lubat. Sabab daku niat tuuk mongkubai tindakan mokalaas doi mian-mian mo bantile baikon kami balimang tukon makisuut-makisuut dunia koono. ³Kami takainomo daano motubo doi dunia lalomo, bai kami aki nabalajuang kona tuduan motolongo dunia koono. ⁴Komai sinapan-sinapan pinake doi mai palajuanganoo lalomo bolikon kai sinapan doi dunia lalomo, bai sinapan-sinapan moluwedoi Mian Bisa mo balakuasa. Tukon sinapan-sinapanoo kami manase kopalataan-palataan; kami aline koponggeelekiyan, ⁵tukon kami duduwo kobenteng-benteng mobinanggaakon tukon inokokondong sulano nalawane komotoiyan kaliangano doi Mian Bisa. Kami lungguiyo ko mian-mian napikilan tukon tealikene yanila mangangga doi Klistus. ⁶Tukon kalu komuyu loingiyomo tutuuno, kami basadia

moukume sasaibino komian mo aki nataat.

⁷Siokai komuyu posadaliyo kondodoong nakanaan. Kalu memeeng komian mangangga baikon yana Klistus nalangge, siokai yana ingotiikene kobutongo susuungo tukon sadaliyo baikon kami koidan Klistus nalangge pokakana yana. ⁸Yaku aki kumammaa kalu lobian badaang daku banggal-banggaalkanano kakuasaanoo mo lapamo Temeneno beekene doi kami, sabab kakuasaanoo bineekon doi kami sulano mai bangune komuyu, bolikon kai sulano nai lubang. ⁹Yaku aki kuyase komuyu poaangene yaku tolongo ododiiyo komuyu tukon daku sulat-sulato. ¹⁰Mian bantile, "Paulus nasulat-sulato togaas tukon taangga, bai kalu yana susuungo daanomo doi kita nia, kona pombawaan mantalamuyuk tukon bantilan-bantilan akiyo koalatio!" ¹¹Siokai komian mo bunu doiya sadaliyo baikon kalu kami daano doi komuyudoo, komai kokubai tontong bunu oila komai tinulis doi surat-sulato lalomo.

¹²Takainomo aki mai balani mopokakanakene kabai moabese kobutonggami pokakana komian mo aangene kobutongo tatandak. Bukan maen yanila nabodoan! Yanila mongkubai ukulan susuungo tukon palesayo kobutongo susuungo tukon ukulanoo. ¹³Kami aki mai bunu doiya. Kalu kami banggal-banggaal, aki mai lupaiyo kobatas. Kami dungol doi batas-batas lipu balimangan lalomo Mian Bisa mo lapamo tantukene doi kami. Tukon komuyu tongusokon doi lipudoo lalomo. ¹⁴Jadi salataa kami lubotiiyo komuyu tukon babayo ko Bilita Monondok kaliangano Klistus doikoo, kami bisa-bisa aki mai kalual doi batas-batasoo lipu mai balimangan. ¹⁵Aki mai nggaale kobutonggami doi mian bailong nalimang mo daano doi batasoo tonggulungo Mian Bisa mo tantukenemo tuuk doi kami. Kobalino kami tataap doi batas-batasoo lalomo Mian Bisa mo tantukanggenemo tuuk doi kami tukon moinikene baikon komuyu pololokon mangangga doi Klistus, sulano kami moola kubaiyo kolimang mo lobian kona babasalan doi komuyudoo. ¹⁶Tukon bunomo doiya kami moolamo babilitakene koidan do Bilita Monondok doi lipu-lipu bailong mau naaki mai binggat-binggate kobutonggami doi limang mo lapamo linakukon doi lipu mian bailong nameleleanian.

¹⁷Doi Kitab Moliyous lalomo totulis, "Mian mo yase banggaalkene komeeng kolangge, sio nabanggaalkene oila komo

lapamo Temeneno kubaiyo.” ¹⁸Sabab komian mo tanggaal siokai mian Temeneno mo nggaale, bolikon mian mo nggaale kobutongo susuungo.

Paulus tukon lasul-lasul mokala

11 Popataikanaku yaku kubabunokon mian molongas soisik. Moola, kai aki? ²Yaku peleengene ikoo, pokakana ko Mian Bisa susuungo mopeleengene ikoo. Komuyu pokakana komeeng kopau boine mo daano moliyous yaku mo lapamo teengene sulano nainosowaanggon tukon meeng kona langkai, doiyamo Klistus. ³Bai yaku balo sasaaki komu pikilan naikon tagoda sulano naakimo mumolole doi Klistus, pokakana Hawa loolukonoo tagoda doi bindadoo napandoiyan. ⁴Sabab buulangge komuyu tolono sanaang motalimayo komian mo lubat doikoo tukon mongotunggul kaliangano Yesus bailong – bolikon Yesus kami mo otunggulikene doikoo. Tukon komuyu yase koidan motalimayo koloh tukon “bilita monondok” mo posasala tuuno tukon Mian Bisa Na Loh tukon Bilita Monondok mo sidutu komuyu talimayo doi kami.

⁵Yaku aki kulasaiyo molobian pende doi “lasul-lasul” mo bolikon langge tuuno! ⁶Kai yaku aki kupandoi basilingan, bai kokaliangano motoiyan, yaku bolikon mian mo bunggu. Doiya lapamo kami bukutiikangene doikoo doi sasaibino kolangge.

⁷Doi tembodoo kubabilitakanano ko Bilita Monondok moluwedoi Mian Bisa tuuk doikoo, yaku aki kukubaiyo komuyu po onkosiaku mau nabaino soisik; tukon nabuno doiya yaku kubaiyomo kobutonggu teali pependekon. Yaku kubaiyo doiya sulano komuyu poinakatandak. Kai doiya meeng daku kasalaan doikoo? ⁸Doi tembodoo yaku leleaniyo komuyu, yaku anggota-anggota jemaat bailong komo onkosiaku. Moola nabinantil baikon yaku olugiyoo do anggota-anggotadoo sulano namoola yaku tulungiyo komuyu. ⁹Kalu doiya kosinggatoo yaku kakulangan, yaku aki nabiasa osusayo komeeng komian doi komuyudoo. Sasaibino komo yaku palaluuwo utus-utus mo lubat doi Makedonia komo sadiakene. Yaku dagaiyo monomonondok sulano yaku aki kukubaiyo susa doi komuyu doi oilamo kolangge lalomo, tukon yaku momeenggon dagaiyo doiya sulano natataap bunoo doiya. ¹⁰Daku tanggaalania aki namoola

Israël miano. Abalaham kai natulunan yanila? Mau yaku bai bunomo! ²³Yanila kai Klistus napeleleani? Kona tololongolan yaku bunu kabuso daku akal, bai yaku takainomo peleleani mo lobian kona monondokan tukon yanila sasaibinodoo! Yaku balimang kakabukuan liise yanila, yaku biasamo inusokon doi talungguan lalomo, yaku badaang luunggon kusinakisaa tukon kobailonggon adukono yaku mate. ²⁴Limamo luunggon ko Yahudi miano nasakisaayo yaku tukon yanila umbase yaku tolu kolono sio luunggon. ²⁵Tolu luunggon ko Loma miano naumbasaku; biasa yaku sinakul tukon batu. Tolumo luunggon kutoupiyo kokopal nakoyol doi tobun, tukon idano kutalatalanto doi ndalangan tangano lua kolono sangkap kojam kolumbito. ²⁶Badaang luunggon kumongkubai ampakanan mo balabahaya: yaku toupiyo kopaisu moeaba, mian mopondikuk, silakaan doi Yahudi miano mau mobolikon Yahudi miano, silakaan doi kota lalomo, silakaan doi kota tonggulungo, silakaan doi tobun tangano, tukon silakaan doi mian-mian mo bantile kobutongo montolitusan Salani miano banggokai bolikon. ²⁷Yaku akabuse kobukunggu, tukon balajuang adukon mate: kobailong aki kumoolo, aki kukaan, aki kumonginum paisu, badaang luunggon kutongokoolo sabab yaku malaal, kanakon memel sabab akiyo daku pakean tukon akiyo daku bonua dungolan. ²⁸Sangalaasan doiyadoo sasaibino, sasamba kooloyo yaku pikikene sasaibino kojemaat-jemaat nandondoong. ²⁹Kalu daano komo mantalamuyuk mau yaku bai talalaing mantalamuyuk koidan. Kalu daano komo tuwong doi lalim lalomo, konoanggu pololokon susa.

³⁰Jadi, kalu yaku sio banggaalkene kolangge meeng, maka doiya banggaalkene kolangge-langge mo okitakene daku kelemahan. ³¹Mian Bisa, Tama moluwedoi Temeneno Yesus toiyo baikon yaku aki kubakala-kala. Tanggaal kosambuno sidutu-posidutukon. ³²Sambuno yaku daano doi Damsyik, gubelnul mo balakuasa idoo doi Tomundo Aletas napamalentaan, sumboliiyo kona suludadu modagaiyo do kotadoo tataaponu sulano napo lakoyo yaku. ³³Bai tukon meeng kobois yaku inilul doi meeng kobuang doi betoonoo. Tukon bunu doiya yaku moola luput doi gubelnuloo limano.

**Inokitakon moluwedoi Mian Bisa tukon pokita Mian Bisa mo
beekene doi Paulus**

12 Takainomo akiyo kolabano tuuk bangga-banggaalan. Bai yaku yase koidan mobanggal-banggaalkene kolangge-langge Mian Bisa mo okitakene doi yaku moluwedoi Mian Bisa nainokitakon kai doi kupokita lalomo. ²Yaku tingoniiyo komeeng ko Salani miano doi mo songulo sangkapoo kotaum mo lapamo linibakon. doi lipu natatandakan doiyamo doi sulugaa. (Yaku aki kutoiyo kai kobutongo bisa-bisa linibakon kai doiya tolongo meeng kopokita tolongo – Mian Bisa komo toiyo.) ³⁻⁴Yaku kuwaikene koidan: Yaku toiyo baikon naiya mian nia biningkat inusokon doi Fildaus. (Yaku aki kutoiyo kai kobutongo bisa-bisa mobiningkat kai doiya tolongo meeng daku pokita – tolongo Mian Bisa komo toiyo.) Indaa do mianoo lengele kolangge-langge mo aki namoola banggaapi nabantile tukon koidan aki naminoolakon doi banggaapi nabantile. ⁵Kaliangano doi mianoo doiya komo yaku yase banggaalkene, bolikon kai doi butonggu susuunggu. Kokaliangano kobutonggu susuunggu, tolongo langge-langge mo okitakene daku kelemahan, doiyamo daku iniyas mobanggaalkene. ⁶Kalu ande-andeno yaku koidan yase mobanggaalkene kolangge meeng, yaku aki kuyase moteali bunu mian mo bongakon mokala-kala; yaku naikon bantile komo kana. Bai yaku dagaiyo kobutonggu, sulano naakiyo komian mo aanggene yaku susuungiyomo daku bantilano oilamo kolangge mo lapamo yaku kitayo kai yana mo lapamo lengele yakudoo mobantile.

⁷Bai sulano naaki kutodudul bangga-banggaal sabab daku pokitadoo mo bolikon langge kona bisa-bisaan, yaku bineekon komeeng kolangge mobuno meeng kopanakit doi butonggu mo bunu meeng ko Ibiliis naloloon. Do panakitoo mobineekon sulano nanale yaku sulano yaku naaki kuteali bangga-banggaal. ⁸Tolu luunggon kusambeang doi Temeneno sulano do panakitoo natoliat doi yaku. ⁹Bai ko Temeneno timbiliyo, “Yaku seange ikoo tukon doiya sukupo doikoo; sabab daku kuasa tokita tuuno kalu ikoo daano doi ndondoong molemah.” Doiyamo kosababpo yaku sanaang tuuno kalu tolongo yaku bangga-banggaalkene daku kelemahan-kelemahan, sabab kalu yaku lemaamo, maka doiyamo kosinggatoos daku lasaano ko Klistus naloolaingano yaku tukon nabukuanan. ¹⁰Jadi yaku laba tukon

daku kelemahan-kelemahanoo. Yaku koidan laba sabab yaku mangangga doi Klistus maka kubinasalitakon lokis, yaku toupiyo kokasulitan, yaku binuluk-buluk tukon yaku toupiyo kokasukalan. Sabab kalu yaku lemah, maka doiya koidan kotembono yaku malaat bukuanan.

Paulus molilikene kokaliangano mian badaang doi Kolintus

¹¹Bisa tuuno yaku mobabunokono mian mobonggu tuuno – bai komuyumo kai komo kubaiyo yaku bunu doiya. Kona bisaan komuyumo komo sio ponggaalaku. Sabab mau kai yaku naakiyono koanggano oioila, yaku aki kukala doi “lasul-lasul” mo bolikon langge tuuno! ¹²Kolangge mominasaingdinggon tukon langge-langge mobolikon langge tukon limang-limang mo babasal lapamo inokitakon tukon sabal doikoo sulano natotingonii baikon yaku meeng kolasul. ¹³Doi indee kai kolanggeno moaki popinalatikanggon, kalu pinookakanakon tukon jemaat-jemaat bailong? Paling-paling tolono naiya langge nia: baikon yaku aki kukubaiyo susa komuyu sulano pookoniyo yaku. Pomaafkangene yaku doi kasalaanoo doiya!

¹⁴Naiya budodoo kotolunomo luunggon kubatotobo molubotiiyo komuyu. Tukon yaku aki kuyase mokubaiyo susa komuyu, sabab komo yaku yase tuuno bolikon kai pobuat, bai tolono butomuyu. Sabab bolikon labuk-labuk komo mo umbolii onggos motuuk doi tamano-tinano, bai tamano-tinano komo mo umbolii onggos motuuk doi nalabuk-labuk. ¹⁵Tobikon doiya, tukon sanaang konoanggu yaku yase mokulbankangene sasaibino daku langge tuuk doikoo, mau kai butonggu susuunggu. Kalu bunu doiya yaku moseange komuyu, oilakai momoola komuyu naaki poseangaku?

¹⁶Nah, komuyu yase baikon yaku aki kubiasa kubaiyo susa komuyu. Mau kai nadaano komo bantile yaku nia pandoi; baikon yaku momalaat kauntungan doi komuyu sabab daku batipuan. ¹⁷Naando minoolakon! Kai luwedei mian badaang yaku mo bintekene doikoodoo yaku biasa malaat kauntungan doi komuyudoo? ¹⁸Yaku lapamo sumboliyo Titus molubotiiyo komuyu, tukon yaku sumboliyo koidan koutusonggita Salani bailonggon mopolaing-laing yana. Oilakai Titus mangala kauntungan doi komuyu? Bai kami lua kami balimang tukon meeng komakisuit mo pokakana tukon kami ampakonggene tukon cala-cala mo pokakana!

¹⁹Takainomo komuyu aangenemo kami salama nia kami daano mokakaate mobelayo kobutonggami telhadap doi komuyu? Komuyu sala tuuno! Mian Bisa toiyu baikon sasaibinodoo kami mo bantile doiya luwedoi Klistus namongiasan. Tukon sasaibino komo kami lakukene doiya sulano nabangune kopoo tuboan lohani. ²⁰Yaku balo sasaaki naikon doi kulubotiiyano komuyu, yaku laate komuyu aki nabuno naikon doi yakudoo mo moinikene. Inai-inaikene nadaano komo ponggimakon, mopoabos noa, momoonas konoano, moutamakene kobutongo susuungo, mopobasalitakon doi nakulokisan, pokala-kalaakon, bangga-banggaal tukon banggaangabut. ²¹Yaku matakut kalu-kalu daku lubatan naikon ko Mian Bisa ekependeyo yaku tukon yaku naikon kokiil sabab badaang doi komuyudoo komo daano kona lalim doi loolukonoo, moaki natobolii tukon aki natade mokubaiyo kokokubai-kokubai mo lokis, manggilit tukon aki napantas.

Poingoti-poingotii napupusan tukon teteba

13 Naiyamo kotolu luunggono daku lubotiiyano komuyu. Doi Kitab Moliyous lalomo daano mototulis, "Memeeng kopalakala sio nadaano kolua kai tolu komian mosakisii, maka nasodo palakaladoo sah." ²Komian badaang doi tempodoo looluk lapamo mongkubai lalim tukon sasaibino komian bailong lapamo yaku ingotiikene yanila loolukonoo doi tempo koluano luunggon, kulubotiiyano komuyu. Budodoiya, samantala yaku pokokodoonggon tukon komuyu, yaku ingotiikene koidan baikon kalu yaku lubat koidan, akiyo komeeng komian doi yaniladoo motongosodii doi ukuman. ³Maka yanila sasaibino malaat bukutii doi komuyudoo mo yase baikon Klistus bisa-bisa mobasilingan lolo doi yaku. Kalu Klistus mokubai tindakan doi komuyu, yana aki mokubai tindakan mantalamuyuk, bai yana okitakene kona kuasa doi komuyudoo. ⁴Takainomo do tempodoo yana nasinempanggonan, yana mantalamuyuk, bai doiya budodoo yana tubo sabab Mian Bisa nakuasa. Kami koidan mantalamuyuk doi mai tuboan lalomo kami mo pomeenggon tukon Klistus, bai kalu kami posasalaan komuyu, kami teali bukuan sabab polaing Klistus sabab Mian Bisa nakuasa.

⁵Soba komuyu poujio kobutomuyu kai komuyu bisa-bisa motubo sabab mangangga doi Klistus! Bisa komuyu sadaliyo baikon Klistus daano doi komuyudoo! – posasala kohallo kalu komuyu aki pobisa-bisa momangangga. ⁶Yaku moinikene sulano komuyu posadaliyo baikon komuyu nia bolikon mian mo aki namoola taane koujian. ⁷Kami sambeang doi Mian Bisa sulano yana nayase tulungiyo komuyu sulano naaki pomongkubai sala. Bolikon kai sulano tudoikene baikon kami nia takainomo pandoi moalapayo komai limang, bai sulano komuyu pokubaiyo oila ko Mian Bisa nainiyas – mau kona tokitaan kami tulungiyo, bai aki nabula-bulaa! ⁸Sabab kami aki namoola mongkubai meeng kolangge mo posasala tukon mo bisa; kami sio loloiyo komo bisa. ⁹Kami sanaang kalu kami mantalamuyuk, tukon komuyu bukuan. Kami sambeang koidan sulano komuyu poteali talakana. ¹⁰Doiyamo kosababpo yaku motulise nia sulatia tempodoo yaku akiyoon kulubat doi komuyudoo. Tukon buno doiya, kalu yaku lubat naikon, mau naakimo natodudul yaku mokubai tindakan tuuno doikoo tukon gunakangene ko Temeneno nakuasa mo beekene doi yaku. Kakuasaanoo mobineekon doi yaku sulano kindendeke komuyu, bolikon sulano nakulokisangene.

¹¹Kona pupusan, Utus-utus, siokai komuyu polaba-laba, tukon kakaate poteali talakana. Potalimayo daku otunggul sasaibino. Siokai komuyu po pomeenggon noa tukon potubo pokokindokon. Mian Bisa Mobabasal Konamaasi tukon do podamedoo naikon nalolainge komuyu.

¹²Poposeang meeng tukon bailong salaku poseangan mondoutusan doi Salani.

Sasaibino ko Mian Bisa namian makapatu teteba doi komuyu.

¹³Temeneno Yesus Klistus balakaatiyo komuyu, ko Mian Bisa mamaasikene komuyu, tukon ko Mian Bisa Na Loh lolainge komuyu sasaibino!

Komai holomat,
Paulus

PAULUS NASULAT DOI JEMAAT-JEMAAT GALATIA

PANGANTOKON

Salataa Bilita Monondok doi Yesus nainatambuunan kosalitano tukon tinalima doi mian badaang mobolikon Yahudi, sumbut kopasadai oilakai kalu teali meeng ko Salani miano sio naloingiyo koatulan agama Yahudi. Paulus lolukenggene baikon do langgedoo aki napalaluu - baikon kona tutuuan tongo meeng kodal mo monondok motuuk doi Salani miano natuboan doiyamo maanggaan doi Klistus. Tukon do manganggaanoo kobanggapi napotaamian tukon Mian Bisa teali monondok koidan. Bai badaang komian mo tumba-tumbake Paulus lubat doi jemaat Galatia, doiyamo meeng koplovinsi Loma doi Asia Pauno. Yanila napalaat baikon sulano nda pokindokon tukon Mian Bisa, komian sio naloingiyo koagama Yahudi atulano.

Paulus nasulat doi jemaat-jemaat Galatia nia tinulis tuuk tulungiyo komian badaang mo lapamo sala kona loloon sabab do otunggul-otungguloo mosala, sulano yanila abali loingiyo doi otungguloo mo kana. Paulus atambuune tukon bantile baikon yana sio nasinumbuikon lasul Yesus Klistus. Tukon tegas Paulus bantile baikon dona inuanganoo moteali lasul luwedo Mian Bisa, bolikon doi banggapi. Koidan baikon kona limang naotuukano tuuno doi mian mobolikon Yahudi (1:2). Lapa doiya Paulus popitoikene kona mongiasan baikon kopotaamian kobanggapi tukon Mian Bisa teali monondok koidan tongo mololoi manganggaan doi Mian Bisa (3-4). Doi pasal-pasal napupusan naiya buku nia (5-6), Paulus otudoikene baikon koposeangan mo sumbot doi Salani miano butongo sabab yana mangangga doi Klistus, tobikon kalu bunomo doiya tealikenemo do mianoo kubaiyo kokokubai-kokubai Salani.

*Antoko**Pololukoni 1:1-10**Paulus nahaak bunu lasul 1:11-2:21**Bilita Monondok kaliangano doi Mian Bisa
namaasi 3:1-4:31**Natongosodiyen tukon Salani miano
nakawajiban 5:1-6:10**Potutupo 6:11-18*

1 ¹⁻³Utus-utus jemaat-jemaat doi lipu Galatia, Yaku, Paulus, tukon sasaibino utus Salani mo polaing yaku, moini kinatauan Mian Bisa Tamanggita tukon Temeneno Yesus Klistus beena balakaat tukon namonondokan doikoo.

Yaku teali lasul bolikon tukon lolo doi banggapi kabai sabab banggapi komo bingkate, baimo Yesus Klistus tukon Mian Bisa Tamanggita mo lapamo otuboiyo yana abali doi namatean. ⁴Loloiyo Mian Bisa Tamanggita namongiasan, Klistus salakangene kobutongo teali sosubakon tuuk kita nalalim-lalim, sulano kita sinalamaton doi lounukoo mo lokis nia. ⁵Nggaale ko Mian Bisa sidutu-posidutukon! Amin.

Meeng-meenggon Bilita Monondok

⁶Yaku helan tongo Utus-utus! Komuyu Mian Bisa uange tobikon Klistus namaasi, bai diabudodoo komuyu bunu mosobit mototunggulunge ko Mian Bisa tukon mololoi “bilita monondok” mo bolikon Bilita Monondok mo luwedo Mian Bisa. ⁷Kona bisaan akiyo ko “bilita monondok bailong”. Tongo daano komian badaang popitoikene doi komuyu “bilita monondok” kaliangano Klistus yanila poibalike tobikon nanggabute komuyu. ⁸Mian mo babotilangene “bilita monondok” mo sangalaasan doi Bilita Monondok mo lapamo kami babotilangene, sodiiyomo yana Mian Bisa naukume - mau kai mianoo kami susuungo kabai malaekat doi sulugaa! ⁹Kami lapamo bantile lolukon, diabudodoo yaku bantile koidan: Mian mo babotilangene doikoo “bilita monondok” mo sangalaasan

ko Bilita Monondok mo lapamo komuyu talimayo doi kami, mianoo sio Mian Bisa naukume!

¹⁰Oilano tukon doiya natokitaan yaku kabi-kabi moini doi banggapi naakuiyo? Tutuu aki! Yaku tongo moinikene pangakuan doi Mian Bisa. Oila yaku daano kakaate mangala noa doi banggapi sulano nasinanaanggon doi mian? Kalu yaku daano mokubaiyo buno doiya, yaku bolikono Klistus naata.

Bulaando Paulus teali lasul

¹¹Utus-utus sio potoiyo baikon Bilita Monondok yaku babotilangedoo aki naluwe doi banggapi. ¹²Yaku aki mantalima bilitadoo doi banggapi, tukon akiyo komeeng komian mootunggukene doi yaku. Yesus Klistus susuungo komo popitoikene Bilita Monondokoo antoko doi yaku.

¹³Tantu komuyu lapamo molongol kaliangano daku tuboan looluk buno meeng komian mangangga agama Yahudi. Komuyu toiyo bulaando daku balanian kubaiyano Mian Bisa najemaat tukon bulaando daku motikasan kakaate momanase. ¹⁴Doi mangampakongganagan agama Yahudi, yaku lobian nabadaangan Yahudi miano mo pokakana tukon yaku. Yaku molole tuuno doi langge-langge kaliangano adat tumbunggami.

¹⁵Bai sabab Mian Bisa noano namonondokan, yana lilike yaku akiyoon kusinuung tukon uange yaku sulano leleaniyo yana. ¹⁶Mian Bisa okitakene kona Pau doi yaku sulano Bilita Monondok kaliangano na Pau namoola yaku babotilanggene doi mian badaang mobolikon Yahudi. Doiya kosinggatoo yaku aki kutaus doi meeng komian sulano mangkabi otinau. ¹⁷Yaku koidan aki kutaus doi mian badaang doi Yelusalem mo lapamo mantailukon doi yaku teali lasul. Bai yaku taus doi lipu Alab, maka idoo abali koidan ke Damsyik. ¹⁸Tolu kotaum doibundu yaku taus ke Yelusalem sulano potoikon tukon Petulus. Yaku dungol tukon yana tongo songulo lima kooloyo kona kalumbit. ¹⁹Yaku aki kuposuung tukon lasul-lasul bailong, tongo Yakobus, Temeneno utuso.

²⁰Oila daku tinulis nia bisa. Mian Bisa toiyo baikon yaku aki kubakala-kala!

²¹Lapa doiya yaku taus doi lipu-lipu Silia tukon Kilikia.
²²Polong naiya kotembono jemaat-jemaat Salani doi Yudea daano komo akiyoon natingoniiyo yaku secala banggadudul.
²³Yanila tolongo molongol mian mobantile, "Mian mo looluk lokis-lokise kami, diabudodoo babotilangene mangangaan molooluk yase nainakiyonggon." ²⁴Maka yanila nggaale ko Mian Bisa sabab yaku.

Paulus tukon lasul-lasul bailong

2 Songulo sangkap kotaum doibundu, yaku abali ke Yelusalem polaing Balanabas, tukon babayo Titus koidan.
²Yaku taus ke Yelusalem sabab Mian Bisa lapamo nyatakangene doi yaku baikon sio kutaus. Tukon doi meeng kopoulosuungan lalomo motongo tukon katua-katua imbali yaku talakangene Bilita Monondok yaku mo babotilangene doi mian badaang mobolikon Yahudi. Sabab yaku aki kuyase daku kakaatean looluk, mau diabudodoo natongo palasuma. ³Titus mo lainge yaku, daano meeng ko Yunani miano, bai yana aki napinakisaa mololoi atulan sunat, ⁴mau kai daano komian badaang mo desaake langgedoo. Yanila daano mian badaang mo popilaing doi golongan lalomo tukon babunokon bunu utus. Yanila usok tukon aki nabiyok-biyok tuuk mapalesa tongosobiiian mo daano doi kita sabab kita pomeenggon tukon Yesus Klistus. Yanila yase abalinggene kita doi nandondoong tumbeno bunu ata, ⁵bai kami aki namenyelaa mau nasoisik doi yanila, sabab kami yase mototooliyo sulano Bilita Monondokoo tataap monondok tuuk komuyu.

⁶Mau nabuno doiya, aki nadaano kolangge-langge boolu mo kinabi doi yaku doi mian badaang mo inaanggon inodotii - bunu yaku akiyo kona posasalaan kalu yanila moinodotii kabai aki, sabab Mian Bisa aki nalilike koduduso. ⁷Kona kabalikan, mian badaang mo inanggap inodotiido mangakukene baikon Mian Bisa lapamo bintekene yaku babotilangene Bilita Monondok doi mian bolikon Yahudi, pokakana bunu yana lapamo bintekene Petulus sulano babotilangene Bilita Monondokoo doi Yahudi miano. ⁸Sabab Mian Bisa mo beekene doi Petulus kona kamampuan sulano teali lasul Yahudi miano, beekene koidan doi yaku kamampuan teali lasul mian mobolikon Yahudi.

⁹Yakobus, Petulus tukon Yohanes, mo tokita teali katua-katua jemaat, mangakukene baikon Mian Bisa lapamo beekene doi yaku limang kusus nia. Maka yanila pokanggi lima tukon Balanabas tukon yaku buno tanda posobatan. Maka yanila tukon kami loingiyo baikon kami naikon balimang doi antala bangsa-bangsa mo bolikon Yahudi tukon doi antala Yahudi miano. ¹⁰Kome-komeengo yanila nakakabi doiyamo sulano kami palahatikangene komian motalalais. Tukon yaku sanaang mokubaiyo langgedoo.

Paulus anuukene Petulus doi Antiokhia

¹¹Singgato Petulus lubat ke Antiokhia, yaku tantange yana tala-talaangan, sabab kona tindakan sala. ¹²Tumbe-tumbeno yana osulang kaan polaing-laing tukon utus-utus mo bolikon Yahudi. Bai Yakobus namian badaang binontokon polongo, yana dedeengenemo kobutongo doi utus-utus mobolikon Yahudi tukon aki nayase koidan kaan tukon yanila, sabab matakutene mian badaang mo yase sulano sasaibino komian nasinunat. ¹³Utus-utus Yahudi bailong koidan babunokon Petulus mobakokolii, tobikon Balanabas nalobian babunokon yanila. ¹⁴Buno doiya yaku kitayo baikon yanila akiyo kosikap pokonoi tukon natalakanaan Bilita Monondokoo, yaku bantil doi Petulus doi mianoo sasaibino salaano mo daano idoo, “Kalu Utus buno Yahudi miano lapamo tubo buno mian bolikon Yahudi, bulaando Utus diabudodoo yase pakisaayo komian badaang bailong tubo buno Yahudi miano?”

Yahudi miano tukon bolikon Yahudi sinalamaton sabab mangangga doi Klistus

¹⁵Bisa mololoi nasinuungan, kami daano Yahudi miano tukon bolikon “mian mobolikon Yahudi mo baladosa”. ¹⁶Mau nabuno doiya kami toiyo baikon mian abali pokindok tukon Mian Bisa tongo sabab manganggaan doi Yesus Klistus, tukon bolikon sabab mangampakonggon ukum agama. Kami susuungo mangangga doi Yesus Klistus, sulano kami pokindok tukon Mian Bisa mololoi kami namanganggaanoo, bolikon sabab kami mangampakonggon ukum agama. Sabab tukon mangampakonggon ukum agama aki nameeng komian moola

abali pokindok tukon Mian Bisa. ¹⁷Kami kakaate abali pokindok tukon Mian Bisa mololoi tuboan pomeenggon tukon Klistus. Bai kalu lapamo kubaiyo komo bunu doiya, tokita kami daano, “mian badaang mobaladosa” koidan bunu mian badaang bolikon Yahudi, oilamo nia koalantino baikon Klistus mo tealikene kami baladosa? Tantu aki! ¹⁸Kalu yaku tambuun abali otuboiyo kodal ukum agama mo lapamo yaku manase, maka yaku tudoikene baikon yaku lapamo teali palanggal ukum. ¹⁹Bai yaku lapamo mate tongo ukum agama – inakate kabai ukumoo susuungo – sulano yaku malaat tuboan tuuk Mian Bisa. Yaku lapamo sinempanggon polaing Klistus. ²⁰Diabudodoo bolikon koidan yaku mo tubo, bai Klistus mo tubo doi butonggu lalomo. Tuboan nia yaku pikikene diabudodoo daano tuboan manganggaan doi Mian Bisa Napau mo seseange yaku tukon mo lapamo sosubakene kobutongo tuuk yaku. ²¹Yaku aki kupandang enteng ko Mian Bisa namaasi. Kalu mian napotaamian tukon Mian Bisa teali abali monondok sabab ambakonggene koukum agama, doo koalantino Klistus namatean akiyo kona totuuk!

Ukum agama kabai manganggaan doi Klistus

3 Utus-utus Galatia miano! Komuyu bisamo molongas! Kabai komuyu lapamo kanakon budukan indee? Klistus namatean sinempang lapamo yaku talakanggene tukon tontong doikoo! ²Soba pobotiikanaku meeng nalangge nia: Oila komuyu lapamo mantalima Mian Bisa Na Loh sabab ampakonggene koukum agama, kabai sabab komuyu molongol Bilita Monondok doi Mian Bisa tukon mangangga doi Klistus? ³Bulaando komuyu bunu longas! Komuyu lapamo atambuune kotuboan boolu tukon Mian Bisa Na Loh, bulaando diabudodoo komuyu yase molaate kona monondokan tukon mubukuanan susuumu? ⁴Palasuma kai sasaibino mo lapamo komuyu motoupiyodoo? Bulaando kai mopalasuma! ⁵Mian Bisa beekene kona Loh doikoo tukon kubaiyo komo minasaingdinggon-minasaingdinggon doi antala komuyu. Oilamo Mian Bisa kubaiyo koiya sabab komuyu ampakonggene koukum agama kabai sabab komuyu molongol Bilita Monondokoo tukon mangangga doi Klistus?

⁶Doiya pokakana bunu mo totulis doi Kitab Moliyous lalomo kaliangano Abalaham – bunu naiya, “Abalaham mangangga doi

Mian Bisa, tukon sabab namangangaanoo yana Mian Bisa talimayo buno mian mo sanaangene ko Mian Bisa noano.”

⁷Jadi tobikon doiya komuyu sadaliyo baikon mian mo bisa-bisa Abalaham nakatulunan daano mian mo mangangga doi Mian Bisa. ⁸Kitab Moliyous tumbe-tumbeno lapamo kitayo baikon Mian Bisa daanokene mian badaang mobolikon Yahudi abali pokindok tukon Mian Bisa, kalu yanila mangangga doi yana. Bilita Monondokoo loolukonoo pinopitoikon doi Abalaham naiya dandi nia lalomo, “Lolo doikoo, Mian Bisa naikon balakaatiyo sasaibino kobanggapi nai dunia nia bungguno.” ⁹Abalaham anggayo, maka yana binalakaati. Bunomo koidan sasaibino komian mo mangangga, naikon binalakaati polaing-laing Abalaham.

¹⁰Mian badaang mo moini doi ukum agama, sasaibino tubo kinutuk, sabab doi Kitab Moliyous totulis, “Mian mo aki namolole ampakonggene sasaibino komo totulis doi Buku Ukum Agama lalomo, Mian Bisa kutuke!” ¹¹Akiyo meeng komian mo pokindok tukon Mian Bisa sabab mangambakonggon ukum agama. Langgedoo lapamo inokitakon doi Kitab Moliyous lalomo, “Tongo mian mo mangangga doi Mian Bisa tobikon kona potaamian tukon Mian Bisa abali teali monondok, naikon tubo!” ¹²Bai ukum agama aki nabeldasar manganggaan. Doi Kitab Moliyous lalomo totulis baikon mian mo ampakonggene koukum agama, naikon tubo sabab ukumoo.

¹³Bai Klistus sobiiyo kita doi ukum agama nakutuk. Yana kubaiyo tukon sodiikene kobutongo nakinutuk sabab kita. Sabab doi Kitab Moliyous lalomo totulis, “Kinutuk komian mo mate motinude doi kayung batango.” ¹⁴Klistus kubaiyo doiya sulano balakaat mo Mian Bisa tetebaikene doi Abalaham bineekon koidan doi mian badaang mobolikon Yahudi. Tukon buno doiya kita mo mangangga doi Mian Bisa, mantalima Loh mo tinetebaikon doi Mian Bisadoo.

Ukum agama kabai Mian Bisa nateteba

¹⁵Utus-utus! Namonondokan yaku mangala sontoh doi pangalaman samba kooloyo. Kalu mian mokubaiyo meeng poboian

teteba tukon tetebadoo lapamo sinatudui, maka akiyo komeeng komian momoola akiyenggene paladandianoo, kabai suungiyo lobo meeng doi yana. ¹⁶Mian Bisa napaladandian-paladandian kinubai luwedoi Mian Bisa tuuk doi Abalaham tukon tuuk mian batulunanggene Abalaham. Doi Kitab Moliyous lalomo aki natotulis “tukon tuuk doi mian badaang mobatulunanggene Abalaham”, koalatio badaang komian. Komo totulis idoo daano “tukon tuuk mian mobatulunanggene ikoo”, koalatio tongo meeng komian, doiyamo Klistus. ¹⁷Komo kabi yaku bantile dimbaa doiyamo naiya: Mian Bisa napaladandian lapamo kinubai tukon sinatuduimo. Ukum agama mo bineekon 430 kotaum doibundu aki namoola inakiyonggon palasatuduan tukon nainapusan Mian Bisa napaladandianoo. ¹⁸Sabab kalu Mian Bisa nabineekon tokooton doi ukum agama, maka doiya bolikon paladandian mo bineekon. Tobikon sabab Mian Bisa lapamo dondiikene doi Abalaham, maka Mian Bisa beekene doi yana.

¹⁹Kalu bunu doiya, tuuk oila ukum agama mobineekon? Potimbilino doiyamo baikon ukumoo sinuungikon tuuk tудоike-ne kobanggapi napalangalan. Ukum agamadoo inapakonggon tongo polong nalubatan meeng komian mobatulunanggene Abalaham mo sinombuikon doi Mian Bisa napaladandian doi Abalaham. Ukum agamadoo malaekat-malaekat komo pelengene tukon mololo doi meeng kobanggapi. ²⁰Jadi, sio nadaano lua kotambuuno komian, sodo palaluu meeng komian pangantala. Bai Mian Bisa aki napalaluu pangantala, sabab yana susuungo tindokiiyo.

Ukum agama napelanan

²¹Oila doiya koalatio baikon ukum agama posasala tukon Mian Bisa nateteba? Tantu aki! Sabab kalu ukum agama bineekon tuuk mobeekon tuboan doi banggapi, maka kobanggapi moola pokindok tukon Mian Bisa mololoi ukum agama. ²²Bai doi Kitab Moliyous lalomo totulis baikon sasaibino kobanggapi daanomo doi lalim nakuasa. Tobikon doiya, mo bineekon tinetebaikono kona dasal mangangga doi Yesus Klistus bineekon doi yanila mo mangangga.

²³Akiyoon nalaate kotembono tuuk mangangga doi Klistus,

kita dinagai tuuno doi ukum agama; kita buno kinulung polong manganggaanoo inokitakonggon. ²⁴Tukon buno doiya, ukum agama teali buno padagai kita, polong Klistus lubat tuuk abali pokindokikene monondok tukon Mian Bisa sabab kita mangangga doi Klistus. ²⁵Diabudodoo, sabab laatemo kotembono banggapi moola mangangga doi Klistus, maka kita akimo koidan dinagai ukum agama.

²⁶Sabab komuyu mangangga doi Klistus Yesus, maka komuyu pomeenggon tukon yana; tukon tobikon doiya komuyu teali Mian Bisa napau-pau. ²⁷Komuyu sasaibino lapamo sinau paisu salani sabab Klistus sambuno, jadi komuyu lapamo mantalima doi butomuyu Klistus susuungo nandondoong. ²⁸Naiya langge nia akimo kai dinaanokon kopoulosalaan antala Yahudi miano tukon mian mobolikon Yahudi, antala ata tukon mian mobebas, antala mala-malane tukon boine. Utus sasaibino meeng sabab Klistus Yesus. ²⁹Kalu komuyu Klistus koono, maka komuyu daano batulunangene Abalaham. Tukon komuyu naikon mantalima oila ko Mian Bisa natinetebaikon.

4 ¹⁻²Bai palaluu yaku tegaskanggene: namalumbitan meeng komian pangalus daano mongula, ano komian mo dagaiyo tukon uluse kona kopontingan-kopontingan polong yana laate kotamano natantukanano koul. Yana binunokon pokakana buno meeng koata, mau kai kona kanaan yana kotumbuno doi sasaibino do buato. ³Bunomo koidan tukon kita: Daano malumbit akiyon natobos, kita kinubai ata doi loh-loh mo kuasaiyo nadunia nia. ⁴Bai doi oloyo mo tantu, Mian Bisa bintekene kona Pau doi dunia. Napaudo sinuung doi meeng koboine motubo doi ukum agama lalomo nakakuasaan. ⁵Tukon buno doiya yana sobiiyo komian badaang mo tubo doi bilit ukum agama nakakuasaan; sulano kita moola teali Mian Bisa napau-pau.

⁶Sabab komuyu daano Mian Bisa napau-pau, Mian Bisa sumboliiyo na Pau na Loh usok doi Utus noano lalomo tukon doi noangu, doiyamo Loh monggeleamon, "Tama, ya Tamangu." ⁷Jadi, komuyu bolikono ata, baimo pau. Tukon sabab komuyu Mian Bisa napau, maka Mian Bisa naikon beekene doikoo sasaibino kona sinadiakon tuuk napau-pau.

Paulus nabalasaakan doi Galatia mian-miano

⁸Looluk komuyu akipo tingoniiyo ko Mian Bisa, doiya ko-sababpo komuyu teali ata doi kuasa-kuasa mo pinookakanakon buno ilah, bai kona bisaan bolikon Mian Bisa. ⁹Bai diabudodoo komuyu tingoniiyomo ko Mian Bisa, kabai lobian komo bisa koidan, Mian Bisa tingoniiyo komuyu. Nah, bulaando komuyu yase abali koidan doi loh-loh dunia nia, mo muyuk tukon talalais? Bulaando komuyu yase kinubai ata koidan doi loh-lohdoo? ¹⁰Komuyu lamekene kooloyo-oloyo motantu, bituwon-bituwon motantu, taum-taum motantu. ¹¹Yaku molili, inai-inai daku pakadakan motuuk doi komuyu akiyo kona totuuk.

¹²Utus-utus! Yaku kabiyo tukon tutuu sulano komuyu teali buno yaku. Sabab yaku koidan lapamo teali buno komuyu. Komuyu aki pokubaiyo komeeng kolobo mo sala doi yaku. ¹³Komuyu tantu daano moneneeke oila mo tealikene yaku doi tumbeno babilitakene ko Bilita Monondokoo doikoo. Kosababpo doiyamo yaku masakit. ¹⁴Doi tembodoo komuyu aki pomisikit doi yaku, mau kai butonggu nandondoong buno palasobaan mo babasal doikoo. Mala komuyu talimayo yaku buno talimayo Mian Bisa namalaekat kabai buno mantalima Klistus Yesus susuungo. ¹⁵Komuyu monondok tuuno doi tembodoo. Bai diabudodoo, inaandomo kai do monondokanoo? Yaku toiyo baikon doi tembodoo komuyu mloyos motuake komatamu susuumuyu tuuk mobeekene doi yaku, kalu koiya moola kinubai. ¹⁶Oila komuyu diabudodoo lapamo anggape yaku buno musu, sabab yaku nyatakanggene komo kana doikoo?

¹⁷Mian badaang bailongoo tukon kokobukuan tuuno ungo-lliiyo komuyu, bai yanila namakisuut aki namonondok. Yanila tongo yase betele mupotaamian tukon kami, sulano komuyu loolainge yanila tukon kakabukuan tuuno. ¹⁸Takainomo monondok tukon kokobukuanan doi langge-langge mo monondok, asal sidutu buno doiya tukon inai tongo kalu yaku daano mopolaing-laing tukon komuyu. ¹⁹Daku pau-pau sinoyang! Yaku diabudodoo nia susa koidan sabab komuyu. Yaku susa buno meeng koboloki mosakisaa doi tembo namosuungan pau. Yaku naikon banggadudul susa, kalu Klistus ndondoongo akiyoon natangabos doi butomu! ²⁰Yaku poloon tuuno daano doi tangatanga komuyu diabudodoo, sulano yaku moola basilingan

doikoo tukon lalo bailong, sabab yaku akimo kutoiyo yase kubaiyo oila koidan tukon komuyu!

Hagal tukon Salah bunu sontoh

²¹Utus-utus mo yase tubo doi ukum-ukum agama nakakua-
saan, soba ndongoliyo yaku! Yaku naikon popitoikene doikoo
oila komo bisa totulis doi Kitab Ukum Musa lalomo. ²²Idoo
totulis baikon Abalaham daano kolua komian kona pau: Paudoo
meeng tinano daano meeng mian ata, tukon paudoo bailong
tinano daano meeng komian mo bebas. ²³Pau doi boine mo
teali ata suunge biasa sabab banggapi namongiasan. Bai pau
doi boine mo bebas, sinuung sabab Mian Bisa tetebaikenemo.
²⁴Naiya moola pinake bunu andean. Lua komian boinedoo
daano andean lua koteteba: komeeng kona luwean doi Bunggul
Sinai - doiyamo Hagal; kona pau-pau sinuung teali ata.
²⁵Jadi, Hagal doiyamo Bunggul Sinai, doi lipu Alab. Andean
yana kota Yelusalem tukon sasaibino kopodungolino diabudodoo
nia lapamo teali ata. ²⁶Bai Yelusalem doi sulugaadoo daano
Yelusalem mo bebas, tukon yanamo kotinanggita. ²⁷Sabab doi
Kitab Moliyous lalomo totulis,

“Labamo ikoo koboine komba, mo aki namosuung!

Potetedeso tukon pokokuweiso he ikoo mo aki idan
meneemi malalasan mosuungan!

Sabab boine nalangkai mo tinggale naikon malaat lobian
badaang kona pau,

maka baino doi boine mo tubo tukon nalangkai.”

²⁸Utus-utus! Komuyu susuungo daano Mian Bisa napau-pau
mo sinuung sabab Mian Bisa nateteba; komuyu pokakana bunu
Ishak. ²⁹Doiya kotembono pau mo sinuung loloiyo kobanggapi
namongiasan, lokis-lokise kopau nasinuungan sabab Mian Bisa
Na Loh namongiasan. Bunomo koidan budodoiya. ³⁰Bai oila
komo totulis doi Kitab Moliyous lalomo? Idoo totulis bunu
naiya: “Siikayo ata boinedoo polaing napau, sabab pau doi ata
boinedoo aki naikon teali mian moano kona haak polaing pau
doi boine mobebasoo.” ³¹Jadi, Utus-utus, kita nia mobilikon
pau-pau doi meeng koata boine; kita daano pau-pau doi boine
bebas.

Palataangene komu bebasan

5 Kita diabudodoo bebas, sabab Klistus lapamo bebaskangene kita! Sabab doiya palataangene komu bebasan, tukon inai moyase kinubai ata koidan.

²Neneeke, kalu komuyu kabiyo sinunat, doiya koalantino Klistus akiyo kona totuuk doikoo. Mobantile naiya daano yaku susuunggu, Paulus. ³Koi koidan yaku mebee poingotii doi mian mo kabiyo sinunat, baikon yana sio nalakukene sasaibino koukum agama! ⁴Kalu komuyu kakaate pokindok tukon Mian Bisa mololoi ukum agama, doiya koalantino mupotaamian tukon Klistus lapamo botol. Tukon bunu doiya komuyu tubo bolikon doi lingkungan Mian Bisa namaasi. ⁵Bai bunu kami, kami moinikene baikon tukon Mian Bisa Na Loh natulungano tukon naalasan kami namangangaan doi Klistus, Mian Bisa moolakene kami pokindok tukon yana. ⁶Sabab kita lapamo pomeenggon tukon Klistus Yesus, motuluti kabai aki natulutiyo kopalatulan sunat akimo nateali soal koidan. Komo palaluu tongo mangangaan doi Klistus, tukon doiya totong doi kita nda seangano komian bailong.

⁷Looluk komuyu baladuang tukon monondok! Diabudodoo bulaa komuyu moakimo pomolole koidan doi Mian Bisa namongiasan? Indee komo lapamo oluuliyo komuyu? ⁸Bisa mo lakukenedoo bolikon Mian Bisa mo lapamo uange komuyu! ⁹“Pangaani mo soisik naikon tuboimo doi sasaibino kona tempat,” mian mobantile. ¹⁰Mau kai nabuno doiya yaku daano manganga baikon komuyu aki naikon pomololoi pendilian bailong, sabab kita lapamo pomeenggon tukon Klistus. Tukon yaku manganga baikon mau ind ee komo tabule komu pikilan, naikon Mian Bisa ukume.

¹¹Kaliangano yaku, Utus-utus, bulaando yaku mobanggadudul minusu kalu yaku babotilangene baikon palatulan sunatoo palaluu? Kalu yaku babotilangene bunu doiya, maka daku babotilanganano kaliangano sempang Klistus aki nasumbetene kopalasoalan. ¹²Lobian komo monondok mian badaang mo nggabute komu pikilanoo banggadudulo motobuat banggadudul doi jemaat!

¹³Utus lapamo inuang tuuk teali mian mo bebas. Bai

inai mopakeyo komu bebasanoo tuuk banggadudul tuuno kubaiyo oila komo komuyu yase kubaiyo. Kobalino, komuyu sio poseang-seang tukon popoleleani. ¹⁴Sasaibino koukum agama tongusokon doi palentadoo mo meeng lalomo, "Siokai ikoo seseange kotulamu banggapi pokakana ikoo mosesange kobutomu susuumu." ¹⁵Bai kalu komuyu ponggima-nggimakon, neneeke, naikon komuyu polaing-laing manas.

Mian Bisa Na Loh naminooton tukon banggapi naminooton

¹⁶Daku makisuut buno naiya: Sobiiyomo ko Mian Bisa Na Loh nababayo komuyu tukon inaimo potubo loingiyo kobanggapi naminooton. ¹⁷Sabab kobanggapi naminooton aki napokokonoi tukon Mian Bisa Na Loh naminooton, tukon Mian Bisa Na Loh naminooton aki napokokonoi tukon banggapi naminooton. Lua-luadoo posasala, tobikon komuyu aki namoola kubaiyo oila komuyu pominooton. ¹⁸Bai kalu Mian Bisa Na Loh pimpine komuyu, maka komuyu akipo kinuasai doi ukum agama.

¹⁹Banggapi natubo minooton tokita doi nakokubai-kokubai lalomo mo balolowa, madikit, tukon aki namonondok; ²⁰doi nasosubaan pilogot lalomo tukon motoiyan guna-guna, pomusu-musu, poakate, possunoi, mosobit nggimal tukon butongo susuungo kona inutamakon; pooalaasan tukon posala-salakan, ²¹misikit konoano, mala-malangu, lame-lame, tukon bai-bailonggon. Yaku ingotiikene komuyu doi sasaibinodoo diabudodoo bunomo kai yaku ingotiikene komuyu loolukoo, baikon mian mo kubaiyo kolangge-langge mobuno doiya aki naikon nateali anggota Mian Bisa namian.

²²Kobalino, kalu mian badaang Mian Bisa Na Loh komo pimpine kona tokitaan doiyamo: Yanila poseang-seang, yanila tedes, yanila noano tanaang, yanila sabal tukon monondok konoano, yanila monondok tuuk doi mian bailong, yanila molole, ²³yanila ekependeo konoano tukon sidutu moola kuasaiyo kobutongo. Aki daano koukum agama mo lalange kolangge-langge mobuno doiya. ²⁴Mian badaang mo lapamo teali Klistus Yesus namian, mian badaangoo lapamo akateyo kona ndondoong banggapino tukon sasaibino kona pisuu tukon naminooton. ²⁵Mian Bisa Na Loh lapamo beekene doi kita

tuboan mo boolu; tobikon doiya yana koidan sio nakuasaiyo konda tuboan. ²⁶Kita aki namoola teali babanggaal, tukon kolosokitiyo konoa, tukon noa misikit meeng pokakana bailong.

Saling potombonii

6 Utus-utus! Kalu meeng-meeng komian linaat mokubai meeng kolalim, siokai komuyu mo tubo lolo Mian Bisa Na Loh, babayo mianoo abali doi loloon mo talakana. Bai komuyu sio lakukangene doiya tukon miyuk-miyuk tukon dagaiyo inai napolong komuyu susuungo tagoda koidan. ²Siokai komuyu po potomboniikene tanggunge komian bailong natanggungan, sulano tukon buno doiya komuyu tulutiyo Klistus napalenta. ³Kalu meeng komian aanggene kobutongo penting, banggokai aki, mianoo kokoliiyo kobutongo susuungo. ⁴Meeng-meeng komian sio napalesayo kobutongo susuungo oila kona kalakuan monondok kabai aki. Kalu monondok, yana moola lasayo banggaal doi langgedoo. Bai mau naakimo nabandikangene tukon mo kinubai mian bailong. ⁵Sabab memeeng komian sio natanggunge kona tanggung jawab susuungo.

⁶Mian mo mantalima otunggul Klistus, siokai naebese tukon nagulu sasaibino komo monondok mo daano doi yana.

⁷Inai motangakakon. Mian Bisa aki namoola minaenggon! Oila komo sinakakon doiyamo komo pinupui. ⁸Kalu mian masakakon tulutiyo totubonomo banggapi, yana naikon pupuiyo komatean doi natotubonomodoo. Bai kalu masakakon tulutiyo ko Mian Bisa Na Loh napimpinano, yana naikon pupuiyo kotuboan tuuno tukon posidutukon doi Mian Bisa Na Loh. ⁹Tobikon doiya, inai kita teali biyai kubaiyo kolangge-langge monondok; sabab kalu kita aki nda tade-tade kubaiyo langge-langgedoo daano koidan kita naikon pupuiyo kohasilo. ¹⁰Jadi, kalu daanoon kotodanan doi kita, siokai kita kubaiyo komo monondok doi sasaibino komian, utamano tuuno doi nda utus-utus mo meeng komangangaan.

Poingotii tukon popitoi

¹¹Palahatikangene mono-monondok sembeleng nia yaku mo tulise susuunggu tukon huluf mo babasal. ¹²Mian badaang mo yase inodotii tukon langge-langge duniawi, yanilamo mokakaate pakisaayo komuyu motulutiyo kopalatulan sunat. Bai yanila kubaiyo doiya tongo sulano yanila aki nailokis-lokis Yahudi

miano sabab sempang Klistus. ¹³Mian badaang mo loloiyo palatulan sunatoo aki namangapakonggon ukum agama. Bai yanila yase komuyu sinunat, sulano yanila moola banggaalkene baikon komuyu molole doi palatulanoo. ¹⁴Yaku aki kuyase tuuno mabanggaalkon oilano, kalu bolikon nda Temeneno Yesus Klistus mo lapamo mate sinempang. Sabab tobikon yana lapamo mate sinempang, maka dunia akiyono koidan kona alati doi yaku. Tukon doi dunia nia, yakudoo pokakana molapamo mate. ¹⁵Sinunat kabai aki nasinunat, doiya aki napenting. Komo penting doiyamo teali banggapi boolu. ¹⁶Buat mian badaang mo tubo tukon nandondoongoo, tukon buno koidan buat sasaibino Mian Bisa namian, yaku moinikene Mian Bisa naikon beekene komonondokan tukon namaasi.

¹⁷Kona tatuluusan inaimo meeng komianoo kubaiyo susa yaku koidan, sabab doi butonggu nia daano kona tanda-tanda baikon yaku pololaing Yesus.

¹⁸Kinatauwan nda Temeneno Yesus Klistus sidutu balakaatiyo Utus-utus. Amin.

Komai holomat,
Paulus

PAULUS NASULAT DOI JEMAAT EFESUS

PANGANTOKON

Paulus nasulat lalomo doi jemaat Efesus komo tulise otuuke ko Mian Bisa natetel sulano “Sasaibino kolangge, mau komo doi sulugaa mau komo doi dunia, teali pomeenggon doi Klistus moteali kapalano” (1:10). Naiya sulatia bunu meeng koidan kopobotiikon doi Mian Bisa namian sulano yanila natoiyu tuuno komaanano do teteloo babasal moluwedoi Mian Bisa sulano napomeenggene sasaibino kobanggapi mololoi Yesus Klistus.

Doi tumbeno taalikon nasulat Efesus nia linolukonggon bulaando dona pomeenggonanoo natealian. Sulano naalatikanggene do halloo bulaando ko Mian Bisa Tama molapamo lilike kona mian, bulaando ko Mian Bisa nabatokitaan doi Yesus Klistus, na Pau, ompuniyo tukon osodiiyo kona mian doi lalim, tukon bulaando do tetebadoo Mian Bisa momoola Mian Bisa Na Loh beekene. Doi koluanu taalikon, binotiikon doi mian mobasayo sulano yanila natubo pomonondokon sulano yanila napomeenggon bunu mian mangangga doi Klistus namoola teali.

Tuuk doi tudoikanano baikon ko Mian Bisa namian molapamo teali meeng sabab pomeenggono tukon Klistus, komo tulise mapake bula-bulaa koandean. Jemaat daano pokakana kobutonggita tukon Klistus teali kapalano, kai bunu meeng kobangunan kobatu paalaso doiyamo Klistus, kai bunu meeng koboloki tukon Klistus bunu nalangkai. Komo tulise tatalik konoano tuuno salataa neneeke ko Mian Bisa nalahmat mololo doi Klistus, sampe kona bantil-bantilan mo pakeyo doi nasulatia lalomo otudoikene baikon konoano pololokon tokumbe tukon palasaan syukuul tukon nggaalano ko Temeneno. Sasaibino kolangge pinikikon doi Klistus naseang, doi namatean, nabaompunian, namonondokan konoano tukon namoliyousan.

*Antoko**Pololukoni 1:1-2**Klistus tukon nakaleda 1:3-3:21**Kotuboan mo boolu bunu Salani miano 4:1-6:20**Potutupo 6:21-24*

1 Mian Bisa namian doi Efesus, mo molole doi Klistus Yesus!

²Yaku, Paulus, lasul Klistus Yesus doi Mian Bisa namongiasan, moinikene sulano ko Mian Bisa Tamanggita tukon Yesus Klistus beena balakaat tukon monondokan doi komuyu.

Balakaat lohani moluwedoi Klistus

³Ngginaal ko Mian Bisa, Temeneno Tamanggita Yesus Klistus!

Yana balakaatiyo kita tukon sasaibino kobalakaat lohani doi sulugaa lalomo, sabab kita pomeenggon tukon Klistus. ⁴Akiyoon nadunia nia natinealikon, Mian Bisa lapamo lilike kita lolo doi Klistus tukon komakisuuto sulano kita teali namian mo tangalaas tukon akiyo kona salaan doi salaano. ⁵Sabab Mian Bisa naseang, maka yana lapamo tantukene loolukon baikon lolo doi Yesus Klistus, yana naikon bingkate kita teali nalabuk-labuk susuungo. Tukon doiyamo kona iniyas kubaiyo. ⁶Ngginaal ko Mian Bisa mo babasal, sabab lolo doi na Pau sineang yana mamaasikene tuuno kita.

⁷Tobikon, Klistus namatean, Mian Bisa bebaskanggene kita, koalatio yana lapamo ompunio kita doi nda lalim-lalim. ⁸Yana kubaiyo doiya sabab seange tuuno kita, tukon do seango bineekon doi kita tukon moonoo pandoiyan maka pangalatian. ⁹Mololoi namongiasan susuungo, Mian Bisa bontiikene doi kita kona tetel laasiano; yana lapamo tataapene baikon dona teteloo naikon nainalapa lolo doi Klistus. ¹⁰Teteloo doiyamo sulano sasaibino kolangge, mau doi sulugaa mau doi dunia, teali pomeenggon tukon Klistus bunu kapalano. Tukon doiya langgedoo naikon Mian Bisa alapayo kalu laatemo kotembono.

¹¹Mian Bisa limange sasaibino kolangge lolo doi namongiasan tukon tataapene susuungo. Salataa doi tumbe yana lapamo lilike kita sabab yana yase sulano kita nateali namian sabab pomeenggon tukon Klistus. ¹²Tadukai kita, mo tumbe-tumbeno moini doi Klistus, nggaale ko Mian Bisa sabab nababasalan!

¹³Mau komuyu nalapamo teali Mian Bisa namian doi tembo komuyu molongol Mian Bisa nateteba, doiyamo Bilita Monondok mo beena kasalamatan doikoo. Komuyu mangangga doi Klistus Yesus, tobikon doiya ko Mian Bisa beena paloosan kona langge doikoo, doiyamo na Loh mo dondiikene. ¹⁴Lohdoo doiyamo kolaatano baikon kita naikon mantalima oila ko Mian Bisa mo lapamo dondiikene doi namian. Naiya beena manganggaan doi kita baikon ko Mian Bisa naikon sodiiyo kona mian. Ngginaal ko Mian Bisa sabab nababasalan!

Paulus nasambeang

¹⁵Tobikon doiya, salataa yaku lengele baikon komuyu manganggaamo doi Yesus, tukon komuyu seseangemo sasaibino ko Mian Bisa namian, ¹⁶yaku aki nabontol-bontol daku mopolonggonan kinatauwani doi Mian Bisa kaliangano komuyu. Sidutu yaku bantile kosambumu doi kusambeangan. ¹⁷Yaku kabiyo sulano ko Mian Bisa nda Temeneno Yesus Klistus, Tama mo babasal, nabeena Loh doi komuyu. Lohdoo tealikene komuyu pandoi, tukon naikon okitakene doi komuyu ko Mian Bisa tobikon komuyu tingoniiyo yana. ¹⁸Yaku kabiyo doi Mian Bisa sulano nabukayo kopoo pikilan nateali madialan; sulano komuyu pomangalatikene oila komo moola komuyu moinikene doi Mian Bisa mo uangemo komuyu. Koidan sulano komuyu potoiyo bulaando kona badaangan kobalakaat-balakaat mo monondok Mian Bisa mo sadiakene doi namian; ¹⁹tukon bulaando kona hebatan ko Mian Bisa moonoo tukon kuasa doi kita mo mangangga. Mian Bisa nakuasadoo pokakana bunoo kuasa mobolikon langge, ²⁰mo pakeyo salataa naotuboiyano koidan Klistus doi namatean tukon beena basambuan motatandak podungoli tukon Mian Bisa doi sulugaa.

²¹Klistus nabasambuan lobian tatandak tuuno doi sasaibino kopamalenta nabasambuan, sasaibino koponguasa, sasaibino

kokatua, sasaibino kotuan-tuan tukon mau indee komiano koidan komo lapamo binee sambu motatandak; mau mo tubo naiya loonu nia mau mo tubo doi lounu mo lubat. ²²Mian Bisa abese doi bilit sasaibino doi Klistus nakakuasaan, tukon beekene Klistus doi jemaat teali kapala doi sasaibino kolangge. ²³Jemaat doiyamo Klistus butongo, yana komo kindendeke mo kindendeke sasaibino kolangge doi yayaamo koidan.

Doi matean biyol doi tuboan

2 Loolukon komuyu mate secala lohani sabab komuyu daano kopoo lalim tukon komuyu aki poloingiyo ko Mian Bisa napalenta. ²Doiya kosinggato komuyu loloiyo kodunia nakabiasaan-kabiasaan; koalatio komuyu molole doi ibiliis nakuasa mobabasal doi dapang, doiyamo loh diabudodoo mo kuasaiyo komian badaang noano mo aki namolole doi Mian Bisa. ³Loolukon kita sasaibino pokakana tukon yanila; kita tubo mololoi banggapi nalenggang kita tukon kubaiyo oila komo pokokonoi kobutonggita tukon nda pikilan. Doiya kosinggato kita nia daano mian badaang mo kanakon Mian Bisa nakiniiti koidan, pokakana bunu mian bailong.

⁴Bai babasal tuuno ko Mian Bisa noano namonondokan! Yana bunomo doiya kona seangano kita, ⁵tobikon doiya kosinggato kita daano mate doi lohani sabab nda tumba-tumbakan, yana otuboiyo kita koidan polaing-laing tukon Klistus. Jadi, baimo Mian Bisa namonondokan konoano, yana salamatene komuyu. ⁶Sabab kita pomeenggon tukon Klistus Yesus, Mian Bisa otuboiyo kita koidan posinggat-singgat yana, sulano kita nda bapalenta koidan posinggat-singgat yana doi sulugaa lalomo. ⁷Mian Bisa kubaiyo bunu doiya sulano doi lounu naikon mo lubat, kobanggapi namoola kitayo bulaando ko Mian Bisa namaasi nababasalan. Mian Bisa okitakene luwedo noano namonondokan doi kita tukon lolo doi Klistus Yesus. ⁸⁻⁹Mian Bisa seange komuyu, doiyamo kosababpo yana salamatene komuyu sabab komuyu mangangga doi Yesus. Dopoo salamatannoo bolikon pousaha susuumuyu. Doiya daano Mian Bisa nakalunia. Jadi, akiyo komeeng komian mo moola babanggaalkene kobutongo doi langgedoo. ¹⁰Kita nia Mian Bisa komo tealikene, tukon lolo doi Klistus Yesus, Mian Bisa kabiyo

kita sulano nda kubaiyo kolangge-langge mo monondok mo lapamo sadiakene motuuk doi kita.

Meeng sabab Klistus

¹¹Utus-utus mo bolikon Yahudi miano! Poneneeke kopoo ndondoong doi loolukonoo: Komuyu binantil “mian moaki nabasunat”, doi Yahudi miano mo akuiyo kobutongo sinunat (komakisuuto mo lapamo malaat paloosan banggapi mo kubaiyo doi yanila butongo). ¹²Doiya kosinggatoo komuyu akipo pomeenggon tukon Klistus, komuyu daano mian molubat-lubaton mo aki natongusokon Mian Bisa namian ililik. Komuyu aki potongusokon doi Mian Bisa tukon namian mo kubaiyomo kona paladandian. Komuyu tubo doi dunia nia lalomo akiyo kopoo moinian tukon akiyo kopoo Mian Bisa. ¹³Bai budodoiya, sabab komuyu pomeenggono tukon Klistus Yesus, loolukonoo komuyu mododoon, lapamo linoolanikon doi Klistus namatean. ¹⁴Sabab Klistus susuungo yanamo komo podamekene kita. Yana pomeenggene ko Yahudi miano badaang tukon mian badaang mobolikon Yahudi teali meeng kobangsa. Mesel popitaso doi yanila, doiyamo pomusuan, lapamo Klistus manase tukon butongo susuungo nainakatean. ¹⁵Agama Yahudi naukum tukon palenta-palenta tukon atulan-atulanoo lapamo Klistus akiyenggene sulano do bangsadoo molua teali meeng kobangsa banggapi moboolu, mo pomeenggon tukon yana. Tukon doiya kokubaidoo Klistus daanokene kopodamean. ¹⁶Namateanoo doi kayung sempang, Klistus pomeenggono do bangsadoo molua, tukon podamekene yanila tukon Mian Bisa, tobikon akiyono do pomusuanoo. ¹⁷Doiyamo kosababpo Klistus lubat babilitakene ko Bilita Monondok kaliangano podameanoo doikoo; mau doi komuyu mobolikon Yahudi miano loolukon mo dodoon doi Mian Bisa, mau Yahudi miano mo pokolanikon tukon Mian Bisa. ¹⁸Tukon lolo doi Klistus, kita sasaibino – mau Yahudi miano mau mobolikon yahudi miano – doi Mian Bisa Na Loh mo meeng, moola koolaniyo ko Tama moinodotii.

¹⁹Tobikon doiya, komuyu koidan bolikono tongusokon mian molubat-lubaton kabai mian doi tonggulung. Komuyu budodoiya daanoon polaing-laing Mian Bisa namian. Komuyu teali Mian Bisa puli-pulino. ²⁰Komuyu kai kinokondong doi batudangan

bungkono lasul-lasul tukon nabi-nabi mo abese, tukon Klistus Yesus buno batu mo utama. ²¹Yanamo komo susune sasaibino do bangunanoo teali Mian Bisa Nabonua mo tangalaas tuuk doi Temeneno. ²²Sabab tuboan pomeenggon tukon Klistus, komuyu koidan daano mobinangun posinggat tukon mian badaang bailong teali meeng kobonua motuuk doi Mian Bisa; idoo Mian Bisa dungol tukon na Loh.

Paulus nalimang motuuk doi mian mobolikon Yahudi

3 Doiyamo kosababpo yaku, Paulus, tinalunggu tobikon Klistus Yesus motuuk kopontingan komuyu mo bolikon Yahudi. ²Tantu komuyu lapamo lengele baikon ko Mian Bisa, sabab namonondokan konoano, lapamo beekene doi yaku nalimangia motuuk doi pokopontingan. ³Mian Bisa bantile kona tetel lasiano tukon pailukene doi yaku. (Kaliangano langge nia lapamo kutulise doi babo tukon palus, ⁴tukon kalu komuyu basayo, komuyu naikon toiyo kolaasiano motuuk doi Klistus buno yaku motoiyomo.) ⁵Buunia laasiadoo aki nabinontiikon doi banggapi, bai budodoiya ko Mian Bisa Na Loh lapamo bontiikene doi lasul-lasul tukon nanabi-nabi. ⁶Laasiadoo doiyamo nia: Lolo doi Bilita Monondokoo, mian mobolikon Yahudi moola lasakangene ko Mian Bisa nabalakaat-balakaat loolukonoo mosinadiakon tolongo tuuk doi Yahudi miano. Mian badaang mobolikon Yahudi tealimo anggota doi butong mo pokakana, tukon tulut mantalima oila komo Mian Bisa dandikenemo lolo doi Klistus Yesus.

⁷Mian Bisa beena doi yaku kalunia – doiyamo limang – sulano babilitakene ko Bilita Monondokoo. Yaku talimayo kaluniadoo luwedei Mian Bisa nakuasa mo balimang doi butonggu. ⁸Doi sasaibino ko Mian Bisa namian, yakumo komo kulokis tuuno. Bai ko Mian Bisa beekene doi yaku kalunia nia: limang babilitakanano doi mian badaang mobolikon Yahudi Bilita Monondok kaliangano Klistus nakaasaan mo akiyo kona kabusan; ⁹tukon koidan sulano nalolo doi yaku sasaibino komian toiyo bulaando ko Mian Bisa, Motealikene nadunia nia, kubaiyo kona tetel salataa doi loolukonoo ilaasiakon doi dunia. ¹⁰Ko Mian Bisa namakisuut doiyamo sulano budodoiya, lolo doi jemaat, sasaibino komo mataani kakuasaan doi dapang

toiyo ko Mian Bisa napandoiyan tukon sasaibino kolangge kaliangano. ¹¹Mian Bisa kubaiyo doiya pokokonoi tukon natetel mo posidutukon, mo kinubai tukon lolo doi Klistus Yesus nda Temeneno. ¹²Tukon mangangga doi Klistus tukon sabal pomeenggon doi yana, kita binee todanan sulano nda koolaniyo ko Mian Bisa tukon totubo komanganggaan. ¹³Tobikon doiya: inai matakut oila kolobo kaliangano yaku mo toupiyo tobikon komuyu, sabab sasaibino doiya tuuk doi pomonondokan.

Klistus naseang

¹⁴Tobikon doiyamo yaku sosuba doi Tama salaano. ¹⁵Doi yanamo meeng-meeng kopuli doi sulugaa tukon doi buta sakean mantalima lenggang mo tangalaas. ¹⁶Yaku sambeang boliisi ko Mian Bisa mo babasal napokonoi sulano keenggele konoamu tukon na Loh. ¹⁷Boliisi sabab komuyu mangangga doi Klistus, Klistus dungol doi noamu lalomo, tukon komu tuboan nakinoonggol tukon kinuasai poseangan. ¹⁸Yaku sambeang boliisi napolaing-laing sasaibino ko Mian Bisa namian, komuyu moola laate bulaando kona loasan tukon nabulusanan tukon naateanan Klistus naseang, ¹⁹kalu tolongo banggapi naakal aki namoola inalati doi naateanan tuuno. Boliisi komuyu potingoniiyo Klistus naseangoo, tobikon komuyu moonoo tukon Mian Bisa napelibadi mo talakana.

²⁰Tukon Mian Bisa nakuasa mo molole balimang doi butonggita lalomo, Mian Bisa moola kubaiyo lobian odoon kona badaangan doi oila komo moola kita kabiyo kai pikikene. ²¹Siokai ko Mian Bisa nda kabasale doi jemaat lalomo polong doi nda tulunan, lolo doi Klistus Yesus. Nggaaale Mian Bisa sidutu-posidutukon! Amin.

Pomeenggonan butong

4 Doiyamo kosababpo yaku - meeng komian motinalunggu, mo tinaan tobikon leleaniyo ko Temeneno - kabiyo tuuno doi komuyu: potubo pokokonoikene tukon polenggang bunoo mian mo lapamo Mian Bisa uange. ²Siokai komuyu sidutu poekependeyo konoamuyu, pomantalamuyuk, tukon sabal. Otudoikene komu seang tukon tomboniiyo meeng tukon bailong. ³Kakaate tutuuno sulano tubo tukon dame sulano

pomeenggonan Mian Bisa Na Loh mo tealikene tataap topiala. ⁴Tolongo daano meeng kobutong, tukon meeng ko Loh. Bunomo lakon koidan komuyu inuang tuuk meeng komoinian mo pokakana. ⁵Tolongo daano meeng ko Temeneno, meeng komangangaan, meeng kobasauwan paisu salani, ⁶tukon meeng ko Mian Bisa mo teali Tama sasaibino komian. Yanamo ko Temeneno sasaibino kodunia antoko, mo balimang lolo doi sasaibino, tukon balakuasa doi lalomo sasaibino.

⁷Kita suwe-suwele mantalima meeng kosabeat lolo oila Klistus nabineekon. ⁸Doi Kitab Moliyous lalomo totulis,

“Sambuno yana liba doi lipu mo tatandak,
yana mababa badaang komian motinaan;
tukon yana mebee sabeat-sabeat doianggapi.”

⁹Nah, kalu binantil, “yana liba” koalantino yana tumbe-tumbeno lapamo obulus polong doi lipu napende-pendean tuuno doi buta sakean nia. ¹⁰Tukon yana mo lapamo obulus yanamo koidan komo liba polong doi lipu mo lobian dodoon kona tatandakan doi sasaibino kotimbu tobikon sasaibino kodunia antoko tongusokon tukon nadaanoan. ¹¹Yana mo “momebee sabeat-sabeat doianggapi”; kosongobos biningkat teali lasul, kobailong teali nabi; kobailong koidan teali pangampakonggon Bilita Monondokoo, tukon kobailong koidan biningkat teali gulu-gulu tukon popiala jemaat. ¹²Naiya kinubai sulano ko Mian Bisa namian ilengkapi tutuuno sulano namoola leleaniyo ko Temeneno tukon nabangune ko Klistus butongo. ¹³Tukon buno doiya kita sasaibino teali meeng doi mangangaan mo pokakana kaliangano Mian Bisa Napau. Tukon kita tealimo mian badaang mo babasalo pololokon malumbit pololokon sosuungi kona talakanaan buno Klistus. ¹⁴Maka kita akimo nda buno labuk-labuk koidan mo doombaa-doombulo tukon takaikanggi doombala doisumai doi solok lupa-lupa kootunggul doi mian badaang mo bakokolii. Yanila atapayo komian tukon yanila napandoiyan bakokolii. ¹⁵Aki! Kobalino kita sio nda bantile kolangge mo bisa tukon noa momoono seang, tobikon doi sasaibino kolangge kita pololokon malumbit pololokon teali talakana buno Klistus, mo teali kapalaiyo kita. ¹⁶Doi napimpinano kita, sasaibino koanggota doi butongoo tosusun monondok, tukon koidan pinotaamikon kololosuano meeng-

meeng. Tukon kalu meeng-meeng anggotadoo balimang buno doiya, maka sasaibino butongoo naikon tobolii teali tabokon tukon bukuan mololoi seang.

Tubeoan mo boolu doi Klistus lalomo

¹⁷Tobikon doiya tongo Temeneno sambuno, naiyamo komo naikon yaku mo bantile tukon tegaase: inaimo potubo koidan buno mian badaang mo aki natingoniiyo ko Mian Bisa, tukon pikikene komo akiyo. ¹⁸Yanila napikilan kalipookano. Yanila aki natingoniiyo kotuboan Mian Bisa mo beekene, sabab yanila tutuu akiyo kona potoi oioila kaliangano Mian Bisa. Yanila buno doiya, sabab motikas konoano. ¹⁹Yanila akiyono konoano momammaa koidan tobikon yanila loloiyomo sasaibino konoanoila napisuu, tukon tubo balolowa konoanoila nainiyas.

²⁰Bai Klistus Yesus komuyu tingoniiyo bolikon buno doiya! ²¹Komuyu lapamo lengele kaliangano yana! Tukon buno kona pololaing-pololaing, komuyu lapamo inotunggul koidan kaliangano ko Mian Bisa nasipat-sipat mo daano doi yana! ²²Tobikon doiya potinggale kobanggapi momalumbito tukon cala tubeoan looluk mo minanas doi namongiasan mo atapayo. ²³Siokai konoamu tukon komu pikilan nakiniboolu sasaibino. ²⁴Siokai komuyu potubo buno banggapi boolu mo tinealikon buno Mian Bisa natuboan; doiyamo tukon lenggang mo talakana, mloyos tukon moliyous.

²⁵Tobikon doiya Utus-utus sasaibino, inaimo pokala-kala. Pokubaiyo doi namoloyosan meeng tukon bailong, sabab kita sasaibino daano singgat-singgat Klistus butongo. ²⁶Kalu komuyu nggimal, inai pobatadikene nggimalanoo tealikene komuyu baladosa. Inai ponggimal polong meeng kooloyo, ²⁷sulano ko Ibiliis aki namalaat todanan. ²⁸Mian mo biasa pondikuk sio natade mpondikuk. Kobalino yana sio nabalimang sulano namalaat tambo tukon mloyos tukon moola tulungiyo komian mo kakulangan. ²⁹Kalu komuyu basilingan, inai popakeyo kobantilan mo manggilit. Tolongo popakeyo kobantil-bantilan pokindok tukon mebee tulungan doi mian bailong. Bantil-bantilan mobuno doiya naikon lubatene komonondokan doi mian badaang mo lengele. ³⁰Inai mosusakene ko Mian

Bisa Na Loh noano. Komuyu lapamo binee tanda tukon Loh, teali Mian Bisa langge. Lohdoo koidan buno meeng kojamanan baikon Oloyo Tongosodiiian naikon lubat doikoo. ³¹Poalapuse sasaibino konoamuyu namasakitan, abos noa tukon nggimal. Inaimo ponggele-nggeleamon tukon pomasa-masangol. Inai koidan nadaano konoamuyu mosikit kabai palasaan bailong mopokakana tukon misikitan. ³²Kobalino siokai komuyu namonondok konoamuyu tukon poposeang meeng tukon bailong, tukon sio popoompuni buno Mian Bisa koidan ompuniyo komuyu lolo,doi Klistus.

Tubean doi madialan lalomo

5 Komuyu daano Mian Bisa nalabuk-labuk mo sineang, sabab doiya komuyu sio pokakaate mololoiyo ko Mian Bisa. ²Komu tubean sio nadaano koseang, buno Klistus seseange kita. Yana salakanggene kobutongo tuuk doi kita, buno meeng kososubakon mo babangi tukon mosanaanggene ko Mian Bisa noano.

³Komuyu daano Mian Bisa namian. Sabab doiya, kokokubai-kokubai mo lokis tukon mo aki napokokonoi, kabai buno bati-batinggai aki namoola daano doi komuyu tanga-tangano. Inai komian bailong daano kona bataanian sulano nabantile baikon komuyu kubaiyo kolangge-langge buno doiya. ⁴Aki koidan namoola ikoo mobantile kobantil-bantilan mo manggilit, mo lokis tukon mo aki namomoola. Kobalino siokai komuyu bakinatauwan doi Mian Bisa. ⁵Timbikene mono-monondok: mian mo lokis kona lenggang, kabai aki napokokonoi, kabai bati-batinggai (kokubai mobuno doiya pokakana koidan tukon mangangaan doi bapilogotan), mianoo aki namoola teali mian Klistus tukon Mian Bisa mopalentayo.

⁶Inai komuyu potangakakon doi salita-salita mo akiyo kotakoso. Sabab langge-langge nia komo lubatene ko Mian Bisa nanggimalan doi mian-mian mo aki naloingiyo doi yana. ⁷Jadi, inaimo po pomeenggon koidan tukon mian-mianoo mobuno doiya. ⁸Komuyu susuungo loolukonoo daano doi kalipookan lalomo. Budodoiyo komuyu lapamo teali Temeneno namian, jadi komuyu daanomo doi madialan lalomo. Tobikon doiya komuyu sio potubo doi madialan lalomo. ⁹Sabab luwedo

madialan doiyamo kona sumbotan sasaibino kokokubai mo monondok, adil tukon moliyous doi Mian Bisa napambaleng. ¹⁰Pokakaate motingoniyo oila komo sanaangene ko Temeneno noano. ¹¹Inai pokubaiyo kokokubai-kokubai mo akiyo kotakoso bunu mian-mian mo tubo doi kalipookan nakinubai. Kobalino, siokai komuyu poakiyengene kolangge mobuno doiya. (¹²Sabab langge-langge yanila mo kubaiyo tosookonoo, tuuk doi nabinisalakonan lapamo minamaakon.) ¹³Sasaibino kolangge mo inakiyonggon doi madialan lalomo, naikon tokita tukon tontong. ¹⁴Sabab sasaibino komo moola kinita tukon tontong, doiya madialang. Doiyamo kosababpo mobinantil,

“Banguno, eh ikoo mo moolo,
tukon tubo doi matean!

Klistus montootilang doikoo.”

¹⁵Tobikon doiya, potimbikene mono-monondok komu tuboan. Inai motubo bunu mian mobonggu; potubo bunu mian badaang mopandoi. ¹⁶Gunakangene mono-monondok kotodanan mo daano doikoo, sabab doi lounu nia daano lounu mo lokis. ¹⁷Inai mobonggu, bai ondosuuke oila ko Temeneno namongiasan.

¹⁸Inai komuyu pomalangukene koanggul, sabab doiya naikon kulokisene komuyu. Kobalino, siokai komuyu Mian Bisa Na Loh komo kuasaiyo. ¹⁹Popakeyo kobantil-bantilan doi mazmul mananian nggaa-nggaale tukon lagu lohani, doi mubasa-basalitaan lalomo. Siokai komuyu tukon noamuyu tedes mananikene konggangaalano ko Temeneno. ²⁰Sidutu tukon kaliangano oilamo koidan, siokai komuyu pobakinatauan doi Mian Bisa Tama, doi Yesus Klistus sambuno nda Temeneno.

Langkai tukon boloki

²¹Tuuk odotiiyano Klistus, siokai komuyu popoodotii meeng tukon bailong.

²²Boloki, odotiiyo kona langkai, pokakana doi Temeneno. ²³Sabab kolangkai yana teali kapala doi boloki, bunu Klistus teali kapala doi jemaat tukon yanamo susuungo koidan ko Tomundo Pasalamat doi jemaat mo teali butongo. ²⁴Bunomo pokakana koidan jemaat odotiiyo ko Klistus, bunomo lakon doi sasaibino kolangge koboloki sio naodotiiyo kona langkai.

²⁵Langkai seange komu boloki, pokakana Klistus seange kojemaat tukon salakanggene kobutongo motuuk doi jemaatoo. ²⁶Klistus kubaiyo doiya sulano yana namoola kumesiyo do jemaatoo tukon naotunggul tukon lolo doi paisu basauwan, sulano doibundu yana moola salakanggene doi Mian Bisa. ²⁷Tukon buno doiya Klistus kubaiyo jemaatoo kokondong tukon babasal tukon bilisii doi salaano, akiyo kona salaan kai oila kosala bailong. ²⁸Bunomo lakon koidan kolangkai sio naseange kona boloki pokakana yana seseange kobutongo susuungo. Mian mo seseange konaboloki koalantino yana seseange kobutongo susuungo. (²⁹Akiyo komeeng komian mo misikitene kobutongo susuungo. Kobalino, yana pialayo tukon dagaiyo buno Klistus koidan pialayo kona jemaat. ³⁰Kita toiyo doiya, sabab kita daano anggota-anggota doi Klistus butongo.) ³¹Doi Kitab Moliyous lalomo totulis, "Sabab doiya meeng komala-malane naikon otinggale kotamano-tinano tuuk pomeenggon tukon naboloki, tukon luailadoo teali meeng." ³²Ayatoo mobinantil daano koalantino mo atean. Tukon yaku taamikene doiya doi napotaamian ko Klistus tukon jemaat. ³³Doi ayatoo motabantil daano kona potaamian koidan tukon komuyu: Siokai memeeng kolangkai seseange kona boloki pokakana yana moseange kobutongo susuungo tukon siokai memeeng koboloki kakaate tuuk odotiiyano kona langkai.

Labuk-labuk tukon tamano tinano

6 Labuk-labuk! Buno pololaing Klistus, poloingiyo komu olang tua sabab doiyamo komo moola kinubai. ²"Odotiiyo kotamamu tukon tinamu" doiya daano meeng kopalenta tumbeno doi Mian Bisa tukon dinondiikon, ³doiyamo: "Sulano ikoo mumonondok tukon nabulusan komu umul doi dunia nia".

⁴Utus-utus mo teali tama! Inai pobulaandekene kopo labuk-labuk buno doiya tobikon yanila teali nggimal. Kobalino, popialayo yanila tukon atulan tukon Temeneno naotunggul.

Ata tukon natuan

⁵Utus-utus mo teali ata! Loingiyo komu tuan napalenta doi dunia nia. Kubaiyo doiya tukon palasaan moodotiiyo tukon

molole tukon koidan bisa-bisa buno komuyu kubaiyo doi Klistus susuungo. ⁶Inai pobabunokon doiya tongo doi tempo komuyu daano modinagai, tolongo sulano pomalaat panggaal doi banggapi. Bai siokai komuyu pokubaiyo babunokon Klistus naata mo daano loloiyo ko Mian Bisa namongiasan tukon tootubo konoano. ⁷Balimangan komuyu mo daano limange bunomo do atadoo, siokai komuyu polimange tukon noa tedesan naadukon buno Temeneno kopo lineleani, tukon aki nabaino banggapi. ⁸Poneneeke baikon memeeng komian, mau ata mau kai mian mobebas, naikon mantalima posoboli doi Temeneno motuuk doi langge-langge nakinubai mo monondok.

⁹Utus-utus mo teali tuan! Siokai komuyu pobabunokon buno doiya doi poata. Inaimo pokubaiyo potokuti-potokuti. Neneeke komuyu tukon domu ata-atadoo, sasaibino daano komeeng kona balainggonan, doiyamo Temeneno doi sulugaa. Yana aki nalilike komian tambongo.

Sabemo ko Mian Bisa nasanjata

¹⁰Kona pupusan, siokai komuyu poteali bukuan tukon bukuanan komuyu mo laate doi Temeneno nakuasa, sabab komuyu pomeenggono tukon yana. ¹¹Popakeyo sasaibino kopo pakakas sinadia polobosian Mian Bisa mo beekene doikoo, sulano komuyu moola bataanggon lawane ko Ibiliis nakuasa. ¹²Sabab kita balajuang bolikon tolongo lawane kobanggapi, bai lawane sasaibino kosetan-setan nabukuanan mo kuasaiyomo nalounu nia mo lokis. Kita lawane ibiliis nabukuanan mo kuasaiyo kodapang. ¹³Tobikon doiya, diabudodoo, popakeyo sasaibino komo kadadiamo ko Mian Bisa napolobosi, sulano doi oloyo mo lokis komuyu moola lawane komusu namolobosian. Tukon sulano kalu komuyu lapamo balajuang polong pupus, komuyu daano motambongan tuuno.

¹⁴Siokai komuyu pobasadia momeenggon. Popakeyo komololean doi Mian Bisa buno poboot oako, tukon komoliosan buno mubokukum besi. ¹⁵Sio komololean natuuk doi babilitakanano ko Bilita Monondok mo babayo komonondokan teali musapatu. ¹⁶Samba-samba kotembo pakeyo komu manganggaan doi Temeneno teali mupangalin; tukon manganggaanoo komuyu

moola posoiyo kopana matano modaano koaung moluwedoi ibiliis. ¹⁷Poalayo kasalamatanoo bunokene songko besi, tukon Mian Bisa nabantilan bunu sabel moluwedoi Mian Bisa Na Loh. ¹⁸Kubaiyo sasaibino doiya loolainge tukon sambeang sulano mumangkabi potombonii doi Mian Bisa. Doi memeeng kotodanan, posambeang bunomo lakon Mian Bisa Na Loh nalolaingano komuyu. Siokai komuyu sidutu badagai tukon inai pokala. Posambeang sidutu motuuk doi Mian Bisa namian. ¹⁹Tukon posambeang motuuk doi yaku koidan, sulano doi tembo kubasinganan, Mian Bisa beena yaku bantil-bantilan mo kana. Tukon sulano yaku balani moola basilingangene kolaasiano Bilita Monondokoo. ²⁰Sabab Bilita Monondok doiyamo, yaku teali meeng komian mobabasal, tukon budodoiya daano doi talunggu lalomo. Posambeang sulano yaku balani basilingangene kaliangano Bilita Monondokoo, bunu bulaando yaku sio kubantile.

Teteba napupusan

²¹Tikhikus, utusonggita tukon peleleani mo molole doi Temeneno nalimang lalomo, naikon pailukene doikoo sasaibino kolobo kaliangano doi yaku, sulano komuyu toiyo daku tuboan, tukon daku limang. ²²Doiyamo kosababpo yaku sumboliiyo yana doikoo sulano napailukene komai tuboan doikoo sasaibino, sulano naekeengele konoamu.

²³Boliisi ko Mian Bisa Tama, tukon Temeneno Yesus Klistus natealikene sasaibino kojemaat sulano napomeenggon tukon poseang-seang tukon tataap mangangga doi Klistus. ²⁴Boliisi ko Mian Bisa nabalakaatiyo Utus sasaibino mo seange konda Temeneno Yesus Klistus tukon seang mo aki namoola poso.

Komai holomat,
Paulus

PAULUS NASULAT DOI JEMAAT FILIPI

PANGANTOKON

Jemaat doi Filipi daano jemaat tumbeno Paulus mo kekendenge doi Elopa. Filipi talaat doi Makedonia, meeng koplovinsi doi batomundoan Loma. Paulus nasulat doi jemaat Filipi nia tinulis salataa Paulus daano doi talunggu. Konoano doiya singgat manasal sabab daano kopototooli Salani miano mo nggimoliyo yana. Koidan doi jemaat Filipidoo lalomo daano komian mongotunggul otunggul-otunggul mo sala. Mau nabuno doiya Paulus nasulatia kona lalo tedes tukon moinikene tuuno. Oila kosababpo bunu doiya? Akiyo kobailong tongo sabab Paulus mangangga tuuno doi Klistus.

Paulus tulise naiya sulatia sabab tumbe-tumbeno yana yase mobakinatauan doi jemaat Filipi doi napoo sabeatoo mo lapamo talimayo doi yaniladoo salataa yana daano doi susaan lalomo. Tukon doi todanan nia lalomo naikon yana yase mebee otunggul doi yanila sulano napai balani tukon sabal mosalaangene kosusaan lalomo. Yana kabiyo tuuno sulano yanila nakependeyo konoanoila bunu Yesus, tukon aki nakinuasai doi palasaan basombong tukon lolukene kobutongo susuungo. Yana ingotiikene yanila baikon tongo Mian Bisa namasi tolong, Mian Bisa kubaiyo yanila pomeenggon tukon Klistus sabab yanila mangangga doi yana, bolikon sabab yanila molole moampakonggene koagama loloono mo tinantukono doi agama Yahudi atulano. Bobus koidan Paulus tulise baikon kotedesan tukon namonondokan Mian Bisa mo beekene doi mian badaang mo tubo pomeenggon tukon Klistus.

Sulatia nasangalaasanan doiyamo kona otuukano doi tedesan, namoongolan konoanggita, tukon nasabalan ko Salani miano napalataangganano komaanggaan doi Klistus tukon ompokoni-iyano kotuboan lalomo bunu Salani miano. Sulatia tudoikene koidan bulaando Paulus naseangano doi jemaat Filipidoo.

*Antoko**Pololukoni 1:1-11**Paulus nanondoong susuungo 1:12-26**Salani miano natuboan 1:27-2:18**Timotius tukon Epafloditus natetel 2:19-30**Poingotii musu-musu doi tonggulung tukon
doi lalom 3:1-4:9**Paulus tukon tula-tulano doi Filipi 4:10-20**Potutupo 4:21-23*

1 Utus-utus Mian Bisa namian sasaibino mo dungol doi Filipi, tukon mo lapamo pomeenggon tukon Klistus Yesus. Koidan Utus-utus tua-tua tukon potombonii jemaat!

Yaku, Paulus, polong Timotius Klistus Yesus napololaing-pololaing, ²moinikene kinatauan Mian Bisa Tamanggita tukon Temeneno Yesus Klistus momebee balakaat tukon namonondokan doi komuyu.

Paulus sambeang tuuk jemaat

³Sidutu yaku neneeke doi komuyu, yaku mengucap kinatauan doi Mian Bisa. ⁴Tukon sidutu yaku sambeangene Utus sasaibino, yaku sambeang tukon noa sanaang. ⁵Yaku bakinatauan doi Mian Bisa sabab tambuun oloyo tumbeno polong diabudodoo, komuyu lapamo motombonii yaku mosa-bukene Bilita Monondok doi Mian Bisa. ⁶Mian Bisa susuungo mo tambuune balimangan mo monondokoo doikoo, tukon yaku anggayo yana naikon banggidukene do balimanganoo polong lapa doi oloyo Yesus Klistus nalubatan koidan. ⁷Bisamo kai doi natampat yaku daano kopalasaan buno doiya doi komuyu, sabab Utus sasaibino sidutu loolani doi noanggu. Koidan sabab komuyu tulut mantalima polaing-laing yaku, namonondokan Mian Bisa mo beekene doi yaku; mau diabudodoo nia yaku modaano doi talunggu lalomo mau doi tembo yaku modaano doi tonggulung tuuk mobelayo tukon mopalataangene Bilita Monondokoo. ⁸Mian Bisa toiyo baikon yaku tutuu poloongene



Kota Filipi (1:1)

tuuno doikoo tukon palasaan poseangan monondok doi Klistus Yesus susuungo.

⁹Naiyamo daku sambeang motuuk doi komuyu: boliisi komuyu pololokon moseange ko Mian Bisa tukon tulando tukon tuluus tosuungi motoiyan mo bisa tukon otunggul pinandoikon. ¹⁰Tukon buno doiya komuyu toiyo lilike oila komo monondok, tukon mutuboan naikon bilisii doi totulai kabai ilait oila koidan doi Klistus naoloyo abalian lubat. ¹¹Mutuboan naikon lobian tukon kokubai mo tutuu mau mo tongo malaat kohasilo doi Yesus Klistus susuungo; maka Mian Bisa naikon kinabasal tukon nggina-ngginaal.

Tubo tuuk Klistus

¹²Yaku yase komuyu potoiyo baikon kolangge-langge mo lapamo teali doi yaku tobikon tealikene lobian badaang komian momolongol tukon mangangga naikon Bilita Monondokoo. ¹³Kona akibat sasaibino kopadagai batomundoan tukon mian-mian bailong doi kota nia toiyo baikon yaku tinalunggu sabab yaku meleleani Klistus. ¹⁴Tukon matalungguan yaku lapamo tealikene komo badaang doi mian-mian Salani doi kota nia teali lobian mangangga koidan naikon doi Temeneno, tobikon yanila

pololokon balani babotilangene ko Mian Bisa nateteba tukon aki namata-matakut.

¹⁵Bisa doiya daano kobubulaa doi antala yanila mo babotilangene Klistus sabab masakit konoano tukon yase ponggeleki bai kobailonggon babotilangene Klistus sabab daano kona makisuut mo monondok. ¹⁶Mian badaang nia mokubaiyo sabab yanila seseange ko Mian Bisa tukon yaku, sabab yanila toiyo baikon Mian Bisa lapamo beena limang yaku sulano tudoikene baikon Bilita Monondokoo bisa. ¹⁷Bai mian bailong babotilangene Klistus tukon makisuut mo aki namonondok; yanila babotilangene tuuk kopontingan susuungo. Tukon doiya yanila moinikene yaku moola kubaiyo susa lobian doi talunggu lalomo.

¹⁸Bai aki nabulaa! Sabab mau nabulaandokon koidan, mau doiya kinubai tukon makisuut mo monondok mau kai tukon makisuut mo sala, toh Klistus binabotilanggon kai; jadi yaku sanaang. Tukon yaku naikon tataap malasakan buno doiya, ¹⁹sabab yaku toiyo baikon tukon musambeang-sambeang luwedo Yesus Klistus Na Loh, yaku naikon sinodiimo. ²⁰Komo yaku yase tuuno tukon moinikene doiyamo sulano inai daku balimangan aki nateali. Kona kabalikan yaku moinikene sulano samba kotembo, utama tuuno diabudodoo, yaku moola batambonggon balani tobikon tukon sasaibino daku basipatonan – mau yaku tubo kabai yaku mate – Klistus kinabasal. ²¹Sabab buno yaku, daku tuboan tolongo tuuk doi Klistus! Tukon mate koalatio utung. ²²Bai kalu tukon tuboan doi dunia nia, yaku moola kubaiyo kolimang mo lobian ano kona totuuk, maka aki kutoiyo inaando komo sio yaku lilike. ²³Yaku binubut doi lua kopihak. Yaku yase tuuno tinggale nadunia nia sulano ampakon dungol tukon Klistus, sabab doiyamo komo monondok tuuno; ²⁴bai, tuuk mukopontingan, daano lobian monondok kalu yaku tataap dungol doi dunia. ²⁵Yaku mangangga naikon langgedoo. Doiya kosababpo yaku toiyo yaku naikon tataap dungol tukon Utus sasaibino, sulano moola tulunge komuyu teali pololokon bukuan tukon pololokon sanaang doi manganggaan lalomo doi Temeneno. ²⁶Sabab doiya, kalu yaku sio abali doikoo, komuyu mo lapamo pomeenggon tukon Klistus Yesus naikon motooli lobian badaang koidan koalasan tuuk lasayo tobingkat kobutonggu.

²⁷Nah, mo ponting diabudodoo doiyamo baikon komuyu tubo

pokokonoi tukon oila komo pinalaluu doi Bilita Monondok tentang Klistusoo. Tukon bunu doiya, bulaa yaku moola posuung tukon ikoo kabai aki, yaku naikon molongol pomeenggonan tukon baladuang polaing-laing tuuk tongo meeng kona makisuut tukon meeng kona minooton; doiyamo tuuk mangangaan mo konoiyo tukon Bilita Monondok doi Mian Bisa. ²⁸Siokai komuyu sidutu balani; inai matakut doi pomusumuwan. Tukon bunu doiya komuyu tudoikene baikon yanila tantu naikon ilunggui, tukon komuyu naikon manaang, sabab Mian Bisa susuungo komo beena manaang doikoo. ²⁹Sabab Mian Bisa lapamo beena namonondokan doikoo bolikon tongo tuuk manganga doi Klistus, bai koidan tuuk sakisaa tongo Klistus. ³⁰Diabudodoo komuyu koidan tulut tukon yaku doi balajuangan mo pokakana; doiyamo komuyu daano mo kitayo yaku mobalajuangene looluk, tukon mo daano yaku tataap balajuangene polong diabudodoo, bunu komuyu diabudodoo lapamo molongol.

Nabatalalaisonan tukon nakinabasalan Klistus

2 Komuyu bukuan, sabab komuyu pomeenggon tukon Klistus. Tukon komuyu tohibul sabab Klistus seange ikoo! Komuyu Mian Bisa Na Loh babayo, tukon komuyu koidan poseang-seang tukon mangabos poseangan meeng tukon bailong. ²Nah, soba komuyu tutuu mokindendeke konoanggu tukon langge-langge nia: Potubo pomeenggon noa tukon seang mo pokana, tukon pikilan mo pokana tukon mopinakituu mo pokana. ³Inai mokubaiyo komeeng kolobo sabab sinusunggon kopontingan butomu susuumu, kabai tuuk basombongene kobutomu. Kona kabalikan siokai komuyu suwe-suwele tukon noa monondok anggape komian bailong lobian monondok doi butongo susuungo. ⁴Potingoniiyo komian bailong nakopontingan; inai tongo kopontingan butomu susuumu. ⁵Siokai komuyu noano nabuno Yesus Klistus:

⁶ Doi uuno yana pokakana tukon Mian Bisa,
 bai yana aki nalasakangene baikon kona ndondoong
 lohanidoo sio napinalataanggon.

⁷ Kona kabalikan, yana sodiiyo sasaibino
 maka teali pokakana bunu meeng komian ata.

- Yana teali buno banggapi,
tukon tokita tubo buno banggapi.
- ⁸ Yana batalalaison butong, tukon tubo molole doi Mian Bisa polong mate -
doiyamo mate sinempang.
- ⁹ Tobikon doiyamo Mian Bisa bingkate yana kinatandak,
tukon beekene doi yana kakuasaan mo lobian babasal doi sasaibino kokakuasaan bailong.
- ¹⁰ Maka tuuk odotiiyo Yesus,
sasaibino komalaekat mo doi sulugaa, tukon mo doi buta,
tukon mo doi buta adeno,
naikon sosuba doi yana.
- ¹¹ Yanila sasaibino naikon mangaku baikon Yesus Klistus Temeneno;
tukon buno doiya Mian Bisa Tama mokinabasal.

Montootilan buno pana mo talaangiyo kodunia

¹²Sabab doiya, Utus-utus mo sineang, bunomo lakon komuyu sidutu molole doi yaku doi tembo yaku daano doi komuyu tanga-tangano, maka lobian tuuno diabudodoo doi tembo podoonggon, siokai komuyu tataap molole doi yaku. Komuyu lapamo Mian Bisa salamatene, jadi kakaate budoo sulano komu monondokan teali monondok tuuno. Lakukanggene doiya tukon odotiiyo tukon molole doi Mian Bisa, ¹³sabab Mian Bisa susuungo komo balimang doi butomu lalomo tuuk kubaiyo komuyu moola tukon teali sanaangene ko Mian Bisa noano.

¹⁴Limangemo sasaibino tukon aki namondommuk-mondommuk kabai podangaani. ¹⁵⁻¹⁶Tukon buno doiya komuyu tudoikene baikon komuyu daano Mian Bisa napau-pau mo akiyo kososiboliino, mo tubo monondok tukon kana doi mian lokis tukon baladosa tanga-tangano. Tukon doi tembo komuyu pelengene doi yanila bilita mo beena tuboan, siokai komuyu teali buat yanila buno pana montootilan mo talaangiyo kodunia. Kalu komuyu tubo buno doiya, sio nadaano koalasan buat yaku tuuk lasaiyo tobinggat kokaliangano komuyu doi tembo Yesus Klistus naabalian lubat. Doiya kona tokitaan baikon daku paladuangan aki napalasma, tukon daku kakaatean daano kohasilo.

¹⁷Kai yaku naikon inakate tukon saunggu teali buno sosubakon mokinundang doi oila bunggono komuyu mo sosubakene doi Mian Bisa buno paloosan baikon komuyu mangangga doi yana. Kalu bisa doiya sio nabuno dia, yaku balasyukuul doi langgedoo tukon tulut potedes-tedeson tukon komuyu. ¹⁸Bunomo koidan siokai komuyudoo lasayo sanaang tukon tulut potedeson tukon yaku.

Timotius tukon Epafloditus

¹⁹Yaku mangangga baikon tukon Temeneno Yesus napotombonii, yaku mosobit bintekene Timotius doikoo, sulano yaku moola tohibul kobilita manganai komuyu. ²⁰Tongo Timotius komiano komo pokokonoi noa tukon yaku, tukon tutuu pikikene komu monondokan. ²¹Sasaibino kobailong tolongo ulusio kobutongo nakopontingan susuungo, bolikon kopontingan Yesus Klistus. ²²Komuyu susuungo lapamo kitayo kona tokitaan baikon Timotius balaguna. Yana lapa balimang tuuno polaing yaku tuuk napinolonggonan Bilita Monondok doi Mian Bisa. Lua kami buno pau tukon tama. ²³Tobikon doiya, mosobit sala lapa yaku mongotoi bulaando daku palakala naikon napupusan, yaku naikon bintekene yana doikoo. ²⁴Yaku mangangga baikon tukon Temeneno napalatulungan, yaku susuunggu aki namalumbit koidan naikon duutiyo komuyu.

²⁵Manganai utusonggita Epafloditus komuyu bintekene tuuk tomboniiyo yaku, yaku lasaiyo palaluu tuuk sumboliiyo yana abali doikoo. Yana lapamo loolainge yaku doi balimangan lalomo tukon kupalajuangan. ²⁶Yana poloon tuuno doi Utus sasaibino, tukon yana aki nasanaang konoano sabab komuyu lapamo malaat bilita baikon yana masakit. ²⁷Takainomo bisa yana masakit kabi mate. Bai Mian Bisa seange doi yana; tukon bolikon tongo doi yanadoo, bai doi yaku koidan, sulano inai yaku teali lobian poloon koidan. ²⁸Doiya kosababpo pololokon babasal koidan daku minooton tuuk mosumboliiyo yana abali doikoo, sulano komuyu potedes koidan kalu komuyu pososung tukon yana, tukon noanggudoo teali tanaang. ²⁹Jadi, talimayo yana tukon noa sanaang buno meeng komian utus mo mangangga. Poodotiiyo sasaibino komian mo buno yana. ³⁰Tuuk kopontingan Klistus nalimang, yana kabi namate; yana batalukene kobutongo tuuk beena palatolongan doi yaku tobikon sambuno.

Nabisaan tuuno

3 Doibundu, Utus-utusonggu, siokai komuyu potedeson sabab komuyu lapamo pomeenggon tukon Temeneno. Yaku aki kulasae babalat motulise koidan oila komo lapamo yaku tulise doikoo tumbeno; sabab langgedoo monondok tuuk mukasalamatan. ²Podaga-dagaiyo ko mian-mian mo kubaiyo kolangge-langge mo lokis mian badaang mo moola sinombuikon 'asu'. Yanila pakisaayo komian badaang sinunat. ³Banggokai kitamo mian badaang mo lapamo mantalima sunat mo tuuno, bolikon yanila. Kita 'osuba doi Mian Bisa tukon Mian Bisa Na Loh susuungo komo lolainge, tukon kita balasyukuul sabab kita tubo pomeenggon tukon Klistus Yesus. Kita aki namoinikene koupacala-upacala dunia koono. ⁴Kona bisaan yaku moola moinikene koupacala-upacaladoo. Sabab kalu ano meeng komian mo lasayo yana ano kona alasan tuuk moinikene koupacala dunia koono, yaku lobian koidan. ⁵Yaku sinunat salataa alumo kooloyo daku umul. Yaku sinuung buno Israe'l miano, doi suku bangsa Benyamin; yaku Iblani miano tuuno. Doi mololean ukum-ukum agama Yahudi, yaku daano anggota golongan Falisi. ⁶Yaku samangat tuuno tobikon yaku lokis-lokise kojemaat. Kalu kinita doi segi ukum agama Yahudi, yaku meeng komian monondok mo akiyo kososiboliino. ⁷Bai sabab Klistus, maka loolukoo sasaibino yaku anggape buno meeng kolobo mo daano koutungo, diabudodoo teali meeng kolobo mo ilugikon. ⁸Bolikon kai langge-langgedoo mobinantil; bai kai sasaibinodoo yaku anggape buno langge-langge mo tongo kalugian. Mo daano doi yaku diabudodoo nia lobian koanggano: doiyamo tingoniiyo Klistus Yesus, daku Temeneno. Sabab Klistus maka yaku lapamo sodiiyo sasaibinodoo. Yaku anggape sasaibinodoo buno limbut, sulano yaku moola laate Klistus, ⁹tukon tutuu pomeenggon tukon yana. Potaamian mo monondok tukon Mian Bisa aki koidan usahakanggene susuungo tukon molole doi ukum agama. Diabudodoo yaku daano potaami tukon Mian Bisa, sabab yaku anggayo ko Klistus. Jadi potaamian monondokoo lubat doi Mian Bisa, tukon kona alasan mangangga doi Yesus Klistus. ¹⁰Komeeng-meengo yaku yase doiyamo sulano yaku tingoniiyo ko Klistus, tukon alamiyo kokuasa mo otobuiyo yana doi matean.

Yaku yase tulut susa tukon yana tukon teali pokakana bunu yana doi namatean. ¹¹Tukon yaku moinikene baikon yaku susuunggu naikon abali inotuboi doi kumatean.

Obulen nalaate kona pinakituu

¹²Yaku aki kubantile baikon yaku daanomo kohasilo, kabai lapamo teali monondok. Bai yaku kai tuluus kakaate malaat tambo Klistus Yesus mo sadiayo. Tuuk doiya yana lapamo laate yaku tukon tealikene yaku yana kotumbuno. ¹³Kona bisaan, Utus-utus, yaku kona tutuuan baikon yaku aki kumalasa lapamo balahasil malaat tambo. Bai naikon daano komeeng kolangge yaku mo kubaiyo, doiyamo yaku tolimingene oila komo daano doi tonggulunggu tukon kakaate tuuno momalaat oila mo daano doi salaano. ¹⁴Doiya kona sabab yaku obuleng banggadudul polong doi napupusan sulano nalaate kona manaangan, doiyamo tubo doi sulugaa; tuuk doiyamo Mian Bisa uange kita mololoi Klistus Yesus.

¹⁵Kita sasaibino mo lapamo moonggol konda manganggaan secala lohani, siokai balasikap bunu doiya. Bai kalu doi antala komuyu daano kona palaat bailong, maka Mian Bisa naikon jelaskanggene koidan doikoo. ¹⁶Mau langge nia siokai napinalahatikanggon: Kita sio tataap tubo mololoi palatulan mo lapamo kita loingiyo polong diabudodoo.

¹⁷Utus-utus sasaibino! Loingiyo daku sontoh. Kami lapamo beena sontoh mo kana, sabab doiya palatikanggene mono-monondok mian badaang mo loingiyo kamidoo nasontoh. ¹⁸Yaku lapamo idan-idan mobontiikon doikoo, tukon diabudodoo yaku ulange koidan tukon kokiil, baikon daano badaang komian kona tuboan lusake koalatio Klistus mate sinempang. ¹⁹Tuboan mian badaang mobuno doiya naikon pupus tukon namanasan, sabab yanila naila kona minomooton tongo tuuk butongoila. Langge-langge mo okimaayo, tobikon doiya yanila banggaalkene; sabab yanila pikikene tongo langge-langge mo pokonoi tukon nadunia nia. ²⁰Bai kita daano batomundoan sulugaa miano. Doi idoo koidan Tomundo Pasalamat kita Temeneno Yesus Klistus, naikon lubat. Yanamo konda tinotiili tukon pinoloonggon. ²¹Butonggita mo muyuk tukon moola manas nia, naikon Klistus boliiyo teali bunu butongo susuungo mo moliyous. Yana moola kubaiyo

doiya sabab yana daano kona kuasa tuuk motaaluukanggene sasaibino kolobo.

Pongotunggul-pongotunggul

4 Tobikon doiya! Utus-utusonggu mo sineang, bunomo doiya siokai komuyu tubo tukon tutuu mangangga doi Temeneno. Konoanggu poloonggene doikoo! Komuyumo daku binanggaakon mo kubaiyo yaku tedes.

²Utus boine Euodia tukon Utus boine Sintike! Yaku kabiyo tukon tutuu sulano Utus boine pomeenggon noa bunu mian badaang mo pokakana kona mangangga. ³Doi tulunggu mo molole, yaku kabiyo koidan sulano Utus tomboniyo boinedoo molua. Yanila lapamo balimang tuuno polaing yaku tuuk babotilangene Bilita Monondok doi Mian Bisa; pokakana bunu Klemen tukon kokabuson komian bailong mo balimang polaing-laing yaku. Yanila sambu-sambuno daanomo doi Buku Mian Tubo lalomo.

⁴Boliisi komuyu sidutu tedesene sabab komuyu lapamo tubo pomeenggon tukon Temeneno. Daano koidan yaku bantile: potedesene!

⁵Siokai sasaibino komian moola kitayo komu ndondoong doi namonondokan konoamu. Sabab akimo namalumbit koidan Temeneno naikon lubat. ⁶Inai momolili manganai oilamo. Doi sasaibino kolangge, posambeang tukon pelenggene mukakabi doi Mian Bisa. Oila kopoo pinalaluu, pailukene doiya sidutu doi Mian Bisa tukon bantile talima kaseh. ⁷Maka namonondokan doi Mian Bisa mo aki namoola kobanggapi mangalatikene, naikon dagaiyo konoamu tukon mupikilan mo lapamo pomeenggon tukon Klistus Yesus.

⁸Doibundu, Utus-utus, usokiyo mupikilan tukon langge-langge mo daano koanggano, mo moola ngginaal, doiyamo langge-langge mo bisa, mo inodotii, mo adil, molino, maamis, tukon momonondok. ⁹Ampakonggenemo oila kopo pinalajali tukon talimayo doi yaku; mau doi bantil-bantilan mau doi yaku napalabuatan-palabuatan. Kona monondokan uuno doi Mian Bisa, naikon loolainge komuyu.

Bantilan talima kaseh

¹⁰Doi kutuboan lalomo komo pomeenggon tukon Temeneno, yaku lasayo sanaang tuuno, sabab lapamo bunu doiya kona

kalumbit, diabudodoo komuyu moolamo koidan pikikene daku ndondoong. Daku makisuut bolikono baikon komuyu lapamo toliminggene yaku; komuyu sio popalahatikangene yaku, bai komuyu aki pomalaat todanan sulano potudoikene. ¹¹Yaku mantailukene naiya bolikon sabab yaku kakulangano, sabab yaku lapamo palajalio malasa biai tukon oila komo daano. ¹²Yaku lapamo toupiyo tubo badaang kokakulangan, tukon koidan tubo tukon lobi-lobian. Yaku lapamo tingoniiyo kolaasiano tuuk masasalaan ndondoong mo bulaando kai koidan; mau nda ndondoong momonondok mau nda ndondoong motalalais, mau ndondoong molobian mau ndondoong mokakulangan. ¹³Tukon kuasa Klistus mo bineekon doi yaku, yaku daano kobukuanan tuuk masasalaan badaang kaliangano kondondoong.

¹⁴Bai komuyu lapamo tulungiyo yaku doi kususaan lalomo; tukon oila kopoo kinubaidoo bisa monondok. ¹⁵Utus-utus Filipi miano! Komuyu susuumuyu toiyo bisa baikon salataa yaku tinggale ko Makedonia loolukoo doi tembo Bilita Monondokoo yaku sabukene tumbeno, komuyumo komemeengo jemaat mo bantuwe yaku; komuyu tumbe-tumbeno mo tulut tamise utung lugi polaing-laing yaku. ¹⁶Salataa yaku doi Tesalonika tukon mapalaluu potombonii, lapamo lobian idan komuyu makapatu potombonii doi yaku. ¹⁷Doiya kona alati bolikon yaku tongo yase mantalima mobineekon. Daku yasano doiyamo sulano yaku moola kitayo hasil-hasil mo suungiyo komu ilaat. ¹⁸Yaku lapamo talimayo sasaibino – kabai lobian doi nasukupan! Sasaibino mobineekon komuyu kapatuwe doi yaku, yaku lapamo talimayo doi Epafloditus. Diabudodoo yaku anomo sasaibino daku pinalaluu. Mobine-bineekon doi komuyudoo daano buno boono mobabangi doi sosuba mo sinosubakon doi Mian Bisa tukon Mian Bisa mo talimayo tukon noa sanaang. ¹⁹Mian Bisa mo yaku sosubaiyo mo lobian kona kaasaan doi Klistus Yesus lalomo naikon daanokene sasaibino komu kapalaluuwan. ²⁰Nggaale ko Mian Bisa Tamanggita sidutu-posidutukon! Amin.

Bantilan napupusan

²¹Pelenggene daku bantilan doi sasaibino ko Mian Bisa namian mo pomeenggon tukon Klistus Yesus. Tukon talimayo koidan bantilan doi utus-utus mo daano polaing-laing yaku

dimbaa. ²²Sasaibino ko Mian Bisa namian doi kota nia, utama yanila doi batomundoan Tomundo, makapatu bantilan doi komuyu.

²³Boliisi Temeneno Yesus Klistus nabalakaatiyo Utus sasaibino.

Komai holomat,
Paulus tukon Timotius

PAULUS NASULAT DOI JEMAAT KOLOSE

PANGANTOKON

Kolose daano komeeng kokota doi Asia Pauno, tongusol taalikon doi tolopot doi kota Efesus. Bolikon Paulus komo kekendenge najemaatia Kolose, bai dotempodoo yana namosumboliiyan mian mobalimang doi Efesus, meeng koibu kota plovinsi Loma doi Asia Pauno, yana lasaiyo koidan mobalatanggung jawab doi jemaat Kolosedoo. Paulus mantalimamo bilita baikon doi jemaatoo lalomo daano kogulugulu mo bangotunggul otunggul-otunggul mo sala. Dopai gulu-guludoo kakatikas konapo otunggukanano baikon sulano nda tingoniiyo ko Mian Bisa tukon nda sinalamaton tukon natalakanaan, komian sio nasosubaiyo “koloh-loh mo kuasaiyo tukon mopalentayo nadunia nia antoko”. Kobailong koidan, do gulu-guludoo bantile, komian sio naloingiyo koatulan-atulan basunatan, kolangge mopinantanggon tukon bai-bailong koidan.

Paulus nasulat doi jemaat Salani miano doi Kolose nia tinulis tuuk doi nalinooolukonggonan kootunggul Salani mo bisa tukon akiyenggene kootunggul-otunggul mosala gulu-guludoo mokala mo otunggukene. Koantoko tuuno nasulatia doiyamo baikon Yesus Klistus moola mebee kasalamatan mobisa tukon baikon do otunggul-otungguloo bailong tongo dedeengene komian doi Klistus. Luwedei Klistus, ko Mian Bisa tealikene kodunia nia, tukon luwedei Klistus koidan ko Mian Bisa salamaten. Tolongo lolo doi pomeenggonan tukon Klistus, kodunia daano kona moinian mosinalamaton. Bobus koidan Paulus otunggukene kona potaamian do otungguloo mobabasal tukon ko Salani miano natubooan.

Palaluu nalinoolukonggon naimbaa baikon Tikhikus - mo babayo naiya sulatia doi Kolose motuuk doi Paulus - Onesimus komo lolainge, ata Paulus mo sumboliiyo sulano naabali doi natuan, doiyamo Filemon, meeng koanggota jemaat doi Kolose.

*Antoko**Pololukoni 1:1-8**Klistus nasifat tukon nakakuasaan 1:9-2:19**Tuboan moboolu Salani miano mo toupiyo 2:20-4:6**Potutupo 4:7-18*

1 ¹⁻²Utus-utus Mian Bisa namian doi Kolose mo molole pomeenggon tukon Klistus!

Buno meeng kolasul Klistus Yesus, - Mian Bisa mobingkate - yaku, Paulus, polaing-laing tukon utusonggita Timotius, moini boliisi ko Mian Bisa Tamanggita mebee balakaat tukon monondokan doi komuyu.

Sambeang bakinatauwan

³⁻⁴Kami lapamo lengele komuyu manganggamo doi Yesus Klistus tukon komuyu seseangemo sasaibino ko Mian Bisa namian. Doiyamo kosababpo tempodoo mai sambeangan motuuk doikoo, kami sidutu bakinatauwan doi Mian Bisa, Tama nda Temeneno Yesus Klistus. ⁵Komuyu anggayo tukon komuyu seseange, sabab komuyu moinikene naikon oila ko Mian Bisa nasinadia doi sulugaa motuuk doi komuyu. Komuyu lapamo lengele doiya langgedoo, salataa Bilita Monondokoo mo bisa mopinolonggon doikoo. ⁶Bilita moluwedoi Temenenodoo tololongol doi sasaibino kolipu, tukon komian natuboan banggadudul binalakaati luwedoi bilitadoo, buno pokakana komu tuboan nabinalakaatian salataa komuyu molongol komaasi Mian Bisa tukon bisa-bisa motoiyo. ⁷Langgedoo Epaflas komo pelengene doi Utus, tulando kami mo seange. Yana Klistus nasosumbolii mo molole balimang tuuk doi nda kopontingan. ⁸Doi yanamo komai longolano baikon tukon kuasa moluwedoi Mian Bisa Na Loh komuyu moola teali posesiang.

⁹Doiyamo kosababpo kami sidutu sambeang motuuk doi komuyu salataa kami lengele komuyu kaliangano. Kami kabiyo doi Mian Bisa sulano Mian Bisa Na Loh beena doi komuyu pandoiyan tukon pangalatian tobikon komuyu toiyo tukon monondok oila ko Mian Bisa namongiasan. ¹⁰Tukon buno



Sambeang (1:9)

doiya komuyu malaat tuboan mololoi Mian Bisa namongiasan, tukon sidutu sanaangene konoano, tobikon doi sasaibino kolangge komuyu modaanokene kolangge-langge mo monondok. Tukon komuyu pomotoiyan kaliangano Mian Bisa naikon tosuungi koidan. ¹¹Boliisi tukon kuasa mo babasal moluwedoi Mian Bisa, komuyu inokobukuan tobikon komuyu moola taane kosusaan doi sasaibino kolobo tukon sabal tukon noa sanaang ¹²tukon bantilan kinatauwon doi Tama. Sabab Tama doiyamo komo kubaiyo komuyu moola mantalima oila ko Mian Bisa nasinadiakon kona mian doi nabatomundoan lalomo mo madialan. ¹³Yana lapamo sodiiyo kita doi kuasa mokalipookan tukon biyele kita doi na Pau nabatomundoan lalomo mo seseange. ¹⁴Luwedoi na Paudoo kita sinodiimo; koalatio konda lalim-lalim lapamo inompuni.

Klistus tukon nalimang

¹⁵Klistus doiyamo kogambal mo totingonii doi Mian Bisa butongo mo aki natokita; Klistus doiyamo kopau langgong, lobian kona utamaan doi sasaibino kolobo mo tinealikon. ¹⁶Sabab lolo doi yana Mian Bisa tealikene kolobo sasaibino doi

sulugaa tukon doi buta nia bungkukono, sasaibino kolangge mo tokita tukon mo aki natokita, tololo koidan sasaibino koloh mo balakuasa tukon mo mapalenta. Sasaibino nadunia nia tinealikon lolo doi Klistus tukon tuuk doi Klistus. ¹⁷Akiyoon sasaibino kolangge nadaano, Klistus daanomo. Tukon sabab doiyamo koidan maka sasaibino kolangge daano doi nadungolan memeeng. ¹⁸Yanamo kooluno doi butongoo, doiyamo jemaat, sabab yanamo kotuboan uuno doi jemaatoo. Yanamo kopau langgong, kotumbe-tumbeno inotuboi koidan doi namatean, sulano yana susuungo tolong komo teali mo pontiing tuuno doi sasaibino kolangge. ¹⁹Mian Bisa susuungo komo palaluuwo sulano sasaibino kolangge mo talaat doi Mian Bisa butongo, talaat koidan tukon sukup doi na Pau butongo. ²⁰Tukon lolo doi Paudoo koidan Mian Bisa putusiyomo sulano nakubaiyo sasaibino kolobo pokindok koidan tukon yana - mau sasaibino kolobo doi buta, mau komo doi sulugaa. Mian Bisa kubaiyo doiya lolo doi na Pau namatean doi kayung sempang.

²¹Buunia komuyu odoon doi Mian Bisa. Komuyu pomusukene sabab lenggang tukon mupikilan molokis. ²²Bai diabudodoo, tukon na Pau namatean, Mian Bisa mongkubai loloon komuyu tukon yana teali monondok koidan. Tukon cala doiya komuyu moola binaba mangadap doi Mian Bisa tukon ndondoong mo moliyous, bilisii tukon akiyo kososiboliino. ²³Bai tantu komuyu sio potataap molole mangangga tukon kokondong moonggol doi mumangangaan. Inai naikon komuyu sodiiyo kopo moinian mo lapamo bineekon doikoo salataa komuyu mantalima Bilita Monondok doi Mian Bisa. Bilitadoo lapamo pinolonggon doi memeeng komian doi sasaibino kolipu. Tukon tuuk doiyamo koidan yaku, Paulus, lapamo teali peleleani.

Paulus nabaleleanian doi jemaat

²⁴Budodoiya yaku sanaang mosakisaa tuuk doi mukopontingan. Sabab tukon sakisaawan doi butonggu, yaku osukupiyo oila komo sio nabuno Klistus nasakisaawan tinoupi motuuk doi najemaat, doiyamo butongo. ²⁵Mian Bisa bintekene yaku teali peleleani jemaat motuuk doi mukopontingan. Yaku sio kupelengene kobilita moluwedoi Mian Bisa, sasaibino; ²⁶doiyamo bilita mo malumbito doi abad-abad loolukon ko Mian

Bisa mo laasiakangene doi sasaibino komian, bai budodoiya inokitaikon doi namian. ²⁷Doi namianoo Mian Bisa yase tудоikene bulaando kona monondokan tukon babasalan kona laasiadoo tuuk sasaibino kona mian. Laasiadoo doiyamo: Klistus daano doi butomu, koalantino komuyu naikon tololo lasaiyo ko Mian Bisa nababasalan. ²⁸Klistus doiyamo komai binasalitakon doi memeeng komian. Kami ingotiikene tukon otunggul yanila sasaibino kopandoiyan. Komai tujuan doiyamo sulano memeeng komian binaba doi Mian Bisa, bunо mian mo toboso doi lobo lohani lalomo, sabab lapamo pomeenggon tukon Klistus. ²⁹Sulano laate lobodoo yaku balimang kakabukuan. Yaku kakabukuan tukon sasaibino daku bukuanan Klistus mo beekene doi yaku tukon mo balimang doi butonggu lalomo tukon moonо kuasa.

2 Yaku yase komuyu potoiyo bulaando daku nggoolaan kakabukuan tuuk doikoo tukon tuuk doi yanila doi Laodekia tukon sasaibino komo aki natingoniiyo yaku secala plibadi. ²Sasaibino naiya yaku kubaiyo sulano yanila noano teali bukuan tukon yanila moola poseseang sulano yanila pomeenggon tuuno. Tukon bunо doiya yanila tutuu mangalati tukon anggayo tukon tingoniiyo ko Mian Bisa nalaasia doiyamo Klistus susuungo. ³Klistus komo abese sasaibino kopandoiyan tukon toiyano ko Mian Bisa doi loolukon motosookon.

⁴Yaku babilitakene naiya sulano komuyu inai poinokolii doi indee miano koidan kona bantilan maamis doikoo. ⁵Sabab mau kai yaku podoonggono doi komuyu, potoiyo yaku daano doi komuyudoo. Tukon yaku laba mokitayo komuyu pomeenggon noa tukon moonggol kopoo mangangaan doi Klistus.

Tuboan mo talakana

⁶Utus-utus lapamo talimayo Yesus Klistus doiyamo Temeneno. Tobikon doiya komuyu sio potubo pomeenggon tukon yana, ⁷tukon pomoonggol doi yana. Komuyu siokai pobangune kopoo tuboan tukon Klistus teali uuno. Siokai komuyu pololokon mangangga doi Klistus, bunо oila komo lapamo inotunggukon doi komuyu. Tukon siokai konoamu natoku-tokumbe tukon bantilan kinatauan.

⁸Komuyu sio pobada-badagai, inai nadaano komian mo pangaluiyo komuyu tukon banggapi namotoiyan mo akiyo kotakoso, bai tolongo atapayo. Motoiyan-motoiyanoo aki

naluwe doi Klistus, bai tolongo banggapi napandapat tukon luwe loh-loh mokuasaiyo kodunia. ⁹Sabab tootubo ko Mian Bisa butongo daano doi Klistus, doiyamo butongo nabatokitaan buno banggapi. ¹⁰Tukon sabab tuboan pomeenggonan tukon Klistus, komuyudoo binee tuboan tuuno. Sabab Klistus daano kapalano doi memeeng koloh mo balakuasa tukon mo mapalenta.

¹¹Sabab pomeenggon tukon Klistus, komuyu lapamo sinunat, bolikon sunat banggapi mo kubaiyo, bai tukon sunat Klistus mo kubaiyo, mo sodiiyo komuyu doi kuasa lenggang mo baladosa. ¹²Sabab singgato komuyu posinauwan, komuyu tinading posinggat-singgat Klistus; tukon basauwanoo mian koidan, komuyu polaing inotuboi koidan posinggat-singgat Klistus sabab komuyu mangangga doi Mian Bisa nakuasa mo lapamo otuboiyo Klistus doi namatean. ¹³Looluk, komuyu lapamo mate secala lohani sabab komuyu baladosa, tukon sabab komuyu aki posinunat loloiyo koadat. Bai budodoiya Mian Bisa otuboiyo komuyu posinggat-singgat tukon Klistus. Mian Bisa lapamo ompuniyo sasaibino konda lalim, ¹⁴tukon akiyenggene konda sulat samea, moano doi kita, mo nggimoliiyo kita tukon salat-salat mo babalat. Tukon mosempange sulatoo doi kayung sempang, Mian Bisa alapuse sasaibino kopakalaakon doi kita. ¹⁵Doi kayung sempangoo Klistus kubaiyo sasaibino koloh-loh mo mapalenta tukon balakuasa tealimo akimo nabukuan koidan. Yanila teali mian badaang namokitaan doi tembo Klistus loolainge yanila buno mian motinalunggu doi nalinamekonan kona manaangan.

¹⁶Tobikon doiya inai mosodiiyo komian moasalakene komuyu motuuk doi kinaan kai moininum, kai doi oloyo-oloyo lamekanano kobaagamaan, kai lamekanano kobituon boolu, kai motuuk doi oloyo Tadean. ¹⁷Sasaibino doiya tolongo bayangan doi langge-langgedoo naikon mo lubat, bai kona batokitaan doiya langge-langgedoo doiyamo Klistus! ¹⁸Inai posodiiyo kobutomuyu nainolugi doi mian-mian mo kakaadukon kpendeyo kobutongo tukon mo sosubaiyo komalaekat-malaekat. Mianoo bangga-banggaal tukon napikilan-pikilan dunia tukon bangga-banggaalkene kona pokita susuungo, ¹⁹tobikon akimo koidan nabataani doi Klistus mo teali kapala. Doi Klistus naloo-

laingano, sasaibino kobutonggita piniala tukon pinoomeenggon doi lolosuano, tukon tubo lolo doi Mian Bisa namongiasan.

Mate tukon tubo polaing-laing Klistus

²⁰Komuyu lapamo mate polaing-laing Klistus, tukon lapamo sinodii doi loh-loh mo kuasaiyo naiya dunia nia. Eh, bulaando komuyu tubo bunu mian mo daano kinuasai doi dunia nia? Bulaando komuyu mololoiyo doi atulan-atulan bunu naiya, ²¹“Inai motaape naiya”, “Inai motamise ndaiya”, “Inai mosinggile naiya”? ²²Sasaibino pelatulanoo doiya tuuk doi langge-langge mo pinake bai akiyono kotakoso. Doiyo tolongo atulan-atulan tukon otunggul-otunggul banggapi mo kubaiyo. ²³Takainomo kona tokitaan do langgedoo monondok, tukon binontiikon sulano komian nasosuba doi malaekat, ekependeyo kobutongo tukon sakisaayo kobutongo; bai sasaibino doiya akiyo kotakoso motaane kobanggapi namoot.

3 Komuyu lapamo inotuboi koidan posinggat-singgat Klistus. Tobikon doiya komuyu sio pomoumbolii sulano pomalaat langge doi sulugaa, inaando Klistus tukon Mian Bisa namapalentaan posinggat-singgat. ²Otunggulikene kopikilan doi langge doiya, inai nabaino langge doi dunia nia. ³Sabab komuyu lapamo mate, tukon komu tuboan tosookon polaing Klistus doi Mian Bisa. ⁴Eh, tuboan uuno mo bisa doiyamo doi Klistus tukon kalu yana tokita naikon komuyu koidan tokita polaing-laing tukon yana doi nababasalan lalomo!

Tuboan malimbito tukon tuboan mo boolu

⁵Tobikon doiya, akiyenggene dunia naminooton-minooton mo otuwenge kobutomu, bunu balolowaan, lobo mo aki namonondok, noano lokis, naminooton lokis, tukon modokoan (sabab komodokoan doiya pokakana tukon bapilogotan.) ⁶Langge-langge mobunu doiya komo lubatene ko Mian Bisa nanggimalan doi mian-mian mo aki naloingiyo. ⁷Loolukon mau komuyu loloiyo komo minooton-minootonoo, singgato komuyu modaano kinuasai.

⁸Bai budodoiyo siokai komuyu aisene kolangge mo lokis doi butomu: inaimo koidan moliit, kai nggimal kai mosikitene

komian bailong. Aki namoola tobuat doi suumu kobantil-bantilan masangolan kai bantilan mo manggilit. ⁹Inai mobakokolii meeng tukon bailong, sabaŕ kotuboan loolukoo tukon sasaibino kolangge lapamo komuyu tinggale. ¹⁰Komuyu budodoiya lapamo binee tuboan mo boolu. Komuyu daanokai banggapi boolu, mo daano kiniboolu momeenggon doi motealikene, doiyamo Mian Bisa, pokakana koduduso susuungo. Kona makisuut doiyamo sulano komuyu tingoniiyo ko Mian Bisa tukon tontong. ¹¹Buno kolimbako doiyamo lapus sasaibino kona posasalaan ko Yahudi miano tukon mobolikon Yahudi, mian mobasunat tukon mian mo aki nabasunat, akimo nadaano koidan naposasalaan komian lipu meeng tukon mian lokis, doi ata tukon mian mobebas, sabab Klistus daano sasaibino kolangge-langge tukon yana pomeenggon yanila sasaibino!

¹²Utus daano Mian Bisa namian. Mian Bisa mamaasikene komuyu tukon piliyo komuyu sulano nateali namian mo tangalaas. Doiyamo kosababpo komuyu sio pookitakene kopoo seang, komuyu sio pomonondok konoamuyu, aki nabingkate kobutongo, matalamuyuk tukon yase sakisaa. ¹³Komuyu sio posabal doi meeng tukon bailong, tukon sio po poompuni kalu daano komo mangabos noa nggimalan doi bailong. Temeneno tukon sanaang konoano ompuniyo komuyu, jadi komuyu sio poyase ompuniyo meeng tukon bailong. ¹⁴Tukon komo penting tuuno, doiyamo: Komuyu sio poposeseang sabab do seango doiyamo komo pomeenggene Utus-utus sasaibino tobikon nateali talakana. ¹⁵Siokai komu mongiasan-mongiasan tinantukon doi pokindokan Klistus mo beekene doi noamu lalomo. Sabab Mian Bisa uange komuyu sulano teali anggota meeng kobutong, sulano komuyu tubo doi pokindokanoo lalomo moluwedoi Klistusoo. Siokai komuyu pobakinatauan. ¹⁶Siokai doi Klistus naotunggul-otunggul mo moonoo balakaat natelem doi noamu lalomo. Sio komuyu pootunggul popobee otinau doi namonondokan. Pomananikene komazmul tukon nggaa-nggaale tukon lagu-lagu lohani; pomanani tuuk doi Mian Bisa tukon palasaan kinatauan doi noamu lalomo. ¹⁷Sasaibino oila komo komuyu kubaiyo kabai bantilan, siokai doiya posipatene tukon pobantile

luwedoi Temeneno Yesus sambuno. Pobakinatauwan doi Mian Bisa Tama tuuk oila Yesus nailakukon doikoo.

Pelibadi napotaamian doi tuboan mo boolu lalomo

¹⁸Utus-utus mo teali boloki! Molole doi polangkai, sabab sio nabuno doiya komu kalakuan buno Salani miano.

¹⁹Utus-utus mo teali langkai! Seseange komu boloki. Inai monggimoliiyo yanila.

²⁰Labuk-labuk! Daano kopoo kuadiban buno meeng ko Salani miano sulano sidutu molole doi tama tina, sabab doiya komo kindendeke ko Mian Bisa noano.

²¹Utus-utus mo teali tama! Inai popalasukitiyo kopo pau-pau noano naaki teali liit konoano.

²²Utus-utus mo teali ata! Doi sasaibino kolangge, siokai komuyu molole doi mutuan mo doi dunia nia. Inai molole doi yanila tongo doi tembo yanila modaano dagaiyo komuyu, sabab komuyu yase ngginaal. Molole doi yanila tukon noa sanaang, sabab komuyu odotiiyo ko Temeneno. ²³Indemo kolimango bineekon doikoo, siokai komuyu limange tukon tootubo konoamuyu, pokakana buno Temeneno kopoo lineleani, tukon bolikon tongo banggapi. ²⁴Poneneeke baikon komuyu naikon mantalima tambo doi Temeneno. Oila ko Temeneno nasinadiakon motuuk doi namian, doiyamo kona bineekon doikoo. Sabab tuan dungolanoo tuuno daano moleleaniyo doiya Klistus susuungo. ²⁵Tukon indee miano komo mongkubai sala, naikon tanggunge kona salaanoo, sabab Temeneno aki napiliyo komian duduso.

4 Utus-utus mo teali tuan! Siokai komuyu pokubaiyo kopoo ata-ata doi nakanaan tukon naadil. Poneneeke baikon mau komuyu daano komeeng kopoo tuan doi sulugaa.

Otunggul-otunggul

²Siokai komuyu sambeang doi nabisa-bisaan tukon pobadagai, tukon pobasyukuul doi Mian Bisa. ³Posambeangene tuuk kami sulano ko Mian Bisa nabeena doi kami todanan mo monondok tuuk mobasalitakene laasia Klistus kaliangano. Sabab doiyamo kolanggeno maka yaku diabudodoo nia daano doi talunggu la-

lomo. ⁴Posambeangene sulano kumoola tunggulikene laasiadoo doi natontongan bulaando kona tutuuwan.

⁵Doi potaamian lalomo komuyu tukon mian badaang mo aki namanganga, siokai komuyu tubo pandoi tukon mangala meeng kotodanan momonondok. ⁶Siokai langge-langge komuyu sidutu bantile monondok tukon kinilakon. Siokai potoiyo bulaando kona tutuuwan komuyu timbiliyo komian napasadai-pasadai.

Sulat napupusan tukon teteba

⁷Tikhikus, nda utus mo sineang, naikon botiikene doi komuyu sasaibino kolobo kaliangano yaku. Yana molole balimang polaing-laing kami tuuk doi Temeneno. ⁸Yaku bintekene yana doikoo tukon alasan sulano komuyu potoiyo komai ndondoong tukon komuyu potohibul. ⁹Onesimus naikon ampakon polaing-laing tukon Tikhikus; yana meeng komian doi popolipuiyan. Yana meeng komian mo molole, tukon kami seseange. Yana tukon Tikhikus pailukene doikoo sasaibino komo teali doi kudungolan nia.

¹⁰Alistalkus, mo daano doi talunggu lalomo polaing-laing yaku, makapatu teteba doi komuyu. Bunomo koidan Malakus, montolidan idan tukon Balanabas. (Komuyu lapamo kinopotui bilita sulano potalimayo yana kalu yana lubat doikoo.) ¹¹Teteba koidan moluwedoi Yesus mo kosambuno Yustus koidan. Luwedoi Yahudi miano mo lapamo mangangga doi Temeneno Yesus, tolongo yanila toluila tolong budodoiya komo balimang polaing tukon yaku moampakonggene kolimang moluwedoi Mian Bisa. Yanila bisa-bisa tuuno motulungiyo yaku.

¹²Teteba moluwedoi Epaflas. Yana koidan luwedoi mupolipuiyan. Yana Yesus Klistus naata, mo sidutu sambeang tutuuno motuuk doi komuyu. Yana kabiyo tutuuno doi Mian Bisa sulano komu mangangaan nateali moonggol tukon komuyu tutuu doi mangangaan, sulano komuyu potalakana molole doi Mian Bisa namongiasan. ¹³Yaku sakisiiyo susuunggu baikon yana lapamo balimang kokobukuan tuuk doi komuyu tukon tuuk mian badaang mo daano doi Laodekia tukon Hielapolis. ¹⁴Doktel Lukas, kita mo seange, tukon Demas makapatu teteba doikoo.

¹⁵Pelengene komai teteba doi utus-utus Salani miano doi Laodekia; koidan doi Nimfa, tukon doi jemaat mo bakaleda doi bonua. ¹⁶Salataa lapa naiya sulatia binasakon doikoo, usahakangene sulano doiya nabinasakon koidan doi jemaat Laodekia. Bunomo koidan komuyu sio pomabasa do sulatoo naikon mo kinapatu luwedoi Laodekia tuuk doikoo. ¹⁷Tukon pailukene Alkhipus, “Alapayo kolimang mo bineekon doikoo tuuk leleaniyo ko Temeneno.”

¹⁸*Teteba doi yaku, Paulus.* Yaku susuunggu komo tulise naiya sembelengia. Inai potolimingene baikon yaku modaano doi talunggu lalomo!

Boliisi Temeneno nabalakaatiyo komuyu.

Komai holomat,
Paulus

PAULUS NASULAT KOMEENGO DOI JEMAAT TESALONIKA

PANGANTOKON

Tesalonika doiyamo kona tongodudukan ibu kota Makedonia, meeng koplovinisi doi batomundoan Loma. Jemaat Tesalonika Paulus bangune salataa yana tinggale ko Filipi. Bai aki namalumbit sambuno lapa doiya, kopai Yahudi miano mo masakit konoano doi Paulus yanila atambuunemo konapo aposano Paulus nalimang mobabulitakene kootunggul Salani doi mian badaang mobolikon Yahudi miano mo lapamo okitakene kona maanggaan doi agama Yahudi. Tapakisaa Paulus tinggale ko Tesalonika maka taus doi Belea. Doibundu Paulus polong doi Kolintus, yana talimayo Timotius nasulat, Paulus tula-tulano, bulaa kokaliangano kojemaat doi Tesalonika.

Jadi, Paulus nasulat tumbeno nia doi jemaat Tesalonika tinulis sulano nabeena otunggul tukon moonggolan doi yanila. Paulus bakinatauwan doi bilitadoo yana motalimayo doi napo iman tukon yanila naseang. Yana ingotiikene yanila motuuk doi natuboan susuungo singgatoos yana daano mopototongi tukon yanila. Sambuno yana lolukenggene doiya sasaibino, Paulus bolosio yanila napasadai bulaa kokaliangano Klistus nalubatan koluano luunggon. Kalu meeng ko Salani miano momate akiyoon nalaate Klistus nalubatan koidan, moola kai do mianoo mantalima tuboan mo posidutukon tukon mobisa doi Klistus? Oilakai kotempono naikon Klistus nalubatan? Paulus otunggukene sulano yaniladoo nabalimang monondok tukon napo totiiliyo Klistus nalubatan tukon tootubo konapo moinian.

Antoko

Pololukoni 1:1

Kinatauwan tukon nggaalano 1:2-3:13

*Otunggul bulaa kokaliangano kona kanaan ko Salani miano
nakokubai 4:1-12*

*Otunggul bulaa kokaliangano Klistus nalubatan koluano
luunggono 4:13-5:11*

Otunggul-otunggul napupusan 5:12-22

Potutupo 5:23-28

1 Utus-utus jemaat doi Tesalonika, mo tealimo Mian Bisa Tama namian tukon Temeneno Yesus Klistus:

Kami, doiyamo Paulus, Silas tukon Timotius moinikene boliisi ko Mian Bisa nabeena balakaat tukon monondokan doi komuyu.

Tesalonika miano natuboan tukon napoo manganggaan

²⁻³Kami sidutu bakinatauwan doi Mian Bisa sabab Utus sasaibino. Momeenggon mai sambeang doi Mian Bisa tukon Tamanggita, kami sidutu tandayo komuyu. Kami momeenggon sambeangene komuyu. Kami neneeke bulaando komuyu potudoikanano kopo kokubai baikon komuyu mangangga doi Klistus, bulaando komuyu kopo seseangano komian bailong tobikon komuyu leleaniyo yanila, tukon bulaando kopo moinian tukon moonggolan doi nda Temeneno Yesus Klistus. ⁴Kami toiyo, Utus-utus, baikon ko Mian Bisa seseange komuyu tukon lapamo lilike komuyu tealikene namian mo tangalaas. ⁵Sabab kami pelengene Bilita Monondok doikoo bolikon tolongo bantil-bantilan balang, bai koidan tukon kuasa tukon Mian Bisa Na Loh. Tukon kami anggayo tuuno naikon kona bisaan do Bilita Monondokoo. Komuyu toiyo bulaando komai tuboan motuuk mukapalaluuwan tempodoo kami daano pototongi komuyu. ⁶Komuyu loloiyo komai kokubai tukon Temeneno nakokubai. Mau kai komuyu posakisaa tuuno, komuyu potalimayo tukon laba-laba bilita kami babotilangene doikoo. Do laba-labaano Mian Bisa Na Loh komo beekene. ⁷Tukon doiya komuyu teali sontoh doi sasaibino ko Salani miano mo daano doi Makedonia tukon doi Akhaya. ⁸Sabab tambuun doi komuyu, bilitadoo kaliangano Temeneno lapamo tololongol doi Makedonia tukon doi Akhaya. Tukon aki nabaino doiya



Kota Tesalonika (1:1)

koidan; bai bilita kaliangano bulaando kopoo manganggaan doi Mian Bisa lapamo tololongol doi yayaa, tobikon kami akimo napalaluu koidan momabantil oioila. ⁹Sasaibino do mianoo basalitakene kaliangano bulaando komuyu kopoo talimaano kami salataa kami loolukon lubat doikoo. Yanila basilingan kokaliangano bulaando komuyu tinggale kobapilogotan tukon lubat doi meeng ko Mian Bisa mo tubo sulano nda mangangga doi yana. ¹⁰Yanila koidan basilingan bulaando kokaliangano komuyu moinikene ko Mian Bisa Napau nalubatan doi sulugaa, doiyamo Yesus, mo lapamo Mian Bisa otuboiyo doi matean. Yesus doiyamo komo salamatene kita doi Mian Bisa naukuman mo naikon lubat.

Paulus nalimang doi Tesalonika

2 Utus-utus! Komuyu toiyo baikon komai lubotiiyano komuyu aki napalasma. ²Komuyu toiyo baikon kami akiyoon mai lubat doikoo doi Tesalonika, kami lapamo sinakisaa tukon tinotulai doi Filipi. Bai mau nabadaang komian molawane

kami, konda Mian Bisa lapamo beena balanian doi kami sulano pelenggene doikoo Ko Bilita Monondok mo luwedoi yana. ³Komai tobiano ikoo bolikon meeng kolobo nasalaan; koidan bolikon tukon makisuut mo aki namonondok kabai bakokolian. ⁴Aki! Kami aki nabasilangan tuuk mokindendeke komian noano, bai tuuk nasanaangan ko Mian Bisa noano, mo udiyo konoanggami. Sabab kami Mian Bisa akuiyo moolamo pelenggene do Bilitadoo Monondok. ⁵Komuyu susuumuyu toiyo baikon kami aki natolongo mai silingan komo maamis kabai abuiyo komuyu sulano natosookon kobapilogotan. Mian Bisa komo teali sakisii! ⁶Kami koidan aki mai kakaate sulano malaat panggaal doi mian - bai doi komuyu kabai doi mian bailong. Kona bisaan bunu meeng kolasul Klistus, kami moola kai mai umbale meeng kolobo doi komuyu. ⁷Bai kami ndondoong tolongo bamuyuk-muyuk kalu kami daanoon mopototongi tukon komuyu, pokakana meeng kopau tinano mopialayo kona pau-pau. ⁸Sabab mai seang maasi, kami basadia mobeekene doikoo bolikon tolongo do Bilita Monondokoo mo luwedoi Mian Bisa, bai mau kai mai tuboan koidan. Sabab kami seseange tuuno komuyu! ⁹Tantu komuyu daano moneneeke bulaando komai motikasan mokakaate tukon kokobukuan. Oloyo maka popook kami balimang sulano kami naaki nakubaiyo susa doi meeng komian koidan doi komuyudoo doi mai babulitakanano do Bilitadoo Monondok mo luwedoi Mian Bisa tuuk doikoo.

¹⁰Kami tubo moliyous, talakana tukon akiyo kososiboliino doi komuyudoo mo lapamo mangangga doi Klistus. Komuyumo kai komai sakisii-sakisii, bunomo koidan doi Mian Bisa. ¹¹Komuyu toiyo balikon kami kubaiyo komuyu memeeng kopau bunu meeng kopau tamano mokindendeke kona pau-pau. ¹²Kami otinauwo komuyu, kami mebee dolongan doikoo tukon kami desaake komuyu sulano potubo pobabunokon doiya sulano ko Mian Bisa noano nasanaang. Sabab ko Mian Bisa lapamo uange komuyu sulano poteali Mian Bisa namian doi Dunia mo Boolu tukon potoupiyo kona babasalan.

¹³Daano koidan komeeng kolangge bailong mo kubaiyo kami sidutu pelenggene kinatauwan doi Mian Bisa. Langgedoo doiyamo, baikon salataa mai polongganano kobilita moluwedoi Mian Bisa tuuk doikoo, komuyu lengele tukon talimayo bilitadoo bolikon bunu bilita moluwedoi banggapi, bai bunu bilita mo bisa-bisa moluwedoi Mian Bisa. Yanamo komo

balimang doi butongmuyu mo mangangga doi Klistus. ¹⁴Utus-utus, kolangge komuyu mo toupiyo lapamo koidan Mian Bisa naanggota-anggota jemaat doi Yudea toupiyo mo tealimo Yesus Klistus namian. Komuyu toupiyo kosakisaa luwedo komuyu pobangsa, bunomo lakon ko Mian Bisa naanggota-anggota jemaat doi Yudeadoo natinoupidoo luwedo Yahudi miano. ¹⁵Dopai mian-mianoo komo akateyo Yesus tukon nabi-nabi, tukon sakisaayo kami. Yanila musuwo komian sasaibino, tukon ko Mian Bisa aki nasanaanggene tuuno doi yanila. ¹⁶Tukon yanila ala-alangiyo kami mopelengene kobilita doi bangsa-bangsa mobilikon Yahudi miano bilita mo moola salamatene dopai bangsa-bangsadoo. Kalu bunoo doiya dopai Yahudidoo miano suungiyo momeenggon kona pai lalim sulano napolong koaito. Tukon budodoiya kona pupusan yaniladoo laate ko Mian Bisa naukuman!

Paulus naiyasano koidan molubotiiyo komian badaang doi Tesalonika

¹⁷Bai Utus-utus, salataa kami pobabandakon tolono aki namalumbit doi komuyu – pobabandakon doi matanggita bai konoanggita aki – kami pololokon neneke ikoo tukon kakaate tutuuno nda pososung koidan! ¹⁸Komai tetel sio ampakon lubotiiyo komuyu; tukon yaku, lapamo soba-sobayo idan lua luunggon, bai ko Ibiliis alangiyo kami. ¹⁹Bisa tuuno komuyumo komai moinian tukon komai labaan. Sabab kalu naikon Temeneno Yesus lubat, tukon kita mangadap, maka komuyumo naikon komo teali mai banggaalan! ²⁰Takainomo komuyumo kai komo teali mai banggaalan tukon mai labaan!

3 Doibundu komai poloonan akimo mai moola taane koidan. Tobikon doiya kami bapikil kona monondokan, tadul mai tinggale doi Athena, ²tukon kami daano bintekene koutusonggita Timotius. Yana meeng ko Mian Bisa napeleleani mo balimang pomeenggon kami doi babilitakanano ko Bilita Monondok kaliangano Klistus. Kami bintekene Timotius doikoo sulano yana naekeengele komuyu tukon nadelenge komuyu sulano napololokon moonggol kopoo manganggaan doi Klistus. ³Tukon bunoo doiya akiyo momeeng komian doi komuyudoo

mo mundul sabab doi nda sakisaa nia. Komuyu susuumuyu toiyo baikon do sakisaadoo tongusokon doi Mian Bisa natetel motuuk doi kita. ⁴Doi tembodoo kami modaano polaing komuyu, kami lapamo pailukene doikoo loolukonoo baikon kita naikon malaat sakisaa. Tukon doiya takainomo bisa-bisa motealimo; komuyu susuumuyu toiyomo. ⁵Doiyamo kosababpo yaku bintekene Timotius, sabab yaku yase koidan toiyo bulaando kona tobinggatan pomangangaan doi Klistus. Yaku sasaakiyo ko Ibiliis nggoola oluliyoyo komuyu maka sasaibino komai pakadakan teali akiyo kolabano.

⁶Budodoiya Timotius lapamo abali tukon lapamo pelengene doi kami kobilita laba-labaan kaliangano bulaando kopoo mangangaan doi Klistus tukon kopoo poseangan. Yana pailukene doi kami baikon komuyu sidutu daano kopoo kanangkanangan mo monondok doi kami motangabos doi noamu. Tukon komuyu yase pososuung tukon kami, pokakana buno kamidoo yase pososuung tukon komuyu. ⁷Doiyamo kosababpo, Utus-utus, doi susaan tukon sakisaa lalomo, kami moola tohibul salitadoo kaliangano komuyumo. Kopoo mangangaan doi Klistus akabasale konoanggami, ⁸tobikon budodoiya kami lasakanggenemo kotuboan mobisa-bisa, tongo komuyu tataap kokondong kokoonggol, pomeenggon tukon Temeneno. ⁹Bulaando kona babasalan komai kinatauhan doi Mian Bisa doi sasaibino kolaba-labaan kami mo toupiyo doi salaano sabab komuyu. ¹⁰Oloyo popook kami kabiyo doi yana tukon tootubo konoanggami, sulano kami moola pososuung tukon komuyu sulano osukupiyo oilamo kopoo pinalaluu motuuk mangangaan doi Klistus bulaando kona bisaan.

¹¹Boliisi lakon ko Mian Bisa Tamanggita susuungo, tukon nda Temeneno Yesus nakeseayo kololoon doi kami sulano mai pososuung tukon komuyu! ¹²Boliisi ko Temeneno nakubaiyo komuyu pololokon pomamaasikon meeng, tukon bailong tukon po pololokon mamaasikene sasaibino komian, sulano dopoo seang nasosuungi, pokakana buno komai seang doi komuyu. ¹³Tukon buno doiya ko Temeneno naikon ekeenggele konoamu, sulano komuyu moliyous tukon akiyo kososibolii doi Mian Bisa Tamanggita salaano, doi tembodoo nda Temeneno Yesus lubat polaing sasaibino komian mo teali namian.

Tuboan mo sanaangene ko Mian Bisa noano

4 Kona pupusan Utus-utus, kami lapamo beena popiala doi komuyu kaliangano bulaando kopoo kubaiyano kopoo tuboan sulano nasanaangene ko Mian Bisa noano. Takainomo komuyu lapamo tubo buno doiya. Bai budodoiya luwedo Temeneno Yesus nakuasa, kami kabiyo tuuno doikoo tukon desaaake sulano komuyu kakaate lobian koidan doi langgedoo! ²Sabab komuyu toiyomo kootunggul-otunggul kami mobeekene doi komuyu luwe Temeneno Yesus nakuasa. ³Naiyamo ko Mian Bisa namongiasan: Sulano komuyu kopoo tuboan tolongo tuuk yana, moliyous, dedeengene sasaibino kokokubai mo balolowa. ⁴Memeeng komalane doi komuyudoo sio natoiyu bulaando kotuboan pomeenggon koboloki tukon kokubai mo sanaangene ko Mian Bisa noano tukon banggapi. ⁵Inai potubo loingiyo konoamuyu naminooton doi poboloki, pokakana komian badaang nakokubai mo aki natingoniiyo ko Mian Bisa. ⁶Lobodoo mobuno doiya, inaikai komeeng komian mokubai sala doi utuso, kabai mookoliyo. Looluk kami lapamo mebee poingotii tuuno doikoo, baikon ko Temeneno naikon ukume komian badaang mo kubaiyo kokasalaan-kasalaan mobuno doiya. ⁷Mian Bisa uange kita, bolikon sulano nda tubo balolowa, bai sulano kita tubo tukon kokubai mo sanaangene konoano. ⁸Mian mo akikene naotunggul nia, bolikon kai akikene kobanggapi, bai akikene ko Mian Bisa mo beekene kona Loh moliyous doikoo.

⁹Akimo napalaluu koidan kami batulis doikoo bulaando kaliangano komuyu sio poseange koutus-utus mo pomeenggon mangangaan. Komuyu susuumuyu lapamo Mian Bisa otunggule sulano poposeang. ¹⁰Tukon nalobo nia lapamo komuyu tudoi-kene doi sasaibino koutus mopomeenggon mangangaan doi posaapon ko Makedonia. Bai, Utus-utus, kami kabiyo tutuuno, sulano komu tuboan teali lobian kona monondokan koidan. ¹¹Pokakaate potubo tukon tanaang tukon inai momasambul palasoalan mian bailong. Siokai komuyu balimang mouggolii onggos susuumuyu, bunomo lakon kami loolukonoo lapamo palentakene doikoo. ¹²Kalu komuyu tubo buno doiya, komuyu aki pomoini doi indee komiano koidan, tukon komian badaang mo aki namangangga doi Klistus, naikon odotiiyo komuyu.



Lua komian mo daano balimang (4:11)

Temeneno nalubatan

¹³Utus-utus, kami yase sulano komuyu potoiyo kona bisaan kaliangano doi mian badaang mo lapamo mate; sulano komuyu naaki nasusa konoamuyu bunu badaang komian bailong mo akiyo kona moinian. ¹⁴Kita anggayo baikon Yesus lapamo mate tukon abalimo tubo. Doiyamo kosababpo kita anggayo koidan baikon ko Mian Bisa naikon abali otuboiyo sasaibino komian mo anggayo Yesus tukon lapamo mate, sulano yanila tubo polaing yana.

¹⁵Kokaliangano langgedoo, naiyamo ko Temeneno naotunggul doi kami moyase pelengene doikoo: Doi tembodoo Yesus nalubatan, kita mo daano tubo aki naikon nda matailukiyo komian badaang mo lapamo mate doi loolukonoo. ¹⁶Sio malaekat mobabasal naikon bantilo tukon alalo mo babasal tukon ko Mian Bisa napopuukon pinuuko pokakana komeeng

kotanda. Maka Yesus susuungo naikon obulus luwedo sulugaa, tukon Salani miano badaang mo lapamo mate naikon inotuboi loolukon. ¹⁷Lapa doiya, kita mo daano tubo doiya tembodoo naikon polaing-laing biningkat tukon yanila doi bunong lalomo sulano pososung tukon Temeneno doi dapang. Maka kita naikon podungoli ko Temeneno posidutukon. ¹⁸Tobikon doiya, siokai komuyu pokoonggoli noa tukon popakeyo nabantil-bantilan nia.

Pobasadia tuuk doi Temeneno nalubatan

5 Utus-utus, aki napalaluu kami batulis doikoo oila kotembono mo pokokonoi doiya langge-langgedoo naikon natealian. ²Sabab komuyu susuumuyu toiyomo tukon kaliangano baikon Ko Oloyo Temenenodoo nalubatan naikon lubat pokakana kopondikuk lubat doi popook tangano. ³Kalu daano komian mobantile, “Sasaibino aman tukon monondok,” maka doiyamo kotembono sosinggot yanila naikon malaat silakaan, tukon akiyo komeeng komian momoola luput. Doiya langgedoo naikon teali sosinggoton, pokakana palasaan sakit mosuungan mo laate meeng koboine naikon mo mosuung. ⁴Bai komuyu bolikono mian mo tubo doi kalipookan lalomo, tobikon do oloyodoo komuyu gilakene pokakana kopondikuk nalubatan. ⁵Utus sasaibino daano mian mo tubo doi madialan lalomo; komuyu tongusokon doi oloyo mo madialan. Kita bolikon mian mo tubo doi kalipookan lalomo, kabai mo tongusokon doi popook mo kalipookan. ⁶Tobikon doiya aki namoola kita momoolo pokakana komian bailong. Kita sio nda badagai tukon konda pikilan sio namadialan. ⁷Doi popook oloyono komian moolo, tukon doi popook oloyono koidan komian teali malangu. ⁸Bai kita nia mian badaang mo tongusokon doi oloyo mo madialan; sabab doiya konda pikilan sio namadialan. Kita sio nda tataap mangangga doi Temeneno tukon seseange komian badaang bailong tukon moinikene tuuno baikon ko Mian Bisa salamatene kita. Doiyamo konda tompide mo dupele kita doi nda polobosian molawane kokalipookan. ⁹Mian Bisa lilike kita bolikon sulano nda inukum, bai sulano nda sinalamaton lolo

doi nda Temeneno Yesus Klistus. ¹⁰Yana mate tuuk kita sulano doi tembo yana nalubatan koidan – kai kita daano motubo, kai kita matemo – kita tubo polaing yana. ¹¹Tobikon doiya, siokai komuyu tataap podudunggon tukon pookonggoli, buno pokakana komuyu daano kubaiyo budodoiyo nia.

Otunggul-otunggul napupusan tukon teteba

¹²Utus-utus, kami kabiyo tukon tutuu sulano komuyu pahalagaiyo komian badaang mo balimang doi komuyudoo; doiyamo yanila mo lapamo Temeneno lilike sulano nakatuaiyo tukon otinauwo komuyu. ¹³Pokubaiyo yanila tukon poodotiiyo tukon pokilakene sabab neneke oila komo yanila kubaiyo. Potubo memeeng tukon monondok.

¹⁴Kami kabiyo koidan, Utus-utus, liekene tukon monondok komian mo aki nayase balimang; pokeenggele komian noano mo matakut; potomboniiyo komian mo palaluu tinombonii tukon posabal doi sasaibino komian. ¹⁵Dagaiyo inai nadaano komian mo balese kokulokisan tukon kulokisan. Pokakaate sidutu sulano pokubaiyo komonondokan meeng komian doi meeng komian bailong tukon doi sasaibino komian.

¹⁶Siokai komuyu momeenggon polaba-laba, ¹⁷tukon posambeang momeenggon. ¹⁸Doi sasaibino kondondoong lalomo siokai komuyu pobasyukuul, sabab doiyamo ko Mian Bisa nainiyas doi komuyu buno mian mo tubo pomeenggon tukon Klistus Yesus.

¹⁹Inai mopisaiyo ko Mian Bisa Na Loh. ²⁰Inai moaanggene ambang kobilita-bilita mo bineekon luwe Mian Bisa Na Loh. ²¹Sasaibino kolobo sio nainuji, tukon komo monondok sio nalinoingi. ²²Dedeenggene sasaibino kokaliangano kokokubai molokis.

²³Boliisi ko Mian Bisa susuungo komo beekene kita komonondokan, tealikene komuyu mian mo bisa-bisa tubo tongo doi Mian Bisa. Boliisi ko Mian Bisa nadagaiyo kobutomu kokabuson mau loh, jiwa mau kai butomu, polong aki nadaano kona lokisan kalu kotembono konda Temeneno Yesus Klistus lubat koidan.

²⁴Mian Bisa, mo lapamo uange komuyu, naikon kubaiyo do langgedoo sabab yana molole.

²⁵Posambeangene kami, Utus-utus!

²⁶Popokila-kilakon sasaibino doi namonondokan buno utus Salani.

²⁷Mangatas Temeneno nakuasa, yaku kabiyo tukon tutuu sulano po babakene nasulatia doi sasaibino koutus mo pomeenggon manganggaan.

²⁸Boliisi konda Temeneno Yesus Klistus nabalakaatiyo komuyu.

Komai holomat,
Paulus

PAULUS NASULAT KOLUANO DOI JEMAAT TESALONIKA

PANGANTOKON

Komian pusinggene bulaa kokaliangano Klistus nalubatan koluano luunggon daano momeenggon mosumbut koponggeelekian doi jemaat Tesalonika lalomo. Paulus nasulat koluano doi jemaat Tesalonika tinulis sulano alapayo doiya palasoalanoo. Yanila napalaat baikon Klistus nalubatan koluano luunggon laatemo kotembono. Doiya palaato sala, Paulus bantile. Sabab, kalu akiyoon Klistus naabali doi dunia, kokulokisan doi dunia pololokon kulokis tuuno loolukon binaba doi meeng komian mo tinoiy doiyamo "Banggapi Lokis" tukon mo apase Klistus.

Paulus otuuke doi napambaca baikon yanila palaluu tuuno napoo koonggol doi napomaanggaanoo lalomo doi Klistus mau kai konapo tuboan susa tuuno tukon yanila sio nasinakisaa. Paulus otunggukene sulano yanila memeeng kopau balimang tuuk doi napoonggos, pokakana buno Paulus tukon tula-tulano. Koikoidan sulano yanila nasidutu mongkubai kokubai momonondok.

Antoko

Pololukoni 1:1-2

Nggaalano tukon palenta 1:3-12

*Otunggul bulaa kaliangano Klistus nalubatan doi dunia
koluano luunggon 2:1-17*

*Otunggul bulaa kokaliangano kona tutuuwan ko Salani miano
nakalakuan 3:1-15*

Potutupo 3:16-18

1 Utus-utus jemaat doi Tesalonika, mo tealimo Mian Bisa namian Tamanggita tukon Yesus Klistus! Kami, doiyamo Paulus, Silas tukon Timotius, ²moinikene sulano ko Mian Bisa Tama tukon Yesus Klistus mebee balakaat tukon sanaangan doi komuyu.

Ukum mo inotuwongikon doi Klistus nalubatan

³Utus-utus, kami sidutu mopolonggon kinatauan doi Mian Bisa sabab komuyu. Tukon takainomo kami sio mai kubaiyo buno doiya, sabab komuyu pololokon mangangga doi Klistus, tukon komuyu momeenggon poseang-seang meeng tukon bailong. ⁴Doiyamo kosababpo bulaando kami bantile doi komuyu samba-samba komai lubotiiyano ko Mian Bisa najemaat-jemaat. Tukon kami sanaang mobasalitakene bulaando komuyu kopoo tataapan momangangga doi Klistus mau doi sakisaa lalomo tukon sakisaa komuyu mo toupiyo.

⁵Tukon naiyamo kona tokitaan bulaando kona adilan ko Mian Bisa nakaputusan. Komuyu lapamo sakisaa sabab Mian Bisa na Dunia Boolu, tukon tobikon doiya komuyu inaanggon moola usok doi lalomo. ⁶Yana lakukanggene oila komo adil, tukon naikon soboliyo kosakisaawan doi mian mo kubaiyo komuyu sakisaa. ⁷Tukon doikoodoo diabudoodoo mosakisaa – bunomo lakon doi kami – Mian Bisa naikon beena naleleapan nalaate kooloyono Yesus naobulusan luwedei sulugaa tukon okitakene kobutongo polong namalaekat-malaekat mo tambongan ⁸tukon koidan aung mo kolot-kolot. Yana obulus sulano naukume komian badaang mo aki napusinggene ko Mian Bisa tukon mo aki nayase tubo pokokonoi tukon ko Bilita Monondok tentang Yesus nda Temeneno. ⁹Mian badaang naikon mantalima ukuman silakaan sidutu-posidutukon, sinakukon doi tongkulung doi mobolikon Temeneno nalingkungan tukon doi nakuasa mo babasal; ¹⁰sasaibinodoo naikon teali doi oloyono nalubatan sulano kona mian naakabasale tukon sulano nainodotii doi sasaibino komian mo mangangga. Mau komuyudoo naikon daano doi Mian Bisadoo namian lalomo, sabab komuyu lapamo mangangga doi bilita kami mopelenggene doikoo.

¹¹Doiyamo kosababpo kami sidutu sambeangene komuyu. Kami sambeang sulano ko Mian Bisa natealikene komuyu

namoola tubo loingiyo kona mongiasan; tobikon doiyamo yana uwange komuyu. Boliisi ko Mian Bisa, tukon nakuasa, okoonoyo kona mongiasan sulano kubaiyo komonondok, tukon kindendeke sasaibino kolimang komuyu mo lakukene sabab mangangga doi Klistus. ¹²Tukon bunu doiya konda Temeneno Yesus komuyu akabasale, tukon komuyu koidan Yesus akabasale sabab namonondokan konda Mian Bisa noano tukon Temeneno Yesus Klistus.

Banggapi Lokis

2 Tentang konda Temeneno Yesus Klistus nalubatan, tukon kaliangano konda pinototongikonan doi nda podungolian tukon yana, naiyamo daku kinabi tukon tutuu doi komuyu: ²Inaikai posobit-sobit pusing kai iyos sabab modaano kobilita baikon laatemo kooloyono Yesus nalubatan koidan. Ugaate do bilitadoo luwedoi meeng konubuat, kabai luwedoi meeng kootunggul; kabai naaki nadaano komian mo bantile baikon kami biasa tulise komo bunu doiya doi meeng komai surat lalomo. ³Mau nabulaandomo koidan, inai popataikene komian naokoliyo komuyu. Sabab kalu akiyoon nalaate do Oloyodoo, siokai nateali nalangge nia lolukon: Badaang komian naikon moupa, moakiyenggene Klistus; tukon Banggapi Lokisdoo mo lapamo tinantukon usok doi nalaka, naikon okitakene kobutongo. ⁴Tukon nababanggaalan yana naikon nggimal tukon atandake kobutongo doi sasaibino kobanggapi nasinosubai, kabai doi sasaibino koilah doi banggapi mo aanggene Mian Bisa. Baikon yana naikon osulang doi Mian Bisa Nabonua tukon pelenggene baikon yanamo ko Mian Bisa.

⁵Poneneeke baikon yaku daano pailukene sasaibinodoo doi singgatoos yaku daano polaing komuyu. ⁶Tukon komuyu toiyo oila diabudodoo komo akiyenggene kona tealian sasaibinodoo. Sio doi tembono mo lapamo Mian Bisa tantukanggene, Banggapi Lokisoo naikon lubato. ⁷Kobukuanan mo kubayo kolokis lapamo atambuune kona balimangan tukon laasia, bai daano motinaataan. Sio kalu domo taanedoo lapamo sinaakon, ⁸maka nasodo tokita do Banggapidoo mo Lokis. Maka kalu Temeneno Yesus lubato, yana akateyo do Banggapidoo mo Lokis tukon naansaang luwedoi babano, tukon momanase

tolongo namontotilangan doi nalubatan. ⁹Banggapi Lokisoo naikon lubat tukon meeng kona kuasa mo babasal moluwedoi Ibiliis. Yana naikon kubaiyo sasaibino kolangge kaliangano mominasaingdinggon langge-langge mobolikon lobo mo moonoo tukon kobangokoliian. ¹⁰Yana pakeyo sasaibino kobangokoliian mo lokis sulano naatapayo komian badaang naikon mo silaka. Yanila naikon silaka sabab aki natalimayo tukon aki napo yase kobilita mo bisa moluwedoi Mian Bisa mo moola salamatene yanila. ¹¹Doiyamo kosababpo ko Mian Bisa olubatene doi yanila komeeng kokuasa mo atapayo yanila, tobikon yanila mangangga naikon oila komo aki nabisa. ¹²Kobalino, sasaibino komian mo yase kolalim tukon aki naanggayo domo bisadoo, yanila inukum.

Komuyu linilik sulano posinalamaton

¹³Utus-utus Temeneno mo mamaasikene! Sidutu kami sio pelenggene kokinatauwano doi Mian Bisa kaliangano doi komuyu, sabab luwedoi tumbeno Mian Bisa lapamo lilike komuyu sulano posinalamaton. Langgedoo doiya teali oila ko Mian Bisa Na Loh nalinimang doikoo sulano natealikene komuyu Mian Bisa namian mo moliyous tukon sabab komuyu anggayo kobilita mo bisa moluwedoi Mian Bisa. ¹⁴Tobikon doiyamo ko Mian Bisa uangemo komuyu lolo doi Bilita Monondok kami mobabilitakene doikoo. Mian Bisa uange komuyu, sabab yana yase sulano komuyu tulut lasakanggene kona babasalan konda Temeneno Yesus Klistus.

¹⁵Tobikon doiya, Utus-utus pokokondong kokoonggol tukon pobataani momeenggon doi otunggul-otungguloo mo lapamo kami beekene doikoo, mau natolongo bantilan mau kai natolongo motinulis.

¹⁶⁻¹⁷Boliisi doi nda Temeneno Yesus Klistus susuungo, tukon nda Mian Bisa Tama hibule tukon keenggele konoamu, sulano pomoola limange tukon babilitakene oila komo monondok. Sabab ko Mian Bisa seseange kita, tukon sabab namonondokan konoano yana kubaiyo kita tataap sabal, tukon moinikene komo monondok.

Posambeang tuuk doi kami

3 Napupusan, Utus-utus, posambeang tuuk doi kami. Posambeang sulano kobilita moluwedoi Temeneno moola tasabukon momeenggon tukon mosobit tinalima monondok, pokakana buno komo lapamo teali doikoodoo loolukon. ²Posambeang koidan sulano ko Mian Bisa nasalamatene kami doi mian badaang mo palalentel tukon molokis. Sabab aki nasasaibino komian anggayo do bilitadoo moluwedoi Temeneno.

³Bai ko Temeneno molole. Yana naikon ekeenggele komuyu tukon lindungiyo komuyu luwedoi Mo Lokis. ⁴Tukon kami anggayo tuuno doi Temeneno kokaliangano komuyu, baikon komuyu daano mokubaiyo tukon momeenggon kubaiyo oilamo kolobo kami mo pailukene doikoo.

⁵Boliisi ko Temeneno naloolainge komuyu sulano nalobian kopoo mangalantikanano baikon ko Mian Bisa mamaasikene komuyu tukon baikon Klistus beena kasabalan doikoo.

Kawajiban sulano nda balimang

⁶Utus-utus, tolongo kuasa Yesus Klistus, kami mapalentakene sulano komuyu pobadodoonggon doi sasaibino koutus, mo tubo bea-bea, tukon mo aki naloiingiyo kootunggul-otunggul kami mobeekene doi yanila. ⁷Komuyu susuumuyu toiyo baikon komuyu mololoi sontoh doi kami. Kami aki mai bea-bea tembodoo kami modaano pototongi tukon komuyu. ⁸Kami aki mai kaane komian nakinaan tukon aki mai beale. Kobalino oloyo popook kami balimang kokobukuan sulano kami aki mai kubaiyo susa mau indee komiano modaano doi komuyudoo. ⁹Kami kubaiyo doiya bolikon sabab kami aki balahaak motuntute sulano komuyu potomboniiyo kami, bai sabab kami yase moteali sontoh doikoo. ¹⁰Do singgatoos mai daanoan doi komuyu, kami mebee palatulan nia, "Mian mo aki nayase balimang, aki namoola kaan."

¹¹Kami bantile naiya sabab kami lengele baikon daano ko mian-mian doi komuyudoo mo tubo bea-bea. Yanila aki namongkubai meeng kolobo, tolongo sibuk momongusoki mian bailong naulusan. ¹²Tukon Temeneno Yesus Klistus nakuasa kami palentayo do mian badaang tukon beena poingotii, sulano yanila nabalimang tukon monondok tukon yanila moubolii onggos susuungo.

¹³Bai komuyu inai pomaalingene kubaiyo komonondokan.
¹⁴Ugaate sio nadaano komian mo aki naloingiyo oila komai binantil nai sulatia lalomo. Pobadagai doi mianoo mobuno doiya tukon inai poposumboli tukon yana sulano yana namamaa. ¹⁵Bai inai pokubaiyo yana bunu musu; tolongo otinauwo yana bunu meeng koutus.

Bantil-bantilan napupusan

¹⁶Temeneno doiyamo kouuno konda monondokan. Boliisi yana nasidutu mebee monondokan doikoo sasaibino kolangge. Boliisi ko Temeneno naloolainge Utus sasaibino.

¹⁷*Teteba moluwedoi yaku, Paulus.* Yaku susuunggu komo tulise naiya sembelengia. Naiyamo kotandano yaku mo saape doi sasaibino daku surat.

¹⁸Boliisi konda Temeneno Yesus Klistus nabalakaatiyo Utus sasaibino.

Komai holomat,
Paulus

PAULUS NASULAT KOMEENGO DOI TIMOTIUS

PANGANTOKON

Timotius daano meeng ko Salani miano mo daano mopaumalanekon doi Asia Pauno, mo lapamo teali Paulus tulano tukon potomboniino doi nalimang lalomo. Timotius tamano meeng ko Yunani miano tukon kotinano Yahudi miano. Dosulato komeengo doi Timotius, linukonggon tolu kolangge mo daano kona potaamian meeng tukon bailong.

Komeengo doiyamo iningotiikon doi Timotius motuuk doi otunggul-otunggul mosala mo talaat doi jemaat lalomo. Otunggul-otungguloo buno naposombuliyen kopalaat Yahudi tukon palaat mobolikon Yahudi moluwedoi maanggaan baikon nadunia nia kulokiso, tukon kokasalamatan tongo linaat kalu komian daano kona potoiy motontong, tukon loingiyo koatulan-atulan buno andeno palatulan aki namoola baasowaan, aki namoola kaane kokinaan moaki naminoolakon tukon bailonggon.

Koluano, doiyamo otunggul-otunggul doi Timotius motuuk doi ulusano kojemaat tukon komo tuuk doi bakaledaan. Inotunggukon doi yana kosipat-sipat doi mian mo moola teali pototooli tukon potombonii jemaat. Doibundu Timotius inotunggul bulaando kokaliangano yana namoola teali meeng Yesus Klistus naata mo monondok tukon bulaa kokaliangano kona tanggung jawab motuuk doi memeeng kotambuno komian mo teali anggota jemaat.

Antoko

Pololukoni 1:1-2

*Pongotunggul-pongotunggul motuuk doi jemaat tukon kopai
ponguluso 1:3-3:16*

*Pongotunggul-pongotunggul doi Timotius motuuk doi
nabalimangan 4:1-6:21*

1 ¹⁻²Timotius, daku pau mo bisa doi Temeneno lalomo! Sulat nia luwedoi yaku, Paulus, Klistus Yesus nalasul luwe Mian Bisa napalenta, Pasalamaton kita tukon luwe Klistus Yesus napalenta, konda moinian.

Boliisi ko Mian Bisa Tama tukon Klistus Yesus nda Temeneno mebee balakaat, maasi tukon namonondokan doikoo.

Poingotii tentang otunggul mo sala

³Yaku yase sulano ikoo tataap dungol doi Efesus buno komo lapamo yaku bantile tuuno doikoo singgato kutausan doi Makedonia. Sabab doi Efesus daano kobubulaa komian mo babilitakene kootunggul mo aki nabisa, tukon ikoo sio mupantane yanila. ⁴Bontiikene doi yanila sulano naakimo koidan napo mangala palaatian doi nunuton-nunuton tukon salita-salita tundun mo akiyo kona kabu-kabusan. Sasaibino doiya tolono lubatene kopoonggeelekian, tukon aki namajukene ko Mian Bisa natetel mo tolono moola tiningonii lolo manganggaan doi yana. ⁵Doiya kuotunggul kona makisuut doiyamo sulano komian namoola malaat noa mo bilisii tukon noa mo moliyous, tukon tutuu mangangga doi Temeneno, tukon kalu buno doiya yanila moola seseange kotula-tulano. ⁶Daano kosoobos komian mo akimo natubo buno doiya, tukon tongusokon doi ponggeelekian-ponggeelekian lalomo mo akiyo kolabano. ⁷Yanila yase teali gulu-gulu agama, banggokai yana susuungo aki natoiyono konapo bantil-bantilan yanila mopakeyo kabai langge-langge yanila mo komukakene tukon moanggayomo.

⁸Kita toiyono baikon koukum agama monondok, kalu ginunakanggon tukon doi nakanaan. ⁹Tantu sio naninoonook baikon koukum mokinubai bolikon tuuk doi mian momonondok, bai tuuk doi mian molupaiyo koukum, mian molokis, mian mopalalentel, tukon doi mian mobaladosa, mian moakiyo kona agama, mian moyase kodunia namongiasan, tuuk doi mian mo akateyo kotamano kabai tinano, doi mian momangakate

sasaibino kolangge, ¹⁰tuuk doi mian balolowa, seselan, panipu, bakala-kala; sakisii-sakisii mokala, tukon doi indee komiano mo kubaiyo kolangge-langge mo pototonggulung tukon otunggul mo bisa. ¹¹Doi otungguloo talaat doi Bilita Monondokoo lalomo komo babilitakangene bineekono doi yaku, doiyamo Bilita Monondok moluwedoi Mian Bisa mo babasal tukon moola nangginaal.

Palasaan kinatauhan sabab Mian Bisa namaasi

¹²Yaku bakinatauhan doi Klistus Yesus nda Temeneno. Yana lapamo beena bukuanan doi yaku sulano kuleleaniyo yana, tukon yana aangene yaku moola limange do limangoo, ¹³doi loolukonoo yaku bakala-kalakene tukon sakisaayo polong totulaiyo yana. Bai ko Mian Bisa mamaasikene yaku, sabab doiya kosinggato yaku akiyoon kumangangga, jadi akiyoon kutoiyo oilamo daku kinubai. ¹⁴Tukon yaku binee momeeng tukon maasi doi nda Temeneno. Yana beena doi yaku sulano kumoola mangangga doi yana tukon seange kotulando banggapi. Kamampuanoo mobineekon doi kita sasaibino mo lapamo pomeenggon tukon Klistus Yesus. ¹⁵Bisa tuuno nabantilan nia – sabab doiya sio natinalima tukon inangga tuuno – : “Klistus Yesus lubat nai dunia nia sulano nasalamatene komian modaano kona lalim.” Tukon yakumo komian mo daano kona lalim mo kulokis tuuno. ¹⁶Bai tobikon doiya ko Mian Bisa mamaasikene yaku, sulano Klistus Yesus namoola tudoikene kookabus kona kasabalan motuuk doi yaku, mian mo badaang tuuno kona lalim. Tukon naiya teali meeng kosontoh motuuk doi sasaibino komian naikon mo mangangga doi yana tukon malaat tuboan mobisa tukon posidutukon. ¹⁷Mian Bisa Tomundo sasaibino kolounu, sio nainodotii tukon ngginaal momeenggon, sabab yanamo komo posidutukon, mo aki natokita tukon mo meeng! Amin.

¹⁸Timotius, kupau! Nalimangia yaku beekene doikoo, moneneeke naikon ko Mian Bisa nateteba nabi-nabi mo pelengene doi jemaat lalomo kaliangano butomu. Siokai do tetebadoo nateali mandu doikoo doi mupalajuangan lalomo mo monondok. ¹⁹Pobalajuang tukon pobataani doi manganggaan mo bisa tukon noa mo bilisii moliyous. Daano komian badaang

mo aki naikon napusinggene konoano nabantilan, tobikon rusak yanila namangangaan. ²⁰Doi yanila doiyamo Himeneus tukon Aleksandel. Mianoo luaila lapamo yaku ukume tukon beekene doi Ibiliis, sulano yanila balajal tade mokulokisanggene ko Mian Bisa.

Jemaat nakaledaan

2 Tumbe-tumbeno, yaku kabiyu tutuuno sulano kokakabi, sambeangan, tukon sambeang mobulusan tukon mangkabian kinatauan napinolonggon doi Mian Bisa tuuk doi sasaibino komian; ²tuuk doi tomundo-tomundo tukon tuuk doi sasaibino komian mo mataani sambu. Pokabiyu sulano kita nda moola tubo tanaang motuuk doi Mian Bisa tukon kokubai mo pokokonoi. ³Doiyamo komo monondok tukon mosanaangene ko Mian Bisa noano, Pasalamaton kita. ⁴Yana yase sulano sasaibino komian nasinalamaton tukon natoiyu komo bisa. ⁵Sabab, tolongo daano meeng ko Mian Bisa, tukon tolongo meeng komo tatangaiyo ko Mian Bisa tukon banggapi, doiyamo Klistus Yesus. ⁶Yana meeng kobanggapi mo lapamo salakangene kobutongo sulano naosobiiyo sasaibino komian doi yanila nalalim-lalim. Tukon doiya Mian Bisa tudoikene doi tembono mo poopaason, baikon yana yase sulano sasaibino komian nasinalamaton. ⁷Tukon doiyamo kosababpo yaku sinumbolii ampakon doi mian badaang mobilikon Yahudi sulano kubabilitakene doi yanila bilita kaliangano mangangaan mo bisa. Komo yaku moloolukene nia doiya bisa, yaku aki kukala-kala.

⁸Yaku yase sulano inaando koidan kopau malane mosambeang tukon noano moliyous, akiyo kopoonggimakanan kabai posalakanan.

⁹Siokai kopai boine nakindendeke kobutongo tukon mopantas tukon mapake pakean mo talakana. Inai mopake kopatolano kobuuk mo sangalaasan kabai polohiasan mosoni kabai mutiala, kabai pakean mo maaling. ¹⁰Tadukai koboi-boine napekeiyu kobutongo tukon kokubai-kokubai mo monondok bunu komo pokokonoi doi boine mo sambeang doi Mian Bisa. ¹¹Boine sio nabalajal tukon tutuuke kobutongo tukon molole. ¹²Yaku aki kupataikene koboine nabangotunggul kabai palentayo komala-

malane; yanila sio naaki nabiyok-biyok. ¹³Sabab komo kinubai tumbe-tumbeno doiyamo Adam tukon doibundu maka Hawa. ¹⁴Tukon bolikon Adam, bai doboinedoo komo tongokolii, tobikon nalupaiyo ko Mian Bisa napalenta. ¹⁵Mau nabuno doiya, koboine naikon salamat doi namosuungan pau, asal yana tukon ekependeyo konoano tataap mangangga doi Klistus tukon tataap seseange komian bailong tukon tubo tolongo tuuk doi Mian Bisa.

Pototooli jemaat

3 Bisa tuuno naiya bantilan nia,
 “Mian mo yase teali padagai jemaat, moyase meeng kolimang mo daano koanggano.” ²Meeng komian moteali padagai jemaat siokai mian mo akiyo kososiboliino, tolongo meeng kona boloki, toiyodo ototiiyo kobutongo, pandoi, tukon taatul; yana yase talimayo komian doi nabonua, tukon moola mongotunggul mian; ³inai kalu mian mo nggolonguwon kai mo yase ponggimakon kotulano. Bai kai, yana sio namantalamuyuk tukon yase kopoo damean. Yana aki namoola kaane kodoy. ⁴Yana sio natoiyodo atule kona bonua lalomo tukon monondok, tukon otunggule kona pau-pau sulano naanggayo tukon ototiiyo yana. ⁵Sabab kalu komian aki natoiyodo atule kona bonua lalomo susuungo, bulaando yana namoola atule ko Mian Bisa najemaat? ⁶Meeng kopadagai jemaat aki namoola doi meeng komian mo sodo usok Salani, sabab naikon yana teali banggaal-banggaal maka kinutuk bunodo Ibiliisoolulukon. ⁷Yana sio mian mo tololongol kosambunodo monondok doi masalakat; sabab kalu aki nabunodo doiya, maka komian totulaiyodo yana, tobikon yana otuwong doi Ibiliis natalong.

Potombonii jemaat

⁸Potombonii jemaat siokai koidan mian mo monondok tukon moliyous; aki nakaane kodoy; tukon aki nayase monginum suka bada-badaang. ⁹Yanila sio nabataani kokoonggol tukon yanila noano mo bilisii doi otunggul Salani miano namangangaan mo lapamo Mian Bisa okitakene. ¹⁰Kona tutuuwan yanila sio nai nuji loolukon, tukon kalu tokita yanila akiyo kososiboliino, maka nasodo yanila motombonii doi jemaat lalomo. ¹¹Yanila

naboloki sio koidan mian mo monondok, bolikon mian mo yase pobabakene kosalita. Yanila sio natoiyu odotiiyo kobutongo tukon moloyos konoano doi sasaibino kolangge. ¹²Potombonii jemaat sio natongo meeng kona boloki. Yana sio natoiyu atule kona pau-pau tukon kona bonua lalomo namonondok. ¹³Mian badaang mo motombonii tukon monondok doi jemaat lalomo, naikon inodotii tukon teali pololokon balani basilingangene kaliangano doi yanila komanganggaan doi Klistus.

Nda agama laasiano

¹⁴Yaku moinikene akimo namalumbit naikon yaku lubotii-yomo komuyu. Mau nabuno doiya, yaku tulise naiya sulatia doikoo, ¹⁵sulano kalu talambat, ikoo lapamo toiyo bulaando kita sio nda tubo buno Mian Bisa namondopulian, doiyamo Mian Bisa najemaat mo tubo. Naiyamo jemaat mo buno sudong pongokokondong tukon potombonii otunggul mo bisa moluwedoi Mian Bisa. ¹⁶Akiyo komeeng komian momoola akiyenggene, bulaando kona babasalan konda agama laasiano:

Yana okitakene kobutongo doi banggapi ndondoongo,
tukon Mian Bisa Na Loh okitakene bisa,
tukon malaekat kitayo.

Kona Bilita pinolonggon doi bangsa-bangsa,
tukon yana inangga doi posaapon kodunia
tukon biningkat doi sulugaa.

Gulu-gulu mokala

4 Mian Bisa Na Loh tukon togaas bantile baikon doi lounu-lounu naikon mo lubat, songobos komian naikon mulutat, akiyenggene Klistus. Yanila loingiyo koloh-loh mo atapayo tukon loloiyo koibiliis naotunggul, ²mo pinolonggon lolo doi mian badaang momunafik tukon kala-kala. Do mian-mianoo noano lalomo kalipookano. ³Yanila mongotunggul mian sulano naaki naosowaan tukon aki nakaane kokinaan motinantukon. Banggokai do kinaanoo Mian Bisa komo tealikene sulano nakinaan tukon mangkabian kinatauan doi yana doi mian-mian mo lapamo manganggaa doi Klistus tukon lapamo toiyo kootunggul mo bisa moluwedoi Mian Bisa. ⁴Sasaibino kolangge Mian Bisa mo tealikenedoo monondok, tukon akiyo mau nabaino meeng komo inaanggon pinatanggon kalu

lapamo tinalima tukon bakinatauwanan doi Mian Bisa. ⁵Sabab balakaat moluwedoi Mian Bisa tukon dosambeangoo kubaiyo do kinaanoo moola kinaan.

Klistus napeleleani mo balimang tukon monondok

⁶Kalu ikoo otunggulkene sasaibinodoo doi utus-utus mopomeenggon manganggaan, ikoo naikon teali Klistus Yesus napeleleani mo balimang tukon monondok. Tukon ikoo momeenggon kindendeke konoamu tukon bantilan Mian Bisa kita mo anggayo, tukon koidan otunggul-otunggul mo bisa mo lapamo ikoo loingiyo polong budodoo nia. ⁷Kokodoonggon doi salita-salita motoiyan mo akiyo kolabano. Siokai mulatiyo kobutomu motuuk doi tuboan mo talakana. ⁸Kolatian badani tolongo soisik kolabano, bai kolatian lohani daano kolabano doi sasaibino kolangge, sabab daano koteteba motuuk doi tuboan lounu nia tukon lounu mo lubat. ⁹Langgedoo bisa tukon sio natinlima tukon nainangga tutuuno. ¹⁰Doiyamo kosababpo kita balajuang tukon kakabukuan, sabab kita moini tutuu doi Mian Bisa mo tubo; yanamo Pasalamaton sasaibino komian, toloutama tuuno mian badaang mo mangangga.

¹¹Otunggulikene sasaibino doiya tukon sumboliiyo ko mian-mian naloingiyo. ¹²Inai mopataikene doi meeng komian moaanggene ikoo pepende sabab ikoo daano momongula. Kona kabalikan, siokai ikoo muteali sontoh doi mian badaang moanggayo komu bantil-bantilan tukon mukokubai, doikoo mumese-meseangan tulamu tukon manganggaan doi Yesus Klistus, tukon koidan doi mutuboan mo bilisii. ¹³Sodo kai doiya polong daku lubatan naikon, ikoo sio musunggu-sunggu basakangene ko Kitab Moliyous doi mian badaang, tukon dulunggene tukon otunggule yanila. ¹⁴Inaikai ikoo lalai mopakeyo kokalunia moluwedoi Mian Bisa Na Loh mo bineekon doikoo do singgato katua-katua jemaat binggakene kolimano doi oluno bunggono, tukon nabi-nabi mopolonggon teteba moluwedoi Mian Bisa tuuk doi butomu. ¹⁵Limange sasaibino doiya tukon tutuuno sulano komu kamajuan nakinita doi sasaibino komian. ¹⁶Dagaiyo kobutomu tukon dagaiyo koidan komu otunggul. Siokai ikoo molole molakukene sasaibino doiya, sabab tukon buno doiya ikoo naikon salamatenemo kobutomu susuumu mau koidan mian-mian mo lengele ikoo.

**Kawajiban motuuk doi mian-
mian mo pomeenggon manganggaan**

5 Inaikai ikoo monggimoliiyo tuuno komian mo lobian kona motuwaan doikoo bai tobiyo yana namolongol komu bantil-bantilan pokakana yana tamamu. Kubaiyo komian badaang momongula bunu utusomu, ²tukon boi-boine momotuwa bunu tinamu. Boi-boine momongula kubaiyo bunu utusomu piyoto, tukon kokubai mo bilisii.

³Odotiiyo kobalu-balu sunggu mo tubo susuungo. ⁴Bai kalu meeng kobalu daano kona pau-pau kai natumbu-tumbu, yanilamo kotumbe-tumbeno sio nabinee pangalatian baikon yanila sio napo palatikanggene konapo kalualga, tukon soboliyo kona poo olang tua nabudi tukon yanila nataatiyo. Sabab doiya langgedoo sanaanggene ko Mian Bisa noano. ⁵Balu mo bisa-bisa baino susuungo, tukon aki nadaano inde-indee komo moola pialayo, tolongo moini doi Mian Bisa. Oloyo popook yana sio namomeenggon sambeang doi Mian Bisa tuuk mangkabi palatolongan. ⁶Bai balu mo yase tubo sana-sanaang, lapamo mate mau kai yana daano motubo. ⁷Pelenggene naiya otunggul-otunggulia doi yanila, sulano yanila natubo akiyo kososiboliino. ⁸Bai kalu daano komian mo aki napialayo kopuli-pulino, pololokon doi nakalualga susuungo, doiya mianoo akiyenggene kona manganggaan; yana lobian kona kulokisan doi mian-mian mo aki namangangga.

⁹Tolongo balu mo moolakene naiya salat-salatia moola nainusokon doi balu-balu natinulisan lalomo: kona umul sio naaki nakulang doi noom kolono kotaum, tukon doi loolukonoo tolongo idan luunggon naosowaan, ¹⁰totoi bunu meeng koboine mo kubaiyo kolangge-langge mo monondok, bunu alanggano: lapamo akabasale kona pau-pau tukon monondok, sanaang momantalima tamu-tamu modungol doi nabonua, meleleani mian badaang momangangga, tulungiyo mian badaang mo susa, tukon lakukene tutuuno sasaibino kolimang kaliangano mo monondok.

¹¹Inai nainusokon doi daftal kobalu-balu mo daano mongula. Sabab kalu omiyo mokuwoton yanila teali bukuan tuuno, yanila yase osowaan koidan tukon tinggale ko Klistus. ¹²Maka yanila sala sabab otinggale kojanji mo bineekon doi yana. ¹³Tukon koidan yanila dadaate kotembo tukon usok kalual doi

mian nabonua. Tukon komo lobian kona kulokisan koidan, doiyamo baikon yanila balajal kulokisanggene komian bailong sambuno tukon yase mongusoki mian bailong naulusan tukon basilingangene kolangge-langge mo aki namoola binasikon. ¹⁴Doiyamo kosababpo yaku yase sulano kobalu-balu modaano mongula naosowaan koidan, malaat pau tukon uluse kona luma tangga, sulano konda musu-musu aki namalaat todanan mokulokisanggene kosambunggita. ¹⁵Sabab daano kobalu-balu mo tapamo moloingiyo koibiliis. ¹⁶Bai kalu meeng koboine Salani daano kona anggota kalualga mo lapamo teali balu, yana sio nabantuwo do balu-baludoo; inai napataikene sio jemaat komo tanggunge yanila. Kalu bunu doiya kojemaat moola bantuwo kobalu-balu mo tutuu bisa akiyo kona puli-puli.

¹⁷Katua jemaat mo lakukene kona limang tukon monondok, pantas nabinee paanggaan lua luunggon paku, toloutama tuuno yanila mo molole bahotbah tukon bangotunggul. ¹⁸Sabab doi Kitab Moliyous lalomo totulis, "Saapi mo daano tuda-tudange kogandum sulano natoliat kogandum batuno doi kulito inai nasinigot kobabano", koidan, "Mian mo balimang, balahaak motalimayo kona tambo". ¹⁹Inaikai potalimayo kotuduhan doi meeng kokatua jemaat, kasuali kalu daano lua tolu komian kai lobian mosakisii. ²⁰Mian mo kubaiyo kolalim, siokai naliniokon doi sasaibino kojemaat salaano, sulano kobailong nateali matakut.

²¹Doi Mian Bisa salaano, Klistus Yesus, tukon malaekat-malaekat mo linilik, yaku kabiyo tukon tutuu sulano ikoo loingiyo naiya otunggul-otunggulia akiyo kosasaaki mau doi indee komiano, tukon aki basembe-sembelenggon. ²²Inaikai natodudul mosobit mobinggakene kolimamu doi meeng komian mosinahkanggon doi nabiningkatan meeng kopeleleani Temeneno. Kalu mian bailong daano kona lalim, inai mobatutu doi lalimoo lalomo. Dagaiyo kobutomu sulano natataap bilisii.

²³Inaimo koidan motolongo monginum paisu; monginum suka soisik sulano nakelendele komu lobo kinaan sabab ikoo tembo-tembokon masakit.

²⁴Soobos komian nalalim, kalu akiyoon nainulus, lapamo tokita tukon tontong. Bai komian bailong nalalim sodo totoi

kalu lapamo. ²⁵Bunomo lakon kalu kokokubai monondok banggadudul tokita. Tukon komo aki nagampang tokita, aki namoola momeenggon tosookon.

6 Mian Salani badaang mo teali ata, sio naanggape baikon yanila natuan sio nainodotii, sulano komian aki namoola kulokisanggene ko Mian Bisa sambuno kabai konda otunggul. ²Ata-ata kona tuan mo baino Salani miano aki namoola okimaayo sabab yanila sasaibino Salani miano. Tongo yanila sio napo leleaniyo kona po tuan tukon lobian kona monondokan koidan, sabab do tuanoo mo lineleani tukon lobian kona monondokan doiya daano pokakana mian mangangga mo sineaseang.

Otunggul mo aki nabisa tukon kaasaan mo bisa

Sasaibino naiya siokai ikoo muotunggukene tukon otinaukene. ³Indee komiano mootunggukene kootunggul bailong doiyadoo tukon aki nasotuju tukon otunggul mo bisa moluwedoi nda Temeneno Yesus Klistus, tukon otunggul doi nda agama, ⁴doiya miano banggaal tukon akiyo kona tinoi oioila! Kona sesel doiyamo tolongo yase pobantikon tukon ponggeeleki kaliangano bantil-bantilan tobikon lubatene kopoomosikitonan noa, poalaasan, posilinganan, sosunoi mo aki namonondok, ⁵tukon pokiitonan mo akiyo kona kabu-kabusan. Doi mian badaangoo kona pikilan naloloon paluso tukon akimo nakana. Yanila aanggene moola nateali kaasa doi agama.

⁶Takainomo koagama mebee kauntungan mo babasal, kalu komian biyai oila komo daanomo doi yana. ⁷Sabab akiyo kolangge meeng kita mo babayo doi dunia, tukon akiyo koidan kolangge meeng kita mo moola babayo doi tonggulung. ⁸Jadi, kalu daano kokinaan tukon pakean, doiya sukupo. ⁹Bai mian mo yase kaasa, togoda tukon tosintak tukon bula-bulaa kolangge kaliangano mominoomooton mo bonggu tukon mo manas. Momootan-momootanoo kubaiyo komian teali lokis tukon silaka. ¹⁰Sabab luwedoi seangano kodoy, tobuat sasaibino kolangge nakulokisan. Daano kosoobos komian mo buluke kodoy tobikon akimo nalongiyo koidan kootunggul Salani, maka yanila linaat badaang kosakisaawan mo kulokisanggene yanila noano.

Otunggul-otunggul pelibadi

¹¹Bai ikoo daano Mian Bisa namian, jadi ikoo sio mudedeengene doiya sasaibino. Pokakaate moteali mian mo talakana doi Mian Bisa matano, mangangga doi Mian Bisa, mangangga doi Klistus, seseange kotulano, sabab doi sakisaawan, tukon tubo mantalamuyuk. ¹²Pobalajuang tutuuno sulano potubo buno Salani miano sulano ikoo mumalaat tambo tuboan mobisa tukon posidutukon. Sabab tuuk doiyamo ko Mian Bisa uange ikoo doi singgatoos mumangakuan doi mian badaang salaano baikon ikoo momangangga doi Klistus. ¹³Tukon budodoiya, doi Mian Bisa salaano mo beekene koansaang doi sasaibino kolangge, tukon doi Yesus Klistus salaano mo beena kasaksian mo bisa doi Pontius Pilatus, yaku kabiyo naiya doikoo: ¹⁴Taatiyo sasaibino do palentadoo tukon doi nabilisiian tukon akiyo kososiboliino polong doi oloyo nda Temeneno Yesus Klistus nalubatan koidan. ¹⁵Kona lubatan naikon Mian Bisa susuungo tinantukonggon doi tembo mo tapaat. Yanamo Koponguasa momeeng; yana babasal, Tomundo doi sasaibino kotomundo, tukon Temeneno doi sasaibino kotuan. ¹⁶Yanamo komo aki namoola komatean kuasaiyo; yana tubo doi montootilangan lalomo mo aki namoola kinoolani mau indee komiano. Akiyo kai mau meeng kobanggapi mo biasa kitayo, kabai moola nakitayo. Doi yanamo koadat tukon kuasa polong sidutu-posidutukon! Amin.

¹⁷Doi mian badaang mo kaasa doi dunia nia, siokai ikoo kabiyo sulano yanila aki nabanggaal tukon aki namoini doi balang-balang mo aki natataap - pokakana langgedoo tukon kokaasaan. Yanila sio namoini doi Mian Bisa mo beekene sasaibino kolobo doi kita tukon badaang sulano kita nda lasaiyo. ¹⁸Kabiyo doi yanila sulano napo okitakene komonondokan, sulano namokubai badaang kolangge-langge mo monondok, monondok konoano tukon yase mendebee. ¹⁹Tukon buno doiya yanila pototongikene kobuat mo teali modal monondok polong doi lounu mo lubat. Tukon buno doiya yanila naikon malaat tuboan posidutukon, doiyamo tuboan mo bisa.

²⁰Oila komo lapamo bineekon doikoo, dagaiyo doiya monomonondok, Timotius! Dedeengene kobasalitaan-basalitaan mo

akiyo kolabano tukon pobanti-bantikonan kokaliangano langgelange mo sala kona binantilan "Motoiyan". ²¹Sabab daano komian badaang mo bantile baikon yanila daano konapo motoiyanoo, tobikon yanila isa doi Salani naotunggul-otunggul yanila loolukonoo mo anggayo.

Boliisi ko Temeneno nabalakaatiyo Utus-utus.

Komai holomat,
Paulus

PAULUS NASULAT KOLUANO DOI TIMOTIUS

PANGANTOKON

Paulus nasulat koluano doi Timotius kosoobos mobabasal koantoko otinau-otinau doi Timotius susuungo buno tulano pobalimanggonan tukon potombonii mo daano momongula. Kona otinau namakisuut doiyamo sulano Timotius nasabal. Yana inotinau tukon inotunggul sulano momeenggon namolole sabukene kobilita kaliangano doi Yesus Klistus tukon bataanian doi Paladandian mo Molumbito lalomo tukon otunggul kalianganodoo Bilita Monondok moluwedoi Mian Bisa; koidan sulano Timotius natataap balimang salaku gulu tukon pabantil Bilita Monondok moluwedoi Mian Bisa, mau kai nda sasalaane kosakisaa tukon koponggimakanan.

Timotius iningotiikon sulano naaki namasambul podangaa-nian-podangaanian mo longas tukon mo akiyo koanggano. Podangaanian-podangaanian mobuno doiya akiyo koanggano oioila, tongo lusayo komian mondongolii napikilan.

Doi sasaibinodoo iningotiikon Timotius sulano namangala sontoh doi Paulus natuboan - doiyamo namaanggaan doi Klistus, kona sabalan, namololean tukon sakisaawan mo toupiyo doi nailoiloikisan lalomo.

Antoko

Pololukoni 1:1-2

Ngiinaal tukon otunggul 1:3-2:13

Otinau tukon poingotii 2:14-4:5

*Otunggukanano bulaa kaliangano Paulus
nandondoong 4:6-18*

Potutupo 4:19-22

1 ¹⁻²Timotius, kupau kinilakon! Yaku, Paulus, tulise naiya sulatia doikoo, tukon moinikene boliisi Mian Bisa Tama tukon nda Temeneno Klistus Yesus nabeena balakaat, maasi tukon namonondokan doikoo.

Tolongo Mian Bisa namongiasan, yaku biningkat teali lasul Klistus Yesus tukon binontokon sulano babotilangene kotuboan Mian Bisa mo dondiikene. Tuboanoo kita talimayo sabab pomeenggon tukon Klistus Yesus.

Basyukuulan tukon teteba

³Yaku basyukuul doi Mian Bisa yaku mo leleaniyo tukon noanggu lalomo mo molino bunu kumbumbu loolukonoo nakubaiyano. Yaku sidutu bakinatauwan doi Mian Bisa samba luunggon yaku neneeke doikoo doi sambeang lalomo, mau oloyo mau popook. ⁴Yaku neneeke konoamu napoloonan. Doiyamo kosababpo yaku yase tuuno pososuung tukon ikoo sulano yaku teali sanaang tuuno. ⁵Yaku neneeke naikon komu manganggaan mo tutuu doi Klistus, pokakana bunu mutaate Lois namanganggaan tukon tinamu Eunike. Tukon yaku anggayo ikoo koidan mangangga bunu doiya. ⁶Tobikon doiya yaku ingotiikene ikoo sulano muotuboikene ko Mian Bisa nakalunia bineekon doikoo doi tembo yaku binggakene kolimanggu doikoo bunggono. ⁷Sabab Mian Bisa Na Loh nabineekon doi kita, bolikono Loh mo kubaiyo kita teali matakut. Kobalino Mian Bisa Na Lohdoo kubaiyo kita teali bukuan, moonoo tukon seang tukon moola taane kobutongo.

⁸Tobikon doiya inaimo momammaa mebee katalangan tentang nda Temeneno, tukon inaimo koidan mammaa kaliangano doi yaku, mo tinalunggu sabab yana. Kobalino, siokai ikoo tukon bukuanan doi Mian Bisa tulut sakisaa tuuk doi Bilita Monondokoo. ⁹Mian Bisa salamatene kita tukon uange kita sulano teali namian susuungo. Yana kubaiyo doiya bolikon dasalkangene oila komo lapamo kita kubaiyo, bai dasalkangene natetel susuungo tukon namaasi. Yana beekene doi kita kona maasi lolo doi Klistus Yesus akiyoon nadunia nia natinealikon. ¹⁰Tukon diabudodoo, Mian Bisa tudoikene kona maasi doi kita tukon nalubatan Tomundo Pasalamat kita Klistus

Yesus. Yesus lungguiyo kokuasa matean tukon babayo kotuboan mo posidutukon mololoi Bilita Monondokoo.

¹¹Tuuk babotilanggene Bilita Monondok doiyamo Mian Bisa binggate yaku teali lasul tukon gulu. ¹²Doiyamo kosababpo yaku sakisaa sasaibino nia, bai yaku tataap anggayo, sabab yaku toiyo tuuno indee daku inangga. Yaku anggayo baikon oila komo lapamo yana monggianggakene doi yaku, yana moola koidan totooliyo polong doi Oloyo Nakiamatan. ¹³Loingiyo tukon tutuu otunggul mokana mo lapamo yaku beekene doikoo. Tukon siokai ikoo tataap bakakanggi doi manganggaan tukon poseangan mo lapamo teali nda milik sabab pomeenggon tukon Klistus Yesus. ¹⁴Tukon potombonii luwedei Mian Bisa Na Loh mo tubo doi kita, siokai ikoo dagaiyo mono-monondok kolangge-langge moano koanggano mo lapamo monggianggakene doikoo.

¹⁵Ikoo toiyo baikon sasaibino komian doi Asia lipuno lapamo tinggale yaku, tololomo koidan Figelus tukon Helmogenes. ¹⁶Bai Onesifolus solipuan lapamo bubulaa luunggon nakubaiyo sanaang konoanggu. Boliisi Temeneno napokokonoi kona tудоikanano kona pomaasikon doi yaniladoo. Mau kai yaku doi talunggu lalomo, Onesifolus aki namammaa doi kondondoongoo. ¹⁷Sambuno polong doi Loma, yana tuluus kakaate mounggoliyo yaku polong yana posuungganaku. ¹⁸Tukon ikoo toiyo baikon doi Efesus yana badaang luunggon natulungiyo yaku. Boliisi ko Temeneno natudoikene kona seang doi yana doi oloyo Temeneno naadiliyano sasaibino kobanggapi.

Klistus nasuludadu mo molole

2 Timotius, kupau! Sio muteali bukuan tongo maasi mo bineekon doi kita, sabab kita pomeenggon tukon Klistus Yesus. ²Otunggul looluk mo lapamo ikoo lengele lengget doi yaku doi mian badaang salaano, siokai mumonggianggakene doi mian badaang mo moola inangga tukon mo pandoi mongotunggul mian bailong.

³Ikoo sio mutulut sakisaa bunu Klistus Yesus nasuludadu mo molole. ⁴Meeng kosuludadu mo daano balimang, aki naikon nasibukene kobutongo, tukon naulusan-ulusan susuungo, sabab yana yase sanaanggene kona talenga noano. ⁵Meeng komian olalagawan aki naikon nateali juala doi meeng kopalatandingan,

kalu yana aki naloingiyo kopalatulan-palatulan. ⁶Petani mo lapamo balimang tuuno yanamo kotumbe-tumbeno balahaak malaat hasilo nasinakakon. ⁷Popikikene oila komo lapamo yaku matailukene doiya, sabab Temeneno naikon beena doikoo motoiyan sulano mumangalatikene sasaibino.

⁸Neneeke naiya: Bilita Monondok mo yaku babotilanggenedoo daano bilita kaliangano Yesus Klistus, Daud nakatulunan, yanamo Klistus mo lapamo abali tubo doi namatean. ⁹Sabab babotilanggene Bilita Monondok doiyamo, yaku sakisaa; tukon polong binoboi bunu meeng komian lokis. Bai Mian Bisa nabantilan aki nalaate binoboi. ¹⁰Doiyamo kosababpo yaku sabal tanggunge sasaibinodoo tongo mian badaang nakopontingan mo lapamo Mian Bisa lilike, sulano yanila malaat kasalamatan mo bineekon lolo doi Klistus Yesus, tukon mo pinoolainggon kokabasan mo posidutukon.

¹¹Bisa tuuno bantilan nia,

“Kalu kita lapamo mate polaing yana,
kita naikon tubo koidan polaing yana.

¹² Kalu kita tataap sabal,

kita naikon mapalenta koidan polaing yana.
Kalu kita aki naanggayo yana,
yana koidan aki natalimayo kita.

¹³ Kalu kita aki nda molole,

yana tataap molole,
sabab aki namoola yana posalakon kobutongo susuungo.”

Polimang mo malaat panggaal

¹⁴Siokai muingotiikene komian badaang kaliangano sasaibino nia. Doi Mian Bisa salaano, otinaukene yanila sulano inai po podangaanikene kaliangano bantil-bantilan. Koiya akiyo kona totuuk, tongo kai kubaiyo nggabut komian badaang mo mondongolii. ¹⁵Siokai mukakaate tutuu sulano ko Mian Bisa naakuiyo bunu mian mo moola balimang doi yana. Kakaate sulano ikoo inai mumammaa kaliangano mubalimangan, bai otunggulkene tukon kona otunggul-otunggul mobisa doi Mian Bisa. ¹⁶Dedeengene kobasalitaan-basalitaan mo akiyo kotakoso tukon mo totulaiyo ko Mian Bisa. Basalitaan-basalitaan mobuno doiya tongo kubaiyo komian pololokon lokis. ¹⁷Mian-



Bonua lolonguno mo kinubai luwedoi tambaga tukon buta nduunan (2:20)


mianoo naotunggul landa buno panakit kankel mo balani Doi yaniladoo tongusokon Himeneus tukon Filetus. ¹⁸Yanila lapamo tinggale kootunggul mo kana, tukon nggabute komian songobos namangangaan. Yanila bantile baikon kotuboan doi matean lapamo teali. ¹⁹Bai dasal mo moonggol Mian Bisa mo kubaiyo aki natounggot. Doi bunggono totulis naiya, “Temeneno tingoniiyo kona mian-mian”, tukon “Mian mo bantile baikon yana Temeneno koono, mianoo sio natade mokubaiyo kokokubai mo sala”.

²⁰Doi bonua mo babasal lalomo talaat moisalomo kololonggu. Daano komo kinubai doi salaka kabai mosoni, bai daano koidan komo kayung kabai buta. Daano komo pinake tuuk palaluu tuuno, tukon daano koidan komo pinake tuuk mopinalaluu biasa. ²¹Mian mo kumesiyo kobutongo doi sasaibino komo lokis, mianoo naikon pinake tuuk mo pinalaluu tuuno. Yana teali natuan koono tukon balaguna doi natuan. Yana sinadiakon tuuk pinake doi samba kolimang monondok. ²²Dedeengene kokasanangan-kasanangan mian mongula. Kakaate tuuk tubo

tulutiyo ko Mian Bisa namongiasan, molole doi naotunggul tukon seseange kotulamu, tukon konoamu daano tanaang. Tubomo buno doiya polaing yanila mo nggeleamon mangkabi tulung doi Temeneno tukon noa monondok. ²³Inai momalaing doi podangaanian lalomo mian badaang molongas mo akiyo kona tinoi. Ikoo toiyu baikon sasaibinodoo tongo sumbetene kopodangaanian. ²⁴Mian mo balimang tuuk Temeneno aki namoola poodangaani; yana sio napokokonoi doi sasaibino komian tukon moola mongotunggul mian tukon monondok tukon sabal. ²⁵Yana sio tukon kokomuyuk mongotunggul mian badaang mo yase lawane; kinatauhan ko Mian Bisa nabeena todanan doi mian badaang sulano yanila babolii doi nalalim-lalim tukon tingoniiyo kootunggul mo bisa. ²⁶Tukon buno doiya yanila teali sadal koidan, tukon tosobii doi Ibiliis napalako mo lapamo lakoyo yanila tukon pakisaayo yanila mololoiyo kona mongiasan.

Oloyo-oloyo doibundu

3 Neneeke naiya: Doi oloyo-oloyo doibundu naikon daano badaang kokasusaan. ²Banggapi naikon utamakene kobutongo susuungo, doy kuasaiyo yanila, banggaal tukon yase balambuus. Yanila yase totulaiyo komian, nggabute komian motuwa, aki natoiyu bakinatauhan, tukon mesikitene kolanggelangge lohani. ³Yanila aki naseange kotulano, aki yase nabeena ampun, yanila yase lokis-lokise komian bailong sambuno, yase pakeyo komotikasan, yanila balani tukon aki nayase komonondokan. ⁴Yanila yase kulokisene, banggaal, tukon aki nabapikil bulusan. Yanila yase tuuno kokasanangan dunia, maka baino moloingiyo ko Mian Bisa. ⁵Mau kai cala dunia, yanila molole ampakonggene koagama nakakabi, bai tolayo koagama naminakisuutidoo. Dedeengene komian badaang mo buno doiya. ⁶Daano doi yaniladoo komo lapamo usok doi bonua-bonua, maka kuasaiyo koboi-boine moaki nabukuan mo daano badaang tuuno kona lalim tukon sabab moisalomo komo minooton. ⁷Boi-boinedoo banggadudul kabiyo nainotunggul, bai aki nabiasa tingoniiyo kootunggul mo kana moluwedoi Mian Bisa. ⁸Bunomo kai Yanes tukon Yambles molawane Musa looluk, bunomo koidan mian badaang motabatiloo lawane kootunggul doi Mian Bisa. Yanila napikilan lusako, tukon kona



Buku-buku tangabosan doi loolukoo (3:15)

pai mangangaan koyolo. ⁹Bai yanila aki naikon namalaat oioila, sabab yanila nalongasan naikon tinoimo doi sasaibino komian, buno Yanes tukon Yambles koidan natinoupi.

Otinau-otinau

¹⁰Bai ikoo lapamo tulutiyo daku otunggul-otunggul, daku ndondoong, tukon daku tuboan natuduan. Ikoo lapamo kitayo susuumu bulaando daku tutuuwan momanganga doi Klistus tukon seseange kotulando banggapi. Ikoo koidan toiyo daku sabalan tukon daku moonggolan. ¹¹Ikoo lapamo kitayo daku sinakisaawan tukon yaku sakisaa. Ikoo toiyo sasaibino mo teali doi yaku doi Antiokhia, doi Ikonium, tukon doi Listla; tukon ikoo toiyo sasaibino daku sakisaawan! Bai Temeneno salamatene yaku doi sasaibinodoo. ¹²Takainomo sasaibino komian mo tubo yase kaleda tukon tubo pomeenggon tukon

Klistus Yesus naikon linoilokis, ¹³baimo kai mian badaang mo lokis tukon mian badaang bakokolii naikon pololokon lokis. Yanila okoliyo komian bailong banggokai yanila susuungo koidan komo tongokolii. ¹⁴Bai kaliangano ikoo, Timotius, siokai mutataap bakakanggi doi otunggul-otunggul mo kana mo lapamo inotunggukon doikoo tukon mo ikoo anggayo tuuno; sabab ikoo toiyo indee miano komu gulu-gulu. ¹⁵Ikoo sio muneneeke baikon sodo poipoisik ikoo lapamo tingoniiyo ko Kitab Moliyous. Kitab Moliyousoo beena doikoo motoiyan sulano malaat kasalamatan lolo manganggaan doi Klistus Yesus. ¹⁶Sasaibino komo totulis doi Kitab Moliyous lalomo, Mian Bisa popitoikene tukon balaguna tuuk otunggulkene komo kana, sulano nateguule tukon konoikene komo sala, tuuk mongotunggul banggapi sulano tubo mololoi Mian Bisa namongiasan. ¹⁷Tukon Kitab Moliyousoo mian mo meleleani Mian Bisa moola moilengkapi tukon sukup tuuk sasaibino kokaliangano kolimang mo monondok.

4 Klistus Yesus naikon lubat koidan doi dunia nia tuuk adiliyo komian badaang mo tubo tukon mo mate; tukon yana naikon lubat tuuk mapalenta bunu Tomundo. Tobikon doiya yaku kabiyo tukon tutuu doikoo doi Mian Bisa salaano tukon Klistus Yesus: ²Siokai ikoo babotilangene bilita doi Temenenodoo, tukon desaake sulano komian namolongol, oilakai yanila yase kabai aki. Siokai ikoo moolakene komian, tudoikene kona sala, tukon beena dolongan doi yanila. Otunggule komian tukon sabal tuuno. ³Sabab naikon laate kotembono mian aki nayase koidan mantalima otunggul mo kana. Kobalino, yanila naikon loingiyo yanila susuungo naminooton, tukon pototongikene badaang kogulu sulano inotunggukon langge-langge mo monondok doi napai polongol. ⁴Yanila naikon kukupiyo kotolingainoila doi mo kana, bai naikon tingaakene kosalita-salita mokala. ⁵Mau kai nabuno doiya, ikoo sio mukuasaiyo kobutomu mau nabulaando koidan kondondoong lalomo. Sabal doi sakisaa lalomo, kubaiyomo komu limang bunu babotilangganano ko Bilita Monondokoo tukon ampakonggene namono-monondok komu limang bunu Mian Bisa napeleleani.

⁶Kaliangano kobutonggu, laatemo kotembono naikon daku matean bunu sosubakon doi Mian Bisa. Soisikeen koidan yaku naikon tinggalemo nadunia nia. ⁷Yaku lapamo malaing bakulebean tukon namono-monondokan, tukon lapamo laate

kogalis bunduno. Yaku tataap molole doi Klistus polong doi-bunduno. ⁸Tukon diabudodoo kopatambo manaangan totiiliyo yaku. Doi Oloyo Nakiamat, Temeneno, Hakim mo adiloo naikon salakangene patambodoo doi yaku, sabab yaku tubo pomeenggon tukon Mian Bisa. Tukon aki natolongo yaku koidan komo mantalima naikon patambodoo, bai koidan sasaibino komian mo totiiliyo ko Temeneno nalubatan tukon poloon tuuno.

Otunggul-otunggul labino

⁹Kakaate lubat doi yaku namosobit, ¹⁰sabab Demas tinggalemo yaku sabab kilakene nadunia nia. Yana tauso doi Tesalonika. Kleskes tauso doi Galatia, tukon Titus doi Dalmatia. ¹¹Tongo Lukas komo dungol tukon yaku. Lolobotiyo Malakus tukon babayo yana polaing ikoo, sabab yana moola tomboniiyaku doi balimangan lalomo. ¹²Yaku sumboliiyomo Tikhikus taus ke Efesus. ¹³Kalu ikoo lubat, kanggiyo domanteloo yaku mo tinggale doi Toloas doi kalpus nabonua. Kanggiyo koidan daku buku-buku, komo utama kubuku-buku mo kinubai doi kalataas kulit.

¹⁴Aleksandel, pokubai tambagadoo lapamo lakukene kolangge-langge mo kulokis tuuno doi yaku. Temeneno naikon balase yana mololoi nakokubai. ¹⁵Ikoo susuumu sio mubaingotii doi yana, sabab yana tantange tuuno konda bilita.

¹⁶Singgatoo tumbe-tumbeno yaku ajukangene belaano kobutonggu, akiyo komeeng komian mololainge yaku; sasaibino tinggale yaku. Kinatauan Mian Bisa aki nasalakene yanila nalangge nia! ¹⁷Bai Temeneno loolainge yaku. Yana beena bukuanan tobikon yaku moola babotilangene Bilita Monondokoo, sulano nailongol doi sasaibino komian mobilikon Yahudi, tukon yaku tosodii doi matean lalomo. ¹⁸Takainomo Temeneno naikon sodiiyo yaku doi samba koniat mo kulokis doi yaku. Yana naikon babayo yaku tukon salamet doi Batomundoan lalomo doi sulugaa. Siokai yana kinabasal sidutu-posidutukon! Amin.

Salam bunduno

¹⁹Daku salam doi Pliskila tukon doi Akwila tukon doi Onesifolus pulino. ²⁰Elastus dungol doi Kolintus, tukon Tolofimus yaku tinggalemo doi Miletus daano momasakit. ²¹Kakaate tutuuno sulano mulubat doi naakiyoonan kotembo kumel.

Ebulus, Pudes, Linus, tukon Klaudia makapatu yanila nasalam doikoo; bunomo koidan sasaibino koutus momanganga bailong.

²²Boliisi ko Temeneno nalolainge ikoo.

Boliisi ko Temeneno nabalakaatiyo Utus-utus!

Komai holomat,
Paulus

PAULUS NASULAT DOI TITUS

PANGANTOKON

Titus daano komeeng komian mobolikon Yahudi miano mo lapamo usok agama Salani tukon teali tulano mopobalimanggon tukon potombonii Paulus doi nalimang lalomo. Naiya sulatia inotuuk doi Titus mo doiya kosinggatoos yana daano doi Kleta sabab Paulus lapamo otinggale yana indaa sulano nauluse kojemaat indaa. Daano kotolu kolangge mo linolukonggon doi sulatia lalomo.

Kotumbeno, Titus iningotiikon bulaa kokaliangano kona sipat-sipat komian mo moola teali padagai jemaat. Doiya langgedoo linolukonggon inotuuk tuuno doi mian badaangoo doi Kleta nakokubai mo lokis. Koluano, Titus inotinaukon bulaando kokaliangano kona tutuuwan yana mootunggukene doi memeeng kotambuno komian mo teali anggota jemaatoo, doiyamo mala-malane tambuno meeng tukon boine momotuwamo (kona tutuuwan otunggule komian mo tabo-tabokon doi yaniladoo), doi mian motabo-tabokon tambuno meeng, tukon doi ata-ata tambuno meeng. Kona pupusan Titus inotunggukon bulaando kokaliangano kona tutuuwan ko Salani miano nakokubai motalakana. Komo ponting tutuuuno doiyamo baikon ko Salani miano sio nambokila tukon yase pokindokon, inai namosikitene komian, inai nayase koponggeelekian kai lubatene koponggalangabutan.

Antoko

Pololukoni 1:1-4

Pototooli-pototooli jemaat 1:5-16

Kawajiban doi bula-bulaando kotambuno komian doi jemaat lalomo 2:1-15

Otinau tukon poingotii 3:1-11

Potutupo 3:12-15

1 Kupau Titus! Yaku, Paulus, motulise nasulatia bunu Mian Bisa naata tukon lasul Yesus Klistus. Yaku pinili tukon binotiikon sulano natulungiyu ko Mian Bisa namian badaang pinili sulano konapoo manganggaan moonggol. Yaku koidan sio kuotunggule yanila sulano toiyo kootunggul mo bisa mo inotunggukon doi nda agama. ²Otungguloo komaanano moinian baikon naikon kita mantalima tuboan mobisa tukon posidutukon. Mian Bisa lapamo dondiikene kotuboan akiyoon kodunia natinealikon - tukon Mian Bisa aki nabakala-kala. ³Doi tembono mo tantu, Mian Bisa okitakene kona dandidoo doi nateteba lalomo. Tetebadoo lapamo bineekon doi yaku, tukon yaku basilinganggene luwedoi Mian Bisa Pasalamaton kita napalenta.

⁴Titus, ikoo tutuu daano kupau, sabab ikoo tukon yaku posinggat-singgat lapamo mangangga doi Klistus.

Yaku moinikene boliisi ko Mian Bisa Tama tukon Klistus Yesus Tomundo Pasalamat kita, beena balakaat tukon monondokan doikoo.

Titus nalimang doi Kleta

⁵Yaku tinggale ikoo doi Kleta sulano mumoola uluse kolangge-langge mo lapamo inatul. Koidan, sulano ikoo mongoduduk katua-katua jemaat doi memeeng kokota. Tukon neneeke naiya kupobontiikon-pobontiikon nia: ⁶Meeng kokatua jemaat siokai meeng komian mo akiyo kososiboliino; yana sio natongo meeng kona boloki; kona labuk-labuk sio nalapamo mangangga doi Klistus tukon bolikon mo tiningonii bunu pau palalental tukon mo aki namoola inatul. ⁷Popiala jemaat doiyamo mian mo uluse ko Mian Bisa nalimang, yana aki namoola ano kososiboliino. Yana aki namoola banggal-banggaal kai nggonggimolon, kai nggolonguwon, kai yase poakate, kai yase doyan. ⁸Yana sio nasanaang motalimayo komian doi nabonua, yase kolangge-langge monondok, moola taane kobutongo, mloyos konoano, moliyous tukon taatul kona tuboan. ⁹Yana sio nabataani kokoonggol doi otunggul mo moola inangga, pokakana komo lapamo inotunggulkon doi yana. Tukon bunu doiya yana moola mongotinau mian loloiyo kootunggul mo bisa, tukon otudoikene komian nasala mo lawane yana.

¹⁰Sabab badaang komian mo yase banggabut, pololokon mian badaang mo baagama Yahudi; yanila okoliiyo komian bailong tukon napo bakala-kalaan. ¹¹Mian badaang mobuno doiya sio nakinukup kobabano, sabab badaang kokalualga yanila mo nggalanggabute tukon otunggul-otunggul mo akiyo kotakoso. Yanila kubaiyo doiya tolono yase moumbolii utung mo aki napantas! ¹²Sidutu daano meeng konapo nabi, mo luwedo Kleta koidan, bantile, "Kleta miano sidutu kala-kala, tukon buno iyayon mobalani mo modoko tukon bea." ¹³Oila komo nabidoo nabinantil takainomo bisa. Doiyamo kosababpo ikoo sio muteguule yanila tukon koonasio; sulano yanila natataap bataani doi otunggul mo bisa ¹⁴tukon akimo napo mangangga doi Yahudi miano nanunuton kai mian badaang naatulan-atulan kinubai mo tolono kootunggul mo bisa. ¹⁵Sasaibino kolobo daano moliyous doi mian badaang mo moliyous. Bai doi mian badaang kona pikilan mo lokis tukon mo aki namangangga, akiyo kolangge meeng mo moliyous, sabab konapo pikilan tukon noano lokis! ¹⁶Yanila bantile baikon yanila tingoniiyo ko Mian Bisa, banggokai kona pokokubai akinggene. Yanila mosikitene, tukon yanila aki nayase molole; yanila daano mian badaang mo aki natendenge kubaiyo kolangge mo monondok.

Otunggul mo bisa uuno

2 Bai ikoo, Titus, siokai ikoo otunggulikene kootunggul mo kana. ²Otinawo komian mala-malaneno mo motuwa, sulano yanila taane kobutongo, bapandoikon tukon tubo bunu mian mo inodotii. Yanila sio koidan nabataani doi otunggul mo bisa luwedo Mian Bisa, meseseangan motalakana tukon taane kosakisaa. ³Bunomo koidan siokai ikoo mongotinau koboi-boine mo motuwa, sulano yanila nakokubai pokokonoi tukon oila komo moola kinubai doi mian mo tubo tolono doi Mian Bisa. Yanila aki namoola bakala-kalakene komian bailong, tukon aki namoola todudukene inume kosuka, yanila sio naotunggulkene kolangge-langge mo monondok, ⁴sulano tukon doiya yanila moola otunggule kopau-pau boine sulano naseange kona langkai tukon nalabuk-labuk, ⁵teali mangalati, tubo moliyous tukon teali boloki doi baasowaanan mo monondok mo odotiiyo kona langkai. Tukon bunu doiya akiyo komian mo moola totulaiyo kobilita monondok doi Mian Bisa.

⁶Bunomo lakon, otinauwo kopau-pau malane sulano yanila nateali mangalati. ⁷Doi sasaibino kolangge, siokai ikoo teali sontoh doi kokubai mo monondok. Kalu ikoo bangotunggul, ikoo sio mumoliyous tukon totubo konoamu. ⁸Pakeyo kobantibantilan mo talakana, mo aki namoola mian sosiboliiyo, sulano mian molawane ikoo nateali maaaa sabab akiyo kolangge-langge molokis mo moola yanila bantile doi kita.

⁹Ata-ata sio naloingiyo kona tuan, tukon sanaangene kona tuan noano doi sasaibino kolangge. Yanila aki namoola tumbak-tumbak, ¹⁰kabai pondikuk. Siokai yanila otudoikene baikon yanila sidutu balasifat monondok tukon molole, sulano tukon nabalasifatan yaniladoo mian nggaale kootunggul doi Mian Bisa, Pasalamaton kita.

¹¹Sabab Mian Bisa lapamo okitakene kona maasi mosalamatene doi sasaibino kobanggapi. ¹²Mian Bisa namaasidoo otunggule kita sulano naaki nda tubo pototunggulung tukon Mian Bisa namongiasan tukon akimo naloloiyo kodunia namongiasan. Kita inotunggul sulano tubo doi dunia nia lalomo tukon toiyo taane kobutonggita, mloyos tukon molole doi Mian Bisa. ¹³Budodoiya kita daano mototiiliyo ko Oloyo kita mo moinikenedoo; doi Oloyodoo dunia kitayo Yesus Klistus nababasilan, doiyamo Mian Bisa mo Babasal tukon nda Tomundo Pasalamat. ¹⁴Yana lapamo salakangene kobutongo tuuk doi kita sulano kita tongosodii luwedoi sasaibino kokulokisan, tukon tealikene kita meeng komian mo tongosodii luwedoi lalim tukon mo teali koonna tolong, tukon komo molole mokubai monondokan.

¹⁵Otunggulkene sasaibino doiya, tukon otinauwo polong teguule doi mian molengele ikoo tukon doi nataanggaan. Inai mopataikene meeng komian molailaingene nakitayo ikoo.

Salani miano nakokubai

3 Ingotiikene doi muanggota-anggota jemaat sulano yanila naanggayo doi napo katua-katua tukon pamalenta negala, tukon balasadia tuuno kubaiyo doi memeeng kolangge monondok. ²Bontiikene doi yanila sulano inai nabakala-kala kabai ponggeleki tukon indee komian koidan, bai sulano konapoo lenggang namonondok. Siokai yanila nalenggang

namantalamuyuk doi sasaibino komian. ³Sabab loolukon mau kita koidan bai longas, sala tukon aki nda molole. Kita kinubai ata doi moisalomo komo iniyas tukon minooton; kita tubo tukon tetel-tetel molokis tukon noa mosikit, maka pomosikiton. ⁴Bai ko Mian Bisa, nda Pasalamaton otudoikene kona seang tukon namondokan konoano doi kita. ⁵Yana salamatene kita, bolikon kita molapamo kubaiyo kolangge mo monondok, bai sabab yana susuungo seange kita. Yana salamatene kita loloiyo doi Mian Bisa Na Loh, mo beena kita sinuungan boolu tukon tuboan boolu tukon lolo doi nakumesiano kita. ⁶Mian Bisa beekene kona Loh doi kita tukon luwedo Yesus Klistus Tomundo Pasalamat kita, ⁷sulano Yesus namaasi, kita pokindokon koidan tukon Mian Bisa tukon kita malaat tuboan mobisa tukon posidutukon kita moinikene. ⁸Bantilan nia bisa tuuno.

Yaku yase ikoo mubantile tuuno langge-langge nia, sulano komian badaang mangangga doi Mian Bisa tutuuno mouboliiyo tukon kubaiyo kolimang-limang mo monondok tukon modaano kotakoso motuuk doi sasaibino komian. ⁹Dedeengene kopoonggeelekian mo akiyo kotakoso, salita-salita tundun, poonggeelekian, tukon ponggimakanan motuuk doi ukum agama. Sasaibino doiya akiyo kotakoso tukon akiyo koutungo. ¹⁰Mian mo kubaiyo konggalanggabutan doi jemaat, siokai muteguule idan lua luunggon; lapamo doiya inaimo koidan mopolaing tukon yana. ¹¹Ikoo toiyo mian mobuno doiya bati-batinggai tukon nalalim-lalim okitakene baikon yana salamo.

Otunggul-otunggul napupusan

¹²Soisobiton lapamo yaku bintekene Altemas kabai Tikhikus doikoo, kakaate soisobit sulano mulubat doi yaku doi Nikopolis, sabab yaku batetel dungol indaa popupuson kotimul. ¹³Kokobukuan tutuuno sulano mutomboniiyo Zenas, mopandoidoo ukum, tukon Apolos, sulano yanila moola lengget tukon akiyo kokakulangan oioila. ¹⁴Konda mian badaang sio namonggiotunggulkon kubaiyo kolangge-langge mo monondok sulano moola laate kona pinalaluu-pinalaluu mo pinalaluu tuuno; inai naikon yanila tubo akiyo kotakoso.

¹⁵Utus sasaibino mo daano polaing yaku, makapatu teteba doikoo. Pelengene komai teteba doi tula-tulanggita mo pomeenggon manganggaan.

Boliisi ko Temeneno nabalakaatiyo Utus sasaibino.

Komai holomat,
Paulus

PAULUS NASULAT DOI FILEMON

PANGANTOKON

Filemon daano komeeng ko Salani miano mototoimo baikon teali anggota jemaat doi Kolose. Yana daano komeeng kona ata kosambuno Onesimus. Do atadoo yana dampasenemo Filemon, dona tuanoo, doibundu kai bulaando doimbaa baino potoikon tukon Paulus salataa Paulus daano doi talunggu lalomo. Tukon Paulus naotunggul, Onesimus teali Salani miano.

Paulus nasulatia doi Filemon bunu kai Paulus nakakabi sulano Filemon nayase podame tukon Onesimus, dona atadoo, Paulus mosumboliyo namule. Paulus kabiyo sulano Filemon kilayo talimayo koidan Onesimus bolikon tongo bunu ata mo lapamo diname, bai koidan bunu tulando Salani miano.

Antoko

Pololukoni 1-3

Filemon naseang tukon namaanggaan 4-7

Onesimus nakakabi 8-22

Potutupo 23-25

¹Utus Filemon, tulando tukon tulanggami! Yaku, Paulus, meeng komian motinalunggu sabab Klistus Yesus, polaing tukon utusonggita Timotius, tulise nasulatia doikoo ²tukon doi jemaat mo pototongi doi mubonua; koidan doi utusonggita Apfia tukon tulando palajuangan kita, Alkhipus.

³Kami moinikene boliisi ko Mian Bisa Tamanggita tukon Temeneno Yesus Klistus mebee balakaat tukon namonondokan doikoo.

Filemon naseang tukon namanganggaan

⁴Samba luunggon yaku sambeang, yaku bantile Utus sambuno tukon mopolonggon kinatauan doi Mian Bisa. ⁵Sabab yaku molongol baikon Utus tutuu mangangga doi Temeneno Yesus tukon seseange sasaibino ko Mian Bisa namian. ⁶Yaku sambeang boliisi konda motolutusan buno mian badaang momangangga naikon kohasilo mangalatian mo lobian babasal doi sasaibino kobalakaat mo daano doi kita sabab pomeenggon tukon Klistus. ⁷Utus Filemon, museangano doi sasaibino ko Mian Bisa namian, yaku laba tuuno tukon beena dolongan doi yaku! Sasaibino ko Mian Bisa namian lapamo teali laba sabab Utus.

Tuuk Onesimus nakakabi

⁸Doiyamo kosababpo, buno meeng komian utuso momeeng komanganggaan, yaku moolamo palentayo Utus tuuk lakukene oila mo sio Utus lakukanggene. ⁹Bai sabab yaku seseange Utus, yaku tongo mangkabi kai. Yaku nia meeng komian motuwa tukon diabudodoo daano doi talunggu lalomo sabab Klistus Yesus. ¹⁰Yaku, Paulus, pelengene meeng kokakabi doikoo manganai Onesimus, kupau doi Klistus lalomo. Sabab doi talunggu nia lalomo yaku lapamo teali tama lohani. ¹¹Looluk yana aki nabalaguna tuuk ikoo, bai diabudodoo yana balagunamo, bolikon tolongo tuuk ikoo tolong, baimokai tuuk doikoo!

¹²Diabudodoo mian mo yaku seangedoo yaku kapatue koidan doikoo. ¹³Kona bisaan yaku taane yana polaing yaku teali posobolimu, sulano yana namoola tomboniiyaku, selama kutinaanan doi talunggu nia lalomo sabab babotilangene Bilita Monondok luwedo Mian Bisa. ¹⁴Bai aki kuyase lakukanggene oioila kalu Utus akiyoon musatuduiyo. Yaku yase tuuno kalu Utus kubaiyo tukon noamu susuumu nameleoson; yaku aki kupakisaayo ikoo.

¹⁵Moola Onesimus tinggale doi Utus tuuk aki namalumbit sulano Utus moola laate yana abali tuuk sidutu-posidutukon. ¹⁶Diabudodoo yana bolikon tolongo meeng koata; yana lobiano doiya. Yana daano tulando mian Salani mo sineang. Yana balaguna tuuno tuuk yaku, baimokai tuuk doikoo! Yana

balaguna tuuno mau nabuno ata mau kai nabuno meeng komian utuso doi Temeneno lalomo!

¹⁷Tobikon doiya, sabab Utus toiyo yaku tulando Salani miano, talimayo koidan Onesimus pokakana bunu Utus talimayo yaku. ¹⁸Kalu yana sala kabai basamea doikoo, sodiiyomo maka kutanggunge kokabuson. ¹⁹Eh, monondoko yaku batulis susuunggu diimbaa: **Yaku, Paulus, naikon olunosiiyo sasaibino.** (Tantu aki napalaluu yaku tandaikene baikon Utus susuumu daano musamea doi yaku, doiyamo mutuboan boolu bunu mian Salani.) ²⁰Tobikon doiya, oh Temeneno soba tulunge yaku, sanaanggene konoanggu bunu utus doi Klistus lalomo.

²¹Yaku tulise nasulatia sabab anggayo baikon Utus naikon lakukanggene oila daku kinabi. Bisa yaku toiyo Utus naikon molakukanggene lobian doiya. ²²Tolongo bunu doiya tulung sadiayo doi mubonua kokombiang tuuk yaku, sabab yaku moinikene Mian Bisa talimayo Utus-utus sasaibino nasambeang tukon babayo yaku abali doi komuyu.

Teteba napupusan

²³Epaflas, mo daano polaing yaku doi talunggu lalomo sabab Klistus Yesus, kapatue kona teteba doikoo. ²⁴Talimayo koidan kotula-tulanggu nateteba; Malakus, Alistalkus, Demas tukon Lukas.

²⁵Boliisi Temeneno Yesus Klistus nabalakaatiyo komuyu.

Komai holomat,
Paulus

SULAT DOI IBLANI MIANO

PANGANTOKON

Sulat doi Iblani miano nia inotuuk doi meeng kotambuno ko Salani miano, sabab yanila momeenggon toupiyo kopapangalui, tealikene naikon akimo napo maangga doi Klistus. Komo tulise nasulatia kakaate modelenge yanila sulano natataap mangangga. Tobikon doiya yana tudoikene baikon Yesus Klistus doiyamo ko Mian Bisa nabatokitaan mo bisa. Komo tulise nasulatia tolu kolangge kona linoolukonggon. Kotumbeno, Yesus daano Mian Bisa Napau - Napau mobisa posidutukon. Mian Bisa Napaudoo tudoikene kona loingiyano ko Tamano mololoi nasabalan doi nasakisaawan. Buno ko Mian Bisa Napau, Yesus lobian tatandak kona kuasa doi nabi-nabi doi Paladandian Tumbeno lalomo. Yesus koidan lobian tatandak kona kuasa doi malaekat kai doi Musa susuungo. Koluano, Mian Bisa lapamo okitakene Yesus buno imam sidutu-posidutukon mo lobian tatandak doi imam-imam Paladandian Tumbeno lalomo. Kotoluno, tukon lolo doi Yesus, mian mo maangga doi yana tosodiimo doi nalalim tukon aline doi matakutan tukon matean. Buno Imam Babasal, Yesus beena doi banggapi kasalamatan mobisa mo aki namoola bineekon doi mososubakene kososubakon tukon kokubai-kokubai bailong doi agama Yahudi lalomo. Doiya basosubakananoo tolongo mebee gambalan moluwedoi kasalamatanoo mobisa tolong, kobailong kiyo.

Tukon linolukonggon sontoh-sontoh manganggaan doi katua-katua motinoiy doi tundun Islael (pasal 11), komo tulise nasulatia popitoikene doi mian mobasayo sulano natataap loingiyo. Doi pasal 12 lalomo yana bintekene yanila sulano napo loingiyo momeenggon polong doi loonu napupusan, tukon tongo kitayo doi Yesus. Yana bontiikene yanila koidan sulano naposabal doi sakisaawan sabal motanggunge kotekanan-tekanan tukon sakisaa doi yanila butongo. Nasulatnia inopupus tukon otunggul maka poingotii.

Antoko

Pololukoni: Klistus doiyamo ko Mian Bisa nabatokitaan mo bisa 1:1-3

Klistus lobian tatandak kona kuasa doi malaekat 1:4-2:18

Klistus lobian tatandak kona kuasa doi Musa tukon Yosua 3:1-4:13

Kona lobianan Klistus nalimang buno imam 4:14-7:28

Kona lobianan Klistus nateteba 8:1-9:28

Kona lobianan Klistus nasinosubakonan 10:1-39

Namonondokan komaanggaan 11:1-12:29

Otinau tukon potutupo 13:1-25

Mian Bisa basilingan lolo doi na Pau

1 Doi loolukoo badaang luunggon Mian Bisa basilingan doi tumbanggita lolo doi nabi-nabi tukon pakeyo badaang koakal. ²Bai doi lounu nia napupusan yana basilingan doi kita tukon lolo na Pau. Mololoi na Pau niamo Mian Bisa tealikene kolipu sasaibino. Tukon Mian Bisa lapamo tetenge baikon na Pau naiyamo koidan mo balahaak taaniyo sasaibino. ³Yanamo mo okitakene nakinabasalan Mian Bisa mo nggile-nggilep; yanamo kotimbangan nabatokitaan moluwedoi Mian Bisa butongo susuungo. Yanamo koidan mo totooliyo komonondokan dunia nia tukon nabantilan mo balakuasa tuuno. Lapa yana moolakene kobanggapi sulano natongosodii doi yanila nalalim-lalim, yana mongosulongii batomundoan doi sulugaa polaing-laing Mian Bisa, Pototooli mo tatandak.

Mian Bisa Napau nakinabasalan

⁴Paudo malaat osulangan lobian odoon tatandak doi malaekat, tukon sambu Mian Bisa mo beekene doi yana koidan lobian odoon inodotii doi sambu mo bineekon doi malaekat. ⁵Aki koidan Mian Bisa bantil bunu naiya doi meeng komalaekat, “Ikoomo daku Pau, doi oloyo nia yaku teali Tamamu.”

- Aki koidan Mian Bisa bantil buno naiya doi meeng komalaekat,
 “Yaku naikon teali Tamano,
 tukon yana naikon ku Pau.”
- ⁶Bai doi tembo Mian Bisa bintekene na Pau langgongo doi dunia nia, Mian Bisa bantil buno naiya,
 “Sasaibino ko Mian Bisa namalaekat sio nasosuba doi Paudoo.”
- ⁷Kaliangano komalaekat-malaekat, Mian Bisa bantil buno naiya,
 “Mian Bisa kubaiyo namalaekat-malaekat teali mbombuul,
 tukon napeleleani-peleleani teali aung lodono.”
- ⁸Bai doi Paudoo, Mian Bisa bantil,
 “Komu batomundoan, oh Mian Bisa, naikon sidutu-posidutukon!
 Komu batomundoan daano batomundoan mo adil.
- ⁹ Ikoo yase naikon kona adilan, tukon misikitene naikon komo lokis;
 doiyamo kona sabab Mian Bisa, mu Mian Bisa, lilike ikoo tukon odotiiyo doikoo pongodotiiian mo lubatene kolabaan, liisiyo kotula-tulamu.”
- ¹⁰Mian Bisa bantile koidan,
 “Ikoo, Temeneno, doi tumbeno motealikene kobuta,
 tukon ikoo susuumu kubaiyo kotimbu.
- ¹¹ Sasaibino naikon lapus,
 tukon teali motuwa buno bokukum;
 bai ikoo naikon aki nabolii.
- ¹² Dunia nia naikon ikoo ambite buno kalambi,
 tukon naikon ikoo soboliyo tukon bailong.
 Bai ikoo aki naidan naikon tobolii,
 tukon mutuboan aki naikon napupus.”
- ¹³Mian Bisa aki naidan bantil buno naiya doi meeng komalaekat,
 “OsuLang doi bakalinganggu taikon,
 polong komu musu-musu yaku taaluukanggene doikoo.”
- ¹⁴Kalu buno doiya, malaekat-malaekato oila kona tutuuwan?
 Yanila daano loh-loh mo leleaniyo ko Mian Bisa, tukon Mian Bisa sumboliiyo sulano tulungiyo mian badaang naikon mantalima kasalamatan.

Kasalamatan mo tuuno

2 Doiyamo kosababpo kita sio lobian tutuu mangangga doi otunggul-otunggul mo lapamo kita lengele, sulano kita inai tinggale konda manganggaan. ²Teteba-teteba malaekat mo pelenggene doi tumbangita totoi bisa, tukon mian mo aki naloingiyo kabai namololean talimayo ukuman mo poloikon. ³Oila koidan tukon kasalamatan mo lobian tuuno doi teteba-tetebadoo! Kalu kita aki nda palatikanggene do kasalamatanoo, kita tantu aki naikon tosodii doi ukuman. Sabab Temeneno susuungo kotumbe-tumbeno mo pelenggene kasalamatanoo, tukon mian badaang tumbe-tumbeno molongol lapa okitakene kona kanaan doi kita. ⁴Lapa do imbaadoo, Mian Bisa tulut kobukuanggene mian badaangoo nasalita tukon daanokene sasaibino kokaliangano mominasaingdinggon tukon langge-langge mobilikon langge tukon ebe-ebese ko Mian Bisa Na Loh bine-bineekon mololoi namongiasan susuungo.

Mobukayo kololoon doi banggapi sulano nasinalamaton

⁵Malaekat-malaekat aki namalaat kuasa doi Mian Bisa sulano napalentayo kodunia boolu naikon mo lubat, doiyamo dunia mosodo kita bisalakene nia. ⁶Napaisobolian doi meeng koobos doi Kitab Moliyous lalomo totulis buno naiya,

“Banggapidoo oila, oh Mian Bisa, tobikon ikoo yase neneeke?
Banggapi tongo banggapino, mau naikoo palatikanggene!

⁷ Tuuk tembo mo soisik ikoo tealikene yana lobian soisik kona pependean doi malaekat.

Ikoo beekene doi yana kadudukan mo monondok tukon inodotii,

⁸ tukon tealikene yana mokuasaiyo sasaibino kolobo.”

Nah, kalu binantil baikon Mian Bisa tealikene kobanggapi “mobalakuasa doi sasaibino kolobo”, doiya koalatio baikon akiyo kolobo meeng mo aki na doi bilit kobanggapi nakakuasaan. Mau nabuno doiya, kita diabudodoo aki nda monggita banggapi mobalakuasa doi sasaibino kolobo. ⁹Bai kita lapamo kitayo Yesus balakuasa! Yana tealikene lobian

soisik pepende doi malaekat tuuk tembo mo palus, sulano doi namonondokan ko Mian Bisa noano yana laate mate tuuk sasaibino kobanggapi. Kita kitayo yana diabudodoo bineekon kona kadudukan mo moliyous tukon hinolomati sabab yana lapamo sakisaa polong mate. ¹⁰Takainomo siokai Mian Bisa – mo tealikene sasaibino kolangge tuuk namongiasan susuungo – tealikene Yesus pasalamaton mo bisa mololo doi sakisaawan. Tukon doiya Mian Bisa moola tobiyo komian badaang sulano namakabasal posinggat Yesus. Sabab yanamo komo bukayo kololoon doi yanila sulano namoola sinalamaton.

¹¹Yesus kumesiyo kobanggapi doi yanila nalalim-lalim; tukon yana kumesiyo, tukon yanila mo kinumesidoo, polaing-laing daano meeng ko Tama. Doiyamo kosababpo Yesus aki namammaa mangakukene yaniladoo bunu kai utus-utuso.

¹²Yesus bantil doi Mian Bisa,

“Yaku naikon babilitakene doi utus-utusonggu kaliangano ikoo.

Yaku naikon nggaale ikoo doi yanila napososuungan lalomo.”

¹³Yesus bantil koidan, “Yaku naikon abese daku moinian doi Mian Bisa.” Tukon yana bantil koidan, “Naiyamo yaku, polaing pau-pau mo lapamo Mian Bisa beekene doi yaku.”

¹⁴Tobikon mian badaangoo mo yana bantile paudoo, daanoon banggapi mo moola mate, maka Yesus susuungo teali pokakana tukon yanila tukon tubo doi banggapi nandondoong lalomo. Yana kubaiyo doiya, sulano tukon namatean yana laate momanase ko Ibiliis mo kuasaiyo komatean. ¹⁵Tukon cala doiya yana bebaskanggene mian badaang pomatekon kinubai ata sabab matakutene komatean. ¹⁶Natokitaan baikon bolikon malaekat kona tinulungi, baimo Abalaham nakatulunan. ¹⁷Naiya koalatio baikon yana sio nateali pokakana tukon utus-utuso doi sasaibino kolangge. Tukon doiya yana moola teali Imam Babasal mo molole tukon daano kona soyang. Tukon nameleleanianoo banggapi nalalim moola inompuni. ¹⁸Tukon sabab yana susuungo idan sakisaa tukon sinobai, yana moola tulunge komian badaang mo kanakon sobaan, sabab yana susuungo idan sinobai tukon sakisaawan.

Yesus lobian babasal doi Musa

3 Utus-utus tulando Salani mo lapamo Mian Bisa uange koidan! Soba pikikene tutuuno kaliangano Yesus nia! Mian Bisa bintekene yana tongo teali Imam Babasal doi agama lalomo nda inangga. ²Yana molole doi Mian Bisa mo lapamo lilike yana tuuk balimanganoo, buno koidan Musa looluk molole limange kona limang doi Mian Bisa nabonua. ³Bai Yesus patut malaat pongodotii lobian babasal doi Musa. Sabab mian mo kokondong bonua sio namalaat pongodotii lobian babasal doi bonuadoo susuungo. ⁴Bisa memeeng kobonua daano komo kekendenge, bai komo kekendenge sasaibino kolobo daano Mian Bisa susuungo. ⁵Musa molole buno peleleani Mian Bisa nabonua lalomo tukon pelenggene kolangge-langge naikon Mian Bisa mo bontiikene doi tembo naikon mo lubat. ⁶Bai Klistus molole buno Pau mo balatanggun jawab doi Mian Bisa nabonua. Tukon kita nia Mian Bisa nabonua, kalu kita tataap kokobukuan tukon tataap mangangga sulano malaat oila konda minoinikon.

Mian Bisa namian natadean

- ⁷Sabab doiya, buno Mian Bisa Na Loh nabantilan,
 “Kalu oloyo nia komuyu molongol Mian Bisa nalalo,
⁸ inaimo po otikase konoamuyu, buno tumbumuyu,
 salataa yanila nggimoliiyo ko Mian Bisa tukon sobaiyo ko
 Mian Bisa doi padang lalomo.
⁹ ‘Imbali tumbumuyu sobaiyo yaku, tukon sobayo yaku,’ Mian
 Bisa bantil,
 ‘banggokai yanila lapamo kitayo kukokubai sangkap kolono
 kotaum nakalumbit.’
¹⁰ Doiyamo kosababpo yaku nggimoliiyo doi yanila tukon yaku
 bantil,
 ‘Yanila sidutu aki namolole,
 tukon ikoo tabaalene moloingiyo daku palenta-palenta.’
¹¹ Yaku nggimoliiyo tukon batotopi,
 ‘Yanila aki naikon nausok doi lipudoo,
 sulano namalaat tadean polaing yaku.’ ”
¹²Utus-utus, pobai-baingotii inai nadaano doi komuyu nokon
 meeng komian konoano mo kulokis tukon aki namangangga,

tobikon yana abali tukon kokodoonggon doi Mian Bisa mo tubo! ¹³Jadi, sulano aki nadaano doi komuyu nokon mo totipu doi lalim tobikon natantaange ko Mian Bisa, siokai komuyu po pootinau samba kooloyo doi naanoonan kita motubo doi tembo nia lalomo mo sinombuikon “Oloyo Nia” doi Kitab Moliyous lalomo. ¹⁴Kita sasaibino daano tulando meeng kopaladuangan tukon Klistus, sio kita polong doibundu taaniyo momoonggol manganggaan mo daano doi kita doi tumbe-tumbeno. ¹⁵Naiyamo mo totulis doi Kitab Moliyous lalomo,

“Kalu doi oloyo nia komuyu molongol Mian Bisa nalalo, inaimo komuyu otikase konoamuyu, buno tumbumuyu, salataa yanila nggimoliiyo ko Mian Bisa.”

¹⁶Nah, indee kai mian badaang mo molongol Mian Bisa nalalo maka nggimal doi yana? Doiyamo sasaibino komian Musa mo pimpine tobuat doi Mesil, bolikon? ¹⁷Tukon doi indee kai Mian Bisa nggimal sangkap kolono kotaum kona kalumbit? Doi yanila mo baladosa, mo otuwong mate doi padang lalomo, bolikon? ¹⁸Salataa Mian Bisa totopiyo buno naiya, “Yanila aki naikon nausok doi lipudoo sulano namalaat tadean polaing yaku” – indee kai koidan Mian Bisa naminakisuuti? Komo minakisuuti doiyamo mian badaang mo nggimoliiyo ko Mian Bisa, bolikon? ¹⁹Doiya budodoo kita toiyomo baikon yanila aki namoola usok, sabab yanila aki namangangga doi Mian Bisa.

4 Nah, Mian Bisa napaladandian daano moilakukon, tukon kita naikon binee tadean yana mo dondiikene. Tobikon, siokai kita dagaiyo sulano inai nadaano meeng komian doi antala komuyu mo totoi aki namotoupi tadean mo dinondiikonoo. ²Tobikon Bilita Monondokoo lapamo pinobotilanggon doi kita pokakana buno yanila. Mau doi yanila, bilitadoo akiyo kona totuuk. Sabab sambuno yanila molongoli, yanila aki namangangga. ³Bai kita mo mangangga mantalima tadean Mian Bisa mo dondiikene. Doiya pokokonoi tukon oila ko Mian Bisa nabinantil, buno naiya,

“Yaku nggimal tukon batotopi,
‘Yanila aki naikon nausok
tuuk malaat tadean polaing yaku.’”

Mian Bisa bantil buno doiya mau kai nabalimangan lapamo

tolimang doi tembo yana tealikene dunia nia. ⁴Sabab kaliangano oloyo kopituno, daano mototulis doi Kitab Moliyous lalomo bunu naiya, “Doi oloyo kopituno Mian Bisa tadekene doi sasaibino kona limang.” ⁵Kokaliangano langgedoo tinulis koidan bunu naiya, “Yanila aki naikon nausok doi lipudoo tuuk malaat tadean polaing yaku.” ⁶Jadi yanila kotumbe-tumbeno molongol salita tentang Bilita Monondokoo, aki namantalima tadeanoo sabab yanila aki namangangga. Kalu bunu doiya totoimo baikon daano komian badaang bailong mo moola namantalima tadeanoo. ⁷Sabab Mian Bisa lapamo tantukanggene doi meeng kooloyo bailong koidan, mo sinombuikon “Oloyo Nia”. Taum-kotaum doibundu Mian Bisa komo basilingan kaliangano langgedoo mololoi doi Daud, doi ayat lalomo mo tinulis budoo,

“Kalu oloyo nia komuyu molongol Mian Bisa nalalo, inaimo komuyu otikase konoamuyu.”

⁸Kalu bunu kai Yosua lapamo beena mian badaangoo tadean mo dinondiikon Mian Bisa, maka Mian Bisa aki naikon basilingan koidan kaliangano meeng kooloyo bailong. ⁹Jadi, tongo Mian Bisa namian koidan daano napaladandian sulano tade bunu Mian Bisa tade doi oloyo kopitunodoo. ¹⁰Sabab mian mantalima tadean Mian Bisa mo dondiikene doi yaniladoo, naikon tade koidan doi sasaibino kona limang, pokakana bunu Mian Bisa. ¹¹Sabab doiya, maimo nda kakaate tutuuno sulano mantalima tadean Mian Bisa mo dondiikene doiya. Inai napolong meeng komian doi kitadoo aki nateali bunu yanila loolukoo, sabab aki namangangga doi Mian Bisa.

¹²Mian Bisa nabantilan daano bantilan mo tubo tukon bukuan; lobian mamangan doi sabel molua komatano. Do bantilanoo batobokon polong doi napokalatanan antala jiwa tukon loh; polong nadumbakan antala doi lolosano tukon bukung tonotoko, tobikon natooyo tutuuno kopikilan tukon kobanggapi naniat doi noano. ¹³Akiyo komeeng kolobo mo tosookon doi Mian Bisa napokita. Sasaibino kolangge talalau tukon tobuka doi yana salaano. Tukon kita sio nda mebee potimbilino doi yana.

Yesus Imam Babasal mo tutuu

¹⁴Doiyamo kosababpo kita sio nda bataani momoonggol doi mangakukanano konda mangangaan. Sabab kita daano konda Imam Babasal mo babasal tuuno, mo lapamo usok polong doi Mian Bisa salaano – yanamo Yesus Mian Bisa Napau. ¹⁵Imam Babasal kitadoo bolikon imam mo aki namoola tulut motoupi konda kasalaan-kasalaan. Kona kabalikan, yana lapamo sinobai doi sasaibino kolangge, pokakana bunu kita susuungo; tongo yana aki nakubaiyo kolalim! ¹⁶Sabab doiya, maimo kita tukon balani tuuno mangadap doi Mian Bisa mo mapalenta tukon noa monondok. Mian Bisa naikon seseange kita tukon balakaatiyo kita sulano kita malaat potulungi konoioyo kotembono.

5 Samba koimam babasal molinilik doi antala kobanggapi, tukon biningkat sulano leleaniyo ko Mian Bisa bunu yanila nawakil. Kona limang doiyamo sosubakene doi Mian Bisa mobine-bineekon tukon sosubakon-sosubakon tuuk lalim nainompunian. ²Imam babasalo susuungo sala doi badaang kolangge lalomo, tukon sabab doiya yana babunokon mantalamuyuk doi mian-mian mo aki natoioyo oioila tukon mo isalomo kona loloon. ³Tukon sabab yana susuungo sala, maka yana sio sosubakene kona sosubakon, bolikon tongo sabab banggapi nalalim-lalim, bai koidan sabab nalalim-lalim susuungo. ⁴Akiyono meeng komian mo binggate kobutongo susuungo teali imam babasal. Mian moteali imam babasal, kalu Mian Bisa uange yana tuuk doiya – bunu pokakana bunu Hælun.

⁵Bunomo koidan Klistus. Yana aki nabinggate kobutongo susuungo teali Imam Babasal. Mian Bisa susuungo komo binggate yana. Mian Bisa bantil doi yana,

“Ikoo daku Pau;

doi oloyo nia yaku teali Tamamu.”

⁶Doi lipu bailong Mian Bisa bantil koidan,

“Ikoo daano imam sidutu-posidutukon,
bunu Imam Melkisedek.”

⁷Singgatoo Yesus tubo doi dunia nia, yana sambeang tukon kabiyo tukon nggeleamon tukon kokiil doi Mian Bisa, mo moola salamatene yana doi matean. Tukon sabab yana tootuku doi

Mian Bisa tukon holomatio tuuno, maka yana ilongoli. ⁸Yesus daano Mian Bisa Napau, bai mau nabuno doiya yana monggi otunggukon teali molole loloiyo kona kasusaan. ⁹Maka yana lapa tinealikon pasalamaton mo bisa, yana teali kokasalamatan uuno naluwean mo akiyo konapupusan doi sasaibino komian mo molole doi yana, ¹⁰tukon Mian Bisa okitakene yana bunu Imam Babasal, bunu Imam Melkisedek!

Poingotii

¹¹Kaliangano Yesus nabasambuan bunu Imam Babasal, daano badaang komo palaluu kami popitoikene doikoo, bai maaling tuuno motalakangene sabab komuyu malumbit tuuno pomangalati. ¹²Kona bisaan lapamo kotembono doikoo tuuk teali gulu, bai natokitaan komuyu daano palaluu inotunggul doi mian bailong kaliangano Mian Bisa naotunggul uuno tumbeno. Kami akiyon moola mantalima kinaan mo matikas; komuyu daano sio tongo monginum susu. ¹³Mian mo daano monginum susu, koalatio yana daano mopau-pauno; yana kiyoon daano kona tinoupi tentang oila komo kana tukon oila komo sala. ¹⁴Kinaan mo matikas tuuk mian mobabasalo sabab tinoupi, moolamo nda posasalakene naando komo monondok tukon mo kulokis.

6 Sabab doiya, maimo kita banggadudulkene doi pongotunggul-pongotunggul mo lobian tuuno kaliangano doi tuboan Salani, momoolamo limange, tukon inai tongo okiteese otungguloo agama kita uuno motumbeno. Inai kita ulange koidan otungguloo uuno baikon mian mosio natade kubaiyo langge-langge mo akiyo kotakoso tukon sio mangangga doi Mian Bisa, ²kabai otunggul uuno kaliangano mansauan paisu salani kabai kaliangano binggakanano kolimano doi mianoo bunggono, kabai kaliangano abalian tubo nalapaan mate kabai inukum posidutukon. ³Maimo kita, kalu Mian Bisa pataikene, tuluus doi otunggul-otunggul mo lobian tuuno!

⁴Sabab, mian-mian mo lapamo upa, aki nateali inotunggul koidan. Looluk yanila daanomo doi madialan lalomo doi Mian Bisa, tukon lapamo talimayo komo bineekon. Yanila lapamo kai tulut Mian Bisa Na Loh kuasaiyo. ⁵Yanila toiyo doi napangalaman yanila baikon Mian Bisa nabantilanoo

monondok, tukon yanila lapamo toupiyo komo bineekon-bineekon mo moonoo kuasa doi lounudoo naikon nalubatan. ⁶Bai lapa doiya yanila upa! Bulaa kona tealian babayo yanila abali tuuk babolii koidan doi yanila nalalim-lalim. Sabab yanila daano mosempanggene koidan Mian Bisa Napau tukon kubaiyo yana tinotulai doi mian badaang salaano.

⁷Buta mo sesepe kopaisu udan idan loboson doi yana bunggono, maka kona hasil mo sinakakon-sinakakonoo balaguna tuuk mian mo limange, butadoo Mian Bisa balakaatiyo. ⁸Bai kalu butadoo tubekene kopadang-padang tukon kayung mosoniton, maka butadoo akiyo kotakoso tukon doibundu naikon Mian Bisa kutuke tukon doibundu sinua kabus.

⁹Bai Utus-utus mo sineang, mau bulaando kami bantile bunoo doiya, bai kami mangangga kaliangano komuyu. Kami mangangga baikon komuyu lapamo mantalima langge-langge mo lobian monondok, doiyamo balakaat-balakaat mo babunokon sembeleng doi mukasalamatan. ¹⁰Mian Bisa bolikon Mian Bisa mo aki naadil. Yana aki natoliminggene oila komuyu nalinimang doi yana, tukon seang komuyu motudoikene doi yana daano kotembono tulungiyoo utus-utus momeeng komangangaan, looluk tukon nia budodoo. ¹¹Kami yase tuuno sulano komuyu memeeng tuluus kokobukuan polong doi napupusan, tobikon komuyu mantalima oila komuyu mo moinikene. ¹²Kami aki yase komuyu teali bea-bea. Bai kami yase sulano komuyu tubo bunoo mian-mian mo mantalima oila ko Mian Bisa nadinondiikon, sabab mangangga tukon sabal.

Mian Bisa napaladandian aki namoola tobolii

¹³Salataa Mian Bisa paladandi doi Abalaham, yana balasumpa baikon yana naikon kubaiyo oila komo lapamo dinondiikon. Tukon sabab aki daano mo lobian tatandak doi Mian Bisa, maka yana balasumpa lolo sambuno susuungo. ¹⁴Yana bantil, “Yaku baladandi naikon balakaatiyo ikoo tukon kubaiyo komu tulunan teali badaang.” ¹⁵Abalaham mototiili tukon sabal, maka yana mantalima oila komo dinondiikon Mian Bisa doi yana. ¹⁶Kalu mian balasumpa, yana balasumpa doi mian bailong sambuno mo lobian tatandak doi yana, maka nasumpadoo kopuusiyo sasaibino kopo bantaan. ¹⁷Mian Bisa yase popitoikene

doi mian badaang mo mantalima paladandian, baikon yana aki naikon naboliiyo kona tetel. Doiyamo kona sabab yana suungiyo sumpa doi napaladandianoo. ¹⁸Lua do langgedoo aki namoola tobolii: Mian Bisa aki nateali bakala-kala doi napaladandian tukon nasumpa. Tobikon doiya, kita mo lapamo soop doi Mian Bisa, binee podulunggon doi moinian mo tabanaton doi salaanggita. ¹⁹Nda moinianoo bunu tapu mo tatamon atean tuuno tukon bunu bataanian mo moonggol tukon aman doi nda tuboan. Moinianoo tadul doi posonggolii Kombiang mo Moliyous doi Temeneno Nabonua doi sulugaa. ²⁰Yesus lapamo bukayo kololoon doi lipudoo tuuk doi kita, tukon lapamo usok imbali teali Imam Babasal doi kita tuuk sidutu-posidutukon, bunu Imam Melkisedek.

Imam Melkisedek

7 Melkisedek nia kotomundo Salem tukon Mian Bisa naimam Mo Tatandak Tuuno. Tembo Abalaham abali doi napolobosian lungguiyo kotomundo-tomundo, Melkisedek lubat mololobotiyo yana maka balakaatiyo. ²Maka Abalaham beekene doi Melkisedek songulo koobos doi sasaibino oila kona linaat. (Melkisedek sambuno koalatio, tumbe-tumbeno, “Tomundo Adil”; tukon sabab yana tomundo doi Salem, maka yana kosambuno koidan koalatio, “Tomundo Monondok”.) ³Kaliangano Melkisedek nia akiyo kokatalangano doi yayaando baikon yana daano kotamano kabai tinano kabai nambumbu; koidan akiyo kotunduno kaliangano nasinuungan, kabai namatean. Yana pokakana bunu Mian Bisa Napau; yana daano imam mo posidutukon.

⁴Jadi, kita kitayo dimbaa bulaando kona babasalan Melkisedek nia; yana bunu doiya kona babasalan tobikon Abalaham, tama tumbunggita, beekene doi yana songulo koobos doi sasaibino kolangge mo ilaat doi poolobosianoo. ⁵Doi ukum agama Yahudi tinantukon baikon imam-imam katulunan Lewi sio namangala songulo koobos doi Israe'l miano napandapatan, doiyamo utus-utus yanila susuungo, mau yanila pokakana katulunan Abalaham. ⁶Melkisedek bolikon katulunan Lewi, bai yana mantalima koidan songulo koobos doi sasaibino Abalaham nalinaat, tukon balakaatiyo koidan Abalaham mo



Meeng ko Imam Babasal moluwedoi Lewi nabenseno (7:11)

lapamo mantalima paladandian doi Mian Bisa. ⁷Tutuu aki namoola inakiyonggon baikon mian mo binalakaati lobian pepende tukon doi mian mo balakaatiyo. ⁸Imam-imam mo mantalima mangalaan songulo koobosoo daano mian mo moola mate. Bai manulut Kitab Moliyous, Melkisedek mo mantalima mobineekon songulo koobosoo daano mian mo tataap tubo. ⁹Moola nabinantil, baikon Lewi – kona katulunan pangala songulo koobos doi Israel miano – beale koidan obosoo lolo doi Abalaham, doi tembo Abalaham beale doi Melkisedek. ¹⁰Mau Lewi kiyoon nasinuung, bai moola nabinantil yana lapamo daano doi Abalaham tumbuno butongo lalomo, tembodoo Melkisedek pososuung tukon Abalaham.

¹¹Doi imam-imam Lewi napimpinano, atulan agama Yahudi bineekon doi Israel miano. Sabab imam-imam Lewi loolukoo aki laate lakukene tukon tutuu oila komo sio nailimang, maka sio

daano koimam bailong, doiyamo buno Imam Melkisedek, tukon bolikon doi golongan Imam Halun koidan! ¹²Nah, kalu imam-imam nabasambuan tobolii, ukum agama Yahudi koidan siokai natobolii. ¹³Komo pinakituu dimbaa doiyamo nda Temeneno: Yana doi suku bailong, tukon akiyoon naidan meeng komian doi bensenoo balimang buno imam. ¹⁴Sasaibino komian toiyoo baikon konda Temeneno luwedoi suku Yehuda; tukon Musa aki naidan mabantil bensenoo doi tembo yana basilingan kaliangano imam-imam.

Meeng koimam bailong, mobuno Melkisedek

¹⁵Langge mo binisalakon nia teali lobian tontong koidan, tukon natokitaan meeng koimam bailong mo buno Melkisedek. ¹⁶Yana biningkat teali imam, bolikon luwe banggapi naatulan-atulan, bai luwedoi natuboan mo balakuasa tukon mo akiyo kona pupusan. ¹⁷Sabab doi Kitab Moliyous lalomo binantil, "Ikoo daano imam sidutu-posidutukon, buno Imam Melkisedek." ¹⁸Jadi, diabudodoo palatulan mo malumbito akimo napinake, sabab akiyoo kotakoso. ¹⁹Ukum agama Yahudi aki nalaate kubaiyo kolobo meeng moteali monondok. Doiyamo kosababpo kita diabudodoo bineekon meeng komoinian mo lobian monondok; tukon doiya kita moola koolaniyo ko Mian Bisa.

²⁰Koidan, sasaibinodoo pinoolainggon tukon sumba doi Mian Bisa. Akiyo kosumba mobuno doiya tembodoo imam-imam bailongoo nabiningkatan. ²¹Bai Yesus biningkat teali imam pakeyo kosumba, doi tembodoo Mian Bisa bantil doi yana,

"Temeneno lapamo basumba,

tukon yana aki naikon naboliyo kona pendilian,

'Ikoo daano kai imam sidutu-posidutukon.' "

²²Tukon nia koidan Yesus teali patalu tuuk meeng kopaladandian mo lobian monondok.

²³Daano koidan meeng kolangge: imam-imam bailongoo daano madaang, sabab yanila memeeng mate tobikon aki nalaate banggadudulkene kona basambuan. ²⁴Bai Yesus tubo sidutu-posidutukon, jadi nabasambuan buno imam aki nabiyol doi mian bailong. ²⁵Sabab doiya tuuk sidutu-posidutukon Yesus moola salamatene ko mian-mian mo lubat doi Mian Bisa mololoi

yana, sabab yana tubo sidutu-posidutukon tuuk mopolonggon kakabi doi Mian Bisa tuuk doi mian-mianoo.

²⁶Jadi, Yesus doiyamo Imam Babasal kita mo palaluuwo. Yana moliyous; doi yana aki natalaat kokasalaan kabai lalim oilamo. Yana pinoalaason doi mian-mian mobaladosa, tukon linibakon polong doi lipu mo lobian tatandak doi sasaibino kotimbu. ²⁷Yana aki nabuno imam-imam babasal bailong, mo samba kooloyo sio nasosubakene kona sosubakon sabab nalalim-lalim susuungo loolukon, koidan sabab mian nalalim-lalim. Yesus sosubakene kona sosubakon tongo idan tuuk sidutu-posidutukon, salataa yana sosubakene kobutongo susuungo buno sosubakon. ²⁸Ukum agama Yahudi bingkate komian mo aki natalakana teali imam babasal. Bai doibundu doi ukumoo, Mian Bisa kubaiyo kopaladandian tukon sumba baikon yana bingkate buno Imam Babasal, Pau mo lapamo tinealikon Pasalamaton mo talakana tuuk sidutu-posidutukon.

Yesus nda Imam Babasal

8 Uuno doi sasaibino kobasilinganan nia doiyamo: Kita daano ko Imam Babasal mo buno koiya, mo osulang mapalenta polaing Mian Bisa Nakabasalan doi sulugaa. ²Yana limange kona limang buno Imam Babasal doi Kombiang Moliyous, doiyamo Temeneno nadungolan lalomo mo bisa, Temeneno mo kekendenge, bolikon banggapi.

³Samba koimam babasal biningkat tuuk mososubakene kona sosubakon kabai sosubakon doi Mian Bisa. Bunomo koidan konda Imam Babasal; yana sio daano langge tuuk sinosubakon. ⁴Kalu kai yana daano nai dunia nia, yana aki naikon teali imam, sabab daanomo koimam mo sosubakene kona sosubakon mo tinuntut doi ukum agama Yahudi. ⁵Kolimang yanila lakukene buno imamoo kona kanaan tongo meeng kogambalan tukon timbalan doi oila mo daano doi sulugaa. Doiyamo lapamo Mian Bisa bontiikene doi Musa looluk, salataa Musa yase kekendenge ko Temeneno na Sandung. Mian Bisa bantil buno naiya doi Musa, “Neneeke! Sasaibinodoo siokai ikoo kubaiyo manulut sontoh mo tinudoikon doikoo doi bunggul bunggono.” ⁶Bai diabudodoo Yesus malaat limang imam lobian mo dodoon kona monondokan doi imam-imam nalinimangoo. Sabab paladandian

yana mo daanokene antala Mian Bisa tukon banggapi, daano kai paladandian mo lobian monondok sabab kona dasal paladandian tuuk langge-langge mo lobian monondok.

⁷Kalu kai aki daano kakulangan doi paladandian mo tumbeno, maka aki napalaluu kinubai kopaladandian koluano.

⁸Bai Mian Bisa lapamo pososuungene kokasalaan doi mian, tobikon Mian Bisa bantil,

“Neneeke, naikon lubat kotembono,

yaku naikon kubaiyo kopaladandian mo boolu tukon bangsa Israel, tukon bangsa Yehuda.

⁹ Bolikon buno paladandian yaku mo kubaiyo tukon yanila nakakai,

tembodo yaku babayo yanila kalual doi lipu Mesil.

Yanila aki namolole doi paladandian yaku mo kubaiyo tukon yanila;

doiyamo kosababpo yaku aki kupaduliyo yanila.

¹⁰ Bai diabudodoo, niamo paladandian naikon yaku mo kubaiyo tukon Israel miano

doi oloyo-oloyo naikon mo lubat, Temeneno bantile:

Yaku naikon abese daku ukum doi yanila napikilan lalomo, tukon yana tulise doi yanila noano.

Yaku naikon teali yanila na Mian Bisa, tukon yanila naikon teali kumian.

¹¹ Yanila aki napalaluu mongotunggul tulanoila, kabai mobontiikon doi utuso,

‘Tingoniiyo ko Temeneno.’

Sabab yanila sasaibino, babasal poipoisik, naikon tingoniiyo yaku.

¹² Yaku naikon ompuniyo yanila nakasalaan-kasalaan, tukon aki neneeke koidan yanila nalalim-lalim.”

¹³Tukon kamukakene meeng kopaladandian mo boolu, Mian Bisa kubaiyo kopaladandian tumbenodoo teali motuwa: tukon oila komo motuwamo, naikon mosobit kai lapus.

Cala basosubakonan doi dunia tukon basosubakonan doi sulugaa

9 Paladandian kotumbeno daano kona palatulan-palatulan kaledaan, tukon daano koidan kona tempat kaledaan banggapi komo kubaiyo. ²Meeng kosandung kinokondong

taambikon doi muka sinombuikon Kombiang Moliyous. Ido daano kobangiisonan lampu, tukon daano komeda tukon loti mo sinosubakon doi Mian Bisa. ³Taambikon doi lalomo, doiyamo doi lalanse koluano tonggulungo daano koluangan mo sinombuikon Kombiang Moliyous. ⁴Doi luanganoo lalomo daano kobalabaan mosuaan kamangian kinubai doi mosoni tukon daano koidan ko Peti Paladandian sasaibino ilapis tukon mosoni. Doi petidoo lalomo talaat kobalanga mosoni koantoko manna, Halun natongkat mo lapamo sopii, tukon lua kobatutulis diingo doi bungkukono totulis songulo kopalenta doi Mian Bisa. ⁵Doi petidoo bunggono talaat lua kolobo modaano kokapilo, doiyamo banggapi mo daano kokapilo mo okitakene ko Mian Bisa nadaanoan. Do lobodoo molua kapilo tobuka doi petidoo tutupo bunggono, doiyamo tempat lalim nainompunian. Bai sasaibinodoo aki namoola tinalangkanggon diabudodoo secala memeeng.

⁶Bunomodoo sasaibino inatul. Samba-samba kooloyo imam-imam usok doi lalomo taambikon doi sandungoo salaano tuuk lakukanggene yanila nalimang. ⁷Komo usok doi sandungoo sembeleng lalomo tuuno tonggo imam-imam babasal. Yana lakukanggene doiya sataum tonggo idan. Doiya linakukanggon tukon makanggi sau tuuk sinosubakon doi Mian Bisa sabab butongo susuungo tukon sabab lalim-lalim namian mo kubaiyo moaki natotoi. ⁸Tukon atulanoo, Mian Bisa Na Loh tudoikene tukon bisa, baikon kona kalumbit sandungoo taambikon doi salaano daano mokokondong, loloon usokan doi Kombiang Moliyousoo lalomo akiyoon natobuka. ⁹Naiya andean doi lounu nia budodoo; koalatio baikon mosinosubakon-sinosubakon tukon sosubakon-sosubakon iyayon mo sinosubakon doi Mian Bisa, aki namoola kindendeke mian noano lalom mo babayo kona sosubakon. ¹⁰Sabab upacala-upacaladoo tonggo pokokonoi tukon mokinaan, moininum tukon moisalomo koupacala pokolimau. Sasaibino tonggo palatulan-palatulan dunia komo teali tonggo polong kotembono Mian Bisa daanokene komo pokibooluwo.

¹¹Bai Klistus lapamo lubat buno Imam Babasal doi langgelangge mo monondok mo lapamo daano. Temeneno nasandung

inaando kona limangano kona limang buno Imam Babasal daano kosandung mo lobian babasal tukon monondok tuuno. Doiya banggapi aki nakubaiyo; koalatio naluwean bolikon doi dunia mo tinealikon nia. ¹²Klistus mongusoki Kombiang Moliyous doi sandungoo lalomo tongo idan tuuk sidutu-posidutukon. Doi tembodoo yana aki namangkanggi domba langgilo sauno kabai saapi napau sauno tuuk sinosubakon; yana makanggi sauno susuungo, tukon doiya yana bebaskanggene kita tuuk sidutu-posidutukon. ¹³Domba tukon saapi langgilo sauno tukon saapidoo napau mosinosubakon abuno, pinake tuuk potiposii mian-mian mo lokis manulut palatulan agama sulano yanila teali bilisii. Nah kalu sau tukon abudoo moola kumesiyo do mian-mianoo nakulokisan, ¹⁴oilakai Klistus sauno! Mololoi Loh mo bisa, Klistus sosubakene kobutongo susuungo doi Mian Bisa buno sosubakon mo bisa. Sauno kumesiyo konoanggita lalomo tuuno doi upacala agama mo akiyo kotakoso, sulano kita moola leleaniyo ko Mian Bisa mo tubo.

¹⁵Doiya kosababpo Klistus teali Pangantala tuuk meeng kopaladandian mo boolu, sulano mian mo lapamo Mian Bisa uange, moola mantalima balakaat-balakaat tuuno mo lapamo Mian Bisa dondiikene. Sasaibinodoo moola teali sabab lapamo daano komo mate, doiyamo Klistus; tukon namateanoo bebaskanggene komian doi nakasalaan-kasalaan yanila mo lakukanggene doi tembo paladandian tumbeno mo daano pinake.

¹⁶Kalu daano kosulat pusaka, siokai nadaano kona bukutii baikon mian mo kubaiyo do sulatoo matemo. ¹⁷Sabab surat pusaka aki napinake kalu mianoo mo kubaiyo anoon motubo. Sulatoo tongo pinake kalu do mianoo matemo. ¹⁸Tobikon doiya paladandianoo tumbeno sio nasinahkanggon tukon sau. ¹⁹Tumbe-tumbeno Musa pelengene sasaibino kopalenta Mian Bisa naukum-ukum doi bangsa Israel. Lapa doiya Musa mangala saapi sauno tukon domba langgilo sauno, maka sambule tukon paisu, doibundu tiposiikene, doi Kitab Atulan-atulan luwedoi Mian Bisa tukon doi sasaibino bangsa Israel tukon pakeyo bulung moonoo kopaisuno tukon domba buluno kobotiko samelaon. ²⁰Daano mokubaiyo doiya Musa bantil, "Nia kosau mo sahkanggene kopaladandian doi Mian Bisa sio komuyu



Meeng ko Imam Babasal doi Kombiang Moliyous Mo Moliyous Tuuno (9:25)

taatiyo.” ²¹Doibundu tukon cala mo pokakana Musa tiposiikene do saudoo koidan doi Temeneno na Sandung tukon sasaibino kololonggu tuuk nakaledaan. ²²Bisa manulut ukum agama Yahudi, kabi sasaibino kolangge kinumesi tukon sau; tukon lalim moola inompuni kalu daano kosau motokundang.

Klistus nasinosubakonan telese kolalim

²³Tukon mobuno doiya balang-balang mo tokitakene kolangge-langge doi sulugaa, palaluu kinoliyous. Bai tuuk langge-langge doi sulugaadoo susuungo pinalaluu sosubakon mo lobian monondok. ²⁴Sabab Klistus aki namongusoki Kombiang Moliyous banggapi nakinubai, mo tongo okitakene Kombiang Moliyous mo tutuu. Klistus usok doi sulugaa susuungo; imbali yana diabudodoo posasalaan doi Mian Bisa tuuk nda kopontingan. ²⁵Imam babasal Yahudi sasamba kotaum usok Kombiang Moliyous doi Temeneno Nabonua lalomo tukon makanggi meeng koyayon sauno. Bai Klistus aki nausok tuuk mososubakene kobutongo koikoidan. ²⁶Sabab kalu buno doiya, doiya koalatino yana lapamo sakisaa koikoidan tambuun dunia nia natinealikonan. Bai natokitaan diabudodoo doi lounu nia bunduno, yana lubat tongo idan tuuk telese kolalim tukon sosubakene kobutongo susuungo. ²⁷Mian Bisa lapamo tatapkanggene baikon kobanggapi mate tongo idan tukon lapa doiya Mian Bisa adiliyo. ²⁸Bunomo koidan Klistus tongo idan

nasinosubakon tuuk telese kolalim mian badaang. Yana naikon lubat koidan koluano luunggon, bolikon tuuk moalapayo soal lalim, bai tuuk salamatene ko mian-mian mo totiiliyo kona lubatan.

10 Ukum agama Yahudi tongo beena gambalan mo aki natontong tentang langge-langge mo monodok naikon mo lubat, tukon bolikon mo tuuno doi langge-langgedoo. Aki nanggoola ukumoo moola kindendeke mian mo lubat sosuba doi Mian Bisa tukon makanggi sosubakon, mau kai samba kotaum sinosubakon budoo kososubakon-sosubakon mo pokakana. ²Umpamano mian-mian mo sosuba doi Mian Bisa bisa-bisa lapamo binilisii luwedo lalim, yanila akimo koidan naikon daano palasaan lalim, tukon sosubakon aki naikon nasinosubakon. ³Bai natokitaan sosubakon-sosubakon mo sinosubakon samba kotaum tobikon ingotiikene komian naikon yanila nalalim-lalim, ⁴sabab bisa saapi sauno tukon domba langgilo sauno aki nateali akiyengene kolalim.

⁵Doiyamo kosababpo doi tembo Klistus usok doi dunia, yana bantil doi Mian Bisa,

“Ikoo aki muyase kososubakon tukon mosinosubakon;
kona kabalikan ikoo lapamo sadiayo kobutong doi yaku.

⁶ Ikoo aki pokokonoi naikon sosubakon mosinua
kabai sosubakon tuuk moompuniyo kolalim.

⁷ Maka yaku bantil, ‘Naiyamo yaku, ya Mian Bisa!

Yaku lubat tuuk lakukene komu mongiasan,
bunomo mo totulis tentang butonggu doi Kitab Moliyous
lalomo.’”

⁸Tumbe-tumbeno Klistus bantil, “Ikoo aki moyase kososubakon tukon mosinosubakon; ikoo aki mupokokonoi naikon sosubakon iyayon mo sinua bunu sinosubakon tukon naikon sosubakon tuuk potolos lalim.” Klistus bantil bunu doiya, idanggon sasai-bino sosubakonoo mololoi ukum agama Yahudi. ⁹Lapa doiya Yesus bantile, “Naiyamo yaku, ya Mian Bisa! Yaku lubat tuuk lakukangene komu mongiasan.” Jadi Mian Bisa apuse sasaibino kososubakon mo malumbitodoo, tukon monggisobolikene tukon sosubakon Klistus. ¹⁰Yesus Klistus lapamo lakukangene oila ko Mian Bisa nainiyas tukon sosubakene kobutongo bunu sosubakon. Tukon mosinosubakonoo, kona linakukon tongo

idan kai tuuk sidutu-posidutukon, kita sasaibino kinumesi doi lalim.

¹¹Samba koimam Yahudi ampakonggene kona limang buno imam samba-samba kooloyo, tukon badaang luunggono yana sosubakene kona sosubakon-sosubakon mo pokakana. Bai sosubakon-sosubakonoo aki naidan malaat potolos lalim. ¹²Kona kabalikan, Klistus sosubakene tongo meeng kona sosubakon tuuk nainompunian kolalim, tukon sosubakonoo tapake sidutu-posidutukon. Lapa sosubakene sosubakonoo, Klistus osulang doi Mian Bisa bakalingano taambikon maka mapalenta polaing-laing tukon yana. ¹³Tukon diabudodoo Klistus totiili polong Mian Bisa kubaiyo kona bali-bali sosuba doi yana. ¹⁴Jadi tukon meeng kososubakon, Klistus kindendeke komian badaang mo lapamo binilisii doi lalim.

¹⁵Kokaliangano langgedoo Mian Bisa Na Loh beena koidan kopobontiikon doi kita. Mian Bisa Na Loh bantil,

¹⁶ “ ‘Naiyamo paladandian naikon mo kubaiyo tukon yanila doi oloyo-oloyo naikon mo lubat,’ Temeneno bantil,

‘Yaku naikon mangabos daku atulan-atulan doi yanila noano lalomo,

tukon tulise doi yanila napikilan lalomo.’ ”

¹⁷Mian Bisa koidan bantil, “Yaku toliminggene naikon lalim-lalim tukon yanila nakulokisan-kulokisan.” ¹⁸Jadi, lalim-lalim tukon nakulokisan-kulokisanoo lapamo inompuni, maka aki napalaluu koidan sinosubakon tuuk nainompunian kolalim.

Maimo nda koolaniyo ko Mian Bisa

¹⁹Nah, Utus-utus, Yesus namateanoo kita diabudodoo balanimo momongusoki Kombiang Moliyous. ²⁰Yesus lapamo bukayo meeng kololoon mo boolu tuuk doi kita, doiyamo loloon mo beena tuboan. Loloono mololoi Yesus butongo susuungo.

²¹Tukon kita diabudodoo daano meeng koimam mo babasal, mo balatanggung jawab doi Mian Bisa nabonua. ²²Sabab doiya nda koolaniyo ko Mian Bisa tukon noa monondok tukon mangangaan mo moonggol; tukon noa mo lapamo kinolios doi palasaan mosala, tukon butong mo lapamo kinumesi tukon paisu mo lino. ²³Siokai kita bataani moonggol doi nda moinian kita

akuiyo, sabab Mian Bisa moola nainangga tukon yana naikon tapaatiyo kona paladandian. ²⁴Tukon siokai nda okiteese, sulano nda podulunggon tuuk poseangan tulando tukon lakukanggene kolangge-langge mo monondok. ²⁵Siokai kita tataap pototongi singgat-singgat, tukon inai molalai bunu mian bailong. Kita sio lobian molole tukon kobukuanggene, sabab kita toiyo baikon akimo namalumbit Temeneno naikon lubato.

²⁶Sabab kalu bilita mo bisa doi Mian Bisa lapamo pinolonggon doi kita, bai kita tataap kubaiyo kolalim tukon sangada, maka akiyono koidan kososubakon tuuk moakiyengene konda lalim. ²⁷Komeeng-komeengo mo daano tuuk kita doiyamo sasalaane ko Mian Bisa napangadilan tukon aung nanggimalan naikon suayo kabus mian badaangoo mo lawane yana! ²⁸Mian mo aki naloingiyo Musa naukum bineekon, inukum mate aki nainompuni, kalu kosakisii lua tolu komian, yana totoi daano kona sala. ²⁹Todudul lobian babalat koukuman mo sio kinonoikon doi mian mo tuda-tudange Mian Bisa Napau. Mianoo anggape hina ko Mian Bisa napaladandian sau doiyamo Klistus namatean mo bilisiikanggene kolalim. Yana totulaiyo ko Loh mobeena maasi. ³⁰Kita toiyo indee yana mo bantil, “Yaku naikon balase! Yaku naikon ukume!” tukon mo bantil, “Temeneno naikon hakimiyo kona mian.” ³¹Bulaando komolilian kalu otuwong doi Mian Bisa Mo Tubo limano!

³²Neneeke bulaando Utus-utus nandondoong doi tembodoo mo lapa. Doi tembodoo, salataa Mian Bisa laango modioliikon, komuyu badaang komo susa; mau komuyu tataap balajuang tukon tutuu. ³³Daano kotembono komuyu sinusibolii tukon ilakukanggon aki namonondok doi mian badaang salaano. Daano kotembono koidan komuyu tulut susa tukon yanila mo ilakukanggon bunu doiya, ³⁴tukon komuyu tulut lasakanggene kona sinusakon mian mo tinalunggu. Tukon salataa sasaibino mo daano komuyu ilambas, komuyu mantalima doiya tukon noa sanaang, sabab komuyu toiyo baikon komuyu daano mo lobian monondok, naikon taanan sidutu-posidutukon. ³⁵Tobikon doiya, inaimo manasal, sabab kalu komuyu tataap mangangga, maka daano kotambono mo babasal tuuk doiya! ³⁶Komuyu palaluu sabal, sulano komuyu moola lakukanggene ko Mian Bisa

namongiasan tukon buno doiya mantalima oila mo dinondiikon.

³⁷Sabab doi Kitab Moliyous lalomo totulis,

“Tongo soisiken koidan,
maka yana naikon komo lubatoo,
naikon mosobit lubat;
yana aki naikon tunda-tundayo kona lubatan.

³⁸ Tukon daku mian mo bisa naikon mangangga tukon tubo;
bai kalu daano doi antala yanila mo saali,
maka yaku aki naikon sanaang doi yana.”

³⁹Kita nia bolikono mian mo saali tukon tapa. Kobalino,
kita daano mian mo mangangga doi Mian Bisa tukon mo
sinalamaton.

Manganggaan

11 Mangangga koalatio anggayo tutuuno kolangge-langge
mo minoinikon, koalatio daano konatutuuwan naikon
langge-langge mo aki nakinita. ²Sabab mangangga, maka mian
badaang doi loolukoo Mian Bisa sanaangene.

³Sabab mangangga, maka kita toiyo baikon dunia nia Mian
Bisa nabantilan komo pasitakayo; jadi, oila komo moola kinita,
teali doi oila komo aki namoola kinita.

⁴Sabab mangangga, maka Habel sosubakene doi Mian Bisa
sosubakon mo lobian monondok doi Kain nasosubakon. Sabab
namanganggaanoo, Habel Mian Bisa talimayo buno mian mo
monondok; sabab tokitamo baikon Mian Bisa talimayo kona
sinosubakon. Habel lapamo mate, bai sabab namanganggaanoo,
maka yana daano mobasilingan polong diabudodoo.

⁵Sabab mangangga, maka Henokh aki namate, bai biningkat
tukon binaba doi Mian Bisa. Akiyo meeng komian molaate
pososuunggene yana, sabab yana lapamo Mian Bisa bingkate.
Doi Kitab Moliyous lalomo totulis baikon akiyon Henokh
nabiningkat, yana konoiyomo ko Mian Bisa noano. ⁶Aki
namangangga, kiyo komeeng komian momoola sanaangene ko
Mian Bisa noano. Sabab mian mo lubat doi Mian Bisa sio
naanggayo baikon ko Mian Bisa daano, tukon baikon ko Mian
Bisa beena pabalos doi mian mo mounggolii.

⁷Sabab mangangga, maka Nuh Mian Bisa bontiikene kokaliangano langge-langge naikon mo teali doibundu mo aki namoola yana kitayo. Nuh molole doi Mian Bisa tobikon yana kubaiyo meeng kokopal mo doibundu tokita salamatene kobutongo tukon nabonua tumbuno. Tukon buno doiya dunia nia inukum, baimo kai Nuh susuungo sabab namanganggaan Mian Bisa okitakene buno mian monondok.

⁸Sabab mangangga, maka Abalaham tulutiyo ko Mian Bisa salataa Mian Bisa uange yana tukon sumboliiyo taus doi lipu Mian Bisa mo dondiikene doi yana. Maka Abalaham luwe tukon aki natoioyo inaando naikon kona tausan. ⁹Tukon mangangga, Abalaham dungol pokakana mian lubat doi lipudoo Mian Bisa mo dondiikene doi yanadoo, Abalaham dungol idoo doi nasandung lalomo. Bunomo koidan Ishak tukon Yakub, mo mantalima paladandian mo pokakana doi Mian Bisa. ¹⁰Sabab Abalaham daanoon mototi-totiliiyo kokota Mian Bisa mo batetelkene bangune koalas mo moonggol.

¹¹Sabab mangangga, maka Abalaham moola malaat katulunan doi Salah, mau kai Abalaham namotuwamo tuuno, tukon Salah susuungo komba. Abalaham anggayo baikon Mian Bisa tapaatiyo kona paladandian. ¹²Mau kai Abalaham doi tembodoo buno mian mo lapamo mate kobutongo, bai yana daano badaang kona katulunan, kona kadaang aki natangait – buno bituon pauno kona kadaang doi timbu tukon bone doi tobun bibilo.

¹³Sasaibino komianoo tataap mangangga pomatekon, yanila aki namantalima langge-langge Mian Bisa mo dondiikene bai tongo mokita tukon lolobotiyo doi naadoonan. Tukon doiya yanila nyatakanggene baikon yanila tongo mian lubat tukon baseeleon doi dunia nia. ¹⁴Mian mo bantile buno doiya tudoikene tukon tontong baikon yanila daano mounggoolii lipu naikon mo teali yanila nalipu dungolan. ¹⁵Bolikon lipu mo lapamo yanila tinggale doiya yanila piki-pikikene. Sabab kalu buno doiya, maka badaango kotodanan doi yanila tuuk abali doi lipudoo. ¹⁶Bai natokitaan, yanila poloonggene meeng kolipu mo lobian monondok, doiyamo lipu doi sulugaa. Doiyamo kosababpo Mian Bisa aki namammaa kalu yanila bantile yana

yanila na Mian Bisa, sabab Mian Bisa lapamo sadiayayo meeng kokota tuuk yanila.

¹⁷Sabab manganggaan koidan, Abalaham sosubakene Ishak teali sosubakon salataa Mian Bisa udio yana. Doi Abalaham Mian Bisa beekene kona paladandian, mau Abalaham yase salakangene kona pau motongo meeng-meengoo. ¹⁸Mian Bisa lapamo bantil doi Abalaham, “Mololoi Ishak ikoo naikon malaat katulunan yaku mo dondiikene doikoo.” ¹⁹Abalaham anggayo baikon Mian Bisa moola otuboiyo abali Ishak doi namatean – jadi moola nabinantil, Abalaham lapamo mantalima Ishak abali doi matean.

²⁰Sabab mangangga, maka Ishak dondiikene kobalakaat-balakaat doi Yakub, tukon Esau tuuk doi oloyo mosinasalaan.

²¹Sabab manganggaan maka akiyoon Yakub namate, yana beena balakaat doi Yusuf napau-pau – tukon sosinggalang doi natongkat oluno tukon sosubaiyo ko Mian Bisa.

²²Sabab manganggaan, maka Yusuf – salataa kabi namate – basilingan kaliangano natobuatan ko Israel miano doi Mesil, tukon tinggale kona teteba oila kaliangano komo sio ilakukon terhadap doi badanno.

²³Sabab manganggaan, maka Musa naolang tua seekene yana tolu kobituwon kona kalumbit lapamo kona sinuungan. Yanila kitayo baikon yana meeng kopau monondok, tukon yanila aki namatakut molawane tomundo napalenta.

²⁴Sabab manganggaan, maka Musa babasalo, aki nayase sinombuikon tomundo boine doi Mesil napau. ²⁵Yana yase tuuno susa polaing-laing tukon Mian Bisa namian baimo kai tuuk soisik kotembo monommii sanaangan doi tuboan baladosa. ²⁶Musa lasayo baikon lobian mododoon koanggano tuuk malaat totulai tongo Tomundo Pasalamat Mian Bisa mo dondiikene maka baimo kai momalaat sasaibino kobuat doi lipu Mesil, sabab Musa moinikene kotambo oloyo doibundu.

²⁷Sabab manganggaan, maka Musa tinggale ko Mesil aki namatakut tomundodoo nanggimoliyo. Musa maju pakituuwo kona tujuan bunu yana lapamo kitayo ko Mian Bisa mo aki nakitayodoo. ²⁸Sabab manganggaan, maka Musa pelingatiyo kona kalualan doi Mesil tukon mapaletakene sulano natiniposii

sau doi Israel miano nabonua tataapono sulano Malaekat Matean inai naakateyo yanila napau-pau langgongo.

²⁹Sabab manganggaan, maka Israel miano moola pitosiiyo ko Tobun Memela, bunu yanila ampakon doi buta tina bunggono, bai Mesil mian-miano molomos doi tobunoo, doi tembo yanila sobayo mopitosiiyo.

³⁰Sabab manganggaan, Israel mian-miano kubaiyo kotembok-tembok Yelikho molombo salataa yanila lapa boilingiyo pitu kooloyo kona kalumbit. ³¹Sabab manganggaan, maka Lahab, boine balolowadoo, aki natalalaing inakate polaing-laing tukon mian badaang mo lawane ko Mian Bisa; sabab yana mantalima tukon sanaang Israel miano namata-mata.

³²Nah, yaku moolamo banggadudul basilingan, bai kotembo aki nasukup tuuk yaku. Sabab yaku akiyoon koidan mabantil Gideon, Balak, Simson, Yepta, Daud, Samuel, tukon nabinabi. ³³Sabab manganggaan, maka yanila lapamo lungguiyo kobatomundoan-batomundoan. Yanila lakukanggene oila komo bisa, tobikon mantalima oila komo Mian Bisa dondiikene. Yanila kukupe kosinga-singa suungo, ³⁴posoiyo koaung mo hebat, tongosodii doi natinobokan sabel. Yanila lemah, bai teali bukuan; yanila bukuan doi polobosian lalomo tobikon nalungguiyo kopasukan-pasukan musu doi lipu meeng. ³⁵Sabab manganggaan, maka boi-boine abali laate kona mian badaang mo lapamo mate.

Daano koidan mo yase mosinakisaa pomatekon, tukon tolayo mosinobii, sabab naabali inotuboi doi meeng kotuboan mo lobian monondok. ³⁶Daano komo sinisibolii, inumbas, binoboi tukon lante tukon mo inusokon doi talunggu lalomo. ³⁷Yanila sinokuli tukon batu pomatekon, daano komo pinatol galagadi, tukon mo inakate tukon sabel. Yanila kakaate tukon napakean domba kulito kabai domba kulito; yanila talalais, ilailainggong tukon sinakisaa. ³⁸Dunia nia bolikon tempat mo monondok doi yanila. Yanila kakaate doi padang lalomo tukon doi bunggul-bunggul, tukon dungol doi leng-leng lalomo tukon doi buta mobuang-buang lalomo.

11:29: Tob. 14:21-31 11:30: Yos. 6:12-21 11:31: Yos. 6:22-25, 2:1-21

11:32: Samb. 6:11-8:32, 4:6-5:31, 13:2-16:31, 11:1-12:7, 1Sam. 16:1-1Tomd. 2:11,

1Sam. 1:1-25:1 11:33: Dan. 6:1-27 11:34: Dan. 3:1-30 11:35: 1Tomd. 17:17-24,

2Tomd. 4:25-37 11:36: 1Tomd. 22:26-27, 2Tun. 18:25-26, Yel. 20:2, 37:15, 38:6

11:37: 2Tun. 24:21

³⁹Babasalo tuuno komonaangan sasaibino mianoo nailaat sabab yanila namangangaan! Mau yanila aki namantalima oila mo dinondiikon Mian Bisa, ⁴⁰sabab Mian Bisa daano kona tetel mo lobian monondok tuuk doi kita. Kona tetel doiyamo baikon tongo polaing tukon kita, yanila naikon teali monondok.

Mian Bisa Tamanggita

12 Nah, kaliangano kita susuungo, potikunggon kita daano badaang tuuno kosakisii! Sabab doiya, maimo nda sakukene sasaibino komo kobolotiiyo kita tukon lalim mo banggadudul lambot doi kita. Tukon maimo kita budodoo nda mololoi bakulebean mo daano doi salaanggita. ²Siokai konda pokita natuduan doi Yesus, sabab yanamo komo otuboiyo konda mangangaan tukon pialayo doi natambuunan polong doi bunduno. Yesus taangene kosakisaa doi kayung sempang! Yana aki napaduliyo baikon mate doi kayung sempangoo daano meeng kolangge mo okimaayo. Yana tongo neneeke naikon kona tedesan naikon yana mo lasakangene doibundu. Diabudodoo yana osulang doi Mian Bisa nadungolan bakalingano tukon mapalenta polaing tukon yana.

³Soba pikikene bulaando Yesus nasakisaawan mosasalaane mian badaang baladosa mo lawane yana tukon tutuuno! Sabab doiya inai napoipoisik konoamu tukon saali. ⁴Sabab doi mu-paladuangan lawane kolalim, komuyu akiyoon idan baladuang polong sio mokundang sau. ⁵Tukon inai motomilingene ko Mian Bisa naotunggul nia, mo bineekon doikoo buno napau-pau:

“Kupau, palatikangene momonondok ko Temeneno naotunggul,

tukon inai napoipoisik konoamu kalu yana nggimoliikon.

⁶ Sabab Temeneno mongotunggul samba komian nasineang, tukon yana mongumbas samba komian kona inakui buno napau.”

⁷Siokai komuyu mantalima pongumbas doi Mian Bisa buno meeng kootunggul doi meeng kotama. Sabab oilakai biasa meeng komian napau aki tamano naukume? ⁸Kalu komuyu akipo inukum buno sasaibino kona pau mo bailong nia koalatio komuyu bolikon pau sah, bai pau mo aki nasah. ⁹Doi dunia

daano kotamanggita. Yana otunggule kita, tukon kita odotiiyo. Nah oilamo kai ko Tamanggita lohani doi sulugaa, tantu kita sio lobian koidan totuku doi yana sulano kita tubo. ¹⁰Nda olang tua doi dunia otunggule kita tongo doi tembo mo telbatas, mololoi oila yanila mo lasaiyo monondok. Bai Mian Bisa otunggule kita tuuk namonondokan kita susuungo, sulano kita moola teali moliyous polaing-laing tukon yana. ¹¹Bisa doi tembo kita inotunggul, ukumanoo aki nakonoiyo konoanggita, bai tongo kubaiyo poloon. Bai doibundu idoo, buno kita mo lapamo inotunggul, ukumanoo tealikene kita tubo mololoi Mian Bisa namongiasan, tukon kubaiyo palasaan monondok doi kita.

Otunggul tukon poingotii

¹²Sabab doiya, kobukuanggene kolimamu mo lemat tukon tuulomu mo mbombokonoo! ¹³Ampakon sidutu doi loloon mo patal, sulano koaimu mo lematoo aki natepelesuk, bai kai teali tangalin.

¹⁴Kakaate tuuk tubo pomeenggon tukon sasaibino komian. Kakaate koidan tuuk tubo moliyous, tuuk Temeneno. Sabab akiyo komeeng komian molaate kitayo ko Temeneno kalu yana aki natubo buno doiya. ¹⁵Dagaiyo inai nadaano komeeng komian mo kalual doi Mian Bisa namonondokan konoano, sulano inai nadaano komo teali buno kayung modaano kolasumo doi komuyu nokon tobikon lubatene kokasulitan tukon mian badaang rusak tukon nalasum. ¹⁶Dagaiyo sulano inai nadaano komo tubo balolowa kabai aki nahalagaiyo kolangge-langge lohani buno Esau nakinubai. Yana balukene kona haak tealian pau langgongo, tolongo tuuk meeng komangko kinaan. ¹⁷Komuyu toiyo baikon doibundu Esau yase malaat balakaatoo doi tamano, bai yana tinolak. Sabab mau kai tukon kokiil yana unggoliiyo kololoon tuuk nakindendeke kona kasalaan, bai kotodanan tuuk doiya akiyo kai.

¹⁸Utus-utus aki nalubat sasalaane langge meeng buno bangsa Israel nasinasalaan looluk. Yanila sasalaane langge meeng mo moola tinaap, doiyamo Sinai Bunggulo tukon naaung mo kait-kait; yanila sasalaane kokalipookan, akimo natokita kolipu tukon mbombuul makansang; ¹⁹yanila sasalaane kopopuukon

bulungan, tukon lalo bulungan tuuno. Salataa Israel miano lengele lalodoo, yanila kabiyo tukon tutuu sulano lalodoo aki nabasilingan koidan doi yanila. ²⁰Sabab yanila aki yase mondongolii palenta mo pinolonggon lalodoo. Tobikon doiya lalodoo bantil, “Sasaibino mo singgile bunggul nia aki napaduliyo oilakai doiya iyayon kabai indee kai koidan, sio nasinakul tukon batu pomatekon.” ²¹Oila ko Israel miano nakinitadoo bunu doiya kona hebatan polong Musa bantil, “Yaku matakut tukon mbombokon!”

²²Kobalino, komuyu lapamo lubat doi Sion Bunggul tukon Mian Bisa nakota mo tubo, doiyamo Yelusalem mo doi sulugaa tukon doi loloongo kona malaekat. ²³Komuyu loloiyo meeng kopoulosuungan mo lame – pososuungan Mian Bisa napau-pau langgongo, kosambu-sambunoila totulis doi sulugaa lalomo. Komuyu lubat sasalaane ko Mian Bisa, Hakim sasaibino kobanggapi. Komuyu sasalaane koloh-loh mian badaang monondok, mo lapamo tinealikon monondok. ²⁴Komuyu lubat sasalaane Yesus, Pangantala tuuk paladandian mo booludoo; komuyu sasalaane kosau potiposii mo jamine kolangge-langge mo lobian odoon kona monondokan Habel sauno nadinamin.

²⁵Sabab doiya, pohati-hati inai napolong komuyu aki poyase mondongolii yana mo basilinganoo. Yanila aki nayase mondongolii yana mo lubat doi dunia tukon pelengene bilita doi Mian Bisa, aki namoola dampasene kobutongo. Baimo kai kita nia mondongolii yana mo basilingan doi sulugaa! Kalu kita aki nda yase mondongolii naando minoolakon kita moola tongosobii! ²⁶Doi tembodoo kona lalo nggabutemo kodunia. Bai diabudodoo yana paladandi, “Daano koidan, yaku naikon nggabutemo bolikon tongo kodunia bai timbu koidan.” ²⁷Bantilan “daano koidan” tudoikene baikon sasaibino kodunia mo lapamo pinasitaka naikon minanaso tukon inalaaso, sulano komo totinggal baimo mo aki nalaat minanas.

²⁸Sabab doiya, siokai kita bakinatauwan doi Mian Bisa, sabab kita mantalima doi yana meeng kobatomundoan mo aki nanggabut. Siokai kita bakinatauwan tukon bakaleda doi Mian Bisa tukon odotiiyo tukon matakut, mololoi cala yana mo yase susuungo. ²⁹Sabab nda Mian Bisa bunu aung mo kopule.

Bulaando konda sanaangganano ko Mian Bisa noano

13 Siokai komuyu tataap poseseang meeng tukon bailong buno mian-mian Salani mo mondoutus. ²Inai mobantala talimayo doi mubonua mian badaang mo akiyoon mutingoniiyo. Sabab tukon lakukangene komo buno doiya, idan komian, aki nasadaliyo, lapamo talimayo komalaekat doi nabonua. ³Neneeke mian badaang doi talunggu lalomo, bunomo lakon komuyu koidan daano doi talunggu lalomo polaing yanila. Tukon mian badaang mo linai-lainggon, siokai komuyu neneeke doi yanila pokakana komuyu ilakukanggon buno doiya.

⁴Sasaibino komian sio natudoikene kosikap odotiiyo kona baasowaanan, doiyamo kosababpo siokai lakai boloki namolole meeng tukon bailong. Mian mo balolowa tukon mian mo pololowai naikon Mian Bisa adiliyo.

⁵Inai mokilayo naikon kodoy nakuasaiyo komu tuboan, bai siokai komuyu biyai tukon oila komo daano doikoo. Sabab Mian Bisa lapamo bantil, “Yaku aki naikon sodiikene kabai naikon tinggale ikoo.” ⁶Sabab doiya kita balani bantil,

“Temeneno daanoon Motulungaku,
aki kumatakut.

Oila komo moola banggapi lakukene doi yaku?”

⁷Inai motomilinggene doi pokatua-katua mo pelengene ko Mian Bisa nateteba doikoo. Pokitopiyo bulaando yanila tubo bulaando yanila mate, tukon loingiyo yanila namanganggaan. ⁸Yesus Klistus tataap pokakana, mau looluk, nia budodoo, tukon polong sidutu-posidutukon. ⁹Inai mosodiiyo sasaibino kootunggul kaliangano mo sosibong moatapayo komuyu. Noanggita sio Mian Bisa noano namonondokan komo kobukuangene doiyamo komo monondok; inai tongo palatulan-palatulan kinaan. Mian badaang looluk loingiyo palatulan-palatulanoo akiyo kotakoso.

¹⁰Kita daano meeng kobalabaang tuuk sosubakanano kososubakon doi Mian Bisa. Tukon imam-imam mo leleaniyo doi Temeneno na Sandung lalomo, aki nadaano kona haak makaan sosubakondoo mo daano doi balabaangoo bunggono. ¹¹Iyayon sauno mo sinosubakon tuuk potolos lalim, imam babasal babayo doi Kombiang Moliyous, bai iyayon bunutodoo susuungo sinua

doi sandung tonggulungo. ¹²Doiyamo kosababpo Yesus koidan mate doi tataapon kotadoo tonggulungo tuuk mokumesiyo kona mian doi lalim tukon sauno susuungo. ¹³Tobikon doiya, maimo nda taus doi yana doi nasandung tonggulungo tukon tulut tinotulai polaing yana. ¹⁴Sabab doi buta akiyo kolipu dungolan mo akiyo kona pupusan tuuk doi kita; kita mounggolii lipu dungolan naikon mo lubat. ¹⁵Sabab doiya tukon palantalan Yesus, siokai kita sidutu nggaa-nggaale ko Mian Bisa; doiya buno sosubakon nda syukuul doi yana, mo kita sosubakene lolo bantilan doi suungo bibilo tuuk monggaale kosambuno. ¹⁶Inai motomilingene kubaiyo komo monondok tukon potombonii, sabab naiyamo kososubakon-sosubakon mo sanaangene ko Mian Bisa noano.

¹⁷Loingiyo katua-katua napalenta tukon anggayo doi yanila. Sabab yanila sidutu tingoniiyo komu tuboan, tukon yanila sio nabalatangung jawab doi Mian Bisa. Kalu komuyu molole doi yanila, yanila moola balimang tukon sanaang konoano; kalu aki, maka yanila naikon balimang tukon poloon konoano, tukon doiya aki poutungene.

¹⁸Tuluuso sambeang tuuk kami. Kami anggayo konoanggami lalomo molino, sabab doi sasaibino kolangge kami sidutu yase lakukene oila komo bisa. ¹⁹Tongo yaku kabiyo tukon tutuu, sulano komuyu sambeangene yaku sulano Mian Bisa mosobit babayo yaku abali doikoo.

Sambeang potutupo

²⁰Mian Bisa lapamo otuboiyo nda Temeneno Yesus doi namatean. Sabab namateanoo yana diabudodoo teali Pototooli Mobabasal doi kita, doiyamo nadomba-domba. Namateanoo koidan sahkangene kopaladandian posidutukon mo Mian Bisa kubaiyo tukon kita. ²¹Boliisi Mian Bisa modaanon komonondokanoo osukupiyo komuyu tukon sasaibino komo monondok komuyu palaluuwo tuuk kubaiyo kona mongiasan. Boliisi tukon lolo doi Yesus Klistus, Mian Bisa limange doi kita, oila kona mongiasan. Siokai Klistus ngginaal sidutu-posidutukon! Amin.

Sulat potutupo

²²Yaku kabiyo sulano komuyu palahatikangene daku otunggul-otunggulia tukon sabal, sabab daku sulatia aki natodudul bulusan. ²³Siokai komuyu toiyo baikon utus kita Timotius lapamo inosobii doi talunggu. Kalu yana lapamo doi kutampatia, yaku naikon babayo tembo yaku duutiyo komuyu.

²⁴Pelengene komai salam doi sasaibino pokatua tukon doi sasaibino ko Mian Bisa namian. Talimayo koidan salam doi utus-utus doi Italia.

²⁵Boliisi Temeneno nabalakaatiyo Utus sasaibino.

YAKOBUS NASULAT

PANGANTOKON

Sulat moluwedoi Yakobus inotuuk doi "sasaibino ko Mian Bisa namian mo tasabukon doi posaapon kodunia". Tukon mapake bubulaa koandean, Yakobus beena doi nasulatia lalomo bula-bulaa kootunggul tukon otinau mo pokonoiy doi Salani miano motuuk doi Salani miano nakokubai. Doi pokita Salani yana otunggukene bubulaa kouuno andean kokaasaan tukon talalaisan, palasobaan, kokubai mo monondok, basangkaan, manganggaan tukon kokubai, suungo nabantil-bantilan, napandoiyan, podangaanian, babanggaalan tukon kpendeano komian noano, langge mosalakene komian bailong, bantilan molobian, sabalan tukon sambeangan.

Sulatia inotuuk baikon koampakongganano koagama Salani, komaanggaan sio napoolaing kokokubai.

Antoko

Pololukoni 1:1

Manganggaan tukon pandoiyan 1:2-8

Talalaisan tukon kaasaan 1:9-11

Sobaan tukon godaan 1:12-18

Mondongolii tukon kubaiyo 1:19-27

Poingotii sulano aki naposasalakene komian 2:1-13

Manganggaan tukon kokubai 2:14-26

Salani miano tukon suungo nabantil-bantilan 3:1-18

Salani miano tukon dunia 4:1-5:6

Bula-bulaa kootunggul 5:7-20

1 Utus-utus sasaibino Mian Bisa namian mo tasabukon doi sasaibino kodunia! Pongodotii moluwedoi yaku, Yakobus, Mian Bisa napeleleani tukon Yesus Klistus napeleleani.

Manganggaan tukon napandoikanano

²Utus-utus! Kalu komuyu toupiyo moisalomo kokaliangano kosobaan, siokai komuyu polasayo moutung. ³Sabab komuyu toiyo, baikon kalu komuyu tataap mangangga doi Temeneno doi tembo potoupiyano kosobaan, kobalaso doiyamo: komuyu teali sabal. ⁴Dagaiyo sulano konoamu nasabalanoo banggadudul tosuungi polong komuyu teali monondok tuuno tukon aki nakakulangan doi langge-langge oila lalomo. ⁵Kalu daano meeng komian doi komuyu mo kinduung napandoi, siokai yana nakabiyo doi Mian Bisa, maka ko Mian Bisa naikon beekene kona pandoikanano doi yana; sabab doi samba komian, Mian Bisa beena tukon noa monondok tukon palasaan pomaasikon. ⁶Bai mian mo mangkabi sio namangangga; yana aki namoola mata-matakut, sabab komian mo mata-matakut pokakana kobokol doi tobun mbombuul mo puule dombala doisumai. ⁷⁻⁸Mian mo pokakana doiya aki natataap kona pikilan; yana aki namoola mangala kaputusan oioila doi sasaibino kolangge nakinubai. Sabab doiya, aki namoola koidan yana moinikene sulano malaat oioila doi Temeneno.

Talalaisan tukon kaasan

⁹Salani miano mo talalais siokai nalasaiyo sanaang kalu Mian Bisa katandake yana. ¹⁰Tukon Salani miano mo kaasa siokai nalasayo sanaang koidan, kalu ko Mian Bisa ekependeyo yana. Sabab mian mokaasa naikon lapus buno bulung bungano. ¹¹Doi tembo oloyo nasumbotan tukon namoonasan tuuno, maka bulungoo naikon teali molooyu tobikon namotondongii kobungano tukon lapus koidan dona monondokan. Bunomo koidan tukon mian mo kaasa; yana naikon silaka doi tembo yana daamo moampakonggene nakinubai.

Sobaan tukon paganggu

¹²Kinatauwan mian mo sabal doi tembo yana toupiyo kosobaan. Sabab lapamo yana malaat hasil kona sabalan doi

sobaanoo lalomo, yana naikon mantalima tambono, doiyamo tuboan mo lapamo Mian Bisa dondiikene doi mian badaang mo seseang ko Mian Bisa. ¹³Kalu komeeng komian taganggu doi nasinobaiyan mo bunu doiya, inaimo yana bantil, "Ganguania doi Mian Bisa kona lubatan," sabab ko Mian Bisa aki namoola taganggu doi nakulokisan, tukon aki koidan nagangguwe mau kai meeng komian. ¹⁴Bai mianoo motaganggu kalu yana kinubut tukon tulutiyo kona mongiasan susuungo mo lokis. ¹⁵Doibundu, kalu mo lokisoo kona iniyas tinuluti, maka lalim komo sumbut; tukon kalu kolalim badaango, maka kolimbako doiyamo matean.

¹⁶Inaikai potongokolii, Utus-utusonggu kusineang! ¹⁷Sasamba kopebee mo monondok tukon palasena mo monondok kona lubatan doi sulugaa, Mian Bisa komo lebesengene, mopasi-takayo sasaibino komadialan doi timbu. Yanamo Mian Bisa mo aki natobolii, tukon aki koidan natealikene kokalipookan. ¹⁸Luwedoi sasaibinodoo yana susuungo tealikene kita napau-pau lolo nabantilan mo kana. Yana kubaiyo doiya sulano kita malaat tempat mo utama doi antala sasaibino kolobo napinasitaka.

Molongol tukon mokubai

¹⁹Palahatikangene naiya momonondok, Utus-utus mo sineang! Memeeng komian sio namosobit mondongolii, bai malumbit nabasilangan tukon malumbit nanggimal. ²⁰Mian mo nggimal aki moola kubaiyo komo monondok, mo konooyo ko Mian Bisa noano. ²¹Sabab doiya, sakukene memeeng kokabiasaan mo madikit tukon mo lokis. Talimayo tukon noa monondok Mian Bisa nabantilan mo usoko doi noamu lalomo, sabab bantilanoo daano kobukuanan tuuk mosalamatene komuyu.

²²Siokai komuyu kubaiyo oila ko Mian Bisa nabinantil, inai natongo lengeliyo tolong, tobikon tukon bunu doiya komuyu kokoliiyo kobutomu susuumu. ²³Mian mo mondongolii ko Mian Bisa nabantilan, bai aki nakubaiyo daano bunu mian mo kitayo koduduso mo tutuu doi sulumiin salaano. ²⁴Lapamo yana palahatikangene momonondok, yana kai taus tukon banggadudul tomilinggene bulaando kotambongo do dudusodoo. ²⁵Ko Mian Bisa naukum monondok tukon daano kobukuanan tuuk namaladekaan kobanggapi. Tukon mian mo solidikiyo tukon mopalahatikangene mono-monondok tukon lakukene do ukum-ukummo, tukon bolikon lengele lolong maka

natoliminggene, do mianoo naikon ko Mian Bisa balakatio doi sasamba kolangge yana mo lakukene.

²⁶Kalu daano komeeng komian mo lasayo kobutongo meeng komian motaat baagama, bai yana aki nadagaiyo koalepo, maka yana kokoliiyo kobutongo susuungo; kona bakaledaan akiyo kotakoso. ²⁷Kokataatan baagama mo tutuu tukon tulut doi Mian Bisa Tama napambaleng doiyamo: tulungiyo kopau-pau tuboon tukon balu-balu mo sakisaa tukon dagaiyo kobutongo susuungo sulano inai dunia nia namanase.

Panganukon motuuk doi posanggaan

2 Utus-utusonggu! Salaku mian mo mangangga doi Temeneno Yesus Klistus, Temeneno Molobian Monondok, inaikai komuyu posasalakene komian luwedoi kolangge-langge doi dunia. ²Sabab kalu daano meeng komian mokaasa mo mapake sousolut mosoni tukon pakean momonondok molubat doi pososungan, maka nalubat koidan komeeng komian motalalais mo mapake pakean momosi-mosiak, ³maka komuyu lobian odotiiyo do mianoo mo mapake pakean momonondok. Komuyu bantile doi yana, “Mai Tuan osulang doi kulsi monondok nia.” Bai domianoo mo talalais komuyu bantile, “Kokondong imbali,” kai “Osulango nai sowaania.” ⁴Tukon kubaiyo buno doiya, komuyu kubaiyo kona posasalaan doi tulamuyu tukon pilito komian moluwedoi pikilan mo lokis.

⁵Neneeke kai, Utus-utus mo sineang! Mian mo talalais doi dunia nia, ko Mian Bisa lilike sulano teali mian mo kaasa doi manganggaan lalomo. Mian badaangoo naikon teali anggota Mian Bisa namian pokakana ko Mian Bisa mo lapamo dandikene doi mian mo seange yana. ⁶Bai komuyu tongo totulaiyo komian motalalais, banggokai mian-mian mokaasa kai molai-lainggene komuyu tukon salakanggene komuyu doi pangadilan! ⁷Yanilamo kai komo totulaiyo kosambu mo inodotii komuyu motalimayo moluwedoi Mian Bisa!

⁸Komuyu kubaiyo komo kana, kalu komuyu kubaiyo kobatomundoan naukum mo talaat doi Kitab Moliyous naayat lalomo nia, “Kilakene kotula-tulamu buno komuyu kilakene kobotomu susuumu.” ⁹Bai kalu komuyu posasalakene komian moluwedoi langge-langge doi dunia nia, komuyu kubaiyo kolalim, tukon

ko Mian Bisa naukum nyatakangene baikon komuyu daano kai polumbai ukum. ¹⁰Mian mo lumbayo komeeng ko Mian Bisa naukum-ukum, koalatio lumbayo sasaibino. ¹¹Sabab komo bantile, “Inai balolowa,” yanamo koidan komo bantile, “Inai momangakate.” Jadi, kalu komuyu akipo balolowa, bai mangakate, maka komuyu daano kai polumbai do ukummo koidan. ¹²Basilingano kai tukon potindokiiyomo salaku mian naikon mo inadili mololoi Mian Bisa naukum mo maladekakene kobanggapi. ¹³Sabab ko Mian Bisa aki naikon natudoikene komaasi doi mian mo aki natingoniiyo koposeangan. Bai poseangan lobian kona moongolan luwedo ukuman!

Mangangaan tukon kokubai

¹⁴Utus-utus! Oila kotakoso komian mobantile, “Yaku mian mo namanganga”, kalu yana aki natudoikene tukon nakokubai? Moola kai do mangangaan mopokakana doiya salamatene yana? ¹⁵Kalu andeno meeng komian utus malane kai utus boine palaluuwo kopakean tukon aki nasukup kona kaanan tuuk sasamba kooloyo. ¹⁶Oila kotakoso komuyu bantil doi yana, “Salamat mopakeyo kopakean mo boolu tukon salamat mokaan” – kalu komuyu aki pobeena doi yana oila kona pinalaluu tuuk tuboan? ¹⁷Bunomo kai koidan tukon mangangaan, kalu aki nainokitakon tukon kokubai, maka mangangaanoo akiyo kotakoso.

¹⁸Banggokai daano kobantile, “Daano komian mo balaanggene kona mangangaan tukon daano kobailong mo balaanggene kona kokubai.” Yaku naikon timbiliyo, “Tudoikene doi yaku bulaando komian modaano kona mangangaan moakiyo doi nakokubai tukon yaku naikon tudoikene tukon kokubai baikon yaku daano daku mangangaan.” ¹⁹Komuyu manganga baikon Mian Bisa tongo meeng, bolikon? Jadi ibiliisoo manganga tukon yanila mbombokon momatakutene! ²⁰Komuyu longas tuuno! Oilakai komo palaluu tinudoikon doikoo baikon akiyo kotakoso modaano komangangaan bai akiyo kona kokubai? ²¹Kitayomo Abalaham nda mbumbu. Yana Mian Bisa talimayo monondok sabab nakokubai, doiyamo doi tembodo yana sosubakene Ishak, napau, doi Mian Bisa doi balabaang bunggono. ²²Dimbaa totongo baikon mangangaan sio naokitakene tukon kokubai

sulano teali monondok. ²³Doiya pokokonoi tukon ayat Kitab Moliyous nia, “Abalaham mangangga doi Mian Bisa, tukon sabab namanganggaanoo ko Mian Bisa talimayo salaku mian mo lakukene ko Mian Bisa namongiasan.” Doiyamo kosababpo Abalaham sinombuikon, “Mian Bisa nasobat”. ²⁴Budodoiya tontongo, baikon komian Mian Bisa talimayo monondok sabab oila do mianoo nakinubaidoo, tukon bolikon tongo sabab namanganggaan kai.


²⁵Kitayo koidan doi Lahab, boine motombo lolowaon. Yana Mian Bisa talimayo monondok sabab nakokubai, doiyamo salataa yana talimayo doi nabonua lalomo kobangsa Israel namata-mata tukon tulungiyo yanila dambasene kobutongo mololoi loloon bailong.

²⁶Jadi, buno kai butong moakiyo koloh daano butong mo mate, bunomo lakon koidan manganggaan moakiyo kokokubaino doiyamo manganggaan mo mate.

Banggapi alepo

3 Utus-utus! Inaimo bada-badaang luwedoi komuyu mo yase teali gulu. Komuyu toiyo baikon kita mo teali gulu naikon inadili tukon lobian tuuno doi mian bailong. ²Kita sasaibino badaang lunggon ndamokubai sala. Bai mian mo aki namokubai kasalaan tukon nabantil-bantilan, yana mian mo talakana, mo moola kuasaiyo kobutongo. ³Kalu kita konoikene kotambang doi kaladai suungo sulano yana natulutiyo konda mongiasan, maka kita moola atule sasaibino do adalanoo butongo. ⁴Mangala koidan kapal bunekene sontoh. Mau kai kapaloo daano lobo meeng buno doiya kona kabasal tukon mbombuul makansang babayo, bai yana uling mo poipoisik moola naatule tulutiyo kotolopuus namongiasan. ⁵Bunomo koidan tukon aleponggitata; mau kai koaleponggitadoo poipoisik, bai yana moola babanggaalkene kobutongo doi langge-langge mo babasal kaliangano.

Pikikene bulaando kobonggulung nababasilan aung mo poipoisik moola suayo! ⁶Koaleponggitata pokakana aung. Doi butonggita yana buno meeng kokulokisan uuno mo sabukene kokulokisan doi sasaibino kobutonggita. Tukon aung moluwedoi nalaka, yana suayo sasaibino konda tuboan. ⁷Sasaibino koiyayon



Tambang doi kaladai babano (3:3)

mobalani kaliangano, tomisi, iyayon molanda tukon ikan moola kinamalu, tukon lapamo banggapi kamaluwo. ⁸Bai banggapi alepo aki namoola meeng komian kamaluwo. Alepodoo kulokis tukon aki namoola kinuasai; moonoo tukon lasum mo mangakate. ⁹Kita gunakangene tuuk bakinatauan doi Temeneno tukon Tamanggita, bai koidan tuuk kutukiyo tulando banggapi, mo lapamo tinealikon loloiyo Mian Bisa tambongo. ¹⁰Luwe babano mo pokakana tobuat kobantilan kinatauan tukon bantil-bantilan bakutukiyan. Kona tutuuwan aki nabuno doiya! ¹¹Oilakai daano kopaisu matano mo palapuasene kopaisu matabal tukon paisu momosopot doi tempat mo pokakana? ¹²Ala batango, Utus-utusonggu, aki nateali sawokene kozaitun saono, tukon anggul batango aki nateali sawokene koala saono. Paisu matano mo motono aki kai nateali tobuatene kopaisu momatabal.

Pandoiyan mo lubat doi bungbuk

¹³Kalu doi antala ikoo daano komian mo pandoi tukon momonondok konoano, siokai yana tudoikene tukon tubo monondok tukon kubaiyo kolangge-langge mo monondok, mo polaingene konoano napependean tukon napandoiyan. ¹⁴Bai kalu komuyu mososunoi, noa mallas, tukon utamakene kobutongo susuungo, inaikai mo babanggaalkene do pandoiyanoo, sabab tukon doiya komuyu pase-pasekene bilita mo bisa doi moluwe Mian Bisa. ¹⁵Pandoiyan mobuno doiya aki naluwe doi sulugaa. Yana luwedoi dunia, doi banggapi namongiasan, tukon luwedoi setan! ¹⁶Inaando kona daanoan kobassunoiyan tukon sipat moutamakene kobutongo susuungo, idoo kai talaat koponggimakonan tukon sasaibino kaliangano kokokubai mo lokis. ¹⁷Bai mian mo daano kona pandoiyan mo luwedoi bungbuk, yana tumbe-tumbeno tuuno molino, doibundu yase podame, monondok, tukon tulut. Yana moonoo tukon poseangan tukon okitakene kona kokubai mo monondok. Yana aki namololoi tukon aki nakakaadukon. ¹⁸Takainomo komonondokan daano kai hasil moluwedoi kalibuang paladamean mo tinipas luwedoi mian mo kilakene kopaladamean!

Pookotula tukon dunia

4 Doi naando kai kona luwean sasaibino kopooakatean tukon podangaanian doi komuyudoo? Bolikon kai doiya kona luwean doi muminoo-mooton mo banggadudul kai polobosii doi butomuyu lalomo tuuk malaatan kasanaangan doi dunia! ²Komuyu yase, bai aki pomalaat, maka komuyu yase mangkate! Komuyu samangat, bai aki polaate oila kopoinumbal, maka komuyu pogagai tukon poakate. Komuyu aki pomalaat oioila, sabab komuyu akipo mangkabi doi Mian Bisa. ³Tukon kalu kai komuyu lapamo mangkabi, komuyu aki pomalaat, sabab muginabidoo natuduan sala; oila kopokinabidoo tongo tuuk kasanaangan butomu susuumu. ⁴Komuyu daano mian mo aki nataat! Komuyu toiyomo baikon kalu komuyu pokotula tukon dunia, maka komuyu teali Mian Bisa namusu? ⁵Inai mosangkayo baikon Kitab Moliyous akiyo kona alasan mobantile, "Doi butonggita Mian Bisa abese kona loh mo tikas kona minooton." ⁶Mau nabuno doiya, Mian Bisa namaasi mo bineekon doi kita lobian moonggol doi lohdoonaminooton.

Doiya kosababpo doi Kitab Moliyous lalomo totulis koidan, “Mian Bisa aki nayase komian mo babanggaal, bai kobalino yana seseange komian mo kependeyo konoano.”

⁷Tobikon doiya, anggayomo ko Mian Bisa tukon lawane ko Ibiliis, maka Ibiliis naikon dampas luwedo komuyu. ⁸Loolaniyo ko Mian Bisa, tukon Mian Bisa naikon loolaniyo komuyu. Kumesiyo kai kolimaiy, komuyu mo baladosa! Tukon kolinoyo konoamu, komuyu mo panga konoamiu! ⁹Siokai komuyu tutuu manasal tukon kokiil tukon mandaung; siokai komu kokumbitan teali kokiilan tukon komu labaan teali susaan! ¹⁰Siokai komuyu pependeyo kobutomuyu doi Temeneno salaano, maka Temeneno naikon akatandake komuyu.

Poingotii sulano inai mososiboliyo komian

¹¹Utus-utus, inaimo pososibolii kai poasalakon. Mian mo sosiboliyo kai noasalakene koutuso motula-tulano mo pokakana Salani, yana sosiboliyo tukon asalakene ko Mian Bisa naukum. Tukon kalu komuyu salakene ko Temeneno naukum, doiya koalatio komuyu aki potulutiyo do ukum-ukumoo, baimo teali nahakim. ¹²Banggokai tongo meeng komo daano konahaak beena ukum doi banggapi tukon adiliyo kobanggapi. Yanamo ko Mian Bisa mo balakuasa salamatenne tukon mositakayo. Jadi, indee kai komuyu, tobikon komuyu yase asalakene kotulamu banggapi?

Poingotii sulano inai mobalambuus

¹³Utus-utus mo bantile, “Oloyo nia kai modoa kami naikon lengget doi kota anu tukon dungol imbali meeng kotaum kona kalumbit tuuk badagang tukon mounggolii doy,” – longolio daku otunggul nia. ¹⁴Oila naikon komo teali tukon mutuboan modoa, komuyu susuungo aki potoyo! Komuyu tongo buno tibolung soisikeen kona tokitaan, doibundu lapus. ¹⁵Siokai komuyu bantile buno naiya, “Kalu Temeneno kilakene, kami naikon tubo tukon lakukene naiya kai doiya.” ¹⁶Bai budodoiya komuyu babanggaal tukon balaambuusi. Sasaibino kosalita mobuno doiya sala.

¹⁷Sabab doiya, mian mo toiyo oila komo monondok mo sio nakubaiyo bai aki nalakukene, mianoo baladosa.

Poingotii doi mian-mian mokaasa

5 Utus-utus mian-mian mokaasa! Ndongoliiyo daku otinau. Siokai komuyu kokiil tukon mandaung sabab komuyu naikon toupiyo kosakisaawan! ²Komukaasaan boano. Mupakean eaka kaanene. ³Mosoni tukon musuasa atak tutupiyomo; koatako naikon teali sakisii molawane komuyu tukon naikon kaane mokobutomu kabus bunu aung. Komuyu lapamo atambune kobuat doi lounu lolani kona pupusan. ⁴Komuyu aki pobeale ko mian-mian natambo mo balimang doi muasi. Budodoiya polengele yanila nabantilan! Mian-mian mo pototongikene komu asi hasilo, nggeleamon manggabi tulung tukon yanila nanggeleamonan polongo doi Mian Bisa tolingaino, Temeneno Mobabasal Konakuasa. ⁵Komuyu tubomo monondok tukon toupiyomo kosanaangan doi dunia nia. Komuyu bunu pokakana mokalanake kobutongmiu tuuk doi oloyo bakolotan. ⁶Komuyu ukume tukon akateyo ko mian-mian mo aki nasala, tukon yanila aki nalawane komuyu.

Kasabalan tukon sambeang

⁷Tobikon doiya, posabal Utus-utusonggu, polong Temeneno nalubat. Pokitayo bulaando meeng komian patani nasabalan mototiili polong doi nabuta mobeena hasilo moano koanggano doi yana. Tukon yana sabal mototiili lonun udan loon namatanasan matandang tukon udan lounu bunga. ⁸Siokai komuyu koidan posabal tukon kabasale konoamiu, sabab Temeneno naoloyo lubatan loolanimo.

⁹Inaimo mondommuk tukon mopoasalakon, sulano komuyu ko Mian Bisa aki naukume. Neneeke! Hakim loolanimo, sadiamo molubat. ¹⁰Utus-utus, neneeke kai sasaibino konabi mo basilingan mangatas Temeneno sambuno. Yanila sabal tukon taane kosakisaa. Jadi, alayo yanila teali sontoh. ¹¹Yanila binantil kinatauwani sabab yanila taat. Komuyu lapamo molongol Ayub nasabalan kaliangano, tukon komuyu toiyo bulaando ko Temeneno doibundu nabalakaatiyano yana. Sabab Temeneno seseange tuuno tukon monondok konoano.

¹²Mo utama tuuno, doiyamo: Inaikai batolopi, mau demi timbu, mau demi buta kai demi oilamo kai. Bantilemo

kai “Oode” kalu makisuut oode, tukon “Aki” kalu komu minakisuut aki; sulano ko Mian Bisa aki naotuwongikene koukuman doi komiu.

¹³Kalu doi komuyu nokon daano komo susa, siokai yana nasambeang. Kalu daano komo tedes, siokai namanani nggaale ko Mian Bisa. ¹⁴Kalu daano komo masakit, siokai yana uange kokatua-katua jemaat. Tukon siokai katua-katuadoo nasambeangene do mianoo masakitoo tukon solitene kolikison mangatas Temeneno sambuno. ¹⁵Kalu yanila nasambeang pelengene tukon mangangga, Temeneno naikon aline miano masakit, tukon ompunio kona lalim-lalim mo lapamo yana kubaiyo. ¹⁶Tobikon doiya siokai komuyu teali mangakukene kopo kasalaan tukon sambeangene, sulano komuyu inalin. Mian nasambeang loloiyo ko Mian Bisa namongiasan, daano kona kuasa mo babasal. ¹⁷Elia pokakana banggapi mo buno kita. Yana sambeang tukon tutuu sulano naaki nalubat koudan, maka udanoo aki nalubat tolu kotaum maka sembeleng kona kalumbit. ¹⁸Doibundu yana sambeang koidan, maka timbu lubatene koudan tobikon kobuta beena hasilo koidan.

¹⁹Utus-utusonggu! Kalu doi komuyu noikon daano komeeng komian mo aki naloingiyo koidan kootunggul moluwedoi Mian Bisa, maka meeng komian bailong tealikene do mianoo abali doi Mian Bisa, ²⁰neneeke koayat nia: Mian mo kubaiyo komian mobaladosa abali doi naloloon mo sala, do mianoo salamatene komian najiwa mobaladosadoo luwedoi matean tukon tealikene badaang kolalim moinompuni.

Komai holomat,
Yakobus

PETULUS NASULAT KOMEENGO

PANGANTOKON

Petulus nasulat tumbeno nia inotuuk doi Salani miano mo sasabul doi sasaibino ko Asia Pauno taikon lembet. Yanila sinombuikon "Mian Bisa namian linilik". Kona makisuut nasulatia tuuno doiyamo sulano naekeengele kona maanggaan sasaibino komian mobasayo modaano toupio kopinakisaawan tukon sakisaawan sabab mangangga doi Klistus. Petulus ingo-tiikene sasaibino komian mabasa naikon ko Bilita Monondok mo buno pobe moinian doi yanila. Sabab, Yesus Klistus lapamo mate, tubo kokoidan tukon paladandi naikon molubat koidan. Luwe do sababpoo yanila siokai nayase tukon dalame kosakisaawan, tukon yanila sadaliyo donapo sakisaawannoo bunokai meeng koudian oilakai yanila bisa-bisa manggo doi Klistus. Koidan yanila sio namangangga baikon yanila naikon Temeneno telese doi tembo Yesus Klistus naabalian.

Doi sangalaasan kona okoonggolano doi sasaibino komian mobasayo namanggaan mo daano doi susaan lalomo, Petulus kabiyo sulano yanila tubo buno salaku pololaing-pololaing Klistus.

Antoko

Pololukoni 1:1-2

*Otunggul sulano nda neneke baikon Mian Bisa salamatenene
kobanggapi 1:3-12*

*Otunggul sulano nda tubo tongo tuuk doi Mian
Bisa 1:13-2:10*

*Salani miano nakawajiban doi tembo sakisaawan
lalomo 2:11-4:19*

*Kinondokano konoanggita tukon meleleanian Salani
miano 5:1-11*

Potutupo 5:12-14

1 ¹⁻²Utus-utus Mian Bisa namian ililik, mo sasabul doi balamsalaan doi kabupaten Pontus, Galatia, Kapadokia, Asia, tukon Bitinia! Yaku, Petulus, Yesus Klistus nalasul, moinikene bilisi ko Mian Bisa beena balakaat tukon namonondokan doikoo tukon lobi-lobian.

Komuyu ililik teali Mian Bisa namian pololoi tukon Mian Bisa Tama natetel. Tukon Mian Bisa Na Loh lapamo tealikene komuyu mian mo moliyous, tangalaas tuuk doi Mian Bisa, sulano komuyu taat doi Yesus Klistus tukon pokimoliyousi luwedoi sauno.

Moinian mo moonggol

³Maimo nda basyukuul doi Mian Bisa, Temeneno Tamanggita Yesus Klistus! Yana seange tuuno kita doiyamo kosababpo yana beekene doi kita kotuboan mo boolu, tukon otuboioyo koidan Yesus Klistus luwedoi namatean. Naiya beena kita moinian mo moonggol. ⁴Kita moini sulano kita malaat balakaat-balakaat Mian Bisa mo sadiayo tuuk doi namian, doiyamo balakaat-balakaat mo inabos doi sulugaa, sulano aki moola manas, kai teali boowan kai mbules. ⁵Sasaibinodoo daano tuuk doikoo, sabab komuyu mangangga doi Mian Bisa. Maka komuyu dinagai tukon Mian Bisa nakuasa sulano komuyu mantalima kasalamatan mo sadiamo inokitakon doi loonu napupusan naikon.

⁶Sabab doiya siokai sanaang konoamu, mau kai nabudodoiya tolongo soisik kosambu bai komiu sio nateali susa sabab komiu toupio bubulaa kaliangano kopalesobaan. ⁷Kona makisuut doiyamo tuuk okitakene oila komuyu tutuu mangangga doi Temeneno kai aki. Mosoni mo moola manas, inuji tukon aung. Jadi kopoomanganggan daano lobian koanggano doi mosoni, jadi sio nainuji koidan sulano nateali moonggol. Tukon buno doiya komuyu naikon ngginaal tukon inodotii kabai kinatandak doi oloyo Yesus Klistus nalubatan koidan. ⁸Komuyu seseange, mau kai looluk komuyu aki pokitayo. Tukon komuyu mangangga doi yana mau kai yana budodoo komuyu akipu kitayo. Doiyamo kosababpo komuyu laba, tukon lasayo kona sanaangan mo babasal tukon aki namoola natabantil. ⁹Sabab mumanganggan namakisuut laatemo, doiyamo butomu nakasalamatan.

¹⁰Naiyamo sasaibino konabi mo telitiyo tukon selidikiyo kokasalamatan, tukon yanila pikikene kobalakaat Mian Bisa mo beekene doi komuyu. ¹¹Yanila selidikiyo bulaa kai tukon oila kotembono langgedoo naikon natealian, Klistus Na Loh mo makasuutio mo daano doi butongoila. Doi tembodoo kona Loh babotilanggene doi yanila sakisaawan-sakisaawan kaliangano mosio Klistus toupiyo tukon kaliangano kona nakabasilan naikon mo tuundu nalapa doiya. ¹²Doi nabi-nabidoo ko Mian Bisa babilitakene baikon oila komo yanila lakukene bolikon tuuk yanila nakepentingan, bai tuuk ikoo; doiyamo langgelange diabudodoonia komuyu molengele tukon tontong doi sasaibino komo babayo ko Bilita Yesus Klistus kaliangano. Yanila pelengene langge-langgedoo doikoo tukon Mian Bisa Na Loh nakuasa mo kpatuwo doi sulugaa. Tutuu koidan malaekat-malaekato yase koidan mongotoi bilita yanila mo babilitakenedoo.

Ponguang sulano tubo moliyous

¹³Tobikon doiya, siokai komuyu basa-basadia. Badagai tukon moinikene tuuno kobalakaat naikon mo bineekon doikoo doi tembo Yesus Klistus naikon nalubatan. ¹⁴Taatkai doi Mian Bisa, tukon moikai potubo loingiyo komu minomooton loolukonoo, doi tembo komuyu akiyon potingoniiyo ko Mian Bisa. ¹⁵Kobalino, siokai po moliyous doi sasaibino kolangge lalomo komuyu mokubaiyo, pokakana bunu ko Mian Bisa mo uange komuyudoo moliyous. ¹⁶Doi Kitab Moliyous lalomo totulis, "Siokai komuyu moliyous, sabab yaku moliyous."

¹⁷Komuyu bantile do Mian Bisadoo Tama doi tembo posambeangan doi yana. Jadi, ko Mian Bisa doiyamo komo hakimiyo kobanggapi pokokonoikene tukon memeeng nakokubai aki nalilike. Sabab doiya nakalu komuyu daano nai dunia nia, siokai pokabasale ko Mian Bisa doi mutuboan lalomo. ¹⁸Komuyu toiyo oila komo lapamo binabeakon potongosodiiyan luwedo tuboan mo akiyo kotakoso mo tininggoliikon doi tumbumu. Kopebealo bolikon meeng kolangge mo moola manas bunu pelak kai mosoni, ¹⁹bai meeng kolobo mo daano tuuno koolino; doiyamo Klistus butongo susuungo, mo teali bunu domba mo sinosubakon doi Mian Bisa akiyo seselo kai sosiboliino.

²⁰Klistus Mian Bisa lilike akiyoon nadunia nia napinasitaka. Tukon doi oloyo-oloyo naloolanimo kolounu napupusan nia, yana lubat doi dunia sulano posinalamaton. ²¹Lolo doi yana komuyu mangangga doi Mian Bisa mo lapamo otuboiyo koidan luwe nadoi matean tukon kabasale yana. Jadi, Mian Bisa kai kopo manggaan tukon doi Mian Bisa koidan kopo mangabosan moinian.

²²Sabab komuyu taat doi otunggul moluwedoi Mian Bisa, maka komiu kumesiyo kobutomiyu tukon komuyu seseange komian badaang pokakana namangangaan tukon sanaang. Tobikon doiya, siokai komuyu seseange meeng maka bailong tukon sasaibino konoamu. ²³Sabab mololoi Mian Bisa nabantilan mo tubo tukon mo posidutukon, komuyu lapamo tinealikon banggapi boolu mo bolikono sinuung moluwedoi banggapi, bai luwedoi Tama mo posidutukon. ²⁴Doi Kitab Moliyous lalomo totulis buno naiya,

“Sasaibino kobanggapi buno bulung,
tukon sasaibino kona kinabasalan buno bulung bungano.
Bulung molooyu, kobungano koidan matandang;

²⁵ bai ko Temeneno nabantilan tataap tuuk
sidutu-posidutukon.”

Bantilanoo Bilita Monondok mo lapamo binabotilanggon doikoo.

Batu mo tubo tukon bangsa mo moliyous

2 Tobikon doiya, sakukenemo luwedoi butomu sasaibino komo lokis; inai koidan mobakala-kala tukon inai mokakaadukon. Inai masakit konoamu, tukon inai mototulaiyo komian bailong. ²Siokai komuyu teali buno pau mo sodo sinuung, sidutu moloukene naikon susu lohani mo bilisii. Tukon buno doiya komuyu naikon tubo tukon sinalamaton. ³Doi Kitab Moliyous lalomo totulis buno naiya, “Komuyu lapamo lasakangene susuumu bulaa kona monondokan ko Temeneno.”

⁴Tobikon doiya, lubat doi Temeneno. Yana buno batu mo tubo, batu banggapi mo sakukene sabab tinoi akiyo kotakoso; bai Mian Bisa komo lilike buno batu mo daano koanggano. ⁵Komuyu buno batu-batu mo tubo. Tobikon doiya siokai komuyu poyase pinake tuuk kekendenge ko Mian Bisa nabonua

lohani. Tukon buno doiya komuyu teali imam-imam, mo tubo tongo tuuk Mian Bisa, tukon mo loloiyo Yesus Klistus sosubakene doi Mian Bisa kososubakon lohani mo konoiyo ko Mian Bisa noano. ⁶Tobikon doi Kitab Moliyous lalomo totulis buno naiya,

“Yaku lapamo lilike meeng kobatu modaano koanggano, yaku abese doi Sion buno batu tuuno; tukon mian mo mangangga doi yana aki naikon namanasal.”

⁷Batudoo daano koanggano tuuk komuyu mo mangangga. Bai mian badaang mo aki namangangga, tapakemo koayat-ayat Kitab Moliyous nia,

“Batu mo aki napinake tukang-tukang bangunanoo tokita teali batu mo tuuno.”

⁸Tukon

“Doiyamo batu mo kubaiyo komian takait, batu mo kubaiyo yanila otuwong.”

Yanila takait sabab yanila aki namangangga naikon ko Mian Bisa nabantilan. Bunomo kai lapamo Mian Bisa tantukanggene yanila kaliangano.

⁹Bai komuyu daano kai bangsa mo tolilik, imam-imam mo leleaniyo kotomundo, bangsa mo moliyous, tangalaas tuuk Mian Bisa, Mian Bisa susuungo namian. Mian Bisa lilikemo komuyu tukon uange komuyu tobuat luwedo kalipookan sulano usok doi madialan lalomo, tukon makisuut sulano komuyu popelenggene kokokubai-kokubai bilita kaliangano mo doikono langge. ¹⁰Looluk komuyu bolikon Mian Bisa namian, bai budodoiya komuyu daano Mian Bisa namian. Looluk komuyu Mian Bisa aki naseange, bai budodoiya komuyu mantalima kona soyang.

Peleleani-peleleani Mian Bisa

¹¹Utus-utus mo sinoyang! Komuyu daano kai mian molubat tukon nalausalan doi dunia nia. Tobikon doiya yaku kabiyo tuuno sulano komuyu inai motulutiyo kobanggapi noano namongiasan mo sidutu polobosi lawane kobutongo. ¹²Komu kalakuan doi antala mian mo aki natingoniiyo ko Temeneno

siokai namonondok tuuno, kalu kai yanila bapitanaakene komuyu bunu mian lokis, yanila sio namangakukene komu kokubai mo monondok, tobikon yanila naikon nggaale ko Mian Bisa doi oloyo nalubatan.

¹³Lolo Temeneno, siokai komuyu tootukuiyo doi sasamba kopototooli banggapi: mau doi Tomundo mo teali ponguasa tuuno, ¹⁴mau kai doi gubelnul mo tinudo luwedo Tomundo sulano naukume komian mo kubaiyo lokis tukon sulano naodotiiyo komian mo mokubai monondokan. ¹⁵Sabab ko Mian Bisa yase sulano tukon mukokubai-kokubai mo monondok komuyu kukupe komian longas suungo mo basilingan. ¹⁶Siokai komuyu tubo bunu mian momaladeka, bai inaimo mopakeyo komu maladekaano tuuk sunggupiyo komu kulokisan, baimo kai tubo bunu Mian Bisa napeleleani. ¹⁷Anggayo kai sasaibino komian, seseange kai koutus-utusomu tulando Salani. Matakutene ko Mian Bisa, tukon odotiiyo ko Tomundo.

Klistus nasakisaawan salaku sontoh

¹⁸Utus-utus mo teali peleleani, tulutiyo komu tuan tukon odo-odotiiyo tuuno; bolikon tongo doi yanila mo monondok konoano tukon tombosalitaon, bai koidan doi yanila mo sidutunggonggimolon. ¹⁹Mian Bisa naikon balakaatiyo komuyu, kalu komuyu naikon mangalatikene ko Mian Bisa namongiasan, sabal doi sakisaawan kokubai mo aki naadil. ²⁰Sabab oilakai kona lobianan kalu komuyu sabal doi sakisaawan ukuman mo siokai po tanggunge tobikon posala? Bai kalu komuyu tukon sabal motanggunge kosakisaawan mo lupayo ikoo sabab kubaiyo komo kana, maka Mian Bisa naikon balakaatiyo ikoo. ²¹Tuuk doiya ko Mian Bisa uange ikoo. Sabab Klistus susuungo lapamo sakisaa tuuk ikoo, tukon doiya yana beekene doikoo meeng kosontoh, sulano komuyu tulutiyo kona ampakanan. ²²Yana aki nakubaiyo kolalim, tukon akiyo kai meeng komian molongol yana mobakala-kala. ²³Doi tembo natinotosian, yana aki nabalase tukon mototosii. Doi tembo nasakisaawan, yana aki namolobosi; yana tongo salakanggene kona palakala doi Mian Bisa, do Hakimmo mo adil. ²⁴Klistus susuungo tanggunge konda lalim-lalim doi butongo doi kayung sempang bunggono, sulano kita tosobii doi lalim nakakuasaan, tukon tubo tulutiyo ko Mian

Bisa namongiasan. Klistus napakol-pakol komo aline komuyu.
²⁵Loolukoo komuyu buno domba mo tapa, bai budodoiya komuyu lapamo binaba kokoidan tuuk mololoi Pototooli tukon Popiala butomu.

Lakai tukon boloki

3 Bunomo koidan komuyu, bolo-boloki, sio poloingiyo kopo lakai sulano kalu doi yaniladoo daano komo aki namaangga kobilita moluwedoi Mian Bisa, komu kalakuan moola kubaiyo yanila teali maangga. Tukon aki napalaluu komuyu mabantil oioila doi yanila, ²sabab yanila kitayo komu kalakuan mo molino tukon moliyous. ³Inaikai komu monondokan tongo monondokan doi tonggulung, bunu umpamano bubungayano kobuuk kai mapake maemaenan, kai bokukum mo maaling koolino. ⁴Kobalino, siokai komu tambongan sumbut doi noamu lalomo, lenggang mo muyuk-muyuk tukon tanaang; doiyamo kotambongan tuuno mo ano tuuno koanggano manulut Mian Bisa napokita. ⁵Tukon nakokubainia doi lounu looluk koboi-boine baagama moini doi Mian Bisa monggitambonggene kobutongo tukon loingiyo konapo lakai. ⁶Sala kai bunomo doiya koidan, yana taat doi Abalaham tukon bantile yana natuan. Utus budodoiya daano kai Salah napau-pau, kalu komuyu kubaiyo kolangge-langge mo monondok tukon aki namatakut doi oilamo.

⁷Tukon komuyu koidan, lakai-lakai, siokai potubo tukon daano komu pangalatian doi muboloki; tukon mangalatikene baikon yanila daano kai mian mo lemah. Pokubaiyo yanila tukon poodotiiyo, sabab yanila polaing-laing tukon komuyu, naikon mantalima balakaat tuboan mo tuuno moluwedoi Mian Bisa. Kubaiyomo kai naiya, sulano aki nadaano komo halangiyo komu sambeangan.

Sakisaa sabab kubaiyo okomo kana

⁸Kona kasimpulan doiyamo: siokai Utus-utus pomeenggon silingan tukon meeng kopalasaan. Siokai komuyu posesiang bunu mian badaang mo motolutus. Tukon siokai komuyu posesiang tukon lenggang noa monondok. ⁹Inai mobalase

kokulokisan tukon kulokisan, kai mototosii tukon mototosii; kobalino balase tukon makabikene balakaat moluwedoi Mian Bisa. Sabab ko Mian Bisa uange komuyu tobikon sulano pomantalima balakaat doi yana. ¹⁰Doi Kitab Moliyous lalomo totulis buno naiya,

“Mian mo yase lasakangene kotuboan

tukon yase toupiyo kooloyo-oloyo mo monondok,
sio nadagaiyo kosuungo sulano aki nabasilingangene
kolangge-langge mo lokis

tukon aki nabantile kolangge-langge mo kala.

¹¹ Yana sio nadedeengene komo lokis tukon lakukene komo monondok;

siokai nakakaate tutuuno sulano nalaate kopoodamean.

¹² Sabab Temeneno sidutu palahatikangene komian badaang mo tulutiyo kona mongiasan,

tukon Temeneno sidutu lengele yanila nasambeang;
bai Temeneno lawane komian badaang mo kubaiyo
kokulokisan.”

¹³Indee komo yase kubaiyo lokis doikoo, kalu komuyu sanaang kubaiyo komonondok? ¹⁴Mau kai nabulaandono kopo sakisaawan sabab lakukene kolangge-langge mo monondok, komuyu utung! Inai pomatakut doi indee kai, tukon inai pomolili. ¹⁵Bai doi noamu lalomo, siokai pobeekene doi Klistus kpongodotii mo tangalaas mo pokokonoi tukon nakadudukan salaku Temeneno. Tukon siokai posidutu basadia tuuk mebee potimbilino doi samba komian mo mansadai tentang moinian mo daano doi komuyu. ¹⁶Bai lakukene doiya tukon muyuk-muyuk tukon odotiiyo. Tukon siokai konoamu lalomo namolino, sulano kalu komuyu loobukon sabab komuyu tubo tukon monondok buno pololaing Klistus, maka komian mo basalitadoo naikon teali mammaa susuungo. ¹⁷Tadukai nda sakisaa sabab kubaiyo komo monondok – kalu doiya daano kai Mian Bisa namongiasan – maka baino sakisaawan sabab kubaiyo kolokis. ¹⁸Sabab Klistus susuungo mate tongo idan, tuuk sidutu-posidutukon sabab banggapi nalalim – meeng komian mo akiyo kona sala, mate tuuk mian mo sala. Klistus lakukene doiya sulano momoola babayo komuyu doi Mian Bisa. Yana inakate tongo butongo dunia, bai inotuboi koidan luwedoi

butongomo lohani. ¹⁹Doi loh ndondoongo lalomo yana taus babotilangene kobilita moluwedoi Mian Bisa doi loh-loh mo tinalunggu: ²⁰doiyamo naloh mian madaang mo aki nataat doi Mian Bisa doi Nuh nalounu. Doi tembodoo ko Mian Bisa mototiili tukon sabal sampe polong Nuh alapayo kona kapal. Tongo mian badaang mo daano doi kapal tolong – sasaibino alu komian – komo sinalamaton luwedoi lomba babasaloo. ²¹Jadi, do motealidoo babunokon andean doi mansauan paisu salani mo budodoiyania mosalamatene komuyu. Mansauan paisu salani nia bolikon meeng kobakolobokiyan mokumesian moluwedoi sasaibino komo manggi-manggilit, baimokai mudandi doi Mian Bisa moluwedoi noano lalom mo monondok. Mansauan paisu salanidoo salamatene komuyu sabab Yesus Klistus lapamo abali tubo doi matean, ²²tukon lapamo liba doi sulugaa. Budodoiya yana balakuasa polaing tukon ko Mian Bisa tukon palentayo sasaibino komalaekat-malaekat, sasaibino koponguasa tukon sasaibino kobukuanan.

Tubean mo boolu

4 Sabab Klistus lapamo sakisaa tongo butongo dunia, komuyu koidan sio kobukuangene kobutomuyu tukon pokokubai mo pokakana doiya. Sabab komian mo sakisaa kobutongo dunia, akimo koidan nakubaiyo kolalim. ²Tobikon doiya, siokai potubo banggadudul doi dunia nia loingiyo ko Mian Bisa namongiasan, tukon bolikon loingiyo kobanggapi naminooton. ³Doi tembo mo lapamo, komuyu malumbito tuuno kopo kubaiyano oila komian badaang nainiyas kinubai mo aki natingoniiyo ko Temeneno. Komuyu tubo aki namonondok. Komuyu tulutiyo konoamuyu napisuu, mala-malangu, lamean babasal, inum-inum tukon sosubaiyo kopilogot mominosikiton. ⁴Budodoiya komian mo aki natingoniiyo ko Temeneno, masaingding baikon komuyu aki potubo buno yanila, molasayo kolalim akiyo kobataso. Doiyamo kosababpo yanila totulaiyo komuyu. ⁵Bai yanila sio namebee potimbilino doi Mian Bisa mo lapamo basadia sulano naadiliyo komian mo tubo tukon mo mate. ⁶Doiyamo kosababpo Bilita Monondok lapamo pinolonggon koidan doi mian badaang momate. Kona makisuut sulano yanila, mo lapamo inadili doi ndondoong dunia lalomo –

buno kolangge sasaibino komian naikon moinadili – moola tubo secala lohani, loingiyo ko Mian Bisa namongiasan.

Moalayo kosabeat moluwedoi Mian Bisa

⁷Sasaibino kolobo loolaniyomo kona pupusan, sabab doiya siokai komuyu kuasaiyo kobutomu tukon badagai, sulano po moola sambeang. ⁸Lobian luwedoi sasaibino, siokai komuyu tutuu poseang meeng tukon bailong, sabab tukon koidan seang komuyu naikon basadia koidan sulano poompuni. ⁹Siokai popotalima meeng tukon bailong doi po bonua suwe-suwele, akiyo kopengeluhan. ¹⁰Komuyu suwe-suwele lapamo mantalima sabeat-sabeat mo posasala moluwedoi Mian Bisa. Tobikon doiya salaku komo alayo komo monondok moluwedoi Mian Bisa nasabe-sabeat, siokai po gunakangene do kamampuanoo tuuk nda kopontingan sasaibino. ¹¹Komian mo pelengene kobilita, siokai napelengene kobilita moluwedoi Mian Bisa; mian mo meleleani mian bailong, siokai leleaniyo tukon bukuanan moluwedoi Mian Bisa, sulano doi sasaibino kolangge lalomo, ko Mian Bisa moola kinabasal mololoi Yesus Klistus. Yanamo komo balakuasa tukon moola kinabasal tuuk sidutu-posidutukon. Amin.

Sakisaa salaku Salani miano

¹²Utus-utus mo sineang! Komuyu budodoiya sakisaa tuuno sabab daano moinudi. Bai inaikai polasayo masaingding, bunomo kai daano komeeng kolangge mo bolikon lobo moteali doikoo. ¹³Bai, siokai polasayo sanaang sabab tulut sakisaa polaing-laing tukon Klistus. Maka naikon kalu ko Klistus nainakabasilan inokitakonggon, komuyu naikon labalaba. ¹⁴Komuyu utung kalu komuyu tinotulai sabab komuyu Klistus napololaing. Doiya koalatio Loh mo babasal, doiyamo Mian Bisa Na Loh, daano doikoo. ¹⁵Inaikai komeeng komian doi komuyu mosakisaa sabab yana mangakate, kai pondikuk, kai mian lokis, kabai sabab yana masambul mian bailong naulusan. ¹⁶Bai kalu komuyu sakisaa sabab komuyu Salani mian, inaikai pomammaa sabab do langgedoo. Pobakinatauan kai doi Mian Bisa, baikon komuyu babayo Klistus sambuno.

¹⁷Laatemo kotembono ko Mian Bisa adiliyomo kodunia. Tukon ko Mian Bisa namian susuungo kai naikon komo inadili loolukon. Jadi kalu ko Mian Bisa naikon tambuun doi kita, bulaando kai naikon kona tealian tukon mian-mian mo aki namaangga doi Bilita Monondok moluwedoi Mian Bisadoo?

¹⁸Doi Kitab Moliyous lalomo totulis bunu naiya,

“Kalua komian mo monondok kai sulito tuuno kona sinalamatonan,

oila mo kai koidan naikon komo teali tukon mian-mian mobaladosa mo aki natingoniyo ko Temeneno!”

¹⁹Tobikon doiya, kalu daano komian badaang mo sakisaa sabab ko Mian Bisa namongiasan bunu doiya, siokai do mianoo natubo tukon talakana tukon monggianggakene kobutongo doi Mopositakayo yanila. Yana naikon sidutu tapaatiyo kona paladandian.

Mian Bisa nadomba tambuno

5 Yaku makabi palahatian doi sasaibino mukatua-katua jemaat. Yaku tulise naiya salaku tulanggu katua tukon salaku mian mo lapamo sakisiyo susuungo Klistus nasakisaawan, tukon naikon komo tulut koidan kinabasal, kalu Klistus nakinabasan inokitakon doi banggapi. Yaku kabiyo tukon tutuuno ²sulano komuyu pototooliyo nadomba nia tambuno meeng Mian Bisa mo salakanggene doikoo. Pototooliyo kai yanila tukon noa sanaang bunu lakon ko Mian Bisa namongiasan, tukon inaikai natukon noa babalat. Inaikai koidan molakukene komu limang sulano mumalaat kauntungan, bai sabab komuyu tutuu yase momeleleani. ³Inaikai motindokiyo bunu ponguasa motuuk doi yanila mo kinuasaikon doikoo, bai tealimo sontoh motuuk doi yanila. ⁴Tukon doi tembo Pototoolidoo mo Babasal nalubatan naikon, komuyu naikon mantalima mahkota mo montootilang, mo aki naikon nambules kona montootilangan.

⁵Bunomo koidan doiya Utus, komian motatabokon. Potaat doi mian-mian badaang mo motuwa. Utus sasaibino sio pokependeyo kobutomuyu tukon koidan meleleani tukon noa monondok. Sabab doi Kitab Moliyous lalomo totulis bunu naiya, “Mian Bisa lawane komian mo batinggai, bai seseange



Dagaiyano kodomba (5:2)

komian mo monondok konoano.” ⁶Sabab doiya, pokependeyo kobutomuyu doi bilit ko Mian Bisa limano mo bukuan, sulano yana akatandake komuyu kalu laatemo kotembono. ⁷Salakanggene sasaibino komu minolilikon doi Mian Bisa, sabab yana palahatikangene ikoo.

⁸Siokai komuyu baingotii tukon basadia! Sabab ko Ibiliis daano mumusu. Yana buno singa moampakon dombala doisumai tukon ngangaakon unggoliiyo kona musu. ⁹Lawane kai yana tukon maanggaan mo moonggol, sabab komuyu toiyo baikon utus-utus tulando Salani bailong doi posaapon kodunia koidan sakisaa buno komuyu. ¹⁰Bai salalapa komuyu sakisaa soisikeen, ko Mian Bisa susuungo naikon kubaiyo komuyu teali monondok. Yana naikon kekendenge tukon kobukuanggene komuyu tukon koonggoliyo komuyu. Sabab yana daano kai Mian Bisa mo monondok konoano tuuno, mo lapamo uange ikoo sulano motulut lasaiyo kona babasalan mo posidutukon mololo doi Klistus. ¹¹Yanamo komo balakuasa polong sidutu-posidutukon! Amin.

Pangadat surat potutupo

¹²Daku surat mo palus nia yaku tulise doikoo tukon Silas napotombonii, yaku mo anggape meeng utus Salani mo taat. Yaku yase beena podudunggon doikoo tukon beena moonggalan

komuyu baikon oila daku tinulis nia bilita mo bisa tentang Mian Bisa namaasi. Siokai pobataani momoonggol doi maasidoo.

¹³Tula-tulando meeng kojemaat doi Babilon, koidan Mian Bisa mo lilike, kapatuwo kopongodotii doikoo; bunomo koidan dakupau Malakus yaku mo seange.

¹⁴Popoodoodotikai meeng tukon doi bailong tukon poseang tuuno bunu utus Salani.

Kinatauwan Temeneno beena namonondokan doi Utus sasaibino mo teali Klistus koono.

Komai pangadat,
Petulus

PETULUS NASULAT KOLUANO

PANGANTOKON

Petulus nasulat koluano nia pinolonggon doi sasaibino ko Salani miano tumbe-tumbeno. Sulatia tinulis komakisuuto sulano natantaange kogulu-gulu nalimang mo atunggukene kolanggelange mo sala, tukon aki koidan namoolakene kokokubai-kokubai mo aki namoola gulu-guludoo otunggukene. Sulano naaki do otunggul-otungguloo napangaluiyo, ko Salani miano sio nabataani doi otunggul mo bisa tentang Mian Bisa tukon tentang Yesus Klistus – doiyamo otunggul mo pinolonggon doi mian badaangoo mo lapamo sakisiyo tukon molongol susuungo Yesus momongotunggul.

Komo kinabalatanggon doi sulatia lalomo doiyamo badaang komian mo mongotunggul baikon Klistus aki naikon nalubat koidan tuuk koluano luunggono. Sulatia napabantil baikon Klistus nalubatan tokita malumbit sabab ko Mian Bisa “aki nayase meeng komian nasilaka. Yana yase sulano sasaibino komian nabadodoloon doi nalalim-lalim”.

Antoko

Pololukoni 1:1-2

Mian Bisa naponguang doi Salani miano 1:3-21

Gulu-gulu mokala-kala 2:1-22

Klistus nalubatan koluano luunggon 3:1-18

1 Utus-utus mo tutuu mangangga bunu kami! Yesus Klistus, doiyamo Mian Bisa tukon Tomundo Pasalamat kita, moolakene kita mangangga doi yana, sabab yana lakukene komo kana.

Sulatia moluwedoi Simon Petulus, meeng peleleani tukon

Yesus Klistus nalasul. ²Boliisi ko Mian Bisa nabeena balakaat tukon namonondokan doikoo tukon lobi-lobian, sabab komuyu tingoniiyo ko Mian Bisa tukon Yesus, nda Temeneno.

Ponguang tukon Temeneno nalinilik

³Mian Bisa lapamo pakeyo kona kuasa tuuk beekene doi kita sasaibino kolobo mo pinalaluu tuuk tuboan bakaleda. Yana lakukene naiya loloiyo oila konda tinoi tentang Yesus Klistus, mo lapamo uange kita tuuk lasakangene kona kinabasalan tukon yana namonondokan. ⁴Tukon do kokubaidoo doiya ko Mian Bisa lebesengene doi kita kobalakaat-balakaat mo akiyo kona bunoan tukon ano koanggano mo lapamo dandikene. Tukon balakaat-balakaatoo komuyu moola tosodii luwedo momooton molokis mo lusake nadunia nia, tukon komuyu talimayo koilah nasipat. ⁵Tobikon doiya, kakaate tutuuno sulano komuyu tataap mangangga doi Klistus tukon domu manaanggaanoo sinuungi tuboan monondok. Sangalaasan tuboan monondok komuyu palaluu teali mian moano kona motoiyan, ⁶tukon sangalaasan komotoiyan, komuyu sio koidan sio kuasaiyo kobutomuyu. Tukon sangalaasan doi kuasaiyomo kobutonggita siokai koidan popialayo kobutomuyu sulano pomoola sasalaane sasaibino kolobo. Doi sangalaasan komoolaan sasalaane sasaibino kolobo, komuyu sio koidan potubo tulutiyo ko Mian Bisa namongiasan. ⁷Tukon tubo tulutiyo ko Mian Bisa namongiasan sio koidan inosukupi tukon poseangan doi utus-utus momeeng komanaanggaan. Tukon koikoidan siokai komuseang doi utus-utus momeeng komanganggaan nasinuungi tukon seang motuuk doi sasaibino komian. ⁸Sasaibino doiya daano kai lenggang-lenggang komuyu mo palaluuwo. Kalu do lenggang-lenggangoo daano doikoo tukon lobi-lobian, komuyu naikon teali molole tukon daano kona hasil, tukon tingoniiyo Yesus Klistus nda Temeneno tukon lobian monondok koidan. ⁹Bai mian mo aki namototooli do lenggang-lenggangoo, kona pikilan modipot; yana aki namoola mokita tukon yana tomilinggene baikon kona lalim-lalim mo malumbito lapamo kinumesi.

¹⁰Sabab doiya, Utus-utus, kakaate tuuno sulano ko Mian Bisa naponguang tukon napolilik doi butomudoo teali pololokon moonggol. Kalu komuyu lakukene doiya, komuyu naikon aki pootinggale ko Mian Bisa. ¹¹Tukon bunu doiya komuyu naikon

binee haak tuuno tuuk usok doi Batomundoan mo akiyo kona pupusan moluwedoi Temeneno tukon Yesus Klistus nda Tomundo Pasalamat.

¹²Tobikon doiya, yaku sidutu ingotiikene komuyu koŋangge mobinantil kaliangano, mau kai molapamo toiyo tukon mangangga tuuno doi Mian Bisa naotunggul mo lapamo komuyu talimayo. ¹³Kalu daano yaku motubo, yaku lasayo palaluu moingotiikene komuyu naikon do langge-langgedoo mobinantil. ¹⁴Sabab yaku toiyo baikon aki namalumbit koidan yaku naikon tinggalemo nadunia nia, sabab nda Temeneno Yesus Klistus lapamo popitoikene tukon talaang doi yaku. ¹⁵Maka yaku naikon kakaate sulano kalu yaku matemo, komuyu sidutu neneeke koidan nalangge-langge nia.

Kitayo susuungo ko Klistus nakinabasalan

¹⁶Doi tembo kami popitoikenemo doikoo bulaa kona babasalan konalubatan nda Temeneno Yesus Klistus, kami aki mamaangga salita-salita moaki nabisa banggapi napangakakon. Klistus nakinabasalanoo lapamo kami kitayo tukon matanggami. ¹⁷Kami daano imbali salataa yana inodotii tukon inakabasal doi Tama Mian Bisa. Doi tembodoo tololongol koalalo moluwedoi Mo Babasalkonamodotuiyan, mo bantil doi yana, “Naiyamo daku Pau sineang. Yana sanaanggene konoanggu!” ¹⁸Kami lengele susuunggami do lalodoo molubat luwedoi sulugaa salataa kami daano polaing yana doi bunggul moliyousoo bunggono.

¹⁹Doiyamo kosababpo kami koidan lobian mangangga naikon ko Mian Bisa nateteba nabi-nabi mo pelenggene. Kona monondokan komuyu palahatikanggene do tetebadoo, sabab do tetebadoo bunu posi mo talaang doi lipu mokalipookan, polong doi pana nasumbotan, mandala alani komodoa panano doi noamuyu lalomo. ²⁰Kona tutuuwan siokai komuyu neneeke naiya: Mian Bisa nateteba nabi-nabi napinolonggon aki namoola pinikikon mololoi ndapalaat susuunggita. ²¹Sabab, aki nabiasa koteteba moluwedoi Mian Bisa pinolonggon tongo luwe banggapi namongiasan. Bai ko Mian Bisa Na Loh kuasaiyo komian sulano napelenggene koteteba moluwedoi Mian Bisa susuungo.

Gulu-gulu mokala

2 Doi tembodoo molapa doi antala Mian Bisa namian sumboto konabi-nabi mokala. Bunomo koidan doi antala ikoo naikon sumbot kogulu-gulu mokala. Yanila naikon mongusokon otunggul-otunggul mo aki nabisa mo silakakene komian. Tukon yanila naikon sangkale ko Ponguasa mo lapamo sodiiyo yanila. Tukon buno doiya yanila lubatene kona silakaan doi butongo susuungo, naikon mo tepake yanila tukon mosobit. ²Mau nabuno doiya, madaang komian naikon momoloingi do kokubaidoo tuboan gulu-gulu mokaladoo mo kinuasai luwe noanoila napisuu. Tukon do gulu-guludoo nakokubai naikon kubaiyo badaang komian mototulaiyo ko Loloon Mobisa mo polong doi Mian Bisa. ³Sabab yanila modoko, maka gulu-gulu mokaladoo naikon basalitakene doikoo kosalita-salita yanila mo kalange susuungo sulano namalaat uutung moluwedoi komuyu. Bai kopangadilan tuuk otuwenge koukum doi yanila malumbito kona sinadiakonon, tukon nasinakisaawan mo lapamo tinantukon tuuk yanila modaano totiliyo yanila.

⁴Malaekat-malaekat mo baladosa kai ko Mian Bisa aki nasodiikene tongosobii doi ukuman, bai sinakukon doi nalaka lalomo. Yanila inusokon doi motombing lalomo mo kalipookan tuuk tinaan idoo polong doi Pangadilan Oloyono. ⁵Bunomo koidan tukon dunia doi loolukoo, ko Mian Bisa aki nasodiikene tongosodii luwedoi ukuman. Ko Mian Bisa lubatene kolomba mobabasal doi dunia komian badaang mo lokis doi tembodoo. Tolongo Nuh polong tukon pitu komian bailonggon komo sinalamaton, sabab Nuh pelengene bilita kaliangano tuboan mo konooyo ko Mian Bisa noano. ⁶Pokakana koidan kohallo tukon kota Sodom tukon Gomola: ko Mian Bisa manase do kota-kotadoo tukon aung sulano teali sontoh kaliangano oila naikon komo teali tukon mian badaang mo lokis. ⁷Bai Lot sinalamaton, sabab yana tulutiyo ko Mian Bisa namongiasan; yana mandalita tuuno sabab kokokubai mo aki napokokonoi luwedoi mian badaang molokis. ⁸Doi mian badaang tanga-tangano mobuno doiya Lot mo monondokoo tubo tukon noano sinakisaa, samba kooloyo yana kitayo tukon ndongoliiyo yanila nakokubai-kokubai mo lokis. ⁹Jadi, Temeneno toiyo bulaando

kosalamatanano mian badaang mo loingiyo kona mongiasan kalu yanila masasalaan sobaan-sobaan. Tukon Temeneno toiyo bulaando komangabosan mian badaang mo lokis sulano nasinakisaa doi Pangadilan Oloyono, ¹⁰tongo mian badaang mo loingiyo yanila noano naminoo-mooton mo manggilit tukon mo totulaiyo ko Mian Bisa nakakuasaan.

Bunomo doiya konabalanian tukon nabanggaalan gulu-gulu mokala-kaladoo tobikon yanila aki namata-matakut mototulaiyo komalaekat-malaekat mo kinabasal doi sulugaadoo! ¹¹Baimo kai malaekat-malaekat mo lobian odoon kona bukuanan tukon mobalakuasa doi gulu-gulu mokala-kaladoo, aki natuduwe sasaibino komahluk domo babasaloo tukon bantil-bantilan pototulai doi Temeneno salaano. ¹²Bai doi gulu-guludoo, todudulo tuuno! Yanila bunu iyayon mo sinuung sulano nailako tukon inakate. Yanila aki napikikene, bai tongo tindokiiyo tulutiyo konoano, namongiasan tolong sampe yanila tantange kolangge-langge mo aki mamangalatikene tukon bantil-bantilan totulai. Sabab doiya luwedo napo kokubai-kokubai susuungo, yanila naikon silaka bunu iyayon-iyayon mobalani. ¹³Salaku ukuman doi nasakisaawan mo lapamo yanila tealikene, yanila naikon susa doi sakisaawan. Doi yanila, langge mo sanaanggene konoano doiyamo mokubaiyo oila tolong doi tembo oloyo sulano naakambule kobutongoila naminooton. Kalu yanila osulang polaing-laing komuyu doi lamean kaanan lalomo, yanila nasikap tinoluwekon sabab yanila malangu tukon noano napisuu. ¹⁴Yanila aki napuas-puas kubaiyo kolalim, tukon yanila nainiyas doiyamo kitayo koboine balolowa. Tukon mian mo sodo mangangga tukon moakiyoon tuuno namangangga, yanila pangaluiyo. Konoaila pomanaanggono tukon komodokoan. Yanila daano kai mian-mian mo kinutuk! ¹⁵Sabab yanila aki nayase mololoi loloon mo mloyos, maka yanila tapa. Yanila mangala loloon molinoloi luwe Bileam Beol napau looluk. Bileam nia yase tuuno malaat doy luwedo nakokubai mo lokis. ¹⁶Bai yana malaat poingotii tuuno motuuk doi nakulokisanoo, doitembo kona keledai nabasilinganan tukon banggapi alalo. Maka do nabidoo pinakisaa sulano naatadeo konakokubai mo tindodoo.

¹⁷Do gulu-guludoo mokala daano kai pokakana kopaisu

matano mo motuul tukon buno antong mombuul makansang mo puule. Ko Mian Bisa lapamo sadiayo doi yanila meeng kolipu mo kalipookan tuuno. ¹⁸Yanila kubaiyo kona pangakuan-pangakuan mo monondok tukon akiyo kotakoso komomootan babalolowaan yanila pakeyo sulano naotuwenge ko mian-mian mo sodo tolong tambunan tongosodii moluwedoi pototongian komian mo tubo tapa. ¹⁹Gulu-gulu mokaladoo dondiikene komaladekaan doi mian-mianoo, bai kai yanila susuungo kinubai ata luwedoi kabiasaan-kabiasaan mo lusake kobanggapi. Sabab kalu mian mokinala doi meeng kolangge, maka yana ata moluwedoi mo kalayodoo. ²⁰Mian mo tingoniiyo ko Temeneno tukon Pasalamaton kita Yesus Klistus lapamo tosobii luwedoi kuasa-kuasa dunia mo kulokisanggene kobanggapi. Bai kalu doibundu yana kositak koidan sampe do kuasa-kuasadoo nakalayo, maka mianoo nandondoong doibundu lobian kulokis doi tumbeno. ²¹Lobian kona monondok do mian-mianoo mobuno doiya aki nabiasa tingoniiyo kololoon mokana moluwedoi Mian Bisa, baino kai doi yanila mo tingoniiyomo, bai doibundu aki nayase mololoi kopalenta-palenta Mian Bisa mo beekene doi yanila. ²²Oila komo konapo linakukanggon bukutiikanggene kona tutuuwan nasosombotia, "Asu naikon kaane koidan oila komo lapamo toluwekene," tukon "Babung mo lapamo sinau, naikon abali banggolinggon doi lapetak lalomo."

Paladandian Temeneno nalubatan

3 Utus-utusonggu mo sineang! Naiyamo daku sulat koluano doikoo. Doi sulatia koluano lalomo, yaku kakaate osumbete kopikilan-pikilan mo bilisii doikoo. ²Yaku pelenggene sulano komuyu neneeke naikon kobantil-bantilan looluk Mian Bisa nanabi-nabi nabinantilo, tukon naikon palenta moluwedoi Temeneno, Tomundo Pasalamat, mo pinolonggon doikoo lolo doi lasul-lasul. ³Tumbe-tumbeno, komuyu sio potoiyo baikon doi oloyo-oloyo napupusan, naikon sumbut komian badaang kona tuboan kinuasai tukon noano napisuu yanila susuungo. Yanila naikon sosiboliiyo komuyu ⁴tukon bantil buno naiya, "Temeneno nabantilan mopaladandi naikon lubat! Budodoiya inaando yana? Tama-tamanggita looluk lapamo mate, bai sasaibino daano

pokakana kai buno looluk doi dunia napinasitakaan!” ⁵Yanila sangadaiyo aki nayase mangakukene baikon loolukoo Mian Bisa pasitakayo kotimbu tukon buta tongo nabantilan. Dunia tealikene luwedoi paisu, tukon paisu; ⁶tukon paisu koidan – doiyamo paisu moluwedoi lomba babasal – dunia loolukoo minanaso. ⁷Bai timbu tukon buta mo daano budodoiya nia, do Mian Bisadoo nabantilanoo komo pialayo koidan sulano inakabus tukon aung. Budodoiya kotimbu tukon buta daano piniala polong doi oloyo ko mian-mian mo lokis nainukuman tukon nasinalakaan.

⁸Bai utus-utusonggu, meeng kolangge nia inaikai potomilingene: baikon doi Temeneno napokita, meeng kooloyo aki naposasala tukon soloon kotaum – kolua-lua nia doi yana pokakana. ⁹Temeneno aki natalambat mobeekene oila komo lapamo dandiikene mau nadaano komo aangene buno doiya. Kabalino, yana sabal doikoo, sabab yana aki nayase meeng komian mosilaka. Yana yase sulano sasaibino komian nabadodoloon doi nalalim-lalim.

¹⁰Bai Temeneno nalubatan Oloyono naikon lubat buno pondikuk. Doi Oloyodoo timbu naikon lapus tukon lalo mobabasal, tukon lobo-lobo doi timbu naikon kabus tosua, tukon buta sasaibino mo daano doi lalomoo naikon lapus. ¹¹Sabab sasaibinodoo naikon minanas tukon kokubai mo buno doiya, bulaando kai kona tealian komuyu tubo? Komuyu sio potubo moliyous tukon tongo tuuk doi Mian Bisa. ¹²Namalumbitan kopo totiiliyano tukon poloonganano ko Mian Bisa na Oloyo lubatan. Doi Oloyodoo kotimbu naikon kabus tosua tukon sabab namoonasan, maka kolobo-lobo doi timbu naikon eemo. ¹³Bai kita mototiili oila mo lapamo Mian Bisa dandiikene, doiyamo timbu mo boolu tukon buta mo boolu, idoo talaat kona adilan.

¹⁴Sabab doiya, Utus-utus mo sineang, daano komuyu mototiili do Oloyodoo, kakaate tutuu sulano tubo moliyous tukon akiyo kososiboliino doi Mian Bisa salaano. Tukon pialayo kopotaamian mo monondok tukon Mian Bisa. ¹⁵Poaangene ko Temeneno nasabalan doi kita salaku todanan yana mo beekene doikoo sulano mumoola salamat. Paulus, nda utus

mo sineang, lapamo tulise buno naiya koidan doikoo. Yanila tulise doiya tukon Mian Bisa napandoiyan bineekon doi yana. ¹⁶Doi sasaibino kona sulat lalomo, Paulus sidutu tulise kaliangano langgedoo. Takainomo daano kobubulaa kolangge mo maaling namalaat doi nasulat-sulato lalomo. Tukon obosoo doiya pinaisobolikon doi mian badaang mo aki motoi oioila tukon mo aki namoonggol kona manangaan. Langgedoo aki nainelanggon sabab obos-obosoo bailong moluwedoi Kitab Moliyous yanila ilakukanggene bunomo doiya koidan. Oila konapo ilakukanggonoo tongo tealikene yanila susuungo silaka.

¹⁷Bai komuyu, Utus-utus mo sineang, lapamo toiyo kaliangano langgedoo. Sabab doiya, pobadagai, kai inai napolong komuyu takaikanggi doi mian-mian molokis natapa-tapaan sampe komuyu otuwong doi lipu pobatudangan mo moonggol. ¹⁸Siokai po pololokon lasakanggene Yesus Klistus namaasi, Temeneno tukon nda Tomundo Pasalamat, tukon siokai komuyu koidan pololokon tingoniiyo yana. Tanggaalo kai yana, budodoiya tukon polong sidutu-posidutukon! Amin.

Komai holomat,
Petulus

YOHANES NASULAT KOMEENGO

PANGANTOKON

Yohanes nasulat tumbeno tinulis tukon lua komakisuuto. Komeengo, sulano nabeena podudunggon doi sasaibino mo kobasayo sulano yanila tubo pomeenggon tukon Mian Bisa polong na Pau Yesus Klistus. Koluano, sulano ingotiikene yanila naaki namololoiy otunggul-otunggul mosala mo moola lusayo yanila napomeenggonan tukon Mian Bisa maka Yesus Klistus. Otunggul-otunggul mo saladoo linenggeton doi maanggaan baikon oilamo komo daano kona posumbutian kodunia, osuute komo lokis; jadi Yesus Mian Bisa Napau, aki naminoolakon moteali banggapi. Gulu-gulu mo otunggulkene kootunggul-otunggul mo saladoo bantile baikon sinalamaton koalatino inoluput doi ulusan-ulusan doi dunia nia; yanila mongotunggul koidan baikon kokasalamatan akiyo kona potaamian tukon langge-langge momonondok kai poseangan doi banggapi suwe-suwele.

Pototonggulung tukon otunggul-otungguloo, komo tulise nasulatia lolukenggene tukon tontong baikon Yesus Klistus bisa-bisa lapamo teali banggapi mobisa. Yana pelenggene koidan baikon sasaibino komian mo anggayo Yesus tukon mamaasikene ko Mian Bisa sio koidan naseange komian bailong.

Antoko

Pololukoni 1:1-4

Madialan tukon kalipookan 1:5-2:29

Mian Bisa napau-pau tukon Ibiliis napau-pau 3:1-24

Mo kana tukon mo sala 4:1-6

Palenta sulano meseaseang 4:7-21

Maanggaan mo babayo komanaangan 5:1-21

Bantilan motubo

1 Naiya sulatia antoko doiyamo bantilan mo beena tuboan, doiyamo bantilan mo daanomo salataa doi tumbe. Kami lapamo lengele, tukon kami kitayomo matanggami. Kami lapamo mbalenge, tukon lapamo kami taaniyo limanggami. ²Salataa tuboanoo inokitakonggon, kami kitayomo. Doiyamo kosababpo kami mebee kasaksian motuuk doi yana. Kami basa litakene doi komuyu doi tuboanoo mobisa tukon posidutukon, mo daano polaing Tama, tukon mo lapamo inokitaikon doi kami. ³Oilamo komo lapamo kami kitayo tukon lengele, doiyamo koidan komai binasalitakon doi komuyu, sulano komuyu polaing kami malaing mopikikene kotuboan pomeenggonan tukon Tama tukon na Pau Yesus Klistus. ⁴Kami tulise naiya sulano konoanggita nalaba-laba tuuno.

Mian Bisa daano madialan

⁵Naiyamo kobilita kani mo lengele luwedoi na Pau tukon kami mo pelengene doi komuyu; Mian Bisa madialan, tukon doi yana akiyo kokalipookan. ⁶Kalu kita bantile baikon kita tubo pomeenggon tukon yana, banggokai kita tubo doi kalipookan lalomo, maka kita bakala-kala doi bantil-bantilan mau doi nda kokubai. ⁷Bai kalu kita tubo doi madialan lalomo bunomo lakon ko Mian Bisa daano doi madialan lalomo, maka kita tubo pokokonoi, pomeenggon doi meeng tukon bailong, tukon Yesus sauno, na Pau, kumesiyo doi sasaibino konda lalim.

⁸Kalu kita bantile baikon kita akiyo konda lalim, kita kokoliyo kobutonggita; tukon ko Mian Bisa akiyo doi noanggita lalomo. ⁹Bai kalu kita mangakukene konda lalim-lalim doi Mian Bisa, yana naikon tapaatiyo kona toon tukon kubaiyo oila komo adil. Yana naikon ompuniyo konda lalim-lalim tukon kumesiyo kita doi sasaibino konda kokubai mo sala. ¹⁰Bai kalu kita bantile baikon kita akiyo konda lalim, kita aanggene naikon ko Mian Bisa kala-kala tukon kita aki nda mangabos Mian Bisa nabantilan doi noanggita.

Klistus potombonii kita

2 Kulabuk-labuk! Yaku tulise naiya doi komuyu sulano komuyu inai pomokubai lalim. Bai kalu daano komo mokubai lalim, maka kita daano komeeng konda pombela, doiyamo Yesus Klistus mo adiloo; yana naikon kabiyo kita doi Tama salaano. ²Tukon lolo doi Yesus Klistus doiyamo konda lalim-lalim inompuni. Tukon bolikon tolongo nda lalim-lalim, bai tukon lalim doi sasaibino kobanggapi koidan.

³Kalu kita taat doi Mian Bisa napalenta-palenta, doiya kotandano baikon kita tingoniiyo ko Mian Bisa. ⁴Mian mo bantile, “Yaku tingoniiyo ko Mian Bisa,” bai aki nataat doi Mian Bisa napalenta-palenta, doiya mianoo kala-kala, tukon Mian Bisa akiyo doi noano lalomo. ⁵Bai mian mo taat doi Mian Bisa nabantilan, doiya mianoo mamaasikene ko Mian Bisa tutuuno. Doiyamo kopaloosano baikon kita tubo pomeenggon tukon Mian Bisa. ⁶Indee komiano mobantile yana tubo pomeenggon ko Mian Bisa, yana sio natubo loloiyo Klistus nalenggang.

Palenta mo boolu

⁷Utus-utus mo sineang! Yaku mo tulise naiya bolikon kai meeng kopalenta mo boolu. Naiya palenta momalum-bito mo lapamo pinolonggon doikoo salataa potambuunan momangangga doi Klistus; doiyamo bilita moluwedoi Mian Bisa mo lapamo komuyu lengele loolukoo. ⁸Mau nabuno doiya, palenta yaku mo tulise nia boolu koidan; sabab kona bisaan moola kinita doi Klistus butongo tukon doi butomuyu. Sabab kokalipookan tambuuno lapus tukon madialan mo bisa tambuuno montootilang.

⁹Mian mo bantile baikon yana daano doi madialan lalomo bai doiya mianoo daano mesikitine koutuso, doiya mianoo daano doi kalipookan lalomo polong budodoiya. ¹⁰Mian mo seseange koutuso, tubo doi madialan tobikon akiyo kolangge meeng doi yana naikon mokubaiyo mangaanikene mian bailong otuwong doi lalim lalomo. ¹¹Bai komian mo mesikitene koutuso, daano doi kalipookan. Yana ampakon doi kalipookan lalomo,

tukon aki natoiyoyo inaando kona tausan, sabab do kalipookanoo tealikene yana aki namoola monggita.

¹²Yaku batulis doikoo, Labuk-labuk, sabab kopoo lalim Klistus ompuniyomo. ¹³Yaku batulis doi komuyu, Tama-tama, sabab komuyu tingoniiyo yana mo lapamo daano salataa doi tumbe-tumbeno. Yaku batulis doi komuyu, Kotabo-tabo, sabab komuyu lapamo lungguiyo ko Ibiliis.

¹⁴Yaku batulis doi komuyu, Labuk-labuk, sabab komuyu tingoniiyo ko Mian Bisa Tama. Yaku batulis doi komuyu, Tama-tama, sabab komuyu tingoniiyo ko Bantilan mo tausono daano salataa doi tumbe-tumbeno. Yaku batulis doi komuyu, Tabo-tabo, sabab komuyu bukuan. Mian Bisa nabantilan daano doi noamu lalomo, tukon komuyu lapamo lungguiyo ko Ibiliis.

¹⁵Inai poseange nadunia nia, kabai oilamo komo daano doi dunia lalomo. Kalu komuyu seange kodunia, komuyu akipo seang Tama. ¹⁶Sasaibino kolobo mo daano doi dunia nia lalomo - mo minooton doi banggapi nalenggang mo baladosa, mo kinita maka minoomoti tukon mo bina-banggaakon - sasaibino doiya langge-langge mo aki naluwe doi Tama, bai tolono luwedoi dunia. ¹⁷Dunia tukon sasaibino kolobo doi lalomo banggapi mo mootiyo, sodo nalapus. Bai mian mo loloiyo ko Mian Bisa namongiasan, tataap tubo polong sidutu-posidutukon.

Klistus na Musu

¹⁸Kulabuk-labuk, dunia napupusan loolanimo! Lapamo pinailukon doi komuyu loolukonoo baikon Klistus na Musu naikon lubat; tukon budodoiya lubato badaang komian mo musuiyo Klistus. Doiya kopaloosano baikon kodunia napupusan loolanimo. ¹⁹Klistus namusu-musudoo doiyamo mian-mian mo lapamo tinggale kita, sabab yanila kona bisaan tuuno bolikon nda mian. Kalu yanila nda mian, tantu yanila tataap polaing-laing kita. Bai yanila tinggale kita, sulano natontong tuuno baikon akiyo komeeng komian moluwedoi yanila mo bisa-bisa tongusokon doi nda agama.

²⁰Bai komuyu lapamo mantalima Mian Bisa Na Loh Yesus Klistus mo kundongiikene komuyu tukon doiyamo kosababpo komuyu sasaibino toiyo kootunggul mo bisa. ²¹Jadi yaku tulise naiya doikoo bolikon kai komuyu akiyoon potingoniiyo kootunggul mo bisa, bai tobikon komuyu lapamo tingoniiyo,

tukon komuyu koidan toiyo baikon akiyo kokala doi otungguloo mo bisa lalomo.

²²Komo bakala-kala doiyamo mian mo bantile baikon Yesus bolikon Tomundo Pasalamat Mian Bisa mo paladandikene.

Mianoo Klistus na Musu; yana aki naakuiyo Tama mau na Pau.

²³Mian mo aki naakuiyo Pau, koalatio aki natalimayo Tama koidan. Tukon mian mo akuiyo ko Pau, koalatio talimayo Tama koidan.

²⁴Sabab doiya, bilita komuyu mo lapamo lengele salataa komuyu tumbe-tumbeno manaangga siokai podagaiyo mono-monodok doi noamuyu. Kalu do bilitadoo komuyu palatikang-gene mono-monodok, komuyu sidutu tubo pomeenggon tukon Pau maka Tama. ²⁵Tukon naiyamodoo Klistus nadinondiikon doi kita: tuboan mobisa tukon posidutukon.

²⁶Yaku tulise naiya doikoo doi mian-mian kaliangano mo kakaate kokoliyo komuyu. ²⁷Bai kokaliangano doi komuyu, Klistus lapamo kundongiikene kona Loh doikoo. Tukon kalu kona Lohdoo daanoon doikoo, aki napalaluu nadaano komian bailong mootunggule komuyu. Sabab kona Loh otunggule komuyu sasaibino kolangge kaliangano; tukon oila kona inotunggukonoo doiya bisa, aki nakala. Tobikon doiya, siokai komuyu molole doi oila do Lohdoo nainotunggulkon, tukon siokai komuyu potataap tubo pomeenggon tukon Klistus.

²⁸Jadi, daku labuk-labuk, potataap tubo pomeenggon tukon Klistus, sulano kalu tembo yana lubat, kita mangadap doi yana tukon balani, tukon aki nda sapit sabab mammaa. ²⁹Komuyu toiyomo baikon Klistus tubo loloiyo ko Mian Bisa namongiasan. Tobikon doiya komuyu sio potoiyo koidan baikon memeeng komian mo tubo loloiyo ko Mian Bisa namongiasan doiya Mian Bisa napau.

Mian Bisa napau-pau

3 Pokitayo bulaando ko Mian Bisa naseangano kita, tobikon kita inakui bunu napau-pau. Tukon takainomo kita daano Mian Bisa napau-pau. Doiyamo kosababpo dunia nia mo lokis aki natingoniiyo kita, sabab dunia aki natingoniiyo ko Mian

Bisa. ²Utus-utus mo sineang! Kita budodoiya daano Mian Bisa napau-pau, bai konda ndondoong akiyoon natontong. Mau nda toiyomo baikon kalu Klistus lubat, kita naikon teali bunu yana, sabab kita naikon kitayo yana doi nandondoong mo bisa tuuno. ³Sasaibino komian mo daano kona moinian nia motuuk doi Klistus, dagaiyo kobutongo sulano namoliyous tuuno, bilisii doi lalim bunomo lakon Klistus moliyous koidan.

⁴Komian mo mongkubai lalim, lupaiyo ko Mian Bisa naukum; sabab kolalim doiya meeng kolumbaiyano motuuk doi Mian Bisa naukum. ⁵Komuyu toiyo baikon Klistus lubat sulano naapuse kobanggapi nalalim, tukon baikon akiyono kona lalim doi butongo. ⁶Sasaibino komian mo tubo pomeenggon tukon Klistus, aki nabangga-banggadudul mongkubai lalim. Komian mo bangga-banggadudul mongkubai lalim, aki namokita Klistus kabai natingoniyo.

⁷Daku pau-pau, inai mosodiiyo mau indee miano komo atapayo komuyu. Mian mo kubaiyo ko Mian Bisa namongiasan doiya Mian Bisa napau bunomo Klistus Mian Bisa Napau. ⁸Bai komian mo bangga-banggadudul kubaiyo kolalim doiya Ibiliis napau, sabab Ibiliis baladosa salataa doi tumbeno. Tuuk naiyamo kona ko Mian Bisa Napau lubat, doiyamo sulano namanase ko Ibiliis nalimang.

⁹Mian mo lapamo teali Mian Bisa Napau, aki nabangga-banggadudul mongkubai lalim, sabab ko Mian Bisa nasifat susuungo daano doi yana. Tukon do sabab Mian Bisadoo Tamano, maka yana aki momoola bangga-banggadudul mongkubai lalim. ¹⁰Naiyamo kona posasalaan ko Mian Bisa napau-pau tukon Ibiliis napau-pau; indee komiano komo aki nakubaiyo ko Mian Bisa namongiasan, kabai aki naseseange koutuso, yana bolikon Mian Bisa napau.

Pomaasikonan meeng tukon bailong

¹¹Salataa doi tumbe lapamo pinolonggon naiya bilita nia doikoo: Kita sio ndaposeang meeng tukon bailong. ¹²Inaikai nda bunu Kain, mo teali Ibiliis napau tukon akateyo koutuso susuungo. Oila kosababpo Kain moakateyo koutuso? Sabab

kolangge-langge yana mo kubaiyo doiya sala, bai kolangge-langge utuso mo kubaiyo doiya kana.

¹³Tobikon doiya, Utus-utusonggu, inai pomasaingding kalu ko mian-mian nai dunia nia mosikitene komuyu. ¹⁴Kita toiyo baikon kita tobuato doi matean, tukon biyolo doi tuboan. Kita toiyo doiya, sabab kita mamaasikene sasaibino koutusonggita. Mian mo aki nameaseang, koalantino daano matean mokuasaiyo. ¹⁵Mian mo mesikitene kokoutuso doiya pangakate, tukon komuyu toiyo baikon meeng komian momangakate aki namalaat tuboan mobisa tukon posidutukon. ¹⁶Tukon naiyamo kololoono kita moola toiyo koseangano kotulanggita: Klistus lapamo salakanggene kona tuboan tuuk doi kita. Tobikon doiya, kita koidan sio nda salakanggene konda tuboan tuuk doi utus-utusonggita! ¹⁷Kalu meeng komian mo lobian kona langge nakitayo koutuso moakiyo kona langge, bai aki nayase tulungiyo do utusodoo, bulaando do mianoo namoola bantile naikon yana seange ko Mian Bisa? ¹⁸Daku labuk-labuk! Inaikai nda tolongo meseang tukon babanggita kabai tolongo tukon bantilan. Siokai kita nda meseang tukon seang mo bisa, kita mookitakene tukon nda kokubai.

Kabalanikonan doi Mian Bisa salaano

¹⁹Bunomo doiya kai kokokubaino kita motoiyo baikon kita tongusokon Mian Bisa napau-pau mo bisa, tukon konoanggita tanaang doi Mian Bisa salaano. ²⁰Kita toiyo, baikon kalu konoanggita asalakene kita, ko Mian Bisa napotoi lobian babasal tukon noanggita napotoi, tukon baikon yana toiyo sasaibino. ²¹Jadi, Utus-utusonggu mo kinilakon, kalu konoanggita aki naasaleke kita, kita moola mangadap doi Mian Bisa tukon kakabalani. ²²Tukon oila komo kita kabiyo doi yana, kita malaat, sabab kita taat doi napalenta-palenta tukon lakukene oila komo sanaangene konoano. ²³Komo yana palentakene doi kita doiyamo: Kita sio nda anggayo kona Pau, doiyamo Yesus Klistus, tukon kita sio nda pomaasikon, pokakana Yesus Klistus mo lapamo palentakene doi kita. ²⁴Sasaibino komian mo taat doi Mian Bisa napalenta-palenta tubo pomeenggon tukon Mian Bisa, tukon ko Mian Bisa pomeenggon tukon yanila. Kita toiyo baikon

ko Mian Bisa tubo pomeenggon tukon kita, sabab yana lapamo beekene kona Loh doi kita.

Loh mobisa tukon loh motapa

4 Utus-utus mo kinilakon! Inaikai poanggayo doi sasaibino komian mo akuiyo daano ko Mian Bisa Na Loh, bai poujiyo loolukon yanila sulano potoiyo oilakai dolohdoo mo daano doi yanila luwedoi Mian Bisa kai aki. Sabab badaang konabi mokala mosasabulo doi yayaa. ²Buno naiya kona tealian komuyu toiyo oilakai doiya Mian Bisa Na Loh kai bolikon: Mian mo akuiyo baikon Yesus Klistus lubat doi dunia buno banggapi, doiya mianoo daano ko Loh mo lubat luwedoi Mian Bisa. ³Bai doi mian mo aki naakuiyo naiya langge nia kaliangano doi Yesus, aki nadaano ko Mian Bisa Na Loh. Mianoo daano koloh moluwedoi Klistus na Musu. Utus lapamo molongol baikon do lohdoon naikon lubat, tukon budodoiyo yana daanomo doi dunia nia.

⁴Bai daku labuk-labuk, komuyu Mian Bisa namian. Komuyu lapamo lungguiyo konabi-nabi mokala-kala, sabab ko Loh mo daano doikoo lobian babasal kona kuasa tukon doi loh mo daano doi dunia nia namian. ⁵Nabi-nabi mokala-kaladoo basalitakene kolangge-langge kaliangano doi dunia nia, tukon dunia nia lengele yanila nabantilan, sabab yanila dunia namian. ⁶Bai kita daano Mian Bisa napau-pau; tukon mian mo tingoniiyo ko Mian Bisa, lengele konda bantilan. Mian mo bolikon Mian Bisa namian, aki namolongol nda bantilan. Bunomo doiya kona tealian kita momoola toiyo kona posasalaan ko Loh mo beena otunggul mo kana, tukon loh mo mangatapa.

Mian Bisadoo maasi naluwean

⁷Utus-utus mo kinilakon! Maimo kita nda poseang meeng tukon bailong, sabab koseang luwedoi Mian Bisa. Mian mo meseseang, doiya Mian Bisa napau tukon yana toiyo ko Mian Bisa. ⁸Mian mo aki nameseang aki natingoniiyo ko Mian Bisa; sabab ko Mian Bisa doiyamo komaasi naluwean. ⁹Mian Bisa okitakene baikon yana seseange kita tukon bintekene kona Pau momeeng doi dunia nia lalomo sulano kita malaat tuboan

luwedoi na Paudoo. ¹⁰Naiyamo do maasidoo: Bolikon kita komo lapamo mamaasikene ko Mian Bisa, bai Mian Bisa komo mamaasikene kita tukon bintekene kona Pau sulano luwedoi yana kita malaat potolos doi nda lalim-lalim.

¹¹Utus-utus mo kinilakon, kalu ko Mian Bisa bunomo doiya kona seangano kita, mau kita koidan sio nda pomamaasikon meeng tukon bailong. ¹²Akiyo komeeng komian mo sidutu kitayo ko Mian Bisa, bai kalu kita pomamaasikon, Mian Bisa pomeenggon tukon kita tukon kona maasi teali talakana tuuno doi butonggita.

¹³Tobikon doiya ko Mian Bisa lapamo beekene doi kita kona Loh, maka kita toiyo baikon kita lapamo tubo pomeenggon tukon Mian Bisa, tukon ko Mian Bisa tubo pomeenggon kita. ¹⁴Kami lapamo kitayo ko Mian Bisa Napau, tukon kami babilitakene baikon yana Tamano sumboliiyo sulano nateali Tomundo Pasalamat naiya dunia nia. ¹⁵Indee komiano moakuiyo baikon Yesusoo Mian Bisa Napau, ko Mian Bisa tubo pomeenggon doiya mianoo, tukon do mianoo koidan tubo pomeenggon tukon Mian Bisa. ¹⁶Kita susuunggita toiyo tukon anggayo ko Mian Bisa namaasi doi kita.

Do Mian Bisadoo maasi naluwean. Mian kona tuboan mo kinuasai maasi, mianoo pomeenggon tukon Mian Bisa, tukon Mian Bisa pomeenggon tukon yana. ¹⁷Maasi tinealikon monondok doi butonggita lalomo, sulano kita nda malaat kabalanian doi Pangadilan Oloyono. Kita naikon malaat kabalanian sabab konda tuboan doi dunia nia buno pokakana Klistus natuboan. ¹⁸Mian mo lasaiyo ko Mian Bisa namaasi, aki natoiyoy komatakutan; sabab komaasi mo talakana alapuse sasaibino kopalasaan matakutan. Jadi totingonii baikon kalu komian akiyoon nalasayo ko Mian Bisa namaasi motalakana kalu doiya mianoo matakut mosasalaane ko Oloyo Pangadilan.

¹⁹Kita meseseang, sabab ko Mian Bisa lapamo seange tumbe kita. ²⁰Kalu meeng komian bantile, "Yaku seseange ko Mian Bisa," bai yana aki naseange koutuso, doiya mianoo kala-kala. Sabab mian mo aki naseange koutuso mo kitayo, aki naminoolakon Mian Bisa moseseange mo aki nakitayo. ²¹Tobikon doiya, naiyamo kopalenta Klistus mo beekene

doi kita: Indee komiano momamaasikene ko Mian Bisa sio namamaasikene koutuso koidan.

Nda manaangan luwedoi dunia

5 Mian mo anggayo baikon Yesus yana Tomundo Pasalamat Mian Bisa mo paladandikene, do mianoo daano Mian Bisa napau. Mian mo seseange kotamano, seange koidan kona paudoo. ²Tukon naiyamo kololoono kita toiyomo baikon seseange ko Mian Bisa napau-pau: Kita mamaasikene ko Mian Bisa tukon taat doi napalenta-palenta. ³Sabab, seangano ko Mian Bisa koalatino taat doi napalenta-palenta. Tukon kona palenta-palenta aki namotoong doi kita, ⁴sabab doi memeeng ko Mian Bisa napau moola lungguiyo nadunia nia mo lokis. Tukon kita lungguiyo nadunia nia tongo nda manaanggaan. ⁵Indee komiano komo moola lungguiyo nadunia nia? Tolongo mian mo anggayo baikon Yesus doiya Mian Bisa Napau.

Basakisiian kaliangano Yesus Klistus

⁶Yesus Klistus komo lubat doi dunia tukon paisu namansauan salani tukon kai sau moluwedoi namatean. Yana lubat aki natolongo paisu tolong, bai tukon paisu maka sau. Tukon Mian Bisa Na Loh susuungo beena katalangan baikon doiya bisa, sabab ko Loh aki nabiasa kala-kala. ⁷⁻⁸Daano kotolu kosakisii: Mian Bisa Na Loh, paisu tukon sau – kotolu-toluno mebee kasaksian mo pokakana. ⁹Kita anggayo nakasaksian doi kobanggapi, bai ko Mian Bisa nakasaksian lobian kona tutuuwan koidan. Tukon doiyamo kokasaksian Mian Bisa mo lapamo beekene doi na Pau. ¹⁰Tobikon doiya, mian mo mangangga doi Mian Bisa Napau, lapamo talimayo do kasaksianoo doi noano lalomo; bai mian mo aki naanggayo ko Mian Bisa, yana aangganemo naikon ko Mian Bisa kala-kala, sabab yana aki naanggayo oila ko Mian Bisa nabinantil motuuk doi na Paudoo. ¹¹Naiyamo do kasaksianoo: Mian Bisa lapamo beekene doi kita kotuboan mobisa tukon posidutukon, tukon kona Pau doiyamo kotuboan uuno. ¹²Mian mo bakoonggukene anggayo ko Mian Bisa Napau, bakoonggukene do tuboanoo; tukon mian mo aki bakoonggukene yana, aki namalaat do tuboanoo.

Tuboan mobisa tukon posidutukon

¹³Yaku batulis doi komuyu mo mangangga doi Mian Bisa Napau, sulano komuyu potoiyo baikon komuyu malaato tuboan mobisa tukon posidutukon. ¹⁴Tukon kita balani mangadap doi Mian Bisa, sabab kita anggayo yana talimayo konda sambeang, kalu kita mangkabi oilamo kolobono mo pokokonoi tukon namongiasan. ¹⁵Sabab kita toiyo baikon yana lengele kita kalu kita mangkabi oioila doi yana, maka kita toiyo koidan baikon yana beena doi kita oila konda kinabi doi yana.

¹⁶Kalu komuyu kitayo komeeng kotulamuyu Salani miano mo kubaiyo kolalim sulano naaki natealikene do mianoo lapus kona tuboan mobisa tukon posidutukon, siokai komuyu posambeang doi Mian Bisa; tukon Mian Bisa naikon beekene do tuboano doi yana. Naiya pokokonoi tukon yanila kona pai lalim mo aki natealikene yanila lapus konapai tuboan. Bai daano kolalim mo mangaanikene do mianoo lapus kona tuboan. Doiyo kokaliangano yaku aki kubantile baikon komuyu sio posambeangene doi Mian Bisa. ¹⁷Sasaibino kokokubai mo sala doiya lalim, bai daano kolalim mo aki nakubaiyo teali lapus komian natuboan mobisa tukon posidutukon.

¹⁸Kita toiyo baikon sasaibino komian mo tealimo Mian Bisa napau-pau, aki nabangga-banggadudul kubaiyo kolalim, sabab ko Mian Bisa Napau totoliyo yana, tukon ko Ibiliis akiyo kona kubaiyano oioila doi yana.

¹⁹Kita toiyo baikon kita Mian Bisa namian, mau kai doi potikunggon kodunia nia Ibiliis kuasaiyomo.

²⁰Kita toiyo baikon ko Mian Bisa Napau lapamo lubat tukon lapamo beena pangalatian doi kita, sulano kita nda toiyo ko Mian Bisa mo bisa. Kita tubo pomeenggon tukon Mian Bisa mo bisa tukon tubo pomeenggon kona Pau Yesus Klistus. Naiyamo ko Mian Bisa mo bisa, tukon naiyamo kotuboan mobisa tukon posidutukon.

²¹Daku labuk-labuk, dedeenggene kobutomu doi bapilogotan!

YOHANES NASULAT KOLUANO

PANGANTOKON

Yohanes nasulat koluano nia “katua jemaat” komo tulise tuuk doi “Tina Mian Bisa mo piliyo” tukon doi napau-pau mo sineang. Ugaate komo minakisuuti tukon “Tina tukon napau-pau” doiyamo meeng kojemaat tukon anggota-anggotano.

Doi nasulatia mo palus komo tulise naiya sulatia mangkabi lua kolangge doi mian mobasayo. Komeengo, sulano yanila naposeseang meeng tukon bailong. Koluano, sulano yanila nabadagai doi gulu-gulu mokala-kala tukon dona otunggul-otungguloo.

Antoko

Pololukoni 1-3

Seang napalaluuwan 4-6

Poingotii doi otunggul mo sala 7-11

Potutupo 12-13

¹Doi Tinano Mian Bisa mo lilikemo, tukon doi pau-pau tinano. Sulatia luwedei yaku, katua jemaat mo bisa-bisa seange komuyu. Bolikon tolongo yaku, bai sasaibino komian mo tingoniiyo ko Mian Bisa mo bisa, seange komuyu koidan. ²Sabab Mian Bisa dungol doi noanggita lalomo, tukon naikon sidutu daano tukon kita sidutu-posidutukon.

³Boliisi kita nda binee balakaat, maasi tukon monondokan doi Mian Bisa Tama, tukon doi Yesus Klistus Tama na Paudoo. Boliisi sasaibino doiya kita laate tukon noa mo moliyous tukon koidan naseang.

Nabisaan tukon seang

⁴Yaku laba tuuno baikon daano kopau-pau tinano mo tubo loloiyo ko Mian Bisa naotunggul, bunu mo lapamo Mian Bisa Tama palentakene doi kita. ⁵Tobikon doiya, Tina, yaku kabiyo tuuno sulano kita sasaibino nda poseseang. Komo yaku loolukene nia bolikon kai meeng kopalenta mo boolu; palenta nia lapamo bineekon doi kita salataa doi nda tambuunan mangangga. ⁶Poseangan koalantino tubo loloiyo ko Mian Bisa napalenta. Tukon palentadoo komuyu mo lapamo lengele salataa doi tumbe doiyamo baikon komuyu sio potubo tukon seseange meeng tukon bailong.

⁷Badaang kopangakakon mosasabulo doi posaapon kodunia. Yanila daanokai mian-mian mo aki naanggayo baikon Yesus Klistus lubat doi dunia pokakana bunu meeng kobanggapi. Mian mopokakana doiya daano meeng kopangakakon tukon Klistus na Musu. ⁸Tobikon doiya, podagaiyo inai nateali lapus doi komuyu oila komo lapamo kami usahakanggene motuuk doi komuyu. Pousahakanggene sulano potalimayo kopatambo sasaibino luwedo Mian Bisa.

⁹Mian mo aki nabataani doi Klistus naotunggul, bai tolongo isa doi oilamo Klistus nainotunggukon, doiya mianoo akiyo kona Mian Bisa. Mian mo tataap loingiyo doi Klistus naotunggul, koalantino daano ko Mian Bisa Tama mau Napau. ¹⁰Tobikon doiya, kalu daano komian molubat tukon pailukene doi komuyu kootunggul Klistus mo aki naotunggulkene, inai potalimayo doiya mianoo doi pobonua lalomo kai beena pongodotii doi yana. ¹¹Sabab komian mo mebee pongodotii doi mianoo mo bunu doiya tulut koidan bunu mianoo mo kubaiyo kokokubai mo lokis.

Bantil-bantilan potutupo

¹²Badaang tuuno komo palaluu yaku pailukene doikoo, bai kupikikene lobian monondok inai natolongo sulat. Yaku moinikene sulano namoola kulubat tukon pobasalitai doi komuyu, sulano konoanggita laba-laba tuuno.

¹³Pau-pau moluwedo utus boine Tinano Mian Bisa molilike koidan makapatu pongodotii doi Tina.

YOHANES NASULAT KOTOLUNO

PANGANTOKON

Yohanes nasulatia kotoluno tinulis doi meeng “kokatud jemaat” doi meeng kopomuka jemaat kosambuno Gayus. Komo tulise naiya sulatia nggaale Gayus sabab nabantuan doi Salani miano bailong. Yana koidan ingotiikene Gayus doi meeng komalane kosambuno Diotlefes.

Antoko

Pololukoni 1-4

Gayus ngginaal 5-8

Diotlefes inasalakon 9-10

Demetlius ngginaal 11-12

Potutupo 13-15

¹Utus Gayus mo sineang!

Yaku, katua jemaat, mo bisa-bisa seange ikoo, ²sambeang boliisi Utus nasehat-sehat tukon sasaibino mono-monondok tukon ikoo buno pokakana komu jiwa daano momono-monondok. ³Yaku sanaang tuuno sambuno moimoiya koutus Salani miano lubat tukon popitoikene doi yaku bulaando komu satiaan doi Mian Bisa mo bisa, sabab memang Utus sidutu tubo tulutio ko Mian Bisa naotunggul. ⁴Akiyo komo moola tealikene yaku sanaang tuuno, luwedo molongol baikon daku labuk-labuk tubo tulutio ko Mian Bisa naotunggul.

Gayus ngginaal

⁵Utusonggu! Utus bunomo doiya komu satiaan doi limang lalomo Utus mo lapamo kubaiyo doi tula-tulanggita Salani

miano; mau koidan doi Salani Utus mo akiyoon natingoniiyo, bai Utus leleaniyomo. ⁶Yanila lapamo popitoikene doi jemaat dombai lipu tentang domu seango. Tulungiyo yanila sulano namoola yanila banggadudulkene kona poampakonan tukon kalu bunu doiya sanaang ko Mian Bisa noano, ⁷sabab doi ampakonon lalomo tuuk moleleaniyo ko Klistus, yanila aki namantalima oila kobatuanoo doi mian-mian mo aki natoiiyo ko Mian Bisa. ⁸Tobikon doiya, kita Salani miano sio nda tulungiyo kotula-tulanggita Salani miano mo bunu doiya, sulano nda moola malaing yanila doi usahadoo lalomo moampakonggene kootunggul moluwedoi Mian Bisa.

Diotlefes tukon Demetlius

⁹Yaku lapamo motulis surat mo palus doi jemaat, bai Diotlefes mo yase teali katua doi jemaat, aki nayase loingiyo yaku. ¹⁰Siokai kulubato, maka kubeasene sasaibino kolangge yana mo lakukenemo, doiyamo tentang langge-langge molokis tukon kala-kalaan yana mo bantile tentang doi kami! Bai sasaibino doiya akiyoon nasukup komo tuuk doi yana. Singgatooodoo tula-tulanggita Salani miano nalubatan, yana aki nayase talimayo yanila. Bai tolono yana pantane komian mo talimayo donda utus-utusoo, tukon yana tolono sumboliiyo dopai mian-mianoo nadampas doi jemaat!

¹¹Utus yaku mo seange, inai pomoloingikon oila komo lokis. Poloingiyo komo monondok. Mian mo mokubai monondokan daano kai Mian Bisa namian. Tukon mian mokubaiyo lokis akiyoon natingoniiyo ko Mian Bisa.

¹²Sasaibino komian nggaale Demetlius. Mau koidan ko Mian Bisa nggaale yana. Kami koidan nggaale yana tukon Utus bai toiyo baikon oila komai pinolonggon moola nainangga.

Pongodotii surat potupo

¹³Badaang tuuno komo palaluu yaku bantile doikoo, bai yaku lasayo lobian monondok kalu aki natolono surat.

¹⁴Yaku moinikene akimo namalumbit koidan kita pososungo, tukon kita tuluusene konda salita.

¹⁵Boliisi ko Temeneno nabalakaatiyo Utus.

Kotula-tulamu doi kulipu nia makapatu pongodotii doikoo. Pelengene daku pongodotii doi sasaibino kotula-tulanggita meeng tukon meeng.

YUDAS NASULAT

PANGANTOKON

Yudas nasulatia tinulis tuuk poingotiikon doi mobasayo sulano nabaingotii doi gulu-gulu mokala-kala mo bantile kobutongo Salani. Doi sulatia mo palus lalomo, koantoko buno Petulus nasulat koluano, komo tulise beena otunggul doi mobasayo sulano momeenggon napokatate tuuk maanggaan.

Antoko

Pololukoni 1-2

Sipat, otunggul tukon gulu-gulu mokala-kala nanasib 3-16

Otinawo sulano tataap maangga 17-23

Sambeang nggaalano 24-25

¹Utus-utus mo lapamo inuang tukon Mian Bisa Tama nasineang tuuno, tukon modinagai tuuk Yesus Klistus. Salaku Yesus Klistus napeleleani, yaku, - Yudas - Yakobus utuso, ²moinikene:

Boliisi ko Mian Bisa nabeena balakaat, maasi tukon namondokan doikoo tukon nalobi-lobianan.

Gulu-gulu mokala

³Utus-utus mo sineang! Daku makisuut tutuu motulis kosulat doikoo kokasalamatan kaliangano kita toupuyomo singgat-singgat. Bai budodoiya yaku lasayo buno sinumbolii sulano otinawo komuyu tukon sulatia sulano komuyu pobagadudul kakate tuuk manganggaan mo lapamo idan ko Mian Bisa nabeekene tuuk sidutu-posidutukon doi namian. ⁴Sabab aki

nda sadaliyo, daano ko mian-mian motantu kokulaing usok doi kita tanga-tangano. Yanila mian-mian molokis mo bakalalakakene bilita kaliangano ko Mian Bisa namaasi doi kita, sulano namalaat todanan sabukene kona pai noanoila napisuu. Tukon yanila tolake Yesus Klistus, komemeengo Balakuasa tukon nda Temeneno. Doi loolukoo ukuman tuuk doi yanila lapamo pinopitoikon doi Kitab Moliyous lalomo.

⁵Sasaibino lapamo komuyu toiyo. Bai yaku yase ingotiikene komuyu bulaando ko Temeneno nasalamatanano ko Israel miano kaliangano moluwedoi tano Mesil, bai doibundu lopue ko mian-mian mo aki namangangga doi antala yanila. ⁶Neneeke koidan komalaekat mo liisiyo kosipat yanila nabalakuasaan, tobikon taus tinggale yanila nalipu dungolan. Ko Mian Bisa boboiyo do malaekat-malaekato tukon lante moaki nabontol-bontol, doi lipu mokalipookan doi buta lalomo. Ido yanila tinaan banggadudul polong yanila kinonoi ukuman doi Oloyo mo hebat tuuno. ⁷Neneeke koidan kota Sodom tukon Gomola tukon kota-kota potikunggon, kotumbuno kubaiyo kolangge-langge buno malaekat-malaekato nakinubai. Yanila kubaiyo kolangge-langge balolowaan tukon molokis, tobikon yanila sinakisaa tukon inukum aung mo akiyo kona posoan, sulano tinealikon poingotii doi sasaibino komian.

⁸Bunomo koidan do mian-mianoo dongo-dongolo polong yanila kubaiyo kolalim doi yanila butongo susuungo. Yanila kitayo ko Mian Bisa nakakuasaan lendah tukon totulaiyo sasaibino komahluk monondok doi sulugaa. ⁹Mikhael susuungo, mo kapalaiyo komalaekat-malaekat, aki nabiasa mokubai buno doiya. Doi tembo yana pogagai tukon Ibiliis doi ponggimakonan lalomo tentang indeemo naikon komo laate Musa badano, Mikhael aki nabalani hakimiyo Ibiliis tukon bantil-bantilan totulai. Mikhael tongo bantil, “Temeneno naikon odinggayo ikoo!” ¹⁰Bai tukon totulai-totulai, do mian-mianoo lobosio sasaibino kolobo mo aki napo alatio. Yanila pokakana buno iyayon-iyayon mo akiyo kona pikilan, mo toiyo kolangge-langge tukon namotoiyan. Bai tongo doiya langge-langgedoo kubaiyo yanila silaka. ¹¹Silakamo yanila! Yanila lapamo loloiyo Kain naloloon. Sulano namalaat doy, yanila usekene kobutongoila

doi susaan lalomo pokakana buno Bileam. Tukon yaniladoo minanaso sabab nggimal buno Kolah. ¹²Doi tembodoo komuyu kubaiyo kolamean kaanan, mian-mianoo nasikap manguanikene toluwe doi antala komuyu. Sabab yanila kaan tukon modoko aki namamaa, tukon tongo utamakene kobutongo susuungo. Yanila buno bunong mbombuul mo puule, bai aki nalubatene koudan. Yanila koidan buno kayung mo akiyo kosaono mau kai doi tembo kayung nasao-saowan; kayung-kayung mo lapamo kinubut koanggolo tukon matemo tuuno. ¹³Pokakana buno bokol mo makansang doi tobun, mobukal bunomo koidan yanila mobukal-bukal kokubai-kokubai mo minamaakon. Yanila buno bituon-bituon pauno mo tasabul tukon mo lapamo Mian Bisa sadiakene kona tangabosan doi kalipookan lalomo mo kulokis tuuno sidutu-posidutukon.

¹⁴Henokh, Adam natulunan kopituno, looluk biasa popitoikene do mian-mianoo kaliangano. Henokh bantile, “Kitayo, Temeneno naikon lubat tukon doi lobo-loboomo kona malaekat moliyous ¹⁵tuuk hakimiyo sasaibino komian. Temeneno naikon ukume sasaibino ko mian-mian molokis sabab yanila nakokubai-kokubai mo kulokis. Tukon yana naikon ukume komian mokubaiyo kolalim tukon palalental sabab sasaibino kona pobinantil pototulai.”

¹⁶Mian-mianoo sidutu nggimal-nggimal tukon asalakene komian bailong. Yanila tubo tulutiyo kona pomongiasan mo baladosa. Yanila babanggaalkene kobutongo susuungo tukon akakene komian sulano namalaat kauntungan.

Poingotii tukon otinau

¹⁷Bai Utus-utusonggu mo sineang, neneeke naikon oila loolukoo nda Temeneno Yesus Klistus nalasul-lasul nabinantil. ¹⁸Yanila loolukonoo bontiikene doikoo baikon naloolanian kolonu napupusan naikon sumbot ko mian-mian mo sosiboliyo komuyu, doiyamo mian-mianoo mo tubo tulutiyo kona pomongiasan mo baladosa. ¹⁹Yanila naiyamo ko mian-mian badaang mo sumbetene kopooalaasan. Yanila aki nakinuasai Mian Bisa Na Loh, bai dunia nia nandondoong kona minoo-minooton. ²⁰Bai komuyu, Utus-utusonggu, didike banggadudul komu tuboan lengget doi mumangaan doi Yesus Klistus. Do

mumaangganoo moliyous tuuno. Sambeang loolukon tukon Mian Bisa Na Loh nakuasa, ²¹tukon potubomo sidutu doi Mian Bisa naseang lalomo doi nadaanoan komuyu mototiili nda Mian Bisa Yesus Klistus namaasi, naikon mo bineekon doikoo tuboan mobisa tukon posidutukon.

²²Doi mian-mian malagu-lagu konoano, siokai komuyu tudoikene koposeangan. ²³Kibute komian natabuat doi aung lalomo tuuk salamatene yanila. Doi mian-mian bailong siokai komuyu tudoikene koposeangan polainggene kopalasaan matakut, bai mosikitene kai tukon yanila napakean mo lapamo kinonggiliti tukon yanila namongiasan mo baladosa.

Sambeang panggaal

²⁴Mian Bisa komo moola madagai sulano komuyu akipo tuwong, tukon mo moola babayo ikoo doi nakakuasaan mo babasal tukon nasanaangan moakiyo kososiboliino, ²⁵yanamo ko Mian Bisa momeeng, Pasalamaton kita mololoi doi Yesus Klistus nda Temeneno. Yanamo ko Mian Bisa mo monondok, babasal, balakuasa tukon inangga doi loolukoo polong budodoiya tukon tuuk sidutu-posidutukon! Amin.

MOKITAKON DOI YOHANES

PANGANTOKON

Mokitakon doi Yohanes nia kona tinulisan singgatooodoo ko Salani mian-mianoo napinipikan tukon nasinakisaawan sabab maangga doi Yesus Klistus salaku Temeneno. Komo tulise namakisuut tuuno doiyamo mebee moinian tukon samangat doi mian momabasa, tukon koidan sulano nadudunggene yanila sulano natataap maangga doi tembo napinipiikan tukon nasinakisaawan.

Buku nia antoko kosoobos mobabasal tokubai doi moimoiya kona potaamian kokokudung natobukaan tukon batokitaan mo linoolukonggon tukon mapake silingan paloosan mo moola tinoiy koalatino doi Salani miamiano doi loonudoo, bai maaling nainalati doi mian-mian bailong. Pokok pikilan mo linoolukonggon doi buku nia lalomo sinula-sulai doi bubulaa kokaliangano mokinubai doi moimoiya kona potaamian kobatokitaan. Mau kai natalaat badaang kona posasalaan kopalaat kaliangano doi popikikon mo temeengi doi buku nia antoko kaliangano, bai kai komaanano doi napikilan tontong, doiyamo baikon lolo doi Klistus, doi napupusan ko Mian Bisa naikon lungguiyo sasaibino kona musu, tousokon ko Ibiliis. Tukon kalu kai do namaangganoo lapamo linaat, Mian Bisa naikon beekene kosulugaa mo boolu tukon dunia mo boolu buno meeng kotambo doi namian mo taat.

Antoko

Pololukoni 1:1-8

Batokitaan natambuunan tukon sulat-sulat doi pitu

kojemaat 1:9-3:22

Buku luluno tukon pitu kosegel 4:1-8:1

Pitu kotolompot 8:2-11:19

Naga tukon lua koiyayon 12:1-13:18

Moimoiya kabatokitaan 14:1-15:8

Pitu kokaliangano ko Mian Bisa nanggimalan 16:1-21

Babel namanasan, iyayon nakalaan, nabi mokala tukon

Ibiliis 17:1-20:10

Ukuman napupusan 20:11-15

Sulugaa boolu, dunia boolu, Yelusalem boolu 21:1-22:5


Potutupo 22:6-21

1 Buku nia antoko oila kokaliangano komo inokitakon doi Yesus Klistus tentang langge-langge naikon mo teali. Mian Bisa bontiikene doi Klistus sulano yana tudoikene doi Mian Bisa napeleleani oila komo sio namosobit nateali. Klistus sumboliyo kona malaekat doi Yohanes, napeleleani, sulano nabontiikene do kadadian-kadadianoo doi yana. ²Maka Yohanes salitayomo sasaibino komo kinitadoo; tukon naiyamo kona lapulan teteba kaliangano luwedoi Mian Bisa komo inokobukuanggon doi Yesus Klistus luwedoi nakasaksian. ³Kinatauwan kai komian komo bacakangene tukon komian komo ndongoliyo kobilita nubuat naiya buku nia tukon taat doi oila komo totulis doi lalomo. Sabab akimo namalumbit koidan sasaibino naiya naikon teali.

Pongodotii doi pitu kojemaat

⁴Utus-utus mo daano doi pitu kojemaat doi lipu Asia! Yaku, Yohanes, moinikene komuyu pobinee balakaat tukon monondokan moluwedoi Mian Bisa – doiyamo yana mo daano, mo lapamo daano, tukon mo daano banggadudul – tukon koidan doi pitu koloh mo daano doi Mian Bisa nabatomundoan salaano, ⁵tukon luwedoi Yesus Klistus, sakisii mo taat. Yanamo kotumbe-tumbeno moinotuboi koidan doi namatean tukon yanamo koponguasa tomundo-tomundo doi dunia nia.

Yesus mamaasikene kita, tukon luwedoi namatean yana sodiiyo kita doi nda lalim-lalim, ⁶tukon tealikene kita meeng kobangsa motangalaas imam-imam mo leleaniyo ko Mian Bisa, Tamano. Yesus Klistus doiyamo komo babasal tukon balakuasa tuuk sidutu-posidutukon. Amin!



Togong Patmos (1:9)

⁷Kitayo, yana lubat polaing kobunong! Sasaibino komian naikon kitayo yana, tongusokon koidan yanila mo lapamo tebeke yana. Sasaibino kobangsa doi dunia naikon kokiil sabab yana. Oode, tantu Amin!

⁸“Yakumo kotumbeno tukon kobunduno,” Temeneno Mian Bisa nabantilan, mo daano, mo lapamo daano, tukon mo daano banggadudul, Komo Babasal Konakuasa.

Pokita tentang Klistus


⁹Yaku Yohanes, utusomu mo pomeenggon nasib tukon komuyu doi sakisaawan lalomo mo tinoupi samba-samba ko Klistus pololaing. Kita sabal sakisaa salaku koonamian. Yaku sinakukon doi togong Patmos sabab yaku ampakonggene koteteba moluwedoi Mian Bisa, komo kinokobukuanggon doi Yesus mololoi doi nakasaksian. ¹⁰Doi Temeneno naoloyo, ko Mian Bisa Na Loh kuasaiyaku, maka yaku lengele kolalo mo

babasal – buno tolompot alalo – basilingan doi tonggulunggu.
¹¹Do alaloo bantile, “Tulisemo oila komu kinita, tukon kapatuwomo do bukudoo doi pitu kojemaat doiyamo: Efesus, Smilna, Pelgamus, Tiatila, Saldis, Filadelfia, tukon Laodekia.”

¹²Yaku mbaleng doi tonggulung sulano kukitayo indee doiya komo basilingan doi yaku. Maka yaku kitayo pitu koposi aino mo kinubai luwedei mosoni. ¹³Doi tanga-tangano do posidoo aiaino kokondong komeeng komian mo tokita buno banggapi. Yana mapake jubah kona bulusanan polong doi aino. Doi oyopo yana mapake potutup oyopo mosoni. ¹⁴Kona buuk moute buno domba buluno, moute buno kapos. Komatano auaungan buno bilat; ¹⁵koaino motontilang buno tambaga mo sinua. Koalalo buno paisu tuwong mokukuungan babasal. ¹⁶Kolimano bakalinga taaniyo kopitu kobituon pauno, tukon doi babano sumbot komeeng kobakoko mo mamangan molua komangano. Koduduso montootilang buno oloyo doi oloyo nasuunan. ¹⁷Salataa yaku kitayo, yaku sosuleengget doi salaano buno mian momate. Bai yana abese kolimano bakalinga doi yaku maka bantile, “Inai momatakut! Yakumo komo tumbeno tukon mo doibundu. ¹⁸Yakumo naiya komo tubo! Yaku matemo, bai kitayomo, yaku tubo sidutu-posidutukon. Yaku balakuasa doi matean, tukon doi dunia mian mate. ¹⁹Tobikon doiya, tulise kolangge-langge ikoo mo kitayo, doiyamo langge-langge komo daano budodoiya nia, tukon langge-langge komo naikon teali koidan. ²⁰Naiyamo kolaasia moluwedei pitu kobituon pauno ikoo mo kitayo doi limangu bakalingano, tukon luwedei pitu koposi aino mosonidoo: Pitu do bituonoo pauno doiyamo sasaibino komalaekat doi pitu kojemaat, tukon pitu do posidoo aino doiyamo pitudoo kojemaat.”

Teteba motuuk doi Efesus

2 “Doi malaekat doi jemaat Efesus, tulise buno naiya: Naiyamo koteteba moluwedei yana komo mataani pitu kobituon pauno doi limano bakalinga, tukon ampakon doi antala pitu koposi aino mosonidoo. ²Yaku toiyo oila komo komuyu kubaiyo: Komuyu balimang kokobukuan tukon komuyu sabal tuuno. Yaku toiyo baikon komuyu akipo mebee noa



Posi mosoni pitu koaino (2:1)

doi mian molokis. Tukon komian mo mangakukene kobutongo lasul bangokai bolikon, lapamo komuyu ujiyo, tukon komuyu laatemo baikon yanila kala-kala. ³Komuyu sabal tukon komuyu sakisaa sabab yaku, tukon komuyu aki namaloto konoamuyu. ⁴Bai naiya daku kabalatan motuuk doi komuyu: Komuyu akimo koidan poseseange yaku buno doi tumbeno. ⁵Tobikon doiya, poneneeke bulaando kona odoonan kopotuwongan! Pobadodolon doi polalim-lalim, tukon polakukene oila komo komuyu nailakukon doi tumbe. Kalu aki, maka yaku naikon lubat doikoo tukon bubute koaino komu posidoo doi natongusolan. ⁶Mau kai nadaano komeeng kolobo mo monondok doikoo, doiyamo: Komuyu mosikitene Nikolaus pololaingo nakokubai, yaku mo mosikitene koidan.

⁷Indee komiano moola molongol, siokai napalatikangene oila komo Mian Bisa Na Loh nabinantil doi jemaat-jemaat!

Yanila mo manaang, naikon yaku pataikene namakaan sao moluwedoi kayung tuboan mo tubo doi Mian Bisa naasi.”

Teteba motuuk doi Smilna

⁸“Doi malaekat doi jemaat Smilna, tulise bunu naiya: Naiyamo koteteba moluwedoi yana komo tumbe tukon mo doibundu – mo lapamo mate tukon tubo koidan. ⁹Yaku toiyo kopoo susa-susaan; yaku toiyo komuyu talalais – bai kona tutuuwan komuyu kaasa! Yaku toiyo koloobu-loobu komo inotuuk doi komuyu luwe mian mo mangakukene kobutongo Yahudi, bangokai bolikon; yanila daano setan namian! ¹⁰Inaikai matakut naikon kosakisaa mo akimo namalumbit koidan komuyu sio potoupiyo. Neneeke, Ibiliis naikon usekene kosoobos luwedoi komuyu doi talunggu lalomo sulano nasobayo komuyu. Komuyu naikon sakisaa songulo kooloyo kolumbito. Siokai komuyu potaat doi yaku polong pomatekon, maka yaku naikon beena doikoo tuboan mobisa tukon posidutukon salaku tambo manaangan.

¹¹Indee komiano momoola molongol, siokai napalatikangene oila ko Mian Bisa Na Loh nabinantil doi jemaat-jemaat!

Yanila mo manaang, tutuu aki naikon nasakisaa oioila doi matean koluano.”

Teteba motuuk doi Pelgamus

¹²“Doi malaekat jemaat doi Pelgamus, tulise bunu naiya: Naiyamo koteteba moluwedoi yana mo taaniyo sabel momangan molua konongano. ¹³Yaku toiyo iyaando kopoo dungolan, doiyamo doi Ibiliis nalipu nabatomundoan. Komuyu taat doi yaku. Maka salataa Antipas, daku sakisii mo satiadoo, inakate doi salaamuyu doi malkas Ibiliis, komuyu akipo manyangkal baikon komuyu mangangga doi yaku. ¹⁴Mau nabuno doiya daano komoimoiya kolangge komo yaku aki kusanaangene moluwedoi komuyu: Daano kosoobos komian doi antala komuyu komo loingiyo oila komo Bileam nainotunggukon. Bileam otunggule Balak bulaando kootuwongano ko Israel miano doi lalim lalomo; tukon oluuliyo yanila namakaan kinaan mo lapamo sinosubakon doi pilogot tukon lakukangganano kolangge-langge mo lokis. ¹⁵Bunomo lakon koidan daano doi antala komuyu mian-mian mo taamo sasaibino Nikolaus

poloolaingo naotunggul. ¹⁶Tobikon doiya, pobadodoloon doi polalim-lalim! Kalu aki, naapa koidan yaku naikon lubat doikoo tukon lobosiyo do mian-mianoo tukon sabel mo daano doi babanggu.

¹⁷Indee komiano moola molongol, tadukai napalatikanggene oila ko Mian Bisa Na Loh nabinantil doi jemaat-jemaat!

Yanila mo manaang, yaku naikon pataikene makaan manna mo tosookon, tukon suwe-suwele naikon mantalima doi yaku meeng kobatu moute. Doi batudoo totulis meeng kosambu mo boolu, mo aki natinoi mau indee miano koidan, sangalaasan luwedoi mian mo talimayomo.”

Teteba motuuk doi Tiatila

¹⁸“Doi malaekat jemaat Tiatila, tulisemo bunu naiya:

Naiyamo koteteba moluwedoi Mian Bisa Napau, komatano kolot-kolot bunu aung, tukon koaino nggilep-nggilep bunu tambaga mosinua. ¹⁹Yaku toiyoo sasaibino komo komuyu kubaiyo – yaku toiyoo komuyu seseangomo kotulamuyu, komuyu taat, komuyu balimang, tukon komuyu sabel mosakisaa. Yaku toiyoo komuyu budodoiya balimang lobian badaang tukon doi loolukon. ²⁰Bai naiya daku kabalatan motuuk doikoo: Komuyu mebee noa doi Izebel, molukodoo mo akuiyo kobutongo Mian Bisa sosumboliiyon. Badaang daku peleleani yanamo tipuwomo tukon mootunggule sulano namongkubai tukon sulano namakaan kinaan mo lapamo sinosubakon doi pilogot. ²¹Lapamo kubeena todanan doi yana sulano nabadodoloon doi nalalim-lalim, bai yana aki nayase tade molakukanggene kolangge-langge mo lokisoo. ²²Poneneeke! Yaku naikon tikakene yana polong masakit doi tampat mooloan. Idoe yana tukon mian-mian mo balolowa tukon yana naikon sakisaa tuuno. Sasaibino doiya naikon yaku lakukanggene budodoiya – alasene kalu yanila tade molakukanggene kolangge-langge mo lokis posinggat-singgat tukon yana. ²³Doi napololaing naikon yaku akateyo koidan sulano sasaibino kojemaat nasadaliyo baikon yakumo yana mo botukiyo kobanggapi napikilan tukon noano. Komuyu naikon yaku balase manulut pokokubai komuyu suwe-suwele.

²⁴Bai komuyu komo bai-bailong modaano doi Tiatila aki namololoi otunggul mo lokisoo, tukon aki palajalio koilimuu-ilmuu Ibiliis. Yaku bantile baikon yaku aki naikon kusuungiyo doikoo kotanggung mo motoong. ²⁵Bai polong doi tembo kulubatan naikon, siokai komuyu potataap loingiyo oila komo lapamo komuyu milikiyo. ²⁶⁻²⁷Yanila mo manaang, tukon komo polong doi napupusan banggadudul kubaiyo oila komo yaku mo yase, naikon kubeekene kuasa mo pokakana buno komo yaku talimayo luwedei Tamanggu. Yanila naikon mantalima kakuasaan luwedei yaku sulano mapalenta bangsa-bangsa tukon tongkat besi, tukon sulano momanase kobangsa-bangsadoo buno tabunan tano. ²⁸Yanila naikon mantalima bituon mandala moluwedei yaku.

²⁹Indee komiano komo moola molongol, tadukai napalati-kanggene oila ko Mian Bisa Na Loh nabinantil doi jemaat-jemaat!”

Teteba motuuk doi Saldis

3 “Doi malaekat modaano doi jemaat Saldis, tulise buno naiya: Naiyamo koteteba moluwedei yana mo daano kopitu koloh moluwedei Mian Bisa tukon kopitu do bituonoo pauno. Yaku toiyo oila kopoo kinubai. Kona binantilan komuyu tubo, banggokai komuyu mate. ²Tobikon doiya, pobanguno, tukon pokakabukuanggene oila komo daano doi komuyu moakiyoon doiya namate sasaibino. Sabab yaku laate baikon oila kopoo kinubai, akiyoon nadaano komeeng mo talakana doi Mian Bisa salaano. ³Jadi, poneneeke koidan oila komo lapamo inotunggukon doikoo buunia tukon oila komo lapamo komuyu lengele. Poambakonggene doiya tukon pobadodoloon doi polalim-lalim. Kalu komuyu akipo bangun, yaku naikon lubat doikoo buno pondikuk; tukon komuyu aki naikon potoiyo oila kotembono daku lubatan. ⁴Bai doi komuyu tanga-tanga doi Saldis daano koidan komian mo dagaiyo sulano kona pakean natataap bilisii. Yaniladoo ampakon polaing-laing yaku tukon bapake moute, sabab yanila pokokonoi tukon doiya. ⁵Doi yanila mo manaang, naikon pinekeikon kojubah moute. Yanila sambuno aki naikon kuapuse luwedei Buku Mian Tubo. Tukon

Tamanggu salaano tukon namalaekat-namalaekat yaku naikon akuiyo baikon yaniladoo daano koonggu.

⁶Indee komiano moola molongol, tadukai napalatikanggene oila ko Mian Bisa Na Loh nabinantil doi jemaat-jemaat!”

Teteba motuuk doi Filadelfia

⁷“Doi malaekat jemaat doi Filadelfia, tulise buno naiya:

Naiyamo koteteba moluwedoi yana mo moliyous tukon bisa. Yanamo kopataani Daud nakunci; kalu yana bukayo, akiyo komeeng komian momoola tutupe, tukon kalu yana tutupe, akiyo komeeng komian momoola bukayo. ⁸Yaku toiyo oila kopoo kinubai. Yaku toiyo baikon komuyu aki nabubulaa kopoo bukuanan; komuyu lapamo tulutio daku otunggul tukon taat doi yaku. Doi komuyu lapamo kubukakene komeeng kotataapon, mo aki namoola tinutup doi indee komiano koidan. ⁹Poneneeke naiya: Komian komo teali Ibiliis namianoo, pakala-kala komo akuiyo kobutongo Yahudi banggokai bolikon, naikon yaku kubaiyo sahingga yanila lubat totuuku doi salaamu. Tukon yanila naikon toiyo baikon yaku seseange ikoo. ¹⁰Tobikon sabab komuyu lapamo tulutio daku palenta sulano pokokoonggol, yaku kai naikon lindungiyo ikoo luwedoi tembo susaan naikon mo lupayo posaapon kodunia. Langgedoo doiya naikon teali sulano nasobaiyo sasaibino komian doi dunia. ¹¹Yaku mosobit lubat! Podagaiyo mono-monondok oila komo daanomo doi komuyu, sulano naakiyo komeeng komian kai moolayo kotambo mumanaangan. ¹²Mian mo manaang, naikon kutealikene silaku sudong doi ku Mian Bisa bonua lalomo moliyous, tukon yana naikon dungol doi tampatoo sidutu-posidutukon. Daku Mian Bisa sambuno, tukon ku Mian Bisa nakota sambuno – doiyamo Yelusalem boolu komo naikon bulus luwedoi sulugaa luwedoi ku Mian Bisa – naikon kutulise doi mianoo butongo. Tukon koidan kosambunggu mo boolu naikon kutulise doi butongo.

¹³Indee komiano komo moola molongol, tadukai napalati-kanggene oila ko Mian Bisa Na Loh nabinantil doi jemaat-jemaat!”

Teteba motuuk doi Laodekia

¹⁴“Doi malaekat jemaat Laodekia, tulisemo buno naiya:

Naiyamo koteteba moluwedoi Mo Bisa, sakisii mo taat tukon talakana, sasaibino kolangge naluwean luwedoi Mian Bisa komo tealikene. ¹⁵Yaku toiyo oila kopoo kinubai; yaku toiyo komuyu akipo memel tukon aki koidan pomoonas. Kona tutuuwan komuyu aladomeeng! ¹⁶Bai komuyu tolongo matalamas; moonas aki, memel aki. Doiyamo kosababpo yaku toluwekene komuyu tobuat luwedoi babanggu. ¹⁷Komuyu bantile, ‘Kami kaasa tukon lobian sukup; kami aki nakakulangan oioila.’ Bai komuyu aki potoiyo bulaando kotalalaisan tukon bulaando kona susaan komu ndondoong! Komuyu talalais, balalau, tukon piit. ¹⁸Tobikon doiya yaku otinauwo komuyu sulano pomongoli luwedoi yaku komosoni, doiyamo mosoni mo tulen, sulano komuyu poteali kaasa. Pomongoli koidan pakean moute luwedoi yaku sulano komuyu pobapake tukon potobukiyo kobutomuyu mo talalau tukon makubaiyo mammaa. Tukon pomongolimo koidan pakuli sulano nasinatiton doi matamu sulano komuyu moola mokita. ¹⁹Mian-mian komo kusineang, yanilamo kai daku nggimalan tukon kuninanal. Tobikon doiya, siokai komuyu posamangat, tukon badodoloon doi polalim-lalim. ²⁰Kitayo! Yaku kokondong doi tataapon salaano tukon tokiyo. Kalu daano komian mo lengele koalalonggu, tukon bukayo kotataapon, yaku naikon usok pososuung yana; yaku naikon kaan posinggat-singgat yana tukon yana kaan posinggat-singgat yaku. ²¹Yanila mo manaang, naikon kupataikene osulang doi kulusii pososinggat yaku, buno pokakana yaku susuunggu kai lapamo manaang tukon budodoiya yaku osulang pososinggat ko Tamanggu doi nakulusii.

²²Indee komiano momoola molongol, tadukai napalatikanggene oila ko Mian Bisa Na Loh nabinantil doi jemaat-jemaat!”

Sosubaan doi sulugaa

4 Sambuno lapa doiya yaku malaat pokita koidan. Yaku kitayo komeeng kotataapon tobuka doi sulugaa. Doibundu tololongol koidan komeeng koalalo doi tumbeno lapamo basilingan doi yaku pokakana kotolompot alalo. Do alaloo

bantile, “Mai liba naimbaa. Yaku naikon tudoikene doikoo oila naikon komo teali.” ²Banggadudul ko Mian Bisa Na Loh kuasaiyo yaku. Maka yaku kitayo doi sulugaa daano komeeng kokulusii, tukon daano komeeng komian moosulang doi kulusiidoo. ³Do mianoo duduso montotilang buno polmata baidulipandan tukon polmata delima. Meeng kotandalo walna zamlut tikume do kulusiidoo. ⁴Doi lalom kondodoongo do kulusiidoo moginagosi potikunggon daano kolua kolono sangkap kokulusii bailonggon. Idoosulang kolua kolono sangkap kokatua mo bapake moute, tukon momapake songgo mosoni. ⁵Luwedoi kulusiidoo tasabul kodidip laango monggilep tukon sumbot koguluk alalo mo palakuluk. Tukon doi kulusiidoo salaano daano kopitu koposi mo kolot; doiyamo pitu ko Mian Bisa Na Loh. ⁶Talaat koidan doi kulusiidoo salaano kolange meeng tokita buno tobun molino, bilisiih buno klistal.

Doi potikunggon do kulusiidoo, doi sasamba kolisuko, daano kosangkap komahluk, doi salaano tealikon tukon doi taalikon doi tonggulongo moonoo tukon matano. ⁷Mahluk mo tokita tumbe buno singa. Kokoluano, buno saapi langgilo. Kokotoluno daano koduduso buno banggapi duduso. Kokasangkapo, tokita buno tomisi lajawali mo bengga. ⁸Komahluk komo sangkap, suwe-suwele daano konoom kokapilo, tukon napotikunggonan tukon doi lalom taalikon moonoo tukon matano. Oloyo popook do mahluk-mahlukoo aki natade-tade kona mananian,

“Moliyous, moliyous, moliyouso ko Temeneno, Mian Bisa
 Mobabasal Konakuasa;
 mo daanomo, mo lapamo daano, tukon mo daano
 momeenggon.”

⁹Do mahlukoo mosangkap mananikene kolagu-lagu panggaal, pongodotii tukon syukuul doi yana mo osulang doi kulusiidoo, doiyamo yana mo tubo polong sidutu-posidutukon. Tukon doi tembo do mahluk-mahlukoo namananian, ¹⁰do katuadoo molua kolono sangkap sosuleengget doi mianoo mo osulang salaano doi kulusiidoo, maka sosubaiyo yana mo tubo sidutu-posidutukon. Doibundu yanila sakukene komai paisonggo-songgo doi kulusiidoo salaano maka nabantile,

¹¹ “Oh Temeneno, oh komai Mian Bisa!

Tongo ikoo komo moola mantalima panggaal, pongodotii
tukon kuasa.

Sabab ikoomo kopapasitaka sasaibino kolangge
tukon luwedoi mumongiasan koidan sasaibino do langgedoo
lapamo teali tukon tubo.”

Buku luluno tukon Domba Napau

5 Doibundu yaku kitayo komeeng kobuku luluno modaano
doi limano mo osulang doi kulusiidoo. Bukudoo moonoo
tukon tulisan doi sembeleng suwe-suwele tukon inobosi pitu
kosegel. ²Maka yaku kitayo komeeng komalaekat mo balani
mowookon tukon alalo mo babasal, “Indee komo moola
bendinge naiya segel-segelia tukon mobukayo naiya buku nia?”
³Bai mau doi sulugaa, mau doi dunia, kai doi dunia nia
suukano aki natalaat komeeng komian koidan mo moola bukayo
do bukudoo, tukon nakitayo kolalomo. ⁴Maka yaku kokiil
yodi-yodi sabab akiyo komeeng komian kai mo moola bukayo
doiya bukudoo, tukon nakitayo doi lalomo. ⁵Maka daano
komeeng komian moluwedoi katua-katuadoolila bantil doi yaku,
“Inai mokokiil! Kitayo! Kosinga moluwedoi Yehuda nabangsa
benseno, Daud natulunan mo babasal, manaango. Yana moola
bendinge dosegeloo mopitu tukon bukayo do bukudoo.”

⁶Doibundu yaku kitayo komeeng ko Domba Napau moko-
kondong doi tanga-tangano kulusiidoo tinikumi doi sangkap
komahluk tukon sasaibino do katuadoo. Do Dombadoo Napau
tokita buno lapamo tinembel. Yana daano kopitu kotanduko
tukon pitu komatano: doiyamo pitu koloh moluwedoi Mian Bisa
mo lapamo sinumbolii doi posaapon kodunia. ⁷Doibundu do
Dombadoo Pauno maju tukon alayo do bukudoo luluno doi
mianoo limano bakalingano mo daano osulang doi kulusiidoo.
⁸Daanoon Dombadoo Pauno mokubaiyo buno doiya, totukumo
kosangkap komahluk tukon domo lua kolono sangkap do
katuadoo doi salaano. Yanila suwe-suwele mataani kacapi tukon
manggo mosoni mo inontoki kemenyaan, doiyamo Mian Bisa
namian nasambeang-sambeangan. ⁹Yanila mananikene komeeng
kolagu mo boolu:

“Ikoo moola alayo do bukudoo

tukon bendinge kosegel-segello.

Sabab ikoo lapamo inakate, tukon doi mumatean,
kobanggapi doi sasaibino kobenseno, kosilingan tukon
bangsa lapamo ikoo oliyo tuuk doi Mian Bisa.

¹⁰ Ikoo lapamo tealikene yanila meeng kobangsa motangalaas
imam-imam,
sulano yanila naleleaniyo konda Mian Bisa,
tukon bapalenta doi dunia bungukono.”

¹¹ Doibundu yaku kitayo koidan. Yaku lengele komalaekat
alalo komo doi libu-libuso tukon doi juta-juta kona kadaang.
Yanila kokondong tikume dokulusiidoo tukon domahlukoo
mosangkap tukon sasaibino do katuadoo. ¹² Tukon yanila manani
tukon alaloila mo bukuan,

“Domba Pauno mo lapamo tinembeloo, moola namantalima
kuasa,
kokaasaan, kopandoiyan tukon bukuanan;
yana moola nainodotii, inakabasal tukon ngginaa-nggaal!”

¹³ Maka yaku lengele sasaibino komahluk doi timbu, doi dunia,
doi dunia suukano tukon doi tobun lalomo – kona palusan
sasaibino komahluk doi dunia nia – manani,

“Yana komo osulang doi kulusii, tukon Sang Domba
Paunodoo,
daano motanggaal tukon inodotii tukon babasal tukon
balakuasa polong sidutu-posidutukon!”

¹⁴ Maka do mahlukoo mosangkap timbiliyo, “Amin!” Tukon do
katua-katuadoo sosulengget tukon sosubaiyo.

Segel-segel

6 Sambuno lapa doiya yaku kitayo do Domba Paunodoo
bendinge do segeloo komeengo doi antala mopitudoo
kosegel. Maka yaku lengele komeeng doi antala mosangkap
komahlukoo bantil, “Maimo!” Koalaloo nabulunganan buno
duluk alalo. ² Maka yaku kitayo, maka tokita komeeng koadalan
moute. Komo lokitiyo mataani meeng kopanah batango, tukon
doi yanadoo binee meeng kosonggo. Yana maju buno meeng
kopemanaang mo ampakon lobuute kokamanaangan.

³Doibundu do Domba Paunodoo bendinge dosegelloo koluano, tukon yaku lengele domahlukoo koluano mo bantile, “Maimo!” ⁴Maka komeeng koadalan bailong tobuat koidan. Doiya adalanoo memela kobuluno. Kopolokitino binee kuasa sulano naapusangene kopookindokonan doi dunia bungukono, sulano kobanggapi moola mangakate. Maka yana binee meeng kobakoko mo babasal.

⁵Maka do Domba Paunodoo bendinge dosegelloo kotoluno. Tukon yaku lengele domahlukoo kotoluno mobantile, “Maimo!” Yaku kitayo, maka tokita komeeng koadalan momopook. Komo lokitiyo mataani meeng kopasang kotimbangan doi limano. ⁶Tukon yaku lengele kolangge meeng komo nalinongolan buno alal mo wookon doi mahlukoo mosangkap tanga-tangano. Do alaloo bantile, “Meeng kolitel kogandum monondok popaason tambo meeng kooloyo, tukon tolu kolitel kogandum kaliangano bailong popaason tambo meeng kooloyo koidan. Bai inai molusake kozaitun batango tukon anggul asino!”

⁷Doibundu do Domba Paunodoo bendinge dosegelloo kosangkappo. Tukon yaku lengele mahluk kosangkappo, bantile “Maimo!” ⁸Yaku kitayo, maka tokita meeng koadalan mo mbole. Kopolokitino kosambuno Maut. Doi tonggulungo yana linoolaing nggaup-nggaup doi Alam Maut. Kokakuasaan doi soobos sangkap kodunia nia sinalakanggon doi yanila, sulano yanila namoola mangakate luwedoi polobosian, lolo doi tembo malaalan, lolo doi panakit tukon lolo doi iyayon-iyayon mobalani.

⁹Lapa doiya do Domba Paunodoo bendinge kosegel kolimano. Maka yaku kitayo doi balabaan suukano daano ko mian-mian mo mate inakate uli-uliko sabab yanila mokobukuanggon teteba moluwedoi Mian Bisa luwedoi napoo basakisiian. ¹⁰Yanila nggeleamon tukon alalo mo babasal, “Oh Temeneno Mobalakuasa, mo moliyous tukon mobisa! Bulaando kona malumbitan koidan maka nasodo muadiliyo kobanggapi doi dunia tukon muukume yanila sabab yanila akateyomo kami?” ¹¹Yanila suwe-suwele binee meeng kojubah mo moute. Maka yanila sumboliiyo tade naapa koidan, tukon kalu polongo koaito doi tula-tulano mopomeenggon doi palajuangan tukon utus-utuso nila komo inaikon inakate buno yanila.

¹²Maka yaku kitayo do Domba Paunodoo bendinge kosegel konoomo. Potealikon koleali mo babasal. Kooloyo teali mopook buno toik mopook mo kasal, tukon kobituwon teali memela buno sau. ¹³Kobituon-bituon pauno otuwong luwedoi timbu doi buta bungkukono pokakana koala saono mo akiyoon namoyoo tuuno topupu doi batango doi tembo mbombuul mo makansang naunggotano. ¹⁴Kotimbu lapus buno kalataas linulun, tukon sasaibino kobungkuko maka togong tasaakon luwedoi natangabosan. ¹⁵Maka kotomundo-tomundo doi dunia, sasaibino kopembesaal, kotalenga-talenga, mian-mian mokaasa tukon mian-mian mobalakuasa, tukon mian-mian bailong, mau ata, mau kai mian mo bebas, sasaibino seekene kobutongo doi leleeng lalomo tukon batu-batu nggoango doi bungkuko. ¹⁶Doi bungkuko-bungkuko tukon do batu-batudoo, yanila nggeleamon, "Pisaiyomo kami! Seekenemo kai kami luwe napandangan yana mo osulang doi nakulusiidoo bungkukono napambaleng, tukon luwedoi do Domba Paunodoo nanggimalan! ¹⁷Oloyo lokis lapamo lubat, budodoiya yanila okumbeyo kona pai liitan, tukon akiyo komeeng komian kai moola bataanggon doi yanila salaano!"

Sakat sangkap kolono sangkap koloon komian moluwedoi Israei miano

7 Lapamo doiya, yaku kitayo kosangkap komalaekat mokokondong doi sangkap kodunia pasuno. Yanila taane kosangkap nalubatan kombombuul doi dunia sulano inai nadaano kombombuul mo puul doi buta tina kai doi tobun, kai doi kayung-kayung batango. ²Maka yaku kitayo komeeng komalaekat bailong motabuat luwedoi tolopot taalikon. Yana mababa segel moluwedoi Mian Bisa mo tubo. Tukon alalo mo babasal do malaekatoos uange kosangkap komalaekat mo lapamo malaat kuasa moluwedoi Mian Bisa sulano namanase kobuta tina tukon tobun. ³Malaekatoos bantile, "Inai looluk momanase kobuta tina kai tobun, kai kayung-kayung batango kalu kami akiyoon mai mebee paloosan segel doi moi Mian Bisa napeleleani-peleleani paaso." ⁴Maka yaku binontiikono baikon daano kosangkap sangkap kolono sangkap koloon kona kadaang

6:12: Ink. 11:13, 16:18, Yes. 13:10, Yo. 2:10, 31, 3:15, Mat. 24:29, Mlk. 13:24-25, Luk. 21:25

6:13-14: Yes. 34:4 6:14: Ink. 16:20 6:15: Yes. 2:19, 21 6:16: Hos. 10:8, Luk. 23:30

6:17: Yo. 2:11, Mal. 3:2 7:1: Yel. 49:36, Dan. 7:2, Zak. 6:5 7:3: Yehz. 9:4, 6

komian mo binee paloosan segel moluwedoi Mian Bisa doi yanila paaso. Dopai mian-mianoo inala doi songulo lua kobenseno ko Israel miano; ⁵memeeng kobenseno songulo lua koloon komian. Doiyamo moluwean doi bensen: Yehuda, Luben, Gat, ⁶Asyel, Naftali, Manase, Simeon, Lewi, Isakhal, ⁷⁻⁸Zebulon, Yusuf, tukon Benyamin.

Kobanggapi mo bolikon langge kona kadaang

⁹Lapa sambuno doiya yaku kitayo koidan, maka tokita kobanggapi mo madaang tuuno - akiyo komeeng komian kai moola aite kona kadaang. Yanila daano mian moluwedoi memeeng kobangsa, bensen, negala, tukon silingan. Tukon mapake jubah mo moute tukon koidan mataani kokayung palem panga-pangano doi limano, dopai mian badaangoo kokondong sasalaane do kulusiidoo tukon do Domba Paunodoo. ¹⁰Maka tukon alalo mo bukuan, yanila bantile, "Konda kasalamatan nalubatan luwedoi nda Mian Bisa, mo osulang doi nakulusii, bungkukono, tukon moluwedoi Domba Paunodoo!" ¹¹Sasaibino komalaekat kokondong boiligiyo do kulusiidoo tukon sasaibino kokatua tukon kosangkap do mahlukoo. Malaekat-malaekatoososuleengget doi kulusiidoo salaano maka nasosubaiyo ko Mian Bisa. ¹²Yanila bantile, "Amin! Tanggal konda Mian Bisa mo babasal tukon mapandoi. Yana pantas nabinee lobi-lobian koucapan-ucapan syukuul tukon doi pongodotii. Yana balakuasa tukon bukuan polong posidutukon! Amin."

¹³Daano komeeng komian moluwedoi katua-katuadoo mansadai doi yaku, "Mian-mian mo mapake jubah moute nia, indee miano yanila tukon inaando kona pai lubatan?"

¹⁴"Yaku aki kutoiyo, Tuan. Tuan susuungo komo toiyo," yaku timbiliyo.

Maka yana bantile doi yaku, "Naiyamo komian mo lapamo salamat luwe lounu pasakisaawan mo hebat. Yanila lapamo kumesiyo kona pai jubah tukon kubaiyo teali moute tukon sau doi Domba Paunodoo. ¹⁵Doiyamo kosababpo yanila mokokondong doi Mian Bisa nakulusii salaano, tukon sambeang doi yana oloyo popook doi Mian Bisa Nabonua lalomo. Tukon yana mo osulang doi kulusii bungkukonodoo naikon polaing tukon yanila sulano lindungiyo yanila. ¹⁶Yanila aki naikon

koidan namotoupi laal kai lou; kai oloyo matano namoonasan tuuno aki koidan nasuayo yanila, ¹⁷sabab do Domba Paunodoo mo osulang doi kulusiidoo tanga-tangano naikon teali pototooli yanila. Yana naikon loolainge yanila doi paisu matano mo mebee tuboan. Tukon ko Mian Bisa naikon itase sasaibino kopai matano paisuno luwedoi yanila matano.”

Segel kopituno

8 Salataa do Domba Paunodoo bendinge dosegeloo kopituno, sulugaa teali kiis uga-ugaate sembeleng kojama kona kalumbit. ²Maka yaku kitayo domalaekato mo pitu kokondong doi Mian Bisa salaano, tukon yanila binee pitu kotolompit.

³Meeng komalaekat bailong, mababa meeng kodupa mosoni, lubat tukon kokondong doi balabaan salaano. Doi yana binee badaang tuuno kokamangian sulano nainabos doi sasaibino ko Mian Bisa nasambeang-sambeang tukon sulano nasinosubakon doi balabaan mosonidoo mo tangabos doi kulusiidoo salaano. ⁴Posinggat-singgat tukon sasaibino ko Mian Bisa namian nasambeang-sambeang, kodupa tibolungo mo daano mokolotoo kobung liba doi malaekat mo kokondong limano doi Mian Bisa salaanodoo. ⁵Doibundu malaekato pulutemo do kamangiannoo, tukon totuiyomo bilat moluwedoi balabaanoo, maka nasakukene doi dunia bunggono. Maka kokuluk duluk-duluko tukon kodidip potadi-tadimo, tukon tealimo koleali.

Tolompit-tolompit

⁶Salataa doiya, pitu komalaekat mo mataani pitu kotolompitoo basa-basadiamo mopuuke.


⁷Malaekat komeengo puuke kona tolompit, maka koudan es tukon bilat moposombuli sau otuwong tukon makansang doi dunia bunggono. Soobos tolu kodunia kabus mosua, bonomo lakon kosoobos tolu kokayang-kayang, tukon samba-samba kobulung mo mandaba.

⁸Maka domalaekato koluanoo puuke kona tolompit, maka daano kolangge meeng mo babasal tuuno mo tokita bunoo bungkuo mo kolot-kolot mosinakukon doi tobun lalomo.

7:16: Yes. 49:10 7:17: Saad. 23:1, Yehz. 34:23, Saad. 23:2, Yes. 49:10, Yes. 25:8

8:3: And. 9:1, Tob. 30:1, 3 8:5: Masam. 16:12, Yehz. 10:2, Tob. 19:16, Ink. 11:19, 16:18

8:7: Tob. 9:23-25, Yehz. 38:22



Tolompet (8:7)

Soobos tolu kotobun tobolii teali sau, ⁹tukon matemo kai kosoobos tolu doi sasaibino komahluk doi tobun; bunomo lakon koidan manaso koidan kosoobos tolu kokapal-kapal.

¹⁰Doibundu malaekat kotoluno puuke kona tolompet, maka komeeng kobituon pauno mo babasal, mo kolot-kolot buno posi, tuwong lengget doi timbu, maka pisayo kosoobos tolu doi paisu-paisu tukon paisu-paisu matano. ¹¹(Kosambuno do bituonoo “Mosopot”.) Maka kosoobos tolu kopaisu teali mosopot, tukon momate badaang komian sabab monginum do paisudoo mo tealimo mosopot.

¹²Maka malaekat kosangkapo puukemo kona tolompet. Maka tongumbas kosoobos tolu kooloyo, soobos tolu kobituwon, tukon soobos tolu kobituon-bituon pauno maka lapus kai kosoobos tolu moluwedoi yanila nabukuanan laango. Koidan soobos tolu doi oloyo aki namadialan tukon bunomo koidan doi soobos tolu luwedoi popook.

¹³Maka yaku kitayo, tukon yaku lengele komeeng kotomisi lajawali mo daano mobenga tatandak doi dapang, bantile, “Silaka! Silaka! Silakamo kai sasaibino komian doi dunia kalu naikon tololongol kotolu komalaekat bailonggon mopuuke kona tolompet naikon.”

9 Maka malaekat kolimano puuke kona tolompet, tukon yaku kitayo komeeng kobituon pauno otuwong lengget doi dapang doi dunia bunggono. Bituon paunodoo binee motombing matean kuncino. ²Maka do bituon paunodoo

bukayo komotombing mateanoo maka sumbot kotibolung luwedoi lalomoo buno tibolung doi poolu mo babasal. Kooloyo matano maka dapang teali kalipookan luwe tibolung moluwedoi motombingoo. ³Maka luwedoi tibolungoo lalomo tobuato kobetek-betek mo obulus doi dunia. Do betek-betekoo binee kuasa mo pokakana buno komo bineekon doi mandasopit. ⁴Yanila pinantan momanase kobulung, kai kayung-kayung, kai langge-langge mosinakakon bai-bailonggon. Yanila tolongo moola lobosiyo komian mo akiyo kopaloosan segel doi paaso moluwedoi Mian Bisa. ⁵Do betek-betekoo aki napinataikon moakateyo dopai mian-mianoo, bai tolongo sakisaayo yanila lima kobituwon kona kalumbit. Masakitan mo sakisaa moluwedoi do betek-betekoo buno pokakana masakitan konakalumbit mandasopit nabakakatan. ⁶Doi lima kobituwon kolumbito, dopai mianoo kakaate sulano namate, bai yanila aki namoola mate; yanila yase momate, bai komatean odoon doi yanila.

⁷Kondondoongo do betekoo buno kaladai mo batotobo sulano namolobosi. Doi olunoila daano kolangge meeng mo tokita buno songgo mosoni. Koduduso yanila buno banggapi duduso. ⁸Yanila nabuuk buno boine nabuuk, tukon yanila ngolingo bunu singa ngolingo. ⁹Yanila oyopo tinutupi tukon meeng kolangge mo adukon bunu bokukum besi. Yanila kapilo alalo bunu meeng kotambuno babasal kokeleta-keleta kaladai alalo mo daano momolobosi doi polobosian lalomo. ¹⁰Yanila daano kopuuso tukon upason bunu mandasopit. Tukon doi puuso lalomoila doiyamo kona talaatan yanila nabukuan sulano nasakisaayo kobanggapi doi lima kobituwon kona kalumbit. ¹¹Yanila daano kona tomundo mo palentayo yanila, tukon do tomundodoo doiyamo malaekat mo moola tanggung jawape luwedoi motombing matean. Kosambuno doi silingan Iblani lalomo doiyamo Abadon; tukon doi silingan Yunani lalomo Apolion (koalatino "Pamanas").

¹²Kosilakaan tumbeno lapamo tinotonggulung. Nalapa doiya daano kolua kosilaka koidan komo sio nalubat.

¹³Doibundu malaekat konoomo puuke kona tolompet. Maka yaku lengele koalal molubat luwedoi sangkap kopasuno

dobalabaan mosonidoo mo tangabos doi Mian Bisa salaano. ¹⁴Do alaloo bantile doi malaekat konoomodoo, “Sodiiyomo kai kosangkap komalaekat komo tokooton doi Eflat Paisuno batango!” ¹⁵Kai sinodiimo do malaekatoos mosangkap. Yanila lapamo sinadiakon kusus doi jam, oloyo, bituwon tukon taum doiya sulano namangakate kosoobos tolu doi sasaibino kobanggapi. ¹⁶Yaku binontiikon baikon koaito kopasukan-pasukan momolokiti do adalanoo kona kadaang lua kosakato kojuta. ¹⁷Tukon doi pokita lalomo, yaku kitayo do adalan-adalanoo tukon polokiti-polokitino. Kopolokiti-polokitino mapake kalambi besi mo memela tuuno, manampal bunobatu nilam, tukon mokuni bolelang. Do adalan-adalanoo koolunobuno singa oluno, tukon doi babano tobuat kobilat, kotibolung, tukon bolelang. ¹⁸Soobos tolu kobanggapi tangakate luwedoi tolu do balaadoo; doiyamo bilat, tibolung, tukon bolelang mo tobuat doi adalan-adalanoo babano. ¹⁹Kona bukuanan do adalan-adalanoo talaat doi babano tukon koidan doi puuso. Kopai puuso-puuso bunobinda modaano kooluno. Tukon doi puusodoo, do adalan-adalanoo sakisaayo kobanggapi.

²⁰Bai kolabino kobanggapi mo aki natangakate luwe do bala-balaadoo aki koidan namongotinggal limanoila susuungo nakinubai. Yanila aki natade mososubaiyo koloh-loh lokis tukon sosubaiyo kopilogot-pilogot mosoni, suasa, tambaga, batu tukon kayung mo aki namoola mokita kai molongol, kai momoola ampakon. ²¹Yanila aki koidan naotinggale konapoo kokubai-kokubai mo lokis, doiyamo mangakatean, motoiyan-motoiyan mominasaingdinggon, balolowaan tukon pondikukan.

Malaekat tukon buku luluno mo poipoisik

10 Maka yaku kitayo komeeng komalaekat balani bailong obulus luwedoi sulugaa. Yana binungusi tukon bunong, tukon komeeng kotandalo mokaloyo kooluno. Koduduso montootilang bunobuno oloyo matano, tukon koainobuno aung sudongo. ²Doi limano daano komeeng kobuku pauno mo tobuka. Koaino bakalingano banggaulanggene doi tobun, tukon koaino bobo banggaulanggene doi buta tina. ³Maka yana nggeleamon tukon alalo mo babasal bunosinga-singamongangaton. Sambuno lapa do malaekatoos monggeleamon

kopitu koduluk timbiliyo tukon alalo mopaladuluk. ⁴Buno doiya kopitu do dulukoo mobasuala, yaku yase motulise, bai yaku lengele koalal moluwedoi sulugaa mobantile, “Lahasiakanggene oila do dulukoo mopitu nabinantil; inai motulise!”

⁵Maka malaekat yaku mo kitayo mobanggaulanggene koaino doi tobun tukon doi buta tinadoo tidekene kolimano bakalinga doi timbu. ⁶Yana batotopi tukon Mian Bisa sambuno mo tubo sidutu-posidutukon, mo pasitakayo kotimbu, dunia tukon tobun tukon sasaibino kolangge mo daano doi lalom. Do malaekatoobantile, “Kotembono akimo nabinuntus koidan! ⁷Bai kalu naikon domalaekatoomopitu puukemo kona tolompet, ko Mian Bisa laksanakanggenemo kona tetel linaasiakon, buno komo lapamo yana pelenggene doi napeleleani-peleleani, doiyamo sasaibino konabi.”

⁸Doibundu do alaloo mo lapamo yaku lengele moluwedoi sulugaadoo, basilingan koidan doi yaku. Yana bantile, “Ampakono mualayo do bukudoo luluno mo tobuka doi malaekatoolimano mo banggaulang doi tobun tukon doi buta tinadoo.”

⁹Maka yaku kai ampakono doi malaekatootukon yaku kabiyo sulano yana nabeekene doi yaku do buku lulunodoo mopoipoisik doi yaku. Yana bantile, “Alayomo tukon kaane naiya. Doi tiamu lalomo yana naikon teali mosopot, bai doi babamu lalomo yana maamis buno dokot.”

¹⁰Yaku alayo do bukudoo luluno poipoisikooluwedoi limano maka kukaane. Doi babanggu kotamiso buno dokot, bai sambuno yaku kuwete, doi tianggu lalomo yana teali mosopot. ¹¹Doibundu yaku pinalentakon, “Babilitakene koidan kobilita Mian Bisa tentang bangsa-bangsa, negala-negala, silingan-silingan, tukon tomundo-tomundo.”

Lua komian sakisii

11 Sambuno doiya yaku binee meeng kopatolo kayung mo buno meeng kobatang tongkat pongukul, maka pinalentakon, “Ampakono muukule ko Mian Bisa Nabonua tukon balabaan. Aitemo bulaa kona kadaang komian bakaleda doi lalomo. ²Bai inaikai moukule kobasaleano mo taalikon

tonggulung doi Mian Bisa Nabonuadoo, sabab do obosoo doiya lapamo sinalakanggon doi mian mo aki natingoniiyo ko Temeneno. Yanila naikon tudo-tudongiiyo kota mo moliyousoo sangkap kolono lua kobituwon kona kalumbit. ³Yaku naikon mosumbolii lua komian daku sakisii mo mapake pakean mandaungan, tukon yanila naikon umumkanggene ko Mian Bisa nabilita kolumbito soloon lua kosakato noom kolono kooloyo.”

⁴Lua do sakisiidoo doiyamo lua kozaitun batango tukon lua koposi aino mo tangabos doi Temeneno salaano papasitaka dunia. ⁵Kalu komian mosoba-sobayo kubaiyo kolangge mo aki namonondok motuuk doi yanila, maka luwedoi babanoila tobuat kai kobilat mo suayo kona musu-musu. Tukon kokubai mobuno doiya, sasaibino komian mo yase osokitiyo yanila naikon tangakate. ⁶Yanila daano kuasa sulano natutupe kotimbu sulano inai naolubatene koudan selama yanila daano moumumkanggene kobilita moluwedoi Mian Bisa. Yanila daano koidan kokuasa luwe sasaibino kopaisu matano, sulano moboliiyo kopaisu teali sau. Tukon yanila daano koidan kuasa sulano naumbase kodunia tukon sasaibino kobalaa kaliangano, kotembono yanila nayasano molakukanggene.

⁷Salataa yanila lapa babilitakanggene konapai bilita, iyayon mo tobuat luwedoi motombing matean naikon lawane yanila. ⁸Tukon yanila badano naikon tasabul doi kota babasal loloono babasal, doi naando konapo Temeneno nasinempanggonan. Kosambuno moinandekon do kotadoo doiyamo Sodom kai Mesil. ⁹Komian doi sasaibino konegala, suku, silingan tukon bangsa naikon kitayo yanila badano selama tolu sembeleng kooloyo, tukon aki napinataikon do badan-badanoo natinadin. ¹⁰Kodunia tumbuno naikon laba-laba luwe namatean kolua do sakisiidoo. Yanila naikon lamekene tukon pokopotuy hadia, sabab kolua komian do nabidoo olubatene badaang kosakisaawan doi sasaibino komian doi dunia. ¹¹Salataa tolu sembeleng kooloyo, lubato kai koansaang tuboan moluwedoi Mian Bisa tukon usok koidan doi lalomo kolua komian do nabidoo. Yanila tubo kokoidan sahingga sasaibino komian mo kitayo yanila teali matakut tuuno. ¹²Doibundu kolua komian do nabidoo lengele koalal mobabasal mo uange yanila luwedoi

sulugaa, “Maimo liba naimbaa!” Maka doi napo musu-musu matano salaano, yanila kai libamo doi sulugaa, tinombuki bunong. ¹³Maka doiya kosinggatoo tealimo kai koleali mo lokis. Tongobos songulo luwe do kotadoo manas, tukon pitu koloon komian momate sabab doiya lealidoo. Komian bailonggon teali matakut tuuno, maka yanila nggaale kona babasalan ko Mian Bisa doi sulugaa.

¹⁴Silakaan koluano lapamo lapa. Bai kitayo kai! Silakaan kotoluno naapa koidan naikon tuundu.

Tolompét kopituno

¹⁵Maka malaekat kopituno puuke kona tolompét, maka doi sulugaa tololongol koalalo-alalo mobabasal tuuno mo bantile, “Kokuasa tuuk mopalentayo kodunia budodoiya daano doi Temeneno limano tukon Tomundo Pasalamat komo dandikenemo. Yana naikon bapalenta tuuk sidutu-posidutukon!”

¹⁶Maka kolua kolono sangkap kokatua mo osulang doi yanila nakulusii doi Mian Bisa salaano, tootuku tukon sosubaiyo ko Mian Bisa. ¹⁷Yanila bantile,

“Temeneno, Mian Bisa Mobabasal Konakuasa,
mo daano, tukon mo lapamo daano!

Kami bakinatauwan doikoo sabab ikoo lapamo pakeyo komu
kuasa mo babasal,
tukon lapamo tambuun mapalenta!

¹⁸ Komian mo aki natingoniiyo ko Temeneno, nggimal
sabab laatemo kotembono ikoo mukumbeano komu
nggimalan,

tukon laatemo koidan kotembono ikoo mupalesaano komian
momate.

Naiyamo kotembono sulano mebee tambo doi
mupeleleani-peleleani, sasaibino konabi,

tukon sasaibino komu mian, doiyamo sasaibino komian mo
bakaleda doikoo

babasal mau kai poipoisik.

Naiyamo kotembono sulano naminanas ko mian-mian mo
manase kodunia!”

¹⁹Maka tobukamo ko Mian Bisa Nabonua doi sulugaa, tukon doi lalomo tokitamokai ko Peti Paladandian doi lalomo. Maka tealimo kai kodidip nopopondili tukon koduluk alalo mopaladuluk tukon tolindungan, tukon leali tukon udan es mo babasal.

Boine tukon binda

12 Maka tokita doi timbu komeeng kolangge mo sosibong tukon mominasaingdinggon. Meeng koboine mo pakeyo kooloyo matano salaku napakean, daano mokokondong doi bituwon bunggono. Doi oluno talaat komeeng songgo mo tongkokondong luwedo songulo lua kobituon pauno. ²Do boinedoo daano motianan, tukon tobikon laatemo kotembono sulano namosuung, maka yana wookon namasakitan.

³Maka tokita koidan doi timbu komeeng kolangge mo minasaingdinggon. Daano komeeng kobinda momemela mo babasal tuuno mo daano kopitu kooluno tukon songulo kotanduko. Doi meeng kotandukkodoo daano komeeng kosonggo. ⁴Tukon kopuuso yana unguwo kosoobos tolu luwedo bituon pauno doi timbu tukon sakukenemo doi dunia. Bindadoo kokondong doi boinedoo salaano mo yase mosuung tukon kona makisuut lemese kona pau, kalu yana sosuung. ⁵Maka do boinedoo mosuung meeng kopau mala-malaneno naikon mo palentayo sasaibino kobangsa tukon tonggat besi. Bai do paudoo linambas luwedo boinedoo, maka binaba doi Mian Bisa tukon doi kulusii salaano. ⁶Maka boinedoo obuleng doi padang gulun, doi lipu mo lapamo Mian Bisa sadiakene doi yana. Doi lipudoo yana naikon piniala sololoon lua kosakato noom kolono kooloyo kona kalumbit.

⁷Maka doi sulugaa teali kopolobosian. Mikhael polaing kona malaekat-malaekat molobosi molawane bindadoo. Tukon bindadoo kai, namalaekat-malaekat mo bomiiyo, lawane Mikhael. ⁸Bai do bindadoo linunggui. Yana tukon namalaekat-malaekat aki napinataikon koidan modungol doi sulugaa. ⁹Do bindadoo mo babasal sinakukon doi tongkulung! Yanamo do binda motuadoo mo sinombuikon Ibiliis, mo tipuwo sasaibino kobanggapi doi dunia. Yana sinakukon doi dunia tukon sasaibino kona malaekat.

¹⁰Maka yaku lengele alalo mo babasal doi sulugaa bantile, “Budodoiyamo kai kotembono ko Mian Bisa nasalamatanano kona mian! Budodoiya ko Mian Bisa otudoikene kona kuasa salaku Tomundo! Budodoiya ko Tomundo Pasalamat mo pinaladandikonoo koidan otudoikene kona kakuasaan! Sabab komo tuduwo koutus-utusonggita doi Mian Bisa salaano oloyo tukon popook, lapamo tinobuatonggon doi sulugaa. ¹¹Koutus-utusonggita lapamo lungguiyo yana tukon do Domba Paunodoo sauno, tukon koidan bilita bisa moluwedoi Mian Bisa komo yanila babilitakene. Yanila yase sosubakene kobutongo sampe mate. ¹²Sabab doiya, siokai kosulugaa tukon komo dungol doi lalom, laba-laba! Bai silaka kai kodunia tukon tobun, sabab ko Ibiliis lapamo obulus doikoo tukon nggimalan mo babasal tuuno, sabab yana toiyo baikon kotembono baino soisik koidan.”

¹³Salataa do bindadoo toiyo baikon yana molapamo sinakukon doi dunia, yana mulaimo mobuluke do boinedoo mo lapamo suunge dona pau malanenodoo. ¹⁴Bai do boinedoo binee lua kotomisi lajawali kapilo mo babasal sulano nabenga doi nadungolan doi padang gulun, iyaando yana naikon napinialaan tolu sembeleng kotaum kona kalumbit tongosodii luwedoi binda molobosiano. ¹⁵Maka do bindadoo supakene luwedoi babano badaang tuuno kopaisu taalikon doi boinedoo, sulano nalaline. ¹⁶Bai kodunia tomboniyo do boinedoo; kodunia bukayo kobabano tukon kuwete kopaisu mo sumbot doi bindadoo babano. ¹⁷Do bindadoo teali nggimal tuuno doi boinedoo, maka yana ambakon molobosio kokatulunan mo bailong moluwedoi boinedoo, doiyamo sasaibino komian mo taatiyo ko Mian Bisa napalenta-palenta, tukon mo beena kasaksian tentang Yesus tukon nakuasa. ¹⁸Maka do bindadoo kokondongo doi tobun bibilo.

Lua koiyayon

13 Doibundu yaku kitayo komeeng koiyayon motobuat luwedoi tobun lalomo. Yana daano songulo kotanduko tukon pitu kooluno. Doi sasamba kotanduko daano komeeng kosonggo, tukon doi sasamba kooluno totulis komeeng kosambu pototulai motuuk doi Mian Bisa. ²Iyayon yaku mo kitayodoo

buno macan tutul, tukon koaino buno beluang aino, tukon kongoolo buno singa ngoolo. Maka do bindadoo beekene konabukuanan susuungo doi iyayonoo, tukon konakulusii, tukon nakakuasaan mo babasal. ³Do iyayonoo oluno mopitu daano komeeng tokita buno pakol mobabasal tuuno, bai do pakoloo tangalino. Posaapon kodunia loingiyo do iyayonoo tukon noa masaingding. ⁴Tukon yanila sosubaiyo do bindadoo sabab yana lapamo beekene kona kakuasaan doi iyayonoo. Tukon yanila sosubamo doi iyayonoo koidan. Yanila bantile, “Akiyo komo pokakana doi iyayon nia! Akiyo komo moola polobosi molawane yana!”

⁵Do iyayonoo minoolakon mabantil langge-langge mo binangga-banggaalkon tuuno tukon totulaiyo ko Mian Bisa. Yana minoolakon namapalenta sangkap kolono lua kobituwon kona kalumbit. ⁶Maka yana tambuuno mototulaiyo ko Mian Bisa, tukon Mian Bisa sambuno. Bunomo lakon ko Mian Bisa nalipu dungolan, tukon sasaibino komo dungol doi sulugaa bai yana totulaiyo. ⁷Yana minoolakon koidan molawane ko Mian Bisa namian tukon lungguiyo yanila. Tukon kakuasaan luwedo sasaibino kobenseno, negala, silingan tukon bangsa bineekon doi yana. ⁸Do iyayonoo naikon sinosubai doi sasaibino komian mo tubo doi dunia, alaasene komian kosambuno molapamo totulis moakiyoon kodunia napinasitaka, doi mian motubo nabuku lalomo Domba Pauno koono mo lapamo tinembel.

⁹Tobikon doiya, kalu komuyu moola molongol, polengele naiya bilita nia: ¹⁰“Mian mo sio natinaan, pasti naikon tinaan. Tukon mian mo sio nainakate tukon bakoko, pasti inakate tukon bakoko. Doiyamo kosababpo ko Mian Bisa namian sio nasabal tukon taat.”

¹¹Maka yaku kitayo komeeng koyayon bailong motobuat doi buta sakean lalomo. Yana daano kolua kotanduko pokakana kodomba pauno tanduko. Koalalo buno binda alalo. ¹²Doi iyayon tumbenodoo salaano yana mapake kakuasaan mo babasal yana mo laate luwedo iyayonoo koidan. Posaapon kodunia tukon sasaibino komo dungol doi bunggono, pinakisaakon mososubaiyo do iyayon tumbenodoo, kona pakol mo babasal lapamo tangalin. ¹³Iyayon mo koluanodoo mekubai langge-

langge mominasaingdinggon mo babasal. Doi sasaibino komian salaano yana mongkubai bilat obulus luwedoi timbu otuwong doi dunia. ¹⁴Tukon sasaibino komian mo tubo doi dunia yana tipuwomo tukon nalangge-langge mominasaingdinggon yana mo kubaiyo doi iyayon tumbenodoo salaano. Tukon yanila sasaibino pinalentakono mokekendenge komeeng kotimbang moluwedoi iyayonoo mo lapamo pinokoli bakoko bai tataap tubo. ¹⁵Do iyayon koluanodoo minoolakon mebee ansaangan do timbalangoo, maka do timbalangoo moola basilingan tukon akateyo sasaibino komian mo aki nayase sosubaiyo yana. ¹⁶Sasaibino komian babasal tukon poipoisik, kaasa tukon talalais, ata tukon mian mobebas, do iyayonoo pakisaayo sulano namantalima paloosan doi limano bakalinganonila kai doi paasoila. ¹⁷Akiyo komeeng komian kai moola bangoli kai babalukon meeng kolangge, kalu doi yana akiyo do paloosanoo, doiyamo do iyayonoo sambuno susuungo, kai angka mo nyatakangene do sambunodoo.

¹⁸Naimbaa palaluu nadaano kopandoiyan. Mian mo pandoi moola naaite koalatio luwedoi angka iyayonoo, sabab do angkadoo daano kai meeng kobanggapi sambuno. Koangkano doiyamo 666.

Domba na Pau tukon namian

14 Doibundu yaku kitayo, maka tokita do Domba Paunodoo mokokondong doi Sion Bunggulo bunggono. Polaing yana daano ko 144.000 komian komo doi paaso suwe-suwele totulis kosambuno tukon Tamano sambuno. ²Maka yaku lengele koalalo moluwedoi timbu momuuk buno paisu otuwong mo babasal tukon buno duluk motolindungan modeikon lobo. Do alalodoo tololongol buno musik alalo moluwedoi pomaen-maen kasapi mo daano momaengene kona kasapi. ³Doi kulusii salaano tukon kosangkap komahluk tukon sasaibino kokatua doi potikunggon do kulusiidoo, 144.000 do mianoo mananikene doi meeng konanian mo soodo. Do nanianoo aki namoola inotunggukon doi meeng komian kai alaasene luwedoi 144.000 do mianoo mo lapamo binebaskanggon luwedoi dunia nia. ⁴Yaniladoo mian mo tataap bilisii buno mian moakiyoon naosowaan, sabab aki namongkubai pososuungan tukon boine.

Yanila loloiyo do Dombadoo Napau mau inaandomo kona ambakonan. Doi antala sasaibino kobanggapi, yanilamo kai komo lapamo binebaskanggon salaku pososubakon tumbeno doi Mian Bisa tukon doi Dombadoo Pauno. ⁵Yanila aki nasidutu kala-kala; tukon akiyo kopangasalakon mau nabaino soisik doi yanila.

Tolu komalaekat

⁶Maka yaku kitayo komeeng komalaekat bailong mo benga tatandak doi timbu. Do malaekatoo babayo kobilita tentang Bilita Monondok mo bisa sulano napinolonggon doi banggapi doi dunia doiyamo doi sasaibino kobangsa, bensen, silingan tukon negala. ⁷Do malaekatoo bantile tukon alalo mo babasal, “Pomatakutene ko Mian Bisa, tukon ponggaale kona babasalan! Sabab laatemo kotembono ko Mian Bisa napalesaano kobanggapi. Pososubaiyo yana mo tealikene kotimbu, buta, tobun tukon sasaibino kopaisu matano!”

⁸Malaekat koluano tunduwo komalaekat tumbeno maka bantile, “Lapamo tuwong! Kokota Babel mo babasal lapamo tuwong! Yana lapamo kubaiyo doi sasaibino kobangsa teali malangu tukon anggul paisuno - doiyamo anggul moluwedoi namoot molokis!”

⁹Meeng komalaekat kotoluno tunduwo do malaekatoo molua, maka bantile tukon alalo mo babasal, “Mian mo sosubaiyo do iyayonoo tukon timbalango, tukon mapake paloosan do iyayonoo doi paaso kai doi limano, ¹⁰doiya mianoo naikon monginum Mian Bisa naanggul, doiyamo anggul nanggimalan mo lapamo kundange galaas doi lalomo, aki namoola kinulangi mau nabaino soisik! Sasaibino do mianoo naikon sinakisaa doi bilat lalomo tukon belelang doi malaekat-malaekat momoliyous salaano tukon doi Domba Paunodoo salaano. ¹¹Tibolung moluwedoi bilat mo sakisaayo do mianoo naikon kobung banggadudul momeeng polong sidutu-posidutukon. Oloyo popook akiyo kona tade-tadean yanila tasakisaa, doiyamo yanila mo sosubaiyo do iyayonoo tukon timbalango, sasaibino komian mo mapake paloosan do iyayonoo sambuno.”

¹²Doi langge nia lalomo ko Mian Bisa namian mo taat doi Mian Bisa napalenta-palenta tukon taat doi Yesus, palaluu nateali sabal.

¹³Maka yaku lengele koalalo moluwedoi sulugaa bantile, “Tulisemo naiya: Mulai budodoiya, kinatauan doi mian mo matemo bai tau-tausono leleaniyo ko Temeneno!”

“Bisa!” Mian Bisa Na Loh timbiliyo. “Yanila naikon tade mobalimang babalat, sabab konapo hasil baleleanian sidutu naikon lolainge yanila.”

Dunia napinupuan

¹⁴Doibundu yaku kitayo, maka tokita komeeng kobunom mo moute. Doi bunomoo bunggono osulang komeeng komian mo tokita buno banggapi. Doi oluno daano komeeng kosonggo batomundoan mosoni, tukon doi limano daano komeeng kosabel mo mamangan. ¹⁵Doibundu komeeng komalaekat bailong motobuat luwedoi Mian Bisa Nabonua. Tukon alalo mo babasal, yana bantile doi yana mo osulang doi bunong bunggonodoo, “Aakenemo komu sabeloo tukon pupuiyomo budodoiya, sabab laatemo kotembo bapupuiyan; dunia moolamo tuuk napinupui!” ¹⁶Maka yana mo osulang doi bunong bunggonodoo aakenemo kona sabel doi dunia, maka kodunia pinupuimo.

¹⁷Doibundu yaku kitayo komeeng komalaekat bailong koidan tobuat luwedoi Mian Bisa Nabonua doi sulugaa. Mau yana mataani meeng kosabel mo mamangan.

¹⁸Lapa doiya, meeng komalaekat bailong, mo kuasaiyo kobilat, lubat luwedoi balabaan. Tukon alalo mo babasal yana bantil doi malaekat mo taaniyo do sabeloo mo mamangan, “Aakenemo komu sabelokon tukon talekemo koanggul-anggul saono doi dunia, sabab kosao-saono moyoomo!” ¹⁹Maka do malaekato aakenemo kona sabel doi dunia tukon taise koanggul-anggul saono doi batango, maka nasakukene doi pakakas popipis anggul nanggimalan ko Mian Bisa mo toku-tokumbe. ²⁰Do anggul-anggul saonodoo piniis doi kota tonggulungo, tukon luwedoi pakakas popiis do anggulo loma kosau buno paisu, kona odoonan tolu kosakato kokilo metel, tukon kona ateanan adukon lua kometel.

Malaekat tukon balaa napupusan

15 Doibundu yaku kitayo doi timbu komeeng kolangge mo sosibong tukon bolikon langge kona hebatan. Daano kopitu komalaekat tukon pitu kobalaa napupusan. Naiyamo kona kabusan ko Mian Bisa nakundangano kona nggimalan.

²Salataa lapa doiya yaku kitayo komeeng kolangge mo tokita bunu doi sulumiin lalomo posombuli tukon bilat. Yaku kitayo koidan komian mo lapamo manaang luwedoi iyayon tukon timbalango, tukon manaang luwedoi mian kosambuno mopino-loosanimu tukon angka. Komian mo manaangoo kokondong doi suluminoó bíbilo maka mataani kasapi komo bineekon luwedoi Mian Bisa doi yanila. ³Tukon yanila mananikene Musa nananian, Mian Bisa napeleleani, tukon Domba Napau nananian. Bunu naiya koalalo,

“Temeneno, Mian Bisa Mobabasal Konakuasa,
deikon lobo kona babasalan tukon kona
minasaingdinggonan komu kokubai-kokubai!

Tomundo sasaibino kobangsa,
bolikon langge kona adilan tukon nakanaan komu
tindakan-tindakan!

⁴Indee komiano komo aki namatakutene doikoo, Temeneno?
Indee komo aki nayase babilitakene komu babasalan?
Tolongo ikoo komo moliyous.

Sasaibino kobangsa naikon lubat sosubaiyo ikoo
sabab komu tindakan-tindakan mo adil
molapamo sasaibino komian kitayo.”

⁵Sambuno lapa doiya yaku kitayo ko Temeneno Nabonua doi sulugaa motobuka, tukon Temeneno na Sandung daano doi lalomo. ⁶Maka do malaekat mopitudoo tukon pitu do balaadoo tobuat luwedoi Mian Bisa Nabonua. Yanila napakean luwedoi toik lenan mo bilisii tukon nggilep-nggilep. Tukon yanila mapake pokukupi oyopo mo tokubai luwedoi mosoni. ⁷Doibundu daano komeeng moluwedoi sangkap komahlukoo beena doi pitu komalaekato pitu kogalaas mosoni mo moonu tukon Mian Bisa nanggimalan, – Mian Bisa mo tubo sidutu-posidutukon. ⁸Maka do Mian Bisa Nabonua moonu tukon tibolung luwedoi Mian Bisa nababasalan tukon nakuasa. Tukon

do balaadoo mopitu namalumbitan do malaekatoos mopitu nababaano akiyoon napupus, akiyo komeeng komian kai mo moola usok doi Mian Bisa Nabonua lalomo.

Mian Bisa nagalaas-galaas nggimalan

16 Maka yaku lengele koalalo mobabasal moluwedoi Mian Bisa Nabonua lalomo mobantil doi mopitu komalaekatoos, “Ampakono tukon kundangemo koantoko domo pitudoo kogalaas ko Mian Bisa nanggimalanoo doi dunia bunggono!”

²Malaekat komeengo ambakon tukon kundange kona galaas antoko doi dunia. Maka sumboto kobisul-bisul mo deikon langge tukon momasakit tuuno doi sasaibino komian mo daano paloosano do iyayonoo, tukon doi mian mo sosubaiyo kotimbalango.

³Sambuno lapa doiya malaekat koluano kundange kona galaas antoko doi tobun. Maka kopaisu doi tobun tabali bunoo mian mate sauno, tukon matemo sasaibino komahluk mo tubo doi tobun lalomo.

⁴Doibundu malaekat kotoluno kundange kona galaas antoko doi paisu-paisu batango tukon kopaisu-paisu matano, maka sasaibino kopaisuno teali sau. ⁵Yaku lengele komalaekat mo kuasaiyo kopaisu bantile, “Koukuman ikoo mo otuwengemo doiya adil, oh Moliyous, Mian Bisa mo daano, tukon mo lapamo daano! ⁶Yanila lapamo kundange kosauno ko Mian Bisa namian tukon nabi-nabi sauno; budodoiya ikoo kubaiyo yanila monginum sau. Takainomo pantas doiya natuuk doi yanila!”

⁷Maka yaku lengele koalalo moluwedoi balabaan mobantile, “Temeneno, Mian Bisa Mobabasal Konakuasa, bisa tukon adil kai koukuman-ukuman ikoo mo otuwenge!”

⁸Sambuno lapa doiya malaekat kosangkapo kundange kona galaas antoko doi oloyo matano, maka kooloyo matano kai minoolakon mokopupuliyo kobanggapi tukon onaso mo moonas tuuno. ⁹Kobanggapi kinopupuli tukon doi moonason tuuno, tukon yanila kutukemo ko Mian Bisa sambuno, mo kuasaiyo do balaa-balaadoo. Mau kai nabuno doiya, yanila aki nayase

badodoloon doi napolalim-lalim tukon aki nayase nggaale ko Mian Bisa nababasilan.

¹⁰Maka malaekat kolimano kundange kona galaas antoko luwedoi iyayonoo nakulusii. Maka sasaibino do iyayonoo nabatomundoan teali kalipookan, tukon kobanggapi kakate koalepo sabab namasakitan. ¹¹Maka yanila kutukemo ko Mian Bisa doi sulugaa sabab yanila masakito tukon sabab napo bisul-bisul. Bai yanila aki koidan nabadodoloon doi napokokubai-kokubai mo lokis.

¹²Sambuno lapa doiya malaekat konoomo kundange kona galaas antoko doi Paisu batango Eflat mo babasaloo. Maka do paisu batangodoo mooti maka kotomundo-tomundo moluwedoi tolopot moola moambakon tukon loloiyo. ¹³Maka yaku kitayo tolu koibiliis kondondoongo buno tupak. Suwe-suwele tupakoo tobuat luwedoi binda babano, luwedoi iyayon babano, tukon luwedoi nabi mokala-kala babano. ¹⁴Yanila daano kai ibiliis mo kubaiyo kolangge-langge mominasaingdinggon. Do lohdo motolu ampakon doi sasaibino kotomundo doi posaapon kodunia tukon pototongikene yanila sulano napo lobosi doi Oloyo mo babasal, doiyamo Oloyo moluwedoi Mian Bisa Mobabasal Konakuasa.

¹⁵“Polengele! Yaku lubat pokakana kopondikuk! Kinatauhan doi mian mo tataap batodanggon tukon modagaiyo kona pakean, sampe yanila aki naambakon tukon balalau tukon teali mammaa doi mian badaang matano!”

¹⁶Doibundu do loh-lohdo pototongikene do tomundo-tomundodoo doi meeng kolipu kalu silingan Iblani sinombuikon Halmagedon.

¹⁷Salataa lapa doiya malaekat kopituno kundange kona galaas antoko doi dapang. Maka tololongol kai koalalo mo babasal moluwedoi kulusii Mian Bisa Nabonua, mo bantile, “Lapamo lapa!” ¹⁸Maka tealimo kodidip mopopondili tukon duluk alalo mobulungan tukon tolindungan, tukon leali mo lokis. Aki nasidutu teali koleali mobuno doiya salataa kobanggapi natinealikonan. Naiyamo koleali mo lokis tuuno! ¹⁹Kota mo babasaloo mapasah teali tolu koobos, tukon manaso kai koidan kokota-kota sasaibino konegala doi dunia. Maka ko Mian Bisa

neneeke naikon ko Babel mo babasaloo. Maka ko Mian Bisa kubaiyo yana monginum anggul moluwedoi Mian Bisa naanggul galaaso - doiyamo anggul nanggimalan mo toku-kumbe. ²⁰Sasaibino kotogong lapus, tukon sasaibino kobungkuko lapus. ²¹Koudan es babasal, komo suwe-suwele kona babalatan lima kolono kokiloglam, otuwong luwedoi timbu tikale ko mian-mian. Maka yanila kutukiyomo ko Mian Bisa sabab balaa udan es mo lokisoo.

Pololowa mobabasal

17 Salataa lapa doiya daano komeeng komian moluwedoi malaekat mopitu mo taaniyo do galaasoo lubat doi yaku tukon bantile, “Mai, yaku naikon tudoikonggon doikoo bulaando do pololowadoo babasal naikon nainukuman; doiyamo do kota babasaloo mo kinokondong poloolanikon kopaisu-paisu batango. ²Kotomundo-tomundo doi dunia pololowai tukon yana, tukon kodunia tumbuno teali malangu sabab yanila monginum anggul nabalolowaan.”

³Maka ko Mian Bisa Na Loh kuasaiyo yaku, tukon do malaekatoobabayo yaku doi padang lalomo. Indaa yaku kitayo komeeng koboine moosulang doi meeng koiyayon bungguto kobuluno memela motuwa, tukon mo moonoo tulisan sambu-sambu pototulai motuuk doi Mian Bisa. Do iyayonoo daano kopitu kooluno tukon songulo kotanduko. ⁴Do boinedoo bakalambi kotambongo ungu tukon memela motuwa, tukon binubungai mosoni, pelmata-pelmata, tukon mutiala. Doi limano yana taaniyo komeeng komango mosoni mo moonoo tukon langge-langge molokis tukon momanggilit, hasil moluwedoi nabalolowaan. ⁵Doi paaso totulis komeeng kosambu koalatio lahasia. Do sambunodoo doiyamo, “Babel Mo Babasal, tina sasaibino komian mobalolowa tukon mian molokis doi dunia.” ⁶Maka yaku kitayo baikon do boinedoo malangu tukon Mian Bisa namian sauno tukon mian-mian mo inakate sauno sabab yanila taat doi Yesus.

Salataa yaku kitayo do boinedoo, yaku teali masaingding. ⁷Maka do malaekatoobantile doi yaku, “Oila kosababpo ikoo momasa-masaingding? Tadukai kubontiikonggon kolahasiano

do boinedoo tukon kolahasiano koiyayon yana mo lokitiyo, doiyamo iyayon mo daano pitu kooluno tukon songulo kotanduko. ⁸Do iyayonoo loolukon biasa tubo, bai budodoiya akimo natubo koidan. Yana naapa koidan naikon tobuat luwedoi motombing matean tukon naikon ampakon pakituuwo kosalalaan. Komian mo tubo doi dunia, kosambuno mo aki natotulis doi Buku Mian Tubo lalomo akiyoon kodunia natinealikon naikon masaingding kalu kitayo do iyayonoo. Sabab do iyayonoo loolukon biasa tubo. Budodoiya akimo natubo koidan, bai yana naikon sumbot koidan.

⁹Doi langge nia lalomo palaluu nadaano kopandoiyan tukon pangalatian. Kooluno mopitudo doiyamo pitu kobunggul bunggono; doiyamo bungkuko-bungkuko lipu do boinedoo naosulangan. Tukon pitudo kooluno koidan doiya kai pitu kotomundo: ¹⁰lima luwedoi yanila lapamo tuwong, komeeng daano mobapalenta, tukon komeeng koidan akiyoon nalubat. ¹¹Tukon iyayon komo loolukon biasa tubo, bai budodoiya akimo natubo koidan, doiya kai tomundo koaluno. Yana daano kai meeng komian moluwedoi tomundodoo mopitu koidan, komo budodoiya modaano ambakon tujuiyo kasilakaan.

¹²Songulo kotanduk komo ikoo kitayodoo doiyamo songulo kotomundo mo akiyoon natambuun mapalenta. Bai yanila naikon binee kuasa sulano namapalenta bunu tomundo polaing-laing tukon do iyayonoo meeng kojam konakalumbit. ¹³Kosongulo natomundo nia sasaibino daano kona tujuan mo pokakana; yanila sasaibino salakanggene kobukuanan tukon yanila nakakuasaan doi iyayonoo. ¹⁴Yanila naikon polobosi lawane do Domba Napaudoo. Bai do Domba Paunodoo tukon napololaing-lolaing mo satia mo lapamo uange tukon dona linilikkoo naikon lungguiyo do tomundo-tomundodoo, sabab yanamo ko Temeneno sasaibino kotuan, tukon Tomundo sasaibino kotomundo-tomundo.”

¹⁵Do malaekato bantile koidan, “Paisu ikoo mo kitayodoo, do pololowadoo nalipu osulangan, doiya kai bangsa-bangsa, layat-layat, negala-negala tukon silingan-silingan. ¹⁶Songulo kotanduko ikoo mo kitayo tukon do iyayonoo naikon mosikitene do pololowadoo. Yanila naikon lambase sasaibino kona polangge, tukon kubaiyo yana teali balalau. Yanila naikon kaane

kosailo tukon lopuwokabus tukon bilat. ¹⁷Sabab ko Mian Bisa lapamo piyeke konoanoila sulano naampakonggene ko Mian Bisa natetel. Ko Mian Bisa tealikene yanila napoomeenggon sulano nasalakangene yanila nakakuasaan doi iyayonoo, sulano do iyayonoo nabapalentaan polong nateali oila komo Mian Bisa nabinantil.

¹⁸Do boine ikoo mo kitayodoo doiyamo kota babasal, mo palentayo kotomundo-tomundo doi dunia.”

Babel natuwongan

18 Salataa lapa doiya yaku kitayo komeeng komalaekat bailong obulus lengget doi sulugaa. Yana daano kuasa mo babasal, tukon nakomuliaan mokubaiyo posaapon kodunia teali madialan. ²Tukon alalo mo babasal, yana bantil, “Lapamo tuwong! Babel babasal lapamo tuwong! Budodoiya yana tealimo ibiliis-ibiliis nadungolan. Doi lalomo tubo sasaibino kokaliangano kotomisi mo lokis tukon komo minosikiton doi mian. ³Sabab sasaibino kobangsa-bangsa lapamo monginum anggul namoot doi balolowaan. Kotomundo-tomundo doi dunia pololowaimo yana, tukon dagang-dagang doi dunia teali kaasa sabab namoot mo aki napoo moola kuasaiyo.”

⁴Maka yaku lengele komeeng koalalo bailong moluwedoi sulugaa mobantile,

“Potobuato kai daku mian! Potobuato kai luwedoi lalomo!

Inaimo kai komuyu pololoiyo kona lalim-lalim,

tukon tulut potanggunge kona ukuman!

⁵ Sabab kona lalim-lalim posusun-susun polong doi timbu, tukon ko Mian Bisa neneeke naikon kona kulokisan.

⁶ Polakukangene yana buno lakon kona lakukangganano komuyu;

pobalase yana lualuunggon paku doi sasaibino komo

lapamo yana lakukangene.

Poontokiyo kona manggo tukon suka mo lua lunggon paku

kona mosopotan doi suka mobiasa

mo sadiakene tuuk doi komuyu.

⁷ Beenamo doi yana sakisaa tukon susaan

mo pokakana kona kadaang tukon nababasilan tukon kona
kaasaan mo beekenemo doi butongo susuungo.

Sabab yana sidutu bantile kobutongo,

‘Yaku naiya tomundo mo bapalenta!

Yaku bolikon balu;

yaku aki naikon kumotoupi susaan!’


⁸ Tobikon doiya langgedoo, maka doi meeng kooloyo lalomo
tolong yana naikon linubotiimo sesel
– panakit, susaan, tukon malaalan.

Tukon yana naikon kinokopuli tukon bilat,

sabab ko Temeneno Mian Bisa mo bahikimidoo balakuasa.”

⁹Tomundo-tomundo dunia mo talalaing doi kokubai-kokubai
nabalolowaanoo lalomo tukon boinedoo namoot naikon
kokoliiyo tukon mandaungene do kotadoo kalu naikon yanila
kitayomo kotibolung mokobung luwedoi bilat mo okopuliyo
yana. ¹⁰Yanila naikon kokondong luwedoi odoonan sabab yanila
matakut nakanakon sakisaawanoo. Yanila bantile, “Aduh, bukan
maen kona silakaan kokota mo tololongol nia – kota Babel mo
bukuan! Doi meeng kojama lalomo tolong komu ukuman lapamo
linaksanakanggon!”

¹¹Sasaibino kodagang doi dunia kokiil tukon susa sabab
do boinedoo, sabab akiyono komeeng komian kai koidan mo
mongoli konapo balang-balang binadaganggon. ¹²Akiyono komo
mongoli mosoni, suasa, pelmata, tukon yanila namutiala; tukon
koidan toik lenan, toik ungu, sutala, tukon toik momemela
motuwa; sasaibino kaliangano kokayung komo akinduong
nalinaat, balang-balang moluwedoi gading, tukon moluwedoi
kayung mo maaling, doi tambaga, besi, tukon pualam; ¹³kayu
manis kulito, lamba-lamba, setanggi, mul tukon kemenyaan;
anggul tukon lisison, tepung maka gandum; saapi tukon domba,
kaladai tukon keleta, ata-ata, baikon mau banggapi naansaang.
¹⁴Sasaibino kopadagang bantile doi boinedoo, “Sasaibino ikoo
mo yase alayo doiya akiyono, tukon sasaibino komu kaasaan
tukon komu tambongan lapamo lapus. Ikoo aki naikon
mupososungene koidan!” ¹⁵Sasaibino padagang teali mokaasa
sabab badagang doi kotadoo naikon kokondong doi naodooan,
sabab yanila matakut nakanakon kosakisaawanno. Yanila naikon



Buat-buat mopinobonggitikon (18:11)

kokiil tukon susa, ¹⁶maka bantile, “Adoh, bukan maen kona silakaan kokota mo tololongol nia! Biasamo yana mapake toik lenan, toik ungu, tukon toik momemela motuwa; biasamo yana moonoo tukon pobubungai mosoni, pelmata tukon mutiala! ¹⁷Bai tolongo meeng kojama, lapus dona kaasaanoo!”

Sasaibino kokapiteeng kapal, kopenumpang, tukon mobalimang doi kapal, tukon sasaibino komian kona mangampalan doi tobun, kokondong doi naadoonan. ¹⁸Tukon nggeleamon salataa yanila kitayo kotibolong mokobung luwedoi bilatoo mo suayo do kotadoo. Yanila bantile, “Akiyo kota bailong buno kota babasal nia!” ¹⁹Maka yanila tiposiiyo abu doi olunoila buno meeng kopaloosan poloonan, maka kokiil tukon nggele-nggeleamon, “Adoh, bukan maen kona silakaan kokota mo babasal nia! Kona kaasaan lapamo kubaiyo sasaibino komian mo daano kona kapal-kapal doi tobun teali kaasa! Bai tolongo doi meeng kojama lalomo, yana lapamo pakkallapus kona langge-langge!”

²⁰Eh sulugaa, polabakenemo kai luwe kona manasan do kotadoo! Mian Bisa namian, lasul-lasul tukon nabi-nabi, polabababamo kai! Sabab ko Mian Bisa lapamo ukume yana buno meeng kopabaloso oila komo lapamo yanila lakukanggene motuuk doi komuyu!

²¹Sambuno lapa doiya, komeeng komalaekat mo bukuan bingkate komeeng kobatu - kona kabasal buno batu gilingan mo babasal - maka nasakukene doi tobun lalomo tukon bantile, "Bunomo kai naiya konakinubaiyan kokota Babel mo tololongolo naikon sinakukon tukon manas sampe aki naikon napinososunggon koidan. ²²Komusiik alalo moluwedoi pomaen kasapi, luwedoi sasaibino komomanani, luwedoi moba suling tukon luwedoi popuuk tolompot, aki naikon polengele koidan doilalom! Aki naikon napososunggene komeeng komian polimang moahli idoo, tukon koalalo dobatu pogilingokai aki naikon nalinongol koidan. ²³Komian aki naikon namokita lambu laango doi komuyu, tukon akimo koidan natololongol kona lamean kolamean basowaanan idoo. Komu padagang-padagang daano kai mian mo totingonii tuuno doi dunia, tukon koidan mumotoiyan-motoiyan mominasaingdinggon ikoo tipuwomo sasaibino kobangsa doi dunia!"

²⁴Babel inukum sabab doi kota lalomodoo lapamo linaat konabi-nabi sauno, Mian Bisa namian sauno - pokoknya sasaibino komian sauno mo lapamo inakate doi dunia bunggono.

19 Lapamo doiya yaku lengele kolangge meeng buno mian badaang alalo momuuk doi sulugaa mo bantil-bantil, "Ponggaale ko Mian Bisa! Konda Mian Bisa doiyamo Mian Bisa mo masalamaton; yana Mian Bisa mo babasal tukon balakuasa! ²Kona ukuman adil tukon pandoi! Yana lapamo otuwenge koukuman doi balolowa mo babasal, mo lusake kodunia tukon nabalolowaan. Ko Mian Bisa lapamo ukume do pololowadoo, sabab yana akateyomo ko Mian Bisa napeleleani-peleleani." ³Maka do mianoo badaang alalo koidan bantile, "Ponggaale ko Mian Bisa! Kotibolong moluwedoi bilat mo suayo do kota babasalo naikon kalikobungano akiyo kona tade-tadean!" ⁴Maka kolua kolono sangkap kokatua tukon kosangkap komahluk mo potikunggon doi kulusiidoo tootuku tukon

sosubaiyo ko Mian Bisa mo osulang doi nakulusii bunggono. Yanila bantile, “Amin! Ponggaale ko Mian Bisa!”

Lamean baasowaanan Domba Pauno

⁵Maka nalongol luwedoi kulusiidoo komeeng koalalo mo bantile, “Ponggaale ko Mian Bisa, eh sasaibino ko Mian Bisa peleleani-peleleani, tukon sasaibino komian – babasal poipoisik – mo sosubaiyo ko Mian Bisa!” ⁶Salataa lapa doiya yaku lengele kolangge meeng buno pokombulian mian mo badaang tuuno alalo; koalalo buno bokol mo pakapapuung tukon buno duluk motolindungan. Yaku lengele yanila bantile, “Ponggaale ko Mian Bisa! Sabab ko Temeneno, nda Mian Bisa Mobabasal Konakuasadoo budodoiya mapalentamo! ⁷Pomaimo nda laba-laba tukon tedes-tedes; pomaimo nda nggaale kona babasalan! Sabab lapamo polong kooloyo baasowaanan komo mataani totumai Domba Napaudoo, tukon kobabaabuno lapamo basadia sulano naninikakon. ⁸Pakean lenan mo dile-dilengan lapamo bineekon doi yana sulano napakeyo.” (Do pakean lenaano daano kai kokubai-kokubai momonondok mo linakukanggon doi Mian Bisa namian.)

⁹Maka do malaekatoos bantile doi yaku, “Tulisemo naiya, ‘Kinatauhan komian mo inundang doi lamean banikaan doi Domba Napaudoo.’” Doibundu do malaekatoos suungiyo kona bantilan koidan, “Naiyamo kobilita mokakana moluwedoi Mian Bisa.”

¹⁰Yaku sosuba doi malaekatoos salaano tukon sosubaiyo, bai yana bantile doi yaku, “Inai! Inai mososubaiyo yaku, bai sosubaiyomo kai ko Mian Bisa! Sabab mau yaku kai Mian Bisa napeleleani pokakana ikoo tukon bunomo sasaibino koutusomu mo bataani momoonggol doi Yesus nakasaksian!”

Sabab Yesus nakasaksian doiyamo kai komo okitaikene doi mian-mian mo tololonggol.

Polokiti kaladai moute

¹¹Doibundu yaku kitayo kosulugaa motobuka, maka tokita komeeng koadalan moute. Kopolokitino kosambuno Mo Taat tukon Mo Talakana. Yana adil moputusiyo koukuman tukon

doi polobosian lalomo komo lakukanggene. ¹²Komatano bunomo bilat kolot tukon doi oluno mapake badaang kosonggo batomundoan. Doi butongo totulis komeeng kosambu; tukon tolongo yana susuungo komo toiyo do sambudoo. ¹³Jubah napinake lapamo kemeke doi sau lalomo. Tukon yana kona binantilan, "Mian Bisa na Bantilan". ¹⁴Kosuludadu sulugaa loloiyo yana tukon molokiti kaladai-kaladai moute, tukon bapake toik lenan mo moute bilisii. ¹⁵Luwedoi babano tobuat komeeng kobakoko mo mamangan tukon dona bakokodoo yana naikon lungguiyo kobangsa-bangsa, tukon yana naikon palentayo yanila tukon tonggat besi. Yana piise koanggul doi pakakas bapiisan lalomo anggul nanggimalan ko Mian Bisa Mobabasal Konakuasa. ¹⁶Doi najubah tukon doi banano totulis nasambu nia, "Tomundo sasaibino kotomundo, tukon Temeneno sasaibino kotuan."

¹⁷Maka yaku kitayo komeeng komalaekat kokondong doi oloyo matano bungguto. Tukon alalo mo babasal yana bantile doi sasaibino kotomisi mo benga doi dapang, "Po maimo kai popototongi sulano nda molubotii lamean babasal Mian Bisa molamekene! ¹⁸Pomaimo kai nda makaan tomundo-tomundo sailo, talenga-talenga kapalano sailo, tukon talenga-talenga sailo; pomaimo nda makaan polokiti kaladai sailo tukon naadalan-adalan sailo, tukon sasaibino kobanggapi sailo, babasal tukon poipoisik, ata tukon mobilikon ata!"

¹⁹Doibundu yaku kitayo do iyayonoo, tukon tomundo-tomundo dunia tukon yanila nasuludadu-suludadu, pototongi sulano napolobosi lawane yana mo lokitiyo do adalanoo momoute tukon nasuludadu. ²⁰Maka do iyayonoo linakomo posinggat-singgat tukon nabi makala mo lapamo mongkubai langge-langge mominasaingdinggon doi iyayonoo salaano. (Tukon do langge-langgedoo mominasaingdinggon doiyamo kai do iyayonoo natipuwano komian mo daano do iyayonoo paloosano, tukon komian mo sosubaiyo do iyayon timbalango.) Maka do iyayonoo tukon do nabi kaladoo sinakukon tubo-tubo doi bilat babasal lalomo mo kolot-kolot tukon bolelang. ²¹Tukon yanila suludadu inakate tukon bakoko mo tobuat luwedoi babano do polokiti

kaladai moutedoo. Maka kotomisi-tomisi kai lubat tukon kaane tukon namodokoan yanila mo inakatedoo sailo.

Tentang tembo soloon kotaum

20 Salataa doiya yaku kitayo komeeng komalaekat moobulus luwedoi sulugaa. Doi limano yana mataani kunci motombing matean tukon meeng kolante poboboi mo babasal. ²Maka yana lakoyo do bindadoo, binda motuwa, - doiyamo Ibiliis - tukon unguwomo soloon kotaum kona kalumbit. ³Doibundu malaekatoosakukene bindadoo doi motombing matean lalomo, maka nakunciyo do motombingoo tukon nasegele, sulano do bindadoo naakimo namoola tipuwo kobangsa-bangsa kalu akiyoon napupus kolounu soloon kotaum. Lapamo doiya yana sio nasinodiimo doi tembo mo mosobit.

⁴Maka yaku kitayo kokulusii-kulusii, tukon komian mo osulang doi kulusii-kulusiidoo mobinee kuasa sulano naputusiyo koukuman. Yaku kitayo koidan komian mo lapamo pinatol kooluno uli-uliko sabab yanila mebee kasaksian tentang Yesus, tukon mobabilitakene koteteba moluwedoi Mian Bisa. Do mianmianoo aki nasosubaiyo koiyayon, mau kai timbalango. Yanila kai aki nabiasa mantalima do iyayonoo paloosano doi paaso kai doi limanoila. Maka yanila tubo koidan tukon mapalenta buno tomundo polaing Klistus soloon kotaum kona kalumbit. ⁵Naiyamo kokadadian tumbeno komian mate nainotuboiyan koidan. (Bai komian mate bailonggon aki nainotuboi koidan kona kalumbit soloon kotaum.) ⁶Kinatauwai kai komian mo talalaing inotuboi koidan doi kadadian tumbenodoo. Yanila moola nateali Mian Bisa namian. Komatean kadadian koluano aki nakuasaiyo yanila. Yanila naikon teali Mian Bisa naimam-imam tukon Klistus na mian-mian; tukon yanila naikon bapalenta polaing-laing yana soloon kotaum kona kalumbit.

Ibiliis linungguimo

⁷Sambuno lapa kabus koloounu soloon kotaumoo, ko Ibiliis naikon sinodiimo luwedoi natinalungguan, ⁸tukon yana naikon ampakon moakakene kobangsa-bangsa mo tebeaason doi posaapon kodunia, doiyamo Gog tukon Magog. Ibiliisoo pototongikene yanila sulano napolobosian, meeng koaito mo

babasal tuuno, kodaango pokakana kobone doi tobun. ⁹Maka yanila kai tebeasono doi posaapon kodunia, maka yanila lubotino molobosio ko Mian Bisa namian nabasandungan tukon kota Mian Bisa mo mamaasikene. Bai kobilat obulus luwedo timbu tukon akateyo yanila. ¹⁰Doibundu Ibiliis mo akakene doi yaniladoo, sinakukon doi bilat mobabasal lalomo tukon doi bolelang. Idoomo kai kona dungolan do iyayonoo tukon do nabi mokala-kaladoo sinakukon loolukon. Yanila naikon sinakisaa oloyo popook polong sidutu-posidutukon.

Ukuman napupusan

¹¹Sambuno lapa doiya yaku kitayo komeeng kokulusii moute mo babasal tukon yana mo osulang doi bunggono. Kotimbu tukon buta lapus luwedo salaano sampe aki natokita koidan. ¹²Tukon yaku kitayo komian mate, babasal poipoisik, kokondong doi kulusiidoo salaano. Maka binukamo kobuku-buku. Maka komeeng kobuku bailonggon binukamo, doiyamo Mian Tubo nabuku. Doibundu koukuman inotuwongikono luwedo mian mate, potimbongii tukon yanila nakokubai pokokonoi komo totulis doi buku-bukudoo lalomo. ¹³Maka kotobun salakangene komian mate komo daano doi lalomo. Maut tukon Alam Maut kai salakangene komian mate komo daano doi yana. Tukon komian momatedoo sasaibino inotuwongi ukuman mopopaason tukon yanila nakokubai. ¹⁴Doibundu Maut tukon Alam Maut sinakukon doi bilat babasal lalomo. (Bilat babasal lalomo nia doiyamo kadadian matean koluano.) ¹⁵Komian mo aki natotulis kosambuno doi Bukudoo Mian Tubo lalomo, sinakukon doi bilat babasal lalomo.

Timbu boolu tukon dunia boolu

21 Maka yaku kitayo kotimbu mo boolu tukon dunia mo boolu. Kotimbu tumbeno tukon dunia tumbeno kai lapuso, tukon kotobun lapuso. ²Maka yaku kitayo do kota moliyousoo, doiyamo Yelusalem mo boolu, obulus luwedo sulugaa luwedo Mian Bisa. Do kotadoo lapamo sinadiakon bunu meeng kobabaabu boine mobinunga-bungai sulano naposusuung tukon kobabaabu malane. ³Maka yaku lengele

koalal luwedoi kulusiidoo mobantile tukon babasal koalalo, “Budodoiya ko Mian Bisa nalipu nadungolan daanomokai posinggat-singgat kobanggapi! Yana naikon tubo tukon yanila, tukon yanila naikon teali namian. Ko Mian Bisa susuungo naikon polaing tukon yanila tukon teali yanila na Mian Bisa. ⁴Yana naikon soutiyo sasaibino komatano paisuno luwedoi matanoila. Komatean akiyono koidan; kosusaan, kokokiilan, kai komasakitan naikon akiyono koidan. Langge-langge mo malumbito lapamo lapus.”

⁵Maka yana mo osulang doi kulusiidoo bunggono bantile, “Budodoiya yaku kubaiyo sasaibino boolu!” Yana bantile koidan doi yaku, “Tulise kai naiya, sabab nabantil-bantilania bisa tukon moola inangga.” ⁶Maka yana bantile, “Lapamo lapa! Yakumo kai kotumbeno tukon kona pupusan, yakumo ko Temeneno luwedoi Tumbeno polong doi na Pupusan. Memeeng komian mo molou, naikon yaku beena monginum balang-balang luwedoi paisu batango mo beena tuboan. ⁷Komian mo manaang naikon mantalima do langge-langgedoo moluwedoi yaku. Yaku naikon teali na Mian Bisa, tukon yana teali kupau. ⁸Bai komian matakut komian moaki maangga, mian molokis, pangakate, mian balolowa, motoiyan lokis, mian mososubaiyo kopilogot, tukon sasaibino mokala-kala, naikon sinakukon doi bilat mobabasal lalomo tukon belelang mo kolot-kolot, doiyamo kadadian matean koluano.”

Yelusalem boolu

⁹Meeng luwedoi antala kopitu komalaekat mo lapamo mataani galaas-galaas mo moonoo tukon kopitu kobalaa napupusanoo lubat doi yaku maka bantile, “Mai! Yaku naikon tudoikonggon doikoo ko Babaabu, doiyamo Domba Napau naboloki.” ¹⁰Maka ko Mian Bisa Na Loh kuasaiyo yaku, tukon do malaekatoobabayo yaku doi bunggul bunggono mo tatandak tuuno. Yana tudoikene yaku ko Yelusalem, do kota moliyousoo, kotadoo obulus luwedoi sulugaa, luwedoi Mian Bisa, ¹¹tukon kakuasaan tukon Mian Bisa babasalan. Kotadoo montootilang bunobuno batu pelmata, pokakana kobatu baiduli pandan mo bilisii bunoklistal. ¹²Komeselo potikunggon tatandak babasal, tukon

songulo lua kotataapon mobabasal, tukon tinotooli songulo lua komalaekat. Doi natataapon-tataapon mobabasal totulis kosongulo lua kobenseno kobangsa Israel sambu-sambuno.

¹³Daano kotolu kotataapon mobabasal mo sasalaane doi samba kolipu; kotolu taalikon doi tolopot, kotolu taalikon doi lalom, kotolu taalikon doi lembet, tukon kotolu taalikon doi talise.

¹⁴Do kotadoo pagalo minesel kinokondong doi songulo lua kobatu. Doi batu-batu mimeseloo totulis do Domba Napaudoo napololaing mosongolu lua sambu-sambuno.

¹⁵Malaekat mo basilingan tukon yakudoo daano kona tongkat pongukul doi mosoni, sulano naukule do kotadoo, kotataapon-tataapono mobabasal tukon kopagalo momimesel. ¹⁶Do kotadoo kondondoongo poombong songgop - kokinobuluso pokakana tukon kobelano. Maka do malaekato ukule do kotadoo tukon natongkat pongukul; tokita kokinobuluso 2400 kokilo metel; kobelano tukon nakatandak pokakanamo kokinobuluso.

¹⁷Salataa do malaekato ukule kopagalo mimesel, tokita kona katandak do meseloo noom kolono kometel. Ukulan mo pinake doi malaekato doiyamo ukulan mo pinake doi banggapi. ¹⁸Komeselo do kotadoo kinubai luwedo batu baiduli pandan, sabeakai kokotano susuungo luwedo mosoni tulen, montotilang buno kaca. ¹⁹Do kotadoo batu-batumo momimesel binunga-bungai tukon sasaibino kobatu pelmata kokaliangano. Batu mimesel tumbeno kinubai luwedo batu baiduli pandan, kokoluano luwedo batu nilam, kokotoluno luwedo batu yakut, kokosangkapo luwedo batu zamlut, ²⁰kokolimano luwedo batu baiduli sepah, konoomo luwedo batu delima, kopituno luwedo batu latna cempaka, kowaluno luwedo batu pilus, kosiono luwedo batu topas, kosongulono luwedo batu klisoplas, kosongulono meeng luwedo batu lasualdi, tukon kosongulono lua luwedo batu kecubung. ²¹Kosongulono lua kotataapono babasal tongkokondong luwedo songulo lua komutiala, suwe-suwele kotataapon kinubai luwedo meeng komutiala. Loloon doi kotadoo kinubai luwedo mosoni tulen, montotilang buno kaca mo didilengan.

²²Yaku aki kukitayo ko Mian Bisa Nabonua doi kota lalomodoo, sabab ko Mian Bisa Nabonua do yanamo Temeneno susuungo, Mian Bisa Mobabasal Konakuasa, tukon Domba

Napaudoo. ²³Do kotadoo aki napalaluu kinonoi tukon oloyo panano kai bituwon laango, sabab ko Mian Bisa nababasilan talaangiyomo, tukon Domba Napaudoo doiyamo kopouloso. ²⁴Kobangsa-bangsa doi dunia naikon ambakon doi laango lalomo, tukon kotomundo-tomundo kai naikon babayo kona kaasaan doi kotadoo lalomo. ²⁵Do kotadoo tataapono tobuka samba-samba kooloyo tukon aki natinataapikon, sabab akiyo kopopook idoo. ²⁶Kona babasilan tukon nakaasaan kobangsa-bangsa naikon binaba doi kotadoo. ²⁷Bai komian mo kubaiyo kolangge-langge mo kulokis, kai mian mo kala-kala - kona palusan oila kolobo mo kulokis, takainomo aki naikon nausok doi lalomo. Komo naikon usok tongo kai mian mo totulis kosambuno doi Buku Mian Tuboan lalomo, Domba Paunodoo nabuku.

22 Do malaekato koidan tudoikene doi yaku kopaisu batango kopaisuno mo mebee tuboan. Do paisu batangodoo montotilang bunu klistal tukon lomba luwedo Mian Bisa nakulusii tukon Dombadoo Pauno, ²doi kotadoo loloono tanga-tangano. Doi paisu batangodoo doi suwe-suwele bibilo daano kokayung molubatene kotuboan, mo sao songulo lua luunggon sataum, doiyamo sobituon idan nasao. Koloono pinake sulano natangalinggene kobangsa-bangsa. ³Doi kotadoo lalomo aki natalaat komeeng kolobo mo kanakon Mian Bisa nakutuk.

Ko Mian Bisa tukon Domba Pauno nakulusii naikon daano doi kotadoo lalomo. Kona peleleani-peleleani naikon sosuba doi yana, ⁴tukon kitayo koduduso. Kosambuno naikon tinulis doi yanila paaso. ⁵Yanila akimo napalaluu posi kai oloyo matano laango, sabab kopopook akiyono, tukon ko Temeneno Mian Bisa susuungo naikon komo kadiyoloniyo yanila. Maka yanila naikon mapalenta pokakana kotomundo sidutu-posidutukon.

Yesus nalubatan

⁶Maka do malaekatoo bantile doi yaku, “Nabantil-bantilania bisa tukon moola inangga. Temeneno Mian Bisa komo beekene kona Loh doi nabi-nabi, lapamo utuse kona malaekat sulano natudoikene doi napeleleani-peleleani oila komo mosobit sio nateali.”

⁷“Palatikanggene naiya!” Yesus bantile, “Yaku naikon mosobito lubat. Kinatauan doi mian mo loingiyo kobantil-bantilan motinantukon doi buku nia lalomo!”

⁸Yaku, Yohanes, lapamo lengele tukon kitayo sasaibino naiya. Salataa yaku lapa lengele tukon kitayo yaku tootuku doi malaekat salaano mo lapamo otudoikene sasaibinodoo doi yaku, tukon yaku sosubaiyo yana, ⁹bai yana bantile doi yaku, “Inai! Inai mososubaiyo yaku! Sosubaiyo ko Mian Bisa! Sabab mau yaku kai peleleani pokakana ikoo, tukon buno koutus-utusomu sasaibino konabi tukon sasaibino komian mo loingiyo koteteba-teteba nai buku nia lalomo!” ¹⁰Maka yana bantile koidan, “Inaikai molaasiakanggene kobantil-bantilan motinantukon nai buku nia lalomo, sabab lapamo loolani kotembono sasaibino naiya naikon kona tealian. ¹¹Mian mo lokis, tadikenemo banggadudul namongkubai lokis; mian mo manggilit, tadikenemo nakanggilitiyo kobutongo; mian mo loingiyo ko Mian Bisa namongiasan, tadikenemo nabanggadudul loingiyo ko Mian Bisa namongiasan, tukon mian mo tubo tolono doi Mian Bisa, tadikenemo nabanggadudul tubo tolono tuuk doi Mian Bisa.”

¹²“Palatikanggene naiya”! Yesus bantile, “Akimo namalumbit yaku naikon lubat tukon babayo kotambo tuuk pabalos doi sasamba komian pokokonoi komo lapamo lakukanggene. ¹³Yakumo kotumbeno tukon kobunduno; yakumo ko Temeneno moluwedoi Tumbeno polong doi Napupusan.”

¹⁴Kinatauan doi mian mo kumesiyo kona jubah sahingga polong bilisii yanila minoolakon makaan kayung tuboan saono tukon usok doi kotadoo lalomo lolojiyo kona tataapon mobabasal. ¹⁵Bai komian mo kubaiyo kolobo-lobo mo lokis, mo mapake motoiyo mominasaingdingon, mian mo kubaiyo balolowaan, mo mangakate, mo sosubaiyo kopilogot, tukon mian mo kala-kala, mau doi bantil-bantilan mau kai tukon kokubai, sasaibino do mianoo kona dungolan doi kota tonggulungodoo.

¹⁶“Yaku, Yesus, lapamo kapatuwe daku malaekat doi komuyu sulano yana napailukene naiya lobo-lobo nia motuuk doi jemaat-

jemaat naponalaluu. Yaku nia Daud natulunan; yakumo do mandala mo madialanoo.”

¹⁷Ko Mian Bisa Na Loh tukon Babaabu Boine bantile, “Maimo!” Memeeng komian mo lengele naiya sio koidan nabantile, “Maimo!” Indee komo molou, siokai yana nalubat! Tukon ind ee komo yase, siokai mamangala tukon babalang do paisudoo mo mebee tuboan.

Potutupo

¹⁸Doi memeeng komian mo molongol bantil-bantilan motinantukon doi buku nia lalomo, yaku, Yohanes, beena poingotii nia: kalu mian suungiyo meeng kolobo doi bantil-bantilan nia motinantukon, maka ko Mian Bisa naikon suungiyo koukuman doi mianoo tukon balaa-balaa silakaan mo tinulis doi buku nia lalomo. ¹⁹Tukon kalu komian kulangiyo komeeng kolobo moluwedoi nabantil-bantilan motinantukon, maka ko Mian Bisa koidan naikon kulangiyo kona obos mo totulis doi buku nia lalomo – doiyamo obos moluwedoi kayung tuboan tukon moluwedoi kota momoliyousoo.

²⁰Yanamo komo pelengene sasaibino nabilita nia bantile, “Bisa, yaku naikon mosobito lubat!” Amin!

Lubato kai, oh Temeneno Yesus!

²¹Boliisi ko Temeneno Yesus nabeekene konabalakaat doi sasaibino ko Mian Bisa namian!